



श्री गणेशाय नमः
H. P. S.

252

CC-0. Mumukshu Bhawan Varanasi Collection. Digitized by eGangotri


भवन वेद वेदांग विद्यालय
ग्रन्थालय
 आगत क्रमांक... १४२९
 दिनांक.....



अभयदाता भगवान

॥ श्रीहरिः ॥

श्री भागवत चरित

[सप्ताह]

लेखक

श्री प्रभुदत्तजी ब्रह्मचारी

प्रकाशक

संकीर्तन भवन, प्रतिष्ठानपुर भूमी [प्रयाग]

तृतीय संस्करण } माद्रपद संवत् २०१७ वि० { मूल्य १।)
५००० } } सवा पाँच रुपया

प्रकाशक

व्यवस्थापक

संकीर्तन भवन

प्रतिष्ठानपुर (भूसी) प्रयाग

प्रथम संस्करण—मार्गशीर्ष सम्बत् २००७ वि० ३००० प्रतियाँ
द्वितीय संस्करण—फाल्गुन सम्बत् २००६ वि० ५००० प्रतियाँ
तृतीय संस्करण—भाद्रपद संवत् २०१७ वि० ५००० प्रतियाँ

पृष्ठ संख्या ६१८
भूमिका, विषय सूची, चित्र सूची २४
पूरी पुस्तक के पृष्ठ ६४२

0152.1NPR.1
KO

चित्र संख्या

तिरंगे चित्र ...	५	न्योछावर—
दुरंगे ,, ...	१	५१) सवा पाँच रुपये मात्र
इकरंगे ,, ...	३२	
सादे ,, ...	४२	
छोटे ,, ...	६०	
सम्पूर्ण पुस्तक में चित्र १४०		

मुद्रक	
❀ मुमुक्षु भवन वेद वेदाङ्ग पुस्तकालय भूसी	
प्रयाग	
आगत क्रमांक.....	2271
दिनांक.....	16/7/

॥ श्रीहरि ॥

प्राक्कथन

तव कथामृतं तप्तजीवनम् ।

कविभिरीडितं कल्मषापहम् ॥

श्रवणमङ्गलं श्रीमदाततम् ।

शुवि शृणन्ति ते भूरिदा जनाः ॥

आज इस 'भागवत चरित' महाग्रंथको प्रेमी पाठक पाठिकाओं के सम्मुख समुपस्थित करनेमें हमें बड़ा ही हर्ष हो रहा है। संकीर्तन भवनसे पद्यमें प्रकाशित यह सर्वप्रथम विशाल ग्रन्थ है। श्रीमहाराज जी जो 'भागवतीकथा' नामक ग्रन्थ लिख रहे हैं, जिसको १०८ खंडों में निकालनेका आयोजन है और जिसके ६८ खंड अब तक छपकर प्रकाशित भी हो चुके हैं। उसी दधि समुद्र रूपी ग्रंथको मथकर उसमें से घृत रूपसे यह निकाला गया है। कहना चाहिये भागवती कथा इन्हीं पद्योंका भाष्य है। भाष्य पहिले प्रकाशित हो गया। मूल ग्रंथ अब पीछेसे प्रकाशित किया जा रहा है। जिन्होंने भागवती कथा को पढ़ा होगा वे जानते होंगे कि उसके अध्यायके आदि अन्तमें एक एक छप्पय रहता है। अध्याय चाहे चार पृष्ठोंका हो अथवा ४० पृष्ठों का, आदि अन्तके दो छप्पयोंमें उसका सार आ जायगा। आप भागवती कथाके गद्य भागको छोड़कर केवल पद्यों ही पद्यों को पढ़ते जायें, पूरी कथासमझमें आ जायगी। बड़ी बड़ी कथायें कितनी चातुरीके साथ वर्णन की गयी हैं, उन्हें पढ़कर आश्चर्य होता है। एक कथा है, ब्रह्माजीसे रावणने अपनी मृत्युके सम्बन्धमें तब पूछा जब दशरथजी विवाह करने जा रहे थे। ब्रह्माजीसे यह सुनकर कि कौशल्याके गर्भसे उत्पन्न दशरथी राम मुझे

मारे'गे । वह दौड़ कर अवध आया । दूल्हा दशरथ नौकासे विवाह करने जा रहे थे । नौकाको डुबो दिया । कौशल्याजीको एक पेटीमें बंद करके एक तिमिगिल मत्स्यको दे गया । इधर किसी प्रकार दशरथजी भी वहीं बहते हुए पहुँच गये । दोनों का विवाह हो गया । कथा बहुत बड़ी है । भागवती कथाके २६ पृष्ठोंमें लिखी गयी है । उसका वर्णन इसी ग्रंथमें एक छप्पयमें सुनिये—

रावण जैसो शूरवीर बलको गरबीलौ ।

पुरुषारथ लखि व्यर्थ भयो चिन्तित अति ढीलौ ॥

दशरथ हौं बर बधू कुमरि कौशल्या वरिहैं ।

तिनिते होवे राम वही तोकूँ रन मरिहैं ॥

ब्रह्मदेवते सुनी यों, कुमर डुबाये कुमरि लै ।

लंका आयौ परि भयो, व्याह देखि खल कर मलै ॥

भारतीय सभ्यता और संस्कृति का पग पग पर ध्यान दिया गया है । इतने बड़े महाग्रंथमें कहीं भी भारतीय मर्यादाका उल्लंघन नहीं किया गया । उन मर्यादाओंका इतनी सरसतासे वर्णन किया गया है, कि पढ़ते पढ़ते हृदय फड़क उठता है । भाव गोपनमें इतना स्वारस्य आ गया है कि कुछ कहते ही नहीं बनता ।

बहुत दिनोंकी प्रतीक्षाके पश्चात् हस्तिनापुरसे श्यामसुन्दर द्वारका पधारे हैं । सभी माताये अत्यन्त उत्कंठित हैं और सोलह सहस्र एक सौ आठ रानियोंकी उत्कंठाका तो कहना ही क्या । भारतीय सभ्यताके अनुसार पहिले भगवान् माताओं के महलोंमें जाते हैं । चिरकालके पश्चात् अपने प्राणाधिक पुत्रको पाकर माताओंके हर्षका ठिकाना नहीं रहा । कुशल क्षेम पूछते पूछते ही बड़ी देर हो गयी । रानियोंकी उत्कंठा पराकाष्ठा को पहुँच चुकी थी, किन्तु सासोंके सम्मुख पतिके पास जाना मर्यादाके विरुद्ध

है। अतः वे ओटमें से छिपकर अपने हृदयधनके दर्शन करनेकी असफल चेष्टायें करने लगीं। खिड़की ऊँची थी। उचकनेसे पैरोंके कड़े छड़े भङ्कृत हो उठे। चूड़ियाँ बजने लगीं। इस खनखनाहट और झनझनाहटसे माँ देवका का ध्यान उधर गया। वे भी नारी थीं। नारी हृदयकी पीर समझती थीं। तुरन्त उठकर खड़ी हो गयीं और पुचकारता हुई बोलीं—“अच्छा, बेटा ! फिर बातें होंगी, तू थका होगा। जा भीतर, कपड़े बदल ले।” भीतर जाकर कपड़े बदलने का अर्थ क्या है इसे श्यामसुन्दर समझ गये और मुस्कराते हुए घर चले। अब देखिये, महलके भीतर भी भारतीय सभ्यताका कितना ध्यान रखा गया है। भारतीय सभ्यतामें किसीके भी सम्मुख पत्नी अपने पतिका स्पर्श नहीं कर सकती। किन्तु इतने दिनोंके पश्चात् पति आये हैं, उनका आलिंगन करना अत्यावश्यक है। अतः उन्होंने अपने छोटे बच्चोंको पतिकी गोदमें दे दिया। पतिने उनका मुख चूमा, प्यार किया, हृदयसे लगाया। फिर पत्नीको दे दिया। अब पत्नी ने उसका मुख चूमा, छातीसँ लगाया, मानों पतिका ही आलिंगन मिल गया। आलिंगन तो पतिका किया, किन्तु पुत्रको बीचमें डाल कर—मर्यादाके भीतर। कबिके शब्दोंमें इसी भावको पढ़िये—

सुनि नूपुरकी झनक चुरिनिकी खनक मनोहर।

माँ बोलीं—‘अब जाउ बस्त्र बदलो भीतर घर।

मन्द मन्द मुस्कात महलमें मोहन आये।

नारि निरखि नँदनन्द नयनतें नीर बहाये॥

मनतें मोहनतें मिलीं, नयन ओटतें चोट करि।

शिशु सौँप्यो पुनि लाइ उर, आलिंगन यों किये हरि॥

श्रीरामचरित मर्यादा चरित है और श्रीकृष्ण-लीला माधुरी रसमय चरित्र है। नौ अध्यायोंमें इसमें राम चरित्रका भी वर्णन है, उसमें पदपदपर मर्यादाका पालन किया गया है और कृष्ण चरित्रमें

तो रसका ऐसा प्रवाह बहाया है कि पढ़ते पढ़ते छप्पयमेंसे रसकी अविरल वर्षा सी होने लगती है। रास का वर्णन करते हुए कवि कहता है:—

ब्रज-युवतिनिके कंठ डारि कर नृत्यत नटवर ।

रुनुमुन नूपुर बजत भनक चुरियनिकी मनहर ॥

हिलत छीन कटि केश लोल लोचन अति चंचल ।

पीताम्बर सँग मिलत हिलत युवतिनिके अंचल ॥

पग पटकत कुंडल हिलत, मुख मटकत लचकत कमर ।

हिलत हार मुख मुख मिलत, करत गान इत उत भ्रमर ॥

इसी प्रकार मोहिनी भगवान्‌के वर्णनमें कविने सरसताकी सरिता बहा दी है। इतना सरस प्रसंग कितनी मर्यादा और विशुद्धता के साथ व्यक्त किया है, इसे पाठक ही विचारें। मोहिनी देवी के रूप का वर्णन करते हुए कवि कहता है:—

पग युग अटपट परत उदर कृश नमत निरंतर ।

कंदुक श्रमतैं श्वेद-बिन्दुयुत मुख अति सुन्दर ॥

अलकनि पलकनि और कपोलनिकी भलकनिपै ।

छटकि सरसता रही भामिनीके अंगनिपै ।

तिरछी चितवनितैं, लखै भूलि अपनपौ शिव गये ।

छाँड़ि शील संकोच सब, मृगनयनी सँग चलि दये ॥

इस सँकुचित स्थलमें किसी भी उपमा, यमक, अनुप्रास रस, रीति आदि का उदाहरण नहीं दिया जाता। उसका स्वारस्य तो पाठक इसके पाठसे प्राप्त कर सकेंगे। हमारी बहुत दिनसे इच्छा थी कि जिस प्रकार भाषामें पाठ करनेको रामायण है उसी प्रकार भागवत भी हो। भगवान्‌ने यह इच्छा पूर्ण की। इसमें साप्ताहिक पारायण पाक्षिक तथा मासिक सभीके स्थल विभक्त कर दिये हैं, जिससे पाठकोंको सुविधा हो। इतने बड़े ग्रन्थको इतनी सुन्दरता

और शीघ्रताके साथ हम कभी भी न निकाल सकते, यदि आर्ट प्रिंटर्स व लक्ष्मी फोटो इन्प्रोविज्ज कम्पनी इलाहाबादके स्वामी बाबू रामनाथजी अग्रवाल हमारे इस काममें हमारी सहायता न करते, उन्होंने जिस उत्साह और लगन के साथ निस्वार्थ भावसे हमारी यह सुन्दर पुस्तक मुद्रित की है उसके लिये हम आपके चिर ऋणी रहेंगे । श्रीमहाराजका कृपाप्रसाद तो उन्हें सपरिवार प्राप्त ही है । अन्तमें हमारी पाठकोंसे विनय है कि इस परम पुण्यमय पावन ग्रन्थका जितना वे प्रचार प्रसार कर सकें अवश्य करें । हमारा एक मात्र उद्देश्य भागवत चरितोंका प्रसार प्रचार करना है । लगभग एक सहस्र पृष्ठों की पुस्तक जिसमें चार रङ्गीन और इतने अधिक सादे चित्र हों, सुन्दर पक्की जिल्द बाजार में १५) से कम में नहीं मिल सकती । ५।) तो लागत भी नहीं । इतनी बड़ी पुस्तक दुबारा शीघ्र नहीं छप सकती । अतः पाठक मँगानेमें शीघ्रता करें । हम चाहते हैं घर घरमें इसका प्रसार हो, किंतु यह सब जनता जनार्दन की इच्छा के ही ऊपर निर्भर है । अन्त में अपने सभी कृपालु दयालु महानुभावोंका आभार प्रदर्शित करते हुये इसी ग्रंथ की एक छप्पय लिखकर हम अपने इस वक्तव्यको समाप्त करते हैं:—

अति ही निरमल चरित भागवत भक्तनिको धन ।

जामें ज्ञान विशुद्ध भक्ति भगवतको बरनन ॥

करम त्याग वैराग्य यथा थल सबई भाखे ।

अति समास सब कहे शेष कोई नहिं राखे ॥

श्रवन मनन अरु पाठ नित, करें प्रेमतें नारि नर ।

देहिं भक्ति अरु मुक्ति तिति, प्रभु परमेश्वर परावर ॥

प्रष्ठानपुर (भूमी)

संकीर्तन भवन

मार्ग० शु० ५—२००७

विनीत

व्यवस्थापक

॥ श्रीहरिः ॥

द्वितीय संस्करण की भूमिका

परम पिता परमात्मा की असीम अहैतुकी कृपा से आज हम 'भागवत चरित' के द्वितीय संस्करण को लेकर पाठक पाठिकाओं के सम्मुख प्रस्तुत होते हैं। इसका प्रथम संस्करण सम्बत् २००७ माघ मास में हुआ। प्रथम संस्करण हमने तीन सहस्र छपाया था। लगभग एक वर्ष में ही प्रायः सम्पूर्ण पुस्तकें समाप्त हो गयीं, किन्तु माँग बराबर आती ही रही। कुछ प्रतियाँ भेंट उपहार में चली गयीं। जो कुछ आय हुई वह "गो ब्राह्मण हिताय च" में समाप्त हो गयी, दूसरे संस्करण को प्रकाशित करने का कोई भी साधन नहीं रहा। किन्तु भगवान् अपने चरित्रों को प्रकाशित करते हैं तो जो उनके अपने आत्मीय व्यक्ति होते हैं उन्हें इसके लिये प्रेरित करते हैं। हम दूसरा संस्करण छापने को चिन्तित थे, तभी सिरमौर राज्य (नाहन) की राजमाता श्रीमदालसा देवी ने स्वयं तथा अपने परिवार के व्यक्तियों से (कृष्णा, पृथु, शिवा, मनु, राजवती तथा अन्यान्य कुटुम्बियोंसे) लेकर साढ़े तीन सहस्र रुपये भेजे। उन्हीं से छपाई कार्य आरम्भ हुआ। बीच में कुछ दिन कार्य रुका रहा, फिर एक दूसरी पूजनीया माँ जी की सहायता से कार्य आगे बढ़ा। इस प्रकार जैसे तैसे कुछ उधार सुधार करके यह पाँच सहस्र का दूसरा संस्करण छपा गया। इस कार्य में लगभग एक वर्ष लग गया।

हमें इस बात की बड़ी ही प्रसन्नता है कि 'भागवत चरित' को भगवत् प्रेमी पाठक पाठिकाओं ने बड़े ही प्रेम से अपनाया। सैकड़ों नरनारी निरहं नियम से इसका साप्ताहिक, पक्षिक तथा

मासिक पाठ करते हैं। बहुत से कथा-वाचक इसके आधार पर श्रीमद्भागवत सप्ताह वाँचते हैं, बहुत से गायक बाजे तबले पर इसकी कथा कहते हैं। इस प्रकार सभी श्रेणी के लोगों ने इसे अपनाया है। यह सब स्वतः ही भगवत् प्रेरणा द्वारा ही हुआ। हमारी ओरसे प्रचार प्रसार का कोई विशेष प्रयत्न नहीं किया गया।

“भागवत चरित” में श्रीमद्भागवत के बारहों स्कन्धों की सभी कथायें संक्षेप तथा विस्तार के सहित वर्णित हैं। अन्य पुराण शास्त्रों के भी प्रसङ्ग बीच-बीच में प्रसङ्गानुसार वर्णित हैं। इस प्रकार यह भाषा में भगवत् भक्तों के श्रवण पठन मनन तथा पारायण करने के निमित्त अपूर्व ग्रन्थ हो गया है। अब पाठक पाठकाओं से हमारा निवेदन है, कि इसका अधिक से अधिक प्रचार प्रसार करें। अपने सगे सम्बन्धी प्रेमी भाई बहिनों को इसके पठन-पाठन के लिये प्रेरित करें। जो सामर्थ्यावान् हों वे विद्यार्थियों को, असमर्थ निर्धन ब्रह्मणों को, पुस्तकालयों, विद्यालयों तथा ग्राम्य सभाओं को लेकर दान करें। पुस्तक-दान से बढ़कर संसार में दूसरा कोई दान नहीं।

इस संस्करण में चित्रों की संख्या और बढ़ा दी है। लगभग सब मिलाकर १०० चित्र हैं। प्रथम संस्करण में चार रंगीन चित्र थे, इन्हें पाँच कर दिये हैं। चित्रों के कारण पृष्ठ संख्या भी बढ़ गयी है फिर भी मूल्य में कोई वृद्धि नहीं की गयी। पिछले संस्करण की प्रूफ अशुद्धियों को भी शुद्ध किया गया है। नयी कोई अशुद्धियाँ रह गयीं हों उन्हें पाठक सुधार लें।

अन्त में पाठक पाठिकाओंसे हमारी यही विनय है कि इस ग्रन्थ को वे अपने हृदय का हार मानकर नित्य नियम से इसका पाठ करें, गायन करें, स्वयं गावें सबसे मिलकर गवावें। स्वयं तो

पढ़ें ही अन्य लोगों को भी पढ़कर सुनावें। यह भगवत् भक्तों का परम धन है, सर्वस्व है, इसके पाठ से इहलौकिक तथा पारलौकिक सभी प्रकार के कल्याण हो सकते हैं। जैसा कि इसके महात्म्य में वर्णित है,—

छप्पय—

प्रभु-प्रसाद यह चरित संत भक्तनिक्कू भावै ।
 कलि कराल विष-व्याल भागवत सुनि नसि जावै ॥
 सुधा अमृत रस सकल सरिस जाके कछु नाहीं ।
 जनम करम जगबन्ध सपदि सुनि के कटि जाहीं ॥
 देवनि शुककूँ सुधा-घट, दै बदले चाह्यो चरित ।
 सुरनि अनधिकारी समुक्ति, दयो न, है यह जग विदित ॥

व्यवस्थापक

तृतीय संस्करण की भूमिका

हमें अत्यंत ही हर्ष है कि धार्मिक जनता ने “भागवत चरित” को अपना लिया है। स्वल्प काल में ही ८ हजार के दो संस्करण इसके समाप्त हो गये, अब ५ हजार का यह तीसरा संस्करण छापा गया है। हमें आशा है, धर्मानुरागी नर नारी इसके प्रचार प्रसार में हमें पूर्ण सहयोग देकर परम पुण्य के भागी बनेंगे।

व्यवस्थापक

॥ श्रीहरिः ॥

श्री भागवंत चरित

[सप्ताह]

की

विषय-सूची

अथ प्रथमाह [१]

अध्याय	विषय	पृष्ठ संख्या
	प्राक्कथन	आरम्भ के
द्वितीय संस्करणकी भूमिका,	विषय-सूची, चित्र-सूची	२४ पृष्ठों में
	समर्पण	
१—शौनक सूत सम्वाद		१
२—ब्यास नारद सम्बान		७
३—भीष्म परलोक गमन		१६
४—भगवद् द्वारका प्रवेश		२२
५—परीक्षित् जन्मोत्कर्ष		२४
६—विदुर धृतराष्ट्र गृहत्याग		२७
७—पाण्डव स्वर्गारोहण		३१
८—परीक्षित् कलि-निग्रह		४०
९—परीक्षित्-शाप		४५
१०—शुक परीक्षित् मिलन		४८
११—शुक्राभिनन्दन		५०
१२—संक्षिप्त अवतार चरित्र		५२
१३—सृष्टि उत्पत्ति		५५

अध्याय	विषय	पृष्ठ
१४—	विदुर हस्तिनापुर त्याग	५८
१५—	विदुर-उद्धव सम्वाद	६१
१६—	सृष्टि वर्णन	६६
१७—	दिति गर्भ स्थापन	७३
१८—	जय विजय-शाप	७६
१९—	हिरण्याक्ष वध	८०

अथ द्वितीयाह [२]

१—	कर्दम देवहूति विवाह	८५
२—	कर्दम देवहूति विहार	८६
३—	कपिल चरित्र	९२
४—	मनुपुत्री वंश वर्णन	९६
५—	दक्ष शाप	१०४
६—	सतीदेह त्याग	१०६
७—	दक्ष यज्ञ पूर्ति	११४
८—	अधर्म वंश वर्णन	१२२
९—	ध्रुव वन गमन	१२५
१०—	ध्रुव नारायण दर्शन	१३०
११—	ध्रुव राज्य तिलक	१३५
१२—	ध्रुव वैकुण्ठ पदाधिरोहण	१४०
१३—	वेन चरित्र	१४६
१४—	पृथुराज्याभिषेक	१५१
१५—	पृथु-यज्ञ	१५६
१६—	पृथु-वैकुण्ठ गमन	१६१
१७—	प्रचेता चरित्र	१६५
१८—	पुरञ्जन पुरञ्जनी	१६६

अध्याय	विषय	पृष्ठ संख्या
१६—	पुरञ्जन मोक्ष	१७४
२०—	प्रचेता उपाख्यान	१७८
२१—	प्रियव्रत चरित	१८१
२२—	ऋषभ चरित	१८५

अथ तृतीयाह [३]

१—	भरत चरित	१८१
२—	जड़ भरत चरित	१८६
३—	संक्षिप्त भूगोल	२०४
४—	नरक वर्णन	२०६
५—	अजामिल चरित	२०८
६—	नाम संकीर्तन महिमा	२१४
७—	दक्ष नारद शाप	२२१
८—	दक्षसुता वंश वर्णन	२२७
९—	विश्वरूप सुरपुरोहित	२३०
१०—	विश्वरूप वध, वृत्रोत्पत्ति, दधीचि अस्थिप्रदान	२३७
११—	वृत्रचरित्र	२४६
१२—	चित्रकेतुचरित	२५२
१३—	वृत्रासुर पूर्व जन्म वृत्तान्त	२५६
१४—	मरुत चरित	२६६
१५—	हिरण्यकशिपु उपदेश	२७१
१६—	प्रह्लाद चरित	२७७
१७—	प्रह्लाद-असुर बालक सम्वाद	२८५
१८—	नृसिंह प्रादुर्भाव हिरण्यकशिपु वध	२८२
१९—	प्रह्लाद प्रसाद नृहरि तिरोभाव	२८६
२०—	धर्मराज नारद सम्वाद	३०२

अथ थतुर्थाह [४]

१—हरि अवतार गजग्राह मोक्ष	३०६
२—सुर विनय	३१२
३—समुद्र मन्थन	३१५
४—शङ्कर विषपान	३२०
५—रत्नोत्पत्ति	३२३
६—मोहिनी चरित	३२६
७—देवासुर संग्रम	३२८
८—शिव मोहिनी चरित	३३३
९—बलि विजय	३३६
१०—श्रीवामन प्रादुर्भाव	३४०
११—श्रीवामन याचन	३४३
१२—बलि शुक्राचार्यसम्वाद	३४७
१३—बलि बन्धन	३५१
१४—उपेन्द्रावतार	३५५
१५—मत्स्यावतार	३५८
१६—शिव क्रीड़ा	३६३
१७—सुद्युम्न चरित	३६५
१८—पृषधादि मनुपुत्र चरित्र	३६७
१९—ज्यवन सुकन्या चरित	३७४
२०—शर्याति नभग वंशवर्णन	३७७
२१—इक्ष्वाकुवंश वर्णन	३८६
२२—सौभरि ऋषि चरित	३८६
२३—त्रिशङ्कु हरिश्चन्द्रादि चरित	३८४
२४—श्रीगङ्गावतरण	३९७

अध्याय	विषय °	पृष्ठ संख्या
२५—	रघुवंशवर्णन	४०१
२६—	श्रीराघवेन्दुचरितमें बालचरित	४०५
२७—	विवाहचरित	४०८
२८—	वनचरित	४१५
२९—	सीताहरण चरित	४१९
३०—	सीता संयोग चरित	४२४
३१—	राज्याभिषेक चरित	४३७
३२—	सीता वियोग चरित	४४६
३३—	उत्तरचरित	४६१
३४—	महिमाचरित	४६४
३५—	निमि दण्डक चरित	४६९
३६—	चन्द्रवंश ऐल चरित	४५७
३७—	श्रीपरशुराम चरित	४८३
३८—	पुरूरवावंश वर्णन	४९१
३९—	ययाति चरित	४९७
४०—	पुरुवंश वर्णन	५०५
४१—	अनुवंश वर्णन	५२२
४२—	यदुवंश वर्णन	५२७

अथ पञ्चमाह [५]

१—	वसुदेव विवाह श्रीकृष्ण जन्मोपक्रम	५३३
२—	चतुर्भुज श्रीकृष्ण जन्म	५४०
३—	कंसचिन्ता	५४७
४—	तन्दोत्सव	५५२
५—	पूतनामोक्ष	५६६
६—	शकटादि मोक्ष विश्वरूपदर्शन	५७१

७—नामकरण, बाललीला मृदुमङ्गल	५७४
८—माखन चोरी दामोदर लीला	५७८
९—वृन्दावन आगमन वत्सादि उद्धार	५८९
१०—अघासुर उद्धार	५९५
११—ब्रह्ममोहनाश	५९९
१२—धेनुक मोक्ष कालियदमन	६०७
१३—दावानलपान प्रलम्बमोक्ष वेणुगीत	६१५
१४—वस्त्रापहरण विप्रपत्नी प्रसाद	६२१
१५—गोवर्धनधारण लीला	६२६
१६—इन्द्र सुरभि वरुण विजय	६३०
१७—रासोपक्रम	६३४
१८—श्रीकृष्ण अन्तर्धान	६४०
१९—रासेश्वरके पुनःदर्शन	६४७
२०—महारासलीला	६५२
२१—रासपञ्चाध्यायी समाप्ति	६५७
२२—अजगर शङ्खचूड़ अरिष्टोद्धार	६६२
२३—कंस चिन्ता केशी-उद्धार	६६८
२४—व्योमोद्धार-अक्रूरागमन	६७२
२५—मथुरा-गमन	६७६
२६—रजकोद्धार कुब्जानुग्रह	६८१
२७—कुवल-मल्ल कंसोद्धार	६८६
२८—ब्रजराजविदा, गुरुकुलवास मृतगुरुपुत्रानयन	६९२
२९—उद्धव-ब्रजगमन	६९७
३०—भ्रमर-गीत	७०२
३१—कुब्जा प्रसाद कुन्ती सान्त्वना	७०८

अध्याय	विषय	पृष्ठ संख्या
	अथ षष्ठाह [६]	

१—जरासन्धाक्रमण कालयवनोद्धार, द्वारावती निर्माण	७११
२—रुक्मिणी विवाह	७१७
३—प्रद्युम्नजन्म, स्यमन्तकोपाख्यान	७२३
४—भगवान्के अन्यान्य विवाह	७२६
५—प्रद्युम्नचरित-रुक्मिणी परिहास	७३६
६—हरिहरसमर, नृगोद्धार	७४२
७—बलदेव चरित	७४८
८—हरिगार्हस्थ दर्शन	७५२
९—जरासन्ध वध	७५४
१०—राजसूययज्ञ	७६०
११—शाल्वोद्धार-बलदेवतीर्थयात्रा	७६५
१२—सुदामाचरित	७७०
१३—कुरुक्षेत्रमें श्रीकृष्णब्रजवासियोंका सङ्ग्राम	७७४
१४—मातृपितृमैथिलानुग्रह	७७६
१५—वेदस्तुति हर भृगु अर्जुनानुग्रह	७८३
१६—महिषीगीत	७८९

अथ सप्ताह [७]

१—यदुकुल शाप नारद वसुदेव सम्वाद	७९७
२—नवयोगेश्वरोपदेश	८०२
३—नारद वसुदेव सम्वाद समाप्ति	८०५
४—अवधूत गीता	८१०
५—उद्धवगीता-हंसावतार कथा	८२६
६—भक्तियोग-ध्यान तथा सिद्धिवर्णन	८३३
७—विभूतियोग तथा वर्णाश्रमधर्मवर्णन	८३८

अध्याय	विषय	पृष्ठ संख्या
८—	विविध प्रश्नोत्तर	८४८
९—	भिन्नगीत-सांख्ययोग	८५७
१०—	ऐतगीत	८६५
११—	उद्धवगीता उग्रसंहार	८६९
१२—	यदुवंशविनाश-भगवत् निर्याण	८७५
१३—	कलियुगीनृपतियों का वर्णन	८७९
१४—	त्रसुधा, ब्रह्मोपदेश	८८६
१५—	परीक्षित निर्वाण	८९०
१६—	त्रेदोंकी शाखा, मार्कण्डेयचरित, पूजा, रविसप्तक	८९३
१७—	विषय अनुक्रमणिका	९००
१८—	सारातिसार सिद्धान्त, भगवन्नाम साहात्म्य	९०७

इति समाह

श्रीभागवत चरित माहात्म्य	९१३
श्रीभागवत चरितकी आरत्ती	९१८
इति विषम-सूची	

चित्रसूची

	रङ्गीन चित्र
१—	अभयदाता भगवान् (चित्रकार श्री जगन्नाथ जी मथुरा)
२—	श्रीनारदजी (" यू० के० मित्रा, प्रयाग)
३—	श्रीसीताराम (चित्रकार श्री जगन्नाथजी मथुरा)
४—	श्रीरास विहारी " यू० के० मित्रा प्रयाग)
५—	श्रीराधाजी ("पं० जगन्नाथ प्रसाद मुरलोधर, अहिवासीबंई)

२—दुरंगे चित्र

६—वंशीधर गोपाल (आवरण पर)

३—एकरंगे चित्र ३२

७—कलिकी शरणागति	४२
८—परीक्षित मुनि के कंठ में सर्प डाल रहे हैं	४३
९-१०—कुमारों को रोकना, हिरण्याक्ष हिरण्यकशिपुजन्म	७६, ८०
११-१२—पृथिवी उद्धार, शिवपार्वती	८०, ११६
१३-१४—नरक की कोल्हू यातना, दधीचिका अस्थिदान	२०६, २४२
१५—चित्रकेतु का शिवजी पर आरोप	२६३
१६—हिरण्यकशिपु-प्रह्लाद	२८०
१७—प्रह्लाद द्वारा रामनामोपदेश	२८५
१८—प्रह्लाद जननी को नारद जी द्वारा उपदेश	२८८
१९-२०—नृसिंह और हिरण्यकशिपु, हिरण्यकशिपु वध	२९३, २९४
२१-२२—ठगिनी मोहिनी, शिवजी और मोहिनी	३२७, ३३४
२३—हरिश्चन्द्रद्वारा शैब्या-रोहित बिक्री,	३९५
२४—गंगावतरण	३९९
२५—संकर्षण द्वारा हस्तिनापुर कर्षण	७५१
२६—भगवान का स्त्री रूप	७५३
२७-२८—शिशुपाल वध, सरोवर में दुर्योधन का गिरना	७६३
२९—सुदामा और उनकी पत्नी	७७०
३०—सुदामाजी के चावल	७७२
३१—कुरुक्षेत्र में यशोदा-रामकृष्ण मिलन	७७४
३२—गोपी-गोपों से विशाई	७७८
३३-३४—सुभद्राहरण; विष्णुजी पर भृगु पद-प्रहार	७८१, ७८८
३५-३६—श्रीकृष्ण पत्नियों का प्रलाप; भक्त की दशा	७९१, ८०३

३७—नरनारायण के तप में अप्सराओं का विघ्न	८०६
३८—कलिकाल में भगवन्नाम-कीर्तन	८०८

४—सादे चित्र ४२

३९—श्री विष्णु का शौनकादिकों को चक्र देना	४
४०—नैमिषारण्य में सूत जी के पिता, शौनकादि और बलदेव	६
४१-४२—नृसिंह भगवान् और प्रह्लाद; समुद्र मन्थन	२९५ ३१८
४३—समुन्द्र मन्थन	३३२
४४—पिता-धुत्र के युद्ध को मुनि मना कर रहे हैं	३७०
४५-४६—विशालाका तप; सुकन्या ने च्यवन ऋषि के आँखों में काटा चुभो दिया	३७१ ३७४
४७—बलदाऊ द्वारा रेवताका ठिगना बनाना	३७८
४८—अम्बरीष की नई रानी की भक्ति	३८०
४९—सौभरि ऋषि का मान्धाता कन्याओं से विवाह	३९०
५०—समुन्द्र की श्री रामकी प्रार्थना व भेंट	४२८
५१-५२—भरत मिलाप; श्रीराम का राज्याभिषेक	४४० ४४३
५३—लवकुश द्वारा हनुमान-जाम्बवान का बन्धन	४५४
५४—सीता जी का भू प्रवेश	४५९
५५-५६—सीताजी की उत्पत्ति; जह्न ऋषि का गंगापान	४७१, ४८३
५७-५८—मदालसा का ब्रह्मोपदेश' कच और देवयानी	४९३, ४९७
५९-६०—भरत का सिंहों से खेल, रन्तिदेव का अन्न दान	५०८, ५११
६१—भीष्म-प्रतिज्ञा	५१६
६२—वसुदेव देवकी की चतुर्भुज हरि की प्रार्थना	५४४
६३—वसुदेव का शिशु कृष्ण को लेकर यमुनापारजाना	५४७
६४—कंस को आकाश वाणी	५५०

६५—गोपियों का कृष्ण जन्मोत्सव	५६१
६६—पूतना का पय पिलाना	५६८
६७—कृष्ण का माखन दूध के लिये माता से हठ	५८१
६८—अप्सराओं के साथ धनद सुत का जलविहार	५८६
६९—ब्रह्मस्तुति	६०३
७०—सुदामा माली का भगवान् को माला पहनाना	६८२
७१-७२—सैरन्ध्री और श्रीकृष्ण; कुबलयापीड-मृत्यु	६८४, ६८७
७३-७४—कंसोद्धार, रुक्मिणी विवाह	६८१, ७२०
७५-७६—जाम्बवती के साथ श्रीकृष्ण; कालिन्दी तप	७२५, ७२६
७७—सोलह सहस्र कन्याओं के साथ विवाह	८३३
७८—मायावती के साथ प्रद्युम्न	७३७
७९-८०—नारदजी को तुलादान; नृगोद्धार	७४०, ७४६
५—छोटे ब्लाक	६०

भागवतचरित की—परायण सूची

१—साप्ताहिक विश्राम स्थान

				पृष्ठ
१—प्रथम	दिवस	का	विश्राम	८४
२—द्वितीय	"		"	१६०
३—तृतीय	"		"	३०५
४—चतुर्थ	"		"	५३२
५—पंचम	"		"	७१०
६—षष्ठम	"		"	७६६
७—सप्तम	"		"	८१२

२—मासिक पारायणके विश्राम स्थान

१—पहले	दिन	का	विश्राम	५९
२—दूसरे	"	का	"	७९
३—तीसरे	"		"	११३
४—चौथे	"		"	१७३
५—पाँचवें	"		"	२०५
६—छठवें	"		"	२२८
७—सातवें	"		"	३१४
८—आठवें	"		"	३६३
९—नवें दिन	"		"	५५१
१०—दसवें	"		"	६२९
११—ग्यारहवें	"		"	७१०
१२—बारहवें	"		"	७६०
१३—तेरहवें	"		"	८०१
१४—चौदहवें	"		"	८६४
१५—पन्द्रहवें	"		"	९१२

३—पाक्षिक पारायण के विश्राम स्थान

१—पहले	दिन	का	विश्राम	२३
२—दूसरे	"		"	४९
३—तीसरे	"		"	५७
४—चौथे	"		"	७२
५—पाँचवें	"		"	९१
६—छठवें	"		"	९५

	दिन	का	विश्राम	
७—सातवें	"		"	१४५
८—आठवें	"		"	१६४
९—नवें	"		"	१८१
१०—दसवें	"		"	२०३
११—ग्यारहवें	"		"	२०८
१२—बारहवें	"		"	२५१
१३—तेरहवें	"		"	२८४
१४—चौदहवें	"		"	३०५
१५—पन्द्रहवें	"		"	३३५
१६—सोलहवें	"		"	३६२
१७—सत्रहवें	"		"	४७४
१८—अठारहवें	"		"	५३२
१९—उन्नीसवें	"		"	५९४
२०—बीसवें	"		"	६२०
२१—इक्कीसवें	"		"	६६१
२२—बाईसवें	"		"	६९६
२३—तेईसवें	"		"	७२८
२४—चौबीसवें	"		"	७५३
२५—पच्चीसवें	"		"	७६९
२६—छब्बीसवें	"		"	७९६
२७—सत्ताईसवें	"		"	८३२
२८—अट्ठाईसवें	"		"	८६८
२९—उन्तीसवें	"		"	८८९
३०—तीसवें	"		"	९१२

समर्पण

अपने श्याम के प्रति

छप्पय

(१)

नेक ठहरि जा श्याम ! बात इक सुनि जा मेरी ।
दौर्यौ जावै कहाँ दीठि चंचल अति तेरी ॥
ब्रजमें मच्यो चवाउ बात फैली घर घरमें ।
कीरति रानी लली घँसी है तेरे उरमें ॥
निज नयननि निरख्यो न कछू, सुन्यो सुनायौ ई कह्यो ।
गोरी भोरी छोहरी—को चैरो तू बनि गयो ॥

(२)

चंचलताकूँ त्यागि बात मेरी सुनि नटवर ।
तेरो लिख्यो चरित्र सूततें सुनिकें सुखकर ॥
लिखवायौ सो लिख्यो करूँ अब काकूँ अरपन ।
है तेरी ही वस्तु करूँ पुनि तोइ समरपन ॥
अरे, बबाके लाड़िले, मोइ सनाथ बनाइ जा ।
पुण्य मागवत चरितकूँ, परसि तनिक सुस्काइ जा ॥

संकीर्तन-भवन
प्रतिष्ठानपुर (प्रयाग)
मार्गशीर्ष शु० २—२००७ विक्रमी

} तेरा ही कोई
प्रभुदत्त

श्रीहरिः

श्रीवृन्दावनविहारिणे नमः

अथ

श्री भागवत-चरित

[सप्ताह]

अथ प्रथमाह

प्रथमोऽध्यायः

[१]

मङ्गलाचरण

श्लोक

नारायणं नमस्कृत्य नरं चैव नरोत्तमम् ।
देवीं सरस्वतीं व्यासं ततो जयमुदीरयेत् ॥

छप्पय

श्रीनारायण विमल विशालापुरी निवासी ।
नर नारायण ऋषी तपस्वो अज-अविनासी ॥
माता वीणापाणि सरसुती वाणी देवी ।
कियो वेदको व्यास परासरसुत गिरिसेवी ॥
घरि सिर सबके पादकी, पावन पुण्य पराग अति ।
भनूँ भागवत भव्ब भव-भयहर भाषा यथामति ॥

तीरथराज प्रयाग याग कमलासन कीन्हें ।
 अक्षयवट-वर विटप मनोवांछित फल दीन्हें ॥
 गंगा यमुना रत्नीं मिलीं मन मोद बढ़ायो ।
 सोमेश्वरने जहाँ सोमको शाप छुड़ायो ॥
 वैष्णोमाधव वसैं वर, बारह वेष बनायकैं ।
 वन्दन करि विनती करें, चरन कमल सिर नायकैं ॥
 व्यासतनय वासिष्ठ विश्व वैराग्यवान् अति ।
 कृष्ण नाम मधु-मधुर मधुप मदमत्त महामति ॥
 भक्ति भागवत भनी पार भव सिन्धु कियो है ।
 कलि कलमष करि दूर दिव्य आलोक दियो है ॥
 परमहंस शुकदेव वर, सुन्दर सुखकर नाम है ।
 तिनिके पद पाथोजमहैं, श्रद्धा सहित प्रनाम है ॥

इति मंगलाचरण

कथारम्भ

सुरसरि उत्तर ओर त्रिवैनी पार मनोहर ।
 प्रतिष्ठानपुर यज्ञ तीर्थ झूसी अति सुन्दर ॥
 मनीराम मम शिष्य चपल चंचल अज्ञानी ।
 ताहीके प्रति सुधा सरिस रस-कथा बखानी ॥
 दैहिक दैविक मानसिक, चाहिं होहि भवकी व्यथा ।
 सब रोगनिकी एक है, ओषधि भागवती कथा ॥
 नैमिषार सुखसार हार भूको है भारी ।
 सहस्र अठासी शौनकादि ऋषि जहैं व्रतधारी ॥
 सहस्र सालको सत्र रच्यो मुनि सूतहु आये ।
 सब इतिहास पुरान अठारह गाइ सुनाये ॥
 किन्तु भागवत मधुर अति, सब शास्त्रनिको सार है ।
 पढ़त सुनत गावत गुनत, होत जगत् उद्धार है ॥

कहूँ परे कुश कहूँ कमण्डलु जलके सोहैं ।
 मत्त मृगनिके मुण्ड मुनिनिके मनकूँ मोहैं ॥
 समिधा वल्कल चीर मूल फल फूल सुहावैं ।
 भई भीर सुर असुर नाग किन्नर नर आवैं ॥
 यज्ञभूमि पावन परम, सब विधि सुखद शरण्य है ।
 शौनकादि सुखतैं बसहिं, नाम नैमिषारण्य है ॥

पृथिवीपति पृथुराज आदि भूके भूपाला ।
 विषम भूमि सम करी रचे पुर नगर विशाला ॥
 मागध सूत बनाय बहुत विधि बिनती कीन्हों ।
 दये देश द्वै मुनिनि वृत्ति वाचक करि दीन्हों ॥
 क्षत्रिय पितु माँ ब्राह्मणी, संकरतातैं सूत हैं ।
 उग्रश्रवा अति विमल मति, कथा कहनतैं पूत हैं ॥

सोरठा—कही कथा कमनीय, शौनकादितैं सूतजी ।
 हर्षित होवै हीय, भव-भय-भंजन होय मुनि ॥

आये मलमहँ सूत, अति प्रसन्न सब मुनि भये ।
 करि पूजा अति पूत, शौनक मुनि पूछन लगे ॥

छप्पय—पढ़े शास्त्र इतिहास पुरानादिक सब नुमने ।
 कही कथा अति मधुर सुनी श्रद्धातैं सबने ॥
 अब सब शास्त्रनि सार सूतजी शीघ्र सुनाओ ।
 कृष्ण चरित कहि पुण्य प्रेम पीयूष पिआओ ॥
 शास्त्र-ज्ञान पय-दधि करहु, मथि तिहि सार जनाइ दें ।
 खट्टो मट्टो पृथक करि, मक्खन मधुर चखाइ दें ॥

श्रीभागवत चरित, प्रथमाह अध्याय १

कलियुग आयो जानि आनि बैठे हम बनमें ।
 विष्णु बताई बाट चक्र लै आयौ छिनमें ॥
 जानि वैष्णव क्षेत्र यशकी दीक्षा लीन्हीं ।
 कृष्ण कथा नित सुनें सबनि शुभ सम्मति कीन्हीं ॥
 सूत ! जगततैं मोरि मुख, कृष्ण चरनमहँ चित दियो ।
 कृष्ण कथा कलिमल हरनि, कही कृपा करि हित कियो ॥



[श्रीविष्णु का शौनकादिको चक्रदेना]

परमधर्म है जिही भक्ति भगवत में होवै ।
 होवै हर्षित हियो मलिनता मनकी खोवै ॥
 हेतु रहित निष्काम भक्ति अति सरस सुहाई ।
 सब शास्त्रनिको सार यही मेरे मन भाई ॥
 शौनकजी ! सच सच कहूँ, सब संतनि सम्मत जिही ।
 भक्ति भनो भागीरथी, विषय बासना विष कही ॥

कथा श्रवण नित करें श्रवण वे ही हैं सुखकर ।
 वाणी बिमला वही कृष्ण कीर्तन में तत्पर ॥
 मन मोहनमें मिलै सतत हरि चरननि सेवै ।
 कर्म करे जो कछू कृष्ण अर्पण करि देवै ॥
 ध्यान खड्गतैं कर्म की, कतरहिँ ग्रन्थ सुतीक्ष्ण अति ।
 जिनको यश पावन परम, को न कथामें करहिँ रति ॥

भगवत भक्ति सहाय भागवत ते कहलावें ।
 अज अव्यक्त अनादि सगुन साकार लखावें ॥
 लै अनन्त अवतार अमित लीला बिस्तारें ।
 नाम, रूप, गुन, धाम जगत् जीवनिक्कूँ तारें ॥
 जो इनकूँ गावें सुनें, नित सेवन सुखतें करहिँ ।
 भक्त भागवत हैं वही, करत जगत पावन फिरहिँ ॥

जिनके चरित पवित्र हृदयकूँ पावन करि हैं ।
 सुनिकें श्रद्धा सहित मनुज भवसागर तरि हैं ॥
 तदनुरूप ही भक्त चरित अति ही सुखदाई ।
 अपने तैं हूँ अधिक स्वयं हरि महिमा गाई ॥
 भक्त कहो भगवन्त वा, भेद न, एक सरूप हैं ।
 भक्ति भवन के भूप हैं, दोऊ चरित अनूप हैं ॥

जिनको यश गुन नाम गान है सुखकर अतिशय ।
 कथा कीरतन करहिँ कलुष काननि कूँ मधुमय ॥
 साधु जननि के सुहृद् सबनिके जो हैं स्वामी ।
 अच्युत अजर अनादि अगुण अज अन्तरयामी ॥
 कृष्ण कथा के रसिक वर, भोता तिनके हृदय बसि ।
 अशुभ बासना मलिन मति, देत तुरत हैं नाथ नसि ॥


सेवनीय जो सदा सुखम सुखदाई सबकुँ ।
 माखनचोर चरित्र, मधुर अति ही श्रवननि कुँ ॥
 श्रोत्रमार्ग तैं प्रविशि हृदयमें जब आ जावैं ।
 करें ज्ञान परकाश तुरत अज्ञान नसावैं ॥
 ज्ञान सूर्य के उदयतैं, मोह मलिनता दूर हो ।
 सब संशय छिन में नसैं, हृदय प्रेम परिपूर हो ॥



[नैमिषारण्य में सूतजी के पिता, शौनकादि मुनि और बलदेवजी]

दोहा—सूत परम हरषित भये, शौनकके सुनि प्रश्न ।
 अवतारनिकी कथा सब, कहैं हृदय धरि कृष्ण ॥

इति श्री भागवत चरित के प्रथमाह में
 शौनक सूत सम्वाद नामक
 प्रथम अध्याय समाप्त ।



श्री नारद जी

अथ द्वितीयोऽध्यायः

[२]

पुण्य पुरान महान व्यास भगवान बनाई ।
परमहंस शुकदेव पुत्रकूँ पूर्ण पढ़ाई ॥
गंगा तटपै नृपति परिक्षित् हैकें शापित ।
मुक्ति द्वारको मार्ग मुनिनितें पुनि पुनि पूछत ॥
आये श्रीशुकदेव तहँ, कही कथा नृपतैं विमल ।
कहूँ ताहि मुनिवर सुनहु, तहाँ सुनी मैंने सकल ॥

श्रीनारायण बीज अमल अंकुर चतुरानन ।
श्रीनारद तनु तनो व्यास शाखा अति शोभन ॥
श्रीशुक पावन पुष्प गंध है सरस सुबानी ।
कृष्ण कथा फल मधुर खाई मुनिवर विज्ञानी ॥
नृपति परीक्षित् शौनकहुँ, सेवें ऋषि मुनि सहित हैं ।
वृद्ध भागवत भव्य अति, सब सुख जामें निहित हैं ॥

हैं अनन्त भगवन्त असन्त न उनकूँ जानें ।
प्राणी प्रेम विहीन कहो कैसे पहिचानें ॥
पावन उनको चरित अमित मधुमय सुखदाई ।
लीला ललित ललाम लखें जिन देहिं लखाई ॥
छाँड़ि कपट छल प्रेमतें, करहिं समर्पण कर्म सब ।
नाम, रूप, गुण, धाम को, समुझि सकें सतसार तब ॥

ये अगणित ब्रह्मांड रहें सरसों सम जिनमें ।
 जड़, चेतन, चर, अचर सृष्टि उपजावें छिनमें ॥
 निहित तत्त्व चौबीस आदि औतार कहावें ।
 इनहीं तैं उत्पन्न इनहीं में फिर मिलि जावें ॥
 अज, अनादि, अव्यक्त, प्रभु, अमित ज्ञान विज्ञान हैं ।
 नारायण अव्यक्त विभु, वे विराट भगवान हैं ॥

दिव्य दिगम्बर फिरें सबहिं सम जग में जिनकूँ ।
 पाँच वरषके सदा जरा व्यापै नहिं तिनकूँ ॥
 राग द्वेष तैं दूरि ऊर्ध्वरेता व्रतधारी ।
 अव्याहत गति रहे सकल जीवनि हितकारी ॥
 सनक, सनन्दन, सनातन, सनतकुमार कुमार वर ।
 मन तिन पद पंकजनिकी, रज श्रद्धातैं धारि सिर ॥

सनकादिकने सृष्टि कार्य में योग न दीन्हों ।
 कह्यो कर्यो न कुमार कोप कमलासन कीन्हों ॥
 मनु सतरूपा भये देहतैं द्वै नर नारी ।
 उनने श्रद्धा सहित सीख सब सिरपै धारी ॥
 आयसु पाई पिताकी, दोऊ दुलहिनि दुल्हा मिलि ।
 सृष्टि रची सुख ते गई, हृदय कमलकी कली खिलि ॥

हैं मनमौजी नाथ सूत्रधर विश्व विहारी ।
 नये नये नित स्वांग रचैं लीला बिस्तारी ॥
 एक रूपतैं रचैं एकतैं जग को पालन ।
 रुद्र रूप धरि करैं विश्व को वे संहारन ॥
 कच्छ, मच्छ, बाराह बपु, धरिकें धरनी धारते ।
 धर्म धेनु, द्विज पालते, दैत्य दुष्ट संहारते ॥

हैं कुमार, बाराह, कपिल, नारद, अवतारा ।
 नर नारायण, ऋषभ, दत्त, पृथु, यज्ञ, अपारा ॥
 धन्वन्तरि, नरसिंह, मत्स्य, कच्छप, वामन हरि ।
 परशुराम, श्रीराम, व्यास, बलराम, रूप धरि ॥
 कला अंस संभव सकल, शुभ अवतार महान हैं ।
 कृष्ण स्वयं भगवान हैं, सबके आदि निधान हैं ॥

सोरठा—मुनि अवतार चरित्र, सुखी सकल ऋषि मुनि भये ।
 कथा भागवत वृत्त, शौनक पूछहिं सूततैं ॥

छप्पय—सूत ! कहो अब कथा कहाँ कब काके द्वारा ।
 प्रकट भागवत भई कहाँ कोयो विस्तार ॥
 व्यासदेव मुनि महा तनय उनके अति ज्ञानी ।
 पागल प्रेत समान फिरें मानों अज्ञानी ॥
 सुनी कथा कैसे कही नृपति परिक्षित् प्रति सबहिं ।
 सूत ! सुनाओ सब कथा, होहि तोष हमकुँ तबहिं ॥

सुत अभिमन्यु नृपाल, उत्तराके सुखदाता ।
 पांडुवंशके बीज दीन दुखियनिके त्राता ॥
 चिन्तामनिके सरिस सबनिकी चिन्ता नासत ।
 कल्पवृक्षकी भांति सबनिकुँ पोषत पालत ॥
 भरतखण्डकी प्रजाको, सुत समान पालन कियो ।
 न्यासभूत निज देहकुँ, तृन समान च्यौ तजि दियो ॥

दोहा—सूत कहैं मुनिवर प्रथम, कहूँ व्यासमुनि वृत्त ।
 फेरि परिक्षित्को चरित, भनूँ सुनो दै चित्त ॥

छप्पय—लीला अमित अपार पार प्राणी नहीं पावें ।
 बिबिध रूपतैं उतरि अवनियै अच्युत आवें ॥
 सूकर सिंह सरूप मत्स्य कच्छप बपु धारें ।
 अंश कला अवतार धारि असुरनिक्कू मारें ॥
 सत्यवती, मुनि पराशर, द्वापर युगमें धन्य हैं ।
 विष्णु रूप श्रीव्यासजी, जिनके तनय अनन्य हैं ॥

कमल पंकतैं होय काक त्रिष्ठातैं पीपर ।
 मृग-मद मृगकी नाभि मांस मेदाके भीतर ॥
 मोती उपजे सीप शंख हड्डी ही होवै ।
 बाद्य पाइकैं चरम अशुचिता अपनो खोवै ॥
 गुणी गुणनितैं पूज्य हैं, क्षेत्र परीक्षा नहीं कही ।
 व्यास, विष्णु भगवान हैं, मातृ वंश त्रुटि नहीं लही ॥

बदरीवनमें बसैं कसैं तनु व्यास महामुनि ।
 नित्य हवन करि वेद, शास्त्र इतिहास पढ़ैं पुनि ॥
 ऋक, यजु, साम, अथर्व, एक के चारि बनाये ।
 चारिहु शिष्य बुलाइ, वेद क्रम यथा पढ़ाये ॥
 शूद्र, नारि, व्रतहीन द्विज, हित भारत रचना करी ।
 तऊ शान्ति मन नहीं लही, अन्तरात्मा नहीं भरी ॥

पाराशर्य प्रवीण परम चिन्तित हूँ सोचत ।
 बिधिवत् पढ़िकैं वेद लगायो श्रीहरिमहँ चित ॥
 गुरु सुश्रूषा करी अग्नि अव्यग्र अराधी ।
 करो तपस्या उग्र ग्रीष्म पंचानल साधी ॥
 वेदव्यास इतिहास रचि, पुण्य पुराण कथा कही ।
 चिन्ता चिततैं नहीं गई, कछू खटक खटकति रही ॥

बदरीबनके निकट विराजें मुनिवर ज्ञानी ।
 वेदव्यास इतिहास रचे मुनि शान्ति न मानी ॥
 चिन्ता चितमें चुभी मलिनता मनमहँ आई ।
 रही कौन-सी कमी आतमा अति अकुलाई ॥
 इतनेमें वीणा लिये, राम कृष्ण गुण गावते ।
 नारद देखे, आवते, प्रेम बारि बरसावते ॥

नारदजीने कह्यो व्यास तुम सब गुण आगर ।
 वेद-पुराण प्रवीण सबहिं शास्त्रनिके सागर ॥
 ब्रह्मज्ञानी आप अज्ञवत् च्यों पछितावें ।
 का कारण है कहो ? भेद च्यों नाहिं बतावें ॥
 बोले व्यास बिनीत है, मुनि ! मन मैल मिटाय दें ।
 काज कौन कीयो नहीं, सच्ची बात बताय दें ॥

बोले नारद—सबहिं आपुने धर्म बताये ।
 किन्तु कृष्णके ललित चरित अति विषद न गाये ॥
 भक्ति भावतें हीन कुकवि जो कविता करि हैं ।
 काक तीर्थ सम समुक्ति हंस मुनि नहिं आदरि हैं ॥
 अब सब तजि मुनि ! भक्ति को, प्रेम प्रवाह बहाइ दें ।
 भक्ति भाव दर्शाय दें, भगवत चरित सुनाइ दें ॥

सोरठा—हौं हरि चरितनि गाइ, शूद्रासुत पुनि मुनि भयो ।

सब संशय मिटि जाइ, रचहु भागवत चरित वर ॥

छप्पय—मदमातेकूँ यथा मद्यको हित जतलानों ।

तथा कर्ममें निरत पुरुषकूँ विषय बतानों ॥

पुनि बोले मुनि व्यास—होइगी आशा पूरी ।

किन्तु कथा कछु कही आपुने अबहिं अधूरी ॥

दासी सुत कैसे भये, संत सङ्ग कस लगो मति ।

चरित सुखद सब सुनाओ, होत हृदय में हर्ष अति ॥

सोरठा—भयेप्रेम महुँ लीन, व्यास वचन मुनि देवऋषि ।

प्रवचनपरमप्रवीन, लगे कहन निज चरितकुँ ॥

छुप्य—मुनिवर ! मैंने महा मोहवश दुरगति पाई ।

किन्तु कृष्णकी कृपा पाइ वह विपति बिताई ॥

चारु चरित हैं मधुर कृष्णके अति सुखकारो ।

उनको अभिनय रच्यो मुनिनि आज्ञा सिर धारी ॥

लोला रास बिलासकी, अति रहस्ययुत मधुमई ।

निरखि मुनिनिकी सुधि गई, मति मोहित सबकी भई ॥

रंगभूमि अति रम्य रासको रसमय अभिनय ।

निरखि सबनिको चित्त चमत्कृत भयो सुअतिशय ॥

मेरे मनमें मैल धँस्यो, रस विरस भयो सब ।

नारद लम्पट होहु मुनिनि मिलि शाप दियो तब ॥

बन्दन करि विनती करी, होय शापको अन्त कस ।

सतसंगति हरि भक्ति लहि, होओ मुनि पुनि कह्यो अस ॥

गई सृष्टितैं पूर्ब कल्पमें अति ही सुन्दर ।

उपबर्हण गन्धर्व नामको हो हौं मुनिवर ॥

नखतैं शिखलौं सुघर मनोहर मेरी मूरति ।

दिव्य गन्धयुत देह सुघर वर मानो रतिपति ॥

मेरे मनहर रूपपै, अबला अति आसक्त ई ।

मदन मथित मदमत्त ई, सब समान अनुरक्त ई ॥

भयो यज्ञ इक विषद सबहिं गन्धर्व बुलाये ।

विश्वसृजनिकी आयसुतैं हम सबहुँ आये ॥

मृगनैनिनि तैं धिरंधो रूप मदमें मतवारो ।

अविनय मेरी निरखि शाप सबने दै डारो ॥

जा, पृथिवी पै अबहिं तू, शूद्र योनिमें प्रकट हो ।

मेरी अनुनय पै कह्यो, संत समागम निकट हो ॥

दासीको हौं पुत्र किन्तु शुभ करमनिमहँ रुचि ।
 साधुसंगतैं बुद्धि भई मेरी कछु कछु शुचि ॥
 चातुर्मास्य निमित्त तहाँ मुनिवर बहु आये ।
 सेवा सौंपी मोइ सुने हरि चरित सुहाये ॥
 सीथप्रसादी पाइकैं, पाप पहाड़ दये सकल ।
 जग सुनो सुनो लगत, रहत कृष्ण विनु चित विकल ॥

कृष्ण कीरतन कथा माहिँ आसक्त भयो चित ।
 सेवा श्रद्धा सहित करूँ सन्तनिकी हौं नित ॥
 सुनत मनोहर चरित मैल मनको सब छूट्यो ।
 श्रीपति पद रति भई जगततैं नातो दूट्यो ॥
 चित्त भ्रमर सतसंग मधु, श्रीहरि गुन गावन लग्यो ।
 मनमें मोद महा भयो, हृदय प्रफुल्लित है गयो ॥

चातुर्मास्य समाप्त भयो मुनि चालन लागे ।
 रोयो है अति दीन दयालु मुनिनिके आगे ॥
 करुना कीन्ह कृपालु प्रेमतैं पास बुलायो ।
 प्रेम प्रकाशक मधुर कृष्ण कीर्तन करवायो ॥
 कृष्ण कीरतन करत ई, भवको भय भागन लाग्यो ।
 प्रेम हृदय जागन लग्यो, गृह बन्धन लागन लग्यो ॥

निर्मोही ये संत प्यार करिकैं अपनावैं ।
 किन्तु अन्तमें बधिक सरिस हिय छुरी चलावैं ॥
 गहकि मिलैं जब तलक रहैं रस नित बरसावैं ।
 कसक हियेमें छोड़ि निठुर बनिक्कें भगि जावैं ॥
 साधुनि सँग अति प्रेम करि, जग सुख काहू नहिं लख्यो ।
 बिलपत ई जीवन गयो, रुदन शेष ई रहि गयो ॥

छीन दीन कुलहीन, कृष्णहूँ कैसे पाऊँ ।
 करुणासिन्धु कृपालु मिलें केहि मारग जाऊँ ॥
 हों सोचूँ नित जिही गीत माता कछु गावै ।
 होवै बेटा बड़ो बहू बटुआ-सी आवै ॥
 माँ के मनकी नहिँ भई, मृत्यु फाँसमें फँसि गई ।
 दूध दुहन घरतें गई, काल नागने डसि लई ॥

मोहमयी मम मातु मरी मैं घरतें भाग्यो ।
 जरी जगतकी आस, कृष्ण चरननि चित लाग्यो ॥
 देश, नगर, नद, नदी नाँधि निर्जन बन आयौ ।
 न्हायो सरिता सलिल, पान करि ध्यान लगायौ ॥
 ध्यान करत ई चित्तकी, चिन्तां सबरो नसि गई ।
 मनमोहन की माधुरी, मन मेरे में बसि गई ॥

भक्ति भावतें भरित हृदय में हरिजी आये ।
 करत दरश तनु पुलक, अश्रु नयननिमें छाये ॥
 अति उत्कंठा बढ़ी शान्ति सरिता पय पूर्यो ।
 प्रेम बाढ़में बह्यो चित्त आनंद में डूब्यो ॥
 ध्यान ध्येय ध्याता सबहिँ, ध्येय वस्तुमें मिलि गये ।
 दरशन दैकें दयानिधि, तुरत चित्ततें चलि दये ॥

है अतुल्य तब गिर्यो मोहि मुर्छा-सी आई ।
 यह तनु दरश न होयँ दई नभ गिरा सुनाई ॥
 कृष्ण कीरतन करत, कालकी करूँ प्रतीच्छा ।
 तनु तजि नारद भयो, भई भगवतकी इच्छा ॥
 बीणाकी झुंकार सुनि, हरि हियमें प्रकटें तुरत ।
 दौरी आवैं धेनु ज्यों, मोहनकी मुखी सुनत ॥

करि नारद उपदेश व्यासतें बोले वानी ।
 कृष्णकथा सतसंग जनित निज कही कहानी ॥
 उमहूँ संशय त्यागि भक्त भगवत गुन गाओ ।
 कृष्ण कथाके कहत शान्ति सुखसागर न्हाओ ॥
 यों कहि लै बीणा चले, राम कृष्ण गुन गावते ।
 व्यास बिचारैं धन्य मुनि, ये सबके मनभावते ॥

धनि नारद मुनि धन्य-धन्य वर बीना इनिकी ।
 हरि यश गावैं नित्य सुरसना धनि धनि तिनि को ॥
 सब जग दुख संतप्त फिरैं जे हरि गुन गावत ।
 दुखको भेटत मूल शान्ति को पाठ पढ़ावत ॥
 धनि अवनी जिनि चरनकी, पद पराग परसत बिमल ।
 द्वै ई दूरि करें दुरित, संत-संग सुरसरि सलिल ॥

दोहा—नारद अरु श्रीव्यासको, परम सुखद सम्बाद ।
 पढ़ैं सुनैं जे प्रेमतैं, पावैं प्रभुपरसाद ॥

इति श्रीभागवतचरितके प्रथमाहमें व्यासनारद सम्बाद नामक
 द्वितीय अध्याय समाप्त ।



अथ तृतीयोऽध्यायः

[३]

नारदजी जब गये व्यास बैठे वर आसन ।
चित्तवृत्तिकूँ रोकि कियो इन्द्रिनिपै शासन ॥
माया सहित महेश हृदयमें दिये दिखाई ।
भवभयमंजनि भक्ति प्रकट है सम्मुख आई ॥
मनमें मोद महा भयो, भव्य भागवत रचि लई ।
निज सुत शुककूँ स्वर हित, सबरी कंठ करा दई ॥

बोले शौनक—सूत ! सुनाओ शुककी शिखा ।
बैरागी बनि फिरें, करें घर-घरतें भिक्षा ॥
कैसें आके पढ़ी संहिता शास्त्रत सबरी ।
कैसें बाँची कथा मिटाओ शंका हमरी ॥
बोले सूत—सुने सरस, अति मधुमय भगवतचरित ।
फैसे प्रेमके फंदमें, ज्यों मृग बीना स्वर सुनत ॥

भरतवंशमें भूप भये शंतनु सुखदाता ।
बिदुर, पांडु, धृतराष्ट्र, पौत्र तिनके विख्याता ॥
पांडव पांचहुँ पांडु-तनय धृतराष्ट्र पुत्र शत ।
पांडव परम प्रसिद्ध, किंतु कौरव अति निंदित ॥
राज्य हेतु भारत भयो, पांडु-पुत्र विजयी भये ।
भीम सुयोधन जाँघकूँ, तोरि छोरि निज घर गये ॥

जंघा दूटी युगल मुयोधन अति दुख पायो ।
 कंक काक अरु गृद्ध नोचि वृण मज्जा खायो ॥
 अश्वत्थामा सुनत शीघ्र शोकाकुल धायो ।
 दुरयोधनकी दशा देखि नयननि जल छायो ॥
 द्रोणतनय नायक करे, सांसा तक आशा रहत ।
 जैसे जल झूयत तृणहिँ, पकरि पार पावन चहत ॥

अश्वत्थामा चल्यो पापमति मनमहँ आई ।
 पितृमृत्यु करि याद धर्म गति दई भुलाई ॥
 पांडव कुञ्जको बोज नाश कैसे हूँ होवै ।
 प्रतिहिंसामहँ धर्म सत्य सबही नर खोवै ॥
 द्रुपदसुताके सुत सबहिँ, सोवत सुखतें शिबिरमें ।
 दुरत तीक्ष्ण तरवारितें, सिर काटे निशि तिमिरमें ॥

पुत्र शोकतें दुखी द्रौपदी अति अकुलाई ।
 मूर्छित हैकें गिरी पार्थप्रिय कहि समुझाई ॥
 त्यागहु चिन्ता शोक तीर लै दुरतहिँ जाऊँ ।
 जिहि काटे सुत शीश काटि सिर ताको लाऊँ ॥
 केशवकुँ करि सारथी, चले शत्रु पीछो कियो ।
 ब्रह्म अस्त्र निज अस्त्रतें, काटि पकरि गुरुसुत लियो ॥

पशु समान दृढ़ बाँधि लाइ पत्नीकुँ दीन्हों ।
 गुरुसुत सम्मुख समुक्ति, चरन बन्दन उठि कीन्हों ॥
 दयादृष्टितें देखि द्रौपदी बोली बानी ।
 छोड़ो इनकुँ अबहिँ, दंडदैं, होगी हानी ॥
 कृष्णा, कृष्ण, कनिष्ठ, बड़, सबहीको कहनो कर्यो ।
 मूढ़ि बार बाहर कर्यो, माथेको मुक्ता हर्यो ॥

गुरुसुत बिप्र बिचारि पुत्रघाती नहिं मार्यो ।
 अति अपमानित भयो युद्ध करि सम्मुख हार्यो ॥
 मैल न मनको गयो हिये प्रतिहिंसा धारी ।
 पांडुवंशको नाश करूं यह बात बिचारी ॥
 धाव पुरै गढ़हा भरै, नर अपमान न भूलहीं ।
 खल-मन, मोती, दूध ये, जुरत फेरि फटिकें नहीं ॥
 दोहा—राज युधिष्ठिरकुँ दयो, हथिनापुरमहँ आइ ।
 पांडव सेवें श्यामकुँ, प्रेम न हिये समाइ ॥
 छप्पय—कृष्णा करी कृतार्थ, पांडुनन्दन नृप कीन्हे ।
 सबकुँ सब समुझाइ द्वारका हरि चलि दीन्हे ॥
 इतने में अति दुखित उत्तरा आगे आई ।
 स्वर गद्गद भयभीत, विपतिकी बात बताई ॥
 देव ! निहारो दहकतो, आवै अस्त्र अमोघ है ।
 मारै मोकुँ किन्तु मम, गर्भ विभो ! रक्षित रहे ॥
 अश्वत्थामा कुपित क्रोध करि सर छै छोड़े ।
 आवत देखे चक्र सुदर्शनतैं हरि तोड़े ॥
 दुर्योधन दल दल्यो दुसइ दारुन दुख दीन्हे ।
 करी उत्तरा अभय पांडु-सुत निरभय कीन्हे ॥
 पलमें जो जगकुँ रचें, करें निमिषमें नाश हैं ।
 दुष्ट दलन भक्तनि भरन, महँ तिनि कवन प्रयास हैं ॥
 चले द्वारकाधीश पृथा पुनि आगे आई ।
 मातृपुत्रकुँ पकरि प्रेमतैं विनय सुनाई ॥
 प्रभो ! पुत्र परिवार सहित सब भाँति उबारी ।
 किन्तु जिही है एक अन्तमें भीख हमारी ॥
 विपति बारि बारिद भरे, बार बार बरसा करें ।
 दर्शन देवें दयावश, छत्र छाँह करि भय हरे ॥

हे विश्वम्भर ! विभो ! आपु हैं सबके स्वामी ।
 अच्युत अलख अनन्त अगोचर अन्तर्यामी ॥
 सुरसरिको शुभ सलिल सदा सागर में जावै ।
 मेरो चंचल चित्त चरन तल तव त्यों धावै ॥
 ब्रूआकी विनती सुनी, प्रेम सहित प्रभु हैंसि गये ।
 माया मोहित मन भयो, वासुदेव मन बसि गये ॥

नहीं द्वारका गये लौटि महलनिमें आये ।
 धरमराज रण-याप सोचि पुनि पुनि पछित्ताये ॥
 कैसी मम मति मलिन भई भाई निज मारे ।
 निज सम्बन्धी हने सबहिँ निरदोष विचारे ॥
 अश्वमेध करि कवन विधि, परम पुण्य पुनि मिलि सके ।
 कीचड़की कालिख कबहुँ, कीचड़तें का धुलि सके ॥

हूँ पापी अति अधम मोहि नर नारि न निरखें ।
 पत्नी पतितें पृथक करीं बिधवा बनि बिलखें ॥
 सबके सुत पितु मातु करनक्रंदन करि कोसैं ।
 पांडव पापी परम बन्धु बधि निज तनु पोसैं ॥
 कृष्ण ! कहो कैसे कलूँ, रक्त सुरंजित राजकुँ ।
 कौन करै सुख स्वजन बधि, ऐसे कुत्सित काजकुँ ॥

धर्म नीति कहि बार बार सबने समुझाई ।
 किंतु काहुकी बात धर्मसुत मन नहिँ भाई ॥
 कृष्ण कहैं—श्रीभीष्म हमारे अति ही प्यारे ।
 भक्ति भाव सुनि सबहिँ, दरसकुँ शीघ्र सिधारे ॥
 शोभित भीष्म शर बिँधे, अबनि उतरि बिभि रवि गिरे ।
 पांडव पुरजन प्रभु सहित, सबने पद बंदन करे ॥

शरशैयापै परे भीष्म विद्युत् सम दमकें ।
 शोणित शर कच कांति इन्द्र धनु सम मिलि चमकें ॥
 दंधु सहित ढिँग जाय युधिष्ठिर शिशुसम रोये ।
 अश्रु धिंदु बरसाय युगल पद-पंकज धोये ॥
 पांडुपुत्र पद पासमें, पग पकरे रोवत निरखि ।
 बोले उनतें पितामह, नंदनँदनकी ओर लखि ॥

जिन्हें सारथी सुहृद सखा सेवक तुम मानों ।
 उन्हें सगुण साकार सर्वस्वामी करि जानों ॥
 कैसे कैसे कठिन काज सब करे तुम्हारे ।
 भाववश्य भगवान भक्त भय हरिवे वारे ॥
 कमठ अंड सेवै सदा, भाव रखें त्यों दासमें ।
 दरशन दैवे दयानिधि, आये सेवक पासमें ॥

हैं नटनागर नवल नित्य नाटक नव खेलें ।
 देखि दयाके दृश्य दुःख दर्शक बहु फेलें ॥
 कब करवावैं कहाँ कौनतें कैसो कारज ।
 मेद न जानें देव, दैत्य, दानव, शंकर, अज ॥
 अंतकालमें कृष्ण कहि, नर अघ तजि हारिपुर गये ।
 ते मम मृत्यु समय समुक्ति, स्वयं श्याम सम्मुख भये ॥

भये अशुभ सब छीन शुद्ध मन मोहन धारे ।
 शस्त्र शूल सब शांत भयो प्रभु निकट निहारे ॥
 इन्द्रियवृत्ति बिलास रुकी हरि हियमें आये ।
 गद्गद गिरा गँभीर गीत गोविंदके गाये ॥
 मति हो मेरी कृष्णमें, गति हों गोबरधनधरन ।
 चंचल चित चितवे चरन; रटि रसना राधारमन ॥

भीष्म स्तुति

मेरो मन प्रभु चरननि रमि जावै ।

मोर सुकुट कच कुटिल मनोहर फँसि तिनिमें उरझावै ॥१॥ मेरो मन०

माल तिलक धनु सम शुभ भाँहनि नयननिमें गड़ि जावै ।

लोह कपोल श्वेद युत सुन्दर निरखि निरखि सचु पावै ॥२॥ मेरो मन०

सुधर नासिका दंत मनोहर अघरनिपै बलि जावै ।

शंखग्रीव केहरि सम कंधनि पीताम्बर पहरावै ॥३॥ मेरो मन०

बाहु विशाल करधनी कटिमें चरनकमल नित ध्यावै ।

कृष्ण कृपालो करुना सागर रसना नामनि गावै ॥४॥ मेरो मन०

छप्पय—हे अनाथके नाथ ! ज्ञान गीताके दाता ।

हे अरजुनके सखा ! सारथी दुखके त्राता ॥

हे बूढ़ेकी कठिन प्रतिज्ञा पूरनकर्ता !

हे ब्रजवल्लभ ! अखिल विश्वके हर्ता भर्ता ॥

हरि हियमें धारन करे, करत विनय बिहल भये ।

कृष्ण ! कृपालो ! कृपानिधि, कहत भीष्म सुरपुर गये ॥

सोरठा—सब धरमनिको सार, भीष्म धरमसुततैं कह्यो ।

भये श्याम लखि पार, तनु तजि पायौ परम पद ॥

छप्पय—भये भीष्म जब शांत कृष्ण पांडव पछिताये ।

दाह आदि संस्कार करे कुल करम कराये ॥

सेवक स्वजन समेत हस्तिनापुर में आये ।

भये युधिष्ठिर भूप, त्रिविध विधि हरि समुभाये ॥

सबको सब संतोष करि, श्याम सकुचि बोले बचन ।

जाउँ द्वारका तहाँ हूँ, चिंतित होंगे सब स्वजन ॥

इति श्रीभागवतचरितके प्रथमाहमें भीष्म परलोक गमन नामक

तृतीय अध्याय समाप्त ।

अथ चतुर्थोऽध्यायः

[४]

जावेंगे यदुनाथ बात फैली घर-घरमें
 व्याप्यो सब थल शोक राज रनिवास नगरमें ॥
 सबही कहिवे लगे—कृष्ण कब दरशन देंगे ।
 कब पुनि पुण्य पराग पादपद्मनिकी लेंगे ॥
 नरतनु फल है नयन ये, नंदनंदन निरख्यो करें ।
 काज करें कर कृष्णके, मनमोहन मनकूँ हरे ॥

दुखित भये नर नारि नयनतें नीर बहावे ।
 नाथ ! अनाथ बनाइ विलखते तजि घर जावें ॥
 हाय ! विधाता बाम श्यामको साथ छुड़ावै ।
 हमकूँ कुटिल कराल कालहू च्यों नहिँ आवै ॥
 मोजम भाषन शयनमें, साथ श्याम सबके रहें ।
 पांडव पालित प्रेमके, प्रभु त्रियोग कैसे सहें ॥

नयन नीरतें धूरि कीच भइ नल्ली सवारी ।
 पीछे पुरजन पांडुपुत्र अति चले दुखारी ॥
 साग्रह सब लौटाइ सैन सँग श्याम सिधारे ।
 पथके नृप नर-नारि निरखि अति भये सुखारे ॥
 पद-रजतें पावन करत, देश नगर, पुर, बन विकट ।
 पहुँचे प्रभु सन्ध्या समय, दिव्य द्वारकाके निकट ॥

पाञ्चजन्यको शब्द सुन्यो अति भये मुखारे ।
 स्वागत को सामान सजायो सबहिं सिधारे ॥
 नगर, द्वार, गृहद्वार, मार्ग सब सुधर सजाये ।
 दधि अक्षत फल लाइ सजल घट दीप जराये ॥
 रथमें शोभित श्याम घन, छत्र श्वेत माला गले ।
 नयन सफल सबके करत, हरत चित्त चितवत चले ॥
 नव जलधर सम श्याम सुमन बर बरसा बरसैं ।
 जनता करि जयघोष दरसतैं अति ही हरसैं ॥
 श्याम अंग पटपीत गरे वनमाला सोहै ।
 मानों घनमें तड़ित इन्द्रधनु मनकूँ मोहै ॥
 प्रेम सुधा बरसावते, हियमें सुख सरसावते ।
 पुरवासिनि हरसावते, सुने श्याम गृह आवते ॥
 अति उत्कण्ठित महल मांहिं महिषी माता सब ।
 आवैं प्रिय यदुनाथ पुरावैं चिर आशा कब ॥
 इतनेमें घनश्याम महल माताके आये ।
 सब मातनिके मृदुल चरनमहँ शीश नवाये ॥
 अंक लाय सिर सँधि सब, प्रेम बारि बरसा करति ।
 चूमि चाटि गौ बत्स जिमि, बिरह त्रिधां हियकी हरति ॥
 सुनि नूपुरकी झनक, चुरिनिकी खनक मनोहर ।
 माँ बोलीं—अब जाउ वस्त्र बदलो भीतर घर ॥
 मन्द मन्द मुक्कात, महलमें मोहन आये ।
 नारि निरखि नैदन्द नयनतैं नीर बहाये ॥
 मनतैं मोहनतैं मिलीं, नयन ओटतैं चोट करि ।
 शिशु सौंध्यो पुनि लाइ उर, आलिङ्गन यों किये हरि ॥
 इति श्रीभागवत चरितके प्रथमाहमें भगवद् द्वारका प्रवेश नामक
 चतुर्थ अध्याय समाप्त ।

(मासिक परायण—प्रथम दिवस विश्राम)

अथ पञ्चमोऽध्यायः

[५]

बोले शौनक—सूत ! सुधा सम कथा सुनाई ।
 कहो परोक्षित जन्म, कर्म बल, वीर्य बढ़ाई ॥
 कहें सूत—सब सुनो कुक्षिगत बालक जरते ।
 निरखैं निरमल रूप गदातैं रक्षा करते ॥
 करें परीक्षा कौन ये, सुन्दर श्याम सुरूपयुत ।
 दसम मासमें तिरोहित, भये प्रकट अभिमन्युसुत ॥

सुनत परीक्षित जन्म हर्ष चहुँदिशिमें छाये ।
 नगर राज सरबत्र विविध विधि बजत बधाये ॥
 वेदविज्ञ बहु विप्र युधिष्ठिर बेगि बुलाये ।
 दिये दान बहु ग्राम अन्न धन रतन लुटाये ॥
 कहें विप्र—ये जगतमें, त्रिपुल अमल यश पायेंगे ।
 विष्णु वीर्य रक्षित नृपति, विष्णुरात कहलायेंगे ॥

पृथापुत्र पुनि कहें—पुत्रके ग्रह फल भाखें ।
 बोले विप्र—तुम्हार पौत्र कुल गौरव राखें ॥
 विप्र भक्त, दुरधरस दयारत दाता दुस्तर ।
 क्षमा शील गुणवान सत्यवादी सब सुखकर ॥
 शूर सिंह सम समर प्रिय, वीर विज्ञ विजयी बड़े ।
 रहैं द्वारपै बाँधि कर, आज्ञा हित भूपति खड़े ॥

हौंगे कृष्ण समान कुलागत काज करिङ्गे ।
 करि दुष्टनिको दमन दुखिनिके दुःख हरिङ्गे ॥
 क्रोधित बालकविप्र शापतें शापित हुङ्गे ।
 सर्व संग निर्मुक्त होहि हरि कथा सुनिङ्गे ॥
 श्रीशुक स्वेच्छातें स्वतः, आवें कथा सुनाइंगे ।
 मुनिमंडलमें त्यागि तनु, पुण्य परमपद पाइंगे ॥
 सोरठा—सुनि विप्रनिके बैन, घरमागज प्रमुदित भये ।
 भरे नेह जल नैन, कछुक बदे अभिमन्यु-सुत ॥
 छण्य—पुरुष पुरुष प्रति पेलि परीक्षा करहिं सबनिमें ।
 गर्भमाहि जो लख्यो ताहि ते लखहिं नरनिमें ॥
 हरि हयमेघ हितार्थ हस्तिनापुर फिरि आये ।
 देखत दौरे गोद बैठि हरषे किलकाये ॥
 बोले विप्र बचन सफल, कृष्ण अंक्रमें निरखि सुन ।
 नाम परीक्षित्तें विदित, होय नृपति अति भक्तियुत ॥
 लखे युधिष्ठिर दुखी कहें हरि—मत घबराओ ।
 सब अघनाशक पुण्य यज्ञ हयमेघ कराओ ॥
 सब समरथ हैं आपु तऊ चितित है रोवें ।
 अश्वमेघ करि युद्धजनित पातक नृप धोवें ॥
 अश्वमेघकी बात सुनि, मौन युधिष्ठिर है गये ।
 रिक्तकोष लखि दुखित है, मनही मन चितित भये ॥
 सोचें राजा—हने नृपति सम्बन्धो सबई ।
 जत्र होवें हयमेघ ररिङ्गे पातक तबई ॥
 सम चिंतातें भला कहो का काज सरिङ्गे ।
 वे होवें सम्पन्न जाहि श्रीकृष्ण करिङ्गे ॥
 हरि भक्तिनिके काज प्रभु, करता बनि करतें करें ।
 जे शरणागत है गये, तिनिके सब दुख हरि हरे ॥

दोहा—घरमराजकी विकलता, लखि बोले धनश्याम ।

अश्वमेध मख नृप ! करो, पावै मन विश्राम ॥

छप्पय—कुन्तीनन्दन कहैं—कृष्ण ! केहि विधि मख होवैं ।

कौन काज करि कहो कालिमा कुलकी धोवैं ॥

छूटे अंश अरु दंडद्रव्यतैं काम चलावैं ।

भूमिपालकी जिही वेदवित वृत्ति बतावैं ॥

हरि बोले—हिम शिखरपै, धन है विपुल मरुत्तको ।

लाइ करो मख जिही तो, सदुपयोग है वित्तको ॥

अच्युत आज्ञा पाइ हिमाचल पांडव धाये ।

शिवकुँ करि सन्तुष्ट मरुत मखको धन लाये ॥

करि कृष्णार्पण सबहिं यज्ञके कारज कीन्हैं ।

अन्न वस्त्र धन धाम ग्राम त्रिप्रनिक्कू दीन्हैं ॥

इन्द्र सरिस कुन्ती तनय, नव जलधर सम श्याम हैं ।

स्वर्ण बारि बरसैं त्रिपुल, पूरैं सबके काम हैं ॥

इति श्रीभागवतचरितके प्रथमाहमें परीक्षित जन्मोत्कर्ष नामक
पञ्चम अध्याय समाप्त ।



अथ षष्ठोऽध्यायः

[६]

दोहा—कहें सूत—मुनिवर ! सुनो, विदुर आगमन धन्य ।
शूद्र भये यम शाप वश, जो हरि भक्त अनन्य ॥

छप्पय—मुनि मांडव्य महान् मनस्वी मौनी दुष्कर ।
करें तपस्या तीव्र द्वार आश्रमके तस्तर ॥
करिकें चोरी चोर ओर आश्रमकी आये ।
देखि दूरतें दूत द्रव्य धरि तहाँ लुकाये ॥
पूछें मुनितें दूत सब, मौनी उत्तर देहि कस ।
यही चोर सरदार है, सब मिलि निश्चय कियो अस ॥

बाँधे चोरनि सहित निकट नरपतिके लाये ।
बिनु विचारि मुनि सहित चोर शूली लटकाये ॥
तपतें मुनि नहिं मरें मरम भूपति जब जान्यो ।
क्षमा याचना करी दोष मुनि अपनो मान्यो ॥
क्रोधित लखि यमने कही, छोड़े कृमि छोड़े अबश ।
शाप दयो यम शूद्र हो, भये विदुर मुनिकोपवश ॥

सोरठा—तेई बनि परिव्राज, तीरथ हित रनतैं प्रथम ।
धरमराजको राज, आये देखनहेतु पुनि ॥

छप्पय—आये चाचा विदुर युधिष्ठिर सुनि हरषाये ।
 करि स्वागत सत्कार प्रेमतेँ पुरमें लाये ॥
 पुनि पूछी कुशलात कृष्णको कहो कहानी ।
 तिरोभावकुँ त्यागि विदुरने सबहिँ बखानी ॥
 स्वयं धरम शत वरष तक, शूद्र भये मुनि शाप सुनि ।
 शूलीके कारन कुपित, शाप दयो माण्डव्य मुनि ॥

विदुर देववत लखे अंग पांडव न समाये ।
 मानों मृतक शरीर प्रान फिरितें फिरि आये ॥
 पूछें पांडव—चचा ! हमें क्यों अस बिसराये ।
 कुन्ती बोलीं—लला ! भूलि तुम इत कित आये ॥
 प्रणय कोपयुत मधुर अति, सुनत विदुर बोले बचन ।
 भाभी ! भाग्य अधीन हैं, सुख दुख अरु विछुरन मिलन ॥
 सोरठा—पाइ परम सत्कार, विदुर बसैं धृतराष्ट्र दिँग ।
 करन बन्धुउपकार, नित प्रति सोचत ही रहत ॥

छप्पय—धरम रूप वे विदुर बन्धुतैं बोले बानों ।
 राजन् ! कुटिल कराल कालकी कछु गति जानी ॥
 देखो, दौर्यो काल सबनिके सम्मुख आयो ।
 चलो त्यागि तत्काल बिलम क्यों यहाँ लगायो ॥
 सगे सबहिँ सुरपुर गये, देह जरजरित है गई ।
 जीवन आशा नहिँ गई, अन्त समय दुरगति भई ॥


जिनकुँ तुमने देव ! दुसह दुख दारुन दीन्हे ।
 दारा दूषित करी द्रव्य हरि भिल्लुक कीन्हे ॥
 श्वान समान अमान उनहिँके टुकड़े खाओ ।
 रक्त सुरजित भोग भोगतें नहीं लजाओ ॥
 चलो उत्तराखंडकुँ, मोहपाश छेदन करो ।
 जनम सफल तप करि करो, सब तजि हरि हियमें धरो ॥

सुनत बिदुरके बचन बन्धुवर अति हरषाये ।
 गद्गद गिरा गँभीर नीर नयननिमें छाये ॥
 धन्य धन्य लघुभ्रात हाथ गहि तात उबार्यो ।
 अन्धकूपमें पतित—पतितकूँ पकरि निकार्यो ॥
 सबकूँ सोवत छोड़िकेँ, गान्धारीके साथमें ।
 बिदुर बताये मार्गतें, चले हाथ दै हाथमें ॥
 नित्य नियम अनुसार युधिष्ठिर गुरु बन्दनकूँ ।
 आये, देखे नहीं, बिदुर अरु कुरुनन्दनकूँ ॥
 सुनि संजयतैं वृत्त बहुत रोये पछिताये ।
 आये नारद समाचार सब सत्य सुनाये ॥
 ताऊ ताई तव चचा, सप्तश्रोत सब जायँगे ।
 पाप पुण्यतैं पृथक है, पुण्य परम पद पायँगे ॥
 दोहा—यों कहि नारद मुनि गये, धर्मराज अति दीन ।
 सूनो सूनो सब जगत्, दीखत अति श्रीहीन ॥
 छप्पय—कहैं युधिष्ठिर—भीम ! भयानक काल भयो है ।
 आयो अरजुन नहीं द्वारकामाँहि गयो है ॥
 भये धरम बिपरीत रीति कुलकी सब त्यागैं ।
 जाइँ पुत्र, परलोक पिता माताके आगैं ॥
 पिता पुत्र, भाई सगे, पति पतिनीमें कलह नित ।
 असगुन नित नूतन निरखि, चंचल होवै मोर चित ॥
 त्याग्यो सबने धर्म कर्म कछु करें न हितकर ।
 पालैं पापी पेट पाप करि सबहिं नारि नर ॥
 करें नहीं विश्वास परस्पर प्रेम न राखैं ।
 तनिक द्रव्यके हेतु हाल मिथ्या सब भाखैं ॥
 निरखि नित्य उत्पात अति, मन मलीन मेरो भयो ।
 कपटबन्धु कलिकाल का, धरा धामपै छा गयो ॥

फरकें बाईं बाहु हृदयमें कम्पन होवै ।
 करि मुँह मेरी ओर श्वान निरभय है रोवै ॥
 उल्लू और कपोत मृत्यु के दूत कहावैं ।
 करकश कठिन कराल शब्द करि हृदय हिलावैं ॥
 लीला विग्रह त्यागि का, श्याम धाम गमने कहीं ।
 करूँ कहा चित दुखित अति, अरजुन हूँ आयो नहीं ॥

गैयाँ रोवैं नित्य, घास घोड़ा नहिं खावैं ।
 बहे बायु बीभत्स, रक्त बादर बरसावैं ॥
 पृथिवी, प्रेत, पिशाच, पाप प्राणिनि तैं पूरन ।
 भई गई शुभ कान्ति, लड़ें नभमें सत्र ग्रहगन ॥
 देवमूर्ति मुख मलिन करि, अश्रु बिन्दु बरसावतीं ।
 अति अपशकुन जनावतीं, दुखद दृश्य दिखलावतीं ॥

इति श्रीभागवतचरितके प्रथमाहमें विदुर चतुराष्ट्र गृहत्याग नामक
 षष्ठम अध्याय समाप्त ।



अथ सप्तमोऽध्यायः

[७]

धरमराज भयभीत भये अरजुन तहँ आये ।
सुखमण्डल अति मलिन दुखित चितित घबराये ॥
सब ई हर्षित भये नहीं अरजुन हरषाये ।
पकरि पैर गिरि परे बचन नहिं कळू सुनाये ॥
बार-बार पूछें नृपति, बन्धु ! बताओ बात सब ।
सम्बन्धी सब सुखी हैं, कहो तहाँतैं चले कब ॥

अरजुन बोले नहीं बहुत बिलपें पछितावें ।
धरमराज पुचकारि, प्यार करि धीर बँधावें ॥
दुखको कारन बन्धु ! शोक तजि मोह बताओ ।
यदुनन्दनके सबहिं सुखद संवाद सुनाओ ॥
बचन कठिन काहू कहे, अथवा अपमानित भये ।
या तनु तजिकें भुवनपति, नित्य धाम तो नहिं गये ॥

दुखको वारापार न अरजुन कतहूँ पावैं ।
कृष्ण कृपाकूँ सुमिरि, नयनतें नीर बहावें ॥
नाथ ! सारथी सदा सुहृद सम्बन्धी बनिकें ।
नित नित नेह बढ़ाय, छाँड़ि गमने छल करिकें ॥
हाय ! प्रमो ! अब जायँ कित, इत उत नहिं संतोष सुख ।
अश्रु पौछि बोले बचन, तात बाततें बढ़्यो दुख ॥

जिनकी कृपा कटाक्ष पाइ हम भये सुखारे ।
 राजन् ! कैसे कहूँ श्याम निजधाम पधारे ॥
 जिनके प्रेम प्रसाद प्रिया कृष्णा-सी पाई ।
 यन्त्र-मत्स्यकूँ वेधि द्रुपदपुर लही बढ़ाई ॥
 काममत्त सब नृपनिके, सिरपै पैर जमाइकें ।
 द्रुपदसुता हमने बरो, गये अनाथ बनाइकें ॥

जिनकी लहिकें कृपा अकारज कारज कीन्हे ।
 विप्र वेषमहँ ब्रह्मि आइ बर माँगे दीन्हे ॥
 सन्निधि समुझी श्याम भोज बहु खांडव दीन्हों ।
 अति प्रचंड धरि रूप दाह बन सबरो कीन्हों ॥
 देवराज रक्षा करी, किन्तु पराजित वे भये ।
 धराधाम तजि धामनिज, अज अच्युत अब चलि दये ॥

राजन् ! अति कमनीय कृष्णकी अकथ कहानी ।
 प्रेमामृत में सनी सरस सुखदायक बानी ॥
 खांडवको करि दाह अग्नि भरि पेट अघाये ।
 दोउनिकूँ बर दें देवपति दौरे आये ॥
 मैंने मांगे अन्न बर, मांग्यो हरि वर हिय भरै ।
 अरजुनके सँग मित्रता, मेरी नित बढ़िबौ करै ॥

राजसूयके समय सबहि भूपति बश आये ।
 जरासन्ध नहीं नम्यो आपु अतिशय घबराये ॥
 मगधेश्वरके दमन करनकी युक्ति बताई ।
 अभय करत वा समय श्याम सब कहें सुभाई ॥
 राजन् ! अरजुन, भीम, मैं, तीनिहु गिरिब्रज जायँगे ।
 जरासन्धकूँ युक्तितें, मारि मगधतें आयँगे ॥

आज्ञा लैकें चले साथ हम दोऊ लीन्हे ।
 क्षत्री बानों बदलि वेष विप्रनिके कीन्हे ॥
 ज्येष्ठ बन्धुतैं भिड़ा दुष्ट मरवायौ इनतैं ।
 बन्दी भूपति मुक्त करे बोले हरि उनतैं ॥
 धरमराजके यज्ञमें, बहुत भेट लै आउ सब ।
 वे ही हमरे हृदयधन, श्याम सिधारे धाम अब ॥

राजन् ! कहँ कहँ कहूँ, करी हमरी रखवारी ।
 दुष्ट फन्दमें फँसी द्रौपदी प्रिया तुम्हारी ॥
 जिनमें छींटा राजसूय पयके शुभ लागे ।
 खोले खींचे केश खलनिने सबके आगे ॥
 रोई अति ही दोन है, रक्षा नहिं काहू करी ।
 कृष्ण पुकारे करुणस्वर, कान भनक उनके परी ॥

मरी समामें आई चीरकूँ अक्षय कीन्हों ।
 दुखित दयानिधि भये दंड दुष्टनिक्कूँ दीन्हों ॥
 जिन कच खींचे बधू बनीं विधवा उन सबकी ।
 खोले डोलें केश, प्रतिज्ञा पूरी तब की ॥
 सदा दुःखी दुःखमें रहे, सुखी सबनि सुख दै भये ।
 किन्तु अकेले अन्तमें, सब तजि निज पुर चलि गये ॥

मूर्तिमान जो कोप तपस्वी दुर्वासा मुनि ।
 शाप दिवावन शत्रु पठाये बन ब्रैभव मुनि ॥
 अक्षय राविको पात्र खाइ मलि कृष्णा निवटी ।
 अतिथि भये लै शिष्य सबनि चित चिंता चिपटी ॥
 दुःखमें सुखमें शोकमें, हैं जाकी गोविन्द गति ।
 श्याम पुकारे करुन स्वर, भई द्रौपदी दुखित अति ॥

सुनत प्रियाकी टेर बेर नहिं करी पधारे ।
 'अति भूखो कछु देहु' आइ ये बचन उचारे ॥
 रोई कृष्णा पात्र लयो आगे धरि दीन्हों ।
 शाकपत्रकूँ पाइ, तृप्त सबरो जग कीन्हों ॥
 न्हात मुनिनि फूले उदर, लेत डकार पलायँ सब ।
 टारी बृहद बिपत्ति जिनि, गये त्यागि संसार अत्र ॥

अश्वत्थामा भीष्म द्रोण अरु कर्ण धनुर्धर ।
 डरत रहत नित आपु चारिहू अति बलवत्तर ॥
 दीक्षा दैके मोइ आपुने अस्त्र लैन हित ।
 पठयो प्रकटे इन्द्र कह्यो तपमें तुम हो रत ॥
 तुमरे तपतैं तुष्ट है, तुरत त्रिलोचन आयँगे ।
 लोकपाल शिव अस्त्र निज, आइ सबहिं दै जायँगे ॥

उल्ला०—इन्द्र, वरुण, यम, धनद आ, अस्त्र सहित दरशन दियो ।
 करी कृपा जिन कृपातैं कृष्ण कहाँ अत्र चलि गये ॥

देखि देवपति मुदित मन, पुत्र प्रेम परगट कियो ।
 सिर सूँध्यो मुँह चूमिके, आधो सिंहासन दियो ॥

कृष्ण—करत तपस्या भील वेष धरि शिव तहँ आये ।
 जानि जंगली जाति लङ्ग्यो हर अति हरषाये ॥
 भयो युद्ध घनघोर भई नहिं कुंठित मो मति ।
 कृष्ण कृपाते उमा सहित शिव तुष्ट भये अति ॥
 जिनकी कृपा प्रसादतैं, नर तनुतैं सुरपुर गयो ।
 अर्ध सिंहासन हरि दयो, अत्र उन बिनु निरबल भयो ॥

कछुक काज सुखसहित स्वर्गसुख भोगे भारी ।
 दिव्य अस्त्र सब सीखि चलनकी करी तयारी ॥
 देवराज सब देव कहें—इक कारज कीजे ।
 अस्त्र-शस्त्र तो लये दक्षिणा गुरुकी दीजे ॥
 हैं निवात कबचादि अति, प्रबल दैत्य तिनतैं लरो ।
 मारो रणमें सबनिक्कूँ, निष्कण्टक सुरपुर करो ॥

मारि सके नहिँ देव तिनहिँतैं हौं जा जूझ्यो ।
 कृष्ण कृपातैं कछू कठिन कारज नहिँ सूझ्यो ॥
 दिव्य अस्त्रतैं मारि शत्रु सबही संहारे ।
 माया छलतैं लड़े तऊ रणमें सब हारे ॥
 कालिकेय पौलोम सब, स्वर्णपुरी बासी हने ।
 जिनिके बलतैं बली बनि, राजन् ! अब तिनु त्रिनु बने ॥

कौरव और त्रिगर्त सन्धि करि करी चढ़ाई ।
 करें बास अज्ञात जहाँ हम पाँचहु भाई ॥
 भोष्म, कर्ण, गुरुद्रोण, सुयोधन सब मिलि करिकें ।
 मत्स्यदेशपै चढ़े चले गोधन बहु हरिकें ॥
 बृहन्नलातैं सारथी, बन्यो हरष हियमें अमित ।
 कहे उत्तरा—सुधर पट, लावें मम गुड़ियानि हित ॥

उत्तर उत ही चल्यो जायँ कौरव गौ लूटें ।
 सेना लखी महान कुँवरके छक्के छूटें ॥
 निज परिचय करवाइ युद्धकी करी तयारी ।
 संधान्यो गांडीव शत्रु-सेना संहारी ॥
 लही विजय मूर्छित करे, मुकुट, वस्त्र गोधन लये ।
 करे काज जिनि कृपातैं, हाय ! कृष्ण वे तजि गये ॥

कैसी किरपा करी हमारे ऊपर रनमहँ ।
 भीष्म द्रोण सम वीर बान तकि मारहिँ तनमहँ ॥
 जाहिँ सर करि निकरि तनिक तनमहँ नहिँ लागै ।
 लागत मेरे बान शत्रु रन तजि सब भागै ॥
 मेरे रथपै बैठिकें, सबकुँ निरवीरज कर्यो ।
 दृष्टि डारि मृत सरिस करि, ओज, तेज, बय बल, हर्यो ॥

बार-बार थो कहें फिरै रनमहँ लै मोकुँ ।
 शत्रु पक्षके अस्त्र परसि पावै नहिँ तोकुँ ॥
 दरसावै निज कला विविध विधि रथकुँ हाकें ।
 तजै तेज बल वीर जाहि तिरछे है ताकें ॥
 राजन् ! रनमें काल बनि, संहारे सब हो जने ।
 अचनि त्यागि अब अखिलपति, बर बिकुंठवासी बने ॥

जिनिके कमल समान पूजि पग मुनि न अवावै ।
 हृदय कमलमहँ ध्याइ पार भवसागर जावै ॥
 नहिँ पूजे पद पदुम निन्द्य कारज करवायो ।
 मनमाहनतें महामोहवश रथ हँकवायो ॥
 समुक्ति सक्यो नहिँ श्यामकुँ, मोह्यो तब मैं मन्दमति ।
 हाय ! लुट्यो वञ्चित भयो, हृदय फटत मन दुखित अति ॥

कहूँ कहाँ तक प्रभो ! श्याम मोकुँ अपनायो ।
 घोड़ा घायल भये चलै नहिँ मैं घबरायो ॥
 सब शत्रुनितें घिर्यो डर्यो हरि नेह निहार्यौ ।
 समुक्ति श्याम संकेत बानतें नीर निकार्यौ ॥
 द्रव प्याये तैराइकें, शर निकारि मलि जोरि रथ ।
 चले शत्रु मोहित करे, गये त्यागि अब हौं बिरथ ॥

राजन् ! हरिने ठग्यो घट्यो बल मेरो सबरो ।
 गये सुदिन वे नीति अंत अब आयो हमरो ॥
 अस्त्र न आवें यादि शस्त्र सब भूले अबई ।
 पुरुषोत्तमतैं रहित भयो गुन गमने सबई ॥
 गंगातटपै तापसी, शाप क्रोध करि जो दयो ।
 सम्मुख आयौ आज वो, अबला सम हौं लुटि गयो ॥

एक दिना बन माँहिं तापसी तीन खड्ग धरि ।
 बैरी मेरे तीन बतावै जब पूछी हरि ॥
 बाँधे माखन हेतु यशोदा ताकूँ मारूँ ।
 दीन्हों कृष्णा कष्ट पार्थद्वित तीसरि धारूँ ।
 तीन शाप क्रमशः दिये, बहु समुझायो श्याम जब ॥
 सुत वियोग पति उपेक्षा, दस्यु पराजित करहि तब ॥

हरि आज्ञा सिर धारि नारि लैकें मैं आयो ।
 डाँकू मगमें मिले मोइ मिलिके धमकायो ॥
 अपनो परिचय दयो नाम अखुनहुँ बतायो ।
 किन्तु न माने दुष्ट नारि लखि चित्त चलायो ॥
 हरिकी सोलह सहस्र प्रिय, पत्नी तिनि दादस दयो ॥
 तऊ लूटि लै भगे हौं, देखतको देखत रह्यो ॥

जीत्यो भारत युद्ध दिव्य रथ घोड़ा वेई ।
 धनुष वही गांडीव समरत्रिजई सर वेई ॥
 विश्वविदित हौं रथी साज सामान वही हैं ।
 किन्तु नहीं हैं श्याम सारथी व्यर्थ समी हैं ॥
 बुझी आगमहँ हवन जिमि, ऊसर बोयो बीज ज्यो ॥
 जिमि सेवा कंजूसकी, व्यर्थ होइ है गयो त्यो ॥

राजन् ! पथकी व्यथा बताई सबरी हमने ।
 पूछी जिनिकी कुशल नाम लै-लै कै तुमने ॥
 वे सबतो बनि मूढ़ परस्पर लरे बिचारे ।
 मद पीकें मदमत्त भये मरि स्वर्ग सिधारे ॥
 जैसे जलचर दीर्घ लघु, खायँ बली निरबलनिकूँ ।
 त्यों यदुवंशी लरि मरे, मरवाये हरि सबनिकूँ ॥

कैसी क्रीड़ा करें कौतुकी श्याम खिलारी ।
 विषय बासना, बद्ध न समुझाति बुद्धि बिचारी ॥
 जीव जीव सो करैं जीवतैं पुनि मरवावैं ।
 करहिँ परस्पर प्यार शत्रुता पुनि करवावैं ॥
 महाराज ! सब काज तजि, चलो बिजन बन तनु तजो ।
 राज, पाट, धन, धाम, गृह, छोरि मोरि मुख हरि भजो ॥

भयो भोर सब ओर शोक घर घर में छायाँ ।
 कुन्ती माता सुन्यो द्वारकातें सुत आयाँ ॥
 स्वामी सरबसु सगे बाहिरी प्राण हमारे ।
 वे हरि हमकुँ त्यागि हाय ! बैकुंठ सिधारे ॥
 नाश भयो यदुवंशको, लरि भिरिकें सब मरि गये ।
 कुन्ती तनु त्याग्यो तबहिँ, शोकाकुल सुत सब भये ॥

स्वर्ग सिधारी मातु धरमसुत नहिँ धबराये ।
 धन्य-धन्य मम मातु बिरह-हरि प्राण गँवाये ॥
 अज्ञ अभागो हमहिँ बज्रसम हिये हमारे ।
 सुतन श्याम संवाद प्राण हरि सँग न सिधारे ॥
 बल्लभ-मीन फणि-बारि मणि, बिनु न रहैं जीवित अधिक ।
 मातु निबाह्यो प्रेम भल, हम जीवित अस नेह धिक ।

धरमराजने लख्यो, राजमहँ दम्भ कपट अति ।
 कलिक्कूँ आयो जानि, कीन्ह परलोक गमन मति ॥
 वन परब्रत नद नदी, ससागर सवरी पृथ्वी ।
 के कीन्हें सम्राट् परीक्षित् परम यशस्वी ॥
 हथिनापुरमहँ परीक्षित्, वज्र ब्रजेन्द्र बनाइकें ।
 गुणो पौत्र लखि मुकुट निज, सिर धरि दियो सिंहाइकें ॥
 कहें परीक्षित्—प्रभो ! प्रजापालन अति दुष्कर ।
 हौं मतिमंद मलीन अज्ञ अतिशय हे नृपवर ॥
 कृपासिन्धु ! करि कृपा काज सब मोइ सिखावें ।
 आश्रयहीन अनाथ नाथ ! अबहीं न बनावें ॥
 कहु पिपीलिका हिमालय, कैसे निज सिर पर धरै ।
 कस कपोत निज पंखपै, धरनीधर धारन करै ॥
 क्रिये परीक्षित् नृपति चले सब पांडव बनकूँ ।
 राज-पाट परिवार सबहितें खँच्यो मनकूँ ॥
 चोर बसन आहार तजे, कच कुंचित खोलें ।
 जड़ उनमत्त समान न काहूतें कछु बोलें ॥
 जैसे बीती यामिनी, नहिँ लौटति पुनि जाइकें ।
 उत्तर दिशिक्कूँ चलि दिये, हरिपद हियमें लाइकें ॥
 गान्धारी धृतराष्ट्र बिदुर कुन्ती हरि हिय धरि ।
 पांडव पतिनी सहित गये परिवार दुखित करि ॥
 तनु त्यागो यश छाँड़ि धाम बैकुण्ठ सिधारे ।
 सबके सुखकर मधुर चरित हैं अतिशय प्यारे ॥
 जे श्रद्धाते सुनहिँ नर, पढ़हिँ प्रेमतेँ गायँगे ।
 पुण्य परम पद पायँगे, भवसागर तरि जायँगे ॥

इति श्रीभागवतचरितके प्रथमाहमें पांडव स्वर्गारोहण नामक
 सप्तम अध्याय समाप्त ।

अथ अष्टमोऽध्यायः

[८]

पूज्य हितामह परम पुण्य परलोक पधारे ।
 मये परीक्षित नृपति सुनत सब संत सुखारे ॥
 यज्ञ याग बहु करे दान दुखियनिहूँ दीन्हे ।
 इरावती में चारि गुणी सुत पैदा कीन्हे ॥
 कृपाचार्यकी कृपातैं, अश्वमेध कैई करे ।
 यों ऋषि-ऋण सुरपितर-ऋण, तीनिहु ऋणतैं नृप तरे ॥

मुन्यो परीक्षित राजमाहिँ कलियुग घुसि आयौ ।
 धावा बोल्यो तुरत सुनत कलियुग घबरायौ ॥
 पूछें शौनक—सूत ! कर्यो कलि कैसे वशमें ।
 नृपति वेषमें शूद्र गऊ ताड़त किहि थल में ॥
 राजवेषधारी वृषल, वृषभ गऊ ताड़न करत ।
 बलपूर्वक कस बश कर्यो, कस नृप सबके दुख हरत ॥
 दोहा—सूत कहें शौनक सुनहु, कलि निग्रहको वृत्र ।
 भूप परीक्षित को सुखद, जामें पुन्य चरित्र ॥

छप्पय—कुरु जांगलमहँ बसत युद्ध अवसर नहिँ आवैं ।
 धीर धनुरधर नृपति बिना रन हाथ खुजावैं ॥
 कलि प्रवेश सुनि कुपित शीघ्र सब सेन सम्हारी ।
 दशहुँ दिशनिहूँ विजय करनकी करी तयारी ॥
 जायँ जहाँ जहँ जनेश्वर, तहँ निज कुल कीरति सुनत ।
 कहँ कहँ कृष्ण करी कृपा, सुनत होत अति मन मुदित ॥

कहैं विप्रवर आइ कृष्णने करी कृपा कस ।
 बने सारथी, दूत, भृत्य, घनश्याम दयावस ॥
 भक्तवस्य भगवान् दीनतातें बँधि जावैं ।
 किन्तु करें अभिमान तिनहिँ यमसदन पठावैं ॥
 करें कृपा करुनायतन, जीव क्षुद्रता नित करें ।
 शरनागतके अध अखिल, अखिलेश्वर छिनमे हरैं ॥

बोले ब्राह्मण वृद्ध—युद्धकी बात बाताजँ ।
 सुनहु नृपति ! इक कथा सरस शुभ सुखद सुनाजँ ॥
 करी प्रतिज्ञा भीष्म अरु पांडव बिनु करिहौं ।
 सब शंका-संताप सुयोधनके अरु हरिहौं ॥
 सुनत हँसे हरि दयामय, लै कृष्णा कौतुक कियो ।
 हो सौभाग्यवती सती, भूलि पितामह बर दियो ॥

कृष्णातें यों कहैं कृष्ण—कछु बात सुनी है ।
 पांडव मारुँ काल्ह प्रतिज्ञा भीष्म करी है ॥
 कहे द्रौपदी दुखित—दयालो ! दया दिखाओ ।
 पावकमें जरि मरुँ नाहिँ पति पाँच बचाओ ॥
 रचो चिता फेरोनि मिस, भीष्म द्वारपै लै गये ।
 गंगासुत आसिस दई, तब पांडव निरभय भये ॥

हरिलीला अति मधुर आइ सब नृपहिँ सुनावहिँ ।
 सब समाजके सङ्ग सुनहिँ अति हिय हरषावहिँ ॥
 तबई शिबिर समीप घटी घटना अद्भुत अति ।
 एक पैरतें धरम बृषभ बनि चलहिँ मन्द गति ॥
 धेनु रूप धरनो घरे, रोवै सुत बिनु मातु ज्यों ।
 मातु दुखित पूछहिँ तनुज, धरम धरनितें कहैं यों ॥

वीतत सुखद वसंत ग्रीष्ममें गरमी आवै ।
 प्रथम पक्ष शशि छीन द्वितियमहँ पुनि खिलि जावै ॥
 महामोदमें हँसै वही दुखमें पुनि रोवै ।
 त्यो कलियुग पश्चात् सुखद शुभ सतयुग होवै ॥
 जननी ! दुखतैं दुखित है, काहे अश्रु बहावती ।
 कान्तिहीन मुख म्लान करि, कस डरि-डरि डकरावती ॥

बोली बसुधा—बत्स ! त्रिपतिकी बात बताऊँ ।
 प्राननाथ पदपदुम परस बिनु अति अकुलाऊँ ॥
 जिनकी कृपाकटाक्ष पाइ पावन सब होंवें ।
 मधुर मन्द मुसकान नारि लखि धीरज खोवें ॥
 तिनु बिनु हौं त्रिषवा भई, सब सुहाग सुख लुटि गयो ।
 शम, दम, बल, तप, तेज, गुन, गये धैर्यमम छुटि गयो ॥

जलज सरिस जे चरन, योगिजन जिनकुँ ध्यावें ।
 जिनमें बज्र, त्रिशूल, कमल, ध्वज शोभा पावें ॥
 दुखहर सुखकर पाद पदुम मम हिय जब परसत ।
 रोमांचित करि देह सकल अँग अँग अति हरषत ॥
 आज तिनहितैं हीन है, भाग्यहीन अबला भई ।
 श्री, ह्री, लजा, कान्ति, धृति, सुख समृद्धि बिनु है गई ॥

जहाँ धरनि अरु धरम करें सम्वाद परस्पर ।
 करत दिग्विजय तहाँ परीक्षित पहुँचे नृपवर ॥
 बने वृषभवर धरम, धेनु तनु धरनी धारे ।
 छद्मवेषमें वृषल नृपति बनि तिनकुँ मारे ॥
 वृषभ एक पदतैं व्यथित, कामधेनु लखि दुखित अति ।
 शूद्र हनै थर-थर कँपै, कर्यो क्रोध बोले नृपति ॥

अरे दुष्ट ! तू कौन बड़ो बलवान बन्यो है ।
 बलहीननिक्कूँ हने, ठहर, यह तीर तन्यो है ॥
 पुनि पूछे—गोतनय ! दुखित क्यों तीन पैरतें ।
 राजवेषमें वृषल हनहि कहु कौन बैरतें ॥
 जो हो कारन कष्टको, वेगि बताओ वृषभ अब ।
 दुष्ट मारि बदलो लऊँ, सच सच बात बताउ सब ॥

धरम कहें—हे देव ! दुःख देवै को काकूँ ।
 होवै कारन एक बताऊँ हों तब ताकूँ ॥
 ईश्वर, कर्म, स्वभाव भिन्न मुनि भिन्न जनावें ।
 समुझें अपने आपु काहि दुख बीज बतावें ॥
 कहें नृपति—तुम धरम हो, धरम बिना अस को कहै ।
 अधकारीके पाप कहि, सूचक हूँ अधगति लहै ॥

हरिकी माया अमित न पहुँचै मन अरु बानी ।
 शौच दया, तप, पाद बिना तुम्हरे मन ग्लानी ॥
 गऊरूप ये धरनि पदुम पद प्रभुके सोचति ।
 चरन चिह्नतें रहित दुखित है अश्रु विमोचति ॥
 धरहु धीर धरनी ! धरम ! क्षत्रिय हों शर धनु धरूँ ।
 नृप लांछन कलि क्रूरको, सिर धड़तें न्यारो करूँ ॥

यों कहिकें भूपाल तीक्ष्ण तरवारि निकासी ।
 ज्यों आगेकूँ बड़े तुरत कलि युक्ति विचारी ॥
 पापी पैरनि पर्यो कृपाकी भिक्षा माँगो ।
 धरी म्यानमें खड्ग दया दुखिया लखि लागी ॥
 कहैं—क्रूर यह ! का करै, काहे मम पग सिर धरै ।
 असि कुरुवंशिनिकी कबहुँ, नहि शरनागतपै परै ॥

प्रानदान तो दैऊँ किन्तु अबई तुम जाओ ।
 ब्रह्मावर्त सुदेश भूलि इत कबहुँ न आओ ॥
 बिप्र करें इत याग भाग देवनिक्कूँ देवें ।
 सबही सुखतें सदा सर्वपति शिवकूँ सेवें ॥
 बोल्यो कलि—सर्वत्र है, राज तुम्हार बसूँ कहाँ ।
 मोक्कूँ ठौर बताइ दें, आज्ञा मानि रहूँ तहाँ ॥
 बोले नृप—मम द्वार विमुख याचक नहिँ जाहीं ।
 वेश्या, हिंसा, द्यूत, मद्यमहं बसहु सदाहीं ॥
 सोची भूपति यहो चार अति निन्दित थल हैं ।
 आसक्ती, मद, झूठ, क्रूरताके ये बल हैं ॥
 गिड़गिड़ाय पुनि कलि कहै, निन्दित अधम सबहिँ दये ।
 एक मनोहर नाथ ! दै, तब राजा सोचत भये ॥
 स्वर्ण एक संसारमाहिँ हत्याकी जर है ।
 स्वजन विजन बनि जायँ बैरको यह ही घर है ॥
 कौरव पांडव लरे नाश सब जगको कीन्हों ।
 दोष खानि लखि नृपति पांचवों सोनों दीन्हों ॥
 सुखी स्वर्ण मुनि कलि भयां, अति प्रसन्न है हँसि गयो ।
 स्वर्ण मुकुट नृप सिर निरखि, तुरत ताहिमहँ घँसि गयो ॥
 पूछें शौतक—‘सूत ! दुष्ट कलि ज्यों नहिँ मार्यों ।
 काहि न क्रूर कराल राज्यतें पकरि निकार्यों ॥
 सूत कहें—नृप भ्रमर सरिस रसग्राही ऋजु अति ।
 सोच्यो कलिमहँ लंगहिँ पाप करि पुण्य हायँ मति ॥
 यह खल कलि कायरनिक्कूँ, डरपावै वृकके सरिस ।
 धीर वीर हरिमक्त लखि, डरै कैपै नहिँ करहि रिस ॥

कृति श्रीभागवतचरितके प्रथमाहमें परीक्षित कलि निग्रह नामक
 अष्टम अध्याय समाप्त ।

अथ नवमोऽध्यायः

[६]

शौनकादि मुनि कृष्ण कथा सुनि अति हरषाये ।
 आशिष दोन्हों दौरि हृदयतें सूत लगाये ॥
 अश्रु विमोचन करें सूततें पूछें पुनि पुनि ।
 तृप्त न होवें मधुर सुखद हरिलीला सुनि सुनि ॥
 सब ऋषि बोले—सूतजी, कछु दिन तुम मस्त्रमहैं रहहु ।
 नृपति परिचितचरित शुभ, हरिलीला बरनन करहु ॥

गद्गद हैकें सूत ऋषिनितें बोले बानी ।
 कृष्णकृपाको पात्र बन्यो अब मैंने जानी ॥
 कृष्णचरित है अमित सबहिं मति सरिस सुनावें ।
 निज बलके अनुसार पक्षि नभमाहिं उड़ावें ॥
 कीर्तनीय गुन करम अति, जिनिके परम उदार हैं ।
 बनि घनि ते नर तिनहिं जे, सुनहिं गुनहिं धुनितें कहैं ॥

मुनिवर ! उत्तरचरित उत्तरासुतको सुनु अब ।
 है अति भावी प्रबल करहिं अनुभव मुनि ये सब ॥
 दक्षिन दिशिक्क एक दिवस नृप धनु धरि धाये ।
 भूख प्यासतें दुखित भये मुनि आश्रम आये ॥
 करहिं तपस्या तहाँपै, मुनि शमीक बैठे अचल ।
 पानी माँग्यो मुनि नहीं, सुन्यो भये नृप अति विकल ॥

आयौ नृपकुँ कोह द्रोह मुनिवर्तें कीन्हों ।
 मर्यो स्यापु मुनि नारि डारिकें भूपति दीन्हों ॥
 कबहुँ न ऐसो कर्यो कालकी कैसी गति है ।
 होनी जैसी होय तबहिं तस होवै मति है ॥
 विधि विधान है कै रहै, कबहुँ होय नहि व्यर्थ वह ।
 पांडव नल अरु रामके, चरित बतावैं तत्त्व यह ॥

रावण जैसो सूर वीर बलको गरबीलो ।
 पुरुषारथ लखि व्यर्थ भयो चिन्तित अति दीनो ॥
 दशरथ हों बर बधू कुमरि कौशल्या बरिहैं ।
 तिनतें होवें राम वही तोकुँ रन मरिहैं ॥
 ब्रह्मदेवतें सुनी यों, कुमर डुबाये कुमरि लै ।
 लंका आयो परि भयो, ब्याह देखि खल कर मलै ॥

होनहार नहिं होय अन्यथा काहू विधितैं ।
 मृत्यु टरै नहिं जोग जज्ञ, तप, रिद्धि सिद्धितैं ॥
 नृप सोचैं—मुनि नेत्र मूँदि का ध्यान लगावै ।
 अथवा देखत मोह अकड़िके ढोंग बनावै ॥
 लैन परीक्षा मुनि गरे, मृत अहि डार्यो कुपति अति ।
 आश्रमतें निकसे दुरत, पहुँचे निजपुरमहँ नृपति ॥

पूछें शौनक—सूत ! सर्प तहँ किनने डार्यो ।
 मुनि आश्रम अति शान्त जीव किहि अहि कुँ मार्यो ॥
 सबहिं भाग्यवश करहिं सूत समुझावहिं पुनि-पुनि ।
 मारे किनकुँ कौन—कौन जीवन देवै मुनि ॥
 अजी, कहा पूछहि प्रभो ! विधि विधान अति विकट है ।
 बने बुद्धि वैसो वहीं, मृत्यु जहाँ जिहि निकट है ॥

हो मुनिको इक पुत्र संयमी परम तपस्वी ।
 धरम करममहँ निरत तपोनिधि महायशस्वी ॥
 पिता अवज्ञ सुनी कोप अति मनमहँ आयौ ।
 मुनि पुत्रनिके निकट क्रोध करि बचन सुनायौ ॥
 अरे, दुष्ट क्षत्रिय अधम, ऐसो साहस करि सके ।
 गरुड़ गरेमें काटि अहि, कहु का जीवित रहि सके ॥
 डार्यो पितु उर स्याँपु शाप हों देहौं वाकूँ ।
 डसै सातवें दिवस महा अहि तक्षक ताकूँ ॥
 यो दैकें सुत शाप पूज्य पितुके दिँग आयौ ।
 मर्यो स्याँपु उर निरखि बहुत रोयो चिल्लायौ ॥
 जगे महामुनि सुनी सब, बात बहुत दुख मन कर्यो ।
 भिक्कार्यो सुत बिविध विधि, नृपसनं वृत्त पठै दियो ॥
 इत नृप पुरमहँ पहुँचि कनक जबमुकुट उतार्यो ।
 आश्रम कर्यो कुकृत्य चित्तमहँ फेरि बिचार्यो ॥
 अरे बुद्धि मम भ्रष्ट भई अनुचित यह कीन्हों ।
 योगनिष्ठ ते महा तपस्वी मुनि अब चीन्हों ॥
 सोचैं—अब मुनि कोपतैं, मम सरवसु नसि जाइगो ।
 वाही छिन सन्देश लै, शिष्य नृपतिदिँग आइगो ॥
 मुन्यो शिष्य आगमन नृपति तहँ तुरतहिँ आये ।
 भूप निरखि भयभीत शिष्यने बचन सुनाये ॥
 राजन् ! ऋषिमुत शाप दयो सो सब मुनि लीजे ।
 सात दिवसमहँ होहि मुक्ति सो कारज कीजे ॥
 सुनो शापकी बात नृप, सौँपि सुतहिँ सब राजघन ।
 कृष्ण चरनमहँ चित्त दै, चले गंगतट मुदित मन ॥

इति श्रीभागवतचरितके प्रथमाहमें परीक्षितशाप नामक
 नवम अध्याय समाप्त ।

अथ दशमोऽध्यायः

[१०]

कमल बसै जलमाँहिँ किन्तु निरलेप रहे नित ।
 त्यों ही नृप सब करत रहे कारज रखि हरि चित ॥
 शापित सुरसस्तिोर चले सुनि सबई धाये ।
 ऋषि मुनि त्यागी संत बिरागी तपसी आये ॥
 मुनिनिमाँहिँ सुरपति लसैं, श्रीपृथु सोहैं सत्रमहैं ।
 त्यों संतनितैं धिरे नृप, अतिशय शोभित होयँ तहैं ॥
 माघ मकरके मध्य मनुज माघव ज्यों धावैं ।
 त्यों सत्र दिशितैं सबहिँ संत गंगातट आवैं ॥
 उठैं अरघ दें नृपति योग्य आसन बैठावैं ।
 चरन धूरि धरि शीश बिनयतैं बचन सुनावैं ॥
 पाप करम करि क्रूर अति, बिप्र शाप शापित भया ।
 किन्तु संत दरसननितैं, धन्य आज हौं हूँ गयो ॥
 बार-बार सिर नाइ नृपति बोले यों सबतैं ।
 कर्यो अकारज काज चित्त चंचल मम तबतैं ॥
 मूर्तिमान हैं वेद आपु ऋषे मुनि तनु घारी ।
 दरशन दैंके सपदि बिपति चिन्ता मम टारी ॥
 मुनि प्रेरित अहि डसै भल; शुभ कर्तव्य बताइदैं ।
 भ्रम भय भेद मिटाइ दें, कृष्णकथा सुनवाइ दें ॥
 सब मुनि मोकूँ महा मन्त्र दै पार लगावैं ।
 कृष्ण चरनमहैं चित्त लगे सो गैल बतावैं ॥
 विद्या, साधन, शास्त्र सबहिँ हैं न्यारे न्यारे ।
 जो जिनकूँ अनुकूल परैं ते तिनिकूँ प्यारे ॥
 सरल सुगम सुन्दर सरस, मिलि सब सुठि साधन कहैं ।
 बिहि कलियुग नर नारि गहि, भक्ति मुक्ति दोऊ लहैं ॥

मधुर वचन नृप कहे मुनिनिके मनमहँ भाये ।
 ताही छिन निरपेक्ष व्याससुत शुक तहँ आये ॥
 तरुन अरुन कर चरन कमल सम नयन रँगीले ।
 मनहर लोल कपोल अंग सुकुमार गँठीले ॥
 कंध सिंह सम विपुल उर, कारे कुञ्चित केश अति ।
 मृदु मुसकावन श्यामतनु, मत्तगयन्द समान गति ॥
 धूरि भर्यो तनु दृष्टि इष्ट चरननिमहँ लागी ।
 रतिपति सम अति सुघर देहकी मुधि बुधि त्यागी ॥
 वेष दिगम्बर केश खुले सँग बालक भागें ।
 निरखि नारि सौन्दर्य चलीं सब कारज त्यागें ॥
 ऋषि-मुनि निरखे व्यासमुत, जानि सबनि आदर दयो ।
 बैठे पूजित पीठपै, नृप मन अति आनंद भयो ॥
 विधिवत् पूजा करी नृपति यों वचन उचारे ।
 दीये दरशन देव ! दुरित सब हरे हमारे ॥
 जिनिको सुमिरन करत रागयुत होहिं बिरागी ।
 तिनिको दरशन पाहिँ भाग्यशाली बड़-भागी ॥
 अहो, आज द्विज-द्रोह करि, कैँ हूँ हौं पावन भयो ।
 अतिथि आइ श्रीशुक भये, निन्द्य कृतारथ है गयो ॥
 प्रभो ! परम पुरुषार्थ कृपा करि मोहिं बतावें ।
 मरनशील कस तरहिं तुरत ताकूँ समुझावें ॥
 सुने सुधासम वैन नोर नयननिमहँ आयौ ।
 बोले शुक—नृप ! धन्य जगततें चित्त हटायौ ॥
 नृपवर ! सब चिन्ता तजहु, मनमोहनमहँ मन घरहु ।
 कहूँ भागवत तत्व अब, दत्त चित्त हैकैँ सुनहु ॥
 इति श्रीभागवतचरिके प्रथमाहमें शुक परीक्षित सम्मिलन नामक
 दशम अध्याय समाप्त ।

(इति मासिक पारायण—द्वितीय दिवस विश्राम)

अथ एकादशोऽध्यायः

[११]

छप्पय—भरतवंश-अवतंस ! प्रश्न अति उत्तम कीन्हों ।
 मुनिमण्डलके मध्य मोह आदर बहु दीन्हों ॥
 भूप ! मूढ़जन विषय-भोगमहँ समय बितावें ।
 प्रभुपद प्रेम न करहिँ अंतमहँ पुनि पछितावें ॥
 नृपतर ! नरतनु नाव दृढ़, कृष्णकथा पतवार है ।
 केशवकुँ केवट करै, सो भवसागर पार है ॥
 दोहा—बटनर सुरसरिके निकट, जैसे शशिहिँ चकोर ।
 घेरे बैठे सकल मुनि, सब निरखत शुक ओर ॥
 कहन लगे शुकदेव मुनि, दै नृपकुँ सन्तोष ।
 शुद्ध भागवत तत्त्व अव, कहूँ धरम निरदोष ॥
 छप्पय—हैं प्रपञ्च बहु विषयभोगमहँ फँसे नरनकुँ ।
 हरिलीलातेँ सुखद और अवलम्ब न मनकुँ ॥
 आकर्षित अति भयो रूप हरिलीला सुनिकै ।
 भूल्यो निरगुन ब्रह्म सगुनके गुनकुँ गुनिकै ॥
 भव्य भागवत भूपवर ! तुमहिँ सुनाऊँ सरस अति ।
 सुनत श्यामपद कमलमहँ, होहि तुरन्त अनन्य मति ॥
 अल्प कालकी कछू आपु चिन्ता नहिँ करिहैं ।
 सात दिवस तो बहुत कथा मुनि छिनमहँ तरिहैं ॥
 एक मुहूर्तहिँ माहिँ तरे खट्वाङ्ग बिरागी ।
 शेष आयु सप्ताह आपु तो सरबसु त्यागी ॥
 अन्तकालकुँ निकट लखि, गेह देह ममता तजहिँ ।
 ते ध्रुव पावहिँ परमपद, जे सब तजि प्रभुपद भजहिँ ॥
 जीवनधन बिनु जीवन जीवन नहीं कहावै ।
 भक्तिहीन नर मृतक सरिस है काल बितावै ॥

खावें पीवें लड़ें बृद्ध बनि यमपुर जावें ।
 बार-बार ते जनमि जगतमें जावें आवें ॥
 कोटि कल्पको कालहू, भक्ति बिना निस्सार है ।
 छिन भरि हरि हियमहँ वसैं, सोहि समय सुखसार है ॥
 सो०—श्रोता वक्ता आइ, सुरसरि तटपै मिलि गये ।
 शौनक दिये सिहाइ, पूछत पुनि पुनि सूततैं ॥
 छ०—सूत ! सुनाओ सुत्रद परोक्षित-शुक्र-प्रश्नोत्तर ।
 जहाँ सन्तजन भिलाहिं तहाँ सम्वाद होइ बर ॥
 गंग यमुन मिलि हरै महापातकहू भारी ।
 तैसे ही शुक्र विष्णुगत बार्ता अग्रहारी ॥
 केवल कृष्णकथा सदा, श्रवणनिक्कूँ श्रवणीय है ।
 करें कृष्ण कैकर्यकूँ, तेही कर कमनीय हैं ॥
 पायौ पुण्यशरीर मनुष ज्यौ पाप बटोरै ।
 अरे, अमृतमहँ अघम व्यर्थ ज्यौ विषकूँ घोरै ॥
 पतिनी, पशु, परिवार, पुत्र, धन सङ्ग न जावें ।
 मलि मलि धोवै देह अन्तमहँ गीदड़ खावें ॥
 काहे भूल्यो बावरे, मेला जगको द्वै दिवस ।
 कृष्ण-कृष्ण रटि कृष्ण जपि, कृष्ण कथा सुनि अहनि स ॥
 जिनिको बन्दन, श्रवण, कोरतन, सुमिरन दरशन ।
 पूजन अरचन नाम गान करि नर हों पावन ॥
 संजीवनि रुज हरै मृतनिक्कूँ सुधा जियावै ।
 हरै दोष ज्यौ तिमिर तूल तृन अग्नि जरावै ॥
 त्योंही अघकी राशिकूँ, जिनिको नासै नाम है ।
 तिनि प्रभुके पद-पद्ममहँ, पुनि-पुनि पुन्य प्रनाम है ॥
 इति श्रीभागवत चरितके प्रथमाहमें शुकाभिनन्दननामक

ग्यारहवाँ अध्याय समाप्त ।

पाणिनीय पाठशाला—प्रथम दिवस विश्राम
 मुमुक्षु भवन वेद वेदाङ्ग पुस्तकालय

चार गङ्गा ।

अथ द्वादशोऽध्यायः

[१२]

दोहा—शौनककी शंका सुनी, सूत कहें हरि कृश्न ।
है सचेत कहिवे लगे, भूप कर्णो ज्यों प्रश्न ॥

छप्पय—बोले राजा—प्रभो ! सृष्टि उत्पत्ति बतावें ।
निरगुनतैं यह सगुन भयो कैसे समुझावें ॥
शुक बोले—त्रिधि निकट यही पूछी नारद मुनि ।
कहूँ भागवत भूप ! समाहित मन करिकें सुनि ॥
ब्रह्मा विष्णु महेश बनि, रचि पालहिं मारहिं सबहिं ।
हरि अवतारनिकी सुखद, कथा कहहुँ नृप सुनु अबहिं ॥

बनिगे सूअर श्याम मेघ सम लम्ब तड़ंगे ।
घुरँ घुरँ करि घुसे नीरमहँ नंग धड़ंगे ॥
आयो भीषण दैत्य भिड़े नख दाँत चलावें ।
गई सिटिल्ली भूलि बली लखि मुँह मटकावें ॥
पटक्यो फिरि सटक्यो तुरत, भटक्यो लटक्यो चोटतैं ।
चट्ट पट्ट मार्यो असुर, धरणी देखे ओटतैं ॥

हे सूकर भगवान् ! चरण तब शीश नवावें ।
यज्ञ रूप हैं आपु शास्त्र अरु वेद बतावें ॥
स्वामिन् ! सूकर रूप धर्यो च्यों भेद बताओ ।
ऊँच नीच नहिं जीव यही का मर्म जताओ ॥
जिनि पृथिवी उद्धार करि, मुदित करे सब देवगन ।
तिनि बराह भगवान्की, जय बोलो सब संतजन ॥

सूकर, हरि श्वर कपिल, दत्त सनकादि तपस्वी ।
 नरनारायन, ऋषभ, विष्णु ध्रुव परम यशस्वी ॥
 हयग्रीव, पृथु, कच्छ, मत्स्य, वामन, धन्वन्तरि ।
 परशुराम, श्रीराम, हंस मनु बनि प्रकटें हरि ॥
 श्रीवलदाऊ, व्यासजी, बुद्ध, कल्कि आनन्दमय ।
 सब अवतारनिके परम, अवतारी यशुनतितनय ॥

हैं अपार परपुरुष पार नर कैसे पावें ।
 का लै पूजा करें कौन-सी वस्तु चढ़ावें ॥
 श्रीपति सबके ईश कोटि ब्रह्माण्डनिनायक ।
 मन बानीतें परें चरित कस गावैं गायक ॥
 सहस्रबदन श्रोशेषजी, सृष्टि आदितें अंत तक ।
 करें गान गुनगननिको, पार न पायो अवतलक ॥

मधुर मूर्ति रघुनाथ साथ सीता सुकुमारी ।
 अनुपम जोरी सुधर मनोहर अतिशय प्यारी ॥
 कैसी हियहर चलनि उठनि चितवनि बर बोलनि ।
 नंगे पगतेँ कठिन अवनिषै बन बन डोलनि ॥
 मनुज सरिस क्रीड़ा करी, करुनाकर कीन्हें चरित ।
 तिनिक्कूँ गावत सुनत अति, नर नारिनिको हाँइ हित ॥

चञ्चल चपल चटोर चोर वे अति ही खोटे ।
 बरबस खेचें चीर लगें देखनमें छोटे ॥
 बाहर भीतर श्याम नयन तिरछे अनियारे ।
 तीखे विषतेँ बुझे बान सम तोऊ प्यारे ॥
 मनमन्दिरमहँ मोहना, माखनके हित मचलि जा ।
 अरे, लड़ैते नन्दकें, आ जा, मोकूँ पिचलि जा ॥

कल्कि बुद्ध बनि ब्यास करहिं जगकारज नटवर ।
 माया अपरम्पार बिलक्षण अतिही दुस्तर ॥
 ब्रह्म, रुद्र अरु देव दैत्यहू पार न पावैं ।
 वेद भेद त्रिनु लखैं नेति कहिकैं समुभावैं ॥
 तोऊ श्वपच, किरात, शठ, पशु पक्षीहू तरि गये ।
 जो सब तजि श्रद्धा सहित, चरन शरन हरिकी भये ॥
 सोरठा—हरि अवतार चरित्र, जिही भागवत तत्त्व है ।
 है अति परम पवित्र, विधि नारद सन कहत पुनि ॥
 छप्पय—बोले ब्रह्मा—ब्रह्म ! बजाओ बीना बरतर ।
 भनों भागवत तत्त्व सुनत भवपार होयँ नर ॥
 करम बन्धके हेतु किन्तु हरिचरित ललित अति ।
 कहत सबनिको होय राधिकापति चरननि रति ॥
 सब संसारी सुख लहैं, जग विषयनिर्ते मन हटै ।
 मुक्त मुमुक्षु बद्ध मन्त्र, सेवैं भवबन्धन कटै ॥
 कहैं परीक्षित—“गुरो ! आपु बिस्तार बतावैं ।
 जाकूँ नारद कह्यो ताहि अब मोहिं सुनावैं ॥
 बरषा बीते शरद स्वच्छ करि देवै जलकूँ ।
 त्यों हरि—लीला, नाम हियेके मेंटै मलकूँ ॥
 पीवत पानी पन्थको, निज पुर पहुँचे पान्थ ज्यों ।
 हरषित होवै हृदय हरि—भक्त परसि पद शान्त त्यों ॥
 ब्रह्मन् ! यह संसार भूमि आकाश नदी नद ।
 बन, परबत, ग्रह दिशा, स्वरग, पाताल, कमल हृद ॥
 इन सबकी उत्पत्ति, प्रलय रक्षा बतलावैं ।
 धरम काम अरु अरथ मोक्षको मार्ग दिखावैं ॥
 बरन धरम आश्रम नियम, भगवत चरित सुनाइकैं ।
 शंका नाथ मिटाइदैं, शरनागत अपनाइकैं ॥
 इति श्रीभागवतचरितके प्रथमाहमें संचित अवतारचरित
 नामक बारहवाँ अध्याय समाप्त ।

अथ त्रयोदशोऽध्यायः

[१३]

है प्रसन्न शुक कहें—भूप ! सुनु सुखके मगकूँ ।
 माया ब्रह्म प्रकाश पाइ दरसावै जगकूँ ॥
 सोचें ब्रह्मा—सृष्टि करूँ कस, नमधुनि आई ।
 तपही सबको सार, करो तप भ्रम मिटि जाई ॥
 दिव्य सहस्रत्तर परम, तप कीन्हों बिधि उग्र अति ।
 परमधाम त्रैकुण्डमहँ, लखे मुदित मन रमापति ॥

परम दिव्य त्रैकुण्ड कान्ति ऐश्वर्य अभित जहँ ।
 सुखासीन परिवार पारषद सह श्रीहरि तहँ ॥
 नारायनकूँ निरखि नीर नयननिमें छाँयौ ।
 पकरि बाँह भगवान् पुत्रकूँ ढिँग बैठाँयौ ॥
 वेदगरभते विष्णु बर, बोले बचन सुधासने ।
 वत्स ! बताओ बात सब, सृष्टि समय च्यों अनमने ॥

बोले ब्रह्मा—विभो ! जीव जग तत्त्व बतावैं ।
 दिव्य भागवत धरम सार संक्षिप्त सुनावैं ॥
 हँसि हरि बोले—मोइ कृपा ही तैं सब पावैं ।
 आदि अन्त मैं रहूँ, नेति कहि निगम जनावैं ॥
 बिना भये दीखै गुही, माया मेरी मानियो ।
 अन्वय अरु व्यतिरेकतैं, सदा मोइ पहिचानियो ॥

वेदगर्भ ! सुनु सबहिं शास्त्रको सार सुनाऊँ ।
 हूँ व्यापक सर्वत्र सर्वदा नहीं लखाऊँ ॥
 जाहि जानि जग रचो मोह होवै नहिं कबहूँ ।
 दैकें सद् उपदेश भये अन्तरहित हरिहूँ ॥
 बीणाबादक देवऋषि, सुनी पितातैं भागवति ।
 तिनि उपदेशे मम जनक, तोहिं सुनाऊँ सो नृपति ॥

जामें सर्ग, विसर्ग, स्थान, पोषण, ऊती सब ।
 मन्वन्तर, ईशानुकथा, सुनु लक्षण नृप ! अब ॥
 है निरोध पुनि मुक्ति दशम आश्रय बतलावैं ।
 दशम तत्त्वकी सिद्धि हेतु नौऊ कहलावैं ॥
 श्रुतितैं अरु बहु अर्थतैं, साकल्लात कोई कहैं ।
 जापै हरि किरपा करें, भक्ति अहैतुकि ते लहैं ॥

आश्रय सबके वही अखिलपति अलख अगोचर ।
 रचनाकूँ बिधि बनें भरनकूँ हों विश्वम्भर ॥
 सृष्टि समेटें सबहि तबहिं हरि शिव कहलावैं ।
 यों वे व्यापक ब्रह्म बिबिध विधि रूप बनावैं ॥
 भौतिक दैविक आत्मिक, तीनिहुकूँ नियमन करें ।
 बालकवत् क्रीड़ा करें, रचैं ताहि पोसैं हरैं ॥

कऱ्यो सृष्टि संकल्प रच्यो जज्ञ बसे उदरमहैं ।
 इन्द्रिय, मन, तनु-शक्ति रची पुनि प्राण उदित तहैं ॥
 भूख प्यास जब लगी कर्ण गोलक सब निकसे ।
 अन्तःकरण, प्रकाश, अहं, मन, चित, धी बिकसे ॥
 कर्ता भोक्ता हरि नहीं, सदा रहैं निरलेप हैं ।
 धरें रूप तोऊ बिबिध, उदासीन रचिकें रहैं ॥

प्रभु बिगटतैं ओज और सह बल प्रकटे सब ।
 पुनि उपजे ये सबहिं विषय इन्द्रिय देवहु तब ॥

तालुमाहिँ नभ देव रसन इन्द्रिय रस चाखै ।
 मुखमहँ बाचा, अग्निदेव बाणी बहु भाखै ॥
 प्राण, चक्षु, श्रोत्रहु, त्वचा, गन्ध, रूप, शब्दहु, परस ।
 वायु सूर्य दिग प्राण सब, क्रमशः देव भये हरष ॥
 भये हस्त जिनि काज ग्रहण सुरपति देवहु तहँ ।
 चलिबेकूँ द्वै चरण, विषय गति, विष्णु देव जहँ ॥
 विषय कामना हेतु उपस्थ प्रजापति जामें ।
 पायु गुदा मल त्याग देव मित्रहु हैं तामें ॥
 तनु तजि जावै अन्यमहँ नामि अपानहु मृत्यु भय ।
 कुक्षि आंत नस नदी-पति, देव तुष्टि पुष्टी विषय ॥
 निराकार निरलेप निराश्रय नित्य निरंजन ।
 माया आश्रय करत होहिँ साकार सगुन तन ॥
 उद्भिज अंढज और जरायुज होंवें स्वेदज ।
 स्थावर जंगम रूप जीव बनि प्रविशैं हरि अज ॥
 कर्म रहित कर्ता बनहिँ; नाम रूप धारन करहिँ ।
 स्वयं बाच्य बाचक नृपति ! धरि तनु धरणी दुख हरहिँ ॥
 उक्ता०—विष्णुरात सम्वाद शुक्र, मुनि शौनक बोले बचन ।
 हृदय हरष गद्गद गिरा, कृष्ण चरनमहँ फँस्योमन ॥
 छप्पय—अजी सूतजी ! याद बात इक आई अबई ।
 गये बिदुरजी तीर्थ भ्रमण हित तजिकें सबई ॥
 मुनि मैत्रेय समीप ज्ञान पायौ कहँ उननैं ।
 का का कीन्हें प्रश्न दयौ उत्तर का तिननैं ॥
 संत समागममहँ सदा, कथा कृष्णकी होहिँ नित ।
 सूत ! सुनाओ सरस सब, शुभ सम्वाद प्रसन्न चित ॥
 इति श्रीभागवत चरितके प्रथमाहमें सृष्टिउत्पत्ति नामक
 तेरहवाँ अध्याय समाप्त ।

(मासिक पारायण—तृतीय दिवसविश्राम)

अथ चतुर्दशोऽध्यायः

[१४]

सूत सुने मुनि-बैन नैन भरि आये उनके ।
 बोले गद्गद गिरा प्रश्न सुनिकें निज मनके ॥
 शौनकजो ! सर्वज्ञ आपु सत्र जानें बूझें ।
 कहाँ करें कस प्रश्न आपुक्कूँ ततछिन सूझें ॥
 अजी यही तो नृपतिने, कर्ण्यो प्रश्न शुक्रदेवतैं ।
 दैं हुँकारी तो कहूँ, त्रिंश देव ! निज देवतैं ॥

श्रीशुक्र बोले—भूप ! बिदुरने ये ही बातैं ।
 मैत्रे मुनितैं सुनी कहूँ तिनहींकुँ तातैं ॥
 राजा पूछे—प्रभो ! बिदुरजीकी मुनिवरतैं ।
 भेंट भई कब कहाँ ? गये जब बनकुँ घरतैं ॥
 श्रीशुक्र बोले—का कहूँ ! बिदुरभवन मुनि-मनहरन ।
 तिहि तजि तीरथकुँ गये, जहँ निवसे राधारमन ॥

राजन् ! बनिकें दूत देवकीनन्दन आये ।
 कौरव करि सत्कार राजमहलनिमहँ लाये ॥
 नाना व्यंजन धरे न तिनिकी ओर निहारे ।
 करिकें शिष्टाचार बिदुरके भवन सिधारे ॥
 पतिनी पगली प्रेमकी, छिलका हरिहिँ जिमा रहीं ।
 बिदुर भिगी केला दई, खाय कही वो रस नहीं ॥

ता घरमहँ बसि बिदुर बन्धुक्कँ सम्मति देवें ।
 बिदुरनीति बिख्यात जाहि सज्जन सब सेवें ॥
 पूछी जव धृतराष्ट्र सत्य सम्मति यह दीहीं ।
 राजन् ! घोर अनोति बन्धु पुत्रनि संग कोहीं ॥
 भ्राता ! भूलो गई जो, आगेकी सोचो सई ।
 धर्मराजके राजकुँ, देहु गई सो तो गई ॥

जिनके सिरपै श्याम तिनिहिँ फिर कौन अँदेसो ।
 निश्चय ताकी बिजय जासु रथ हाँकेँ केशो ॥
 धर्मनीतितें डरो राज्य यह संग न जावै ।
 पाप-पुण्य ही जायँ त्रिपुल धन काम न आवै ॥
 आये मुट्ठी बाँधिकेँ, हाथ पसारे जायँगे ।
 पुण्य करें सुख पायँगे, पाप करें पछितायँगे ॥

उल्ला०—बिदुर बचन धृतराष्ट्र सुनि, बोले-भैया ! सुत सगे ।
 त्यागूँ कैसे ?' बिदुर तब, मर्म बचन कहिवे लगे ॥

छप्पय—राजन् ! निकसै मैल देहतें कोइ न राखै ।
 डोंगर तनमहँ होयँ तनय कोई नहिँ भाखै ॥
 बिष्ठा बहु मल मूत्र देह ही तें नित होवें ।
 तनतें होवें पृथक् परसिकें सब तन धोवें ॥
 स्वयं तरें तरें कुलहिँ, ते सत्पुत्र कहावते ।
 नहिँ तो मलके कोट सम, ऋषि मुनि तिनहिँ बतावते ॥

यह दुरयोधन दुष्ट इष्टकुँ नहिँ पहिचानें ।
 मधुसूदनकुँ मूल मन्दमति मानुष मानें ॥
 कपटी कुटिल कुबुद्धि क्रूर कलिकी यह मूरति ।
 तैसे ई सब सचिव शकुनि दुस्सासन खलमति ॥
 राजन् ! चाहो कुशलता, कुलकी यह कारज करो ।
 कृष्णार्पण जाकुँ करो, सब जगको संकट हरो ॥

सुनत बिदुरके बचन दुष्ट दुरयोधन अधमति ।
 भौंह चढ़ी म्हाँ लाल अधर फरकें कोप्यो अति ॥
 तिरस्कार करि कहै—क्रूर कोनें बुलवायो ।
 काहे दासीपुत्र राजपरिषदमहँ आयो ॥
 कान पकरिकें कुटिलकूँ, करि कारो म्हाँ मूढ़ि सिर ।
 देहु निकासो देशतें, लौटे नहिं यह अधम फिर ॥

भौचक्के-से भये बन्धुकूँ बिदुर निहारें ।
 करै नीचता नीच न ताकूँ तनिक विचारें ॥
 किन्तु अन्धकूँ मौन निरखिकें अति घबराये ।
 सोचें-अब तो अन्त दिवस इन सबके आये ॥
 बोले—भैया ! स्वयंही, तेरे घरतें जाउँगो ।
 अब कब हूँ जा भवनमहँ, म्हाँ तोकूँ न दिखाउँगो ॥

परम भागवत बिदुर भये बाहर जब पुरतें ।
 मानों सद्गुण पुण्य सबहिं निकसे वा घरतें ॥
 करिबेकूँ व्योपार बनिक धन लैकें धावें ।
 त्यों लीये सँग पुण्य, बृद्धि हित तीरथ जावें ॥
 सभाद्वारपै धनुष धरि, नंगे पाँइनि चलि दिये ।
 शत्रु मित्र सम्बन्ध तजि, त्यक्तदंड मानों भये ॥

इति श्रीभागवत चरितके प्रथमाहमें बिदुर हस्तिनापुर त्याग नामक
 चौदहवाँ अध्याय समाप्त ।

अथ पञ्चदशोऽध्यायः

[१५]

दोहा—सूत कहैं-मुनि ! विदुर तब, सबईतें मुख मोरि ।

तीरथ करिवे चलि दये, हथिनापुरकूँ छोरि ॥

छप्पय—बन उपवन वर पुण्य सरोवर सरिता सुन्दर ।

चिह्नित देखे शंख चक्रतें मनहर मन्दिर ॥

कहूँ कृष्ण धरि विष्णु रूप श्रीरंग विराजें ।

विश्वनाथ श्रीशम्भु त्रिविध रूपनिमहँ राजें ॥

सब तीरथकी सार जो, आये ता ब्रज-भूमिमहँ ।

नीलबाल क्रीड़ा करो, माखन खायो चोरि जहँ ॥

देखी रसमय भूमि विदुर हियमहँ हरषाये ।

कृष्ण विरहमें विकल तहाँ श्रीउद्धव आये ॥

पथ भ्रम वश ज्यों भूलि मिलै परकीया उपपति ।

गंगा यमुना सरिस मिले मन मोद भयो अति ॥

उद्धवतें बोले विदुर, कुशल कृष्ण कुलकी कहो ।

कृष्ण बिना कस भ्रमत हो, संग सदा तुम तो रहो ॥

धन्य भाग हैं आजु भक्त उद्धव जी भेंटे ।

दर्शन दैकें देव ! दुरित दुख सब ई भेंटे ॥

भयो तिरस्कृत फिरूँ न मनमहँ हर्ष शोक है ।

विषय भोगमहँ फँस्यो बहिर्मुख अज्ञ लोक है ॥

यह हरिकी माया प्रबल, रचै खेल ठगिनी नये ।

जाते ते जगमहँ बचे, जे हरि शरणागत भये ॥

सखे ! कहो अब कुशल कुशलके कारण जे हैं ।
 शरणागत प्रतिपाल अबनिकें ज्ञाता ते हैं ॥
 संकर्षण बलरामदेवकी कुशल सुनाओ ।
 हैं सुखतें बसुदेव सबनिकी बात बताओ ॥
 उद्धवजी ! प्रद्युम्न अनु-रुद्धादिक जे स्वजन हैं ।
 ते यदुवंशी कुशल हैं, जे सब हरिकी शरन हैं ॥

पांडव प्रभुके भक्त सबनिकी कुशल सुनाओ ।
 अंध-बन्धु धृतराष्ट्र करें का सब समुझाओ ॥
 करिकें दर्शन यादि आपुके आये सबई ।
 इस्मृति पटपै लिखे त्रिज जीवितसे अबई ॥
 अथवा छोड़ो सबनिकूँ, चर्चा हरि ही को करौ ।
 तृषित हृदयकी शान्ति हित, कर्णनि हरि गुनतें भरौ ॥

सुनि उद्धव हरिनाम देहकी सुधि विसराई ।
 नाम धामतैं रूरा यादि लीला है आई ॥
 गद्गद बानी भई रूप सागरमहँ न्हाये ।
 रोमाञ्चित वपु भयो, अश्रु नयननिमहँ आये ॥
 भूले या संसारकूँ, नयन मूँदि तन्मय भये ।
 नित्य धाम वृन्दाविपिन, भ्यान धरत मनतैं गये ॥

उद्धव देखे बिकल बिदुर पहिले घबराये ।
 प्रेम दशा पहिचानि कानमहँ नाम सुनाये ॥
 देखी दशवीं दशा बहुत मनमहँ हरषावैं ।
 जानि कृतारथ कृष्ण-कृष्ण कहि चेत करावैं ॥
 मङ्गलमय मधुमय मधुर, मनमोहनके नाम सुनि ।
 शनैः शनैः सम्हले सखा, परत श्रवनमहँ मधुर धुनि ॥

बोले उद्धव सम्हरि धरी सिर रज व्रज-थलकी ।
 बन्धु त्रिदुर ! अब कहूँ कुशल कैसे यदुकुलकी ॥
 भाग्यहीन यह लोक अधिक यदुवंशी तामें ।
 पहिचाने प्रभु नहीं भये परगट कुल जामें ॥
 अजी, कुशल अब का कहें, यादवेन्द्रके संग गई ।
 समृद्धिशालिनी श्रीसहित, द्वारावति बिधवा भई ॥

हाय ! कहाँ वो परम सुखद श्रीहरि की भाँकी ।
 मन्द मन्द मुसकान चित्तहर चितवन बाँकी ॥
 आँखिनिक्कूँ वा छुटापानको चसको लाग्यो ।
 भये न जौलौ तृप्त, हमें हरि तौलौ त्यागो ॥
 उठवनि चितवनि कर परसि, हँसनि अंक भरि-भरि मिलनि ।
 चेष्टा ये सब श्यामकी, परम मधुर बोलनि चलनि ॥

कारे-कारे कुटिल केश मलि तेल सम्हारें ।
 गोरोचनको तिलक मोर मुकुटादिक धारें ॥
 कंकन कुंडल हार करवनी अंगद नूपुर ।
 शोभित होंवें स्वयं पाइ तनु सुन्दर मनहर ॥
 निरखहि निज प्रतिविम्बकूँ, अपन पपनपौ भूलिकें ।
 मुख मल्लूक मनहर स्वयं, चकित होहिं छवि देखिकें ॥

देश देशके भूप यशवर राजसूयमहैं ।
 निरखि मुग्ध सब भये नन्द नन्दनकी छबितहैं ॥
 घन-चातक, जल मीन शलभ-पावक उपमा सब ।
 फीकी सबरी भई एकटक लखें रूप जब ॥
 रचना विषयक चातुरी, विधिकी सब पूरी भई ।
 सब थलकी सुषमा सकल, कृष्ण-मूर्तिमहैं घरि दई ॥

जिनकी मधुमय हँसनि हृदयमहँ मिश्री घोरति ।
 जिहिँ चितवहिँ चितचोर भट्ट पगली है डोलति ॥
 मुरली अघरनि घरेँ बजावहिँ स्वरतेँ गावहिँ ।
 छोड़ि-छोड़ि गृहकाज त्रिबस ब्रज-बाला धावहिँ ॥
 लखि मोहनकी मधुरी, चुप्य होहिँ नहिँ कछु कहति ।
 आँखि मोचि थिरचित्त करि, आभीरिनि योगिनि बनति ॥

केशपाश ई पाश पास आवें फँसि जावें ।
 मौह कमान समान नाइ लखि डोरि चढ़ावें ॥
 चितवन तिरछी तोर लगे घायल करि जावें ।
 नहिँ जीवें नहिँ मरें अधमरी है बिललावें ॥
 तब गोदीमहँ सिर धर्यो, भक्त मुक्तभोगी विदुर ।
 अजी, अबतलक जाँघमें, चिन्ह परम शुभ है मधुर ॥

विदुर ! अजन्मा होहि जन्म लीयो मनमोहन ।
 करुनावश बनि तनय करहिँ गैयनिको दोहन ॥
 मथुगामहँ लै जन्म भागि गोकुलमहँ आये ।
 चोरीके अपराध दामतेँ श्याम बंधाये ॥
 अज अविनाशो गुन रहित, वेद जाहि अच्युत कहहिँ ।
 डर डरपै जातेँ सतत, सो डरिकें ब्रजमहँ रहहिँ ॥

व्यापक प्रकटै बह्नि काष्ठमहँ मंथन करिकें ।
 जलतेँ हिम है जाय उछारो करपै धरिकें ॥
 इन्नु अमल रस जमें मधुर मिश्री है जावै ।
 माखन पथमहँ व्याप्त मथेतें सो बिलगावै ॥
 सुखद मनोहर मधुर रस, घनीभूत नर तनु भयो ।
 नेत्रनिकूँ ललचायकें, अन्तरहित अब है गयो ॥

जैसी पूजा करे देव तैसो फल देवें ।
 वैसो वेतन मिलहि भूपकुँ जिहि विधि सेवें ॥
 किन्तु कृष्णकी बानि सवनितें परम निराली ।
 भाव कुमावहु आइ द्वारतें जाय न खाली ॥
 बालघातिनी पूतना, रक्तपान राक्षसि करहि ।
 दई दयावश मातुगति, तिहि त्रिनु को भवदुख हरहि ॥

नाम जाति कुल कर्म भाव सम्बन्ध न पेखें ।
 कहहु जीव अल्पज्ञ अलखकुँ कैसे देखें ॥
 कैसे हूँ आ जाय ताहि ओहरि अगनावें ।
 दुर्जनता दुख मेंटि परम निज धाम पठावें ॥
 पापी, द्वेषो, गुनरहित, नित निन्दें नित अघ करें ।
 तामस, क्रूर, पिशाच खल, देखि मरें तेहु तरें ॥

श्रीवृन्दावन परम रम्य कालिन्दी कुंजनि ।
 नित बसंत जहँ बसै मधुर स्वर मधुकर गुंजनि ॥
 गावें रोवें हँसैं तहाँ नर नाट्य दिखावें ।
 स्वरमय वेनु बजाय ग्वाल सँग गाय चरावें ॥
 मामाजी सौगातमहँ, मेजे भीषन असुर गन ।
 खेले तिनिहँ बालवत, मारि दई चरननि शरन ॥

नाथ्यो कालिय नाग नीर—हृद निर्मल कोन्हों ।
 इन्द्रयागको भाग राज गिरवरकुँ दीन्हों ॥
 कर्यो कोप सुरराज प्रलयको जल बरसायौ ।
 ब्रजवासिनि करि अभय शैल कर कमल उठायौ ॥
 ग्वाल बाल गोपी गऊ, सब जलतें निर्भय भये ।
 रस बरसायौ रासमहँ, हरि अन्तरहित है गये ॥

वृन्दावनमहँ प्रकट चरित अनुपम दरसाये ।
 मथुराजीतें गये फेरि मथुरामहँ आये ॥
 मामाको आतिथ्य ग्रहण करि हरषि पधारे ।
 गज मुष्टिक चाणूर दुष्ट सब पकरि पछारे ॥
 सब असुरनिके मुकुटमनि, कुलकलंक वा कंसकूँ ।
 मारि घसीट्यो गलिनिमहँ, अभय कर्यो यदुवंशकूँ ॥

त्रिदुर ! कृपात्रश कृष्ण करें क्रीड़ा जो जगमहँ ।
 जहँ जहँ सुमिरहिं भक्त, होयँ परकट प्रभु तहँ-तहँ ॥
 कहूँ पुत्र बनि प्रेम सहित पितु पगकूँ पूजें ।
 कहूँ धारिकें अस्त्र शस्त्र लै रनमहँ जूझें ॥
 जाकी बानी वेद हैं, सबहिँ शास्त्र उच्छ्वास हैं ।
 जाँहिँ पढ़न चटसार ते, सब उनके परिहास हैं ॥

मथुराहूँतें भगे डरे द्वारावति आये ।
 करै न कोई ब्याह दाव अरु पेच भिड़ाये ॥
 कर्यो । राकछस ब्याह छीनिकें कन्या लीन्हों ।
 रुक्मी क्रोधित भयौ दुरदशा ताकी कीन्हों ॥
 बाणासुर, शम्बर, द्विविद, दंतवक्रत्र, बल्वल असुर ।
 मरवाये मारे कछू, हर्यो भार भू सुरेश्वर ॥

हरि सोचें—भू भार न उतर्यो सबरो अबई ।
 यदुकुलको संहार होइ उतरैगो तबई ॥
 बहुत बढ्यो यदुवंश अंश मेरे हैं सब ये ।
 मदमाते है लड़ैं परस्पर नशिहैं तब ये ॥
 प्रेम प्रदर्शित कर्यो बहु, पुनि मरवाये बन्धु सब ।
 भार उतार्यो अवनिको, गवने हरि गोलोक तब ॥

जाते जत्र जे श्याम करावें जहँ जो जैसे ।
 सो तत्र तुरतहि तहाँ करै प्रेरित है तैसे ॥
 यदुकुलको संहार करन चितमहँ जत्र आयौ ।
 तत्रई तपतें पूत मुनिनिर्ते शाप दिवायौ ॥
 ज्यों बाजीगर बानरहिँ, नाच नचावै जत्र जसहिँ ।
 त्यों ई ईश अश्वीन है, जीव नचै यह स्ववश नहिँ ।

द्वारावतिमहँ कृष्ण दरश हित मुनिगन आये ।
 कर्यो हास परिहास कुमारनि बहुत खिजाये ॥
 कुपित तपोधन भये शाप कुलभरिकूँ दीन्हों ।
 सुन्यो श्याम जत्र शाप समर्थन हैं निकें कीन्हों ॥
 सब मिलि गये प्रभासमहँ, भयौ परस्पर युद्ध अति ।
 वंश अग्नि-कलितें जरे, हरिप्रेरित अस भई मति ॥

मोतें हरिने कही—जाहु बदरीवन ऊचो ।
 किन्तु दैवगति समुझि चल्थो हरि पीछे सूचो ॥
 यदुकुलको संहार कर्यो हरि पीपर तरुतर ।
 बैठे, हों टिँग गयो ब्रिहँसि बोले श्रीयदुवर ॥
 भले मिले उद्धव सखे ! आये तुम हो त्रिमलमति ।
 कहूँ भागवत सरस अति, सुनैं पढ़ें होवै सुगति ॥

भूखेकूँ ज्यों खीरि पिपासितकूँ ज्यों पानी ।
 त्यों अतिशय प्रिय लगी मधुर श्रीहरिकी बानी ॥
 विनय करी—हे प्रभो ! भक्तिको तत्व बतावैं ।
 शुद्ध भागवत ज्ञान दान करि दुःख मिटावैं ॥
 कमलनयन विनती सुनी, परमतत्व मोतें कस्यो ।
 आयसु सिर धरि बन्दि पग, बदरीवनकूँ चलि दयो ॥

सूधो आयौ यहाँ आपुने दरशन दीन्हों ।
 शोक मोह संताप आपुने सब हरि लीन्हों ॥
 बिदुर कहें—हे सखे ! कृपा हमहूँपै कीजे ।
 हरितें पायौ ज्ञान ताहि हमहूँकूँ दीजे ॥
 उद्धव बोले—बिदुरजी ! बड़भागी हैं आपु अति ।
 जिनकूँ हरि सुमिरन करें, अन्त समयमहँ अखिलपति ॥

मुनि मैत्रेय समीप कही हरिने यह बानी ।
 मोर भक्त है बिदुर परमप्रिय अतिशय ज्ञानी ॥
 तिनिकूँ मेरो ज्ञान अवसि मुनिवर ! उपदेसैं ।
 जिनकूँ सुमिरैं श्याम सराहैं तिनकूँ कैसैं ॥
 आपु पधारैं गङ्ग तट, हौं बदरीवन जाइकैं ।
 हरि आराधन करौं तहँ, कंद मूल फल खाइकैं ॥

कीन्हीं हरिने सुरति दीनकी अन्त समयमहँ ।
 बिदुर भये अति विकल गिरे मूर्छित हैकैं तहँ ॥
 करिकैं दण्ड प्रणाम चले उद्धव बदरीवन ।
 बिदुर भये यों दुखित कृपनको ज्यों खोयो धन ॥
 कृष्ण-कथा सबरी सुनी, संसकार पिछले जगे ।
 सुमिरि सुमिरि लीला ललित, ढाह मारि रोवन लगे ॥

बिदुर संग नहिं गये चेतना उद्धव सँगई ।
 गई, चेतना शून्य भये ब्याकुल वे तबई ॥
 धर्यो धीर पुनि उठे शून्य सब देइ दिखाई ।
 पुनि कृपालुकी कृपा यादि तबई है आई ॥
 मुनि मैत्रेय समीप वे, तुरत तहाँतें चलि दये ।
 सुरसरि-तटकी बाट गहि, हरिद्वार पहुँचत भये ॥

इति श्रीभागवतचरितके प्रथमाहमें बिदुर उद्धव सम्बाद नामक
 पन्द्रहवाँ अध्याय समाप्त

अथ षोडशोऽध्यायः

[१६]

पिता गोदतें जहाँ अवनियै आई गङ्गा ।
हर-हर गायन करति तालदें तरल तरंगा ॥
बुशवर्त अति विमल-द्वार-गंगा मायापुर ।
सप्त स्रोततें बहें देवसरि अति उमगै उर ॥
वास करें तहँ भक्तवर, मुनि मैत्रेय कृपायतन ।
भये विदुर संतुष्ट अति, सुठि स्वभाव लखि मुदित मन ॥

देखे मुनि आसीन प्रेममहँ तन्मय बिह्वल ।
परम शान्त गम्भीर निरामय निरमल निश्चल ॥
करिकें दरशन शोक मोह सब भय भ्रम भागे ।
जाइ दंड वत परे अवनियै मुनिके आगे ॥
करत दंडवत विदुरकूँ, लखि मुनिवर ठाढ़े भये ।
बरबस तुरत उठाइकें, निज हियमें चिपटा लये ॥

विधिवत करि आतिथ्य कुशल पूछी सबकी मुनि ।
कछु करिकें विश्राम चलाई बात विदुर पुनि ॥
हँसि बोले मुनि—विदुर ! यादि हरि तुमरी कीन्हीं ।
करूँ तुम्हें उपदेश मोह यह आयसु दीन्हीं ॥
पूछो जो शंका तुमहिँ, सब संशय अबही हरहुँ ।
जो उपदेश्यो मोहिँ हरि, समाधान तातें करहुँ ॥

तब बोले श्रीविदुर—बिमो ! इक बात बतावैं ।
काहे ये सब जीव करम करि दुख ही पावैं ॥

दुख निवृत्ति सुख हेतु करहिं शुभ अशुभ करम नर ।
किन्तु न दोऊ होयँ क्लेश ही पाहिं निरन्तर ॥
नर सुरतर तर ज्यों मुदित, संत दरश त्यों सुख लहैं ।
साधहिं पर-कारज सतत, संत देह धरि दुख सहैं ॥

विभो ! विशुद्ध चरित्र श्यामके मोह सुनावैं ।
पावैं शाश्वत शान्ति सुगम-सी गैल बतावैं ॥
बर्म काम अरु अर्थ पिता सन सब सुनि जाने ।
तृप्ति न तिनिहैं भई क्षुद्र कैतवयुत माने ॥
कृष्ण कथाकी लगन ई, विषय विरक्त बनावती ।
मनमहँ मोद बढ़ावती, सबरे दुःख मिटावती ॥

नित भारू जहँ लगै न कूरो करकट होवै ।
त्यों मनके सब मैल कथा-जल तिनिहँ धावै ॥
सुनिहँ सिंह दहाड़ शशक गीदड़ भगि जावैं ।
कामादिक सब भगैं कथातैं हिय हरि आवैं ॥
शोचनीय ते पुरुष अति, हरि चरचातैं जे त्रिमुख ।
कथा-श्रवन कीर्तन बिना, जीव लहहिं नहिं शान्ति सुख ॥

सुनी विदुरकी बात बहुत मुनि हियमहँ हरषे ।
रोमांचित तनु भयो नयन बरषा सम बरषे ॥
बिदुर धन्य तुम धन्य धरम हो नर तनुधारी ।
पावन कुरुकुल कर्यो व्याससुत दृढव्रतधारी ॥
पर उपकार विचारि हिय, प्रश्न कर्यो पावन परम ।
ज्यों हरि सिखयो त्यों कहहुँ, प-मधरमको सुनु मरम ॥

खोजैं जे सुख विषय बासनामहँ ते जड़—मति ।
जगके चंचल विषय भोगतैं रोग बढ़हिँ अति ॥
सूआ सेमरि सेइ अंतमहँ सो पछितावै ।
रोपै वृक्ष बबूर आम फल कैसे खावै ॥

दुःख नाश सुख जे चहहिं, विषवत विषयनिक्कूँ तजहिं ।
है अनन्य अखिलेशकूँ, सर्वभावतें नित भजहिं ॥

नटनागर की नाट्य भूमि जा जगकूँ जानों ।
जहाँ दृष्टि मन जाहि ताहि सत्र माया मानों ॥
लीलातें गुण कर्म गहें पुनि बिहरें तामें ।
लीला ललित ललाम करहिं बहु तनु धरि जामें ॥
बालकवत् क्रीड़ा करहिं, हरष, शोक इच्छा रहित ।
कटहिं तुरत बन्धन जगत, सुनहिं चरित श्रद्धा सहित ॥

अन्तःकरण समेत बाह्य करणादिक सबई ।
विषयनितें उपराम होइ दुख कटिहैं तबई ॥
माया, भिष्या-ज्ञान अविद्या—भ्रम भगि जावें ।
होवै ज्ञान यथार्थ प्रतिष्ठा निज पद पावें ॥
मायापति मैत्री करहु, माया चरचा त्यागिकें ।
चक्र—चक्र दुलहिनि करै, पति लखि जावै भागिकें ॥
कहें बिदुर—हे प्रभो ! सृष्टिको सार बतावें ।
नाना रूप बनाय विश्वपति काहि लुभावें ॥
हंसि बोले मुनि—बिदुर ! धन्य कुरुकुलके भूषन ।
कहूँ भागवत सुनत दूर होवें दुख दूषन ॥

संकरषन भगवानने, सनकादिक मुनि सन कही ।
तिनितें सांख्यायन सुनी, पूज्य पराशर पुनि लही ॥
मैंहूँ चाहूँ किन्तु भागवत तत्व लहूँ कस ।
श्रद्धा संयम रहित जाइ गुरु निकट कहूँ कस ॥
मुनि पुञ्जस्थनेकही—चलो हम तुम्हें दिवावें ।
शक्ति—पुत्र मम मित्र प्रेमतें तुम्हें सिखावें ॥
करी कृपा गुरुदेवने, गुह्य ज्ञान मोकूँ दयौ ।
तात तुरत तिहि तुम गहौ, हरिहू ने जो पुनि कह्यौ ॥

अच्छा, अब उत्पत्ति सृष्टिकी तुमहिँ सुनाऊँ ।
 ज्यों हरि माया संग रचें सब क्रम बतलाऊँ ॥
 नाभिकमलतें ब्रह्म भये जल ई जल पेखें ।
 ऊपर नीचे निरखि जनक हरिकूँ नहिँ देखें ॥
 विफल मनोरथ जब भये, योग ध्यानमहँ लागि गये ।
 योग-भाव भावित हृदय, महँ दरशन हरिके भये ॥
 इस्तुत विधिनेँ करी ईश हँसि आयसु दीन्हों ।
 सृष्टि पूर्ववत् रचौ सुनत दश विधि की कीन्हों ॥
 अत्रि, अंगिरा, पुलह, दक्ष, भृगु, श्रीनारद मुनि ।
 रचे बसिष्ठ मरीचि और कृतु मुनि पुलस्त्य पुनि ॥
 इनि मानस सब सुतनितें, वृद्धि सृष्टिकी नहिँ भई ।
 चिंतित चतुरानन भये, युक्ति विचारी पुनि नई ॥
 सृष्टि करनकूँ कहें जिनहिँ तें ते खिसिआवें ।
 बेमनतें कछु करें, कछू बहु बात बनावें ॥
 विधि हरिको करि ध्यान देहतें नारि बनाई ।
 आधेतें नर भये नारि लखि बुद्धि लुभाई ॥
 हक्के बक्के सब भये, सृष्टि करन इच्छा भई ।
 मृगनयनी मनहरमुखी, शतरूपा मनुकूँ दई ॥
 विधि सामग्री सुखद सृष्टिकी लखि हरषाये ।
 उदासीन जे पूर्व निरखि तेऊ ललचाये ॥
 बोले ब्रह्मा—बत्स ! ब्याह हम सबको करि हैं ।
 कुंजी अब तो मिली सृष्टि करि जगकूँ भरि हैं ॥
 नारद बांले—पिताजी ! श्रीहरिके गुन गाउँगो ।
 कारेसिरकीके नहीं, हौं चक्करमहँ आउँगो ॥
 इति श्रीभागवतचरितके प्रथमाहमें सृष्टिवर्णन नामक

सोलहवाँ अध्याय समाप्त

(मासिक पारायण चतुर्थ दिवस विश्राम)

अथ सप्तदशोऽध्यायः

[१७]

सुन्दर दुलहिनि पाइ कहें मनु पितु सन बानी ।
 करहुँ कहा अत्र काज रचहुँ कहँ निज रजधानी ॥
 बिधि हँसि बोले-अनघ ! सृष्टिको चक्र चलाओ ।
 पुत्र, पौत्र परपौत्र रचौ, बहु बंश बढ़ाओ ॥
 पयमहँ पृथिवी परी प्रभु, ताकूँ बाहर करहिँ अत्र ।
 बसहिँ जोव सुख लहहिँ सब, होहि मही उद्धार जब ॥
 सुनिकें मनुके बचन ध्यान चतुरानन कीन्हों ।
 पृथिवी तो पाताल गई विधिने सब चीन्हों ॥
 अति ही चिंतित भये करूँ का अत्र हों भाई ।
 सृष्टि चक्र तब चलै करें जब श्याम सहाई ॥
 हम तो उनके यन्त्र हैं, वेही कारण काम हैं ।
 अपनेते होवै न कछु, करनहार घनश्याम हैं ॥
 ध्यान करत बिधि युगल नयन सरसिज सम बिकसे ।
 हरि शिशु सूकर वेष धर्यो नासातें निकसे ॥
 लघु अंगुष्ठ समान यज्ञ तनु वेद बखानें ।
 केवल किरपा प्राप्त मनस्वी जिनिक्कूँ मानें ॥
 अति अद्भुत तनु निरखिकें, बिधि त्रिस्मितवत् है गये ।
 तब तक सूकर रूप हरि, हस्ती सम नभमहँ भये ॥
 तुरत शिला सम बढ़े पर्वताकार भये पुनि ।
 कान्ति तेज ऐश्वर्य निरखि निर्वाक् भये मुनि ॥
 बिधि सोचैं—ये यज्ञपुरुष मन मेरो मोहैं ।
 रूप अनूप बनाय अघर नभमहँ अति सोहैं ॥
 सूकर हरि पयमहँ घुसे, लाये पृथिवी दाढ़ धरि ।
 हिरण्याक्ष मार्यो असुर, धरो धरा जलके उपरि ॥

सुनी बिदुर हरि कथा सुखद संचित सरस अति ।
 तृप्ति न मनमहँ भई कथा कोर्तनमहँ दृढमति ॥
 बोले—मुनि ! बाराह चरित का पूर्ण भयो है ।
 नहिँ सुनिकेँ सन्देह हमारो नाथ गयो है ॥
 हिरण्याक्ष काको तनय, कहाँ भेंट हरितेँ भई ।
 युद्ध भयो कस कहाँपै, कस पाताल मही गई ॥

कृष्णकथा रुचि होहि सरल जीवन है जवई
 सुनेँ सुयश सब समय श्रवन सार्थक हैं तवई ॥
 सोवें खावें करें पुत्र पैदा पशु पच्छी ।
 नर तनु यही विशेष लगें हरि लीला अच्छी ॥
 संत सरल चित-जगत् जन, चरण गहत सब सुख लहहिँ ।
 यदपि भक्त नहिँ हों तदपि, कथा कृपा करिकेँ कहहिँ ॥

बोले मुनि मैत्रेय—बिदुर ! विस्तार बताऊँ ।
 जस बिधि सन इतिहास सुन्यो तस तोहिँ सुनाऊँ ॥
 इक दिन सन्ध्या समय दक्ष दुहिता दित देवी ।
 हैकेँ कामातुरा गई, जहँ पति हरिसेवी ॥
 कजरारे नैनानितेँ, घूँघट महँ तें चोट करि ।
 चाहति पतितेँ रति तुरत, शील त्यागि पटुका पकरि ॥

साम दाम अरु भेद दंडतेँ मुनि समुभावहिँ ।
 असमयमहँ यह कार्य निन्द्य पुनि पुनि बतलावहिँ ॥
 भीषण बेला कछो रुद्रको भय दिखलायो ।
 किन्तु काम बस भई धर्म मत मन नहिँ भायो ॥
 कामातुर नर नारि है, सत्य, शील, संयम तजहिँ ।
 विनय विवेक बिसारिकेँ, विषय बासना ही भजहिँ ॥

हाथी वशमहँ करें सिंहकुँ पकरि पछारें ।
 परव्रत डारें तोरि सिन्धुतें रतन निकारें ॥
 जायँ रसातल फोरि गगनमहँ अधर उड़ावहिं ।
 विष हालाहल तोदण खाहिँ पुनि ताहि पचावहिं ॥
 कबहुँ न पग पीछे पर्यो, सदा समर विजयी भये ।
 किन्तु कामके कुसुन सर, लगत तुरत ते गिरि गये ॥

अहंकार अत्रिवेक कामकुँ तुरत बुलावें ।
 नर नारिनि संमोह मान मद खींचि गिरावें ॥
 विद्या, जप, तप, शास्त्र, मौन, व्रत सबहिं मुलावें ।
 रहें न बिरति त्रिवेक कुसुम सर हिय धँसि जावें ॥
 कृष्णकथा कीर्तन सतत, होय काम आवै न तहँ ।
 जिनको मन मन्मथ मथ्यो, ते पुनि पावें शान्ति कहँ ॥
 कश्यप दितिकुँ ऊँच नीच सब विधि समुझायो ।
 किन्तु कामवश भई धर्म मत मन नहि भायो ॥
 होनार अति प्रव्रज प्रजापति मनमहँ मानो ।
 विधिको यही विधान अत्रश्यम्भावी जानो ॥
 नारि विरोध अनिष्ट अति, तासु व्यथा मुनिने हरी ।
 करिकें गर्भाधान तब, दिति इच्छा पूरी करी ॥

होत कामके शान्त भई दिति लज्जित भारी ।
 बोली गद्गद गिरा छिमहु प्रभु चूक हमारी ॥
 मुनि बोले—तव पुत्र होहिँगे पापी कामी ।
 बली साहसी बड़े हनहिँ तिनि अन्तरयामी ॥
 किन्तु पौत्र हरि भक्त है, यश जगमहँ फैलायगो ।
 वाके भक्ति प्रभावतें, कुल समस्त तरि जायगो ॥

इति श्रीभागवत चरित के प्रथमाहमें दिति गर्भ स्थापन नामक
 सत्रहवाँ अध्याय समाप्त

अथ अष्टादशोऽध्यायः

[१८]

सुने पुत्र अति क्रूर अधम सबकुँ संहारें ।
शंकित है शत वर्ष रही गर्भहिं दिति धारें ॥
उग्र तेजतें भये हीन सूरज शशि जबई ।
ब्रह्मलोककुँ गये देवता मिलिकें सबई ॥
इन्द्रादिक बोले—प्रभो ! ओज तेज सबको गयो ।
दशहुँ दिशिनिमहँ दयामय ! अन्धकार काको भयो ॥

आपु कालके काल जगत्पति अन्तरयामी ।
भूत-भविष्यत-वर्तमान सबईके स्वामी ॥
हस्तामलक समान विषय सब विदित जगतके ।
करहिं कर्म नित सोहिँ होयँ जो जगके हितके ॥
देव, दैत्य, दानव, असुर, को प्रबिस्यो दिति उदरमहँ ।
तेजहीन सबई करे, व्यथित भये अब रहहिँ कहँ ॥

हँसिकें ब्रह्मा कहें—विष्णु-पार्षद ये आये ।
सनकादिक है कुपित शाप दै भूमि गिराये ॥
बोले विस्मित देव—विभो ! सब बात बताओ ।
माया रहित कुमार दयो कस शाप सुनाओ ॥
ब्रह्मा बोले—मम तनय, हरि लोलामहँ नित निरत ।
हरि दरशनकुँ गये मिलि, विष्णु-लोक घूमत फिरत ॥

दिव्य धाम बैकुण्ठ बसैं हरि शुद्ध सत्त्वमय ।
 जहाँ न ईर्ष्या द्वेष दम्भ छल कपट कष्ट भय ॥
 नैःश्रेयस वन जहाँ दिव्य पादप सुखकारी ।
 सब ऋतु है साकार रहैं अतिशय प्रियकारी ॥
 कमल कुमुदिनी सोहिं सर, लता माधवी मधुमई ।
 मधुप गुञ्जि गावैं जहाँ, कृष्ण कथा नितई नई ॥

कमला तुलसी हिलीं मिलीं निज नाथ रिझावैं ।
 हृदय कंठमहैं लिपटि प्रेम परिरंभन पावैं ॥
 तजि लक्ष्मी चांचल्य गहैं कर कमल धुमावैं ।
 मानो मनिमय भवन मोहि मार्चनी लगावैं ॥
 कथा कीरतनतैं विमुख, तिनको नर तनु ही वृथा ।
 ते नहिं निरखैं नाकपुर, हरिपुरकी पुनि का कथा ॥

श्रद्धा संयम सहित सुयश हरि मुनैं सुनावैं ।
 प्रेम पुञ्जक तनु होहि गिरै हँसि रोवैं गावैं ॥
 तुलसी पूजन करें भागवत भगवत मानैं ।
 परघन लोष्ठ समान मातु सम परतिय जानैं ॥
 त्रिभुवनकी सम्पति मिलै, तऊ न जावै विषय मन ।
 स्वाँस-स्वाँस पै हरि रटैं, ते निरखैं बैकुण्ठ जन ॥

चित्र विचित्र विमान विभूषित परम दिव्य जहैं ।
 सनकादिक मुनि मुदित योग ब्रह्मतैं पहुँचैं तहैं ॥
 चित्त न चंचल भयो निरखि शोभा उपवन की ।
 मनमहैं अतिई उग्र लालसा हरि दर्शनकी ॥
 महल मनोहर मनि जटित, श्रीहरिके देखत भये ।
 द्वारपालके त्रिनु कहैं, नंग धड़ंगे घुसि गये ॥

छै ड्योढ़िनिक्कूँ लांघि, सातवीँ पै पहुँचे सब ।
 दौवारिक द्वै कुपित लखे कर वेत्र लिये तब ॥
 ज्योंई भीतर घुसे तुरत तिननें ते टोके ।
 मुनि बोले करि क्रोध—क्रूर ! कस हम सब रोके ॥
 भू पै जनमो दैत्य है, फिर ऐसो न करो कहीं ।
 सुन्यो शाप पग परि कहें, होवें हरि बिसरें नहीं ॥

दयासिन्धुने सुनी ब्रह्म मानससुत आये ।
 अपमानित है शाप दयो सुनिकें घबराये ॥
 नंगे चरननि चले चरनदासी हूँ त्यागीं ।
 छत्र चँवर लै भृत्य भगे कमला सँग लागीं ॥
 जिन चरननिको चाहमहँ, चारिहुँ चंचल चित भये ।
 मुनि ध्यावें हियमहँ जिन्हें, करि नंगे तिनकूँ गये ॥

गरुड़ कन्ध कर धरें कोटि मनमथ मन मोहें ।
 पद्मा पद्म घुमाय संग विद्युत् सम सोहें ॥
 अस्त व्यस्त पग परें अनुग्रह हित अति आतुर ।
 प्रेम स्रोत बहि चल्यो हियो करुणातें कातर ॥
 नयननिमहँ संजीवनी, अंजन रंजन सो करत ।
 सम्मुख निरखे मुनिनि हरि, शशि सम तम हियको हरत ॥

लखिकें रूप अनूप मुनिनिके भव भय भागे ।
 चरण कमलमहँ परे बिकल है रोवन लागे ॥
 क्षमा प्रार्थना करी कह्यो सब दोष हमारो ।
 किंतु कृपानिधि कहें—कियो अपराध तिहारो ॥
 करूँ मलिन जय विजय ने, मुनिगन ! मेरो अमल यश ।
 अज्ञ न जानें मर्म मम, पराधीन हौं भक्तवश ॥

मेरी बानी वेद ताहि जो तप करि धारें ।
 अति चंचल जो चित्त योग करि ताकूँ मारें ॥
 पूजनीय ते विप्र तृप्ति करि तिन्हें जिमावें ।
 परम धाम वैकुण्ठ सुकृति ते निश्चय पावें ॥
 भुज उठाय करि शपथ हौं, सत्य सत्य बानी कहूँ ।
 सबहिँ सहन तो करहुँ परि, विप्र निरादर नहिँ सहहुँ ॥

सनकादिक पुनि कहें—प्रभो ! हम दास तिहारे ।
 दया दीन जन जानि करी नहिँ दोष बिचारे ॥
 आपु न ऐसो कहहिँ विप्रकूँ फिर को मानें ।
 जगमहँ विप्र न रहहिँ धर्मकूँ फिर को जानें ॥
 वेद धमके मूल हैं, विप्र तिनहिँ धारन करहिँ ।
 हानि होहि जत्र धर्मकी, तत्र तनु धरि प्रभु भय हरहिँ ॥

काम अनुज बस भये शाप हम दयो भूलतैं ।
 अहंकार अब नाथ ! हमारो नस्यो मूलतैं ॥
 हरि हँसि बोले—नहीं विप्रवर ! दुख मत मानो ।
 शाप अनुग्रह माहिँ मदा मम इच्छा जानो ॥
 तुष्टि भई हरि दरसतैं, बचन सुनत निरभय भये ।
 चरण कमल सिर धूरि धरि, सनकादिक मुनि चलि दये ॥

इति श्रीभागवत चरितके प्रथमाहमें जय विजय शाप नामक

अठारहवाँ अध्याय समाप्त

(पाक्षिक पाठ द्वितीय दिवस विश्राम)

अथ एकोनविंशोऽध्यायः

[१६]

जो जगकी उत्पत्ति प्रलय पालनके स्वामी ।
 अच्युत अखिल अनादि अखंडित अन्तरयामी ॥
 जिनकी माया कठिन पार पंडित नहिँ पावहिँ ।
 वेद दामपहँ बँधे जगतकुँ नाच नचावहिँ ॥
 जगकुँ जिनने रच्यो है, जो जाको पालन करहिँ ।
 जीव करें फल होहि का, श्रीहरि हो संकट हरहिँ ॥

नर तनुको फल जिही विष्णु शरणागत हों ।
 विषय वासना माँहि व्यर्थ जीवन नहिँ खों ॥
 स्वेच्छातें को रोग शोककुँ पुरुष बुलावे ।
 विनु प्रयत्न आ जाहिँ सुख त्यो ही आजावे ॥
 कृपा प्रतीक्षा नित करहु, दुःख दयामय हरिङ्गे ।
 मानि वचन निधि चले सुर, प्रभु सब मंगल करिङ्गे ॥

दिति देवी इत डरी करहि नहिँ प्रसव सुतनिक्कुँ ।
 कश्यप आयसु दई निकारो अब दैत्यनिक्कुँ ॥
 पति आज्ञा सिर धारि यमज सुत जनमे दुरधर ।
 स्वर्ग भूमि नभ माँहिँ भये उतपात भयंकर ॥
 ब्रह्माजी पंडित बने, नामकरण तिनिको कर्यो ।
 हिरनकशिपु बड़ नाम धरि, हिण्याक्ष लघुको धर्यो ॥

दिति देवीके पूत भूत सम पल पल बाढ़े ।
 सिरतें छूयें स्वर्ग होहिं जब दांज ठाढ़े ॥
 सब ढरिक्के भगि जायँ दूरितें दैत्यनि देखें ।
 तेजहीन है जायँ जिनहिँ स्वाभाविक पेखें ॥
 करहिं उपद्रव नित नये, तीन लोक वशमहँ करे ।
 कबहुँ न कोई कछु कहैं, दुवके देव रहैं डरे ॥

हिरनकशिपुने जगत कर्यो बश विधिके बरतें ।
 हिरण्याक्ष लै गदा विजयकूँ निकस्यां धरतें ॥
 स्वर्गलोकमहँ गयो भयो कोलाहल अतिशय ।
 इत उत सुर सब भगे छिपे सबकूँ भारी भय ॥
 सुरनि नपुंसक समुक्ति खल, दैत्य हँस्यो गरजन करी ।
 धूमि धामिकें चलि दयो, देव विपति सिरतें टरी ॥

स्वर्गलोकतें निकसि दैत्य जलनिधि टिँग आयो ।
 सुनि गर्जन गम्भीर समुक्ति ललकार रिसायो ॥
 गदा वेगतें तरल तरङ्गनि तोरत फोरत ।
 वरुणलोकमहँ गयो मत्त मद मूँछ मरोरत ॥
 अद्भुत जान्यो जन्तु जिहि, जलचर जीव भगे डरे ।
 किन्तु वरुणजी असुर लखि, सिंहासनतें नहिँ टरे ॥

पहुँचि कर्यो उपहासविहँसि खल वचन उचार्यो ।
 लोकपाल डंडौत लट्ट सिरपै जनु मार्यो ॥
 वरुण देवने कही—असुरपति ! इत कित आये ।
 कैसे किरपा करी कहो कस भूप रिसाये ॥
 को करिके अपकार तुव, रहे जगतमें कुशल बसि ।
 वचन सरल मधुमय सुने, असुर अकड़ि बोल्यो विहँसि ॥

लोकपाल हैं आपु जगतमहँ यश बहु छायाँ ।
 शौर्य वीर्य बल कीर्ति सुनी तुम्हरे दिँग आयौ ॥
 द्वै—द्वै होवें हाथ गदा मेरी सहि लीजै ।
 गदायुद्ध वा द्वन्दयुद्धकी भिक्षा दीजै ॥
 बरुण हँसे बोले—असुर ! ते दिन तो अब लदि गये ।
 लक्ष्मीपति तोतें लड़हिँ, अब हम तो बूढ़े भये ॥

को लक्ष्मीपति कहाँ रहे कैसे वो पावे ।
 किहि विधि वो बल बीर समरमहँ सम्मुख आवे ॥
 असुर सुनत रिस भर्यो चल्थो श्रीहरिकूँ खोजत ।
 सम्मुख नारद लखे सुघड़ बीना कर शोभित ॥
 बर बीणाके सुरनिपै, गुन गावत गोविन्दके ।
 मत्त मधुप मकरन्दके, श्रीहरि पद अरविन्दके ॥

हिरण्याक्ष मुनि लखे मन्द हँसि कीन्हों आदर ।
 दैत्यराज कहँ चले कहँ नारद मुनि सादर ॥
 बोल्थो—मुनि ! मम हाथ खुजावहिँ युद्ध दिवाओ ।
 कैसेहूँ मुनिनाथ ! विष्णुतें मोहिँ मिलाओ ॥
 मुनि बोले—पातालमहँ, हरि बराह बपु धारिकें ।
 बिचरहिँ नाशहिँ गरबकूँ, असुर ! तोहि वे मारिकें ॥

विष्णु वीर्य बल सुनत चल्थो निज गदा घुमावत ।
 श्रीबराह भू लिये लखे सम्मुख ही आवत ॥
 बोल्थो—सूअरशूर ! कहाँकूँ भाग्यो जावे ।
 पूँछ दबाये मजत लाज तोकूँ नहिँ आवे ॥
 बिकट असुरको रूप लखि, पृथिवी देवी डरि गई ।
 तातें सो हरिने तुरत, जलके ऊपर धरि दर्ई ॥



पृथ्वी उद्धार पृ० ८२



शिव पार्वती पृ० ११६

धम्म धरा धरि दई उलटिके असुर निहारो ।
 बोले—आओ असुर ! करूँ सत्कार तिहारो ॥
 दाँत पीसि खल कहे—ब्रके का सूअर ! आजा ।
 मोकूँ जाने नहीं तीनि लोकनिको राजा ॥
 हरि बोले—ब्रक-ब्रक न करि, बार न बात बनावते ।
 नहीं वे डोंग बघारते, रण-कौशल दिखलावते ॥

असुर सुने हरि बैन क्रोध रग-रगमहँ छाया ।
 किटकिटायकें दाँत गदा लै आगे आयो ॥
 लपकि दुष्टने गदा हृदयमहँ हरिके मारी ।
 करी व्यर्थ पुनि झगटि चोट करि फिरे मुरारी ॥
 गदा गदामहँ लगहिँ परि, दोउनिके बल नहिँ घटहिँ ।
 चटचटायँ धम धम बजहिँ, चिनगारी चहुँदिशि उठहिँ ॥


इततें मारै दैत्य देवपति उततें मारहिँ ।
 झिन-छिन करहिँ प्रहार किन्तु दोऊ नहिँ हारहिँ ॥
 असुर गदातें विष्णु गदा गिरि गई 'महीमहँ ।
 चतुरानन अति डरे विष्णुतें विनय करी तहँ ॥
 मङ्गलमय है शुभ घरी, अभिजितको शुभ योग है ।
 अत्रई मारें जाइ हरि, जिह सब जगको रोग है ॥

बिधिके भोरे बैन सुने हरि अति हरषाये ।
 चक्र तानि बाराह दैत्यकूँ मारन धाये ॥
 मायावी खल कपट कर्यो हरिपै पुनि झपट्यो ।
 ओठ काटि करि क्रोध विष्णुके तनुतें लिपट्यो ॥
 निकसे वाकी भुजानितें, एक तमाचो जड़ि दयो ।
 धम्म धड़ाको सो भयो, कटे वृक्ष सम गिरि गयो ॥

योग समाधि लगाइ जिनहिँ योगी जन ध्यावहिँ ।
 नेति-नेति नित कहैं वेदहू पार न पावहिँ ॥
 अन्तकालमहँ अवस नाम लै नर तरि जावहिँ ।
 चौरासीतैं छूटि जगतमहँ फिरि नहिँ आवहिँ ॥
 बड़भागी दितिसुत असुर, हरि निरखत निज तनु तज्यो ।
 प्रभु प्रहारतैं ई मर्यो, शत्रु भावतैं हरि भज्यो ॥

इति श्रीभागवतचरितके प्रथमाहमें हिरण्याक्ष बध नामक
 उन्नीसवाँ अध्याय समाप्त

इति प्रथमाह



अथ द्वितीयाह

अथ प्रथमोऽध्यायः

[१]

हे सरवेश्वर ! श्याम ! वेष तुम विविध बनाओ ।
करि नित नव नव चरित जगतकुँ सुख पहुँचाओ ॥
कमलासन सन कही कथा निज सुख उपजावनि ।
तिनतें नारद सुनी व्यासतें कही सुहावनि ॥
सुत शुकतें तिनने कही, सुनी परीक्षित नृपति पुनि ।
शौनकजीके सत्रमहैं, सूत कही शुकवदन सुनि ॥

प्रथम दिवस संवाद सूत शौनकको सुंदर ।
नारद व्यास चरित्र परीक्षित कथा मनोहर ॥
निजलीला संवरन सुनाई करन कहानी ।
भक्तनि हित साकार नचाई भक्ति भवानी ॥
कह्यो वराह चरित्र अब, करी कृपा भ्रुवपै यथा ।
प्रभु पद पदमनि नाइ सिर, कहूँ द्वितिय दिनकी कथा ॥

शौनक पूछें—सूत विदुरकी बात बताओ ।
पुनि जो पूछी कथा ताहि अब सौम्य ! सुनाओ ॥
कृष्ण कथा अति बिमल गङ्ग सम सब अवहरनी ।
भवसागरके पार करनकुँ दृढ़तर तरनी ॥
खर कूकर सूकर सरिस, वृथा भार तनुको बहहि ।
इतभागी मृतवत पुरुष, जो न कथा सुनि सुख लहहि ॥

शौनक मुनिको प्रश्न सूत सुनि हरषे मनमहँ ।
 प्रेम बिकल अति भये रोम पुलके सब तनमहँ ॥
 बोले—ऋषिवर ! सुनहु गये मनु सतरूपा सँग ।
 दम्पतिमहँ अति प्रीति प्रेमतेँ पुलकित अँग अँग ॥
 द्वै जनमे अति सुघड सुत, प्रियव्रत अरु उत्तानपद ।
 जाई तनया तीन जग, यश छायो जिनतेँ विशद ॥

देवहूति जिहि भोंति बिबाही कर्दम ऋषितेँ ।
 कहूँ भयो कस प्रथम व्याह सो वैदिक विधितेँ ॥
 बिधिकी आज्ञा पाइ चले कर्दम तपके हित ।
 विषयनितेँ मन रोकि लगायो श्रीहरिमहँ चित ॥
 बरस सहस दश तप कर्यो, तनुतेँ कुश अतिई भये ।
 भीषन तपतेँ तुष्ट है, कमलनयन दर्शन दये ॥

इत नारद मुनि देवहूति पितुके ढिँग आये ।
 कन्या हित अति खिन्न लखे तव बचन सुनाये ॥
 कन्यादान निमित्त जाहु ढिँग कर्दम मुनिके ।
 अति प्रसन्न नृप भये बैन मुनिवरके सुनिकेँ ॥
 यदि कर्दम कन्या गहहिँ, मनबांछित फल पाउँगो ।
 पुत्री पत्नी संग लै, कालि तहाँ हौं जाउँगो ॥

तपपति तपतेँ तुष्ट भये निज रूप दिखायौ ।
 अद्भुत शोभा सहित निरखि मुनि चित्त लुभायौ ॥
 चरन अधर कर अरुन मधुर सिर मुकुट मनोहर ।
 आयुध अस्त्र समेत कमल कर लिये गदाधर ॥
 श्रीपति सम्मुख निरखिकेँ, परम मुदित मुनिवर भये ।
 हड़बड़ायकेँ टंड सम, बिकल महीपै परि गये ॥

कोन्हीं बहु विधि विनय बताई इच्छा अपनी ।
 कामधेनु सम सुखद सुन्दरी चाहूँ घरनी ॥
 हरि हँसि बोले—बहू मिलेगी सरसिजनयनी ।
 मनुपुत्री अति सुघर सुशीला कोकिलवयनी ॥
 नौ तब तनया होयँगी, निज यशतेँ जग भरिझी ।
 देहुँ ज्ञान तब तनय बनि, आपु तरें माँ तरिझी ॥

दोन्हीं हरि बर विन्दु अश्रु नयननितें निकसे ।
 विन्दुसरोवर भयो विमल जल सरसिज विकसे ॥
 इत मनु पत्नी सहित संग कन्याकुँ लीन्हें ।
 नारद आज्ञा मानि विन्दुपर नृप चलि दोन्हें ॥
 जहँ कदम्ब, चम्पक, वकुल, कुड्ज, कुद, मन्दार, नग ।
 पहुँचे मुनि आश्रम निकट, चहुँ दिशि कूजहि वृन्द-खग ॥

आवत देखे भूप उठे मुनि स्वागत कीन्हों ।
 वर आसन बैठाय अर्घ्य विधिवत पुनि दीन्हों ॥
 भावोपतिक्क कुमरि ओटतें निरखे पुनि-पुनि ।
 दृष्टि बचाय तरेरि नेत्र लखि लेहि कबहुँ मुनि ॥
 चीर बसन सरसिज नयन, जटा मुकुट मुनिवर बदन ।
 मन्द हँसनियुत मधुर मुख, निरखि कुमरिको लुभ्यो मन ॥

कदम पूछें—प्रभो ! कहो कस किरपा कीन्हीं ।
 सहपरिवार पधारि बड़ाई मोकुँ दोन्हीं ॥
 मनु बोले—मुनिराज ! दयायुत मोहि निहारें ।
 चिन्तासागर मग्न पकरिकें हाथ उबारें ॥
 परम सुशीला गुणवती, कन्या स्यानी है गई ।
 चित चिन्ता निशि दिन यही, ब्याह योग तनया भई ॥

मुनि नारदतैं सुनी गृहस्थाश्रमकूँ भगवन् ।
 स्वीकारेंगे यही सोचि आयो तव चरनन ॥
 कन्या तव अनुरूप जाहि मुनिवर स्वीकारैं ।
 पुत्री चिन्ता उदधि मग्न हौं नाथ ! उवारैं ॥
 मुनि बोले—इच्छा हतो, परि भङ्गटतैं हौं ढरूँ ।
 तनया लै आये स्वयं, फिरि नाहीं कैसे करूँ ॥

कपट रहित मुनि बचन मुने नृप मुदित भये अति ।
 देवहूति मुखकमल खिल्यो समुझी मुनि अनुमति ॥
 सबकी सम्मति समुझि व्याहकी विधि सब कीन्हीं ।
 राजा रानी हरषि सुता मुनिवरकूँ दीन्हीं ॥
 दुलहा दुलहिनि मिलि गये, जंगलमहँ मंगल भयो ।
 कनक अँगूठी जस सुघड़, तस सुन्दर नग जड़ि गयो ॥

इति श्रीभागवत चरितके द्वितीयाहमें कर्दम-देवहूति-विवाह नामक
 प्रथम अध्याय समाप्त



अथ द्वितीयोऽध्यायः

[२]

भये नृपति निश्चिन्त व्याह करि मिलि कर्दमते ।
 दोउनिक्कूँ समुझाय चले मनु मुनि-आश्रमते ॥
 तनया निरखि वियोग मातु पितु हिय भरि आयो ।
 छातीतें चिपटाय नेहको नीर बहायो ॥
 बत्स धेनु बिलगत समय, बार बार घबराय अस ।
 मनु शतरूपातें लिपटि, देवहूति बिललाय तस ॥

मातु पिता पुर गये कुमरिने धीरज धार्यो ।
 पतिसेवा सर्वस्व सतीको धर्म विचार्यो ॥
 तजे दम्भ, छल, कपट, कामतें चित्त हटायो ।
 संयम शौच समेत धर्म सेवा अपनायो ॥
 असन वसन सुधि नहिं रही, मलिन, कुटिल कच सब बदन ।
 तन मनतें सेवा निरत, करहिं सतत इन्द्रिय दमन ॥

हृदतर प्रेम कपाट कृपा करि मुनिवर खोले ।
 सेवातें सन्तुष्ट प्रियातें हँसिकें बोले ॥
 हे मनुनन्दिनि ! मोहि कर्यो सेवातें वशमें ।
 देहुँ अतुल ऐश्वर्य दिव्य सुख भामिनि ! अब मैं ॥
 बर माँगौ दुख भगि गयो, अब आई सुखकी वडीं ।
 अष्टसिद्धि नवनिद्धि ये, कर जोरें सम्मुख खडीं ॥

प्रीतियुक्त पति बचन सुने बोली प्रिय बानी ।
 हे द्विजवृषभ ! तुम्हारी अतुल महिमा अब जानी ॥
 मुनि बोले—मनुपुत्रि ! मोहि कस बैल बतावै ।
 देवहूति हँसि कहे—धेनुपति वृषभ कहावै ॥
 हँसे बात वर मुनि सुमिरि, प्रिया अंकमहँ भरि लई ।
 कटि कदली सम सिथिल है, पिय हियमहँ सटि गिरि गई ॥

बोली—अब हृदयेश ! तपस्या सिद्धि दिखाओ ।
 गृही सरिस सुख भवन सुभग इक नाथ बनाओ ॥
 सुनत तुरत मुनि दिव्य योगतें भवन बनायो ।
 मणिमय सम्पतियुक्त भवन लखि चित्त लुभायो ॥
 सब सुख उपयोगी जहाँ, विविध वस्तु भवननि भरीं ।
 सुन्दर सैया सुखद अति, स्वर्ण जटित चौकी धरीं ॥

दासी दास विहीन मलिन तनु भवन न भायो ।
 समुष्मि भाव मुनि बिन्दुसरोवर जल परसायो ॥
 भई दिव्य जल परसि सहस वर दासी आई ।
 करि सेवा शृंगार भवनमहँ मुनि ढिंग लाई ।
 इत मुनि मौंजी मूँजकी, तजि सुर सम सुन्दर भये ।
 उततें हँसि आई प्रिया, उभय प्रेमतें मिलि गये ॥

सोलहहू शृङ्गार करै कर कमल घुमावत ।
 कमला सम निज नारि निरखि मुनि मन मुसकावत ॥
 नव यौवन सम्पन्न अधर मुसुकानि मनोहरि ।
 शोभा भई सजीव तपस्या अथवा तनु धरि ॥
 जस मनुतनया मुनिहु तस, शोभें सुन्दर तनु धरै ।
 मानौ अङ्ग अनंग धरि, रति सँग सुख क्रीड़ा करै ॥

बोली भामिनि—बिभो ! विश्व वैभवकुँ देखूँ ।
 सुखद स्वर्ग सौन्दर्य इन्हीं नैननितें पेखूँ ॥
 मुनि मुनि उड्यो विमान कुलाचलपतिपै आयौ ।
 सुख क्रीड़ा वर भूमि दिव्य ऐश्वर्य दिखायौ ॥
 नन्दन, सुरसन, चैत्ररथ, वैश्रम्भक, मानस सुवन ।
 पुण्यभद्र उद्यान सब, लखे भयो अति मुदित मन ॥
 जहँ शुभ सुखद समीर सुगंधित सब श्रमहारी ।
 मन्द-मन्द डरि बहे काल अनुरूप विचारी ॥
 कोकिलकी कल कूँज गूँज मधुमय मधुकरकी ।
 देवहूति है चकित लखै शोभा गिरिवरकी ॥
 देव सिद्ध सुरबधुनितें, पूजित मुनि बिहरत भये ।
 निरखि निखिल भूगोल पुनि, निज आश्रमकुँ चलि दये ॥
 आये आश्रम लौटि सुरति सुख अतिशय दीन्हों ।
 नवधा करि निज वीर्य यथाविधि थापित कीन्हों ॥
 नौ कन्या वर भई उभय कुल यश बिस्तारिनि ।
 कमल गंधमय देह जनक जननी सुखदायिनि ॥
 बाल मरालिनिके सरिस, किलकें कूजें सुता सब ।
 कुटुम बढ़त जब मुनि लख्यो, भयो उदित वैराग्य तब ॥
 गह्यो कमण्डलु हाथ चले तप हित मुनि बनकुँ ।
 कच्ची गृहथी निरखि तपस्विनिके दुख मनकुँ ॥
 अञ्जलि बाँधे डरपि विनययुत बोली बानी ।
 करी प्रतिज्ञा पूर्ण महामुनि हौं अब जानी ॥
 किन्तु प्रभो ! पुत्रोनिकुँ, योग्य वरनितें व्याहिकें ।
 कछु अवलम्बन छाँड़ि पुनि, करहिँ तपस्या जाइकें ॥
 इति श्रीभागवत चरितके द्वितीयाहमें देवहूति कर्दम विहार नामक

द्वितीय अध्याय समाप्त

(मासिक पारायण पञ्चम दिवस विश्राम)

अथ तृतीयोऽध्यायः

[३]

आई बरकी यादि कमण्डलु पुनि धरि दीन्हों ।
 मुनि दयाद्रु है गये दूरि दयिता दुख कीन्हों ॥
 बोले-भामिनि ! दुःख शोक चिन्ता तजि डारौ ।
 गर्भमाँहि तव प्रकट होहिं हरि शुभ व्रत धारौ ॥
 हरषित है तव व्रत करहिं, हरि प्रसन्न अतिशय भये ।
 उपजै अरणीतें अनल, त्यों प्रभु परगट है गये ॥

प्रकटे प्रभु परमेश पितामह सुनि तहँ आये ।
 अत्रि अंगिरा पुलह आदि नव ऋषि सँग लाये ॥
 कर्दम निरखे पिता यथाविधि स्वागत कीन्हों ।
 ऋषि सँग पूजा करी सन्निकुँ आसन दीन्हों ॥
 करहु व्याह तनयानिके, बिधि बोले इन ऋषिनिर्ते ।
 कपिल रूप धरि पुत्र बनि, हरि आये निज बरनिर्ते ॥

बिधि आशा सिर धारि ऋषिनिर्ते कन्या दीन्हों ।
 वैदिक बिधिर्ते व्याह करे त्रिजती बहु कीन्हों ॥
 सब ऋषि पत्नी लई चले हिय हरिकुँ सुमिरत ।
 कर्दम चिन्ता मिटी भयो मन अतिशय हरषित ॥
 गृही बने सब सुख लहे, हरि प्रकटे कन्या दई ।
 करुणाकरकी कृपातें, सब इच्छा पूरन भई ॥

पुत्र रूप हरि लखे एक दिन बैठे बनमहँ ।
 आशा लै घर त्यागि चलूँ सोची मुनि मनमहँ ॥
 करिकें दंड प्रणाम विनय भद्रायुत बानी ।
 बोले—हे अखिलेश ! तुम्हारी महिमा जानी ॥
 मायामोहित मूढ़ हौं, तुम महेश अज अखिलपति ।
 साधन सुलभ न दरश तब, प्रकटे कोन्हों कृपा अति ॥

भयो कृतारथ देव, पितृ, ऋषि ऋणतें छूट्यो ।
 जगके भोगे भोग मोहको नातो दूट्यो ॥
 एक कृपा अब करो मूर्ति हियमहँ तब धारूँ ।
 बिचरूँ है निरद्वन्द तुमहिँ सर्वत्र निहारूँ ॥
 इच्छा द्वेष बिहीन बनि देह गेह ममता तजहुँ ।
 सुख दुखमहँ सम भाव करि, है अनन्य तुमकुँ भजहुँ ॥

जनक बचन सुनि कपिल कहैं—जाओ पितु बनकुँ ।
 चंचल चितकुँ रोकि लगाओ मोमें मनकुँ ॥
 परम मधुर अति सरल बचन श्रीहरिके सुनिके ।
 प्रभु बियोगकुँ सुमिरि नैन भरि आये सुनिके ॥
 चले मोह ममता तजी, बनि विरक्त बन बन फिरहिँ ।
 पाई भागवती गती, सुनत चरित कलिमल टरहिँ ॥

इत माताने आइ करी हरितें जिज्ञासा ।
 प्रभो ! उबारो मोह लगाई कबतें आसा ।
 प्रकृति पुरुषको भेद बताओ संशय नासो ।
 तम अज्ञान मिटाइ हृदय रवि ज्ञान प्रकासो ॥
 भव-भयभंजन करहु प्रभु, भक्त बल्लल अशरन शरन ।
 पार जगत जलनिधि करन, तरणि रूप तव शुभ चरन ॥

सुनिकें परम पवित्र मोक्ष रतिकर बर बानी ।
 जिज्ञासा है गई मातु हिय हरिने जानी ॥
 हरि बोले—अध्यात्मयोग साधन भल सुखकर ।
 जाके आश्रय तरें जगत जलनिधि अति दुस्तर ॥
 जो मन विषयनिमहँ फँस्यो, सो बन्धनको हेतु है ।
 हरि चरननि मँहँ जो लगै, तो जग तारन सेतु है ॥

मोक्ष भवनको द्वार संत-संगम मुनि भाखैं ।
 सरस कथा जहँ होहिं कृष्ण हिय जहँ सब राखैं ॥
 सत्संगति तैं वेगि होहि श्रद्धा सत्-पथमहँ ।
 श्रद्धा तैं रति होहि भक्ति पुनि पद भगवतमहँ ॥
 भक्ति भवानी हिय बसैं, जग सुख विषयत होहिं सब ।
 करत करत अभ्यास दृढ़, होहिं कृतारथ पुरुष तब ॥

भक्तियोग अति सरस सरल सबके हितकारी ।
 विप्र, शूद्र, नर-नारि सबहिं जाके अधिकारी ॥
 परमात्मा परब्रह्म पुरुष भगवान कहो हरि ।
 ज्ञानी करिकें ज्ञान लहैं नर भक्त भक्ति करि ॥
 कपिलदेवके वचन सुनि, मुदित मातु मन अति भयो ।
 हट्यो मोह आवरण सब, द्वन्द कटे तम नसि गयो ॥

सिद्ध भई जब जननि जोरि जुग कर सिर नायो ।
 गद्गद गिरा गँभीर मातु गुरु गौरव गायो ॥
 हौं मतिमंद गँवारि नारि निज नाम सिखायो ।
 जाकूँ लैकें श्वपच परम शुचि श्रेष्ठ कहायो ॥
 जाको कीर्तन करत ही, कलि कल्मष छिनमहँ कटहिं ।
 बड़भागी ते नारि-नर, जे तब नामनिक्कूँ रटहिं ॥

इस्तुति सुनिकें कपिल मातुतैं आशा लीन्हीं ।
 यह तजि बनकूँ गवन करनकी इच्छा कीन्हीं ॥
 ज्ञान लाभ हू भयो तऊ जननी बियोग भय ।
 बछुरा बिछुरत गऊ होहि व्याकुल ज्यों अतिशय ॥
 सुर मुनि पूजित कपिल हरि, गंगासागर ढिँग गये ।
 हरषि उदधि आलय दयो, सुखासीन प्रभु तहँ भये ॥
 कन्या निज यह गइ पुत्र पतिने घर त्यागो ।
 मातु हृदय बैराग्य ज्ञान सुनि अतिशय जाग्यो ॥
 बहु वैभव सम्पन्न सर्व सुखमय तजि निज घर ।
 सत् चित् आनन्द रूप ब्रह्ममें निरत निरन्तर ॥
 वल्लहीन सब खुले कच, तपो योगमय दिव्य तनु ।
 परमानन्द निमग्न मन, सिद्ध भई साकार जनु ॥
 छऊ भूमिका पार करीं सतवींमहँ निशि दिन ।
 रहैं, करें नहिं कछू काज भगवत् चिन्तन बिन ॥
 यों माताने तुरिय भूमिका प्रकट दिखाई ।
 प्रेमयोगतैं परामक्तिकी पदबी पाई ॥
 मातृगया जो सिद्धपद, सिद्धि मातु पाई जहाँ ।
 दैहिक मलतैं रहित तनु, सरिता बनि बिहरैं तहाँ ॥
 बोले मुनि मैत्रेय—कह्यो सम्बाद विदुर वर ।
 कपिल चरित अति रहस गूढ़ जिहि सुनहिं नारि नर ॥
 तिनिके शुभ अरु अशुभ करम सब ही नसि जावैं ।
 प्रसुपद प्रकटै प्रेम परमपद प्रियवर ! पावैं ॥
 देवहूति करदम कथा, कपिल ज्ञानके सँग कहीं ।
 सुनु आकूति प्रसूतिकी, कथा सुता मनुकी रहीं ॥
 इति श्री भागवत चरितके द्वितीयाहमें कपिलचरित नामक

तृतीय अध्याय समाप्त

(मासिक पारायण षष्ठ दिवस विश्राम)

अथ चतुर्थोऽध्यायः

[५]

देवहूति की कथा सुनी मनुपुत्री मँभली ।
 आकूती रुचि बरी प्रसूती पुत्री पिछली ॥
 दक्षनारि बनि जने पुत्र पुत्री अति श्रेष्ठा ।
 यज्ञ पुरुष अवतार जननि आकूती ज्येष्ठा ॥
 अनसूया कर्दम सुता, तीन देव बश करि लये ।
 पुत्र होहिँ प्रकटै उदर, तैं तीनों मिलि बर दये ॥

पतिप्राना जगमाहिँ सरिस अनसूया नारी ।
 को है बश जिन किये अखिलपति, विधि त्रिपुरारी ॥
 पुरुष योग जप करै सिद्धि बाकूँ नहिँ पावै ।
 जाहि पाहि पतिप्रिया सहज जगतै तरि जावै ॥
 जाके डरतैं, देव मुनि, इन्द्र, चन्द्र, रवि सब डरहिँ ।
 पतिव्रता तिहिके चरन, बार-बार बन्दन करहिँ ॥

सरस्वती श्रीरमा शिवा तीनिहुँ यह मानैं ।
 पतिव्रता हम श्रेष्ठ याहि सबरो जग जानैं ॥
 नारद सबके भरे कान अनसूया को सम ।
 निज निज पतितैं कहैं—पतिव्रत देखैं बल हम ॥
 बिधि, हरि, हर भिच्छुक बने, अनसूया आश्रम गये ।
 पतिव्रताकी परोक्षा, हित भिच्छा मांगत भये ॥

देवी मिच्छा देहिँ, कहें—हम तब लैं मिच्छा ।
 बल्लहोन है देहु यही हम सब की इच्छा ॥
 सती ध्यान तैं जानि, कही—तीनिहु सुत होवैं ।
 पतिव्रता प्रन सत्य भयो, बनि बालक रोवैं ॥
 उमा, रमा बाणी बिनय, करी देव फिरितैं भये ।
 तीनिहुँ तव सुत होहिँ हम, है प्रसन्न सब बर दये ॥

पतिव्रता जग माहिँ अलौकिक चरित दिखावैं ।
 जीवित मृतपति संग सती है सुरपुर जावैं ॥
 पति परमेश्वर मानि अनलकुँ शीत बनावैं ।
 सूर्य चन्द्र गति रोकि काल विनु प्रलय करावैं ॥
 पतिप्राना वेश्यासदन, कोढ़ी पति इच्छा समुक्ति ।
 जाति रही मुनि मग मिले, पति पग तिनतैं गो उरक्ति ॥

कर्यो कोप मुनि शाप दयो जिहि कीन्ह अवज्ञा ।
 सूर्योदयके होत मरे मेरी यह आज्ञा ॥
 सती कहे—रवि उदय होहिगो नाहीं अबई ।
 तीन दिवस तक राति भई घबराये सबई ॥
 सुर अनसूया लै गये, सती सखी संतोष करि ।
 पति जिवाय रवि उदय करि, गई सबनिको दुःख हरि ॥

अग्नि करें तप उग्र बायु भक्षण करि बनमें ।
 जगत ईश निज सरिस पुत्र दैं सोचे मनमें ॥
 सिरतैं निकसी अग्नि तपस्या तेज दिखावै ।
 सर्व भाव मुनि भये विश्वकुँ आँच जरावै ॥
 सुर मुनि लखि लौ अनलकी, तपतैं सब बिस्मित भये ।
 बर दैवेकुँ विष्णु शिव, विधि तीनिहुँ मुनि दिंग गये ॥

देखे तीनिहुँ देव तेजतैं दिशा प्रकासत ।
 हंस, गरुड, वृष चढ़े पूर्ण शशि सम सुभ भासत ॥
 यश गावैं गंधर्व अप्सरा नाचैं आगे ।
 करि दरशन मन मोद भयो मुनिके दुख भागे ॥
 अविरल जल नयननि बहै, परे लकुटि सम अवनि पै ।
 है अधीन ममता भरी, डारी दृष्टी सबनि पै ॥

चकाचौंघ है गई चतु चित चरन लगायो ।
 हाथ जोरि सिर नाइ विष्णु विधि हर गुन गायो ॥
 जा जगके जो ईश पुत्र हित एक पुकारे ।
 किन्तु कृपाकेसिन्धु ! दया करि तीनि पधारे ॥
 मुनि मुनि बच बोले सबहिं, तीनिहु ही जगदीश हम ।
 हृच्छा बर माँगो अनघ ! अब तुमकूँ सबई सुगम ॥

बोले मुनिवर अत्रि—नाथ ! माँगत सकुचाऊँ ।
 तुम सम सुन्दर सुघर सलौनों सुत हों पाऊँ ॥
 हँसिकें बोले देव—हमारे सम हम तीन्हों ।
 जन्म रहित हम तऊ उग्र तप तुमने कीन्हों ॥
 जाओ हम हीं होंहिंगे, तनय तुम्हारे तपोधन ।
 मुनि मुनि अति हरषित भये, गहै चरन है मुदित मन ॥

दै दुरलभ बरदान भये अन्तरहित देवा ।
 आये आश्रम अत्रि करें श्रीहरिकी सेवा ॥
 काल पाहि विधि चन्द्र नामतें प्रकटे आई ।
 शिव दुर्वासा भये शापकी छूटा दिखाई ॥
 योगेश्वर श्रीहरि भये, दत्तात्रेय महान मुनि ।
 लरैं जगत्के जीव बहु, जिनको सुन्दर सुयश मुनि ॥

दत्तदेव बपु परम सुघर सुन्दर सुठि सोहत ।
 जनु सौन्दर्य शरीर धरै घूमे जग मोहत ॥
 एक बार वो लखैं संग सो फिर नहिँ छोरत ।
 मातु पिता घर कुटुम सबनितैं मुखकूँ मोरत ॥
 खाय अखाद्य पदारथनि, माया रचि कौतुक करहिँ ।
 जानि अचारी शुचि राहत, ऋषि कुमार संगतैं भगहिँ ॥

देवासुर संग्राम भयो सुर सत्रे हारे ।
 देखि देवपति दुखी देवगुरु बचन उचारे ॥
 दत्तात्रेय समीप सफल हों काज तिहारे ।
 शरण गये लहिँ विजय पाइ श्री भये सुखारे ॥
 सहस्रबाहु अरजुन भये, ऋद्धि सिद्धि जगमहैं लहीं ।
 पायौ अन्तहु परमपद, कहूँ हरि बिनु हारे नहीं ॥

अग्नि सरिस अवधूत लाहिँ सब तुरत पचावैं ।
 करहिँ अल्प अनुकरन पतित नर ते है जावैं ॥
 अनल अनिल रवि अशुचि शुचिहुमहैं नहिँ लपटावैं ।
 समरथकूँ का दोष, उमापति विषकूँ खावैं ॥
 बाहिरके आचरन लखि, दत्तदेवतैं धिनि करहिँ ।
 उभय लोक सुखतैं रहित, होहिँ नरकमहैं मरि परहिँ ॥

जे भट्टायुत धैर्य धारि सेवैं नित इनकूँ ।
 है प्रसन्न सब सिद्धि मुक्ति देवैं हू तिनकूँ ॥
 यदुने पूछ्यो प्रश्न यथारथ उत्तर पायो ।
 नृप अलर्क सुख लह्यो दत्तने ज्ञान सिखायो ॥
 असुरराज प्रह्लादहू, सुनि शिच्चा निरभय भये ।
 आयु नृपति सेवा करी, नहुष सरिस सुत हरि दये ॥

भद्रा पत्नी सती अंगिरा मुनि की गुणवति ।
 कन्या राका कुहू सिनीवाली अरु अनुमति ॥
 गुरु, उतथ्य द्वै पुत्र कहूँ अग्रिम संतति पुनि ।
 ऋषि पुलस्त्यकी पत्नि हविभूने अग्रस्य मुनि ॥
 द्वितिय विश्रवा सुत जने, धनाधीश तिनके तनय ।
 कुंभकरन रावन भये, और विभीषन महाशय ॥

गति पत्नी तैं पुलह जने प्रिय तीनि योगयुत ।
 कर्मश्रेष्ठ अरु बरोयान तीसर सहिष्णु सुत ॥
 ऋतुको पत्नी क्रिया बालखिल्यादिक मुनिवर ।
 जने अरुन्धति माँहि वशिष्ठहु शक्ति गुणाकर ॥
 अमल अथर्वण पत्नि चिति, के दधीचि सुत है गये ।
 भृगु सुत धाता ख्यातितैं, और त्रिधाता श्री भये ॥

भृगु पुत्रो श्री संग व्याह कमलापति कीन्हों ।
 तिहिके कारन शाप विष्णुकूँ मुनिवर दीन्हों ॥
 हंसिके शौनक कहें—सूत जी ! गप्प न मारो ।
 देवै हरिकूँ शाप जगतमें कौन बिचारो ॥
 हूँसे सूत बोले—बिभो ! लीलापति लीला करैं ।
 बैठे बनियाँ बाट गहि, तोलैं इतकी उत धरैं ॥

बोले शौनक—सूत ! सुनाओ शाप कहानी ।
 कस भृगु दीयो शाप खुंस ज्यौँ हरितैं मानी ॥
 सूत कहें—मुनि ! सुनो नगर इक विष्णु बनायो ।
 ऋद्धि-सिद्धियुत निरखि ताहि मुनि निज बतलायो ॥
 बोले विष्णु विनोद प्रिय, दुहिता धन कस लेहु मुनि ।
 वक्र भृकुटि भृगुकी भई, जामाताके बचन सुनि ॥

शाप दयो तुम विष्णु जन्म दश भूपै धारौ ।
हरि बोले—मुनि शिरोधार्य है शाप तिहारौ ॥
पाणिग्रहण यों विष्णु कर्यो भृगु पुत्री श्रीतैं ।
श्री भ्रातनि ने कर्यो व्याह आयति नियती तैं ॥
तिनके तनय मृकण्ड अरु, प्राण भये भृगु तृतीय सुत ।
कबि तिनके उशना भये, असुर पुरोहित तेजयुत ॥

तीसरि पुत्रि प्रसूति दई मनु दक्षप्रजापति ।
सोलह कन्या जनीं कमल नयनी सुन्दरि अति ॥
श्रद्धा, मैत्री, दया, शान्ति, उन्नति अरु तुष्टी ।
क्रिया, तितिक्षा, बुद्धि, मूर्ति, मेधा, ह्री, पुष्टी ॥
तेरह दोन्हीं धर्मकूँ, स्वाहा अग्निनीकूँ दई ।
स्वधा त्रिवाही पितृगण, सती शम्भुपत्नी भई ॥

शुभ श्रद्धाके पुत्र दयाने अभय जन्यो सुत ।
मैत्री पुत्र प्रसाद शान्ति सुत सुख शोभायुत ॥
तुष्टि पुष्टि के तनय मोद अरु अहंकार बर ।
योग क्रियाके लाल दर्प उन्नतिके सुखकर ॥
बुद्धि, अर्थ, मेधा सिमृति, ज्ञेय तितिक्षाने जने ।
लज्जाके प्रश्रय तनय, देव सरिस ये सबजने ॥

सर्व गुणनिकी खानि मूर्तिने पुरुष पुरातन ।
विश्वम्भर श्रीकृष्ण जने हरि नर नारायन ॥
जन्म समय सुर कुसुम गगनतैं बहु बरसामें ।
गामें गुण गन्धर्व देव बर बाद्य बजामें ॥
सब जगमहँ मंगल भयो, साम गान ऋषि मुनि करहिं ।
प्रभु प्रकटे अब जगत्को, शोक मोह तम सब हरहिं ॥

मूर्ति तनय सुकुमार मार सम मोहक मनहर ।
 नर-नारायण अमित तेज तपबल युत ऋषिवर ॥
 लै अवतार प्रभाव तपस्याको प्रकटावैं ।
 जनक जननि तैं कहैं, तीव्र तप हित हम जावैं ॥
 त्यागी तनयनि तप करन, हित यह त्यागत माँ निरखि ।
 करि दृढ़ हिय आज्ञा दई, बिकल भई रोई बिलखि ॥

उग्र तपस्या निरखि इन्द्र मन संशय करहीं ।
 करिकैं तप ऋषि प्रवर इन्द्र आसनकुँ हरहीं ॥
 काम क्लामहँ कुशल कामिनी तप नाशनकुँ ।
 ० भेजीं बहु देवेन्द्र डिगा सकि नहिते इनकुँ ॥
 भक्तराज प्रह्लाद हू, लखि प्रभाव विदित भये ।
 नीमसारमहँ निवसि फिर, बदरीवन तप हित गये ॥

नर नारायण देव दया दीननिपै कीजै ।
 भवसागर भयहरन शरण चरननि की दीजै ॥
 लोकसंग्रही बने करें तप बदरीवन महँ ।
 होहि विश्व कल्याण यही सोचैं नित मन महँ ॥
 तब चरननि तैं त्रिमुख नर, जाहिँ कालके गाल महँ ।
 भक्त तरैं त्रिनु भक्तिके, फँसे जीव जग जाल महँ ॥

चौदहवीं जो दक्षसुता स्वाहा पितु प्यारी ।
 अग्निदेव ने बरी कमलनयनी सुकुमारी ॥
 पावक शुचि पवमान जने हविभुक्त तीनिहु सुत ।
 पौत्र पाँचचालीस अग्नि सबई तेजोयुत ॥
 वेदविज्ञ जन यज्ञमहँ, आगनेय इष्टी करहिं ।
 उनंचास सब मिलि भये, यज्ञ यागमहँ जो जरहिं ॥

एक अग्नि सर्वत्र रहें व्यापक सब थल महुँ ।
 एक करहिं पयपान रहें नित सागर जल महुँ ॥
 जठर माँहि जो रहें पचावें अन्न पानकूँ ।
 एक भाग यज्ञीय पठावें उभय यानकूँ ॥
 एक असंस्कृत घरेलू, अग्नि पाक जिहिं करहिं ।
 आदि अग्नि तो एक ई, रूप विविधि तेई घरहिं ॥

नित्य पितरगन षष्ठ बर्हिषद सोमक साग्निक ।
 अग्निष्वात्ता और आज्यपा कहें निरनिक ॥
 इन सबने मिलि स्वधा बिबाहो दक्षकुमारी ।
 इनतैं तनया उभय भई जो प्रभुकी प्यारी ॥
 कन्या वयुना धारिनी, स्वधा जनी जगतैं बिरत ।
 पारंगत परमार्थमहुँ, ब्रह्मवादिनी तप निरत ॥

जे श्रद्धातैं करें श्राद्ध बिधिवत तिल तरपन ।
 तिनपै किरपा करें प्रजा हित निरत पितरगन ॥
 अन्न श्राद्ध शुचि खायैं विप्रमुखतैं स्वीकारैं ।
 प्रजा वृद्धि बहु होय यही मन सदा बिचारैं ॥
 पितर स्वधा उच्चारतैं, सुर स्वाहा तैं लेत हैं ।
 दाता श्रद्धा निरखिकें, मन वाँछित फल देत हैं ॥

दोहा—मनु पुत्रिनिके वंशकी, कथा कही शुभ धन्य ।
 पढ़ैं सुनैं जे प्रेमतैं, होहि तिनहिं अति पुन्य ॥

इति श्रीभागवत चरितके द्वितीयाहमें मनुपुत्री वंशवर्णन नामक
 चतुर्थ अध्याय समाप्त

अथ पञ्चमोऽध्यायः

[५]

दक्षकुमरि लघु सती रूप गुन की जो खानी ।
 व्याही शिवके संग भक्ति तैं भई-भवानी ॥
 अर्घ अङ्ग दै भये अर्धनारीनट ईश्वर ।
 सती सरिसको सती तज्यो तनु ततछिन नश्वर ॥
 हठ अधको शोधन कर्यो, जग कीरति अक्षय करी ।
 पति निन्दा रूपी अनल, लगी देह छिनमहँ जरी ॥

बोले त्रिस्मय सहित त्रिदुर मुनिवरतैं वानी ।
 प्रभो ! कही का दक्ष-सती की अकथ कहानी ।
 पुत्री प्रान समान प्रजापति दक्ष पियारी ।
 शान्त मूर्ति श्रीशम्भु चराचर गुरु त्रिपुरारी ॥
 जामाता अरु ससुरमहँ, किहि कारन अनवन भई ।
 जा दुखतैं दुहिता दुखी, भई क्रोध करि जरि गई ॥

बोले मुनि मैत्रेय—त्रिदुर ! सुनु शम्भु चरित प्रिय ।
 हर गुन अध हरि लेत होत हरषित अतिशय हिय ॥
 तीरथराज प्रयाग याग मिलि करें प्रजापति ।
 आये ऋषि मुनि देव सत्र शोभे अद्भुत अति ॥
 श्वेत नील बसना बहिन, सुरसरि अरु रविजा जहाँ ।
 मिलैं मध्य बटके निकट, भीर भई भारी तहाँ ॥

दूरि दूरितैं दौरि दौरि देवादिक आये ।
गङ्गा यमुना मध्य यज्ञ लखि सब हरषाये ॥
उच्चासनपै विश्वजनक श्रीब्रह्म विराजैं ।
चन्द्रमौलि ढिँग दिव्य तेज रविसम विभ्राजैं ॥
दक्ष प्रजापति मानयुत, आये सब ठाढ़े भये ।
बिधि सम अपनी पीठ पै, बैठे ही हर रह गये ॥

समुक्ति अवज्ञा दक्ष कोपतैं अष्ट भई मति ।
अरुनवरन मुख भयो, भृकुटि चढ़ि बक्र भई अति ॥
नयन रक्त सम भये कोपकी किरनैं छिटकैं ।
कटकटाइकें दाँत पैर पृथिवीपै पटकैं ॥
भुज उठाइ शिवकुँ निरखि, अण्ड बण्ड बोले वचन ।
ज्यो द्विप लखि भूखे कुकुर, कछु न कहैं हर त्यो मगन ॥

बलबलाइ ज्यो ऊँट भूठ बानी बहु जलपै ।
अहि सम उगलै गरल मनो बड़ पागल प्रलपै ॥
बोल्थो—यह शिव अशिव मुंड माला नित धारै ।
चिता भस्म तन लेपि हँसै रोवै किलकारै ॥
हाय ! अधम निरलज्जकुँ, सती सरिस तनया दई ।
बिधि हठ मानी व्यर्थई, कन्या बिनु बर सम भई ॥

बकै बात बहु बुरी बुद्धि बिधिने हरि लीन्हौ ।
क्रोध मान बश भयो पेट भारि निन्दा कीन्हौ ॥
तऊ नहीं संतोष भयो जल हाथ उठायो ।
सम्बोधन करि शाप सबनिकुँ दक्ष सुनायो ॥
मुनहु सभासद श्रवन दै, सत्रनि महीं शिव जायगो ।
तो यह देवनिमें अधम, यज्ञभाग नहिं पायगो ॥

दैकें शिवकूँ शाप क्रोधमें भरि चलि दीन्हों ।
 कछुने अनुचित कह्यो कछुक अनुमोदन कीन्हों ॥
 नन्दी दीन्हों शाप दक्ष अज्ञानी होवै ।
 वकराको मुख होहि प्रतिष्ठा अपनी खोवै ॥
 शिवद्रोही जो विप्रगन, ते जगमहँ याचक रहैं ।
 भृगु बोले—जो नामके, शैव अशुचि तनि दुख सहैं ॥

शौनक बोले—सूत ! शापकी कथा सुनाई ।
 शिवनिन्दा तो हमें नेंकऊ नाहिं सुहाई ॥
 शिव मदिमा कछु कहो जगत् दृढ़ बन्धन तोरै ।
 मनमहँ उपजै मोद सुधा श्रवननिमहँ घोरै ॥
 काशीवासी शम्भु हर, त्रिपुरारी शिव सतीपति ।
 नाम रटत भवभय कटत, गुन सुनि होवे चरन रति ॥

सूत कहें—‘सुत जाम्बवतीने हरितैं माँग्यो ।
 लखि सौतिनि सुत डाह सौतिया मनमहँ जाग्यो ॥
 श्रीहरि हैंसिकें कहें—होहि सुत शिव आराधैं ।
 विषय भोग तजि नियम कठिनव्रत यदि हम साधैं ॥
 हरि पत्नी आग्रह लख्यो, गरुड़ चढ़े हिम गिरि गये ।
 निवसैं जहँ उपमन्यु मुनि, लखि आश्रम हरषित भये ॥

मुनिनैं निरखे कृष्ण यथाविधि स्वागत कीन्हों ।
 अद्भुत, तुलसी, पुष्प, अर्घ्य चन्दनयुत दीन्हों ॥
 करि पूजा स्वीकार कहें—मुनि ! हर गुन गाओ ।
 शिवके सुखद प्रसंग प्रेम तैं मोहिं सुनाओ ॥
 मुनि बोले—इहि थल विभो ! बहुत बरसतैं हों रहूँ ।
 सिद्धि असुर सुर जिन लही, कछुक कथा तिनकी कहूँ ॥

हिरनकशिपुने प्रभो ! यहीं बर दुरलभ पाये ।
 विद्युन्प्रभ मन्दार बली बनि देव हराये ॥
 याज्ञवल्क्य श्रीव्यास और शाकल्य महामुनि ।
 ग्रन्थकार बड़ भये नाम शिव रटि हरगुन सुनि ॥
 और कहाँ तक अब कहूँ, हों दरिद्रता तैं दुखी ।
 मातु वचनतैं शिव भजे, भयो शम्भु बरतैं सुखी ॥

मुनितैं पूछें कृष्ण—कहो सब कथा त्रिप्रवर ।
 व्याघ्रपाद सुत कहें—सुरभि नहिँ रही मोर घर ॥
 एक दिना कहूँ पियो दूध घरपै नहिँ होई ।
 माँग्यो माँतैं आइ सुनत जननी मम रोई ॥
 मैंने हठ जब करी बहु, चून घोरि जलमहँ द्यो ।
 पीयो परि पय स्वाद नहिँ, मेरे मन अति दुख भयो ॥

अम्मा ! यह पय नाहिँ मोहिँ तू च्यों बहकावै ।
 अमृतोपम अतिश्वेत मधुर पय च्यों न पिआवै ॥
 मम हठ निरखी मातु नयनतैं अश्रु बहावै ।
 बार बार पुचकारि हृदयतैं मोइ लगावै ॥
 मैं पूछ्यो—घर सुरभि पय, होइ न च्यों हे जननि ! कह ।
 बोली—बेटा ! त्रिष्णुको, सालीकी करदूत यह ॥

पुनि पूछ्यो—हे मातु ! भगै यह कुलटा कैसे ।
 सुनि माँ बोली—वत्स ! बताऊँ जावै जैसे ॥
 आशुतोष भगवान शम्भुकूँ जो आराधैं ।
 तिनके दुरलभ काज कपदीं छिनमहँ सार्धैं ॥
 मधुसूदन ! मम मातुने, महादेव महिमा कही ।
 उपजी सुनि शिवभक्ति हिय, शरन चरन हर को गही ॥

आराधे शिव सहस्र बरस सब सुख तनु त्यागे ।
 दये देवने दरस दुःख दारिद सब भागे ॥
 अजर अमर बपु कर्यो दूधको सागर दीन्हों ।
 कृपा कर्माँ करी कृतार्थ किंकर कीन्हों ॥
 मुनि हरिहूने हर भजे, सहस्र सुतनि शिव बर दये ।
 है सतकृत ऋषि मुनिनि तैं, कृष्ण द्वारकाकूँ गये ॥

ऐसे शिवकूँ शाप ददने दारुन दीन्हों ।
 कर्यो न हरने कोप शाप सिर धारन कीन्हों ॥
 शापाशापी निरखि विमन शिव निज गिरि धाये ।
 सहस्र सालको सत्र पूर्ण करि सब मिलि न्हाये ॥
 सुखद सिद्धिप्रद अघहरन, पावन पुण्य प्रयाग महुँ ।
 अवभृत मज्जन कर्यो सब, गङ्गा जमुना मिलहिँ जहुँ ॥

दोहा—दत्त प्रजापति मंदमति, हरतैं राखै द्वेष ।
 जिनको मंगल नाम शिव, किन्तु अमंगल वेष ॥

इति श्री भागवत चरितके द्वितीयाहमें दत्तशाप नामक
 पंचम अध्याय समाप्त

अथ षष्ठोऽध्यायः

[६]

कछुक कालमहँ बात सत्रकी भई पुरानी ।
किन्तु ईरषा अधिक दक्षके चित्त समानी ॥
सोच्यो अब इक यज्ञ करूँ यह प्रथा चलाऊँ ।
सती शम्भुकुँ यज्ञमाँहिँ हौं नाहिँ बुलाऊँ ॥
इहि विधि मन महँ सोचिकेँ, यज्ञ बृहस्पतिसव रच्यो ।
पशुपति निन्दा रूप जो, पाप हृदयमहँ नहिँ पच्यो ॥

नाहिँ द्रव्यकी कमी यज्ञके ठाट जमाये ।
दौरि दौरि सब ठौर ठौर धावन धरि धाये ॥
देव, उरग, गन्धर्व निमन्त्रन सबनि पठाये ।
किन्तु यज्ञके अधिप सदाशिव नाहिँ बुलाये ॥
अति उमंग ललना भरीं, सत्रमाँहि सजिबजि चलीं ।
प्रिय पति संग बिमानमहँ, लागें विद्युत् सम भलीं ॥

निरखीं प्रमदा सती पतिनि सँग सुखतैं गावति ।
बैठि बिमाननि विहँसि सिंहावति अति हर्षावति ॥
पूछें—“भैना ! कहहु जाउ कहँ सब सुकुमारी” ।
बोलीं—“तव पितु गेह यज्ञ उत्सव है भारी ॥
अवई तुम च्यौं नहिँ गई, का कछु अनवन है गई ।
अथवा रिस है प्रजापति, पत्नी मखकी नहिँ दर्ई ॥

विस्मय, लज्जा, हरष, मोद, उत्सुकता सब संग ।
 भये महोत्सव सुनत पिता घर पुलके अँग अँग ॥
 शिव समीप पुनि दौरि गईं बोलीं सुनु अग्रहर ।
 श्वसुर तुम्हार उदार करहिं इक बृहत् यशवर ॥
 हँसि मोले बाबा कहें—यह जग पथिक निवास है ।
 हाय हाय होवै कहूँ, कहूँ उत्सव उल्लास है ॥

सती प्रेमयुत कहहिं—प्रभो ! मति ज्ञान सिखाओ ।
 मोइ संग लै चलो नाथ ! पितु यश दिखाओ ॥
 दीना हूँ अति विभो ! व्यर्थ अन्न मत बहकाओ ।
 चलो बैलपै चढ़ा मोइ हर ! पकरि चढ़ाओ ॥
 शिव बोले—नहिं निमन्त्रण, कस जावैं भामिनि ! सुनो ।
 छ्छाटी बेटी बापकी, व्यर्थ लड़ैंती तुम बनो ॥

बात सत्य है पिता मित्र गुरु घर बिनु बोलें ।
 जावै यदि वे निरखि नेहतें हियकूँ खोलें ॥
 दोष दृष्टितें देखि रोषवश मुँह मटकावें ।
 तिनके घरमहँ भूलि कबहुँ नहिं सज्जन जावें ॥
 सती तुम्हारे बापने, कहनो अनकहनी कहों ।
 सबके सम्मुख सभामहँ, भली बुरी गारी दई ॥

सती कहें—तुम कृपा-सिन्धु योगेश्वर जानी ।
 वेद न पावैं मेद पाहिं फिर कस अभिमानी ॥
 थूको जो कछु भई गईकूँ नाथ विसारो ।
 पिता यश लै चलो, आसरो एक तिहारा ॥
 शम्भु कहें—“दादायणी ! त्यागा हठ हरि-हरि भजो ।
 हौं कबहुँ नहिं जाउँगो, जिह आशा मोतें तजो ॥

समुझाई शिव सती बहुत विधि तऊ न मानी ।
 भई बुद्धि विपरीत विश्वपति हियमहँ जानी ॥
 पितृ नेह इत शम्भु रुष्टताको भय भारी ।
 फिरि फिरि आवें जाइ, हिंडोले सरिस विचारी ॥
 सर्पिनि सम निश्वास लै, कँपै देह विह्वल भई ।
 आँखिनिमहँ आँसू भरे, सती अनमनी है गई ॥

बहुरि विचारें चलूँ शम्भु नहिँ दैंगे अनुमति ।
 छिन-छिन बीते कल्प कांठि सम चित चंचल अति ॥
 राम करै सो होहि चलूँ होवै सो होवै ।
 वह पाँछे पछिताय सुअवसर जो नर खोवै ॥
 सती सतिनि महँ शिरोमणि, विकल वासना वश भई ।
 आज्ञा उल्लंघन करी, त्रिनु पूछे ही चलि दई ॥

समुक्ते शिव सर्वज्ञ सतीके सुकृत सिराये ।
 अनुचर नन्दी आदि तुरत हर संग पठाये ॥
 विनती सब मिलि करी भवानी वृषभ विराजी ।
 चँवर छत्र सिर लगे दुंदुभी तुरही बाजी ॥
 यो सजि वजि पितु घर चलौ, असगुन बहु मग महँ मये ।
 परि न ध्यान उतकूँ दयो, नन्दी खगपति सम गये ॥

शिव इच्छाके बिना पात नहिँ हिलै नगनिके ।
 नाहिँ सती कछु कर्यो काज करवाये इनिके ॥
 धर्यो सती सिय रूप शम्भु तब मन तें त्यागी ।
 इष्ट शक्ति मम मातु सरिस समुझी तब भागी ॥
 गाजे बाजे बजहिँ बहु, चहल पहल चहुँ दिशि हती ।
 चढ़ि नन्दी पै गणनि सँग, यज्ञ माँहि पहुँची सती ॥

पिता न आदर कर्यो देखि ग्हाँ अपनो फेर्यो ।
 डरके मारैं सती माँहि कोई नहिं हेर्यो ॥
 जननी भगिनी मिलीं प्रेमतैं हिये लगाई ।
 किन्तु न कोई बात सतीकुँ फेरि सुहाई ॥
 जग जननी जगदम्बिका, अपमानित अतिशय भई ।
 व्यापौ तनमहँ कोप अति, आग बबूला है गई ॥

इत उत निरखैं कहूँ शम्भुको भाग न पायौ ।
 तातैं लाखनि गुनों कोप देवीकुँ आयौ ॥
 यश अनल तैं प्रबल सती हिय ज्वाला व्यापी ।
 काली चण्डी बनी पिताकुँ समझ्यो पापी ॥
 पापी तैं पैदा भयो, नहिं तनु शिव उपभोग्य है ।
 अशुचि ताहि पितुयश महँ, तजौं जिही तो जोग्य है ॥

ऐसो निश्चय कर्यो कोपतैं बोलीं बानी ।
 च्यौ रे मङ्गलरहित शम्भुद्वेषी, अभिमानी ॥
 कर्मकाण्डमें फँस्यो शम्भु महिमा नहिं जानै ।
 सबतैं हौं ही बड़ो बाप तू ऐसो मानै ॥
 जिनके “शिव” जा नामकुँ, भाव कुभावहुँ जे रटें ।
 तिनके सब दुख दुरित अघ, जगके छिन भरिमें कटें ॥

महत पुरुष मन मधुर चरन अरविन्द सरिस हर ।
 पान करें मकरन्द मधुर भवभयहर सुखकर ॥
 अर्थी पावैं अर्थ काम सब पावैं कामी ।
 करें कामना पूर्ण सबनिकी अन्तरयामी ॥
 अज अनादि सुख दुख न कछु, राग द्वेषतैं जो रहित ।
 तिनतैं बैर बिसायकें, कैसे होबै तोर हित ॥

धरमहीन जो कुटिल करै निन्दा हरि हरकी ।
 गरम सड़ासी पकरि जीभ खींचे वा नरकी ॥
 नाहिं तु मूँदे कान जपै शत नाम रामके ।
 हरि हर द्वेषी सगे बन्धुहू नाहिं कामके ॥
 तोतैं उपजी देह जिह, शिव उपयोगी रही नहिं ।
 कैसे ऊँचो म्हाँ करूँ, जब हर दादायणि कहहिं ॥
 ऐसे कहिकैं सती ओढ़िकैं पीरी सारी ।
 युगल नेत्र करि बन्द जगतकी सुरति विसारी ॥
 नाभि चक्रतैं प्रान उठाये हियमें लाई ।
 कंठ भ्रुकुटिके मध्य अनिलतैं अनल जराई ॥
 योग अग्नितैं तनु तज्यो, लीन भई शिव ध्यानमें ।
 किन्तु कुटिल पितु दक्षके, जूँ रेंगी नहिं कानमें ॥
 देख्यो चरित विचित्र डरे सब जगके प्राणी ।
 जगत सून्य 'सम भयो प्रलय वेला सब जानी ॥
 धिक्कारैं सब लोग दक्षकूँ देवें गारी ।
 सम्मुख दुहिता मरी नहीं बरजी सुकुमारी ॥
 पिता नहीं अति पतित यह, शिवद्रोही कलुषित हृदय ।
 सिंह व्याघ्रहू सुता लखि, छाँड़ि क्रूरता हौं सद्यः ॥
 सती देह निरजीव लखी शिवगण रिसियाने ।
 यश नाश हित चले, अस्त्र निज निज सब ताने ॥
 भृगुने देखे भूत भयंकर विघ्न करिझें ।
 यश करहिं विध्वंस दक्षके प्रान हरिझें ॥
 यश विघ्ननाशक ऋचा, पदीं प्रकट ऋभु सुर भये ।
 उनने मारे शम्भुगण, भये पराजित भगि गये ॥
 इति श्रीभागवत चरितके द्वितीयाहमें सतीदेहत्याग नामक

षष्ठ अध्याय समाप्त

(पाक्षिक पाठ तृतीय दिवस विश्राम)

८ फा०

अथ सप्तमोऽध्यायः

[७]

भूत प्रेत उत भगे, भगे इत नारद हरपै ।
 देखे विभु विश्वेश विराजें हिमगिरिवरपै ॥
 करी वन्दना विलखि बिनयतें बोले बानी ।
 पिता कर्यो अपमान जरीं योगाग्नि भवानी ॥
 तव पार्षदगण अस्त्र लै, युद्ध करन उद्यत भये ।
 किन्तु करे भृगु प्रकट ऋषु, तिनहिँ देखि गण डरि गये ॥

कर्यो कपरदी कोप अधर दाँतनितैं काटैं ।
 चढ़ी भ्रुकुटि मुख लाल ओठ जिह्वातैं चाटैं ॥
 भरिकैं रिसमें एक जटातैं बार उखार्यो ।
 कटकटाइकें दाँत पट्ट पृथिवीपै मार्यो ॥
 मारत ई अति विकट नर, कारो अंजन गिरि सरिस ।
 प्रकट्यो भीषण सहस भुज, घेरीं तनुतै दशहु दिस ॥

बोल्यो—हे विश्वेश ! बताओ किनकूँ मारूँ ।
 सोखूँ सबई सलिल सकल संसार सँहारूँ ॥
 रुद्र कोप करि कहैं—अस्त्र अपने संहारो ।
 दम्भयज्ञमें जाय दक्षकूँ अबई मारो ॥
 सुनत भयंकर रुद्र गण, हा-हा हू-हू करि चले ।
 कर कंकण माये मुकुट, कटि किंकिणि माला गले ॥

भूत, प्रमथ, बैताल, विनायक, बटुक, डाँकिनी ।
 गुह्यक, कर्पट, क्षेत्रपाल, सँग चली साँकिनी ॥
 नव दुर्गाऊ चलीं कोप करि गर्जति तर्जति ।
 वीरभद्रके संग नगनि मग मर्दति फर्दति ॥
 विकट वेष वाहन विविधि, मोषण कोलाहल करहिँ ।
 वीरभद्र सेना निरखि, नर नारी सबहीं डरहिँ ॥

आव गिन्यो नहिँ ताव यज्ञकी आगि बुझाई ।
 ऋत्विक् लीन्हे पकरि धमाधम करी कुटाई ॥
 भृगुकी दाढ़ी मूँछ सफाचट करी उखारी ।
 भगकी फोरीं आँखि बतीसी पूषा झारो ॥
 प्रजापतिनिके जशमें, जिनि जैसैं शिवकुँ लख्यो ।
 दक्षयज्ञमें तिननि तस, ततछिन ताको फल चख्यो ॥

सबतें पीछे शम्भुससुरकी बारी आई ।
 वीरभद्रने पटक दक्षपै खड्ग चलाई ॥
 किन्तु न मार्यो-मरै सबनिकुँ चिन्ता व्यापी ।
 कौन जतनतें मरै सती-घाती जिह पापी ॥
 सहसा सूझी युक्ति इक, बलि पशु सम सिर मोरिकें ।
 फेक्यो जरती अग्निनिमें, धड़तें सिरकुँ तोरिकें ॥

शौनक पूछें—‘सूत ! कलहको बीज बताओ ।
 मान्यों कस शिव वैर दक्षने सो समुझाओ ॥
 सूत कहें—‘मुनि ! कलह कामनातें ई होवै ।
 काम क्रोधतें उपजि सुमति सद्गुन सब खोवै ॥
 विधितें उपज्यो काम जब, कामातुर ऋषि मुनि भये ।
 बरजे जब श्रीशम्भुने, तब सब लज्जित है गये ॥

विधिने आज्ञा दई काम शिव चित्त विगारौ ।
 निरविकार श्रीशम्भु काम का करै विचारौ ॥
 मलयानिल सुबसन्त सबनि मिलि शक्ति लगाई ।
 किन्तु मलिनता नहीं महेश्वर मनमहँ आई ॥
 अपनों-सो मुँह मदन लै, ब्रह्मादिक ढिँग फिरि गयो ।
 निस्पृहता सुनि शम्भुकी, सबको मन विस्मित भयो ॥

दक्ष कर्यो तप महाशक्ति आराधीं विधिवत ।
 प्रकटीं जगकी मातु कह्यो वर माँगो इच्छित ॥
 दक्ष कह्यो मम गेह प्रकट है चरित दिखाओ ।
 शम्भु संग करि व्याह प्रेमको मरम जताओ ॥
 “एवमस्तु” माता कह्यो, दै वर अन्तरहित भई ।
 ते ई रुद्राणी सती, दक्ष कुमारी बनि गई ॥

शिव होवें मम नाथ करें व्रत सती कुमारी ।
 विधिसन सुनि शिव प्रकट भये जहँ दक्ष दुलारी ॥
 देखि तेज, तप, शील शम्भुके मन अति भाई ।
 नित्य शक्ति निज जानि शिवा सहचरी बनाई ॥
 चन्द्र चन्द्रिका प्रभा रवि, सम अभिन्न दोऊ भये ।
 दक्षयज्ञके कलहमें, प्राण सतीने तजि दये ॥

सुनिकें शौनक कहें—कथा अब सूत ! सुनाओ ।
 पिटि कुटि देवनि कर्यो कहा सो बात बताओ ॥
 सूत कहें—सब देव बहुत व्याकुल घबरावत ।
 छिन्न भिन्न सब अंग गये विधिसन विललावत ॥
 घाव दिखावहिँ रोइ सब, अंग भंग जो-जो भयो ।
 देखि दशा दयनीय विधि, देवनिक्कूँ ढाढ़स दयो ॥

ब्रह्मा बोले—“बहुत बुरो तू सबने कीन्हो ।
 यज्ञनिके जो ईश तिनहिँ मख भाग न दीन्हो ॥
 किन्तु भई सो भई शम्भुकुँ जाय मनाओ ।
 चरननिमहँ सब परौ यज्ञ पूरो करवाओ ॥
 ऋषि मुनि बोले—“कृपानिधि ! हम सब शिवतैं बहु डरें ।
 हम सबकुँ सँग लै चलें, दारुन दुख सबको हरें ॥

मानि सबनिकी बात चले विधि गिरि कैलासा ।
 जहँ फूले वर वृक्ष केतकी, पनस, पलासा ॥
 देव, यक्ष, गन्धर्व, सिद्ध सब शिवकुँ सेवें ।
 पशुपति तिनकुँ सदा मनोवाञ्छित फल देवें ॥
 बारह मास वसन्त जहँ, कुहू कुहू कोकिल करहिँ ।
 विहरें, खग, मृग, विहँगवर, करि कलरव मनकुँ हरहिँ ॥

चहुँ दिशि देखे सिद्ध विविध साधन सब साधत ।
 जप, तप, जोग विराग आदितैं हरि आराधत ॥
 ओषधितैं इक सिद्ध अपर मंत्रनिकुँ जपिकें ।
 कोई ठाढ़े रहें बहुत नानाविधि तपिकें ॥
 सिद्धेश्वर शिवकुँ सदा, सेवै सतत सुसिद्धगन ।
 पितर, देवता, ऋषिनिको, निरखि भयो अति मुदित मन ॥

भरना भर भर भरहिँ मनो गिरि हँसिकैं बोलत ।
 कारे घूमें नाग मनहुँ नग इत उत डोलत ॥
 कल्पवृक्षकी उठी शाख हिलि मनहु बुलावहिँ ।
 यकित पथिक लखि अतिथि भावतैं दया दिखावहिँ ॥
 आम, अनार, अशोक वर, वट, कदम्ब, पाटल, वकुल ।
 पीपर, पाकर, विटप शुभ, शोभें बहु शतदल कमल ॥

कमल कुसुम अति सरल विमल सरवरमहँ सोहँ ।
 मँडरावें मदमत्त मधुपगन मुनि मन मोहँ ॥
 रति विलासतें थकित चकित सुररमनी न्हवँ ।
 तनु कुंकुमकुँ घोइ सलिलकुँ पीत बनावँ ॥
 कहूँ किन्नर, किंपुरुषगन, प्रानप्रिया निज सँग लिये ।
 तनु पुलकित उल्लसित हिय, डोलें गलवाहीं दिये ॥

सम्मुख निरख्यो विशद् विटपवर वटको सुखकर ।
 सौ योजन अति सघन स्वच्छ सुन्दर अति मनहर ॥
 ता तरु तर तपयुक्त तापसनि मध्य महेश्वर ।
 भूतनाथ भगवान् विराजें शिव परमेश्वर ॥
 अक्षमाल गल चन्द्र सिर, जटा मुकुट श्रीगंग युत ।
 करहिँ ज्ञान उपदेश हर, जो पूछहिँ कछु ब्रह्मसुत ॥

मुनि विधिको आगमन उठे संभ्रम सह श्रीहर ।
 अगवानीकुँ गये चरनमहँ नायो निज सिर ॥
 करत दण्डवत देखि शम्भु विधि तुरत उठाये ।
 श्रद्धा भक्ति समेत प्रेमतें हिये लगाये ॥
 बोले ब्रह्मा—देव ! तुम, मकरी सम जगकुँ रचहु ।
 रचि पालौ क्रीड़ा करहु, जब चाहो छिनमहँ हरहु ॥

यज्ञ अधूरो भयो कृपा करि दक्ष जिवाओ ।
 भृगुकी दाढ़ी लगै देव भग नेत्र बनाओ ॥
 कस पूषा विनु दाँत खायँ कछु युक्ति बताओ ।
 जस जानों तस प्रभो जज्ञकुँ पूर्ण कराओ ॥
 हर हँसि बोले—यज्ञपशु, को सिर शव घड़पै धरो ।
 जीवित होवे दक्ष—भृगु, दाढ़ी बकराकी करो ॥

मित्र नेत्रतें निरखि भाग भग अपनो पावें ।
 पूषा सत्तू पिसे पोपले मुखतें खावें ॥
 अध्वर्यू निज भाग अश्विनी करतें लेंवें ।
 दूटे जिनके हाथ सबहिँ पूषा कर जेंवें ॥
 छिन्न मित्र जिनके भये, अंग नये फिरितें लगें ।
 जाओ, सत्रके दुख दुरित, देखत देखत ही भगें ॥

साधु साधु सत्र कहें शम्भुकी करें बड़ाई ।
 बोले ब्रह्मा—‘बिभो ! विगारी बात बनाई ॥
 अब चलिक्कें सब साज सत्रके शीघ्र सजाओ ।
 फिरितें रोपौ ठाठ, यज्ञकुँ सफल बनाओ ॥
 विधि आयसु सिर धारि शिव, सबकुँ संगलै चलि दये ।
 बकरा सिर धरपै धर्यो, तुरत दक्ष जीवित भये ॥

निरखे सम्मुख शम्भु दक्ष हिय स्वच्छ भयो अति ।
 रुद्र-द्रोहको मैल धुल्यो वर विमल भई मति ॥
 सती सुताकी यादि प्रजापतिकुँ है आई ।
 वाणी गद्गद भई प्रेममें सुधि बिसराई ॥
 जैसे तैसे रोकि मन, बहुविधि शिव विनती करो ।
 दई सान्त्वना विविध विधि, समुर लाज शिवने हरी ॥

विधि हर आशा पाइ यज्ञ आरम्भ कर्यो फिरि ।
 ऋत्विक्, होता, सभ्य कुण्ड चहुँ ओर रहे धिरि ॥
 भूत, प्रेत संसर्ग जनित सब मेंटि मलिनता ।
 पुरोडास हरि अरपि करी सब विधि पावनता ॥
 पुरोडास हवि हाथ लै, ज्योंही दक्ष ठढ़े भये ।
 ध्यान करत अखिलेश हरि, त्योंही परगट है गये ॥

निरलिभये सत्र मग्न उठे शिव मुरनि सहित विधि ।
 नव जलधर सम वरन हरन दुख दुरित दयानिधि ॥
 क्रीट मुकुट अति सुधर पीतवर वसन विराजें ।
 श्वेत छत्र अरु चँवर गले वनमाला भ्राजें ॥
 शङ्ख, चक्र, असि, गदा, सर, ढाल, पद्म, सारंग, धनु ।
 अष्टबाहु आयुध लसैं, गिरि फूली कन्नेर जनु ॥

इस्तुति प्रभुको करें दक्ष, ऋत्विक्, विद्याधर ।
 लोकपाल, सुर, इन्द्र, सिद्ध, ऋषि, मुनि, योगेश्वर ॥
 यजमानी अरु अग्नि, यक्ष, गन्धर्व, विप्रगन ।
 विविधि भाँति करि विनय लगायौ हरि चरननि मन ॥
 सबकी सुन्दर सुनि विनय, अति प्रसन्न श्रीहरि भये ।
 जैसी जाकी कामना, तैसे तक्क वर दये ॥

बिप्र कहैं—हे विभो ! आपुई यज्ञ, सोम, घृत ।
 मंत्र, अग्नि, कुश, समिध देव ! तुम बलि पशु अरु व्रत ॥
 पुरोडास, यजमान आपुई हविकूँ पावैं ।
 नाम कीरतन करत यज्ञ त्रुटि सब नसि जावैं ॥
 प्यावैं प्रेम पियूष प्रभु ! पुनि पुनि पैरनिमें परहिँ ।
 शिवगाणकृत विध्वंस मख, ताहि विभो ! पूरन करहि ॥

विष्णु भये सन्तुष्ट सबनिकूँ शिद्धा दीन्हीं ।
 हौं, विधि, शिव सब एक भेदकी व्याख्या कीन्हीं ॥
 सबई हरषित भये कर्यो आरम्भ यज्ञ फिरि ।
 च्यौं न होहि मख पूर्ण जहाँ तीनिहु विधि, हरं, हरि ॥
 अति प्रसन्न है प्रजापति, शिवजीको पूजन कर्यो ।
 सती यादि करि दक्षके, नेह नीर नयननि भर्यो ॥

फिरि सब विधिवत विप्र पितर पूजे ऋषि मुनि सुर ।
 भयो यज्ञ परिपूर्ण, गये सब जन निज-निज पुर ॥
 प्रजापतिनिके ईश दत्त मनमहँ अति हरषें ।
 वज्रें दुन्दुभी आदि कुसुम सुरद्वमके वरषें ॥
 दत्त-यज्ञकी कथा जिह, विदुर ! यथामति सब कहौ ।
 पूछो तुम जो हृदयमहँ, शंका अब जो कछु रही ॥

इति श्रीभागवत चरितके द्वितीयाहमें दत्तयज्ञपूति नामक
 सप्तम अध्याय समाप्त ।



अथाष्टमोऽध्यायः

[८]

विदुर कहैं—गुरुदेव ! सती तो शक्ति सनातन ।
 शिव तजि अनत न जाहिँ सुनी जिह प्रथा पुरातन ॥
 कैसे तजिकें देह मिलीं फिरि कस शंकरकूँ ।
 जिहि ध्यावत तनु तजहिँ फेरि पाँवहिँ तिहि वरकूँ ॥
 मुनि बोले मैत्रेय मुनि, बिदुर ! सुनो इतिहास सब ।
 हिमगिरि मेंनाकी सुता, सती भई जस कहूँ अब ॥

मेंना सेवा करी सुतासम सती देहमें ।
 प्रकटीं तनया होय मातु गिरिराज-नोहमें ॥
 चन्द्रकला सम बढ़त निरखि पितु अति हरषाये ।
 विरही शिव तप हेतु पास गिरिके इत आये ॥
 सुनत शैल सेवा करन, सुता सहित शिव सन गये ।
 कन्याकूँ कैकर्य हित, गिरि अरपी हरषित भये ॥

शिव योगी निष्काम विकार न मनमहँ आवै ।
 इत तारक इक असुर प्रकटि सब सुरनि सतावै ॥
 शिव सुत मारै जाहि सुरनि मिलि निश्चय कीन्हों ।
 मेख्यो शिव दिँग काम छार हरने करि दीन्हों ॥
 शिवहित तप गिरजा करहिँ, ताप युक्त सब जग भयो ।
 आशुतोष सन्तुष्ट है, मनवाञ्छित फल दै दयो ॥

विविधि माँतितें करी परीक्षा शिव गिरजाकी ।
 दृढ़ निष्ठा लखि वरी, कामना पुरी प्रजाकी ॥
 विधि, हरि, सुर, गन्धर्व सन्ननि मिलि धूम मचाई ।
 शिवकी निरखि बरात स्वयं शोभा सकुचाई ॥
 नित्य शक्ति शिवकी प्रिया, अपनाई फिरतें वरी ।
 शिव दुलहा दुलहिनि शिवा, रति लखि पति हित पग परी ॥


काली, गौरी भई हँसीमें कोप जतायौ ।
 देवी दया दिखाइ मगरतें बाल छुड़ायो ॥
 गनपति और कुमार पुत्र द्वै अति ही प्यारे ।
 बाहन चूहो मोर भक्त भय हरिवेबारे ॥
 शक्ति युक्त शिव विविध विधि, लीला प्राकृतवत् करहिँ ।
 जाहि सुनहिँ जे भक्तजन, तिनिके अथ छिनमहँ कटहिँ ॥

स्वामिन् ! पशुपति ! प्रभो ! दासके पाश छुड़ाओ ।
 जगदम्बा ! माँ ! उमाँ, वत्सकूँ हृदय लगाओ ॥
 भटक्यो जगमहँ जनक ! शरन चरननिमहँ दीजे ।
 माँ ! अन्न गोद बिठाय चूमि मुख सुतको लीजे ॥
 यद्यपि हौँ अति अधमहूँ, तऊ पिता ! अपनाइ लै ।
 मैयो ! साधन रहित सुत, कूँ हियतें चिपकाइ लै ॥

है अघर्म विधि पुत्र मृषा है ताकी जाया ।
 द्वै तिनके सन्तान दम्भ सुत पुत्री माया ॥
 ते पति पतिनी बने लोभ शठता द्वै जाये ।
 दम्पति हैकें तिननि क्रोध हिंसा उपजाये ॥
 हिंसा क्रोध विवाह करि, कलि दुरुक्ति जनि संतती ।
 अन्य युगनिमें छीन बल, होहिँ बली कलिमहँ अती ॥

कलि द्विरुक्तिने जने मृत्यु भय दोऊ बालक ।
 दुलहा दुलहिनि बने क्रूर सब जगके घालक ॥
 तिनि दोउनिर्ते नरक यातना भये मूढ़मति ।
 पापनिको दुख भोग करावें देहिँ दुःख अति ॥
 जे अधर्मके वंशकूँ, स्वयं पढ़ैं सबतें कहैं ।
 तिनके मनकी मलिनता, भिटै अन्त सुरपुर लहैं ॥

इति श्रीभागवत चरितके द्वितीयाहमें अधर्म वंश वर्णन नामक
 अष्टम अध्याय समाप्त



अथ नवमोऽध्यायः

[६]

दोहा—विदुर ! कहूँ अब भ्रुव-चरित, जिन कीये वश श्याम ।
 बालकपनमहँ घर तज्यो, पुनि पायो भ्रुव घाम ॥
 छप्पय—शतरूपापति स्वायंभुव मनु तेज तपोयुत ।
 प्रियवत अरु उत्तानपाद तिनके द्वै शुभ सुत ॥
 हौ महिषीं उत्तानपादकी सुरुचि सुनीती ।
 किन्तु नृपतिकी अधिक सुरुचि पर्त्तापै प्रीती ॥
 सुरुचि पुत्र उत्तम जन्यो, नृपको अति प्रिय है गयो ।
 बड़ी सुनीति तिरस्कृता, तिनको शुभ सुत भ्रुव भयो ॥

परम सुन्दरी सुरुचि भूप वशमें करि लीन्हें ।
 भ्रुवकी मातु सुनीति दुःख ताकूँ बहु दीन्हें ॥
 प्रभु सुमिरन नित करें पुत्रकूँ जिही सिखावें ।
 बेटा ! जगमहँ पुरुष भाग्यहीतों सब पावें ॥
 हरि चिन्तन ही लाभ अति, हरि सुमिरन ही श्रेष्ठ सुख ।
 परम कष्ट हरि विसमरन, शायागतकूँ कवन दुख ॥

एक दिनाकी बात गये भ्रुव महलनि भीतर ।
 उत्तमकूँ लै गोद मोदयुत बैठे नृपवर ॥
 ललकि गोदमहँ चढ़न मनोरथ भ्रुवने कीन्हों ।
 किन्तु सुरुचि रुचि निरखि गोद सुतनृप नहिँ लीन्हों ॥
 भ्रुव हियको इच्छा लखी, सौतेली माँ हैंसि परो ।
 सुमिरि सौतियाडाहकूँ, भ्रुव माँकी निन्दा करी ॥

बालकतें यों बिहँसि विमाता बोली बानी ।
 बेटा ! व्यर्थ विषाद करै तू अति अज्ञानी ॥
 यद्यपि राजा तनय किन्तु मम कोखि न जायो ।
 तू सुनीतिके गरभमाँहि किहि अघतें, आयो ॥
 अब तप करि मम उदरतें, लेहि जनम सम्भव जबहिं ।
 उत्तम सम नृप अङ्गमहँ, बैठि सकैगो तू तबहिं ॥

सुनत विमाता वचन क्रोध ध्रुवकुँ अति आयौ ।
 फरके दोऊ ओठ रोष सब तनमहँ छायाँ ॥
 खिसियानों फिरि रोइ मातु ढिँग चलयो रिस्यानो ।
 मार्यो बालक सर्प दण्डतें मणिधर मानों ॥
 रुदन करत निज सुत लख्यो, दौरि गोद माता लयो ।
 सुत मुखपै निज मुख धर्यो, चूम्यो पुनि घोरज दयो ॥

बोली—बेटा ! बात बतादै च्यों तू रोवै ?
 च्यों निकासिकें नोर नयनको काजर धोवै ?
 पुनि पुनि पूछे मातु बात कछु नाहिँ बताई ।
 तब पुरवासिनि कथा आदितें अन्त सुनाई ॥
 सुनि सुनीति सब सौतिकी, सुत संबन्धी दुख कथा ।
 भुरसि अनलतें ज्यों लता, गिरै मई त्यो हियव्यथा ॥

सुत समुझायो मातु कृष्ण दुख दूरि करिजे ।
 वे अनाथके नाथ शोक संताप हरिजे ॥
 कमलनयन बिनु नाहिँ ताप-त्रय हरिवेवारो ।
 दीनबन्धु विनु बत्स ! हमारो कौन सहारो ॥
 जो समृद्धि सुख परम पद, चाहो तो हरिपद गहहु ।
 रटि रसना हरि रूप दग, सुमिरि चरित मधुवन बसहु ॥

मुनी मातुकी बात पुत्र मुनि धीरज धार्यो ।
 ऊँच नीच सब सोचि फेरि करतव्य विचार्यो ॥
 जननीतैं ध्रुव कहैं—मातु अब आज्ञा दीजे ।
 पथ मंगलमय होहि कृत्य अब सोई कीजे ॥
 माँ इकलौते तनयकूँ, हिय लगाय आशिष दई ।
 पितुपुरतैं ध्रुव चलि दये, फैलि बात घर-घर गई ॥

दये प्रलोभन बहुत न ध्रुव फिरि घरकूँ गदे ।
 दुख वन पथके सोचि करी नहिं शंका हिरदे ॥
 ज्योंही आगे बढे मिले मुनि नारद ज्ञानी ।
 जग उपकारक देव बात ध्रुव मनकी जानी ॥
 अबहर कर सिरपै धर्यो, बोले—बेटा ! बाल तू ।
 अरे ! मान अमान का, क्रीड़ासक्त कुमार तू ॥

बेटा ! जगमें जीव भाग्यतैं दुख सुख पावै ।
 जा घर अपने लौटि व्यर्थ ज्यों धक्का खावै ॥
 ध्रुव बोले—हे विमो ! बात नहिं बैठे मनमें ।
 बाक बाण बहु विँधे विमाताके मम तनमें ॥
 घर लौटूँगो तबहिं जब, सर्वोत्तम पद पाउँगो ।
 नहिं तो मुनिवर ! घोर तप, करत करत मरि जाउँगो ॥

मुनि प्रसन्न अति भये देखि हड़ता बालककी ।
 बोले—बेटा ! बात मातुकी अति हो हितकी ॥
 सब रोगनिकी एक औषधी हरि पद-सेवन ।
 जा कालिन्दी कूल धाम जहँ मनहर मधुवन ॥
 गोवरधन गिरिवर जहाँ, कृष्ण करें क्रीड़ा कलित ।
 ललित कुञ्ज भुकि भूमिकें, चूमैं हरि पद-रज सतत ॥

जा करि मधुवन वास आश जगकी तजि दीजो ।
 कालिंदीमें तीन काल मज्जन नित कीजो ॥
 यम नियमनिक्कूँ साधि बाँधि आसन जो सुखकर ।
 पूरक कुंभक और नित्य रेचक करियो वर ॥
 मन, इन्द्रिय अरु प्रान मल, मेंटो प्राणायामतैं ।
 प्रत्याहार सम्हारिकें, चित्त लगय्यो श्यामतैं ॥

धरियो हरिको ध्यान भान जगको नहिं होवै ।
 श्रीहरिको शुभ ध्यान दुःख जगके सब खोवै ॥
 मधुमय सुखकर मृदुल सुधासम मनहर वैंना ।
 सुन्दर लोल कपोल कमलमुख विकसित नैंना ॥
 कर कङ्कण केयूर वर, कुंडल काननिमें लसैं ।
 करुणासागर प्रनतप्रिय, मन्द मन्द माधव हूँसैं ॥

करतल, पदतल, ओठ, अधर अति अरुन मनोहर ।
 मन्द मन्द मुसकान सजल जलधर वपु प्रियतर ॥
 काञ्चनकी कमनीय करधनी कटि में भ्राजैं ।
 शङ्ख चक्र अरु गदा पद्म करकमलानि राजैं ॥
 यों बेटा ! भगवान को, ध्यान करेगो नेमतैं ।
 तो निश्चय करुनायतन, प्रकट होयेंगे प्रेमतैं ॥

पूजा प्रभुकी प्रेम सहित करियो मधुवनमें ।
 धरियो जो कछु मिलै भावतैं हरि—चरननमें ॥
 तुलसीदल, जल, फूल, मूल फल जो मिलि जावैं ।
 भाववस्य भगवान् प्रेमतैं सोई पावैं ॥
 गोवरधनकी शिला वा, वटिया शालिगरामकी ।
 करियो सेवा नेमतैं, कृपा होहि धनश्यामकी ॥

द्वादश अक्षर सरिस श्रेष्ठ हैं मन्त्र न दूजो ।
 वाहीतें फल फूल सहित हरिक्कूँ नित पूजो ॥
 करि आवाहन प्रेम सहित आसन फिरि दैयो ।
 पाद्य अरघ आचमन स्नान जलतें करवैयो ॥
 वस्त्र और उपवीत दै, गंध धूप दीपादि करि ।
 तत्र नैवेद्य फलादि मुख, शुद्धि फेरि द्रव्यादि धरि ॥

करिकें पूजा विविध भाँतितें विनती करियो ।
 यों सब मनके मैल मेंटि चितमें हरि धरियो ॥
 जो नर पूजै भावभक्तितें बेटा ! उनक्कूँ ।
 मन वाञ्छित फल देहि कल्पतरु सम हरि तिनक्कूँ ॥
 अरथ धरम अरु काम सुख, मोक्ष देहि आश्रितनिक्कूँ ।
 किन्तु न चाहैं भक्त कछु, केवल चाहैं भक्तिक्कूँ ॥

शिखा दीक्षा पाइ गमनकी आज्ञा लीन्हीं ।
 अति प्रसन्न भ्रुव भये दण्डवत् चरननि कीन्हीं ॥
 मुनि सिरपै कर धर्यो, दई आज्ञा हिय हरषे ।
 दृढ़-प्रतिज्ञ है चले सुमन नभतें बहु बरषे ॥
 करि प्रदक्षिणा प्रेमतें, बार बार विनती करी ।
 भ्रुव तप हित बन चलि दये, तनु पुलकित सुमिरत हरी ॥

इति श्रीभागवत चरितके द्वितीयाह में भ्रुव वनगमन नामक
 नवमो अध्याय समाप्त ।

अथ दशमोऽध्यायः

[१०]

इत सोचैं उत्तानपाद नृप महलनिमाहीं ।
 च्यौ गोदीमें चढ़त पुत्रकूँ लीयो नाही ॥
 हाय ! कुमति मन बसी फूल-सो लाल गँवायो ।
 यों सोचत मन दुखित कमल मुख नृप कुम्हलायो ॥
 भ्रुवकूँ इत करिकैं विदा, नारद मुनि नृप ढिँग गये ।
 विधिवत मुनि पूजा करी, अति हरषित भूपति भये ॥

पूछैं नारद—नृपति ! कमल मुख च्यौ मुरझायौ ।
 अरथ धरम अरु काम अपर करतव्य नसायौ ॥
 कैं नृप अति दुखित कहैं—“हौं नाथ ! अभागी ।
 नारीके वश भयो कानि कुलकी सब त्यागी ॥
 प्रमदा क्रीड़ामृग बन्यो, सुधि बुधि मेरी नसि गयी ।
 कुसुम सरिस सुकुमार सुत, तज्यो कुमति मन बसि गयी ॥

हँसि नारद मुनि कहैं—नृपति ! चिन्ता नहिं कीजै ।
 प्रभु सरबज्ञ समर्थ चित्त तिनि चरननि दीजै ॥
 सुत प्रभाव नहिं विदित सुयशतैं भुवन भरैगो ।
 करि न सकैं जो लोकपाल सो काज करैगो ॥
 है कृतार्थ अति बेगि ही, तब चरननिमहँ आइगौ ।
 त्रिभुवनमहँ विख्यात है, यश तुम्हार फैलाइगौ ॥

कहि सब सुत संवाद भये अन्तरहित मुनिवर ।
 नृप हिय फाटन लग्यो गये ध्रुवकी माता घर ॥
 परे पैर भट खींचि देवि चरननि लिपटानी ।
 मुरुचि स्वच्छ हिय कही सेविका हौं तुम रानी ॥
 त्याग बिना सुख होहि नहिं, त्याग प्रेम बिकसित करत ।
 यह तजि ध्रुव जब बन गये, तब तीनिहु दिखिमिलि रहत ॥

इत ध्रुव आयसु पाइ गये पावन मधुवनमें ।
 अधिक चटपटी लगी कृष्ण दरशनकी मनमें ॥
 कालिन्दीके कूल पहुँचि अतिशय सुख पायो ।
 असित सलिलमें न्हाय ग्वा दिना कछु नहिं खायो ॥
 तरणितनूजा तट बसहिं, हिय लागी लौ श्यामतेँ ।
 अब तक वह थल ख्यात है, ध्रुवटीलेके नामतेँ ॥

फल फूलनितें लदे नम्र पादप जहँ मनहर ।
 शुक पिक मत्त मयूर करें कोकिल कलरव-वर ॥
 स्वच्छ सलिलतेँ भरे सरोवर सुखकर जहँ तहँ ।
 तिनमें बिकसित कमल भ्रमरगन गुंजें जिनमहँ ॥
 कालिन्दीकी कलितधुनि, मुनि सब संशय भगि गये ।
 ऐसे मधुवनमहँ निवसि, ध्रुवजी अति प्रमुदित भये ॥

करहिं कठिन तप सततचित्त प्रभु चरन लगायो ।
 कछु दिन तीसर दिवस फेरि कछु छुटवें खायो ॥
 नौदिन बारह दिवस अंतमहँ भोजन त्याग्यो ।
 वायु खाइकें रहें ध्यान भगवतमहँ लाग्यो ॥
 एक पैरतेँ ठूँठ सम, निश्चल हैकें थिर भये ।
 सब थल निरखें श्यामकूँ, तन्मय हरिमें है गये ॥

रोके इन्द्रिय द्वार चित्त इतउत न चलायौ ।
 निश्वम्भर हियधारि ध्येयमें ध्यान लगायौ ॥
 रुकी सबनिकी स्वाँस जीव सबई घबराये ।
 डगमग डोले धरनि लोकपालहुँ अकुलाये ॥
 सोचें असमयमें प्रलय, किहि कारन जगमें भई ।
 हेतु कहा सहसा अबहिं, स्वाँस सबनिकी रुकि गई ॥

दीनबन्धु के द्वार गये दौरे देवादिक ।
 हाथ जोरि सब कहें—प्रभो ! जगके प्रतिपालक ॥
 भयो कहा जिह देव ! चराचर च्यों दुख पावैं ।
 सबकी स्वाँस प्रस्वाँस च्यों नहीं आवैं जावैं ॥
 शरणागतवत्सल बिमो ! भयहारी सब भय हरहिं ।
 बेगि छुड़ावहु बिपतितैं, बार बार बिनती करहिं ॥

सुनि देवनिकी बिनय कहें प्रभु—मत घबराओ ।
 भयकी नहिँ कछु बात न चिन्ता मनमें लाओ ॥
 मचल्यौ मेरो बालभक्त इक अबई जाऊँ ।
 करिकें प्यार दुलार बिबिध विधतैं समुझाऊँ ॥
 वाकबाणतैं बिद्ध है, करे तपस्या कठिनतर ।
 मुँह माँग्यो बर देउँगो, सेवककूँ सब सुलभ वर ॥

देव गये निजघाम सजे घनश्याम हमारे ।
 शङ्ख, चक्र, अरु गदा पद्म कर कमलनि धारे ॥
 पीताम्बर फहरात जात विद्युत सम चमकै ।
 मणिमय मनहर मुकुट अलक सँग दमदम दमकै ॥
 भक्त दरसकूँ व्यग्र अति, उपमा किहि सम देहि कबि ।
 गरुड़पीठि चढ़ि जाहिं ज्यों, अस्ताचलकूँ सहसरबि ॥

माधव मधुवन लख्यो तहाँ थिर बालक ठाढ़ो ।
 देख्यो बालक हेज हियेमें हरिके बाढ़ो ॥
 अन्तरहित निजरूप हियेतें ध्रुवके कीन्हों ।
 इत उत निरखै नेत्र खोलि हरि सम्मुख चीन्हों ॥
 पर्यो दंडवत् भूमिमें, तनिक न तनकी सुधि रही ।
 तनु पुलकित गद्गद गिरा, प्रेम समाधि दशा लही ॥

प्रेम मगन ध्रुव भये सतत श्रीहरिहिं निहारें ।
 इस्तुति कैसे करूँ बिकल है बाल बिचारें ॥
 जानी हरि हिय बात शङ्कतें बदन छुवायो ।
 भये वेदमय बचन ज्ञान विज्ञान लखायो ॥
 वेद शास्त्र सम्मत बचन, शङ्क छुवत मनमहँ जगे ।
 गद्गद बानी मुदितमन, बिनती ध्रुव करिवे लगे ॥


ध्रुव-स्तुति

जो सब हिय निबसहिँ घट घट प्रविसहिँ, सब करननि विकसावैं ।
 जो एक अनूपा, सब जगरूपा, तिनि चरननि सिर नावैं ॥
 जो रचहिँ जगतकुँ, करन असतकुँ, जीव रूप है जावैं ।
 बनि एक अनेका, सबको लेखा, रखहिँ फेरि भरमावैं ॥
 ते पुरुष अभागी, प्रभुपद त्यागी, विषय भोग जग भाहैं ।
 जे तव पद ध्यावैं, पद तब पावैं, जनम मरन छुटि जाहैं ॥
 है कथा तुम्हारी, सब दुखहारी, जो नर सुनै सुनावैं ।
 ते होहिँ कृतार्थ, भक्त यथार्थ, भुक्ति मुक्ति ठुकरावैं ॥
 पुनि पुनि पद ध्याऊँ, यह बर पाऊँ, तब भक्तनि सतसंगा ।
 तब-जन अनुरागी, अतिबड़भागी, छिन छिन पुलकहिँ अँगा ॥

तिनके तुम स्वामी, अन्तर्यामी, सब तुममहँ मिलिजावैं ।
 जिन अज शिव ध्यावैं, कमल कहावैं, तिनि चरननि सिरनावैं ॥
 जो अज अविनासी, नित्य उदासी, जगहित धरि अवतारा ।
 करि, पालि, सँहारैं, खलदल मारैं, होहि न नैंक विकारा ॥
 तुमकूँ जो सरबस, अतिशय प्रियरस, समुझैं ते बड़भागी ।
 हम मलिन मंदमति, दीन दुखित अति, विषयनिके अनुरागी ॥
 कहूँ शरन न हमकूँ, जननी तुमकूँ, समुझि उतझिक्कूँ घावैं ।
 पद पङ्कज मनहर, अवहर सुखकर, तिनमहँ शीश नवावैं ॥

सुनि बिनती हरि कहैं कलैं—मन बाँछित तेरो ।
 पावै दुरलभ श्रेष्ठ अन्त तू ध्रुवपद मेरो ॥
 करि छत्तीस हजार बरष पृथिवीपै शासन ।
 भोगो भोगनि किन्तु रहै मम चरननिमहँ मन ॥
 यों बर दैकैं बरद हरि, अन्तरहित छिनमें भये ।
 करिकैं पश्चात्ताप बहु, ध्रुव निज घरकूँ चलि दये ॥

इति श्रीभागवत चरितके द्वितीयाहमें ध्रुवनारायण दर्शन नामक
 दसवाँ अध्याय समाप्त



अथ एकादशोऽध्यायः

[११]

कहैं बिदुर—गुरु ! विष्णु दरस करि भयो ताप च्यौ ?
 बोले मुनि—मुनि ध्रुवहिँ चित्तमहँ सोच भयो यौ ॥
 अरे ! मोक्षपति पाइ मोक्ष मैंने नहिँ मागी ।
 परुष विमाता बचन यादि करि ईर्ष्या जागी ॥
 हाय ! नृपति ढिँग जाइ मम, माँगी चावलकी भुसी ।
 तुच्छ भोगहित भजे हरि, हिय कुबुद्धि कैसी घुसी ॥

हाय ! पाइकें लाल काँच लै ताहि गँवायो ।
 हाय ! सुरनि मति भ्रष्ट करी ध्रुवपद अपनायो ॥
 छै महिनामें मिले मोहि माधव मदहारी ।
 तऊ न माँगी मुक्ति गई मेरी मत मारी ॥
 माँग्यो सोनो एक पल, ढिँग सुमेरुके जाइकें ।
 प्यासे गंगातट गये, पीयो पय न अघाइकें ॥

पूछें शौनक—“सूत ! दरश दुरलभ अति हरिके ।
 पाये ध्रुवने मास मात्र छै ही तप करिके ॥
 बहुत दिवस तक करत करत तप मुनि मरि जावें ।
 किन्तु न भाँकी नटनागरकी छिनकूँ पावें ॥
 कहैं सूत—“मुनिवर ! सुनहु, होहि चरम जिनको जनम ।
 नाम मात्र साधन करें, होहिँ प्रकट पूरव करम ॥

एक करै तप सहस बरस परि सिद्धि न पावै ।
 एक दिना दस करै सिद्ध चटपट है जावै ॥
 एक राति दिन पढ़ै यादि संथा नहि होवै ।
 एक सुनतही यादि करै फिरि सुखतें सोवै ॥
 पाप, पुण्य, दुष्कृत, सुकृत, होहि उदित बहु जनमके ।
 सिद्धि असिद्धि अधीन नहि, ततछिन कीन्हें करमके ॥

पाँच दिना तप कर्यो भद्रतनु भये मित्र हरि ।
 तिन गुरु तप अति कर्यो भये हरि दरश नहीं परि ॥
 ऐसेही ध्रुव पूर्व जन्ममहँ हरि आराधे ।
 जप, तप, संयम, नियम कुच्छ आदिक व्रत साधे ॥
 संग दोषतें बिप्रतें, प्रकट राजकुलमें भये ।
 मास षष्ठ में सुकृत बश, सफल मनोरथ है गये ॥

मुक्ति चाह हिय होय संग विषयिनि को त्यागे ।
 भोगनितें मन रोकि देखि कामिनिक्कू भागे ॥
 जैसे जल थल नीच निरखि उतकूँई ढरके ।
 तैसे भोगनि देखि चित्त उतकूँई सरके ॥
 मुक्तिबन्धकी साधु खल, संगति सच्ची युक्ति है ।
 विषयिनिके संग बन्ध है, साधुनिके संग मुक्ति है ॥

पूर्वजन्ममहँ रहे तपस्वी ध्रुवजी मुनिवर ।
 राजपुत्र संग कर्यो विषय सुख लागे सुखकर ॥
 चिन्तनमें आसक्ति बढ़ी विषयनिमहँ उनकी ।
 इच्छा मनमें भई राजसी सुख भोगनि की ॥
 अन्त समय मनमहँ रहै, जैसी इच्छा जासुकी ।
 अपरजन्ममहँ भावना, पूरी होवै तासुकी ॥

काम करै कछु किन्तु न इच्छा फल की होवै ।
 सुखमें फूले नहीं दुःखमें दुखी न रोवै ॥
 कृष्णार्पण करि करै शुभाशुभ सौंपै उनकूँ ।
 करै करम करतव्य धरै हरि चरननि मनकूँ ॥
 कर्यो करूँ जो करंगो, सब कछु प्रभु तुमई करो ।
 कर्ता भोक्ता हौ नहीं, कर्यो तुमनि तुमई भरो ॥

जा विधि राखें राम रहैं ताही विधि सज्जन ।
 जो करवावें करें भले ही निन्दें दुरजन ॥
 कृष्ण प्रीति ही करम कामना जगकी त्यागें ।
 प्रेम छाँड़िकें भक्त कृष्णतें कछु नहिं मागें ।
 ध्रुवजी यह सब सोचिकें, खिन्न मनहिं मन अति भये ।
 तप करिकें अपवर्गपति, तें जगके सुखई लये ॥

पितानगर ध्रुव चले भाग्यकूँ दुरजय मानत ।
 इत नृप बार्ता सुनी सिद्ध है सुत पुर आवत ॥
 सुनत प्रेममें विकल भये निज भाग्य सराह्यो ।
 मानो मरि मम पुत्र मृत्युके मुखतें आयो ॥
 सुनत सुखद संवादकूँ, अति प्रसन्न भूपति भये ।
 अन्न, वस्त्र, धन, धान्य, मणि, मुक्ता त्रिप्रनिक्कूँ दये ॥

भूपति आयसु दई साज स्वागतके साजे ।
 शंख, दुंदुभी, पणव मांगलिक बाजे बाजे ॥
 बल्लाभूषन पहिन कुमारी कन्या आवैं ।
 दधि अक्षत लै फूल-खील ध्रुवपै बरसावैं ॥
 आगे आगे त्रिप्रगन, करत वेदध्वनि चलि दये ।
 मंत्री रानी सबनि लै, सुत स्वागत हित नृप गये ॥

देख्यो उपवन निकट फूल सम सुतकूँ आवत ।
 गावत गुन गोविन्द अमीरस-सो बरसावत ॥
 उत्तरे रथतें भूपटि तनयकूँ हृदय लगायो ।
 बार बार मुख चूमि गोद में लाल बिठायो ॥
 पर्यो पैरपै पुत्र जब, पुलकित सब अँग है गये ।
 जनु प्रेमासव पान करि, भूप भाव भावित भये ॥


भेंटि पितातें तुरत मातुडिँग ध्रुवजी आये ।
 दोऊ मातनि पैर कपट छल तजि लिपटाये ॥
 भई सुनीती बिकल सुसुचि उठि आशिष दीन्हों ।
 भेंटे उत्तम ललकि मातु सुश्रूषा कीन्हों ॥
 मातु प्रेम मूर्च्छा तजी, सुतकूँ हिये लगाइकें ।
 सिर सँध्यो चूम्यो बदन, कीन्हों प्रेम अघाइकें ॥

हथिनीपै इक संग चढ़े ध्रुव उत्तम भाई ।
 धूम धामतें चले विविध विधि पुरी सजाई ॥
 गली, द्वार, गृह, चौक, राजपथ भरे भराये ॥
 केरा बन्दनवार बाँधि बहु भाँति सजाये ॥
 दधि, अक्षत, फल, फूल, जल, पीरी सरसौं खील सब ।
 छिरकें कन्या कुल वधू, ध्रुवजी जित जित जाहि जब ॥

सबतें सतकृत भये गये महलनि के भीतर ।
 लालित पालित भये जनक जननीतें ध्रुववर ॥
 सब सुखके सामान सजे शालामें सुखकर ।
 दुग्धफेन सम श्वेत सुखद शैया शुभ मनहर ॥
 असन सरस अतिबर बसन, शोभायुत मणिमय भवन ।
 विमल बाटिका कमलयुत, सर लखि होवै मुदित मन ॥

पाइ पिताको प्यार बिताई बाल अवस्था ।
 तरुन भये पितु संग करें सब राज व्यवस्था ॥
 सबकी सम्मति समुक्ति भूप सिंहासन दीन्हों ।
 मंत्री पुरजन प्रजा सबनि अमिनन्दन कीन्हों ॥
 राज्य भार ध्रुवकूँ दयो, नृप तपहित बनकूँ गये ।
 सुनत भूप ध्रुव अबनिपै, होवें मंगल नित नये ॥

इति श्रीभागवत चरितके द्वितीयाहमें ध्रुवराज्य तिलक नामक
 ग्यारहवाँ अध्याय समाप्त ।



अथ द्वादशोऽध्यायः

[१२]

बोली इक दिन मातु—बहू अब बेटा आवै ।
मेरे पूजै पैर तोइ भोजन करवावै ॥
रनु झुनु रनु झुनु करति फिरै मन मोद बढ़ावै ।
बहू संग लखि तोहि सफल जीवन है जावै ॥
हैंसे जननि ममता लखी, मुदित मातु मन अति भयो ।
कन्या भ्रमि शिशुमारकी, संग व्याह ध्रुव करि लयो ॥

पुत्र भये द्वै कल्प और बत्सर सुखदाई ।
दूसरि जाया इला पुत्र उत्कलकूँ जाई ॥
उत्तम मृगया हेतु गये अविवाहित बनमहँ ।
भयो यक्ष सँग युद्ध प्राण त्यागे तिन रनमहँ ॥
सुचि पुत्र हूँदन गई, दावानलमें जरि मरी ।
यक्षनिपै अति कोप करि, तुरत चढ़ाई ध्रुव करी ॥

चढ़े चैत्ररथ चले यक्ष कुलकूँ संहारन ।
देखी हिमगिरि पार पुरी अलका अति पावन ॥
धूधू करिके शङ्ख युद्धकूँ बेगि बजायो ।
मुनि यक्षनिनें तुरत समरको साज सजायो ॥
लड़िबे आये यक्ष मिलि, नहिं अवसर ध्रुवने दयो ।
मारै सबके सिरनि सर, बड़ बिस्मय सबकूँ भयो ॥

सबई मिलिकें यक्ष अकेले ध्रुवपै भूपटे ।
चाप चक्र सम चले चहुँ दिशि चटचट चटके ॥
खड्ग, परिघ, तिरसूल, परश्वध, शक्ति, भुसुन्डी ।
चलें दनादन समरमाहिं बिहरै रण चण्डी ॥
एक बार ध्रुवरथ दक्यो, यक्षनि बाणनितें जबहिं ।
रवि नोहारहिं फारि ज्यौ, प्रकटे रथ निकस्यो तबहिं ॥

ध्रुव फिरि मारे बान धुसे यक्षनिके तनमें ।
घायल हैकें गिरे भगे गिरि बन उपवनमें ॥
फिरि प्रकटाई विकट कपट माया शत्रुनिनैं ।
ध्रुवकुँ नाम १ हात्म्य जतायो खस्य मुनिनिनैं ।
तुरत चढ़ायौ धनुषपै, ध्रुव नारायण अस्त्रकुँ ,
यक्ष असंख्यहु, मरि गिरे, बचे भगे तजि शस्त्र कुँ ॥

निरखि पौत्रको कृत्य दुखित मनु ध्रुव दिँग आये ।
प्रेम भरे अति सरस बचन कहि कहि समुभाये ॥
बस, बेटा ! बध व्यर्थ न उपदेवनिको करि अब ।
वंशवृद्धिके हेतु न यक्षनितें तू लरि अब ॥
सहनशीलता दया अरु, मैत्री समतातें हरी ।
होहिं तुष्ट इन गुननितें, ज्यौ हिंसा इनकी करी ॥

अरे, जगतमहँ कौन जिवावें को किन मारें ।
जगकुँ वेई रचें अंतमहँ वे संहारें ॥
जीवनिकुँ उपजाय जीवतें जीव जिवावें ।
मारें जीवनि जीव बड़े छोटनिकुँ खावें ॥
नहिं यक्षनि तब बन्धुबध, कोन्हों सब हैं दैवबस ।
क्रोध बैरकुँ त्यागि अब, सब ईश्वरकृत समुक्ति अस ॥

लोकपाल .शिवसखा, धनद यक्षनिके ईश्वर ।
 क्षमा याचना करौ देहिंगे तुमकुँ शुभ बर ॥
 जब तर्क करें न क्रोध पैरपरि विनय सुनाओ ।
 हाथ जोरि है नम्र शरन उनकी तुम जाओ ॥
 विविध भाँति समझाइकें, मनु अन्तरहित है गये ।
 करिकें पश्चात्ताप बहु, अति विनीत ध्रुवजी भये ॥

गुरुजन आज्ञा करें ताहि .जे सिरपै धारें ।
 छौँडें तर्क कुतर्क करें भूट बिना बिचारें ॥
 ते जगमहँ धन धान्य सुयशके होवें भागी ।
 अन्त परमपद पाहिँ बनें प्रभुके अनुरागी ॥
 ध्रुव सुनि श्रद्धा सहित सब, मनु आज्ञा स्वोक्त करी ।
 यक्षनि प्रति हिंसा जगी, ज्ञान अग्निमहँ सो जरी ॥

ध्रुवकुँ समुभूयो शान्त धनद दिँग उनके आये ।
 बोले—वेटा ! बीरकाज करि काहि लजाये ॥
 यक्ष न मारे तुमनि उननि नहिँ उत्तम मार्यो ।
 क्रूर काल सब करै कालतैं सब जग हार्यो ॥
 मनु आज्ञा मानी तुमनि, अति प्रसन्न मम मन भयो ।
 बर माँगो मन भावतो, बिहँसि धनद ध्रुवतैं कह्यो ॥

हाथ जोरि ध्रुव कहें—कृपा करुनाकर कीजे ।
 हरि चरननि अनुराग दयाकरि मोकुँ दीजे ॥
 शंभुसखा सुनि कहें—सदा तुम भक्त भूपवर ।
 कृष्ण चरनमहँ भक्ति तुम्हारी बड़े निरंतर ॥
 यो कुबेर धरदान दै, तत्कृतिन अन्तरहित भये ।
 स्वप्न सरिस घटना भई, ध्रुव देखत ही रहि गये ॥

आये निज पुर करे यज्ञ बहु बैभव बारे ।
 पुण्य भोगतें पाप यज्ञ तपतें सब जारे ॥
 सुत, दारा, धन, धान्य जानि नश्वर सब त्यागे ।
 राज पुत्रकुँ सौपि सतत तपमें ई लागे ॥
 करे सुकृत सब सुख लहे, फिर ध्रुव वनबासी भये ।
 तजि सबरे गृह भोग सुख, बदरीवनकुँ चलि दये ॥

बदरीवनमहँ जाय अलकनंदामें न्हाये ।
 ऋषि मुनि दीन्हें कंद, मूल, फल तेई खाये ॥
 रहें तहाँ ध्रुव करें साध्यहित नित प्रति साधन ।
 प्रेम भावमहँ मग्न निरन्तर हरि आराधन ॥
 परम प्रेमकी सब दशा, स्वतः प्राप्त तिनकुँ भई ।
 द्रवित हृदय सागर बन्यो, अँखियाँ वर्षा बनि गई ॥

इक दिन लख्यो बिमान उतरतो नभतें आवत ।
 चकाचौंघ-सी करत छुटा चहुँदिशि छिटकावत ॥
 अरुण कमल दल नेत्र निहारे पार्षद हरिके ।
 करि प्रणाम ध्रुव उठे तुरत आये टिँग उनके ॥
 ध्रुव जीत्यो हरिपद तुमनि, बोले नंद सुनन्द तब ।
 मेज्यो दिव्य बिमान हरि, चढ़ें करें नहिँ देर अब ॥

आज्ञा सबतें लई चढ़ूँ ध्रुव जिहो बिचारें ।
 आयो तबई काल—प्रभो ! मोकुँ स्वीकारें ॥
 बोले ध्रुव—तू बैठ मान राखों तेरोऊ ।
 भक्त करें सत्कार चाहिँ आवै टिँग कोऊ ॥
 मृत्यु शीश पद दै चढ़े, हरि बिमान चट चलि दयो ।
 अपनो सो मोहड़ौ लिये, मृत्यु खिस्थानों रहि गयो ॥

जब उड़ि चलयो विमान यादि माताकी आई ।
 समुक्ति पारषद भाव मातु गति तिननि बताई ॥
 तुमते पहिले जात मातु च्यौ चिन्तित होवैं ।
 च्यौ नहिँ पावैं सुगति जासु तुम सम सुत होवैं ॥
 सुनि अति हरषित ध्रुव भये, चित्त लगायौ श्याममहँ ।
 सप्त ऋषिनिक्कूँ पार करि, पहुँचि गये ध्रुव घाममहँ ॥

ध्रुव जीत्यो हरि घाम जाइ नहिँ पापी पावैं ।
 समदरशी शुभ शान्त शुद्ध जनइँ जहँ जावैं ॥
 देवहु जिनके परम पुण्यको पार न पावैं ।
 गुरुहू गुरता त्यागि शिष्य गुन गौरव गावैं ॥
 धन्य धन्य ध्रुव धन्य तव, जननी मातु सुनीति है ।
 धन्य हृदय तुव जासुमहँ, प्रभुपदपंकज प्रीति है ॥

सोरठा—नारद ध्रुव गुन गान, गुरु हैकें गायौ मुदित ।
 बर बीनाकी तान, छेड़ि प्रचेतनि सत्रमहँ ॥

पद

(१)

सुनीती धन्य जगतके माहीं ।

जिनके लाल भक्त चूड़ामनि, जिन सम कोई नाहीं ॥ सुनीती०
 क्रोधित सुत समुझायो सब विधि, साँची सीख सिखाई ।
 शिक्षा पाइ गये ध्रुव बनकूँ, अति मनमहँ हरषाई ॥ सुनीती०

जप व्रत साधे प्रभु आराधे, बनकी मेवा खाई ।
 प्रभु पद पायौ रोष गँवायौ, लखि ध्रुव सुरुचि सिहाई ॥ सुनीती०

(२)


घन्य ध्रुव भक्तनि के सिरमौर ।

सौतेली माँ बाकवानने वेध्यौ हियो कुठौर ॥ घन्य०
क्रोधित है बनकूँ चलि दीन्हें छोड़ी पितु की पौर ।
बालक है हरि हियमहँ धारे, तजी आश जग और ॥ घन्य०
मधुवन गये मानि मेरी सिख, हरिजू आये दौर ।
प्रभुपद पायो दुरलभ जगमहँ, पाइ सकै नहिँ और ॥ घन्य०

छप्पय—अति पवित्र यह चरित जाहि जे निशिदिन गावें ।
ते निश्चय नर नारि प्रेम प्रभुपदको पावें ॥
जे श्रद्धातें पढ़ें सुनैं पढ़ि सबनि सुनावें ।
पाइँ परमपद पुण्य जगतमहँ नहिँ फिरि आवें ॥
बालसुलभ क्रीड़ा तजी, तय करि अक्षय पद लह्यो ।
उन ध्रुवजी को बिदुर ! यह, विमल चरित तुमतेँ कह्यो ॥

इति श्रीभागवत चरितके द्वितीयाहमें ध्रुववैकुण्ठ पदाधिरोहण नामक
बारहवाँ अध्याय समाप्त ।

(मासिक पारायण सप्तम दिवस विश्राम)



अथ त्रयोदशोऽध्यायः

[१३]

छप्पय—अति आनंदित भये बिदुर बर बोले बानी ।
 भगवन् ! ध्रुवकी कहो, कलित कमनीय कहानी ॥
 कहो प्रचेता कौन कहाँ शुभ सत्र रचायौ ।
 कैसैं नारद जाइ तहाँ ध्रुवको गुन गायौ ॥
 सुनि अति पावन प्रश्नकूँ, हँसि बोले मैत्रेय मुनि ।
 भये प्रचेता वंश ध्रुव, ताको वरनन बिदुर मुनि ॥

ध्रुव के वत्सर पुत्र भये पुष्पाण तासु सुत ।
 तिनके बेटा व्युष्ट सर्वतेजस् सुत तपयुत ॥
 आकूतीमहँ पुत्र चक्षु मनु तिनके सुखकर ।
 मनुके उल्मुक भये तिनहिँ के अंग पुत्रवर ॥
 मृत्यु सुताको अंगने, पाणिग्रहण विधिवत् कियो ।
 ताहांतैं अति क्रूरतर, वेन पुत्र पैदा भयो ॥

सोरठा—भई क्रूर च्यों मूढ़, मृत्यु सुता गुरुवर ! कहौ ।
 बिदुर प्रश्न सुनि गूढ़, कहन लगे मैत्रेय मुनि ॥

छप्पय—जो-जो कारज करत सदा माता पितु दीखैं ।
 वेई सबरे काज बालिका बालक साखैं ॥
 सुता सुनीथा मृत्यु पिताकूँ संबकूँ मारत ।
 निरखै नित प्रति दंड देत ताड़त हुंकारत ॥
 तप सुशङ्क बनमहँ तपत, मृत्यु सुता तहँ जाइकैं ।
 तड़ तड़ ताड़न नित करति, मारति तोत्र सिहाइकैं ॥

वरजें बहुत सुशङ्ख सुनीथा सदा सतावै ।
 दयो शाप अति क्रूर पुत्र तू दुष्टा जावै ॥
 भई खिन्न मुनिशाप समुक्ति नहिं व्याह भयो जन्न ।
 तपहित बनमहँ गई अंग सँग मेल भयो तब ॥
 रम्भाने तिकड़म करी, अंग संग मन मिलि गयो ।
 भयो व्याह रानी बनी, दुष्ट बेन ताकें भयो ॥

अंग कर्यो इक राजसूय सुर नहिं तिहिं आये ।
 कारन पूछ्यो भूप बिप्र अध पूर्व बताये ॥
 तिनकी आज्ञा मानि यज्ञ पुत्रेष्टि रचायो ।
 यज्ञेश्वरतें भूप पात्र पायसको पायो ॥
 संधि सुनीथाकूँ दयो, खाइ गर्भ ताकें रह्यो ।
 गर्भवती रानी लखी, मन प्रसन्न सबको भयो ॥

गर्भवती बनि सदा सुनीथा जिही विचारै ।
 होवे पापी पुत्र क्रूरता मनमहँ धारै ॥
 अङ्ग अङ्गको पाप सिमिटि वीरजमहँ आयौ ।
 शाप सुनीथा फल्यो क्रूरकर्मा सुत जायो ॥
 गर्भकालमहँ मातु जो, सोच सदा जैसो करै ।
 पूर्ण गर्भके होतई, सुत पैदा तैसो करै ॥

भयो पापमति बेन सदा मदमातो झूमे ।
 तीर कमन्टा लिये मृगनि मारत बन घूमे ॥
 छोरनि बाँधै दुष्ट ऐंचिकें जलमें डारै ।
 मगमहँ मूरख पकरि मार मुक्कनिकी मारै ॥
 शठता सुतकी सुनि सबहिं, दुःख अङ्गकूँ अति भयो ।
 सोचें मनुके बंशमहँ, कुल अलंक यह है गयो ॥

समुझायो बहुभाँति किन्तु खल बेन न मान्यो ।
 नहिं समुमेगो दुष्ट अंग यह निश्चय जान्यो ॥
 सोचें कुलमहँ कोढ़ भयो खलमति सुत पापी ।
 कैसे त्यागूँ जाहि जिही चिन्ता चित व्यापी ॥
 कहा कलँ कछु बस नहीं, अब तजि घर हरिकूँ भजूँ ।
 तजै दुष्टता जिह नहीं, तो जाकूँ हौं ही तजूँ ॥

निभिड़ तिमिरमय निशा नींद नृपकूँ नहिं आई ।
 करिकें इत उत बात बेनकी मातु सुआई ॥
 सबकूँ सोवत छोड़ि राजघरतें नृप निकसे ।
 चन्द्रहीन लखि निशा अमित नभ उड़गन विकसे ॥
 जनमे जा घरमें नृपति, बड़े भये राजा भये ।
 कैचुल तजि अहि जाहि ज्यों, सुत दुखतें त्यों तजि गये ॥

दुढ़वाये चहुँओर भूपको पतो न पायो ।
 तब ऋषि मुनि मिलि दुष्ट बेनकूँ नृपति बनायो ॥
 यद्यपि मंत्री सचिव सबहिं सहमत नहिं जाते ।
 तऊ अंगको तनय मुनिनि नृप कीन्हों ताते ॥
 एक गिलोय स्वभावतें, कड़वी फिरी नीमहिं चढ़ी ।
 त्यों सिंहासन पाइकें, बेन दुष्टता अति बढ़ी ॥

फिरै निरंकुश भयो करै अपमान सबनिको ।
 मानें बेद न यज्ञ करै पूजन न सुरनि को ॥
 डोढ़ी दई पिटाय यज्ञ मख दान करो मति ।
 मैई इन्द्र, कुबेर, वरुण, यम, रुद्र, बृहस्पति ॥
 मोइ छाँड़ि जे औरकूँ, जप तप करिकें भजिजे ।
 समुझो मेरे खड्गतें, प्रान तुरत ते तजिजे ॥

जब नास्तिकता करत बेन धूमे भुवि माहीं ।
तब सब ऋषि मुनि विप्र देवगन अति घबराहीं ॥
कहें परस्पर—दुष्ट देहि अति सबनि यन्त्रणा ।
धरम करम कस होहिं करहिं मिलि विप्रमन्त्रणा ॥
सबकी सम्मति जिह भई, पहिले चलि समुझाईंगे ।
जो नहिं माने मन्दमति, तो फिर ताहि बताईंगे ॥

यों निश्चय करि गये भूपटिँग मुनि उपकारी ।
बोले बचन विनोत—बेन ! सुनु विनय हमारी ॥
च्यों करवाये बंद यज्ञ, व्रत दान, धरम वर ।
च्यों मेंटी मरजाद वेदकी अतिशय सुखकर ॥
राजन् ! तुमरे राजमहँ, होहिं यज्ञ जो विधि सहित ।
तो होवें सबई सुखी, प्रजा ब्याधि पीड़ा रहित ॥

है मनुको अति विमल वंश ध्रुव जनमे जामें ।
भये भूप उत्तानपाद हरिपदरत तामें ॥
वर्णाश्रम शुभ धर्म करो पालन तुम ताकूँ ।
उज्ज्वल कुलकी कीर्ति करो कलुषित च्यों वाकूँ ॥
बेन कोपकी अगिनिमहँ, मुनिगण—बच घृत सम भये ।
बोल्हो करिकें कोप अति, ये आये मम गुरु नये ॥

फिरि यों बोल्हो बेन—बड़े मूरख हो तुम सब ।
मैंई सबको ईश मोइ पूजो तुम मिलि अब ॥
मोइ छोड़िकें ओर ईश कोई मति जानों ।
मूरखताकूँ तजो, महेश्वर मोकूँ मानों ॥
जो अब बकबक करो तो, लुंगो जीभ निकारिकें ।
जीवित चाम उतारिकें, भुस ढुंगो भरवाइकें ॥

मुनत कुपित मुनि भये पुकारें मारो मारो ।
 राजासनतें खेंचि दुष्टकुँ बेगि उतारो ॥
 पाह परम ऐश्वर्य नीच अतिशय इतरावै ।
 करे वेद अपमान आज वाको फल पावै ॥
 यो कहि भरि कैं क्रोधमें, सब मुनि मिलि हुंकृत करी ।
 तुरत बेनकी देह तहँ, प्रानहीन हूँ कैं गिरी ॥

इति श्रीभागवत चरितके द्वितीयाहमें बेन चरित नामक
 तेरहवाँ अध्याय समाप्त ।



अथ चतुर्दशोऽध्यायः

[१४]

छप्पय—झाँड़ि ताहि निरजीव गये निज-निज आश्रम मुनि ।
 मातु सुनीथा दुखित भई निजपुत्र मृत्यु मुनि ॥
 राज्यमाँहि बहु भई अराजकता अतिभारी ।
 लूट, पाट, व्यभिचार, कलह, चोरी अरु जारी ॥
 मुनिनि देश देख्यो दुखी, दया हिये उमड़ी प्रबल ।
 होहि तहाँ तप कस जहाँ, निरबलकूँ ताड़े सबल ॥

मुनि समदरसी शान्त, शान्ति हित सब पुर आये ।
 देखि बेनको मृतकदेह, अति हिय हंरषाये ॥
 बेन जाँघकूँ युक्ति सहित मुनि मथिबे लागे ।
 निकस्यो कारो पुरुष निरखि मुनि नहिँ अनुरागे ॥
 बेनदेह कल्मष कथ्यो, पृथक् देहतें ह्वैगयो ।
 मुनिनि निषीद कह्यो वचन, सो निषाद संशक भयो ॥

मथीं भुजा फिरि युगल भये लक्ष्मीनारायन ।
 पृथुल कीर्ति पृथु पुरुष अर्चि कमला जगपावन ॥
 तेज, बीर्य, बल, प्रभा सुलक्षण लखि मुनि हरषें ।
 गावें गुन गन्धर्व सुमन सुर नभतें वरषें ॥
 दक्षिण करतें पृथु भये, वार्येतें लक्ष्मी भई ।
 प्रभु प्रकटे मुनि प्रजाकी, चिन्ता सब ईं नसि गई ॥

दोहा—वेद, विप्र, सुर, साधु मख, करि इनको अपमान ।
मर्यो बेन तब पुत्र बनि, प्रकट भये भगवान ॥

छुप्य—विप्रवृन्द करि वेदगान हियमहँ अति हुलसैं ।
धेनु दूधकी घार बहावैं सरसिज बिकसैं ॥
स्वरगलोकतैं सिद्ध पितर, सुर, मुनि मिलि आये ।
भये चराचर सुखी चहूँ दिशि बजत बघाये ॥
कमलासन बिधि चरन कर, लखि लखन प्रमुदित भये ।
प्रकटे प्रभु पृथु रूपमहँ, सत्यलोक यों कहि गये ॥

मिलिकैं मुनि वेदज्ञ करन अभिषेक लगे तब ।
बाजैं तुरही शङ्ख राजसी साज सजे सब ॥
आये नदी, पहाड़, पेड़, पक्षी, पशु, पयनिधि ।
असन, बसन, मणि, रत्न, भेंट लाये बर बहुबिबि ॥
कनक सिंहासन धनद शुभ, दयो छत्र बर बरुनने ।
बायु दये अति बर व्यजन, माला दीन्हों घरमने ॥

लोकपाल मुरपाल सबनि मिलि सेवा कीन्हों ।
जापै जो बर वस्तु हती ताने सो दीन्हों ॥
स्वीकारे उपहार कर्यो सम्मान सबनिको ।
प्रजापाल प्रभु भये बढ्यो उत्साह सबनिको ॥
सिंहासन आसीन पृथु, सुर, नर, ऋषि, मुनि मन हरत ।
उमढ्यो आनँद दशहुँ दिशि, हिय हरषत जय जय करत ॥

मिलि मागध अरु सूत लगे विरदावलि गावन ।
तब लजित है लगे तिनहिँ हँसि पृथु समुभावन ॥
अरे ! मृषा गुन गाय समय ज्यों व्यरथ बिताओ ।
कीर्तनीय हरि एक तिनहिँकी कीरति गाओ ॥

पौनी, सूत, कपास नहिं, बल प्रशंसा होय जस ।
कीर्ति योग्य कछु कर्यो नहिं, करहु प्रशंसा फेरि कस ॥

सुनि सहमे सूनादि कर्यो संकेत मुनिनि जब ।
तजिकें सब संकोच करहिं गुन गान हरषि सब ॥
ये हुज्जे अति सहनशील शरणागतवत्सल ।
परम तेज सम्पन्न एक सम समुझें जल थल ॥
एक छत्र शासक सबल, सेवा सबकी करिज्जे ।
दुहिता करि घरनी दुहैं, कष्ट सबनिके हरिज्जे ॥

प्रजापाल पृथु भये आइ बोले जन सब अस ।
पृथिवीपै नहिं अन्न, करें निर्वाह नृपति कस ।
नृप सोचैं—सब बोज भूमि निज उदर छिपाये ।
ताहीतैं बिनु अन्न प्रजाजन अति घबराये ॥
भूख प्यास पीड़ित प्रजा, पृथु लखि चोट हिये लगी ।
तानि धनुष मारन चले, धेनु रूप धरि भू भगी ॥

धरैं धनुषपै बान लखे पृथु भागी घरनी ।
ज्यौं कर लीये पाश व्याध लखि भागे हरिनी ॥
त्रिपुर बिनाशन हेतु मनहुँ सर शंभु सजायौ ।
घरमधेनु बधहेतु मनहुँ पंचानन धायौ ॥
मुरि मुरि निरखति भय सहित, जावै बसुधा जहाँ जहैं ।
संधानें सर करें पृथु, पीछो ताको तहाँ तहैं ॥

बोली बसुधा—विभो ! व्यर्थ ज्यौं मोकुँ मारौ ।
अबला सदा अबध्य ताहि फिरि ज्यौं संहारो ॥
बिना बात ज्यौं बान चलाओ बात बताओ ।
निरपराधिनी मोइ मारिकें का तुम पाओ ॥

पृथु बोले—दुष्टे धरनि ! तोपै बान चलाउँगो ।
सबकुँ सुखी बनाउँगो, यमपुर तोहि पठाउँगो ॥

धरनों धरिकें धीर वीरतें बोली बानी ।
मोइ न मारें नाथ ! आपु ज्ञानी बिज्ञानी ॥
गऊ तिहारी बनी सन्नितें दूध दुहाओ ।
दुहनी दोग्धा लाइ वीरवर बत्स बनाओ ॥
युक्ति सहित यदि दुहेंगे, तो इच्छित फल देउँगी ।
प्रकट सबहि औषधि करूँ, दुहिता बनि यश लेउँगी ॥

सुनि बसुधाके बैन बेन-सुत दुहिबे लागे ।
मनुकुँ कीयो बत्स पात्र कर कीयो आगे ॥
सुर-गुरु दोही इन्द्र बत्स करि कनक पात्रमहँ ।
अमृत रूप जो दुग्ध, ओज बल वीर्य पात्रमहँ ॥
असुर दैत्य प्रह्लादकुँ, बछरा गौके करि लये ।
लोह पात्रमहँ सुरा अरु, आसव दुहिकें भगि गये ॥

विश्वात्रसु करि बत्स दुह्यो संगीत अप्सरनि ।
कपिल बत्स नभ पात्र सिद्धि लीन्हों दुहि सिद्धनि ॥
करे रुद्रवर बत्स भूत प्रेतादिक गणने ।
लै कपालई पात्र दुह्यो रुधिरासव सबने ॥
पात्र बत्सके मेदतें, दुग्ध सन्ननि अभिमत लयो ।
तब पृथुने पुत्री करी, पृथ्वी नाम तबहिं भयो ॥

ऊबड़ खाबड़ भूमि परी कहुँ पर्वत भारी ।
ऊँची नीची कहुँ कहुँ जंगल कहुँ भारी ॥
लैकें पृथुने धनुष करी चौरस सब वसुधा ।
गिरि उत्तर दिशि चुने करी खेतीकी सुबिधा ॥

भूमि समान करी नृपति, घर, पुर पत्तन रचे तब ।
पहिले हते न नगर पुर, इत उत तरु तर बसें सब ॥

रचे नगर अरु ग्राम भवन, गृह अटा अटारी ।
बापी कूप तड़ाग राजपथ अति सुखकारी ॥
नगरनि सीमा बनी पृथक सब प्रान्त बनाये ।
मंडलीक भूपाल सबनिके दुर्ग सुहाये ॥
करी व्यवस्था सबहिं विधि, दुःख सबनिके मिटि गये ।
राज्य नियामक नृपति, पृथु, आदि राज भूके भये ॥

सुखी भये नर नारि बने घर सुखद सुहाये ।
मिटे दम्भ पाखंड धरम प्रिय अति हरषाये ॥
वेद पढ़ें द्विज करें प्रजा पालन भूपति गन ।
कृषि गोपालन बनिज वैश्य करि जोरें सब धन ॥
करें शूद्र सेवा सतत, बरन व्यवस्था पुनि भयी ।
पृथुल कीर्ति पृथुकी विदित, वसुधा वेटी बनि गयी ॥

इति श्रीभागवत चरितके द्वितीयाहमें पृथुराज्याभिषेक नामक
चौदहवाँ अध्याय समाप्त ।



अथ पञ्चदशोऽध्यायः

[१५]

वर्णाश्रमकी मिटी व्यवस्था थापित कीन्हीं ।
 ये सब करिकें काज यज्ञ शत दीक्षा लीन्हीं ॥
 बहे सरस्वति जहाँ पुण्यप्रद भूमि सुहावन ।
 गंगा यमुना मध्य ब्रह्मऋषि सेवित पावन ॥
 मलपूजा त्रेता कही, अश्वमेध तातें करहिँ ।
 कालक्षेप करि देहिँ सिख, करहिँ अनुकरन भव तरहिँ ॥

होहिँ यज्ञ अति विषद करें सुरगन सब सेवा ।
 देहिँ वृक्ष बहु मूल, फूल, फल, मधुमय मेवा ॥
 दूध, दही, घृत, तक्र, खीरि सरिता सब लावें ।
 रुचि प्रिय परम पदार्थ प्रेमतें पंडित पावें ॥
 हलुआ पूरी जलेबी, माखन भिसिरी जो चहो ।
 खाओ पीओ पेट भरि, तानि दुपट्टा सो रहो ॥

यों नौ नब्बे यज्ञ भये अन्तिम जब आयौ ।
 इन्द्रासन मम लेहिँ अमरपति पेट गिरायौ ॥
 वेष बदलिकें भिन्न करन मल अश्व चुरायौ ।
 चोरी करिकें चलयो अत्रि मुनि तुरत लखायौ ॥
 करनी सुरपतिकी लखौ, विषय भोग दुख मूल हैं ।
 जे विषयनि अनुकूल ते, मोक्ष मार्ग प्रतिकूल हैं ॥

चोर इन्द्रकुँ अत्रि दिखायौ पृथु कुमारकुँ ।
 बत्स ! वेगि जा पकरि पुरंदर चोर जारकुँ ॥
 सुनत राजसुत शीघ्र शक्रकी ओर सिधार्यो ।
 साधु समुझिकें सहृद कुमर फिरि नहिं सर मार्यो ॥
 अश्व विजय करि इन्द्रतें, लायौ सुख सबकुँ भयो ।
 ऋषि मुनि मिलि विजिताश्व बर, नाम कुँवरकुँ तब दयो ॥

इन्द्र हृदयमहँ मची कुलबुली बिगरे मख कस ।
 अत्रकें चुपके जाइ अश्व लाजँ सोच्यो अस ॥
 अंधकार करि पकरि अश्वकुँ सुरपति भाग्यो ।
 अत्रि कीन्ह संकेत कुमर फिरि पीछे लाग्यो ॥
 साधुवेष लखि फिर कुमर, हिचक्यो मुनि मारो कह्यो ।
 छोड़्यो शर विजिताश्व तब, अन्तरहित शतक्रतु भयो ॥

मख बिध्वंसन हेतु इन्द्र जो वेष बनाये ।
 ते पाखंडिनि चिन्ह ऊपरी परम सुहाये ॥
 जटाजूट बनि नग्न लाल अरु श्वेत पहिन पट ।
 यही मोक्षको मार्ग अज्ञ नित करहिँ सतत हट ॥
 तम प्रधान विद्यारहित, मानें धर्म अधर्मकुँ ।
 लिङ्ग धर्म कारन नहीं, समुझें नहि जा मर्मकुँ ॥

समुझी शक्र कुचाल क्रोध नृप पृथुकुँ आयो ।
 इन्द्र मारिबे हेतु धनुष अरु बान उठायो ॥
 ऋत्विज बोले—विभो ! बिहित बध अब नहिं तुमकुँ ।
 हम सब कछु करि सकें देहिँ आयसु यदि हमकुँ ॥
 मंत्र शक्तितें शक्रकुँ, अबई यहाँ बुलाईंगे ।
 स्वाहा करिकें अग्निमें, यमपुर ताहि पठाईंगे ॥

क्रोधित है पृथु कहैं,—अवशि देवेन्द्र जराओ ।
 पढ़े विप्रवर मंत्र, अमरपति आओ आओ ॥
 गिरे स्वर्गतें इन्द्र कलामुंडी-सी खावत ।
 देखे सबने शक्र खिंचे पशु सम मख आवत ॥
 दौरे आये पितामह, अरे, अरे, का करत हो ।
 यज्ञ रूप इन इन्द्रके, व्यर्थ प्रान च्यों हरत हो ॥

भैर्या श्रद्धा सहित जिन्हें मखमोंहि बुलाओ ।
 काहे तिनकुँ विप्र ! अग्निमहँ आजु जराओ ॥
 राजन् ! छोड़ो बैर व्यर्थ मति बात बढ़ाओ ।
 अब हठ करि पाखंड जगतमहँ मति फैलाओ ॥
 सौ मख करि का करोगे, मोक्ष मार्गके पथिक तुम ।
 बच्छा राखो इन्द्रकी, सबके हितकी कहहिं हम ॥

विधि आज्ञा सिर धारि यज्ञ पृथु बन्द करायौ ।
 गुरु गौरवकुँ मानि बात आगे न बढ़ायौ ॥
 जो जो मखमहँ देव विप्र ऋषि मुनिवर आये ।
 सबको करि सत्कार त्रिविध विधि दान दिवाये ॥
 पाइ दान सम्मान बहु, विप्र तुष्ट अतिशय भये ।
 दै आशिष अति मुदित है, अपने अपने घर गये ॥

पृथु यज्ञनितें तुष्ट भये श्रीमधुसूदन अति ।
 भये यज्ञमहँ प्रकट शक्र लै संग यज्ञपति ॥
 पृथुतें पूजित भये फेरि बोले मृदु बानी ।
 राजन् ! सबहिं कुचाल शतकतुकी हम जानी ॥
 हौं प्रसन्न तुमपै भयो, सिद्ध होहिं तव काज सब ।
 अति लज्जित यह इन्द्र है, जाहि क्षमा करि देहु अब ॥

राजन् ! यह तनु नाशवान छिन मंगुर गुनमये ।
 आत्मा निरगुण शुद्ध सर्वगत साक्षी आश्रय ॥
 करहिं दान तप धर्म विविध विधि यज्ञ रचावें ।
 करिकें अरपें मोहिं परमपद ते नर पावें ॥
 पृथु ! पृथिवी पालन करो, मेरी सेवा जानिकें ।
 करहु प्रेम सब जननितें, सबमहँ मोकूँ मानिकें ॥

हरि आयसु सिर धारि चरनमहँ शीश नवायौ ।
 पर्यो पैरपै शक्र उठायो हिये लगायौ ॥
 पुनि विधिवत अति प्रेम सहित प्रभु पूजा कीन्हौ ।
 अति प्रसन्न हरि भये प्रेमकी आशिष दीन्हौ ॥
 हरि दरशन नहिं करि सकें, प्रेम अश्रु नयननि भरे ।
 कंठ रुद्ध निश्शब्द हरि-हियतें आलिंगन करे ॥

पृथु पकरे प्रभु पाद पदुम पावन अति मनहर ।
 स्रवे सदा मधु मत्त होहिं पी भक्त भ्रमर वर ॥
 पलकनि पौछि पराग नयन पयतें पुनि बोये ।
 नखद्युति के आलोक माँहि प्रिय पुनि पुनि जोये ॥
 प्रभु प्रभुपनकूँ भूलिकें, पग पृथिवी परसत भये ।
 भक्त और भगवान ऊ, दोऊ बेसुबि बनि गये ॥

भक्तबल्लभ भगवान् कहैं—नृपवर वर मागौ ।
 मोइ कृतारथ करौ निसपृहा ऐसी त्यागौ ॥
 अश्रु पौछि पृथु कहैं—प्रभो ! अब यह वर दीजे ॥
 होहिं सहस्रदश कान, प्रतिज्ञा पूरी कीजे ॥
 घर बैठें सब ठौरतें, सुयस तुम्हार सुन्यो करूँ ।
 सुनत श्रवन गुन थकित नहिं, होहि हिये तब छबि धरूँ ॥

सुयश सुधा मकरंद चरन कमलनितें निसृत ।
 साधु संग करि पान होहिं सबरो जग बिसमृत ॥
 कमला जाके पान हेतु पगली-सी डोलें ।
 सज्जन पीवहिं सतत दूसरी बात न बोलें ॥
 साश्रु नयन गद्गद गिरा, कहें परस्पर संतजन ।
 इहि बिधि हरि गुन श्रवन करि, अनत जाहि नहिं मोर मन ॥
 पद्मा प्रभुके पाद पदुम प्रति पहर पलोटे ।
 संत पुरुष ऊ सदा धूरि पगकीमहैं लोटे ॥
 इच्छा मेरी जिही पलोटे तनि पाइनिकूँ ।
 करुनासागर कृष्ण ! कृतारथ करूँ करनिकूँ ॥
 लक्ष्मी मोतें लडिझी, प्रभु तिनकूँ समुझाइलें ।
 जगमाताकूँ घुड़किकें, सुतकूँ हिये लगाइलें ॥
 जिन विषयनिकूँ छोड़ि भूमिपति वनकूँ भागें ।
 तिनकूँ तुमरे दास भला क्यों तुमतें भागें ॥
 जगदीश्वर तुम जनक तनय हम नाथ तिहारे ।
 तो फिरि जगके भोग आपु ई भये हमारे ॥
 हौं बर माँगू जिही प्रभु ! तव पद पदुमनि प्रीति अति ।
 सत्संगति हरि कथा रुचि, जग भोगनितें भीति अति ॥
 पृथुकूँ सब बर दये भये अन्तरहित श्रीपति ।
 करि सबको सम्मान चले पुरकूँ पृथिवीपति ॥
 सुनत आगमन प्रजा गई लैवेकूँ आगे ।
 बीणा, बेनु, मृदंग बाद्य सब बाजन लागे ॥
 ध्वजा पताकातें सजे, नगरमाँहिं आये नृपति ।
 निजपति लखि चिरकालमहैं, भये मुदित नर नारि अति ॥
 इति श्रीभागवत चरितके द्वितीयाहमें पृथुयज्ञ नामक
 पन्द्रहवाँ अध्याय समाप्त ।

अथ षोडशोऽध्यायः

[१६]

प्रविसे पुर पृथु करें, प्रजा सबको यो पालन ।
ज्यों माता पितु करें, नेहते सुतको लालन ॥
महासत्र इक रच्यो धर्मकी वृद्धि करनकुँ ।
फैले नास्तिकभाव धराते तिन्हें हरनकुँ ॥
देश देशते सभ्यगन, आये जुर्ग्यो समाज बर ।
तिनके सगमुख कहन कछु, उठे भूप ज्यों दिवाकर ॥

अति सुन्दर अति मधुर भ्रान्तिते रहित बचन बर ।
बोले सबहि सुनाय धर्म सगमत अति हितकर ॥
सुनो शास्त्रको सार संत-मुख सुनी सुनाऊँ ।
सेवा सौपी सबनि पुरुष करतब्य बताऊँ ॥
वेद बिहित सब यज्ञ तप, दान धर्म मिलि करहु अब ।
पितर, अतिथि, गुरु, देव, द्विज, पूजा सबको करहु सब ॥

धन्य प्रजाके पुरुष करहि जे पूजा प्रभुकी ।
ते अति आदरणीय करहि जे अर्चा बिभुकी ॥
धरम मूल हैं धेनु यज्ञ हित घृत जे देवें ।
दूसर भूसुर कहे वेद जे बिधिवत सेवें ॥
विप्र कमलपदगणकुँ, नित सिरते धारन करहु ।
कृष्णार्पण करि करहु सब, करम व्यथा सबकी हरहु ॥

१६१

११ फा०

सुने वेन-सुत बैन नैन सबके भरि आये ।
 सुनि अभिभाषन साधु साधु सबई चिल्लाये ॥
 उठे वृद्धसे पुरुष एक प्रतिनिधि परजाके ।
 धन्यवादा बहु दये मंचके दिँगमहँ जाके ॥
 पिता पुत्र द्वारा परम, प्राप्त पुण्य लोकनि करहि ।
 भई सत्य वेदोक्ति जिह, पृथु पितुके पापनि हरहि ॥

भये कृतारथ आजु हमनि अच्युत पति पाये ।
 प्रभो-! धन्य सुनि भये अबहिं जो हरिगुन गाये ॥
 जुग जुग जीवै नाथ सदा अस सीख सिखावै ।
 सुनि श्रीमुख हरि सुयश हृदय हमरे हुलसावै ॥
 मति मलीन अति दीन हम, नहीं भेंट सम्मान है ।
 केवल श्रद्धा सहित प्रभु ! पद पदुमनि परनाम है ॥

सभामाहिँ सनकादि तत्रहिं नभ मारग आये ।
 प्रजा सहित पृथु उठे सबनि चरननि सिरनाये ॥
 सिंहासन बैठाय विविध विधि पूजा कीन्हों ।
 रोज, कोष, सम्पत्ति, देह अरपन करि दीन्हों ॥
 हाथ जोरि गद्गद गिरा, कहत बचन विह्वल भये ।
 करे कृतारथ कृपानिधि ! सुर दुरलभ दरसन दये ॥

अब हे दीनदयाल ! मोक्षको मार्ग बताओ ।
 कस होवै कल्याण सरलतातें समुझाओ ॥
 भटके भव मगमाँहि प्रभो ! अवलम्बन देवें ।
 भवजल डूबत नाव आपु नाविक बनि खेवें ॥
 तीनिहु तापनितें तपित, कबतें जगमहँ भ्रमि रहे ।
 दुखित देखि दरशन दये, भई शांति तब पद गहे ॥

बोले सनत्कुमार प्रश्न पृथुको मुनि करिकें ।
 करहु होहि निस्संग काज सब हरि हिय धरिकें ॥
 शास्त्र बचन गुरु दया भक्ति भगवत भक्तनिकी ।
 योग, ज्ञान, हरिकथा, टेव नित हरिकीर्तनको ॥
 ऐसे और अनेक हू, हैं उपाय. उत्तम अनघ ।
 करहिं तिनहिं जे प्रेमते, होहि शुद्ध मन कटहिं अघ ॥

बासुदेव भगवान् भक्ति.तें होवें बश जस ।
 योग याग विज्ञान आदितें बश न होहि तस ॥
 तातें तबि सब अन्य एक श्रीहरि आराधें ।
 छाँड़ि क्लेशकर काज सुगम सो साधन साधें ॥
 शेष न साधन तुमहिं कछु, सब तुम परहित करत हो ।
 हास धरमको होहि जब, तब तब तुम तनु धरत हो ॥

नृप पृथु सनत्कुमार मुखामृत पान कर्यो जब ।
 सब तनु पुलकित भयो कहें हैकें प्रसन्न तब ॥
 प्रभो ! सुधारस प्याइ कर्यो कृतकृत्य कृपानिधि ।
 पूजा प्रत्युपकार करहुँ हे मुनिवर किहि विधि ॥
 तन मन धन सब आपुको, का तुमकुँ अरपन करूँ ।
 तातें श्रद्धा सहित तब, चरन कमलमहँ सिर धरूँ ॥

विदुर ! विष्णु नट कुशल विविध विधि बेष बनार्वें ।
 बनि ठनि जगमहँ स्वयं नचें अरु सबनि नचावें ॥
 बस जस बाने धरें आइ तस भाव दिखावें ।
 मुर, नर, मुनि, गन्धर्व खेलको पार न पावें ॥
 रङ्गमंच यह दृश्य जग, नाटक जगके काज हैं ।
 यह माया ठगिनी नटी, निरविकार नटराज हैं ॥

भूमि विषम सम करी नगर पुर ग्राम बसाये ।
 जरा जानि जनराज तपोवन सब तजि धाये ॥
 पृथिवी पुत्री विरह व्यथामहँ अश्रु भिमोचति ।
 तजी प्रजा सब दुखी विरहमहँ बिलखति रोवति ॥
 सबतैं मुखकूँ मोरिकैं, निरमोही भूपति भये ।
 पत्नी लीन्हैं संगमहँ, बानप्रस्थ बनि बन गये ॥
 बसिकैं बनमहँ भूप अखिलपतिकूँ आराधैं ।
 योग ध्यानमहँ निरत नियम व्रत मुनिके साधैं ॥
 अति सुकुमारी अर्चि करें सेवा सब तजि सुख ।
 पाणिपरस पति पाइ भुलावैं बनके सब दुख ॥
 कछु दिन खाये भूप फल, कछु दिन पय पत्ता परे ।
 वायु खाय कछु दिन रहे, यों इन्द्रियगण बश करे ॥
 बेन-तनय तप करें, संग पतिप्राणा लैकैं ।
 भगवत चिन्तन करत प्रेम प्लावित हिय हैकैं ॥
 कर्यो वासना रूप बन्ध मन शुद्ध भयो जब ।
 अन्त काल ढिँग जानि ब्रह्ममय भये भूप तब ॥
 त्याग ग्यान बैराग्यतैं, हृदय भक्ति भावित भयो ।
 तब अहि कैंचुल जीर्ण पट, सम भूपति तनु तजि दयो ॥
 अर्चि गई पति निकट देह निष्प्राण निहारी ।
 बिलखी पतिशव निरखि दुखारी भई विचारी ॥
 ईवन चुनि चुनि चिता सतीने स्वयम् बनाई ।
 विधिवत कीन्हें कृत्य देह पति सँग जराई ॥
 पृथु पत्नी सँग परम पद, विष्णु भक्ति ई तैं लख्यो ।
 यों समासतैं पृथु चरित, विदुर ! यथामति हौं कह्यो ॥
 इति श्रीभागवत चरितके द्वितीयाहमें पृथुवैकुण्ठगमन नामक
 सोलहवाँ अध्याय समाप्त ।

(मासिक पारायण—अष्टमदिवस विश्राम)

अथ सप्तदशोऽध्यायः

[१७]

बोले सुनि मैत्रेय—प्रचेता जनमे जस दश ।
 कहूँ सुनो, पृथु तनय भये विजिताश्व पुण्य यश ॥
 हविर्घान सुत भये वर्हिषद् तिनके आत्मज ।
 शतद्रुति सँग करि व्याह, धरी आशा सिर पद्मज ॥
 शील, रूप, गुण, बय, विनय, एक सरिस सबके भये ।
 तातें सबई प्रचेता, एक नामके है गये ॥

सब सुन्दर सब सुघर सरिस सद्गुनहिं सबनिके ।
 भये प्रचेता नाम एकसे सबके तिनिके ॥
 पिता कहें तब एक संग सबई मिलि आवैं ।
 जाओ जावैं संग संग सबई मिलि खावैं ॥
 एक प्राण दश देहमें, संचारन सँग सँग करत ।
 मानों मन दश रूप धरि, करत काज जगमहँ फिरत ॥

पिता कह्यो—हे पुत्र ! तपस्या हित सब जाओ ।
 तप करि संचय शक्ति करो फिरि प्रजा बढाओ ॥
 आयसु पितु सिर धारि चले सब मिलि जुलि भाई ।
 मारगमहँ मनहरन पर्यो संगीत सुनाई ॥
 सुनि विस्मित सबई भये, इत उत सब निरखन लगे ।
 शिव सम्मुख गण सहित लखि, त्रिविधि सबनिके भय भगे ॥

देखे सम्मुख शम्भु दौरि पकरे सब हर पग ।
 अति आनंदित भये लख्यो निष्कण्टक निजमग ॥
 बिनय सहित सब कहैं—कृतारथ भये दरस करि ।
 दुष्कृत सबरे नसे नाथ निरखे नयननि भरि ॥
 नीलकंठ शंकर कहैं, तुम सब सुकृत स्वरूप हो ।
 राजकुमार ऋषिरूप हो, भक्ति भवनके भूप हो ॥

रुद्रगीत हों कहूँ जपो निश्चल है ताकूँ ।
 होहि सिद्धि अति शीघ्र, जपोगे जो तुम जाकूँ ॥
 प्रजापतिनिहूँ पूर्वकालमहूँ जिह विधि दीन्हों ।
 पाइ तिननि अति हरषि सृजन परजाको कीन्हों ॥
 यों कहि योगाधीश हर, रुद्रगीत सबकूँ दयो ।
 पाइ शम्भु उपदेश अति, मन प्रसन्न सबको भयो ॥

मुनिमें बोले विदुर—तनिक गुरुवर ! मुनि लीजे ।
 रुद्रगीत है कौन मोहि प्रभु शिखा दीजे ॥
 बोले मुनि मैत्रेय—प्रचेता दशहू मिलि जव ।
 करि शिव दर्शन धन्य भये पग पकरि कहैं सब ॥
 सरवेश्वर दर्शन भयो, भगवन् ! अब भवभय भगे ।
 देहि मंत्र मुनि सतीपति, रुद्रगीत कहिवे लगे ॥

रुद्र गीत

आपुही सर्वरूप घनश्याम ।
 करें पुनि पुनि प्रभुपाद प्रनाम ॥

तुम्हारी जय होवै भगवान्, करैं हम सबको प्रभु कल्याण ।
 कियो जग व्याप्त तेजके सहित, आपु हैं क्षय वृद्धीतैं रहित ॥
 नाम है वासुदेव अभिराम, प्रनतपालक प्रभुपाद प्रनाम ॥१॥

भूत, चित, इन्द्रियगणके ईश, शान्त कूटस्थ स्वयं जगदीश ।
लेत अवतार प्रेमके हेतु, नाम तव भवसागरके सेतु ॥
पितामहके पितु शोभाधाम, जगत्पति तत्र पदपदुम प्रनाम ॥२॥

सूक्ष्म इस्थूल अनंत महान, आपुही संकरसन भगवान ।
आपु प्रद्युम्न और अनिरुद्ध, सच्चिदानंद शुद्ध अरु बुद्ध ॥
तुम्हारी तेजरूप है नाम, करें पदपदुमनि माँहिँ प्रनाम ॥३॥

आपुही स्वरग मोक्षके द्वार आपु भवउदधि तरनि पतवार ।
आपु रवि अनिल अनल शशिरूप, आपुही जल जगविषयनि भूप ॥
आपु अद्वैत जगत विश्राम, करें पुनि पुनि पद पदुम प्रनाम ॥४॥

कृपा करिबेकी तुमरी टेव, देहिँ दरशन देवनिके देव ।
चतुरभुज सुन्दर सुघर सरूप, चरन, कर, नयन, कपोल अनूप ॥
रूप लखि लाजै कोटिनि काम, अरुनपद पदुमनि माँहिँ प्रनाम ॥५॥

कान्तमुख मंद मंद मुसकान, कनक कुंडलधुत सुन्दर कान ।
भ्रमर अग्ली सम कुंचितकेश, पीतगट पहिरे प्रियवर वेश ॥
दिखावैं सुखकर रूप लल्लाम, देव पद पदुमनि माँहिँ प्रनाम ॥६॥

करैं जे नित प्रति तुमरो ध्यान, न तिनकुँ रहै तनिक अभिमान ।
प्रेम पीयूष करैं नित पान, सुनहिँ यश करहिँ गुननिको गान ॥
भक्त जो हैं अनन्य निष्काम, करें ते नित पदपदुम प्रनाम ॥७॥

दयासागर निरमल अग्रहीन, शुद्ध शुचि सरल सहज अतिदीन ।
हृदय जिनि जल पावन जिमि गंग, होहि नित तिनि भक्तनिको संग ॥
लेहिँ तिनिसँगभित्ति तुमरे नाम, करें सब मिलि पदपदुम प्रनाम ॥८॥

करैं साधक तव चरननि मनन, न तिनि मन करहि विषय बनभ्रमन ।
रहैं नहिँ तिनिके अग्र दुख ताप, जगतमहँ दीखैं आपुहि आप ॥
रमि रहे जो जगमाहीं राम, गंगकारन पदपदुम प्रनाम ॥९॥

सकल जग ही तुमरी काया, सृष्टिके पूर्व सुप्त माया ।
 रचै जग ज्यों जालो मकरो, प्रकृतितें विकृति होहिँ सबरो ॥
 रूप तुमरे सब तुमरे नाम, अंश अंशीकुँ करै प्रनाम ॥१०॥

बनाओ अज है जगको जाल, करो संहार फेरि बनि काल ।
 भीत हम मरनशील प्राणी, अभय करि देहिँ देव दानी ॥
 प्रनतपालक प्रभु पालक श्याम, करें पुनिपुनि पदपदुम प्रनाम ॥११॥

दिखावैं देव दौरि दाया, प्रबल प्रभु तुमरी यह माया ।
 शंभु हरि हर तुम ही स्वामी, अखिलपति अज अन्तरयामी ॥
 तुम्हारे हैं हरि अगनित नाम, परावर ! तव पदपदुम प्रनाम ॥१२॥

दोहा—रुद्रगीत जो जन जपैं, होवैं तिनि अधनाश ।
 दरशन दैकें दयानिधि, करें सतत हियवास ॥

छुप्य—करिकें हर उपदेश भये अन्तरहित तवई ।
 इत उत विस्मित लखैं जगे सपने से सबई ॥
 सबने शिवकुँ करी दंडवत मनई मनमहँ ।
 रुद्रगीतकुँ जपत चले आगे सब बनमहँ ॥
 करत सहसदश वरष जप, जलमहँ सब ठाढ़े रहे ।
 जप तप रूपी अनलमहँ, कल्मष सबके सब दहे ॥

इति श्रीभागवतचरितके द्वितीयाहमें प्रचेता चरित नामक
 सत्रहवाँ अध्याय समाप्त ।

अथ अष्टादशोऽध्यायः

[१८]

दोहा—गये प्रचेता तप करन, इत नारद मुनिराज ।
सोचें इनके पितु तरें, तजि सकाम सब काज ॥

छप्पय—विदुर ! निरखि प्राचीनबहिक्कूँ पैस्यो करममहँ ।
करन ज्ञान उपदेश गये नारद भूपति जहँ ॥
बोले—राजन् ! काम्य कर्म करि कहा विचार्यो ।
ज्यों न ज्ञान बैराग्य खड्गतें मोह विदार्यो ॥
नृप बोले—मुनि ! मूढ़हौं, मुक्ति मार्ग जानूँ न कछु ।
यज्ञ, याग, बलिदान पशु, स्वर्ग छाँड़ि मानूँ न कछु ॥

मुनि बोले—‘सुनु भूप ! पुरज्जन नृप इक भारी ।
पाऊँ पावन पुरी चल्यो मनमौहिं विचारी ॥
चौरासी लख पुरी लखीं मन एक न आई ।
हिमगिरि दच्छिन ओर लखी शुभ पुरी सुहाई ॥
सजी-बजी नवबधू सम, उपवन सर सौन्दर्ययुत ।
निरखि नयन विकसित भये, भयो दरस करि चपलचित ॥

तामें निरखी एक नयन अभिरामा नारी ।
नूतन वययुत परम सुन्दरी अति सुकुमारी ॥
सरसिज सम बर नयन बदन सुन्दर मधुमय अति ।
अलकावलि अति कुटिल राजहंसिनि सम शुभगति ॥
नयन, नासिका, दन्त, मुख, भ्रुकुटि एकतैं एक बर ।
हिय श्रोणी उभरे पृथुल, कटि मीनी चितवन सुवर ॥

प्रणयकटाक्ष सुवाण भ्रुकुटि कोदंड चदायौ ।
 मारि किरातिनि सरिस पुरंजन पट्ट गिरायौ ॥
 लङ्खड़ात धवरात विनययुत बोल्यो बानी ।
 को तुम का की लली बनी कस पुरकी रानी ॥
 सकुच त्यागि मुखकमलकूँ, मेरी ओर घुमाइकें ।
 अपनाओ अब तुरत तुम, सेवक मोहि बनाइकें ॥

कहे पुरंजनि—प्रभो ! नाम अरु गोत्र न जानूँ ।
 किन्तु तुम्हैं हृदयेश प्रानधन सरबसु मानूँ ॥
 आओ हिलिमिलि रहैं नयो एक जगत बनावैं ।
 आपसमें ही लखैं और सब जगत भुलावैं ॥
 तन-तनमें मन-मन मिलहिं, प्रान प्रानतें एककरि ।
 हृदय सौंपि तब अंकमहँ, सोऊँ सुखतें शीशधरि ॥

को अबला अस पाहि तुमहिं नहिं धीर गँमावै ।
 को तब हियलगि नहीं मनोबांछित फल पावै ॥
 मधुर मंद मुसकानमयी चितवन हिय लागै ।
 भिटै त्रिविधि संताप प्रबल रतिपति भय भागै ॥
 आओ, अब सब दुख दुरित, दोउनिकेई मिटि गये ।
 फँसे प्रेमके फन्द यों, पति-पत्नी दोऊ भये ॥

फँस्यो प्रेमके फन्द अन्ध सम भयो पुरञ्जन ।
 निरखि नारि सब करै भुलाये भवभयभंजन ॥
 पीवे वह तो पान करै खावे तो खावै ।
 रोवे वह तो रुदन करै गावे तो गावै ॥
 नारी धनकी, धर्मकी, बनी स्वामिनी गोहकी ।
 करे कितव अनुकरण यों, जैसे छाया देहकी ॥

तनकी कोमल दिखे भीलिनी भोरी मारी ।
 किन्तु चित्तकी कुटिल बनी ज्यों लट धुंधरारी ॥
 रूप पाश लै हाथ पशुनिकुँ तुरत फँसावै ।
 निज बस करिकें विविध भाँतिके खेल खिलावै ॥
 पूँछ हिलावत फिरत ज्यों, स्वान स्वामिके संगमें ।
 त्यों मदमातो फिरै नर, फँस्यो नारिके अंगमें ॥
 सोरठा—फँसे प्रेमके जाल, दोऊ प्यासे-से रहैं ।
 जात न दीखत काल, उभय अघायँ न मुख निरखि ॥

छप्पय—यद्यपि जाया सग त्यागिबो अति दुखकारी ।
 तोऊ रथ चढ़ि चल्यो पुरंजन बन धनुधारी ॥
 मृगयालोभी भयो गयो बर बहु मृग मारे ।
 सूकर, स्याहो, सिंह, शशक, शावक संहारे ॥
 मनमाने मारे मृगा, मृगया मतवारो भयो ।
 भूख प्यासतैं थकित है, लौटि नगर निज नृप गयो ॥
 न्हाय खाय विश्राम कर्यो दारा सुधि आई ।
 काम बानतैं व्यथित चल्यो नहिँ दर्ई दिखाई ॥
 अन्तःपुरकी नारि निरखि पूछै पछितावै ।
 स्वामिान तुम्हरी कहाँ महलमें नाहिँ दिखावै ॥
 रमनी बोलैं—भूपवर ! आजु स्वामिनो रिस भरौ ।
 असन बसन भूषन तजे, खटपाटी लैकें परी ॥
 सुनत बिकल अति भयो गयो महिषी जहँ सोवै ।
 अस्त व्यस्त-सी परी पुरंजन पग परि रोवै ॥
 अपराधी हौं सदा उचित शिच्चा अब दीजे ।
 देहु दासकुँ दंड क्षमा स्वामिनि अब कीजे ॥
 तिलकहीन अति म्लान मुख, मुरझायो अरविन्द सम ।
 राग रहित सुन्दर अधर, फटत हृदय लखि दशा मम ॥

अब हौं समुझ्यो प्रिये ! पंचशर अवसर पायो ।
 जानि अकेली दुम्हें दुष्टने अधिक सतायो ॥
 पति अनुनय अस सुनत मानिनी मृदु मुसकाई ।
 प्रनय कोप ततकाल प्रियाको गयो बिलाई ॥
 पति पत्नीके प्रेमकुँ, प्रनय कोप उज्ज्वल करत ।
 वह मुँह फेरे तुनुककें, यह पुनि पुनि पगमहँ परत ॥

दृढ़ आलिगन करत पुरंजन अति हरषावत ।
 तजि निज परको ग्यान राति दिन व्यर्थ गमावत ॥
 बाहु पाशमहँ कस्यो अज्ञ-सो भयो बिचारो ।
 सूझत नहिँ कब दिवस भयो कब भयो अँध्यारो ॥
 फँस्यो पुरंजन मोहमहँ, सरबसु समुझी कामिनी ।
 गई युवा लौटी न वय, जैसे बीती यामिनी ॥

ग्यारह सौ सुत भये शूरता बलमहँ भारी ।
 दश ऊपर सौ भई सुता अति हो सुकुमारो ॥
 पुत्रनिकेहू पुत्र भये चित चहुँ दिशि भटक्यो ।
 पुत्र, पौत्र, गृह, कोश, दास, दासिनिमहँ अटक्यो ॥
 ममतामहँ मदमत्त है, अंध कूपमहँ धँसि गयो ।
 विषय भोग जग जालके, पंदामहँ खल फँसि गयो ॥

जग परिवर्तनशाल एक-सो रहे न कोई ।
 जनम मृत्यु सुख दुःख धूप छाया नित होई ॥
 आवै उन्नति संग संग अवनतिकुँ लैकें ।
 यौवनकुँ लै जाय जग भाँसौ सो दैकें ॥
 चण्डबेग गन्धर्वपति, पुरी पुरस्जनकी चढ्यो ।
 वीर तीन सौ साठ सँग, विजय करन आगे बढ्यो ॥

गंधर्वी सँग साठ तीनसौ कारी गोरी ।
 करी चढ़ाई चण्डवेग सँग सेना थोरी ॥
 पाँच फननिको स्थाँपु सबनितें लड़िवे लाग्यो ।
 किन्तु कहाँ तक लड़ै बली सब साहस त्यागो ॥
 बबरायो अति पुरंजन, बशीभूत नारी भयो ।
 लूटी नगरी सबनि मिलि, अति उदास नृप है गयो ॥

भय भाई प्रज्वार काल कन्या सँग आयौ ।
 लखी पुरी अति छीन आइ अधिकार जमायौ ॥
 भूपति पूछे—प्रभो ! कालकन्या को नारी ।
 बोले नारद—नृपति, कुरूपा फिरे कुमारी ॥
 पति चाहै जगमहँ फिरै, कौन कुरूपाकूँ बरै ।
 निरखि मोइ संकेत कछु, भौं चलाइ सैननि करै ॥

व्याह करन संकेत समुक्ति बोल्यो मुनि चंडो ।
 व्याह न हौं अब करुं भागि ह्यौतें मुस्टंडी ॥
 भई कुपति अति शाप दयो थिर रहौ न तुम मुनि ।
 हौं बोल्यो—भय बरो गई ताको वैभव मुनि ॥
 भय भाई प्रज्वार सँग, फिरै लोकमहँ बहिन बनि ।
 पुरी पुरंजनकी गई, ताकी नृप अब कथा सुनि ॥

इति श्रीभागवत चरितके द्वितीयाहमें पुरंजन पुरंजनी चरित नामक
 अठारहवाँ अध्याय समाप्त ।

(पाक्षिक पारायण—चतुर्थ विश्राम)

अथ एकोनविंशतितमोऽध्यायः

[१६]

संग लियौ प्रज्वार पुरंजन पुरमें आई ।
भोगे पुरके भोग अराजकता फैलाई ॥
भयो पुञ्जन कृपन नहीं मारग शुभ सूझै ।
पाँच फननिको स्याँपु कहाँ तक इकलो जूझै ॥
प्रबल वीर प्रज्वार ने, अगि लगाई जर्यो पुर ।
तोरि फेरि विध्वंस करि, कर्यो नाश नृपका नगर ॥

यवनराज भय आई पुञ्जन बाँध्यो तबई ।
पकरि चले लै भृत्य भये सँग परवश सबई ॥
जात पुञ्जन लखयो सर करि स्याँपु सिधारयो ।
सब सैनिक उहँड ॥ पुञ्जन पुगूँ जार्यो ॥
यह वियोग दुस्सह प्रिये, नहीं जात मोपै सह्यो ।
नारीकी चिन्ता करत, अन्त नारि भूपति भयो ॥

नारीमहँ चितु फँस्यो भयो नृप नरतें नारी ।
नृप विदर्भके महल, भई कन्या सुकुमारी ॥
भई सयानी पिता स्वयंवर साज सजाये ।
रूप ख्याति सुनि देश-देशके भूपति आये ॥
पाण्ड्य देशके छत्रपति, मलयध्वज कन्या वरी ।
पति पायो प्रमुदित भई, पटरानी नृपने करी ॥

सात पुत्र इक सुता जनीं सत्र भये सयाने ।
 भये सबनिके व्याह भोग भोगे मनमाने ॥
 मलयध्वज दै सुतनि राज गमने बनमाहीं ।
 वैदरभो सँग चली देह सँग ज्यों पगछाहीं ॥
 विषय भोग त्यागी नृपति, तप करि नित तनकूँ कसहिं ।
 कंद, मूल, फल, फूल, तृन, करि अहार बनमहँ बसहिं ॥

पति सेवामहँ निरत रहै नैदरभी नितई ।
 एक दिना निरजीव देह पतिकी उत चितई ॥
 स्वामि शोकमहँ बिलखि काठ चुनि चिता बनाई ।
 मृतक देह धरि सती होनकूँ आशि लगाई ॥
 पुरुष पुरातनको तबहिं, दर्शन रानीकूँ भयो ।
 गोवति निरखी नारि तिन, दिव्य ज्ञान ताकूँ दयो ॥

अरे सखा ! हौं मित्र तिहारो हंस पुरातन ।
 विषय भागमहँ फँस्यो भुलायौ रूप सनातन ॥
 नहीं पुरज्जन मित्र ! न रानी राजा हो तुम ।
 मानसके हैं हंस एक ही दोऊ तुम हम ॥
 पुरवारी जा बुद्धिने, ठग्यो ज्ञान सब नसि गयो ।
 सुनत सखाकी सोख शुभ, आत्मज्ञान ताकूँ भयो ॥

राजा पूछे—प्रभो ! ज्ञान अति गूढ़ सुनायो ।
 कौन पुरज्जन हंस, कौन पुर, समझ न आयो ॥
 मुनि बोले—यह जीव पुरज्जन घो है नारी ।
 सखा कर्ण हैं सबहिं वृत्ति सब सखी बिचारी ॥
 देह पुरी हरि हंस हैं, प्राण पञ्च फन स्याँप है ।
 नौ दरवाजे छिद्र नौ, जीव संग मन जात है ॥

नाक कान अरु आँखि तथा मुख शिश्न गुदा ये ।
 नौ दरवाजे बने, जीव हित पुरुष बनाये ॥
 शब्द, रूप, रस, गंध, परस पाञ्चाल कहावत ।
 भोगे विषयनि जीव नित्य निज रूप भुलावत ॥
 रुदन करै जत्र जीव जिह, हंस रूप हरि आइकें ।
 करुना करि निज ज्ञान दै, करै शुद्ध समुझाइकें ॥

स्वप्न देह रथ बन्धो कही मृगतृष्णा मृगया ।
 काल कछो गन्धर्व जरा है ताकी तनया ॥
 मृत्यु यवनपति सरिस अंतमहँ पुर संहारत ।
 शीतज्वर अरु उष्ण यही प्रज्वार कहावत ॥
 भ्रमत जीव प्रारब्ध बश, करहिँ कृपा गुरु देव जत्र ।
 कृष्ण कथा गुन श्रवनमहँ, बढै चित अनुराग तत्र ॥

साधु संगमहँ बैठि कृष्ण गुन सुनै सुनावैं ।
 सरस बिमल हरि चरित सुनत जे नाहिँ अघावैं ॥
 पान पात्र करि कान निरन्तर भरि भरि पीवैं ।
 श्रीमधुसूदन मधुर सुधारस पीकें जीवैं ॥
 कथाभवनमहँ भक्त मिलि, पीवैं भागवती कथा ।
 शोक मोह भय भूखकी, होहि न तिनि तनिकहु व्यथा ॥

करम परक हैं वेद मलिनमति पुरुष बतावैं ।
 भक्ति ज्ञान कछु नाहिँ व्यर्थ सबकुँ बहकावैं ॥
 राजन् ! जत्र तक भक्ति योगमहँ चित न लगाओ ।
 तत्र तक नहिँ करि कर्म शान्ति सुख कबहूँ पाओ ॥
 सबके आश्रय सर्वगत, जो शोभाके धाम हैं ।
 आत्मरूप सबके सुहृद्, अबिनाशी घनश्याम हैं ॥

राजन् ! इन्द्रियजन्य विषयते चित्त हटाओ ।
 मनकूँ करि एकाग्र कृष्ण चरननिमहँ लाओ ॥
 काल मेंडिया लाय मृत्यु पोछेतें मारै ।
 किंकर्तव्यविमूढ़ बन्यो नर नाहिं बिचारै ॥
 नित चरचा जहँ विषयकी, बसी कामिनी चित्तमहँ ।
 तजि ताकूँ श्रीहरि भजो, मन न रहै गृह चित्तमहँ ॥

मन ही कारन बन्ध मोक्षको समुझो भूपति ।
 असत् वस्तु सत् समुझि फँस्यो करि कर्म जीव अति ॥
 करमनि कूँ करि मुक्ति जगततें नहिं नृप पाओ
 तन मन हरि पद सौँपि, भजनमहँ चित्त लगाओ ॥
 सिरजें पालें जगतकूँ, काल पाइ पुनि लय करहिं ।
 शरणागतवत्सल सकल, भव-भयकूँ ते हरि हरहिं ॥

श्री नारदमुनि कथित ज्ञानकूँ जो नर धारें ।
 ते न जनम पुनि लेहिं जालां जगके कूँ जारें ॥
 कह्यो पुरंजन गृही बुद्धि सँग फँस्यो देहमहँ ।
 मैं मेरी महँ बैँध्यो पुत्र, धन, धाम, गेह महँ ॥
 हरि हियमहँ जे धारिकें, पीवें प्रभुपय प्रेमतें ।
 पावें ते नर परमपद, कहें मुनें जे नेमतें ॥

इति श्रीभागवत चरितके द्वितीयाहमें पुरंजन मोक्ष नामक
 उन्नीसवाँ अध्याय समाप्त ।



अथ विंशतितमोऽध्यायः

(२०)

विदुर कहें—हे गुरो ! पुरञ्जन कथा सुनाई ।
किन्तु प्रचेता बात बीचमहूँ विभो ! सुलाई ॥
रुद्रगीत उपदेश पाइ तिनि का का कीन्हों ।
कैसे तिनि ढिँग आइ जगत्पति दरशन दीन्हों ॥
मुनि बोले—सुनु विदुर अत्र, कहूँ प्रचेतनिकी कथा ।
रुद्रगीत जपि तप कर्‍यो, हरि दरशन पाये यथा ॥

तपतें भये प्रसन्न प्रचेतनि ढिँग हरि आये ।
दुरलभ दरशन दये दये बर चार सुहाये ।
सुमरें तुमकुँ रुद्रगीत जपि मांकुँ ध्यावें ।
भातृ प्रम तिन बड़ै मनोब्राह्मि पल पावें ॥
होहि जगतमहँ कीर्ति अति, पुत्र प्रजापति होहि सम !
बाद्धीकन्या संग सत्र, करो ब्याह मिलि बन्धु तुम ॥

सो०—मुनि पुनि बोले विदुर, को बाद्धी का की सुता ।
कथा एक अतिरुचिर, मुनि मैत्रेय कहें बिहँसि ॥

कण्डू भये इक परम तपस्वी मुनि विज्ञानी ।
तपमहँ नितई निरत योगरत ज्ञानी ध्यानी ॥
घोर तपस्या करत निरखि सुरपति धरायौ ।
प्रम्लोचा सुरबधू मेजि तप विघ्न करायौ ॥
सोलह हू शृंगार करि, सजि बजि मुनि ढिँग आइकें ।
यौवनतें इतराइकें, मुनि मन लियौ चुराइकें ॥

बरस सहस तक रही संग ऋषि समय न जान्यो ।
 चेत भयो तब दिवस एकई मुनिवर मान्यो ॥
 जब जान्यो वृत्तान्त क्रोध करि रौंड़ भगाई ।
 परम सुन्दरी छाँड़ि बालिका स्वरग सिधाई ॥
 वृद्धनि पाली मारिषा, बाढ़ीं ताईतें भई ।
 करो ब्याह मिलि बन्धु सब, अब तो स्यानी है गई ॥

भगवत आज्ञा पाइ चलै सब वृद्ध जराये ।
 वृद्ध जरत लखि तुरत तहाँ चतुरानन आये ॥
 समुझाये बहु भाँति अगे, ज्यों वृद्ध जराओ ।
 लेहु मारिषा बहू ब्याहि अपने घर जाओ ॥
 विधि आज्ञा मानी सबनि, जादौं कन्या ब्याहिकें ।
 गृही धर्ममहँ रत भये, निज पितु पुरमहँ आइकें ॥

बेटा बहू निहारि वृषति नयननि जल छाये ।
 परे पैरपै पुत्र प्रेमतें पकरि उठाये ॥
 हृदय लाइ करि प्यार राज आसन बैठाये ।
 राज काज सब सौंपि तपोवन भूप सिधाये ॥
 करहिं करम प्रभु प्रीति हित, नित चित राखें श्याममहँ ।
 बन्ध बासनातें कही, मोक्ष करम निष्काममहँ ॥

भोगे जगके भोग योग अब सब बिसरायो ।
 इत बाढ़ीं ने परम यशस्वी सुत इक जायो ॥
 शंभु अवज्ञाकरी ब्रह्मसुत तब तनु त्यागौ ।
 भये मारिषा पुत्र शाप नन्दीश्वर लाग्यौ ॥
 चान्नुष मन्वन्तर विषे, सृष्टि बुद्धि कारण कियो ।
 प्रजा सृजनमहँ दक्ष अति, नाम दक्ष तातें भयो ॥

सौं पि पुत्रकूँ राज प्रचेता तप हित बनकूँ ।
 गये सिन्धुके तीर समाहित कीन्हों मनकूँ ॥
 रोकि, प्रान, मन, बचन, दृष्टि थिर करी योगतें ।
 तनु तप करि कृश कर्यो हटायौ चित्त भोगतें ॥
 सतसंगति बांछ्या भई, नारदजी दरशन दियो ।
 गय प्रचेतनिके जगे, मुनि कृतार्थ सबकूँ कियो ॥

सबई पूछें—प्रभो ! सार उपदेश सुनाओ ।
 मनकी काई सीख खटाई लाइ मिटाओ ॥
 नारद बोले—सुनो, सफल वह जन्म करम मन ।
 जातें सुमिरन होहि कृष्णको धन्य वही तन ॥
 वेद पढ़्यो तप करि कहा ? काल बितायो योग करि ।
 प्रेम बिना सब व्यर्थ हैं, जो नहिं कीन्हों भक्ति हरि ॥

है जग हरिको रूप उनहिँतें पैदा होवै ।
 उनमें ई थिर रहै अंतमहँ उनमहँ सोवै ॥
 सबमहँ सत है व्याप्त रूप चैतन्य कहावें ।
 सुख स्वरूप भगवान् जीव आनंद तहँ पावें ॥
 शरणागतबत्सल अमल, स्वतः तृप्त परिपूर्ण प्रभु ।
 भक्तबल्लल अशरनशरन, अज अविनाशी अलख विभु ॥

बिना शरन हरि गये शान्ति सुख जीव न पावै ।
 चौरासीमहँ भ्रमै बिबिध योनिनिमहँ जावै ॥
 तातें सब कछु त्यागि शरन श्रीहरिकी जाओ ।
 करिकें उनको ध्यान परमपद तुम सब पाओ ॥
 बोले मुनि मैत्रेय—मुनि, ज्ञान प्रचेतनिकूँ भयो ।
 विदुर ! सुखद संवाद यह, सारभूत तुमतें कह्यो ॥

शुक मुनि बोले—भूप ! विशद संवाद सुनायौ ।
 सुनि मैत्रेय महान् विदुरजीके प्रति गायौ ॥
 जो नर जाकूँ पढ़हिं प्रेमतेँ सुनहिं सुनावें ।
 ते निश्चय परमेश परम पावन पद पावें ॥
 स्वायम्भुव-सुत ध्रुव पिता, भूप भये उत्तानपद ।
 बरन्यो तिनको वंश अब, सुनो प्रियव्रत को विशद ॥

इति श्रीभागवत चरितके द्वितीयाहमें प्रचेता उपाख्यान नामक
 बीसवाँ अध्याय समाप्त ।

(मासिक पारायण—नवम दिवस विश्राम)



अथ—एकविंशतितमोऽध्यायः

[२१]

दो०—शुक बोले—मनु प्रथम सुत, प्रियव्रत जिनको नाम ।
परमभक्त ज्ञानी महा, गृही बने निष्काम ॥

छुप्पय—कहें परित्तित—प्रभो ! परमज्ञानी नृप प्रियव्रत ।
करमबन्ध कस फँसे गृही बनि परम भागवत ॥
चरन शरन हरि लई जिननि ते फँसे मोह कस ।
घरमहैं भक्ति न होहि, भई शंका मो मन अस ॥
हँसि बोले शुक—भूपवर ! सत्य बात तुमने कही ।
कहूँ कथा सुनु कृष्णकी, जस नृप हरिपद रति लंही ॥

परमभागवत भये प्रियव्रत ज्ञानी ध्यानी ।
गुरु नारदकी सीख प्रेमतेँ तिनने मानी ॥
लखि विरक्त सुत पिता राजको काज बतायौ ।
किन्तु कुमरके नहीं गृहस्थाश्रम मन भायौ ॥
इत मनु चिन्तामहँ परे, उत चतुरानन चित चढ़ी ।
यदि विरक्त प्रियव्रत बनै, तो होवै गड़बड़ बड़ी ॥

चढ़े हंसपै संग मरोचादिक मुनि षाये ।
सत्य लोकतैं उतरि तपादिक लोकनि आये ॥
बिधिहुँ लखि सब अमर सुमन तिनपै बरसावैं ।
स्वागतके हित सिद्ध, साध्य, ऋषि, मुनि मिलिआवैं ॥
गावत गुन गन्धर्बगन, सुयश संग ऋषि मुनि सुनत ।
लखि बिधि नारद कुमर मनु, उठे सबहिँ सभ्रम सहित ॥

स्वागत श्रद्धा सहित सबनि करि पद सिरनाये ।
 विधिवत पूजा करी दिव्य आसन बैठाये ॥
 प्रेम सहित मुसकाय कहैं ब्रह्मा—सुनु प्रियव्रत ।
 देहुँ सार उपदेश होहि जातैं जगको हित ॥
 जीव बँधे गुण कर्मतैं, करें कर्म ह्वैके अवश ।
 जनम मरन भय शोक दुख, सुख पावैं प्रारब्ध बश ॥

विषय भोग कछु नाहिं बन्धको कारन मन है ।
 इन्द्रिय मन आधीन यन्त्रके सम यह तन है ॥
 जाको मन आधीन ताहि बन काज कहा है ।
 इन्द्रिय बश जे भये तिनहिं बन हानि महा है ॥
 प्रभुपद पंकज कर्णिका, किलौ ताहि दृढ़मानिकैं ।
 भोगो सुख अरि काम हनि, प्रभु प्रसाद जिय जानिकैं ॥

आयसु त्रिविकी मानि प्रियव्रत सिरतैं घारी ।
 सोचैं मनु अब सहज कामना पुरी हमारी ॥
 यों सबविधि समुझाई ब्रह्म निज लोक सिधारे ।
 इत प्रियव्रतने राज काज सब आइ सम्हारे ॥
 ब्याह कर्यो रानी मिली, पतिप्राणा अर्हिष्मती ।
 परम सुशीला सुन्दरी, विनयवती अति गुणवती ॥

भये पुत्र दस विश्वविदित धार्मिक ज्ञानी अति ।
 तिनमें त्यागी तीनि सात द्वीपनिके भूपति ॥
 उत्तम तामस पुत्र दूसरी रानी जाये ।
 तीसर रैवत भये सबनि पुनि मनुपद पाये ॥
 तनया इक ऊर्जस्वती, शुक्र संग ब्याही गई ।
 तासु गर्भतैं गर्बिनी, सुता देवयानी भई ॥

नृप सोचें—शुचि सूर्य प्रदक्षिण मेरु करे नित ।
 होवै उतकूँ निशा दिवस होवै तबई इत ॥
 करूँ दिवसकूँ राति न होवै तम जग माहीं ।
 ज्योतिर्मय रथ चढ़े सूर्यके पाछे जाहीं ॥
 सात प्रदक्षिणतें भये, सात द्वीप अरु उदधि सब ।
 समुभाये बिधि आई जत्र, छोड़यो नृप संकल्प तत्र ॥

कौन करि सके करम प्रियव्रत सम नृप जगमहँ ।
 कीन्हें सात समुद्र चलत रथ नभके मगमहँ ॥
 सौंपि सुतनिक्कूँ राज मोह ममता सब त्यागी ।
 समुझे विष सम विषय बने नृपतें बैरागी ॥
 सप्त द्वीपकी वसुमती, तृन सम त्यागी पलकमहँ ।
 को तिनके सम है सके, तजि ईश्वर या जगतमहँ ॥

इति श्रीभागवत चरितके द्वितीयाहमें प्रियव्रत चरितनामक
 इक्कीसवौं अध्याय समाप्त ।

अथ द्वाविंशतितमोऽध्यायः

[२२]

राजपाटकुँ त्यागि चले राजा बनमाहीं ।
 रानी वर्हिभमती चली छायाकी नाई ॥
 सुत आमीअ महान् भये भूपति जम्बूपति ।
 पालें पुत्र समान प्रजाकुँ नित प्रति नरपति ॥
 सुत हित सुर-सुन्दरि सदन, मन्दर गिरिकी गुहामहैं ।
 तप करि पूजें प्रजापति, राज त्याग नृप रहहिं तहैं ॥

विधि नृप मनकी बात जानि बर बधू पठाई ।
 पूर्वचित्ति आदेश पाइ भूपति ढिँग आई ॥
 ब्रोड़ा क्रोड़ा सहित मधुर चितवन सुसकावत ।
 यौवनके मद भरी रूप रस—सो बरसावत ॥
 भूप निहारी अपसरा, खोयो मन मोहित भये ।
 रूपासवको पान करि, मदमाते-से है गये ॥

राजा बोले—सखे ! परसपर महैं अपनावें ।
 दोऊ हियको भार हार पहिनें पहिनावें ॥
 मिलि जुलि खेलें खेल प्राणको दाव लगावें ।
 द्वै मन एक मिलाय अंगतें अंग सटावें ॥
 अब अपनाओ अधमकुँ, अनुचर अनो मानिकें ।
 प्रेम सुधारस प्यायकें, ज्याओ जड़मति जानिकें ॥

कहि कहि मीठे बैन बढ़ाई प्रेम सगाई ।
 विधिकी भेजी बधू भूप विधिवत अपनाई ॥
 नृपति भामिनी संग विषय सुख भोगें निशि-दिन
 रहि न सकें पल एक अपसरा पूर्बचित्ति विन ॥
 भये यशस्वी पुत्र नौ, भूप परम प्रमुदित भये ।
 तां प्रमदाके संगमहैं, सहस बरस दिन सम गये ॥

नाभि और किंपुरुष, इलावृत, रम्यक, कुरु सुत ।
 केतुमाल, भद्राश्व, हिरण्यमय, भये धर्मयुत ॥
 वर्षाधिप हरिवर्ष भये नौ परम यशस्वी ।
 नौ खंडनिके भूप मनस्वी अति तेजस्वी ॥
 पूर्बचित्ति तत्र छांड़ि सुत, तुरत गई निज लोकमहैं ।
 राजा अति न्याकुल, भये, ग्वा प्रमदाके शोकमहैं ॥

काम्य कर्म करि नृपति पुण्य परलोक पधारे ।
 नौऊ वर्षाधीश भये अति प्रजहिं पियारे ॥
 मेरु-सुता नौ हतीं बिबाहीं तिनके संगमहैं ।
 मेरुदेवि पति नाभि पाइ प्रमुदित अति मनमहैं ॥
 पुत्र हेतु मल नाभिने, रच्यो विष्णु दरशन दये ।
 सहसा प्रभु प्रकटित भये, सब सम्भ्रममहैं परि गये ॥

त्रिनती करिकें विप्र यज्ञ उद्देश बतायो ।
 प्रभु समान सुत होय भूपको भाव जतायो ॥
 हरि हैंसि बोले—अरे विप्र, च्यों जाल फँसाओ ।
 स्वामी सेवक करो पिताकुँ पुत्र बनाओ ॥
 अच्छा, हौं सुत बनूँजो, निज सम कहैं खोजत फिरूँ ।
 मोकुँ बाँधें भक्त ये, मुक्त सबनिकुँ हौं करूँ ॥

अन्तरहित हरि भये राजरानी हुलसानी ।
 गर्भवती पुनि भई मेरुदेवी पटरानी ॥
 भये अवतरित ऋषभ त्यांगको मग दरसावन ।
 संन्यासी मुनि विमल दिगम्बर अतिशय पावन ॥
 नाभि निरखि नय विनय युत, सुत जगपति जानत भये ।
 प्रजा सचिव सम्मति समुक्ति, राजतिलक दै बन गये ॥

करिकें गुरुकुलवास राजको काज सम्हार्यो ।
 लई जयन्ती ब्याहि समुरको मद संहार्यो ॥
 भये पुत्र सौ भरत ज्येष्ठ तिनमें नौ ज्ञानी ।
 भूप भये नौ रचीं जाइ निज निज रजधानी ॥
 इक्यासी हिंसा रहित, विप्र वृत्तिमहैं रत रहैं ।
 जप, तप, पूजा, पाठ, मख, करि समत्व सुख-दुख सहैं ॥

करें ऋषभ शुभ करम हरषि लौकिक वैदिक सब ।
 पुत्र भये जत्र युक्क दई सत शिक्षा नृप तब ॥
 इक दिन घूमत फिरत तृतीय सुत पुरमहैं आये ।
 ब्रह्मावर्त निहारि पितहिं सब बन्धु बुलाये ॥
 सम्बोधन करि सबनिकूँ, प्रेम सहित सबतें कहहिं ।
 सुख हरि सुमिरनमें सतत, विषय भोगि नर दुख सहहिं ॥

विषय भोगिकें कबहुँ कोउ नर सुख नहिं पावै ।
 च्यौं नर जीवन रत्न काँच दै व्यर्थ गमावै ॥
 सुख स्वरूप सरवेश सतत हिय माहिँ बिराजै ।
 कस्तूरीमृग यथा विषय वन खोजै भाजै ॥
 विषयी नर हैं विषसरिस, मोक्ष मूल हैं संत जन ।
 चढ़े रंग जस होहि सँग, स्वेत बसन सम कछो मन ।

ऋषभ चरित अति गूढ़ मूढ़ नर मरम न जानें ।
 निरखि नग्न उन्मत्त सिड़ी पागल सब मानें ॥
 प्रकट्यो पारमहंस धर्म करि शिद्धा दीन्हें ।
 कर्यो दिगम्बर वेष वेद विधि पूरी कीन्हें ॥
 बालक सम भोरे बने, पृथिवीपै विचरत फिरहिँ ।
 मारें पीटें दुष्ट जन, सुखदुखमहँ इक सम रहहिँ ॥

कोई फेंकें टेल सेलतें कोई मारें ।
 त्यागि देहिँ मलमूत्र धूरि खल कोई डारें ॥
 कोई गारी देहिँ दुष्ट ढोंगी जिह आयो ।
 ठग विद्याके हेतु धूर्तने वेष बनायो ॥
 स्वार्थहित पागल बन्यो, सब समुझे स्यानो खरो ।
 सब मिलि जा अवधूतकी, लाठीतें पूजा करो ॥

मारें पीटें मूर्ख होहि क्षत बिक्षत तनु सब ।
 तातें त्याग्यो गमन रहैं अजगर सम नृप अब ॥
 पानी पशुसम पियें लेटिकें भिक्षा पावें ।
 त्यागि देहिँ मलमूत्र अंग बिष्टा लिपटावें ॥
 करें घृणित व्यापार जत्र, फटकैं नहिँ खल पास तब ।
 जनम कृतारथ करनकुँ, आईं तिनि दिँग सिद्धि सब ॥

खल जन निन्दे चाहिँ करें पंडित बहु बन्दन ।
 मलतें लिथिग्यो अंग चढ़ावें चाहें चन्दन ॥
 शानो माला सरप एकसम करिकें जानें ।
 होवें जड़ चैतन्य नारि नर भेद न मानें ॥
 जो जग देखें ब्रह्ममय, उनको शानो नाम है ।
 तिनके पावन चरनमहँ, श्रद्धा सहित प्रनाम है ॥

आईं सबईं सिद्धि सिद्धने सब ठुकराईं ।
 करी विनय बहुमौंति नैकहू नहिँ अपनाईं ॥
 मन अति दानव दुष्ट करै विश्वास न कबहूँ ।
 इन्द्रियजित है जाय बचै विषयनिर्ते तबहूँ ॥
 ब्रह्मा, विश्वामित्र, शिव, घोखो सबकुँ मन दयो ।
 कबहूँ न माने भूलमहँ, मेरो मन वशमें भयो ॥

मन मतंग उहंड दुष्टता करै सदाहीं ।
 संयम अंकुश सदा रखे अपने कर माहीं ॥
 हरे हरे प्रिय धान ऊख मीठी लखि लखिकें ।
 दौरावे निज सँड होहि प्रसुदित अति मखिकें ॥
 गज आरोही युक्तितैं, पेनों अंकुश धारिकें ।
 प्रबल प्रलोभनतैं बिरत, करै चित्त गज मारिकें ।

मलिन बसनके सरिस लखैं शानी जा तनकुँ ।
 सुख-दुखमहँ सम रहैं रखहिँ संयत निज मनकुँ ॥
 ऋषभ त्यागि अभिमान लिङ्ग अरु थूल देहको ।
 त्याग्यो निजपन सबहिँ पुत्र धन धाम गोहको ॥
 योग बासनातैं बची, तनिक अहं आभास मति ।
 ताहोतैं घूमत फिरत, चलत स्वास प्रस्वास गति ॥

कोङ्क बेङ्क अरु कुटक फिरत कर्नाटक शानी ।
 कुटकाचलके निकट गये मुनिवर निर्मानो ॥
 पवन वेणुसंघर्ष लगी दावानल बनमहँ ।
 बैठे है निश्चिन्त नहीं शंका कछु मनमहँ ॥
 तनु अनित्यता प्रकटहित, उपलखंड मुखमहँ धर्यो ।
 भये लीन निजरूपमहँ, दावानलमहँ तनु जर्यो ॥

प्रियव्रत नृपको विमल वंश अति ही मन भावन ।
 जामें प्रकटित भये ऋषभ हरि अग जग पावन ॥
 कीयो पारमहंस्य धरम प्रचलित जगमाहीं ।
 जाकूँ योगी सिद्ध विचारत मनतें नाहीं ॥
 लोक, वेद, सुर, धेनु, द्विज, के स्वामी श्रीऋषभ हैं ।
 करहिँ आचरन घृणित अति, किन्तु मुनिनिमहँ वृषभ हैं ॥

ऋषभ पवित्र चरित्र कह्यो मंगलमय सुखमय ।
 सुनत होत प्रभुचरन प्रेम छुटि जावै भव-भय ॥
 अवतारनकी कथा गंगसम शीतल करनी ।
 पाप, ताप, संताप, क्लेश, दुख, चिन्ता हरनी ॥
 जिनि करुनामय ऋषभने, धरम करे निषकाम हैं ।
 तिनिके पद पायाजमहँ, पुनि पुनि पुन्य प्रनाम हैं ॥

इति श्रीभागवतचरितके द्वितीयाहमें ऋषभ चरित नामक
 बाईसवों अध्याय समाप्त ।

इति द्वितीयाह



अथ तृतीयाह

अथ—प्रथमोऽध्यायः

[१]

दोहा—हे जगपालक ! जगतपति, जगरक्षक ! जगदीश ।
जगहित नित नव तनु धरत, नाऊँ तव पद शीश ॥

छप्पय—द्वितीय दिवसमहँ कही कपिलकी कलित कहानी ।
सती चरित ध्रुव चरित नृपति पृथु कथा बखानी ॥
पुनि प्रियव्रत शुभ चरित ऋषभ अवतार मनोहर ।
पुत्रनिर्कूँ उपदेश कही अवधूत वृत्तिवर ॥

मुनहु भरत शुभ चरित अत्र, सुनत मिटत भवकी ब्यथा ।
प्रभु पद पदुमनि नाइ सिर, कहूँ तृतीय दिनकी कथा ।

ऋषभ—तनय अति श्रेष्ठ ज्येष्ठ सबई पुत्रनिमहँ ।
भरत नाम विख्यात भये तीनिहु भुवननिमहँ ॥
न्याय धरमतेँ करें सदा पृथिवीको पालन ।
औरस सुत सम समुक्ति करें सबईको लालन ॥

विश्वरूप तनया सुधर, पञ्चजनो सँग ब्याह करि ।
यज्ञ याग शुभ करमतेँ, आराधेँ नृप सदा हरि ॥

अग्निहोत्र नित करें दर्श अरु पूर्णमास मख
 चातुर्मास्य अनेक करे सम समुक्ति दुःख—सुख ॥
 सोमयज्ञ पशुयज्ञ प्रकृति अरु विकृति भेदतें
 करें क्रियाके सहित भाव अरु बिधी वेदतें ॥
 सब अमरनिकूँ अंश लखि, अंशी हरिकूँ जानिकें
 देहिं यज्ञको भाग नृप, प्रभु स्वरूप सब मानिकें ॥

भरत भूमिपति दुरित दूरि सब करें यज्ञ करि ।
 भोगनितें करि पुण्यनाश आराधें श्रीहरि ॥
 राजभोगको अन्त निरखि नृप बनहिँ सिधाये ।
 पावन हरिहरक्षेत्र पुलह आश्रममहँ आये ॥
 मिले गंडकी गंगजहँ, तहँ आराधें ईशकूँ ।
 तुलसीदल, जल, फूल, फल, तें पूजें जगदीशकूँ ॥

पूजातें अनुराग हृदयमहँ बढ़यो प्रबल अति ।
 प्रियतमके पदपदुममाँहिँ उरभी उनकी मति ॥
 पूर्यो पय आनन्द हृदय सर बुद्धि डुबाई ।
 भये प्रेममहँ मगन बाह्य पूजा बिसराई ॥
 कुटिल अलक लट बनि गये, जटा जूटको मुकुट सिर ।
 भक्तराज बनि आजहीं, कियो कृष्णमहँ चित्त थिर ॥

ऐसैं पूजा करत बिताये नृप बहु बत्सर ।
 करें नियम व्रत नित्य रहैं पूजामहँ तत्पर ॥
 इक दिन मज्जन हेतु भरत सरितातट आये ।
 पढ़े वेदके मंत्र गंडकी जलमहँ न्हाये ॥
 सन्ध्याकरि नृप जप करहिँ, कूल छटा मनभावनी ।
 सुनी सिंह ध्वनि मृगी इक, पार निहारी गरभिनी ॥

सुनि दहाड़ हरि मृगी भई भयतैं अति चिन्तित ।
 मारी एक छलौंग नदीकूँ पार होन हित ॥
 मरे पेट भ्रम भयो नदीमहँ गरभ गिरायौ ।
 पार जाइ गिरि मरी भरत मृगशिशु अयनायौ ॥
 करुनावश सँग लै गये, सुतसमान पालन कर्यो ।
 मोहमौहिं तन्मय भये, हाथ हवन करतहिं जर्यो ॥

हरिमहँ जो मन लग्यो हरिनमहँ फैस्यो भाग्यवश ।
 करै हरिन जस काज करें भूपतिहू तसतस ॥
 चाटें चूमैं प्यार करें तनकूँ खुजिलावैं ।
 पुचकारैं तून लाइ स्वयं निज करनि खवावैं ॥
 चलत फिरत सोवत उठत, छाया सम राखैं निकट ।
 तजि सरबसु मृगमोहमहँ, फँसे मोह महिमा विकट ॥

औरस आत्मज तनुब धारमिक त्यागे निजसुत ।
 जो सबही सुकुमार सुघर सुन्दर सुशीलयुत ॥
 तून सम त्याग्यो राब सुन्दरी महिषी त्यागीं ।
 रूखती गुणवती मृतकसम ते सब लागीं ॥
 ठगे भाग्यने भरतजी, चढ़ि ऊँचे नीचे गिरे ।
 मूर्तिमान दुर्भाग्य मृग, के चक्करमहँ नृप परे ॥

मृगशावक इकदिवस दूरि चरिवेकूँ धायौ ।
 सब दिन वीत्यो नहीं लौटि आभ्रममहँ आयौ ॥
 विकल भये अति भरत रुदनकरि इतउत धावैं ।
 लै लै बाको नाम करन स्वर ताहि बुलावैं ॥
 हाय ! भ्रमागो हौं लुट्यो, आजु कहाँ मम सुत गयो ।
 को करि क्रीड़ा देहि सुख, जग बा बिनु सूनो भयो ॥
 १३ फ०

कैसे तनिकें गयो कर्यो काहूने टौना ।
 अतिसूखो अतिसरल सुघर वो मेरो छौना ॥
 करिकें क्रीड़ा मधुर मोइ मृगबाल रिभावत ।
 चकित चित्तें आइ अंग मेरे लिपटावत ॥
 हाय ! कबहुँ पुनि आइकें, दूब यहाँ वो चरेगो ।
 का फिरि इत उत बालवत, मम सुत क्रीड़ा करेगो ॥


इहि बिधि व्याकुल भरत फिरें बन मारे मारे ।
 मिल्यो न मृग बहु खोजि विचारे भये दुखारे ॥
 इतने में ही अन्तकाल नृपको नियरायौ ।
 भूप मृत्यु के समय हरिन फिरि आश्रम आयौ ॥
 दशा देखि नृप सहमिकें, सुत समान रोवत सतत ।
 मृग पटकै सिर दुखित चित, भरत ध्यान वाको करत ॥

दुस्सह काल कराल प्रबल बलशाली आयौ ।
 देह त्यागिकें भरत फेरि पशुको तनु पायौ ॥
 जाको चिन्तन करत जीव त्यागे या तनकूँ ।
 अरर जनममहँ योनि मिलै सोई जीवनकूँ ॥
 योगभ्रष्ट भूपति भये, मृगासक्त मन है गयो ।
 तातें मृग की योनिमहँ, भरत जनम फिरतें भयो ॥

व्यर्थ भयो नहिं भजन तनिकहू भूले नाही ।
 पूर्वजन्मको वृत्त भरत मृग तनु के माहीं ॥
 यादि कर्यो पाँछुताइ मातु हरिनी हू त्यागी ।
 कालिंजर गिरि त्यागि भये फिरितें बैरागी ॥
 संग करहिं नहिं भूलि अब, नहिं सजीव तनकूँ चरहिं ।
 सूखे पत्ता खाइकें, ऋषि मुनि सम व्रत तप करहिं ॥

यो भोगे प्रारब्ध कर्म मृगदेह पाइके ।
 तज्यो हरिन तनु तीर्थ गंडकी नीर न्हाइके ॥
 नारायण हरि कृष्ण यज्ञपति नाम उचारे ।
 अंत समय लै नाम पाप उपपातक जारे ॥
 पछिताये मृगमोह करि, कबहुँ न फिरि ऐसो कर्यो ।
 यह भवजलनिधि अंतमहै, गोखुर सम मुखतै तर्यो ॥

इति श्रीभागवत चरितके तृतीयाहमें भरतचरित नामक
 प्रथम अध्याय समाप्त ।



अथ द्वितीयोऽध्यायः

[२]

दोहा—नारायणको नाम लै, भरत तजी मृग देह ।
द्विज तनु पायौ अन्तमहँ, तज्यो गेह जगनेह ॥

छप्पय—मृगतैं ब्राह्मण वंशमौहि प्रकटे मुनि शानी ।
चरम देह है जिही भरत निश्चय करि जानी ॥
पिता पढ़ावैं वेद मंत्र देवैं जपिवेकूँ ।
अंट संट कछु बकैं जतावैं जड़ अगने कूँ ॥
हतो जुड़ैली, बहिन इक, दूसरि माँ के नौ तनय ।
कर्मकांडमें फँसे ते, भरत लखैं जग ब्रह्ममय ॥

पिता करें नित सोच भयो मम सुत लघु जड़मति ।
मंत्र होहिं नहिं यादि करूँ भ्रम हौं अति नित प्रति ॥
कस होवे निरवाह कवन करि काज खाइगो ।
को जाके सँग बिप्र सुता अपनी विवाहिगो ॥
करत मनोरथ बिप्र अस, काल पाशमहँ फँसि गये ।
सती पिता सँग माँ भई, नहिं रोये जड़ हँसि गये ॥

भये भरत निश्चिन्त फिरैं मनमाने इत उत ।
विस्मय सोच न करें रहैं नितई प्रसन्न चित ॥
भीतर ज्ञान गँभीर भेद जगकूँ न बतावैं ।
पागल जड़मति बुद्धिहीन सम सबहिं जतावैं ॥
जो लै जावै पकरिकैं, चले जाहिँ सब कछु करहिँ ।
बासो कूसो जो मिलै, उदर ताहि भखिकैं भरहिँ ॥

बोझ हुआवे पकरि ढोइ ताके घर डारें ।
 फरबावे जो काष्ठ ताहि हँसिकें वे फारें ॥
 भाभी जड़मति जानि स्वादयुत अन्न न देवें ।
 जर्यो भुन्यो जो देहिँ ताहि अमृत करि सेवें ॥
 दृष्ट पुष्ट तनु सौँइ सम, धूप शीत सत्र कछु सहहिँ ।
 रहैं सदा निरद्वन्द बनि, संसारी सिरिँ कहहिँ ॥

भाइनि देख्यो कामकाज सत्रई करवावें ।
 तो फिरि हम बैठाइ व्यरथ च्यौ जाहि खवावें ॥
 ऐसौ चाकर कहाँ मिलै जो काम करे नित ।
 किन्तु न माँगे दाम न जावै कबहूँ इत उत ॥
 ऐसौ मनमहँ सोचिकें, दयो फावड़ो हाथमें ।
 क्यारी रचना करनहित, खेत चले लै साथमें ॥

लयो फावड़ो हाथ खेतकुँ लागे खोदन ।
 गड्ढा भारी खन्यो लगे सत्र भाई रोकन ॥
 कहैं परस्पर—बुद्धिहीन क्यारी न बनावै ।
 देहु मंच बैठाइ बैठिकें खेत रखावै ॥
 जैसो भाई कहहिँ वे, तैसोई कारज करत ।
 नये बने अत्र खेत के, रखवारे श्रीजड़भरत ॥

पुत्र हीन नृप-शूद्र मनौती मन में मानी ।
 मानुषकी बलि देहुँ पुत्र यदि देहिँ भवानी ॥
 भयो पुत्र इक पुरुष पकरि बलि हित सब लाये ।
 निशामाँहिँ भगि गयो दास अति ही घबराये ॥
 बलिपशुकुँ खोजत फिरैं, सोचैं मूरख गयो कहँ ।
 आये खोजत खेतपै, बैठे द्विजवर भरत जहँ ॥

तिनि बाँधे अवधूत भरत समदरशी ज्ञानी ।
 भये न विचलित तनिक मृत्यु सम्मुख हू जानी ॥
 न्हाइ पहिनि नव वस्त्र उड़ाई अधिक मिठाई ।
 खाइ भये निश्चिन्त फेरि बलिचारी आई ॥
 दस्यु पुरोहित पूजि असि, द्विजवरके सम्मुख घरी ।
 नहीं सोच विस्मय कछू, ज्ञानी लखि काली डरी ॥

निरखि घोर अन्याय भई देवी बिकराली ।
 मूर्ति फोरि पट प्रकट भई सहसा चट काली ॥
 तड़तड़ाइ करि क्रोध ओठ दाँतनितें काटे ।
 खड्ग लिये कर फिरै दस्यु सिर धड़तें काटे ॥
 उष्ण रक्त मद पान करि, अट्टहासतें नभ भर्यो ।
 कन्दुक सम सिर फेंकिके, जोगिनि सँग कौतुक कर्यो ॥

दुखी होहिं कस सदा रहैं जे हरि पद सेवी ।
 काटि सबनिको शीश भई अन्तरहित देवी ॥
 उदासीन है चले महामुनि अतिशय ज्ञानी ।
 हरष विषाद न हृदय दैवकी इच्छा जानी ॥
 जग में जो जस करेगो, सो तैसोई भरेगो ।
 डूबेगो हरि बिमुख है, प्रभुपदतें भव तरेगो ॥

इक दिन आये भरत फिरत तट इच्छुमतीके ।
 लखे चौधरी तहाँ सिन्धुसौबीरपतीके ॥
 कपिलदेव टिंग जायँ रहूगण भूप बिचारे ।
 शिविका धीवर नहीं खोजि सेवक सब हारे ॥
 मोटे ताजे जड़ भरत, कूँ लखि सब प्रमुदित भये ।
 पकरि पालकीमें दिये, सब कहार सँग लगि गये ॥

पदतल दबै न जीव दौरि इततैं उत आवैं ।
 डगमग शिविका होहि भूप बैठे हिलि जावैं ॥
 व्याप्यो तनमहैं कोप कहैं—मैं मारूँ तोकूँ ।
 मैं हूँ सबको ईश मूर्ख माने नहिं मोकूँ ॥
 स्वामीके अपमानको, तोकूँ मजा चखाउँगो ।
 डंडनितैं पिटवाउँगो, जीवत खाल खिचाउँगो ॥

हंसिकें बोले भरत—कौन मोटो को पतरो ।
 को है स्वामी भूप कौन है सेवक तुम्हरो ॥
 राजा है तू आज काल्हि भिज्जुक बनि जावै ।
 इतनेपै ऊ मोह नृपति उनमत्त बतावै ॥
 इच्छा, भय, तृष्णा, जरा, निद्रा, तन्द्रा जागनो ।
 आत्मरूप मोमें नहीं, पतरो अस मोटोपनो ॥

आत्म-ज्ञानमहैं मग्न मोह नहिं मेद लखावै ।
 तू मोकूँ हे नृपति ! मत्त उनमत्त बतावै ॥
 ज्ञानी सिरीं उभय भाँति तव बश नहिं आऊँ ।
 देह मोह नहिं नेक कर्म प्रारब्ध बिताऊँ ॥
 अस कहि शिविका कन्ध धरि, चले भूप तम भगि गयो ।
 शिविकातैं कूद्यों तुरत, जड़ पैरनिमहैं परि गयो ॥

सोरठा—रह्यो न संशय कोह, पर्यो महीपति महीपै ।
 भग्यो मान, मद, मोह, मनमहैं जिज्ञासा जगी ॥

छप्पय—पूछै है आधीन—कौन तुम रहहु कहाँ प्रभु ।
 कस अस वेष बनाइ गुप्त बन बन बिचरो त्रिभु ॥
 योगेश्वर वा सिद्ध स्वयं नर बनि हरि आये ।
 करि करुना करुनेश, सुधा सम बचन सुनाये ॥
 या असार संसारमें, सार बस्तु जानन निमित्त ।
 कपिलाश्रमकूँ जात हौ, ब्रह्मभूत गुरु मिले इत ॥

करुणासागर कपिल आपु हो मेरे स्वामी ।
 हो अनादि अखिलेश अलख अज अन्तरयामी ॥
 जड़को वेष बनाइ फिरौ सब जग अवलोकत ।
 निज ऐश्वर्य छिपाय अवनियै निरभय विचरत ॥
 आत्माराम सुबोधमय, योगेश्वर निष्काम हो ।
 निरगुन मायातैं परे, षट् संपतिके धाम हो ॥

दोहा—अब मेरी शंका सुनहिँ, कही बात जो नाथ ।
 करो पार भव जलधितैं, गह्यो कृपा करि हाथ ॥

छप्पय—कह्यो 'मोइ श्रम नाहिँ' बात नहिँ बैठी मनमहँ ।
 भार दोइ पथ चलो होहि श्रम सबके तनमहँ ॥
 स्वामी सेवक भाव आपु व्योहार बतावैं ।
 बड़ा मृत्तिका एक होहि पानी कस लावैं ॥
 सुख, दुख, होवे पुरुषकूँ, देइ करन मन बँधेतैं ।
 जल चावल हैं पात्रमहँ, रँधैं अग्निके लगेतैं ॥

दोहा—शंका करि नृप लखहिँ मुनि, जैसे चंद चकोर ।
 भूप वचन सुनि मुनि हँसे, कीन्हीं करुणा कोर ॥

छप्पय—कहैं भरत—सुनु भूप ! भूत निर्मित जग जानो ।
 भेद भाव कछु नाहिँ ज्ञानतैं निश्चय मानो ॥
 शिवका ऊ है काष्ठ काटिकें ताहि बनावैं ।
 रूपान्तर है जाय फेरि नहिँ पेड़ बतावैं ॥
 यह विभिन्नता जगतमहँ, नाम रूपके भेदतैं ।
 नहीं, सत्य तो बात यह, सभी एक हैं तत्त्वतैं ॥

स्वामी सेवक भाव कल्पना जिह सब मनकी ।
 आत्मा तो अद्वैत उपाधी ये हैं तनकी ॥
 राजा होवै रंक रंक राजा बनि जावै ।
 कल शिबिका जो चढ्यो, आज सो ताहि उठावै ॥
 जगको यह व्योहार है, ज्ञानी जन मिथ्या कहैं ।
 मूरख समुझैं सत्य सब, तातें नित नित दुख सहैं ॥

मूरख जड़मति पुरुष देहकुँ आत्मा मानें ।
 लुधा तृषातें दुखित पुरुष होवै जिह जानें ॥
 आत्मा तो निस्संग सर्व व्यापक अज अच्युत ।
 सदा रहै निरलेप ब्रह्म है जाहि ब्रह्मवित ॥
 जब तक गुणमय रहे मन, चौरासी चक्कर भ्रमै ।
 विषयनिर्ते मुख मोरि जब, निरगुन होवै तब थमै ॥

आँख, कान, त्वक, नाक, जीभ ज्ञानेन्द्रिय जानो ।
 हाथ, पैर, गुद्शिश्न वाक कर्मेन्द्रिय मानो ॥
 अहंकारके सहित वृत्ति सब मनकी भाई ।
 पञ्च कर्म तन्मात्र देह आधार कहाई ॥
 अगणित मनकी वृत्ति हैं, तिनतें जग बन्धन बन्यो ।
 मोहनाश जब है गयो, तब सब जग हरि ही बन्यो ॥

यह मन कपटी भूत जीवकुँ नाच नचावै ।
 देवलोक लै जाय कबहुँ पृथिवीपै आवै ॥
 भेद भाव करवाइ बाँधिकें जगमें राखै ।
 जो असत्य है वस्तु ताहि सत कहि नित भाखै ॥
 गुरु हरि पद सेवा खडग, तातें रिपु मनकुँ हनो ।
 तब सब दुखतें छूटिकें, निरवैरी जगमें बनों ॥

तप करि चाहै मोक्ष कालंकूँ वो नर खोवै ।
 केवल करिकैं करम धरम सत् ज्ञान न हांवै ॥
 षट सम्पत्ति त्रिवेक ज्ञान सोपान कहावैं ।
 विषयनिर्ते वैराग्य ज्ञानतें मुक्ति बतावैं ॥
 होहि बसन वा रंगको, रँग्यो होहि जा रंगतें ।
 विषय संगते बन्ध है, मोक्ष होहि सत्संगतें ।

संतनिके ढिँग नित्य कथा होवै भगवतकी ।
 कृष्ण कथातें मिटै मलिनता नित नित चितकी ॥
 परनिन्दा अपवाद साधु जन करहि न कबहूँ ।
 त्रिभुवन पावैं विभव भजन छोड़ैं नहिं तबहूँ ॥
 चाहे भवजलनिधि तरन, गहे संत चरननि शरन ।
 जग बन्धनके हेतु हैं, अघर-मुधा योषित नयन ॥

बनिक रूप यह जीव चल्थो सुखधन अरजन हित ।
 प्रवृत्ति मार्गमहँ फँस्यो लोभ अति बढ़यो तासु चित ॥
 इत उत भटकत फिरै राजपथ कबहुँ न पावै ।
 सिंह व्याघ्रतें डरै गहन बन क्लेश उठावै ॥
 वर्षा खुजली बवंडर, भूख प्यास मच्छर प्रबल ।
 देहिं क्लेश नहिं तहँ मिलै, सुन्दर भोजन मधुर जल ॥

उठ्यो भभूरो तहाँ फँस्यो चक्कर महँ ताके ।
 भरीं धूरितें आँखि नचै संकेतहिं वाके ॥
 करें कर्ण कटु शब्द उलूकहु भींगुर बनमें ।
 यक्षनिर्ते संतप्त डरै बनिया अति मनमें ॥
 छत्ता मधु मक्खीनिके, निरखि शहद भक्षन निमित ।
 कर डारत काटैं सबहिं, पथिक होहि अति ही दुखित ॥

दुरगम पथ यह जगत जीव बनिया मुख धनकूँ ।
 निज परिवार समूह संग लै निकस्यो बनकूँ ॥
 बनीं बवंडर नारि राग-रज नेत्रनि डारें ।
 मृग तृष्णा है विषय भोग दुर्जन अरि मारें ॥
 परनारी हैं शहदकी, मक्खी मन जबई गयो ।
 तबई ताको मुख सुयश, नस्यो मृतक सम नर भयो ॥
 माया मोहित जीव जाहिँ जहँ तहँ दुख पावें ।
 लखि समीप धन धान विविध बिधि ताहि सतावें ॥
 पुत्र, मित्र, परिवार, सगे सम्बन्धी आवें ।
 स्वारथ हित दर्शाय नेह सम्बन्ध लगावें ॥
 जबतक जगमहँ मोह है, तबतक तृष्णा बढ़ैगी ।
 भेड़ जहाँ जहँ जायगी, राजन् ! तहँ तहँ मुड़ैगी ॥
 तजि जग को जञ्जाल जगतपतिमहँ मन लाओ ।
 मैं हूँ सबतें बड़ो नीच जन जाहि मुलाओ ॥
 यह मिथ्या संसार सत्य हैं जाके स्वामी ।
 वे हैं शाश्वत सत्य सर्वगत अन्तरयामी ॥
 मन विषयनितें मोड़िकें, जगतें नातो तोड़िकें ।
 हरि चरननि चित जोड़िकें, राम भजो सब छोड़िकें ॥
 सुन्यो ज्ञान अतिगूढ़ कृतारथ भये रहूगन ।
 मन प्रसन्न हैगयो भयो पुलकित सबरो तन ॥
 विधिवत पूजाकरी अरघ अश्रुनितें दीन्हों ।
 तब स्वेच्छातें गमन भरत मुनिवर ने कीन्हों ॥
 श्रद्धा, संयम सहित जे, भरत-चरितकूँ सुनिज्जे ।
 ते फिरि या भवसिन्धु महँ, भूलि कबहुँ नहिँ परिज्जे ॥
 इति श्रीभागवत चरितके तृतीयाह में जड़भरत चरित नामक

द्वितीय अध्याय समाप्त

(मासिक पारायण, दशम दिवस विश्राम)

अथ तृतीयोऽध्यायः

[३]

भये भरत सुत सुमति देवताजित सुत तिनके ।
 तिनके देवद्युम्न भये परमेष्ठी जिनके ॥
 पुत्र प्रतीह महान भये ज्ञानी तेजस्वी ।
 अष्टम पीढ़ी माँहिँ भूप गय भये यशस्वी ॥
 करमकान्ठमें कुशल अति, सर्वमान्य सब शस्त्रवित ।
 गय समान को होहि नृप, धरम, ज्ञान, नय, विनययुत ॥

स्वयं पधारे इन्द्र यज्ञमहँ देवनि साथ ।
 अवतक जगमहँ विदित राजर्षि गयकी गाथा ॥
 इतनो पीयो सोम भये उन्मत्त देवपति ।
 स्वयं यज्ञपति प्रकट पाई हवि है प्रसन्न अति ॥
 जिन बश कीन्हें विश्वपति, तिनकी समता को करें ।
 निरत रहँ सत्संग महँ, संत चरणरज सिर धरें ॥

रानी गयकी भई गयन्ती पतिकी प्यारी ।
 भये चित्ररथ आदि तीनि सुत आज्ञाकारी ॥
 तिनके सुत सम्राट पुत्र उनके मरीचजित ।
 बिन्दुमान तिन पुत्र मधू मधुके सुबीरव्रत ॥
 अन्तिम भूप भये विरज, परम यशस्वी अति सदय ।
 देववंश में विष्णु जिमि, भये जगतमहँ कीर्तिमय ॥

राजन् ! सात समुद्र सात हैं द्वीप अवनि पै ।
 प्रियव्रत सुत ईं करें राज इन सब द्वीपनि पै ॥
 भौमस्वरग दिविस्वरग स्वरग पाताल कहावैं ।
 तिनिमें करिकें पुण्य धरमप्रेमी जन जावैं ॥
 पुण्यनिको फल स्वरग है, शास्त्र वेद ऋषि मुनि कहैं ।
 पाप करेंतें नरकमें, नर नाना विधि दुख सहैं ॥

इति श्रीभागवत चरितके तृतीयाहमें संचित भूगोल नामक
 तीसरा अध्याय समाप्त ।

(पाश्चिक पारायण—पञ्चमदिवस विश्राम)



अथ चतुर्थोऽध्यायः

[४]

पाप करेंतें हृदयमाहिँ अति तम भरिजावै ।
अन्तःकरन मलीन होहि नर बहु दुख पावै ॥
सूक्ष्म देह जब जाइ यातना देह पाइकैं ।
नरकनिमें फिरि पचै भूमितें जीव जाइकैं ॥
सहै यातना नित नई, किन्तु दुःखमें मरे नहि ।
अनुभव वैसेई करै, जैये नरतनु कष्ट सहि ॥

इन्द्रिय मन आधीन करें जो जिह करवावै ।
मन लैजावै स्वर्ग नरकमें जिहो पठावै ॥
मनतें भोगै भोग जिहो देखे सपनेकूँ ।
मायामोहित जीव कहै करता अपनेकूँ ॥
यह मन चंचल चपलअति, नहिँ काहूको मीत है ।
मनके हारे हार है, मनके जीते जीत है ॥

दोहा—बोले शौनक—सूतजी, सब नरकनिकेनाम ।
कहौ कौनमहँ जाइ को, करिकैं कैसो काम ॥
कहैं सूत सुनि मुनिवचन, करि सबको सम्मान ।
नरकनिको बरनन करूँ, सुनहिँ आपु घरि ध्यान ॥

रौरव, कुम्भीपाक, महारौरव सूकरमुख ।
 कृमिभोजन सन्दंश, शाल्मली, नरक देहिं दुख ॥
 तप्तभूमि, पूयोद, प्रानरोधन, बटरोधन ।
 पर्यावर्तन, शूलप्रोत, वैतरणी, विशसन ॥
 कोई कहें अनेक हैं, अष्टाविंशति कछु कहें ।
 इन नरकनिमहें जाइकें, पापी जन बहु दुख सहें ॥

मारें जीवनि सदा मांसतें तनकूँ पोसैं ।
 क्रोध मोह बश भये रक्त प्राणिनिको सोषैं ॥
 चाहैं जीवो जीव तिनहिं हठ करि जो मारैं ।
 ते पापी तनु त्यागि तुरत ई नरक सिघारैं ॥
 औरनिकी दुरगति करी, कोटि गुनी तिनकी भई ।
 कुटें पिटें भूखनि मरें, सहें यातना नित नई ॥

हिंसा परतिय गमन मांस मदिराको सेवन ।
 महापाप ये कहे पैस्यो इनमें जिनको मन ॥
 ते नर पापी महादुःख जग माँहिं उठावैं ।
 छटपटाइकें मरें फेरि नरकनिमहें जावैं ॥
 नाना दुख सहि अंतमहैं, सूकर कूकर योनि धरि ।
 चौरासीके चक्रमहैं, भ्रमैं विविध विधि करम करि ॥

परधन, परसंतान, परस्त्री जे लै जावैं ।
 ते नर रौरव नरक परें अति दुःख उठावैं ॥
 चोरी जारी करें मूत्र विष्ठा ते खावैं ।
 होहि वेदना अधिक नारकी फिरि पछितावैं ॥
 विविध भाँतिकी यातना, परबश है पापी सहैं ।
 करे पाप न्यौँ दुष्ट अम, पुनि पुनि यमकिंकर कहैं ॥

त्रिप्र हनन, मदपान कनककी चोरी करिबो ।
 कामातुर है पूज्य अंगना शय्या चढ़िबो ॥
 इन पापिनिके रहें संग सोवें अरु खावें ।
 ये पाँचहु ही महापातकी मनुज कहावें ॥
 ये सब मरिकें नरकमहँ, महायन्त्रणा नित सहें ।
 चिल्लावें रोवें गिरें, हा मैया बप्पा कहें ॥

पापिनिको संसर्ग पापमय दुरत बनावै ।
 संतनिको सत्संग कृष्ण चरननि पहुँचावै ॥
 डरें पापतैं सदा प्रेमतैं प्रभु आराधैं ।
 जप, तप, तीरथ, बरत, करें यम नियमनि साधैं ॥
 सदा सत्य बोलैं बचन, ब्रह्मचर्यतैं रहें नित ।
 जाइँ नहीं ते नरक नर, परतियपै न चलाइँ चित ॥

इति श्रीभागवत चरितके तृतीयाहमें नरकवर्णन नामक
 चतुर्थ अध्याय समाप्त ।

(मासिक पारायण—ग्यारहवाँ दिवस विश्राम)



अथ पञ्चमोऽध्यायः

[५]

दोहा—कहें सूत—‘नृप परीक्षित, सुनिकें नरक प्रसङ्ग ।
छुटी कँपकँपी श्वेद तनु, शिथिल भये सब अङ्ग ॥

छप्पय—सुनी नरककी बात कँप्यो हिय दशा भुलानी ।
करै प्रतिक्षण पाप कहें नृप—प्रभु ! जिह प्रानी ॥
ज्ञानी अति ही अलग, अविक अज्ञानी जगमहैं ।
प्रतिपल हिंसा होय, उठत बैठत घर मगमहैं ॥

होयें पाप तो का करें, कैसे पापनितें बचैं ।
जीव भ्रमैं प्रारब्धवश, करम नचावैं त्यों नचैं ॥

दोहा—नृप शंका सुनि शुक कहें, सुनो भूप दै चित्त ।
मिलहिँ पाप फल अवसि यदि, करै न प्रायश्चित्त ॥

छप्पय—जैसे सज्जी आदि बल्लके मलकूँ घोवैं ।
तैसे प्रायश्चित्त सबिधिकृत पापनि खोवैं ॥
स्वच्छ बल्ल फटि जाय तऊ चित्त मोद बढ़ावै ।
मज्जिन बल्ल है जीर्ण मलिनता संग लै जावै ॥

प्रायश्चित्त किये बिना, यमपुर जे नर जायेंगे ।
ते निश्चय ई नरक परि, बिबिध भाँति दुख पायेंगे ॥

तनतें मनतें करे पाप जितने बचननि तें ।
 करिकें प्रायश्चित्त पृथक् होवें नर तिनितें ॥
 श्रद्धा संयम युक्त करैं तप, ब्रह्मचर्य, शम ।
 सत्य, दान, तप, शौच, योग युत करैं नियम यम ॥
 ते निश्चय ही पापतें, छिनमें नर तरि जात हैं ।
 ज्यों दावानलके लगत, वेणु गुल्म जरि जात हैं ॥

निज आहार बिहार रखें शुचि संयम धारें ।
 सदा पश्यतें रहें, बड़े दोषनिक्कूँ जारें ॥
 होन न देवें रोग होहिँ तो औषधि खावें ।
 तिनि पुरुषनि ढिँग रोग भूलि कबहूँ नहिँ आवें ॥
 प्रायश्चित्त यथार्थ जिह, सद्गुरु के ढिँग जायकें ।
 करै नाश अज्ञानकूँ, नारायन गुन गाइकें ॥

पथ परमार्थ महान मार्ग बहुतेरे जावें ।
 भक्तिमार्गकूँ सुगम किन्तु सब संत बतावें ॥
 उभय भक्त जब मिलें मधुर हरिनाम उचारें ।
 नवें परस्पर विनय सहित पदरज सिर धारें ॥
 ऐसे शील स्वभावयुत, संत गहैं जा गैलकूँ ।
 ज्यों न फेरि चलि पथिक सब, धोवें मनके मैलकूँ ॥

भक्ति मार्ग अति सुगम सरल सबके उपयोगी ।
 विप्र होहि वा शूद्र परम ज्ञानी वा भोगी ॥
 है निष्कण्टक मार्ग कष्ट कछु जामें नाहीं ।
 पग पगपै फल फूझ मिलें खल नहिँ मग माहीं ॥
 सबरे साथी सरल सुठि, सरस मिलें जा पथ चलत ।
 प्रेम रुदन कबहूँ करत, हरिगुन सुनि कबहूँ हँसत ॥

भक्ति भेद बहु भनै अघम ऊँचे अरु मध्यम ।
सङ्कीर्तन हरिनाम कछो सबईतें उत्तम ॥
नाम ग्रहणतें भक्ति मुक्ति निश्चय नर पावैं ।
कैसे ऊ हो पाप नामतें तुरत नसावैं ॥

मरन कालमहैं अजामिल, यमदूतनि लखि डरि गयो ।
नारायन सुत हित कछो, नाम लेत भव नसि गयो ॥

दोहा—पूछैं शौनक सूतजी, कौन अजामिल दीन ।
नाम पुत्र मिस न्यौं लयौ, कैसे प्रभु गति दीन ॥
अति पावन मुनि प्रश्न सुनि, कहैं सूत हरषाइ ।
कही कथा गुरुने यथा, कहूँ यथामति ताइ ॥

छप्पय—कान्यकुब्ज शुभ देश अजामिल रहै विप्र इक ।
मितभाषी अनसूय तपस्वी परम धारमिक ॥
पितु आशातें गयौ लैन समिधा इक बनमहैं ।
तहैं लखि वेश्या सुघर काम सर लाग्यो मनमहैं ॥

वा वेश्याको रूप लखि, बिना दाम ई वह बिक्यो ।
रोक्यो चंचल चित्तहुँ, राजन् ! परि खल नहिँ रुक्यो ॥

पत्नी माता पिता तजे वेश्या अपनाई ।
जाति पाँति निज लाज तजी कुल शील बड़ाई ॥
कैसे हूँ घन मिलै घातमहैं घूमे उत इत ।
अपने घरकुँ छाँड़ि रहै वेश्याके घर नित ॥

वेश्या सँग व्यभिचारतें, बहु बालक वाके भये ।
हिन्सा चोरी करत ई, बहुत दिवस छिन सम गये ॥

कहाँ बेदको पाठ कहाँ चोरी नृआ नित ।
 कहाँ धरम अनुराग पापमहँ फैस्यो कहाँ चित ॥
 कहाँ कुलवती सती कहाँ बेश्या पणनारी ।
 किन्तु अजामिल बुद्धि भाग्यनें तुरत बिगारी ॥
 व्रत पालन आचार सद्, बेश्या संगतें नसि गयो ।
 व्याधिनि वेश्या बनि गई, द्विज फंदामहँ फैसि गयो ॥

पूर्वजन्म को पाप शाप मनमहँ रह जावै ।
 अपरजन्ममहँ आइ पाप फल निज दरशावै ॥
 काऊको धन हर्यो सग्यो बनिक्के सो लेगो ।
 ह्वेके परवश पिता बन्धो वाक्कू वो देगो ॥
 बिधवा बनि परपुरुषक्कू, पाप दृष्टितें लखें जे ।
 न्याह होत ही मरे पति, पुनि पुनि बिधवा बनें ते ॥

कोई सब दिन संग रहे परिचय नहिं होवै ।
 निरखि काहुक्कू कोउ तुरत अपनोपन खोवै ॥
 होहिं सहोदर बन्धु परस्पर प्रेम न तिनमें ।
 भिन्न जातिके होहि, होइ मैत्री छिनभरमें ॥
 पूर्वजन्म अपकार करि, इह तन होवै शत्रुता ।
 कस्यो जासु उपकार कछु, तातें होवै मित्रता ॥

पूर्वजन्ममें रखो अजामिल परम तपस्वी ।
 सदाचार सम्पन्न सत्यप्रिय परम यशस्वी ॥
 शिशिरमाँहिँ अति शीत लग्यो मूर्छा-सी आई ।
 तहाँ चैद्यने अपर त्रिप्रक्कू युक्ति बताई ॥
 यौवनकी यदि उष्णता, युवती तनमें तन लगै ।
 जब जावै जिह शीतपन, तुरत तपस्वी तब जगै ॥

सोरठा—तहाँ रहे मुनि एक, निज तनया के संगमें ।
 दशा भयानक देख, तिनि निज कन्यातें कही ॥
 छपय—मुनिततगाकूँ दया तपस्वीपे अति आई ।
 अंगनि लयो लगाय उष्णता तन पहुँचाई ॥
 चेतनता जब भई क्रोध तपसीकूँ आयौ ।
 बनि वेश्या तू नारि, धरमतेँ मोइ डिगायौ ॥
 मुनिकन्या हू ने दयो, शाप अवम तू बनेगौ ।
 धरम करम सब छाँड़िकेँ, मो वेश्या सँग फिरेगौ ॥
 शाप भये सब सत्य अजामिल दुष्ट भयौ अति ।
 निरदय डाकू क्रूर करै पथिकनिकी दुरगति ॥
 भ्रमत भाग्यश संत एकदिन घरपै आये ।
 कीयो अति सत्कार आपने पाप सुनाये ॥
 संत हृदय करना उठी, बोले करियो काम तू ।
 धरियो अवके पुत्रको, नारायण शुभनाम तू ॥
 मनमहँ निश्चय कर्यो अवसि जिह काम करुझो ।
 अवकेँ होवै पुत्र नरायन नाम धरुझो ॥
 कछु दिनमहँ सुत भयो हरष चितमहँ अति छायो ।
 नारायण धरिनाम नेह अति अधिक बढ़ायो ॥
 सबरो प्रेम बटोरिकेँ, नारायणमहँ धरि दयो ।
 भूल्यो सब जाके विषय, सुतमहँ तन्मय है गयो ॥
 लै नारायण नाम प्रेमतेँ मुखकूँ चूमै ।
 गोदीमें बैठाथ नरायन कहि कहि घूमै ॥
 अपनै पीछे खाय नरायन प्रथम खवावै ।
 पीवै ओ कछु पेय नरायन संग पिवावै ॥
 नारायणकूँ संगलै, यों खावत पीवत चलत ।
 नारायण भूलै नहीं, जागत हू सोवत उठत ॥
 इति श्रीभागवत चरितके तृतीयाहमें अजामिलचरित नामक
 पञ्चम अध्याय समाप्त ।

अथ षष्ठोऽध्यायः

[६]

दोहा—बोले शुक—नृप ! चित चपल, काहूमहँ लगिजाय ।
तौ सोवत बैठत उठत, सब थल वही लखाय ॥
चित्त अजामिलको फँस्यो, नारायन सुतमाहिँ ।
नाम नरायन प्रिय लगत, सुनत नयन भरिजाहिँ ॥

छप्पय—नारायनमहँ चित्त फँस्यो नारायण निशिदिन ।
सेवै प्रान समान रहै छिनहू नहिँ वा बिन ॥
बेश्यापति यों फँस्यो मोहमहँ मृत्यु बिसारी ।
गरि निरबार कराल कालकी आई बारी ॥

मृत्यु समय यमकिंकरनि, पकुर्यो पापी अजामिल ।
नारायन मुखतें कह्यो, खेलत सुतकूँ लखि बिकल ॥

सुनि नारायन नाम विष्णु पार्षदतहँ आये ।
यमदूतनिक्कूँ पकरि गदातें मारि गिराये ॥
ढरिक्कें पूछें दूत—कौन तुम हमें भगाओ ।
मोल भाव बिनु किये तड़ातड़ मार लगाओ ॥

धर्मराजके दूत हम, पापीकूँ लौ जात हैं ।
कर्यो न हम अपराध कछु, काहे आप लिख्यात हैं ॥

विष्णु पारषद कहें—धरमको मरम बताओ ।
 दंड जोग जिह नाहि जाइ ज्यों व्यरथ सताओ ॥
 बोले यमके दूत—धरम जो बेद बखान्यो ।
 है अधरम विपरीत बेद हरि रूपहि मान्यो ॥
 हिंसक पापी सुरापी, कूँ यमपुर लै जायेंगे ।
 नरक अगिनिमें डारिकें, जाकूँ बिमल बनायेंगे ॥

हरि पार्षद पुनि कहें—दूत ! तुम कछु नहिँ जानों ।
 व्यरथ बजाओ गाल बिज्ञ अग्नेकूँ मानों ॥
 नारायण यह कह्यो अन्तमहँ सुखतें जानें ।
 तौ हम ताकूँ फेरि परम पावन नर मानें ॥
 चोर, जार, हिंसक, कुटिल, पापी चाहें होय अति ।
 नाम उच्चारनतें तुरत, होइ शुद्ध पावै सुगति ॥

प्रायश्चित मनु आदि पापके विविध बतावें ।
 तिनतें छूटे पाप किन्तु जड़तें नहिँ जावें ॥
 रहै बासना बनी फेरि हू पाप करिझें ।
 पुनि पुनि करिकें पाप नरकमहँ मनुज परिझें ॥
 प्रायश्चित सब पापको, पुरुषोत्तमको नाम है ।
 तुम उच्चारन भर करो, फेरि नामको काम है ॥

लेवें जाको नाम यादि गुन ताके आवें ।
 पुण्य कीर्ति भगवान नाम गुन ज्ञान करावें ॥
 हरि गुन मनमहँ धँसे फेरि ज्यों पाप रहिझें ।
 बहुतक होवें हिरन सिंहकूँ देखि भगिझें ॥
 इत उत भटके जीव ज्यों, करे व्यर्थ के काम तू ।
 सब प्रयत्नकूँ छोड़िके, ज्यों न लेइ हरि नाम तू ॥

कैसे हू हरिनाम लेन, फल निश्चय देवै ।
 चाहें मनतें लेइ भले वेमनके लेवै ॥
 हरिको लैकें नाम मार्गमें आवै जावै ।
 कृष्ण कृष्ण संकेत करे सब वस्तु मँगावै ॥
 मोदक घी बूरो सन्यो, दिन में खाओ रातिमें ।
 सब थल मीठो लगेगौ, घर खाओ या पाँतिमें ॥

भक्त न करें विनोद विषय सम्बन्ध जोरिकें ।
 रहैं उदासी सदा जगत सम्बन्ध तोरिकें ॥
 लै लै हरिके नाम प्रेमतें हँसैं हँसावैं ।
 रामभक्त करि हँसी कृष्णकुँ चोर बतावैं ॥
 कृष्ण भक्त हँसि रामकुँ बानरभालूपति कहत ।
 बनि बैरागी राम तो, बन बनमें रोवत फिरत ॥

राग अलापन हेतु रामको नाम उचारैं ।
 चाहें कहि कहि रामभक्तकुँ ताने मारैं ॥
 राम कहत लड़िजायँ राम कहि प्रेम जतावैं ।
 ते नर कवहूँ भूलि नरककी गैल न जावैं ॥
 विनु इच्छा ऊ रुईपै, चिनगारी पावक परै ।
 जरे रुई तो अत्रसि हो, नाम नाश अत्र त्यों करै ॥

गिरत परत मग चलत रपटि कीचड़महँ जावै ।
 अङ्ग भङ्ग है जायँ जीव हिसकहु सतावै ॥
 काटे कोई आइ देहमहँ पीड़ा होवै ।
 ज्वर को होवै बेग चेतनाकुँ नर खोवै ॥
 कैपेहू नर विवश है, हरि उच्चारन करिजे ।
 नाम प्रतिष्ठाके निमित्त, अत्र तिनके हरि हरिजे ॥

निज शुक्रकूँ करि प्यार नित्य गनिका पुचकारै ।
 मनविनोदके निमित्त रामको नाम उचारै ॥
 स्वयं कहै हरि नाम और खगते कहवावै ।
 शुक्रमुखते अति मधुर नाम सुनि हिय हरषावै ॥
 मगन समय अब सुमिरिक्कें, बेश्या अति व्याकुल भई ।
 संत चितायो अंत हरि, नाम कबो हरिपुर गई ॥

हरिकीर्तन वा श्रवन करें भद्धा बिनु प्रानो ।
 निश्चय ते ऊ तरे, वेद संतनिकी बानी ॥
 राम विमुख लखि संत जीवपै यदि दुरि जावें ।
 बिनु इच्छा ऊ देहि नाम तोऊ तरि जावें ॥
 कृष्ण नाम भव रोग की, है अचूक ओषध सुगम ।
 चाहें ज्यों सेवन करो, निश्चय देगी पद परम ॥

संत अनुग्रह करो विमुखकूँ नाम सुनायौ ।
 मर्यो अधम जब दूत तुरत यमपुर पहुँचायौ ॥
 नाम श्रवनको पुण्य सुन्यो सब सुर धरारये ।
 ब्रह्मजोक शिवलोक फेरि सब हरिपुर आये ॥
 सुनि सब हरिने अंकमहँ, प्रेम सहित वाकूँ लयो ।
 भवबन्धनते मुक्त हूँ, प्रभु पार्षद वह बनि गयो ॥

सुनिक्कें यमके दूत नाममहिमा हुलसाये ।
 पारा मुक्त सो कर्यौ दौरि संयमनी आये ॥
 इत सुनि शुभ संवाद नामकी महिमा जानो ।
 निज पारनिक्कूँ सुमिरि अजामिल मन अति ग्लानी ॥
 करि पारनिक्कूँ यादि जो, पछितावें दुख अति करें ।
 तिनके अब सन्ताप प्रभु, जानि हृदय भल-सब हरे ॥

बारबार चिक्कार अजामिल देवै मनकूँ ।
 हाय ! पापमहँ फैस्यो भुलायो निज द्विजपनकूँ ॥
 तजे पिता अरु मातु दुःख जिन सहि सुख दीन्हों ।
 तजी सती निज नारि मोह बेश्यातें कीन्हों ॥
 करे पाप अति भयानक, करूँ न ऐसे काम अब ।
 बिगरी मेरी बात तो, किन्तु बनाई नाम सब ॥

यों करि पश्चात्ताप मोह ममता सब त्यागी ।
 बेश्या अरु सुत त्यागि राग तजि भये विरागी ॥
 हरिद्वारमहँ जाइ योगको आश्रय लीन्हों ।
 बिषयनितें मुँह मोरि युक्तितें मनचश कीन्हों ॥
 दृश्यवर्गतें पृथक करि, आत्मा ज्ञान स्वरूपमहँ ।
 फेरि अजामिल भक्तियुत, भये पारषद रूपमहँ ॥

आयौ दिव्य विमान निहारे पार्षद तेई ।
 पहिचाने ततकाल नाम दाता गुरु येई ॥
 पंचभूतक्री देह त्यागि पार्षद बपु धार्यो ।
 तब फिर चलयो विमान दिव्य वैकुण्ठ सिधार्यो ॥
 अवधम अजामिल हू तर्यो, नारायन कहि पुत्रहित ।
 ते फिर क्यों नहिँ नर तरैं, लेहिँ नाम जे शुद्धचित ॥

संयमनीपति निकट गये यमदूत खिस्याने ।
 बिना भावके मार पड़ी सब अंग पिराने ॥
 हाय जोरि सब कहें—प्रभो ! तुमई जगस्वामी ।
 या तुमतेँ हू अपर ईश बड़ अन्तरयामी ॥
 लावत ए हम नरकमहँ, जा पापीकूँ पकरिकें ।
 चारि पुरुष आये तहाँ, छुड़वायो अति भिरकिकें ॥

शङ्ख चक्र वनमाल गदामृत सेवक किनिके ।
 काके हैं वे दूत कौन स्वामी हैं तिनिके ॥
 सबके शासक आपु जीव प्राननिके हरता ।
 शासन सबको करें शुभाशुभ निरनय करता ।।
 इतने पै ऊ आपकी, आशा उल्लंघन भई ।
 बिना बातके बीचमें, हमरी दुरगति हैगई ॥

नारायन है मन्त्र जंत्र वा जादू टोना ।
 काहू नरने मृत्यु समय जिह नाम कह्यो ना ॥
 सुनि नारायन नाम भयो तनु पुलकित यमको ।
 प्रेम मगन है कर्यो ध्यान भगवत चरननिको ॥
 जलद सरिस अति विमलवर, जो हरि नित्य नवीन हैं ।
 शिव विरञ्चि इन्द्रादि हम, तिनके नित्य अधीन हैं ॥

गुह्य भागवत धरम देवता सिद्ध न जानें ।
 फिर नर, दानव, दैत्य ताहि कैसे पहिचानें ॥
 अज, शिव, नारद, जनक, कपिल, मनु, बलि, शुक, शानी ।
 भीष्महु, सनतकुमार, धरम, प्रह्लाद, अमानी ॥
 जानि भागवत धरमकुँ, परम भागवत ये भये ।
 अन्य भक्त हू भक्तिमें, नाम लिये हरिपुर गये ॥

दूत कहें—अब, नाथ ! नियम हमकुँ बतलावें ।
 जाइँ न किनके पास पकरि किनकुँ हम लावे ॥
 धरमराज तब कहें—नाम हरि जे न उचारें ।
 चितमें कबहुँ चरन कमल हरिके नहिं धारें ॥
 नहीं नवें सिर कृष्णकुँ, हरिचर्यातें जे विमुख ।
 लाओ तिनकुँ पकरिकें, आइ उठावें नरक दुख ॥

नामगान सम जगतमौहिँ साधन नहिँ दूजो ।
 करो यज्ञ व्रत दान भले प्रेतनिक्कुँ पूजो ॥
 नाम उचारत तुरत मलिनता मनकी जावै ।
 माया मोइ नसाय प्रेम प्रभुको हिय आवै ॥
 नामकीरतन जे करहिँ, जाउ न तिनके ढिँग कबहुँ ।
 पहिले पापी रहे वे, आवैं मम गृह नहिँ तबहुँ ॥

कृष्ण कीरतन गुन गौरव जे गान करहिँ नर ।
 वे कबहुँ नहिँ भूलि निहारै नीरस मम घर ॥
 सब पापनिको एक प्राइचित मुनिनि बखानों ।
 होयै नामके रसिक उनहिँ मेरो गुरु मानों ॥
 यम आज्ञा दूतनि सुनी, शिरोधार्य सबने करी ।
 हरिकीर्तन करिकें चले, सब मिलि बोले जयहरी ॥

सोरठा—जा दिनतैं यमदूत, नाम सुनत भगि जात भट्ट ।
 होत नामतैं पूत, ग्वा दिनतैं निश्चय भयो ॥

बृष्ण—पुण्य अजामिज्ञ चरित महा पापी हू गावैं ।
 गाइ हियेमइँ धरैं पाप पुनि चित्त न लावैं ।
 तिनके पाप पहाड़ भस्म सबरे है जावैं ।
 जीवत सब सुख लहैं अन्तमहैं प्रभुपद पावैं ॥
 अरथवाद जाकुँ कहैं, ते नर कोरे रहिज्जैं ।
 जीवत जा निन्दा लहैं, मरि नरकनिमहैं परिज्जैं ॥

इति श्रीभागवत चरितके तृतीयाहमें नामसंकीर्तन महिमा नामक
 छठा अध्याय समाप्त ।

अथ सप्तमोऽध्यायः

[७]

कहैं परीक्षित—प्रभो ! सुनाई सरस कहानी ।
 कथा अजामिल सुनी नाम महिमा हू जानी ॥
 ताप शाप संताप नाम ध्वनि सुनि भगि जावैं ।
 सब मिलि ऐसे भगैं लौटिकैं फिर नहिं आवैं ॥
 सुनी नाम महिमा प्रभो ! प्रकृत कथा चालू करौ ।
 सृष्टि प्रसंग सुनाइकैं, मेरे सब संशय हरौ ॥

बोले शुक—सुनु नृपति ! दक्ष प्राचेतस प्रकटे ।
 करी सृष्टि तिनि त्रिविध देव नर करमनि लिपटे ॥
 तऊ सृष्टि नहिं बड़ी दक्ष अतिशय घबराये ।
 बिन्ध्याचलके निकट तपस्या हित तत्र आये ॥
 अवमर्षण इक विमल वर; तीर्थ ताहि तट जाइकैं ।
 कीन्हों तप अति उग्र तहैं, कंद मूल फल खाइकैं ॥

करैं प्रजापति कठिन तपस्या तीर्थबास करि ।
 प्रजा सृष्टिके हेतु, नाम लैं राम कृष्ण हरि ॥
 हंसगुह्यको पाठ करैं, तप नियमनि साधैं ।
 गुण अभिव्यंजक नाम लेहैं श्रीहरि आराधैं ॥
 धरम अरथ अरु मोक्ष वा, होइ बासना कामकी ।
 सब इच्छा पूरन करैं, शरन गहैं जे रामकी ॥

दोहा—शुक बोले—सुनु भूपवर ! हंसगुह्य इस्तोत्र ।
 गिरा गाइ पावन बने, होहिं सफल सुनि ओत्र ॥

छन्द

जय स्वयं प्रकाशक श्याम हरी । जिनि सब प्रपञ्चकी सृष्टि करी ।
 जिनि जीव न जाने संग रहै, जिनि वेद निरंतर नेति कहै ।
 सब भूत, विषय, तन, प्रान करन, जाने न स्वयं निज रूप बरन ।
 सबकुं जानें जिह जीव विभू, परि जीव न जाने तुमहिं प्रभू ।
 जय हो अनन्त अखिलेश प्रभो ! जय जय करुनाके धाम विभो ।
 जिनको समाधिमहँ होहि शान, जो शुद्ध चित्तमें होत भान ।
 जो शुद्ध सच्चिदानन्द राम, तिनके पद पदुमनिमहँ प्रनाम ।
 जो मोक्ष रूप अनुभव स्वरूप, जो सर्वनाम अनुपम अनूप ।
 होवें प्रसन्न मोपै अनाम, तव चरननिमहँ पुनि पुनि प्रनाम !
 जो मन वानी को विषय नाहिँ, जिनिकुं पुरान, श्रुति, शास्त्र गाहिँ ।
 जो भेदभावतें रहित श्याम, जिनितें होवें सब जगत काम ।
 है जिनकी माया अति अपार, फँसि जीव जनम ले बार बार ।
 जिन नाम लेत भव होत पार, तिनि चरन कमलमहँ नमस्कार !
 जो अस्ति नास्तितें बोध होत, जो भवसागरके प्रबल पोत ।
 जो नाम रूपतें रहित राम, तिनि चरननिमहँ पुनि पुनि प्रनाम ।
 जो भक्त हेतु धरि रूप नाम, अवतार लेहिँ हरि पूर्ण काम ।
 जो भाववस्य सुरतरु समान, अभिमत फल दाता सुखनिधान ।
 सतचित्त स्वरूप जो मुक्तिधाम, तिनि प्रभु पद पदुमनिमहँ प्रनाम ।
 दोहा—देवें दरशन दयानिधि, गहै चरन तव नाथ ।

यों करि इस्तुति दक्ष नित, पुनि पुनि नावें माथ ॥

छप्पय—दक्ष भावकुं समुक्ति भावग्राही बनवारी ।

प्रकट तुरत तहँ भये विष्णु पीताम्बरधारी ॥

मुकुट कटक कर अंगुलीय कंकण नूपुर पग ।

त्रिभुवन मोहन रूप निरखि मोहित होवै जग ॥

परे लकुट सम भूमिमहँ, दक्ष निरखि घनश्यामकुं ।

बार बार निरखें मुदित, श्रीहरि शोभा धामकुं ॥

बोले हरि—तुम प्रजा हेतु च्यों कष्ट उठाओ ।
 मनतें बदै न सृष्टि मैथुनी सृष्टि बनाओ ॥
 पञ्जजन्यकी सुता असिकनी बहू व्याहिकें ।
 संतति करि रति धरम बढ़ाओ उभय जाइकें ॥
 बिनु आकर्षण सृष्टि नहिं, कबहुँ बदै हियमहँ धरौ ।
 तातें चटपट जाइकें, बर विवाह बेटा करौ ॥

व्याह दक्षने कर्यो विष्णु आज्ञा सिरधारी ।
 अति प्रसन्न मन भयो, बहू लखि अति मुकुमारी ॥
 सुधी प्रजापति दक्ष तपस्वी दृढव्रत धारी ।
 दश सहस्र सुत जने, सरलचित्त आज्ञाकारी ॥
 सब समान गुण रूप रँग, शील एक-सी बय नई ।
 तातें सबकी एकई, हर्यश्व हि संश भई ॥

पिता कह्यो—हर्यश्व ! करौ तप वंश बढ़ाओ ।
 पुत्र पौत्र करि अधिक जगतमहँ कीर्ति कमाओ ॥
 पितु आयसु सिर धारि चले तपकूँ सब मैया ।
 नारायन सर वसें मिले मुनि बीन बजैया ॥
 भ्रद्धा संयमके सहित, जाय तीर्थ जे न्हात हैं ।
 होत हृदय तिनिको बिमल, फिरि सतगुरु मिलि जात हैं ॥

आये नारद तहाँ दक्षपुत्रनिहैं बोले ।
 सृष्टि करो च्यों बिना भूमि सबरीपै डोले ॥
 एक पुरुषको राष्ट्र मार्ग बिनु बिल तुम देख्यो ?
 उभयवाहिनी नदी नारि कुलटापति पेख्यो ?
 धर पच्चीस पदार्थको, बहुरंगी इक हंसकूँ ।
 बिनु जाने छुरचक्र तुम, वृद्धि करो कस वंशकूँ ॥

जो हैं सच्चे पिता सबनिके अतिशय ज्ञानी ।
 का उनकी हर्यश्व वास्तविक आशा जानी ॥
 पुत्रो ! कैसे करो सृष्टि इन बातनि जानें ।
 बिना करें उपदेश हमारो नहिँ मन मानें ॥
 इतनो कहिकें देव ऋषि, प्रेम सहित पेखत भये ।
 कूट वचन सुनि दक्ष-सुत, ध्यानमग्न सब है गये ॥

नारदके सुनि कूट प्रश्न मिलि ध्यान लगायौ ।
 लिंग देह ई भूमि अंत कब जाको पायौ ॥
 नित्य मुक्त हरि लखे बिना फल करमनिको नहिँ ।
 ब्रह्मरूप बिल प्रविशि लौटि फिरि आयो को कहिँ ॥
 बुद्धि स्वैरिणी नारि है, पति अज्ञानी जीव है ।
 उभय बाहिनी नदी जिह, माया जिहि पति शीव है ॥

आश्रय पुरुष पचीस तत्वके क्षेत्र गेह भल ।
 हरि प्रतिपादक शास्त्र हंस है अतिई निरमल ॥
 कालचक्र अति तीक्ष्ण शास्त्र ई पिता सरिस है ।
 निवृत्ति मार्ग ई मुख्य कही ताकी आयसु है ॥
 यों मनतें सब सोचिकें, नारदके चेला भये ।
 मोक्ष धरमकी राह गहि, बाबाजी सब बनि गये ॥

नारायण सरमाँहिँ भई नारदतें भेटा ।
 सुनी दक्ष जिह बात बने बाबाजी बेटा ॥
 भयो हृदय अति दुखित बहुत मनमहँ पछिताये ।
 जैसे तैसे घर्यो धीर सब त्रिधि समुभाये ॥
 पाञ्चजनीने फिरि सहस, जने पुत्र शबलाश्व बर ।
 पितु आबसुतें गये वे, तपहित नारायण सु-सर ॥

करत तहाँ इस्नान भये हिय पावन तिनके ।
जब सब तप मिलि करें विचारें नारद अबके ॥
ये बालक हूँ सौम्य मोक्षपदके अधिकारी ।
देखूँ चलिक्केँ तहाँ ध्यानतें इनको नारी ॥
पर उपकारक ब्रतनिरत, चले देवऋषि तुरत तहाँ ।
करें कठिन नियमादि ब्रत, पहुँचे मुनि शबलाश्व जहाँ ॥

प्रश्न पुराने करे दक्षमुत सहस फँसाये ।
फिरि दश वे ही कूटबचन कहि कहि समुझाये ॥
ज्येष्ठ बन्धु जिहि गैल गये तुम सबहूँ जाओ ।
श्रेष्ठ मार्गमहँ जाय नित्य सुख तुम सब पाओ ॥
सृष्टि वृद्धि बिपरीत यों, पट्टो तुरत पड़ाइकेँ ।
नारद मुनि चम्पत भये, बीना मधुर बजाइकेँ ॥

मुनिक्केँ सब शबलाश्व भये भिक्षुकगृहत्यागी ।
दक्ष सुने सब वृत्त हृदय क्रोधानल जागी ॥
आग बबूला भयो क्रोध व्याप्यो नस नसमहँ ।
तुरत दयो तिनि शाप रह्यो नहिँ मन निज बशमहँ ॥
कहैं दक्ष—तू जगत महँ, कबहुँ न कुटी बनाइकेँ ।
थिर न रहै घूम्यो करै, तुमड़ी तान बजाइकेँ ॥

नारद मुनिक्कूँ शाप दक्षने दीयो नरपति ।
सिर धरि करि स्वीकार भये मुनि मुदित हृदयअति ॥
बन्धनको है हेतु कुटी आश्रम बनवानों ।
खंदकमेंतें निकसि कूपमहँ पुनि गिरि जानों ॥
हरि भक्तनिक्कूँ शाप वर, दोऊ एक समान हैं ।
तिनको निश्चय अटलजिह, सबईमहँ भगवान हैं ॥
१५ फ०

शाप कर्षो स्वीकार देवर्षि सुरपुर धाये ।
 देखि दक्षकूँ दुखी हंस चदि इत विधि आये ॥
 सृष्टि करन पुनि कही, दक्ष बोल्यो घबरायो ।
 नारद पीछें पर्यो प्रभो ! कछु युक्ति बताओ ॥
 विधि बोले—अबकें सुता, करौ वंश बढ़ि जाइगो ।
 छोरिनिके टिँग भूलिके, नारद मुनि नहिँ आइगो ॥

इति श्रीभागवतचरितके तृतीयाहमें दक्षनारदशाप नामक
 सप्तम अध्याय समाप्त ।



अथ अष्टमोऽध्यायः

[८]

दोहा—दैकें आज्ञा पितामह, गमने अपने लोक ।
कीयौ गरभाधान पुनि, दक्ष त्यागि सुत शोक ॥

छप्पय—विधि आज्ञातेँ साठि दक्ष कन्या उपजाईं ।
तेरह कश्यप लईं चन्द्र सत्ताइस ब्याईं ॥
अंगिर भूत कृशाश्व दईं द्वै द्वै सुकुमारी ।
शेष तार्दर्य सँग चारि त्रिवाही पुत्री प्यारी ॥
पुत्र पौत्र सबके बहुत, भये जगत सब भरि गयो ।
बहुसंतति लखि दक्षकी, हृदय सरोरुह खिलि गयो ॥

भानु, मुहूर्ता; ककुप, जामि, वसु लम्बा साध्या ।
मरुत्वती, संकल्प, धर्मकी ये सब भार्या ॥
स्वधा सती ये नारि अंगिरा मुनिकी प्यारी ।
बिनता कद्रू और पतंगी यामिनि नारी ॥
तार्दर्य बहू ये चारि हैं, धिषणा, अर्चौ गुणवतौ ।
पत्नी कहीं कृशाश्वकी, सबईं सुन्दर सब सती ॥

अत्र कश्यपकी नारि त्रयोदशकी संतति मुनि ।
अदिती, दिति, दनु, इला, अरिष्टा सुरसा अरु मुनि ॥
काष्ठा, सरमा, सुरभि, कही तिमि, क्रोधवसा पुनि ।
ताम्रा पत्नी पाइ भये अति आनंदित मुनि ॥
लोक मातु ये जगतकी, सब इनकी सन्तान हैं ।
देव, असुर, पशु, पक्षि, नर, लघु बड़ छुद्र महान हैं ॥

देव ऋषभ सुत भानु जन्यो लम्बा विद्योतहिं ।
 ककुभ, बंशमहँ भये देव जो दुर्गनिमहँ रहिं ॥
 देव, मुहूर्ता, जने मुहूर्तनि के अभिमानी ।
 मरुत्वतीके पौत्र जयन्त उपेन्द्र सुजानी ॥
 संकल्पा, संकल्पसुत, जाके सुत ये काम हैं ।
 अष्टवसू बसुने जने, द्रोण आदि जिन नाम हैं ॥

साध्याके सुत साध्य, विश्वके विश्वेदेवा ।
 भूत सरूपा नारि रुद्रगण जने कुदेवा ॥
 दूसरि पत्नी पुत्र भूत प्रेतादि त्रिनायक ।
 स्वधा अंगिरा नारि पितृगण जने प्रभावक ॥
 सती, सुमाता बेदकी विषणा, अर्चि, कृशाश्वकी ।
 नारि पतंगी यामिनी, विनता कद्रू तार्क्ष्यकी ॥

विनता कद्रू बहिन सौतिया डाह भयो मन ।
 उच्चैःश्रवा निमित्त दासताको कीन्हों प्रन ॥
 कद्रू लूँगटि करी पूँछ सुत अहि लिपटाये ।
 दासी विनता बनी गरुड़ जनि दुःख भुलाये ॥
 अरुण भये आधे गरुड़, अमृत लाइ अहि पुनि हने ।
 बरतें हरिध्वज महँ रहे, हरि बर दै बाहन बने ॥

सत्ताइस नक्षत्र चन्द्र पत्नी सुकुमारी ।
 औरनितें नहिं नेह रोहनी अतिशय प्यारी ॥
 पितु समीप सब गईं दुःखकी कथा सुनाई ।
 दयो दक्ष सुनि शाप होय क्षय सोम सदाई ॥
 बात शापकी सौमने, सुनी बहुत चिन्तित भये ।
 अपराधी बनि ससुरके, विनय सहित पुनि दिंग गये ॥

चन्द्र विनय बहु करी प्रजापति किरपा कीन्हीं ।
 कृष्णपद् ई कला होयँ क्षय आशा दीन्हीं ॥
 शुक्लपद्महँ पूर्ण होयँ ऐसो बर दीन्हीं ।
 अति अनुनय करि दक्ष तुष्ट शशिने करि लीन्हीं ॥
 दक्षसुता दस सत्तरह, संतति बिनु सब रह गई ।
 पक्षपात पतिने कर्यो, दुखित सबहिं जाते भई ॥

काष्ठाके सुत अश्व, सुरभिके गौ पशुगन हैं ।
 तिमिके जलचर जीव, दनूके सब दानव हैं ॥
 सरमा के व्याघ्रादि बाज ताम्राकी संतति ।
 सुरललना मुनि जनीं, दैत्य दितिके हिंसक अति ॥
 क्रोधवशाके सर्पगन, करें क्रोध जो नित्य हैं ॥
 सुरसांके राक्षस भये, अदितीके आदित्य हैं ॥

इला जने सब वृक्ष जगतके जे सुखदायक ।
 जने पुत्र गन्धर्व अरिष्टा सुन्दर गायक ॥
 जो बारह आदित्य बड़े तिनि विवस्वान् रवि ।
 हते अर्यमा द्वितिय भये तिनतैं मानुष कवि ॥
 दक्ष यज्ञमें पिष्टभुक्, दन्तहीन पूषा भये ।
 विश्वरूप त्वष्टा तनय, सुरगुरु कछु दिन बनि गये ॥

इति श्रीभागवतचरितके तृतीयाहमें दक्षसुता वंशवर्णन नामक
 अष्टम अध्याय समाप्त ।

अथ नवमोऽध्यायः

[६]

छप्पय—नृप पूछें—गुरु विश्वरूप क्यों मुरनि बनाये ।
 मुरगुरु देवनि छोड़ि स्वरगतें कहाँ सिधाये ॥
 बोले शुक—नरदेव ! शक्र हिय मद अति आयौ ।
 करि गुरुको अपमान तुरत फल ताको पायौ ॥
 कहैं परीक्षित चकित है, क्यों मद मुरपतिकूँ भयो ।
 कथा सुनावैं सकल प्रभु, दंड देवगुरु का दयो ॥

दोहा—सुन्यो परीक्षित प्रश्न शुक, कर्यो कछुक छिन ध्यान ।
 कहन लगे इतिहास सच, इन्द्र भयो क्यों मान ॥

छप्पय—हम सबतें हैं ऊँच भयो अभिमान देवपति ।
 क्यों देवें सम्मान बृहस्पतिकूँ हम नित प्रति ॥
 ऐसो निश्चय करयो सभामहँ जब गुरु आये ।
 नहिँ आसनतें उठे बचन नहिँ मधुर सुनाये ॥
 समुक्ति गये गुरु इन्द्रकूँ, अहंकार अतिशय भयो ।
 तुरत लौटि आये भवन, भलो बुरो नहिँ कछु कह्यो ॥

तुरत इन्द्रकूँ चेत भयो मनकूँ धिक्कारें ।
 कैसो कीयो काम दुखित अति होहिँ विचारें ॥
 हाय ! बुद्धि मम नसी अनादर गुरुको कीन्हों ।
 सम्मुख आये देव नहीं उठि आसन दीन्हों ॥
 श्रीचरननिमहँ शीश धरि, रोउझो पछिताउँगो ।
 बारबार बहु विनय करि, गुरुकूँ जाइ मनाउँगो ॥

गुरुगृह गमने इन्द्र बृहस्पति तहाँ न पाये ।
 अन्तरहित गुरु भये देव अतिशय धरारये ॥
 सुरगुरु त्यागे असुर प्रीति हियमहँ अति छाई ।
 स्वरग त्रिजयके हेतु सुरनिपै करी चढ़ाई ॥
 शुक्राचार्य सहायतें, गुरुप्रिय सुररिपु बढि गये ।
 गुरुद्रोही सुरसंघपै, अलख शल्ल लै चढ़ि गये ॥

निरुत्साह है देव समरमहँ सम्मुख आये ।
 किन्तु न कछु बल चलयो तनिक लरिकें धरारये ॥
 मरतें है उन्मत्त असुर देवनिक्कूँ डारें ।
 हाथ, पैर, सिर अङ्ग कठिन वाननितें काटें ॥
 जब असुरनि की मारतें, अति व्याकुल सुरगन भये ।
 भागे रनकूँ छोड़ि सुर, कमलासनके दिँग गये ॥

सुनिकें सबरी बात कहैं विधि—मलो न कीन्हों ।
 मूरखता अति करी नहीं गुरु आदर दीन्हों ॥
 जाईतें तुम बली अबल असुरनितें हारे ।
 है धरवार त्रिहीन फिरौ सब मारे मारे ॥
 सुखी कृपा गुरुतें दुखी, जिहि पर गुरु प्रतिकूल हैं ।
 होहि अमगल तासु कस, जाके गुरु अनुकूल हैं ॥

निज अपराधी जानि करै हरि क्षमा जीवकूँ ।
 कहु पौरुषतें जीव तुष्ट कस करे शीवकूँ ॥
 कृपासिन्धु भगवान कौनपै कब दुरि जावैं ।
 कब कापै करि कृपा अनुग्रह रस बरसावैं ॥
 दुष्ट दैत्य भगवानकूँ, परुष वचन नितई कहैं ।
 गनें न तिनके दोषकूँ, अज्ञ जानि सब कछु सहैं ॥

सबको ही निस्तार करें हरि क्षमा सबनिकूँ ।
 किन्तु न पशुपति करें क्षमा खल गुरुद्रोहिनिकूँ ॥
 हरि रूठें तो चरन शरन गुरुकी नर आवें ।
 गुरु रूठें तो कहहु जीव किहिके दिँग जावें ॥
 जे तन मन धन आदितें, गुरु सेवा नितई करें ।
 प्रभुपद पावें प्रेमतें, भवसागर छिनमहैं तरें ॥
 गुरु प्रसादतें कौन बस्तु है दुरलभ जगमहँ ।
 गुरु-प्रसाद पायेय चलो लै निरभय मगमहँ ॥
 गुरु चाहें तो रुष्ट देवकूँ तुरत मनावें ।
 गुरु चाहें तो तुरत क्रूरकूँ साधु बनावें ॥

गुरु चरननिकी शरनमह, होहि न भवभयकी व्यथा ।
 है प्रसिद्ध संसारमें, काकभुशुण्डीकी कथा ॥

दोहा—यो देवनिकूँ डाँटिकें, भये पितामह मौन ।
 कछुक देर सोचत रहे, बनें पुरोहित कौन ॥

छपाय—बोले ब्रह्मा—त्रिश्वरूप दिँग सुर सब जाओ ।
 करिकें अनुनय विनय उन्हें गुरुदेव बनाओ ॥
 विधिसम्पत्ति सिर धारि चले सब आयसु पाई ।
 त्वष्टासुत दिँग जाइ विपतिकी बात बताई ॥

सब मुनि बोले त्वाष्ट्र मुनि, कैसे अब नाहीं करूँ ।
 उपरोहित निन्दित करम, तिहि करि कस अब सिर धरूँ ॥
 देखो, पौरोहित्य करम अतिई निन्दित है ।
 लोक बेद सर्वत्र देवगण ! बात विदित है ॥
 उपरोहितको अब पाप ई विश बतावें ।
 अति प्रसन्न है कुमति ताहि हरषित है खावें ॥
 निष्किञ्चनकी वृत्ति तो, कन कनकूँ संग्रह करै ।
 पूजि पितर, सुर, अतिथि, ऋषि, उदर शेषतें मुनि भरै ॥

कहैं देव—प्रिय विश्वरूप ! तुम पुत्र हमारे ।
 आये हैकें दुखित बत्स ! हम पास तुम्हारे ॥
 अनुचित उचित बिसारि पुरोहित पद स्वीकारो ।
 बिपति उदधिमहँ मग्न पकरिकैं हमें उबारो ॥
 करो न मन संकोच कछु, छोटे कस गुरुपद गहैं ।
 ज्ञानवृद्धकूँ वेदविद्, बन्दनीय सबकौ कहैं ॥

बिनय सहित पुनि विश्वरूप बोले मृदुबानी ।
 आप देवगन परम पूज्य ज्ञानी विज्ञानी ॥
 लोकेश्वर हैं आपु पुत्रकूँ देहिँ बड़ाई ।
 गुरु आज्ञामहँ होहि शिष्यकी सदा भलाई ॥
 होवैं अब निश्चिन्त हौं, पुरोहिताई करुझो ।
 तुम सबकी आज्ञा बिहँसि, प्रेम सहित सिर धरुझो ॥

सुनिकैं सबई देव हृदयमहँ अतिशय हरषे ।
 बजें तुंदुभी आदि कुसुम नमतें बहु वरषे ॥
 विश्वरूपको बरन करूँ गुरु पद बैठाये ।
 धरम करम व्रत नियम सुरनि सब बिप्र सिखाये ॥
 विश्वरूप गुरु पाइकैं, देवनि की चिन्ता गई ।
 अवसि मिलैं पुनि स्वर्ग सुख, यह प्रतीति सबकूँ भई ॥

विश्वरूप गुरु बने नाकपति निरभय कीन्हों ।
 रक्षाकें हित दिव्य कवच नारायन दीन्हों ॥
 नारायनको कवच धारि जे रनमहँ जावैं ।
 होहिँ पराजय नहीं विजय शत्रुनिपै पावैं ॥
 पाई विद्या वैष्णवी, अति प्रसन्न सुरपति भये ।
 करी चढ़ाई सुरनिने, असुर पराजित करि दये ॥

पूछें नृप—है कौन कवच नारायन गुरवर ।
 बोले शुक—है दिव्य अस्त्र अष्टाक्षर नृपवर ॥
 करिकें विधिवत न्यास ध्यान करि विनय करे अति ।
 आठ भुजातें युक्त सिद्धि देवें जग अधिपति ॥
 जलमहँ बनिकें मोन प्रभु ! थलमहँ वामन तनु धरें ।
 विश्वरूप बनि गगनमहँ, चहुँदिशि हरि रक्षा करें ॥

वन, रन, दुरगनिमाँहिँ करें रक्षा श्रीनरहरि ।
 डगरमाँहिँ वाराह परशुधर शिखरनिपै गिरि ॥
 परदेशनिमहँ रामलखन सँग मोइ बचावें ।
 नर नारायन गरव प्रमादहिँ तुरत भगावें ॥
 रक्षा दत्त कुयोगतें कपिल करम बन्धन नसैं ।
 कामदेवतें सनत् शिशु, हयग्रीव मग अघ नसैं ॥

पूजाके अपचार नसैं नारद मुनि ज्ञानी ।
 कच्छप रक्षा करें नरक कछु करें न हानी ॥
 धन्वन्तरि दैं पथ्य द्वन्द्वतें ऋषभ बचावें ।
 यश लोकअरवाद नसैं बल दुःख नसावें ॥
 शेष सरप रक्षा करें, व्यास नसैं अज्ञानकूँ ।
 बुद्ध नसैं पाखण्ड सब, कल्कि दोष कलिकालकूँ ॥

करें प्रात लै गदा हमारी रक्षा केशव ।
 मुरलीधर गोविन्द करें रात्र उदय होहिँ जव ॥
 करें क्लृप्त समय सदा रक्षा नारायन ।
 चक्रगानि श्रीविष्णु मध्यदिन रक्षें पावन ॥
 रक्षा तीसर पहरमहँ, मधुसूदन श्रीधनुरधर ।
 त्रय मूर्ति माधव करें, रक्षा सायंकाल वर ॥

दृषीकेश परदोष कालमहँ रक्षे' नित विभु ।
 आधी राति निशीथ समयमहँ पद्मनाभ प्रभु ॥
 जिन लाञ्छन श्रीवत्स पहर पिछलेमहँ रक्षन ।
 उषाकालमहँ करें खड्ग धरि कृपा जनार्दन ॥
 सूर्योदयके प्रथम ही, दामोदर रक्षा करें ।
 विश्वेश्वर श्रीकाल प्रभु, सब सन्ध्यनिको दुख हरे ॥

करो सुदर्शन ! मक्ष शीघ्र तून सम सब शत्रुनि ।
 कुचलि कुचलि करि चूर्ण गदे ! तू भूत राक्षसनि ॥
 करि रव भीषन शङ्ख ! रिपुनिके हिये कँपाओ ।
 तीक्ष्ण धारतैं खड्ग ! विपद्दिनि शीश उड़ाओ ॥
 हे चमकीली ढाल ! तू, चकाचौंघ करि रिपुनिकूँ ।
 तुम सब प्रभुके अन्न हो, करौ पराजित सबनिकूँ ॥

एवि, ग्रह, दानव, दैत्य, भूत प्रेतादि भयङ्कर ।
 प्रतिबन्धक जे अपर सिंह सरपादिक विषधर ॥
 नसैं करत हरि नाम, रूप, आयुषको कीर्तन ।
 पार्षद विश्वक्सेन गरुड दुख मेंटें ततछिन ॥
 नाम, रूप आयुष सकल, हरि पार्षदगन दुख हरे ॥
 बुद्धि, करन, मन, प्रानकी, सब क्रमते रक्षा करें ॥

जग प्रपञ्च सत् असत् सकल हरि' रूप कहावैं ।
 है यदि यह ध्रुव सत्य अबहिँ मम दुःख नसावैं ॥
 है निरगुन निज जननि हेतु नाना वपु धारैं ।
 है सत तो सरवत्र सकल विपतिनि हरि टारैं ॥
 अट्टहास करि भयङ्कर, जो भक्तनिके भय हरे ।
 ते नरहरि अति तेजयुत, दशहु दिशनि रक्षा करें ॥

विश्वरूपने जिही कवच सुरपतिकूँ दीयो ।
 दै नारायन मन्त्र अभय सबईकूँ कीयो ॥
 शुभ नारायन कवच मिल्यो सुरश्री पुनि आई ।
 असुरनिपै सजि सैन, सुरनिनै करी चढ़ाई ॥
 श्रीहरि कवच प्रभावतें, असुर स्वरग तजि भगि गये ।
 राजभ्रष्ट सुरराज तब, अमरावतिपति पुनि भये ॥

इति श्रीभागवत चरितके तृतीयाहमें विश्वरूप सुरपुरोहित वर्णन नामक
 नवम अध्याय समाप्त ।



अथ दशमोऽध्यायः

[१०]

त्वष्टासुत गुरु पाह भये स्वर्गेश इन्द्र पुनि ।
 करबावें नित यज्ञ पुरोहित विश्वरूप मुनि ॥
 उच्चस्वरतें बोलि सुरनिद्रुँ आहुति देवें ।
 चुपकेतें कछु यज्ञभाग दै अमुरनि सेवें ॥
 मातृपक्ष अनुराग लखि, देवनि संशय है गयो ।
 उपरोहित अभिनय निरखि, क्षोभ इन्द्र मन अति भयो ॥

निरखि स्वार्थमहँ बिघ्न इन्द्रने खड्ग निकार्यो ।
 त्वष्टा-सुत सिर तीन काटि उपरोहित मार्यो ॥
 सोमपीथ सिर भयो कपिञ्जर सुरापीथ सिर ।
 भयो पक्षि कलविद्ध तीसरो नरसिर तित्तिर ॥
 द्विजहत्या सुरपति निकट, आई अञ्जलिमहँ लई ।
 हत्यारे देवेन्द्र हैं, यह प्रसिद्धि जगमहँ भई ॥

बनि हत्यारे फिरें बरष भरि सुरपति जहँ तहँ ।
 बाँटी हत्या इन्द्र घरा, नग, नारि, बारिमहँ ॥
 गड्ढा पुनि भरि जायँ लह्यो बर घरा प्रेमतें ।
 कटिकें पनपें वृक्ष इन्द्र बर दयो नेमतें ॥
 व्यय करिकें हू नित बदे, बदलेमहँ बर जल लह्यो ।
 रतिसुख शक्ति सदा बनी-रहे कामिनिनि वर दयो ॥

ऊसर पृथिवी होय ब्रह्महत्याके लक्षण ।
 यज्ञादिक शुभ करम नष्ट होवें तहैं तत्क्षण ॥
 गौद तरुनिमहैं होय करें जे वाकूँ भक्षण ।
 राग सहित तिहिं खायँ पापमय होवै तत्त मन ॥
 दीखें मैले फैँन जे, जल प्रवाहमहैं जाइकें ।
 द्विजहत्या लखि पियो जल, बुदबुद फैँन बचाइकें ॥

चौथे दीन्हों भाग इन्द्रने नारिकूँ जत्र ।
 मास मासमहैं प्रकट होहि अस्पर्श होहिं तत्र ॥
 रजोधर्ममहैं निरत नारिकूँ नर जो जोहैं ।
 धरम करमतेँ हीन पापमय खल जन सो हैं ॥
 भूलि समागम अज्ञ नर, रजस्वलातेँ करिजे ।
 हर्यारे सम पातकी, अवसि नरकमहैं परिजे ॥

नारि, वृक्ष, जल, भूमि पाइ बरदान सिहाये ।
 इन्द्र भये निष्पाप मुदित है स्वर्ग सिधाये ॥
 द्विजहत्या तो गई शत्रुता सिरपै आई ।
 विश्वरूप पितु कुपित भये सुनि इन्द्र ठिठाई ॥
 स्वष्टा मन निश्चय कर्यो, इन्द्र नीचता हरुझो ।
 जो मारै जा इन्द्रकूँ, अस नर पैदा करुझो ॥

ऐसो मनमहैं सोचि हवन मुनिवरने कीन्हों ।
 इन्द्र शत्रु बढि जाव, मंत्र पढ़िकें हवि दीन्हों ॥
 मंत्र शक्ति अति अमित, तुरत इक उपज्यो प्राणी ।
 महा भयंकर वृत्र बली अतिशय अभिप्राणी ॥
 लाल मूँछ दाढ़ी अरुन, बरन नयन प्रलयाग्नि सम ।
 अञ्जनपरबतके सरिस, सुररिपु तेजस्वी परम ॥

छिन छिनमहँ बहु बदै लोक तीनहु दकि लीन्हें ।
 देव मारतैं विकल असुर सब निरभय कीन्हें ॥
 पूछे पितुतैं वृत्र—तात ! हौं कलैं कहा अब ।
 मोकूँ कछु न अशक्य, काज हौं पिता करौं सब ॥
 त्वष्टा मुनि मुनि इन्द्रको, कहा वृत्त सब वृत्रतैं ।
 इन्द्र मारि देवनि करो, रहित चमर अरु छत्रतैं ॥

वृत्रासुर मुनि पिता बचन सब असुर बुलाये ।
 शुक्र पुरोहित आइ विजयके कृत्य कराये ॥
 मदमाते-सब असुर चले रन शस्त्र घुमावैं ।
 गर्जन तर्जन करत वृत्र बल समुक्ति सिहावैं ॥
 आवत देख्यो असुर दल, सब शस्त्रनि लै भिरि गये ।
 वृत्र पराक्रम निरखि कै, त्रिस्मित सब सुरगन भये ॥

बोल्यो उनतैं वृत्र—देव ! तुम सब अज्ञानी ।
 अरे, तुमनि मम देह, बज्रकी बनी न जानी ॥
 अति कोमल मम जीभ ताहिपै शस्त्र चलाओ ।
 एक साथ मिलि मोहिँ युद्धकी कला दिखाओ ॥
 मुनि सुर सब मिलि जीभपै, अस्त्र शस्त्र मारन लगै ।
 लीले सबके अल जव, है निशस्त्र डरि सुर भगे ॥

मागत देखे देव असुर जय पाइ सिहाये ।
 नहीं शरन ललि अन्य विष्णु ढिँग सुर सब धाये ॥
 हाथ जोरि सब विनय करें हरि हमें बचाओ ।
 बहुत अवज्ञा सही जगतपति अब अपनाओ ॥
 गुरु अपमान स्वरूपमहँ, वृत्र विपति सिरपै परी ।
 गो द्विज देवनिकी तुमनि, युग युगमहँ रक्षा करी ॥

विपति उदधिमहँ मगन भये हरि आइ उबारो ।
 अन्य शरन नहि नाथ ! गहो अब हाथ हमारो ॥
 सुनि देवनि की विनय तुरततहँ प्रगटे श्रीहरि ।
 अति प्रसन्न सब भये देव दुरलभ दरशन करि ॥
 देखि दुखी देवनि दया, करी बिष्णु बोले बचन ।
 शुभ सम्मति सबकुँ दऊँ, ताहि सुनो एकाग्र मन ॥

मुनि दधीचिके निकट देव सब मिलिके जाओ ।
 निज विपत्तिके वृत्त जाइ मुनिवरहिँ सुनाओ ॥
 विद्या व्रततँ पूत तपस्याके प्रभावतँ ।
 उनकी हड्डी बिमल सरल सन्चे स्वभावतँ ॥
 बनें वज्र मुनि अस्थितँ, वृत्रासुर मरि जाइगो ।
 सबरो दुख कटि जायगो, गयो राज फिर आइगो ॥

हरिकी मुनिकेँ बात देव हैकेँ विस्मययुत ।
 चिन्ता भयतँ विकल भये निरखेँ सब इत उत ॥
 कहँ—प्रभो ! हम दुखित असंभव कहो न बानी ।
 देहि न जीवित अस्थि होहि चाहे नर ज्ञानी ॥
 को जगमहँ अस करि सके, प्रानदान दुषकर करम ।
 दमरी देनो दयानिधि ! दुखदायो होवै परम ॥

हरि हैंसि बोले—देव ! सबनि अपु सम मति जानों ।
 परउपकारी पुरुष देहिँ सबसु सच्चु मानों ॥
 शिवि, बलि अरु, हरिचंद करम दुषकर जग कीन्हों ।
 परकारजके हेतु मोह तनको तजि दीन्हों ॥
 सिर कटाइ उपदेश शुभ, ज्ञान अश्वशिरतँ कर्यो ।
 का अदेय जिनकुँ सदा, हृदय ज्ञान धनतँ भर्यो ॥

विष्णु कहें—सुरराज ! काज ऋषिचर ई साधें ।
तनय-अथर्था नित्य नियमते हरि आराधें ॥
नाहीं सुरपति करी विविध विधि धमकी दीन्हों ।
यमजनितें जो कही प्रतिज्ञा पूरी कीन्हों ॥
कही ब्रह्मविद्या सकल, ह्यसिरतें मुनिऋषभ जो ।
अश्वसिराके नामतें, है प्रसिद्ध अब तलक जो ॥

मिलि सब जाओ करो बन्दना ऋषि चरननि की ।
माँगो ह्वैकें दीन अस्थि अति पावन मुनिकी ॥
अबसि देइंगे कबहुँ मनैं मुनिवर न करिजे ।
तुम सबके हित विहँसि नेहते देह तजिजे ॥
उनकी तपमय अस्थितें, सुघर बज्र बनि जायगो ।
वाईतें जा बृत्रको, सिर घड़तें कटि जायगो ॥

विश्वरूपने तुमहिँ कवच नारायन दीन्हों ।
पितु त्वष्टातें विश्वरूप द्विजवरने लीन्हों ॥
मुनि दधीचिने दयो तपस्वी त्वष्टाकूँ पुनि ।
अस्थिनिमहँ विधि गयो भयो अतिई पावन मुनि ॥
परउपकारीकूँ कहो, कौन कठिन जग काज है ।
परकारजके हेतु तो, तुच्छ देह, धन, राज है ॥

सोरठा—मुनिकें हरिकी सीख, देवनिकूँ निश्चय भयो ।
माँगन मुनितें भीख, चले अमर स्वारथ निरत ॥
शौनक पूछें—सूत, मुनि अस्थिनिमहँ तेज च्यों ।
किहि कारन ते पूत, मुनिकें बोले सूतजी ॥

छुप्पय—मुनि दधीचि ढिँग गये देव असुरनिक्कूँ जय करि ।
 मुनितें बोले अमर—महामुनि ! देवनि भय हरि ॥
 इन अस्त्रनिर्ते हमनि असुर सब ई संहारे ।
 अब ये सबई दिव्य अस्त्र हैं व्यरथ हमारे ॥
 नष्ट असुर करि देईंगे, प्रभु ! इनकी रक्षा करहु ।
 रहें सुरक्षित यहाँपै, इनकुँ निज आश्रम घरहु ॥

स्वीकारी सुर विनय अस्त्र मुनिनें धरि लीन्हें ।
 गभस्तिनीतें डरे देव मुनि निरभय कीन्हें ॥
 सुर लैवे नहीं गये न्यास रक्षाके भयतें ।
 पीये मुनि सब धोय पचाये अपने तपतें ॥
 ते अस्थिनिमहँ विधि गये, बज्र सरिस सबरी भई ।
 शुद्ध हतों तर्ते प्रथम, परम शुद्ध अब है गई ॥

ताहीतें हरि कही—अस्थि मुनिकी लै आओ ।
 फिरितें अपने अस्त्र शस्त्र अब बज्र बनाओ ॥
 हरि आयसु स्वीकारि चले सुर मुनि ढिँग तबई ।
 पढ़ी पढ़ाई बात सुनाई देवनि सबई ॥
 मुनि दधीचि बोले बिहँसि, कठिन फन्द तनुनेहको ।
 माँगें चाहैं विष्णु ई, दैवो दुरत्तम देह को ॥

स्वेच्छातें नहीं जीव देह अनीक त्यागै ।
 पापी, रोगी, मूढ़, देह सबकुँ प्रिय लागै ॥
 सहै दुसह दुख किन्तु मृत्यु तोऊ भयकारी ।
 ज्यौ तुम माँगो देव ! देहकी अस्थि हमारी ॥
 बोले सुर स्वारथ सहित, साधु सदा पर हित निरत ।
 दुखित देव सब आपु प्रभु, दुखियनि दुख मेंटत सतत ॥





नरक की काल्हू यातना पृ० २०६

जिनको व्रत है सतत दया जीवनिपै करिबो ।
 उनकुँ एक समान जगत् महुँ जीबो मंरिबो ॥
 परकारज हित हरषि साधु प्राननिकुँ देवें ।
 दाता : देहिँ अनित्य नित्य बदलेमहुँ लेवें ॥
 कहैं संतजन जगत् महुँ, एक त्यागई श्रेय है ।
 परउपकारी के लिये, नहिँ कछु वस्तु अदेय है ॥

इन्द्र बने घर बाज कबूतर अनल बनाये ।
 दोऊ भगड़त परम यशस्वी शिवि ढिँग आये ॥
 अति ई दुखी कपोत कहे—प्रभु ! रक्षा कीजे ।
 बाज भूखतें दुखित कहे—भोजन मम दोजे ॥
 शरनागतकी कष्ट सहि, पीड़ा भूपतिने हरी ।
 मांस दयो निज देहको, रक्षा शिवि वाकी करी ॥

सब स्वारथके मीत न देखें परहित कोई ।
 हाँवै मेरो लाभ हानि मल औरनि होई ॥
 परउपकारी सदा दुःख औरनिकौ लेवें ।
 दुखियनिके हित बिहँसि प्रान तन मन धन देवें ॥
 यह कारज मैंने कियो, नहीं करें अभिमान वे ।
 उनको सहज स्वभाव यह, दोष न देवें ध्यान वे ॥

हाड़ मासके बने देहमें ममता सबकुँ ।
 चाहैं सबहों दुखी सदा सुख होवै हमकुँ ॥
 परउपकारी त्यागि देहिँ सरबसुकी ममता ।
 देहिँ देहको दान रखहिँ सबईमहुँ समता ॥
 मोरध्वजने सही सब, साधु सिंह हित सुत व्यथा ।
 हैं अब तक जगमहुँ विदित, शिवि, दधीचि, बलिकी कथा ॥

दोहा—देवनिको उपदेश सुनि, मुनि सोचें मनमाहिँ ।
परमारथतें भ्रष्ट जग-महँ कारज कछु नाहिँ ॥

छप्पय—हँसि दधीचि मुनि कुहें—धरमको मरम जतायो ।
ताहीतें अस ब्यंग देवगन बचन सुनायो ॥
विषयनिर्ते नहिँ मोह नहीं है ममता तनकी ।
लगी रहे नित वृत्ति ब्रह्ममहँ मेरे मनकी ॥
इक दिन छूटे अवशि ई, नाशवान यह है अनित ।
ज्यों न तजौ फिरि स्वतः ई, तनु तुम्हरे हितके निमित ॥

अहो कष्ट अति घोर करै नर तनमहँ ममता ।
नहिँ साधे परलोक करै धनमाँहिँ कृपनता ॥
परमधरम है जिही दुखी परदुखमहँ होनों ।
दया धरमतें हीन व्यरथ जीवनकुँ खोनों ॥
छिन भंगुर नितनाशयुत, व्यरथ मोह धन गेहमहँ ।
ज्यों न बितावै समयकुँ, परमारथके नेहमहँ ॥

मुनि मुनिको उपदेश देवता अति ई हरषे ।
ब्रजें दुंदुभी गगन सुमन सुर-तरु के बरषे ॥
पुनि पुनि इच्छा करी तीर्थ मैने नहिँ कीन्हे ।
तुरत तीर्थ तहँ सुरनि बुलाये सब मुनि चीन्हे ॥
न्हाय घोय निश्चिन्त है, सब तोरथ करि भक्तितें ।
बैठे तनु त्यागन निमित, तप संयमको शक्तितें ॥

परब्रह्ममहँ चित्त लीन कीन्हों मुनि अपनों ।
यह सब दृश्य प्रपंच लख्यो सबरो जस सपनों ॥
मनकुँ करि एकाग्र तत्त्वमय दृष्टि करी तब ।
संयत कीन्हें प्राण करी बसमहँ इन्द्रिय सब ॥

सुरनि बुलाई सुरभि सत्र, चाटि मांस बिनु तनु कियो ।
यो परकारजके निमित्त, मुनिने निज तनु तजि दियो ॥

सखी हड्डी रहीं तेजथुत अतिशय मनहर ।
रन्धो वज्र शुभ दिव्य विश्वकरमा अति सुन्दर ॥
हरिको प्रविश्यो तेज सुरनि सँग मुदित भये अति ।
ऐरावतपै चढ़े सुशोभित होयँ स्वरगपति ॥
परउपकारीकुँ नहीं, तनिकहुँ तनमहँ राग है ।
धनि दधोचि मुनि धन्य तप, धनि धनि उनको त्याग है ॥

इति श्रीभागवत चरितके तृतीयाहमें विश्वरूपवध वृत्रोत्पत्ति
दधोचि अस्थिदान नामक दशम अध्याय समाप्त ।



अथ एकादशोऽध्यायः

[११.]

दोहा—मुनि दधोचिकी अस्थितें, बने बज्र अरु शस्त्र ।
लखि सुर अति हरषित भये, चले समर लै अस्त्र ॥

छुप्पय—सब सुर शस्त्र सम्हारि समरमहँ सजि बजि धाये ।
उततें असुरहु अस्त्र शस्त्र लैकें चढ़ि आये ॥
गदा, परिघ, शर, शूल लगे बहु शस्त्र चलन तहँ ।
रनके बाजे बजें बोर बर लड़ें समरमहँ ॥
देवासुर संग्राम अति भयो भूमिपै भयङ्कर ।
सुरसेना विजयी भई, भगे असुर तजिके समर ॥

असुरनि भागत देखि बृत्र बोल्थो बर बानी ।
अरे, असुरगन ! समरत्यागि का मनमहँ ठानी ॥
आआगे भगि कहाँ मृत्यु तो सँग ई आवै ।
बिना कालके मृत्यु कहूँ दिँग हू नहिं जावै ॥
जे जगमहँ पैदा भये, ते निश्चय ई मरिङ्गे ।
तो फिर मरिकें बीरबर, च्यौं न अमर यश करिङ्गे ॥

असुरनिक्कूँ यों बृत्र धरमयुत बचन सुनाये ।
किन्तु समरतें भगे एकहू नहिं मन भाये ॥
असुर प्रान लै भगे देवता तिनहिं खदेरें ।
लड़ें भिड़ें नहिं तऊ जाइ सुर पुनि पुनि घेरें ॥
बृत्रासुर अन्याय लखि, कहे इन्द्रतें कटु बचन ।
अरे, अधरमी धरम तजि, करै काहि यह कपट रन ॥

है पुरुषारथ, तेज, ओज, बल तोमें सुरपति ।
 तो करि मोतें युद्ध करूँ तेरी अब दुरगति ॥
 मेरे सम्मुख आव समरको स्वाद चखाऊँ ।
 अबई तोकुँ मारि मृत्युके सदन पठाऊँ ॥
 यों कहिके गर्जन करी, सुनि रव सबरे सुर डरे ।
 बज्राहतके सरिस है, देव अवनिपै गिरि परे ॥

असुर पराक्रम निरखि इन्द्रने गदा चलाई ।
 तुरत वृत्रने छीनि इन्द्र गजमाँहिं धुमाई ॥
 ऐरावत सिर लगी फट्यो मुँह अति घबरायो ।
 तिलमिलायकें हट्यो बहुत सो रुधिर बहायो ॥
 व्याकुल सुरपतिकुँ लख्यो, पुनि प्रहार कीयो नहीं ।
 सम्हरि समर सम्मुख भयो, वृत्र बात कड़वी कहीं ॥

वृत्र कहे—रे इन्द्र ! ब्रह्महत्यारे ! पापी ।
 अबई मारूँ तोइ असुरकुलके सन्तापी ॥
 अथवा मैं ई दिव्य अस्त्रतें यदि मर जाऊँ ।
 तो हरि सुमिरन करत मोक्ष पदवीकुँ पाऊँ ॥
 भक्तशिरोमणि असुरवर, ध्यान मग्न यों कहि भये ।
 श्रीहरिने तब वृत्रकुँ, समरमाँहिं दरशन दये ॥

करि हरि दरशन वृत्रै विनययुत बोल्यो बानी ।
 दीन्है दरशन देव जानि सेवक अज्ञानी ॥
 तब दासनिको दास दयानिधि पुनि पुनि होऊँ ।
 चिंतन चित नित करे, गुणनिको तब हित रोऊँ ॥
 करें काज कैकर्य कर, गुन गावै बानी सतत ।
 जो कछु होवै देहतें, सो तुम्हरी सेवा निमित्त ॥

नहीं चाह है स्वरग ब्रह्मपद हू नहिं चाहूँ ।
 भूमि रसातल राज न चाहूँ ऋषि बनि जाऊँ ॥
 नहीं सिद्धि सब पाइ सिद्ध बनि जगत लुभाऊँ ।
 बाञ्छा चितमहँ नहीं मुक्तिकी पदवी पाऊँ ॥
 है मेरे मन लालसा, चरन कमल चितमहँ धरूँ ।
 सेवक बनिकें सदाई, नित सेवा तुम्हरी करूँ ॥

हरितें हेतु हटाय विषय जगमाँहिं फँसावें ।
 हरि बिनु जगके भोग मोह तनिकहु नहिं भावें ॥
 मूरति मनमहँ मधुर मचलि माधवकी जावै ।
 रसना निसिदिन सुखदगीत गोविंदके गावै ॥
 दयासिन्धु द्वारे खड़ो, दरस दासकूँ दीजियो ।
 कलपूँ कबतें कृपानिधि, कृष्ण ! कृपा अब कीजियो ॥

कैसे चाहूँ तुम्हें जगत उपमा कहूँ पाऊँ ।
 तोऊ हियकी बिरह चाह सरवेश ! सुनाऊँ ॥
 लग शावक बिनुपंख मातुकूँ जैसे चाहें ।
 भूखे बछरा मातु दूधहित ज्यों डकराहें ॥
 भये प्रवासी प्राणपति, नित्य निहारें नारि ज्यों ।
 जीवनघन ! उतसुक बन्यों, भाँकी चाहूँ नाथ त्यों ॥

प्रिय आवनके दिवस प्रिया ज्यों ब्याकुल होवै ।
 आशातें है मुदित निराशातें पुनि रोवै ॥
 पुनि पुनि देखै द्वार अटा चढ़ि पीव निहारे ।
 कबहुँ निहारे शकुन कबहुँ कछु बस्तु सम्हारे ॥
 छिन-छिन पल-पल निमिषमहँ, ज्यों प्रियतम सुमिरन करे ।
 त्यों हरि तुम्हरे नेहमहँ, नीरस हिय मेरो भरे ॥

घन, जन, वैभव, स्वरग, ब्रह्मपद मुक्ति न चाहूँ ।
 भ्रमत जगतमहँ जनम ग्रहण करि यदि पुनि आऊँ ॥
 तौ मेरी है साध नाथ ! तुम पूरी कीजौ ।
 विषयिनिको नहीं संग होय हरि यह बर दीजौ ॥
 सुत कलत्र घन घाममहँ, जिनको मन आसक्त अति ।
 कबहूँ मोकूँ भूलि प्रभु, तिनको दैयो संग मति ॥

सदा साधुको संग होहि मन अनत न जावै ।
 कान कृष्ण की कथा सुनें रसना हरि गावै ॥
 साधुनिमें ई रहूँ सीथ परसादी पाऊँ ।
 पादोदक सिर धारि प्रेमतेँ चरन दबाऊँ ॥
 प्रभु पूजामहँ निरत जे, कथा कीरतन करहिं नित ।
 तिन हरिभक्तनिके चरन, महँ मेरो अति रमे चित ॥

इस्तुति करिके वृत्र उठ्यो सुरपतिपै धायौ ।
 गर्जन तर्जन करी फेंकि तिरसूल चलायौ ॥
 इन्द्र न बिचलित भये बाहु निज रिपु की काटी ।
 मार्यो अरिने परिघ इन्द्रको ठोड़ी फाटी ॥
 बज्र हाथतेँ गिरि पर्यो, सुरपति लज्जित है रहे ।
 नहीं उठायो शस्त्र जत्र, वृत्र वचन तब प्रिय कहे ॥

इन्द्र ! करो मत सोच वज्रहूँ फेरि उठाओ ।
 सदा कौनकी भई विजय यह मोड़ बताओ ॥
 यश अग्यश, जय अजय, दुःख सुख रहें संगमहँ ।
 रोग शोक भय हर्ष होहि नहीं कवन अङ्गमहँ ॥
 युद्ध द्यूतक्रीड़ा सरिस, दोउनिमहँ को कब थके ।
 जय होवे या पराजय, निश्चय कोउ न कहि सके ॥

सुनी भक्तिमय मधुर वृत्रकी सुरपति बानी ।
 बोले आदर सहित—अहो दानव ! तुम ज्ञानी ॥
 सब जीवनिक्कूँ विश्वमोहिनी मोहै माया ।
 असुर होहि अस कृष्ण करो कस तुमपर दाया ॥
 तुम विजयी हौं पराजित, तोऊ सम्मुख लख्खो ।
 छुद्र स्वरग सुखके निमित्त, समर असुर बर करुखो ॥

तुम कृतार्थ है गये भक्ति भगवतकी पाई ।
 परउपकारक असुर ज्ञान दै करो भलाई ॥
 हम तो भैया ! विषय भागमहँ सदा निरत हैं ।
 इन्द्रासनके हेतु करें हम यतन सतत हैं ॥
 प्रभु पदपद्मनिमहँ परे, विजय पराजय सम तुम्हें ।
 धरम युद्ध कर्तव्यहित, करनो चाहिये अब हमें ॥

यों कहि दोऊ भिरे परिघ अरु बज्र घुमावें ।
 क्रोधित हैकें फिरें परस्पर शस्त्र चलावें ॥
 वृत्र चलाई शक्ति बीच महँ सुरपति डाटी ।
 मार्यो तकिक्कें बज्र बाहु दूसरिहू काटी ॥
 असुर भुजा दोऊ कटीं, परव्रत सम घूमत फिरत ।
 भीषन मुखकूँ फारिकें, इन्द्र ओर दौर्यो तुरत ॥

ऐरावतके सहित लोलि लीन्हे सुरपति जब ।
 असुर उदरमहँ इन्द्र गये सुर दुखित भये सब ॥
 नारायन शुभ कवच अमरपति कीयो धारन ।
 बाल न बाँको भयो, नाम श्रीहरिके कारण ॥
 वृत्रासुरके पेटकूँ, फारि इन्द्र बाहर भये ।
 नारायन महिमा लखी, सुर मुनि बिस्मित है गये ॥

आये बाहर इन्द्र असुरके सिरकूँ काटें ।
 बज्र वेगतें घिसें असुरको अस्थि न फाटें ॥
 सबरो शक्ति लगाय कर्यो धर सिरतें न्यारो ।
 एक बरष यों लग्यो मर्यो पुनि वृत्र बिचारो ॥
 मुनि दधीचिकी अस्थितें, बज्र बन्यो सुररिपु मर्यो ।
 अब चरित्र अगिलो सुनो, जो दधीचि पत्नी कर्यो ॥

लै दधीचिकी अस्थि गये सुर अति हरषाई ।
 उत मुनि पत्नी न्हाइ धोइ आश्रममहँ आई ॥
 सब मुनि काट्यो पेट पुत्र तजि सती भई पुनि ।
 पीपला पाले पुत्र भये ते पिप्पलाद मुनि ॥
 पिप्पलाद मुनि सुरनिपै, कोप शंभुवरतें कियो ।
 सुरनि शरन शिवकी लई, रुद्र शान्त मुनि करि दियो ॥

इति श्रीभागवत चरितके तृतीयाहमें वृत्र-चरित नामक
 ग्यारहवाँ अध्याय समाप्त ।

(मासिक पारायण बारहवें दिवसका विश्राम)



अथ द्वादशोऽध्यायः

[१२]

त्वष्टा दूसर तनय वृत्र यों मार्यो सुरपति ।
 वृत्रासुरके मरत भये मुनि देव सुखी अति ॥
 मार्यो ब्राह्मण पुत्र ब्रह्महत्या पुनि आई ।
 चाण्डालिनि अति मलिन इन्द्र के ऊपर धाई ॥
 डरे इन्द्र तहँतें भगे, अति व्याकुल मनमहँ भये ।
 मिली शरन जब कहूँ नहिँ, मानस सरमहँ घुसि गये ॥

कमलनालमहँ रहें ब्रह्महत्यारे शचिपति ।
 मिलै न तहँ आहार भई सुरपतिकी दुरगति ॥
 स्वरग इन्द्र विनु भयो नहुष सुरइन्द्र बनाये ।
 पाइ स्वर्ग सम्पत्ति मनुज भूपति बौराये ॥
 इन्द्रानीतें कहें नृप, पौलोमी अब हठ तजो ।
 मैं शासक हूँ स्वरगपति, इन्द्र मानि मोकूँ भजो ॥

नये इन्द्रकी बात शची मुनि अति घबराई ।
 चिन्तित व्याकुल दुखी डरी सुरगुरु दिँग आई ॥
 गुरु प्रसन्न है युक्ति अनौखी ताहि बताई ।
 शमी त्रिषयासक्त नृपतिपै बात पठाई ॥
 ऋषि कंघनि शिविका धरें, चढ़ि मम दिँग आवें अवसि ।
 तो निज पतिके ई सरिस, बरन करूँ तिनकूँ हरषि ॥

दोहा—सुनि संदेशो शचीको, ऋषि मुनि लिये बुलाय ।
 कहन लग्यो अति मुदित है, शिविका चलो उठाय ॥
 छप्पय—चढ्यो पालको नहुष सहस मुनि ताहि उठावें ।
 सर्प सर्प नृप कहे अनसुनी ऋषि करि जावें ॥
 अति जव करिबे लग्यो कोप कुम्भज मुनि कीन्हों ।
 दुष्ट होइ तू सर्प शाप मुनिवरनें दीन्हों ॥
 चट्ट पट्ट अजगर भयो, ओषे मुखतें गिरि पर्यो ।
 तुरत पापको फल चख्यो, इन्द्राणी प्रति जस कर्यो ॥
 भयो पापको अंत गये सब मिलिकें ऋषि मुनि ।
 देवराजकुं लाइ करायौ अश्वमेध पुनि ॥
 ज्यों कुहरा नसि जाय उदित दिनके हैवेतें ।
 पाप पुञ्ज त्यों नसैं नाम हरिको लैवेतें ॥
 इन्द्र नाकपति पुनि भये, त्रिभुवन अति हरषित भयो ।
 यों दधीचिको त्याग अरु, वृत्रासुरको बध कह्यो ॥
 यह पवित्र अति चरित सुखद शिचाप्रद भारी ।
 पढ़ें मुनें नर नारि होहिं ते अवसि सुखारी ॥
 मुनि दधीचिको त्याग वृत्रकी भक्ति अनूठी ।
 ये ही द्वै हैं सार और जग चरचा झूठी ॥
 शौनक बोले—सूत ! कस, वृत्र असुर देही लही ।
 सूत कहैं—शुकने कथा, नृपति प्रश्नपै सब कही ॥
 कहैं परीक्षित—प्रभो ! वृत्र को पूर्व जनममहैं ।
 ज्यों दृढ़ हरि पद भक्ति रख्यो ज्यों अटल धरममहैं ॥
 शुक बोले—सुनु भूप ! नृपति इक चित्रकेतु बर ।
 शूरसेनको ईश साधुसेवी सुठि सुन्दर ॥
 विद्या रूप उदारता, संपति सब अगनित भरी ।
 नृपकी रानी दश अयुत, हतीं कुलवतीं सुन्दरीं ॥

किन्तु न तिनके पुत्र हतीं सब बन्ध्या रानी ।
 यातें नृपके चित्त माहिँ नित रहै गलानी ॥
 सब सुख त्रिषवत लगें भार सम शासन लागत ।
 निसि दिन चिन्ता रहै भूपकुँ सोवत जागत ॥
 दान, धरम, व्रत, नियम, जप, करें पुत्रहित बहु नृपति ।
 किन्तु न संतति मुख लख्यो, तातें चिन्तित भये अति ॥

एक दिना नृप भवन अङ्गिरा मुनिवर आये ।
 करि सेवा सतकार कनक आसन बैठाये ॥
 पूछी मुनि कुशलात नृपतिकी नीति बताई ।
 पुनि पूछें—नृप ! रह्यो कमल मुख क्यों मुरझाई ॥
 चित्रकेतु बोले—त्रिमो ! कहूँ कहा प्रभु बिश हैं ।
 तप समाधि अरु योगतें, आप नाथ ! सरबज्ञ हैं ॥

निष्कलमष हैं सन्त आवरण तम नहिँ तिनकुँ ।
 भूत भविष्यत वर्तमान दीखें सब उनकुँ ॥
 बड़भागी ते गृही सन्त जिनके घर आवें ।
 करि पूजा स्वीकार त्रिष्णु-परसादी पावें ॥
 होहिँ दुरित दुख दूरि सब, करें कृपा यदि ते कहीं ।
 घटघटकी जानत सकल, अविदित तिनकुँ कछु नहीं ॥

तोऊ आज्ञा मानि दुःखको हेतु बताऊँ ।
 प्रजानाथ सम्राट जनेश्वर हौँ कहलाऊँ ॥
 सब सुख मेरे, यहाँ किन्तु सुत एक न स्वामी ।
 ताई तैं अति दुखी रहूँ सुनि अन्तरयामी ॥
 प्रभु सर्वज्ञ समर्थ हो, कृपा कृपानिधि करो तुम ।
 देउ एक सुत मनोहर, बनें लोक परलोक मम ॥

करि न सकें का संत बिष्णु हित जे व्रत धारें ।
 भाग्य अन्यथा करें रेखपै मेखहु मारें ॥
 हरि जिनके आधीन भाग्य तिनको है चैरो ।
 सन्त दरस जब भये भयो तब सब हित मेरो ॥
 सात जनम सन्तति नहीं, नारदतें बच हरि कहे ।
 सन्त कृपातें सात सुत, भक्त सेठ सो ऊ लहे ॥

चित्रकेतु मुनि विनय दया मुनिवरकुँ आई ।
 त्वष्टाके हित खीर ब्रह्मसुत सविधि बनाई ॥
 यजन करयो जो बची बड़ी महिषीकुँ दीन्हीं ।
 जाते होवै पुत्र अङ्गिरा आयसु कीन्हीं ॥
 रानी कृतद्युति मुदित अति, राजा हू हरषित भयो ।
 खाह खीर मुनिकृपातें, गर्भ नृपति पत्नी रह्यो ॥

शुक्ल पक्षको चन्द्र बदै ज्यों बदै गर्भ त्यों ।
 त्यों-त्यों आनंद बदै गर्भ दिन वीतें ज्यों-ज्यों ॥
 समय पाइकें पुत्र भयो सब लोग सिहाये ।
 राजमाँहिँ सरबत्र नगर पुर बजत बघाये ॥
 सुनत पुत्रके जन्मकुँ, अति आनन्दित नृप भये ।
 गौ, धन, बर भूषन, बसन, पुर पत्तन विप्रनि दये ॥

दिन दिन बाढ्यो नेह गोह सुत तनिक न त्यागें ।
 नहिँ औरनि घर जाइँ कृतद्युति महल बिराजें ॥
 सौतिनि मन अति डाह पुत्र नहिँ शत्रु भयो है ।
 जेवतें जनम्यो दुष्ट छीनि पति प्रेम लयो है ॥
 जा कंटककुँ काटिकें, निष्कंटक हम होहिँ कस ।
 विष दै मारौ शत्रुकुँ, सब मिलि निश्चय क्रियो अस ॥

भई सबनिकी बुद्धि भ्रष्ट ईर्ष्या मन आई ।
 सोवत शिशुकुँ एक दिवस विष दियो पिवाई ॥
 मरयो सौतिको पुत्र सबनि मन सुख अति होवै ।
 इत कृतद्युति निश्चिन्त कुमर मम सुखतें सोवै ॥
 कञ्ची नींद जगे लला, नहिं अनवन मन होहि कहिँ ।
 ममता बश अस सोचिकें, सुतहिं जगावत मातु नहिँ ॥

देर बहुत जब भई मातु मन भय अति लाग्यो ।
 नित तो सोवत नैक आजु अब तक नहिं जाग्यो ॥
 धाइ पठाई तुरत ललाकुँ लै आ प्यारी ।
 धाइ जाइ तहँ मृतक चीख सुतकुँ लखि मारी ॥
 हाय ! अभागिनि लुटि गई, हाय ! दई जिह का भई ।
 हा ! मम छौना ! लाल ! सुत ! यों कहि दासी गिरि गई ॥

दासीकुँ लखि बिकल गई तहँ भगिकें रानी ।
 मृतक बत्स लखि मातु धेनु सम गिरि डकरानी ॥
 करुना क्रंदन सुन्यो सेविका सब घबराई ।
 कपट बेदना प्रकट करत रानी सब आई ॥
 समाचार भूपति सुन्यो, हृदय बिदारक अति बिकट ।
 पहुँचे अन्तःपुर तुरत, गिरत परत सुत शव निकट ॥

फटै कृतद्युति हृदय रुदन भूपतिको सुनि सुनि ।
 अस्त व्यस्त तनु भयो भूमिपै लोटें पुनि पुनि ॥
 कज्जल कालिख मिले अश्रु मोचन करि रोवै ।
 चन्दन चर्चित पीन पयोधर सतत भिगोवै ॥
 अहो बिधाता निरदयी, तोइ दया नहिं नेकहूँ ।
 कहूँ मिलावै प्रेम तैं, बिछुरावै दुखतें कहूँ ॥

हाय कहा जिह भयो कुमरने नातो तोर्यो ।
छल करि यमपुर गयो भाग्य मेरो पुनि फोर्यो ॥
बेटा ! मोकुँ छोरि अकेलो मति तू जावै ।
दूर देशमहँ दूष तोइ को तहाँ पिआवै ॥
बेटा ! सोवत आज तो, देरी तोकुँ है गई ।
यो अतिशय सुत शोकमहँ, रानी बहु व्याकुल भई ॥

रानी राजा शोक सिन्धुमहँ डूबै पुनि पुनि ।
आये दैवे घोर अङ्गिरा अस नारद मुनि ॥
देखे वेसुधि भूप उठै नहिं विप्र उठावै ।
कहि कहि सुन्दर युक्ति उभय मुनि यो समुझावै ॥
जीव काल क्रमतेँ मिलै, समय पाय बिछुरे तुरत ।
रचि माया मायेश पुनि, बालक वत क्रीड़ा करत ॥

हैं निरोह अखिलेश अजनमा भूमा श्रीहरि ।
शिशु सम खेलै सदा योगमाया आश्रय करि ॥
रचै जीवतेँ जीव जीवतेँ पुनि मरबावै ।
कबहुँ जग करि जगें कबहुँ लय करि सो जावै ॥
नहिं त्रिकाल बाधित अजर, अमर नित्य प्रभु जगत् पति ।
तजि तिन पद भ्रम बश करहिं, अश जगतमहँ मोह रति ॥

मुनि सचेत नृप भये मुनिनि सन बोले बानी ।
को हैं दोऊ आप परम तेजस्वी शानी ॥
कहै अङ्गिरा—भूप ! अङ्गिरा मोकुँ जानों ।
ब्रह्माजीके पुत्र इन्हें नारद मुनि मानों ॥
ज्ञान देंन आये उभय, आपु शोक संतप्त हैं ।
शोमे नहिं अस मोह भ्रम, जे नर भगवत् भक्त हैं ॥
१७ फ०

को कलत्र को मित्र पुत्र को का को भाई ।
जगके सब सम्बन्ध अन्तमहैं अति दुखदाई ॥
सम्पति सब ऐश्वर्य, विषयसुख, राज, कोष, धन ।
पृथिवी, सैना, भृत्य, सुहृद, आमात्य बन्धुगन ॥
स्वप्न समान अनित्य ये, शोक, मोह, भय देहिं दुख ।
तजो द्वैत भ्रम जालकुं, तत्र पाओ नृप नित्य सुख ॥

कह्यो अंजिरा ज्ञान फेरि बोले नारद मुनि ।
देहुँ मंत्र उपनिषद ज्ञाहि नृप सावधान मुनि ॥
जगके सब सम्बन्ध संग तनके ई जावैं ।
माता पत्नी बने पिता पुनि पुत्र कहावैं ॥
यों कहि मृतक कुमारकुं, मुनि जीवित-सो करि दयो ।
दुखित भूपतें जीवने, आत्मज्ञान अति प्रिय कह्यो ॥
इति श्रीभागवत चरितके तृतीयाहमें चित्रकेतुचरित नामक
बारहवाँ अध्याय समाप्त ।

(पाक्षिक पारायण षष्ठ दिवस विश्राम)



अथ त्रयोदशोऽध्यायः

[१३]

नारद बोले—जीव ! पिता माता ये तेरे ।
 शोकाकुल अति भये पकरि पग रोवें मेरे ॥
 जीवित है कें राज्य विषय सब भोगो सुखतें ।
 अति ईं दोऊ विकल छुड़ाओ इनकूं दुखतें ॥
 सुनि हँसि बोल्यो जीव वह, काके को पितु मात हैं ।
 सब मुँह देखेके स्वजन, सुहृद बन्धु सुत तात हैं ॥

जीव नित्य अति सूक्ष्म प्रकाशक स्वयं निरंजन ।
 मायाके गुण रोपि करे योगिनि मनरंजन ॥
 मायिक गुण सम्बन्ध भयो दीखे मदमातो ।
 जब तक रहे शरीरमाँहिँ तब तक ईं नातो ॥
 अगनित योनिनिमहँ भ्रमे, काकूं निज पर कहि गने ।
 कबहूँ नर, पशु, देव बनि, पिता, पुत्र, भ्राता बने ॥

निज परतें है रहित आतमा नित्य निरंतर ।
 अक्रिय त्रिगुन बिहीन सर्वगत अजर शुद्धतर ॥
 साक्षी सर्व स्वतन्त्र दोष गुनहूतें न्यारो ।
 कर्ता भोक्ता नहीं दीपवत करहि उजारो ॥
 मृतकुमारको आतमा, यों कहि अन्तरहित भयो ।
 सुनी ज्ञानमय बात जब, तब नृपको भ्रम भगि गयो ॥

जिनि रानिनि बिष दयो तिननि हू अति दुख कीन्हों ।
 पूर्वजन्मको बैर बिमाता बनिकें । लीन्हों ॥
 मुनिके पकरे पाँइ पाप निज सत्य सुनायौ ।
 सब मुनि प्रायश्चित्त सबनितैं सविधि करायौ ॥
 हतप्रभ लज्जित नारि सब, यमुनाजीमें न्हाइकें ।
 षष्ठिताई कल्मष रहित, भई कृष्ण गुन गाइकें ॥

राजन् ! सुख दुख देख न कोई कबहुँ अकारन ।
 पूर्व बैर करि यादि करें उच्चाटन मारन ॥
 चींटी पूरब जनम माँहिं ये सबई रानी ।
 क्रीडामहँ अति उष्ण कुमरने छोड़यो पानी ॥
 उष्ण तोयके परत ई, ये सबकी सब मरि गई ।
 चित्रकेतुके भवनमहँ, ते ई सब रानी भई ॥

विष दै सुतकूँ भयी ग्लानि मन अति पछितायो ।
 मुनि चरननिमहँ जाइ सबनि निज पाप बतायौ ॥
 बालक वध अघ महा भई हतप्रभ सब रानी ।
 दुखित अङ्गिरा निकट कही सब सत्य कहानी ॥
 समुझी मुनि भवितव्यता, व्रत बताइ दीयो द्विजनि ।
 भेजीं ते यमुना निकट, प्रायश्चित्त कीन्हों सबनि ॥

रानिनि कीन्हों जाय बालहत्या नाशक व्रत ।
 नारदतैं लै मंत्र नृपति घरतैं निकसे इत ॥
 केवल जल पी रहे सात दिन मन्त्र जपत नित ।
 शोक मोह सब गयो लग्यो संकरषणमहँ चित ॥
 असन शयन तजि भूप वर, शेष चरन दर्शन निमित ।
 जगकी सुरति विसारिकें, करत रहे इस्तुति सतत ॥

संकर्षण-स्तुति

जय जय संकर्षण, सब जग कारन, करहुँ प्रनाम अनन्ता ।
 जय चतुरव्यूह वर, भवभय दुखहर, ज्ञान रूप भगवन्ता ॥
 नहिं द्वैत दृष्टि तब, ब्रह्मरूप सब, प्रणतपाल निरद्वन्दा ।
 मन इन्द्रिय स्वामी, अन्तरयामी, जयति सन्निधानंदा ॥
 मन बानी जावैं, अन्त न पावैं, लौटैं बिनु ही पावैं ।
 नहिं नाम न रूपा, सत्य स्वरूपा, तिनि चरननि सिर नावैं ॥
 जिनितैं जग उपजै, नित नित विकसै, जो संहारैं अन्ता ।
 जग ओत प्रोत हैं, शक्ति-स्रोत हैं, तिनि प्रनमें भगवन्ता ॥
 जो गगन सरिस प्रभु, व्यापि रहे विभु, मन बुधि करन न पावैं ।
 नहिं प्रानहु परसैं, चहु न दरसैं, शेष चरन सिर नावैं ॥
 जय नमो नमस्ते, नमो भगवते, महापुरुष जय देवा ।
 जिन चरन कमलवर, सेवित सुखकर, करहिं असुर सुर सेवा ॥
 जय जय धरनीधर, जय विश्वम्भर, पाँइ न सुर मुनि अन्ता ।
 तब चरन मृदुलतर, सुखकर अघहर, नित नित सेवहिं सन्ता ॥
 जय जय संकर्षण, सब जग कारन, करहुँ प्रनाम अनन्ता ।
 जय चतुरव्यूहवर, भवभय दुखहर, ज्ञान रूप भगवन्ता ॥


छप्पय—चित्रकेतुको चित्त चरन संकर्षण लाग्यो ।
 अव्याहत गति भई आवरण तम को त्याग्यो ॥
 सात दिवसमहैं सिद्ध भये संशय सब भागे ।
 कर्यो निरन्तर जाप भाग भूपतिके जागे ॥
 विद्याधरपति है गये, मनुज देह ही तैं नृपति ।
 पहुँचे संकर्षण, निकट, बड़ी योगतैं विपुलगति ॥

कनकमुकुटमणिजटितफणनिपै चहुँदिशि चमकें।
 गौर बरनपै परम रम्य नीलाम्बर दमकें ॥
 कंकणादि कटिसूत्र सबनितें शोभा अद्भुत।
 सुधापानतें अरुन नयन अति ई आभायुत ॥
 श्रीअनंत दरशन करत, बढी हृदयमहँ भक्ति अति।
 गद्गद वानीतें विनय, प्रेम सहित कीन्हीं नृपति ॥


समदरशी जय अजित ! दयासागर ! सुरपूजित।
 उत्पति यिति अरु प्रलय करौ लीलातें नितनित ॥
 आदि मध्य अरु अन्तमाँहिं तुम ही संकरषन।
 सब कछु पायौ तिननि भये जिनकूँ तव दरशन ॥
 स्वयं तेज ज्ञानाग्नि तुम, करहु वासना भस्म सब।
 कैसे अङ्कुर बीजमहँ, उठै फेरि जरि जाय जब ॥

तुमने दीयो देव भागवत ज्ञान मुनिनिक्कूँ।
 करि लीये सुर असुर ब्रह्मसुत शिष्य सबनिक्कूँ ॥
 दिव्य भागवत धरम मोह ममता सब नाशै।
 करै अविद्या नाश भक्त हिय ज्ञान प्रकाशै ॥
 कर्यो भागवत धरम को, नाथ ! निरूपन अति सुखद।
 होवै समदरशीपनों, सब जीवनिक्कूँ लाभप्रद ॥

मङ्गलमय अति मधुर नाम जे जन उच्चारै।
 होहिं श्वपच अति पतित तुरत तव धाम सिधारै ॥
 जगत प्रकाशक, सत्य परमगुरु नित्य निरञ्जन।
 प्रेरक, प्रभु, परमेश, करें पद पदुमनि वन्दन ॥
 भूमण्डलकूँ शीश पै, सरसों सम धारन करै।
 सहस्रबदन तिन शेषके, पुनि पुनि हम चरननि परै ॥



हिरण्यकशिपु और प्रह्लाद पृ० २८०



चित्रकेतु का शिवजी पर आरोप पृ० २६३

चित्रकेतुको विनय पाठ मुनि शेष सिंहाये ।
तत्त्वज्ञान मय गूढ़ बचन हितकर समुक्ताये ॥
दुर्लभ है नरदेह भाग्यते कोई पावें ।
पाइ करें नहिं भक्ति अन्तमहँ ते पछितावें ॥
ज्ञान दयो श्रीशेषने, भक्तप्रवर भूपति भये ।
पुनि करि सेवक श्रम सफल, अन्तरहित हरि ह्वै गये ॥

हरि अन्तरहित भये रहे विद्याधर विस्मित ।
भौचक्के से होइ निहारें पुनि पुनि उत इत ॥
करि घरनीघर दरश मनोरथ सफल भये सब ।
मिथ्यो सकल संताप कृतारथ भये भूप अब ॥
संकरषन जिहि दिशामहँ, दै सिख अन्तरहित भये ।
करि प्रनाम तिहि दिशाकूँ, चढ़ि बिमानमें उड़ि गये ॥

अष्ट सिद्धि नव निद्धि नृपतिके निकट बिराजें ।
विद्याधरपति भये तेजमहँ रवि सम आजें ॥
एक दिना कैलास गये शिव शिवा संग महँ ।
बैठे लैकें अङ्ग मिलायें अङ्ग अङ्ग महँ ॥
हस्यो देखि शिवसन कहे, बचन कठिन अति व्यङ्गते ।
तजि लज्जा लिपटे रहैं, शम्भु शिवाके अङ्गते ॥

खिलखिलाय हर हँसे नृपतिके व्यङ्ग बचन मुनि ।
निरखि शम्भु रुख मौन रहे सुर असुर देव मुनि ॥
किन्तु सहन नहिं भये कुपति अति भई भवानी ।
जान्यो यह है धृष्ट नीच अतिशय अभिमानी ॥
रोष सहित बोलीं शिवा, हमरे गुरु आए नये ।
ब्रह्मा, हरि, नारद, कपिल, ये सब तो बूढ़े भये ॥

ब्रह्मादिक नित लखें नहीं बरजें श्रीशिवकूँ ।
 आये ये आचार्य धर्म समुक्तावन हमकूँ ॥
 ऋषि मुनि साधक सिद्ध आइ हर पद सिरनावें ।
 विद्याधर ये तिन्हें नियम आचार सिखावें ॥
 अपराधी बाचाल अति, मानी परम अशिष्ट है ।
 जाते जिह क्षत्रिय अधम, दण्डनीय अति दुष्ट है ॥

यों कहि दीयो शाप शिवाने शिद्धाके हित ।
 अधम आसुरी योनि पाइ फल भोगे परिमित ॥
 करै न शिव अपराध अधिक अपमान कहीं तू ।
 त्रिष्णु चरणकी शुद्ध दासता योग नहीं तू ॥
 शोक मोह नहिं कछु भयो, शम्भु-प्रियाको शाप सुनि ।
 बचन सती सन यह कह्यो, चित्रकेतु पद बन्दि पुनि ॥

मातु तुम्हारो शाप हरषयुत ग्रहण करूँ मैं ।
 परम अनुग्रह मानि शीश निज जननि ! धरूँ मैं ॥
 शाप अनुग्रह देव नहीं स्वेच्छातें देवें ।
 करे पूर्ब जस कर्म उनहिंकूँ सब जन लेवें ॥
 चक्र सरिस संसारमहँ, सुख दुख आवत भाग्य बश ।
 शाप अनुग्रहके निमित्त, करम करै नर है अवश ॥

शाप अनुग्रह करहु विनय यहि हेतु करौं नहि ।
 होहि भोग को नाश भाग्य बश दुःख आदि सहि ॥
 अविनय मेरी समुक्ति मातु तुम कुपित भई अति ।
 तातें विनती करौं और कछु तुम समुक्तो मति ॥
 सती शम्भु पद बंदिकें, चित्रकेतु पुनि चलि दये ।
 सती सभासद सभाके, समता लखि बिस्मित भये ॥

हर हँसि बोले—शिवा ! लखी महिमा भक्तिनिकी ।
 सदा एक मति रहै स्वरग नरकनिमहँ इनकी ॥
 जो हैं भगवतभक्त कहो तिनकुँ का को भय ।
 तीनि कालमहँ सदा निहारें जगकुँ प्रभुमय ॥
 देख न सुख दुख दूसरो, भ्रम बश नरपशु कहत हैं ।
 मायाके बश जीवने, करे करम सो सहत हैं ॥

भक्तनिके जो दास दोष देखें नहिं जनके ।
 अनुचित यदि कछु करें करम निन्दें नहिं उनके ॥
 ऋषि मुनि सुर नर चरनकमल पूजें नित जिनके ।
 मेरे हू जो इष्ट नृपति अनुगत हैं तिनके ॥
 गत बिस्मय है नृप गये, घोर शाप दीयो इन्हें ।
 जे अच्युतप्रिय भक्त हैं, नहिँ अशक्य है कछु तिन्हें ॥

यों महिमा गिरिजेश विष्णु भक्तनिकी गाई ।
 सुनि अति सहमी शिवा चित्तमहँ समता आई ॥
 बोले शुक—अभिमन्युतनय ! तब ई त्वष्टा मुनि ।
 क्यो इन्द्रपै कोप मरण सुत विश्वरूप मुनि ॥
 चित्रकेतु वे ई नृपति, असुर योनिकुँ पाइकें ।
 भये प्रकट दक्षिण अनल, तें मुनि मखमहँ आइकें ॥

जे पबित्र यह चरित बृत्रको सुनें सुनावें ।
 बड़भागी ते मनुज परमपद निश्चय पावें ॥
 कहें उत्तरातनय—अदितिके शेष वंशकुँ ।
 प्रभो ! सुनावें अवसि कथाके बचे अंशकुँ ॥
 शुक बोले—सविता बरुण, मित्र विधाता उरुक्रम ।
 धाता भगके वंशकुँ, कहूँ सुनेतें भजें भ्रम ॥

इति श्रीभागवत चरितके तृतीयाहमें बृत्रासुर पूर्वजन्मवृत्त
 नामक तेरहवाँ अध्याय समाप्त ।

अथ चतुर्दशोऽध्यायः

[१४]

सविता पत्नी पृश्नि जने तिनि सत्र यज्ञादिक ।
 भगकी पत्नी सिद्धि जने सुत तीनि सुता इक ॥
 धाता पत्नी कुहू सिनीवाली राका अरु ।
 अनुमति चौथी पत्नि भये सुत सबके सुन्दरु ॥
 सायं प्रातः दर्श अरु, पूर्णमास सुत अति बिमल ।
 क्रिया बिघाताकी बहू, जने पुरीष्यादिक अनल ॥

वरुण चर्षणीमाँहिं भये भृगु मुनि पुनि तिनतैं ।
 सुत वसिष्ठ बाल्मीक आगस्त्यु जनमे इनतैं ॥
 मित्र रेवती नारिमाँहिं सुत तीनि भये बर ।
 इन्द्र शचीतैं ऋषभ जने मीढुस जयन्त सुर ।
 बामन पत्नी कीर्तिने, बृहच्छोक शुभ सुत जने ।
 श्रीउपेन्द्र बलि यज्ञमें, छोटे-से बौना बने ॥

हिरनकशिपु हिरनाक्ष भये दितिसुत खल भारी ।
 हिरनकशिपुकी बहू कयाधू अति पतिप्यारी ॥
 अनुहाद, संह्राद, हाद, प्रहाद जने सुत ।
 सुता सिंहिका भई जासु सुत भयो बिप्रचित ॥
 जन्यो पंचजन असुरकुँ, कृतितैं सुत संह्रादने ।
 इल्वल बातापी जने, धमनि पत्नितैं हादने ॥

अनुहादकी नारि भई सूर्या सुकुमारी ।
 तार्ते द्वै सुत भये बली सुररिपु अतिभारी ॥
 प्रथम बाष्कल भयो द्वितिय महिषासुर मानी ।
 चढ्यो स्वर्गपै बली भगे सुर तजि रजधानी ॥
 स्वर्ग छोड़ि सुर भगि गये, महिषासुर सुरपति भयो ।
 दुखित पराजित सुरनि मिलि, वृत्त जाय त्रिधि सन कह्यो ।

महिषासुरकी सुनी बात त्रिधि हू घबराये ।
 लैकेँ देवनि संग सुरत श्रीहरि दिँग आये ॥
 सम्मति करिकेँ तेज निकार्यो सबने निज निज ।
 दुर्गा देवी भई शक्ति दश दश धारें भुज ॥
 गजों तजों चंडिका आयुध लै रिपु दिँग गई ।
 महिषासुरकूँ मारिकेँ, जगत माँहिँ पूजित भई ॥

दुर्गा देवी दया करहु दुख दुरित नसाओ ।
 शक्तिहीन संतान परी माँ ! आय जगाओ ॥
 भये भवानी भीत आय भय भूत भगाओ ।
 खड्ग हाथमहँ देहु युद्धको पाठ पढ़ाओ ॥
 कलि कराख कलुषित करहि, करि कल्याण कपर्दिनी ।
 मेरो ममता मोहकूँ, महिषासुर मदमर्दिनी ॥

हिरनकशिपु लघु पुत्र भये दैत्यनि कुलभूषण ।
 भक्त मुकुट प्रह्लाद भये तिनि पुत्र बिरोचन ॥
 तिनि सुत दानी परम भये बलि जग बिख्याता ।
 जिनने कीये विष्णु द्वाररक्षक पुराताता ॥
 बलि असनामहँ जने सुत, शत सबके सब श्रेष्ठ हैं ।
 तिन सबमहँ शिवभक्त अति, बाणासुर ही ज्येष्ठ हैं ॥

उनंचास जे मरुत पुत्र तेऊ दितिके हैं ।
 किन्तु भये नहिं दैत्य मरुत गण सुर सब ते हैं ॥
 राजा पूछें—दैत्य देवता भये त्रिभो ! च्यों ।
 असुर भावकूँ त्यागि राग सुरपति कीयो च्यों ॥
 श्रीशुक बोले—भूपवर ! दितिके द्वै जव मरे सुत ।
 शत्रु इन्द्र बधके निमित्त, पति सेवामहँ भई रति ॥

मन्द मन्द मुसकाइ मधुर बर बोलै बैना ।
 कजरारे अनुराग नयनके छोड़े सैना ॥
 प्रतिपल पति मुख जोहि भावकूँ समुझि सयानी ।
 करै काज अनुकूल सदा ई रहै सिहानी ॥
 त्रिया चरित समुझ्यो नहीं, मुनि मोहित-से है गये ।
 सुठि स्वभाव सेवा निरखि, अति प्रसन्न दितिपै भये ॥

बोले दितितें—प्रिये ! माँगु बर इच्छित मोतें ।
 तव सेवा लखि तुष्ट भयो भामिनि हों तोतें ॥
 हैं प्राननितें अधिक पियारे निजपति जिनिक्कूँ ।
 तब जगमहँ फिरि कौन वस्तु है दुरलभ तिनिकूँ ॥
 माँगै बर हिय बज्र करि, दिति लखि पति अति प्रीतियुत ।
 जो मारे देवेन्द्रकूँ, अमर एक अस देहिं सुत ॥

दितिके बरकूँ सुनत भये व्याकुल कश्यप मुनि ।
 हाय कहा हों कर्यो भयो परवश सोचें पुनि ॥
 नारिचरित अतिप्रबल वयन सर बड़े कँटीले ।
 कमल कुसुमके सरिस मधुर मुख बैन रसीले ॥
 लुर धाराके सरिस हिय, जो चाहैं जे करि सकें ।
 क्रुद्ध भये पति पुत्रके, प्राननिकूँ हू हरि सकें ॥


सोचि कहैं—व्रत एक बताऊँ तोइ पुंसवन ।
 करै ताहि निरविघ्न होहि इच्छित सुत शोभन ॥
 होहि तनिक हू छिद्र फेरि सुत सुरप्रिय होवै ।
 यदि हैकै अपवित्र जूठ मुखतैं तू सोवै ॥
 सदाचार पालन करै, कदाचारकूँ त्यागिकैं ।
 व्रत वैष्णव यदि वर्ष भर, करै समयपै जागिकैं ॥

यो कहि बिधिके सहित बतायो मुनिवरने व्रता
 धार्यो दितिने तुरत लगायो निज हितमहँ चित ॥
 मौसीको संकल्प जानि सुरपति घबराये,
 परे सोचमें अधिक तुरत तिहि आश्रम आये ॥
 छिद्रान्वेषणके निमित्त, बेष बदलि बालक बने
 करें टहल नित कपटतैं, सदा रहैं चित अनमने ॥

लावैं नित प्रति फूल, मूल, जल, फल अरु अङ्कुर ।
 छिद्रान्वेषो बने रहैं सेवामहँ तत्पर ॥
 बिनु पग धोये सौंभ समय सोई इकदिन दिति ।
 व्रतको छिद्र निहारि उदरमहँ प्रविशे सुरपति ॥
 करे बज्रतैं गर्भके, सात खंड पुनि रुदन सुनि ।
 मा रुद कहि मारुत् भये, एक एकके सात पुनि ॥

उनंचास सुत भये इन्द्र प्रकटे सुरपालक ।
 दिति पूछै—व्रत कर्यो एक हित न्यौँ बहु बालक ॥
 इन्द्र आदितैं अन्त सत्य सब वृत्त बतायो ।
 छद्म वेष न्यौँ धर्यो बिना छल कहि समुभायो ॥
 सुनि दिति अति सन्तुष्ट है, बोलौँ काट्यो गर्भकूँ ।
 होहि बन्धु तब मरुद्गण, सब जाओ मिलि स्वर्गकूँ ॥

दिति आयसु सिर धारि मरुद्गण स्वर्ग सिधाये ।
 इन्द्र भये अतिमुदित प्राण फिरितें जनु पाये ॥
 यों दितिके ये पुत्र इन्द्र पार्षद कहलाये ।
 मातृ दोषकूँ त्यागि असुरकुलतें बिलगाये ॥
 परम पुण्यप्रद मरुद्गन, को चरित्र तुमतें कह्यो ।
 अन्य प्रश्न पूछो नृपति ! यह प्रसंग पूरन भयो ॥
 इति श्रीभागवत चरितके तृतीयाहमें मरुत् चरित नामक
 चौदहवाँ अध्याय समाप्त ।



अथ पञ्चदशोऽध्यायः

[१५]

अब पूछें पुनि नृपति—प्रभो ! शंका इक भारी ।
 समदरसी भगवान सुहृद सबके सुखकारी ॥
 तब च्यों देवनि हेतु फेरि दैत्यनिकूँ मारें ।
 च्यों अमरनिको पक्ष लेहिँ असुरनि संहारे ॥
 नारायन के गुननि प्रति, शंका मो मनमहँ भई ।
 ताहि नाश भगवन् ! करें, बात हिये की कहि दर्ई ॥

हँसि बोले शुकदेव—करी शङ्का नृप सुन्दर ।
 यह सब माया रचै प्रकृतिपालक विश्वम्भर ॥
 आत्मा निरगुन नित्य प्रकृतिके ये तीनिहु गुन ।
 कबहुँ सत्त्व बढ़ि जाय कबहुँ तम कबहुँ रजोगुन ॥
 जब जैसे गुन बढ़त हैं, हरि तब तैसोई करहिं ।
 सत्त्व वृद्धिके समयमहँ, असुर मारि सुर दुख हरहिं ॥

राजसूयके समय युधिष्ठिर नारदमुनि सन ।
 पूछ्यो विस्मय सहित प्रश्न नृप जिही बिलक्षण ॥
 सदा करै शिशुपाल कृष्णकी निन्दा पापी ।
 मुक्त भयो च्यों दुष्ट अधम भक्तनि संतापी ॥
 धर्मराजकी बात सुनि, नृप सन मुनि बोले बचन ।
 निरभिमान हरिमहँ नहीं, राग द्वेष निन्दा स्तवन ॥

जाकूँ है अभिमान देहको अतिशय भारी ।
 मैं अतिसुन्दर सुघर सुन्दरी मेरी नारी ॥
 पाप पुण्य जे करें कर्मवश सुख दुख पावें ।
 जिनमहँ नहिँ अभिमान द्वन्द्वतिनि ढिँगनहिँ जावें ॥
 क्रीड़ावश हरि अवतरहिँ, तिनि महिमा को कहि सकै ।
 धर्महेतु सुररिपु दलन, हिंसा तिनि कस लगि सकै ॥

कैसेहू सम्बन्ध कृष्णतें जो जुरि जावै ।
 काम, द्वेष, भय, भक्ति प्रेमवश चित फँसि जावै ॥
 तो होवै कल्याण भयो जगमहँ बहुतनिको ।
 कामभाव ब्रजवधू थापि पद पायौ हरिको ।
 भयतें मामा कंसने, यादवगण सम्बन्ध करि
 शिशुपालादिक द्वेषतें, मुक्त भये हरि हृदय धरि ॥

धर्मराज तुम धन्य घन्य तुमरे पितु माता ।
 बने सुहृद घनश्याम तुम्हारे ये भयत्राता ॥
 हरि शोभाके घाम मंगलनिके मंगल हैं ।
 उनमहँ जिनको चित फँस्यो तिनके मंगल हैं ॥
 दन्तवक्र शिशुपाल हरि, करतें मरि हरिपुर गये ।
 प्रभु पार्षद जय विजय जे, विप्र शाप बस खल भये ॥

कहें युधिष्ठिर—नाथ ! शापकी बात बताओ ।
 प्रभु पार्षद जय विजय अमुर कस भये सुनाओ ॥
 बोले नारद-प्रभो ! गये हरिपुर सनकादिक ।
 गदा बेत्र लै खड़े द्वारके दोऊ पालक ॥
 नंग घड़ंगे बाल ललि, रोके हरि दरसननितें ।
 शाप दयो सुररिपु बनौ, ये डरि बोले मुनिनि तैं ॥

बिप्र, रहै कब तलक असुर तनु समय बताओ ।
 मुनि बोले—फिरि यहाँ तीनि जनमनिमहँ आओ ॥
 हिरनकशिपु हिरनाक्ष भये ते प्रथम जनममहँ ।
 नरहरि अरु बाराह हने दोऊ तिनि रनमहँ ॥
 कुम्भकरन रावन बने, राम हाथ मारे गये ।
 न्तबक्र शिशुपाल पुनि, हरि हाथनि मरि सुर भये ॥

नारद बोले—नृपति ! चरित नरसिंह सुनाऊँ ।
 हिरनकशिपु ज्यों हन्यो भक्त महिमा अब गाऊँ ॥
 सूकर बनि लघु बन्धु हन्यो बड़ भयो दुखासी ।
 विष्णु हमारो शत्रु असुर कुलको संहारी ॥
 मारूँ पहिले विष्णुकूँ, तब देवनिक्कूँ बश करूँ ।
 करिकेँ विष्णु बिहीन जग, असुर बंशको दुख हरूँ ॥

हे शम्बर ! हे नमुचि ! शकुनि ! सब मिलिके जाओ ।
 वेद, बिप्र, गौ, यज्ञ अवनितेँ जाइ मिटाओ ॥
 यज्ञ रूप हैं विष्णु देवता यज्ञ सहारे ।
 विष्णु यज्ञ मिटि जाइँ देव का करें बिचारे ॥
 दुरबल देवनि पक्ष लै, विष्णु कपट सूअर बन्यो ।
 समदरशीने छल सहित, सुहृद सहोदर मम हन्यो ॥

अनुशासन मुनि असुर अवनिपै मिलि सब आये ।
 सब ब्रह्माश्रम धर्म यज्ञ यागादि मिटाये ॥
 भये देव अति दुखित यज्ञ आहुति बिनु पाये ।
 हिरनकशिपु इत मातृ बन्धुसुत पास बिठाये ॥
 दई सान्त्वना सबनिक्कूँ, शोकमग्न जे अति भये ।
 यह झूठो संसार सब, उदाहरन बहुतक दये ॥
 १८ फ०

देखो माता ! कौन बन्धु काको सम्बन्धी ।
 करें मृतक हित शोक प्रथा जगकी यह अन्धी ॥
 नदीधार तृन बहैं परस्परमहँ मिलि जावैं ।
 संग संग कछु चलैं फेरि इत उत बिलगावैं ॥
 आत्मा अविनाशी अमर, सदा एकरस सर्वगत ।
 मायिक गुण सम्बन्धतैं, भ्रमवश दीखे भ्रान्तवत ॥

नृप सुयज्ञ इक मर्यो युद्धमहँ शत्रु हायतैं ।
 दुःखित परिजन भये भूपकी मृत्यु बाततैं ॥
 मृतक देहकुँ घेरि बन्धु रोवैं डकरावैं ।
 छाती सबई धुनें दीन हैकैं बिललावैं ॥
 रानिनि रोवति देखिकैं, यमबालक बनिकैं गये ।
 विविध भाँतिके ज्ञानतैं, सबकुँ समुक्तावत भये ॥

बोले अपने आपु—अहो ! अद्भुत हरि माया ।
 पति है काको कौन कौन काकी है जाया ॥
 नितई देखैं मरत न सोचैं तोऊ प्राणी ।
 काल न देखैं दीन दुखी राजा अरु रानी ॥
 आयो जहँतैं जीव जिट, करै तहाँ ई गमन है ।
 स्वयं तहाँ सब जायँगे, व्यर्थ शोक दुख रुदन है ॥

शिशुपनतैं ई हमें पिता माताने त्याग्यो ।
 काई ढिँग नहिं रखै कहैं सब—बड़ो अभागो ॥
 है अनाथ बनमाँहिं फिरैं तरुतर सो जावैं ।
 भोजन हू मिलि जाय भेड़िया सिंह न खावैं ॥
 मृत्यु समय यदि निकट नहिं, रहै चाहिं बनमहँ पर्यो ।
 करें सदा पालन जिननि, गर्भमाँहिं पालन कर्यो ॥

मारज चाह्यो धृष्टबुद्धिनें चन्द्रहासकूँ ।
 बधिकन सौँप्यो त्रिविध करे उद्योग नासकूँ ॥
 किन्तु मृत्यु नहिं भई राज द्वै देशनि पायो ।
 द्वै द्वै रानी मिलीं श्वसुर हू मृतक जियायो ॥
 विष बदले विषया मिली, भिक्षुक तें राजा भयो ।
 भयो भाग्य अनुकूल जब, तब सब बानिक बनि गयो ॥

पुरुष बली नहिं होहिं दैव ई बली कहावै ।
 जैसो होनो होइ दैव तस बुद्धि बनावै ॥
 नष्ट होनको समय जासुको अवई नाई ।
 अति करिकें पुरुषार्थ सकें नहिं लोग नसाई ॥
 गिरी गैलमें बस्तु हू, ज्यों की त्यों रहि जायगी ।
 नष्ट होनको यदि समय, तौ घरमहँ नसि जायगी ॥

ब्याघ्र पकरि लै गयो हंतो इक मुनि सुत वाकूँ ।
 आयु शेष कछु हती पुत्रवत पाल्यो ताकूँ ॥
 ब्याघ्रनिमहँ ई रहै संग उनके बन जावै ।
 हाथ पैरतें चले मांस तिनिके सँग खावै ॥
 परशुराम नरशिशु निरखि, आश्रमकूँ सँग लै गये ।
 पाल्यो पुनि सुतके सरिस, अकृतवृण मुनि ते भये ॥

आत्मा है निरलेप रहै नितं पृथक देहते ।
 जैसे गोही रहै भिन्न ई सदा गेहते ॥
 जलमहँ बुदबुद होहिं नहीं ते जल कहलावै ।
 अनल एकरस रहै हार कंकण मिटि जावै ॥
 अनल काठतें अलग है, वायु देहते पृथक ज्यों ।
 है असंग नभ सर्वगत, आत्मा हू निरलेप त्यों ॥

माया वश ई कर्मबन्धमहँ फँस्यो जीव है ।
 मया बन्धन कटे जीव नहिं फेरि शीव है ॥
 मनतें मोदक खायँ मुदित होवें हरषावें ।
 सपनेमहँ धनहीन चक्रवर्ती बनि जावें ॥
 स्वप्न मनोरथ ये सबहिं, जैसे सत्यातीत हैं ।
 तैसेही जगके विषय, भ्रमवस होत प्रतीत हैं ॥

फँसी कुलिगी एक जालमहँ तजि निज सुत पति ।
 लखि कुलङ्ग निज बधू फँसी मन भयो दुखित अति ॥
 नैननि नीर बहाय कहै—कैसे जीऊँ अब ।
 प्रिया विरह अति दुसह भये असहाय पुत्र सब ॥
 देह दैवको दोष पुनि, कहै—विधाता का कर्यो ।
 व्याधा मार्यो बान तकि, लगत बान मरि गिरि पर्यो ॥

कितनो ही दुख करो भूपकुँ अब नहिं पाओ ।
 तातें तजिके शोक मोह अपने घर जाओ ॥
 सुनि बालककी बात शोक सबने तजि दीन्हों ।
 मिलि सम्बन्धी सविधि दाह नृप शवको कीन्हों ॥
 हिरनकशिपु सबतें कहे, बन्धु शत्रुकुँ मारि हम ।
 बदलौ बधको लेइंगे, तजो शोक संताप तुम ॥

दोहा—यों बहु विधि समुझाइकें, हिरनकशिपु अलि वीर ।
 भयो चुप्प दिति, आवुसुत, सबने घार्यो घीर ॥

इति श्रीभागवतचरितके तृतीयाहमें हिरनकशिपु उपदेश नामक
 पन्द्रहवाँ अध्याय समाप्त ।

अथ षोडशोऽध्यायः

[१६]

यो सत्रकूँ समुष्माइ चल्यो तपकूँ असुराधिप ।
 अजर अमर रनजयी वनन हित करै घोर तप ॥
 मन्दरगिरिकी गुहा माँहिँ एकाकी रहिकै ।
 करै तितिद्धा असुर शीत उष्णादिक सहिकै ॥
 माँस दीमकनि भलि लयो, अस्थि मात्र ई बचि गई ।
 असुर उग्र तपतैं जगत, महुँ अशान्ति अति मचि गई ॥

दौरे दौरे देव गये घाताके ढिँग सब ।
 बोले—ब्रह्मन् ! बढ्यो बबन्डर बिश्वमाँहिँ अब ॥
 असुर करै तप देव ! ब्रह्मपद चाहे लैवो ।
 ब्रह्मा बनिकैं चहे आपुकूँ बक्का दैवो ॥
 सुनि बिधि बोले—देवगन, असुर निकट हौं जाउँगो ।
 दैकैं इच्छित बर तुरंत, तपतैं ताहि हटाउँगो ॥

यो कहि ब्रह्मा गये ढेर दीमकको देख्यो ।
 तृन बाँसनितैं ढक्यो अस्थिमय सुररिपु पेख्यो ॥
 दिव्य कमण्डलु नीर झिरकि तनु सुघर बनायो ।
 बोले—बेटा ! माँगु तोहिं बर दैबे आयौ ॥
 करि पूजा बोल्यो असुर, माँगू बर ये देहिं बिशु ।
 रचे तुम्हारे जीवतैं, मृत्यु न मेरी होहि प्रसु ॥

भीतर बाहर नहीं मल्लूँ निशि तथा दिवसमहँ ।
 अस्त्र शस्त्रतें नहीं कटूँ सब हौँ मम बशमहँ ॥
 होहि न मेरी मृत्यु मनुज, मृग, नाग असुरतें ।
 नहिं नभ थलमहँ मल्लूँ होहि भय नहिं सुर नरतें ॥
 प्रभु जस जगमहँ मान्य हैं, तस मेरी हू वृद्धि हो ।
 बलमहँ तपमहँ तेजमहँ, योगिनि सम सब सिद्धि हो ॥

ब्रह्मा बोले—बत्स ! बहुत बर दुरलभ माँगें ।
 तोऊ दुंगो अवसि कर्यो प्रन तेरे आगे ॥
 बर दै अन्तरधान भये सुररिपु घर आयौ ।
 विधिबर मदमहँ मत्त, उपद्रव आइ मचायौ ॥
 सुरपुर यमपुर बरुनपुर, धनपतिपुर निज करे बश ।
 सबको स्वामी बनि गयो, फीको सब को कर्यो यश ॥

शतक्रतु दयो निकारि इन्द्र बनि सुख सब भोगै ।
 इन्द्रभवनमहँ बसै स्वर्गको। वैभव भोगै ॥
 मरकत मनिकी भूमि बनी सीढ़ी बिद्रुमकी ।
 नन्दन कानन कल्पवृक्ष बर गंध कुसुमकी ॥
 दुग्धफैल सम स्वच्छ मृदु, शैयाबर वाराङ्गना ।
 तऊ तृप्ति नहिँ असुरकी, नित नव बाढ़ै कामना ॥

सुरनर वाके उग्र दण्डतें दुखित भये जब ।
 अन्य शरन नहिँ लखी गये हरिकी शरनहिँ सब ॥
 क्षीरसिन्धु ढिँग जाय करें मिलिकें सुर तप अति ।
 जहाँ लगावैं लेट शेष शैयापै' शोपति ॥
 अन्न खायें नहिँ पियें जल, तबि निद्रा निशि दिन जगे ।
 बायु पान करि बिष्णु को, आराधन करिवे लगे ॥

कलुक कालमहँ तहाँ भई सहसा नभ बानी ।
 देव दुखित मति होहु बात मैंने सब जानी ॥
 बेद, देव, गां, बिग्र, साधु सन द्वेष करै जब ।
 मोतें बाँधै बैर असुर संहार करूँ तब ॥
 शान्त दान्त निरबैर सुत, भक्त वीर प्रह्लाद मम ।
 मारूँ तब हौं तुरत ही, देख यातना जब अवम ॥

नभबानी सुनि देव लौटि निज निज घर आये ।
 हिरनकशिपुने देव भक्त इत अधिक सताये ॥
 चौथो ताको पुत्र अवस्थामहँ छोडो अति ।
 किन्तु भक्तिमहँ श्रेष्ठ आसुरी नहिं जाको मति ॥
 विद्या, कुल, धन, रूपको, जाकें नहिं अभिमान चित ।
 सुहृद सदाचारो सरल, सब सद्गुण जामें निहित ॥

सुख दुखमहँ सम सदा सत्व स्वाभाविक जामें ।
 मिथ्या मायिक भोग होहिं अनुरक्त न तामें ॥
 तन मन इन्द्रिय प्राण रखें नित अपने बशमहँ ।
 स्वाभाविक ई प्रीति श्यामसुन्दरके यशमहँ ॥
 सतत हियेमहँ जरि रही, ज्योति प्रेमके जोगकी ।
 भक्ति भाव भावित हृदय, नहीं कामना भोगकी ॥

शत्रु मित्रको भाव कबहुँ मनमहँ नहिं आनैं ।
 जिनकी शुद्धा भक्ति निरखि सुर लोहो मानैं ॥
 सोवत जागत चलत उठत खावत अरु पीवत ।
 रहैं अनमने सबनि सिरों से दीखत ॥
 गावें नाचें प्रेमतें, हृदय सदा श्रीहरि बसैं ।
 कृष्ण भूत सिरपै चढ्यो, कबहुँ रोवें पुनि हँसैं ॥

जिनकी लखिकें भक्ति सबहिँ जन होहिँ सुखारे ।
 हिरनकशिपु हरि नाम सुनत फटकारे मारे ॥
 गुरुगृह भेजे, पढ़न पढ़ें का पढ़े पढ़ाये ।
 राजनीतिके दाव पेंच तिनि मन नहिँ भाये ॥
 पूछै इन दिन पुत्रतें, अंक लाइ पुनि चूमि मुख ।
 सुत ! प्रिय तोकुँ का लगै, कौन काजतें होहिँ सुख ॥

सुनि बोले प्रह्लाद—पिता जी ! बुरो न मानें ।
 हम तो जगमहँ भली बात जाईकुँ जानें । ।
 रहै सदा उद्विग्न चित्त घर दारा धनमहँ ।
 तातें तजिकें मोह सबनिको जावै बनमहँ ॥
 यह अपनो यह परायो, अभिनिवेश मिथ्य तजै ।
 जगकी आशा छोड़िकें, प्रेम सहित प्रभुकुँ भजै ॥

सुन हँसि बोल्यौ असुर-होहिँ भोरे बालक अति ।
 जो दें जैसी सीख होहि तैसी तिनकी मति ॥
 वेष बदलिकें बिष्णु-भक्त जाके ढिँग आवें
 कहि कहि हरिको सुयश सरल शिशुकुँ बहकावें ॥
 सेवक शासन सुनो सब, सावधान सबई रहौ ।
 बाबाजिनितें बचावें, गुरु पुत्रनितें तुम कहौ ॥

आशा सुनि प्रह्लाद तुरत गुरुगृह पहुँचाये ।
 असुर कहे जे वचन सेवकनि जाय सुनाये ॥
 पूछें सण्डामर्क कुमरतें नेह सहित अस ।
 किनके बश तू भयो भई बिपरीत बुद्धि कस ॥
 हँसि बोले—प्रह्लाद—गुरु ! कौन काहि को वश करें ।
 हरि ई सबकी बुद्धिकुँ, जत्र चाहें तब तस करें ॥

अति कोप्यो गुरुपुत्र कहे अति खल जिह बालक ।
 कुलाङ्गार दुरबुद्धि असुर कुलको संहारक ॥
 लाओ मेरो बेंत न मानें बात पिताकी ।
 हड्डी पसली तोरि उधेडूँ चमड़ी जाकी ॥
 चंदनवन यह असुर कुल, विष्णु कुल्हाड़ी सम भयो ।
 मूलोच्छेदन करम हित, बेंट सरिस जिह है रह्यो ॥

यो डराइ घमकाइ पढ़ाई राजनीति पुनि ।
 लख्यो लालकूँ चतुर गये लै दिँग भूपति पुनि ॥
 पर्यो पैरमहँ पुत्र असुरपति तुरत उठायौ ।
 सिर सूँध्यो करि प्यार प्रेमतें गोद बिठायौ ॥
 कहा श्रेष्ठ समुझ्यो तुमनि, पुनि पुनि पूछै पुत्र अब ।
 निज स्वभावतें विवश है, बोले श्रीप्रह्लाद तब ॥

श्रवन कीरतन करै विष्णु सुमिन्न, पदसेवन ।
 अर्चन, वन्दन, दास्य, सख्य अरु आत्मनिवेदन ॥
 है जिह नवधा भक्ति करे जगमें जो इनि कूँ ।
 यही बात अति श्रेष्ठ गनूँ हौँ उत्तम तिनि कूँ ॥
 सुनि खिसियानो असुर अति, गुरु पुत्रनिपै क्रोध करि ।
 डाँटि कहै—ओ अघम द्विज, गयो पुत्र कैसें बिगारि ॥

बोले गुरुके पुत्र—असुरपति कोप न कीजे ।
 देवें लखि अघ दंड बात सबरी सुनि लीजे ॥
 नहिं हम कबहूँ जाइ कृष्ण को नाम सिखायो ।
 नहीं बदलिके वेष गुप्तचर कोई आयौ ॥
 यह मति जाकी सहज है, बिना पढ़ाये कहै सब ।
 हिरनकशिपु अति क्रोध करि, बोल्यो सुतकूँ भिरकि तब ॥

च्यों रे छोरा ! बात सिखाई कौनों तोकूँ ।
 मुनि बोले प्रह्लाद—पिता ! सिखवै को मोकूँ ॥
 बिष्णु भक्ति तो नहीं सिखाये ई तें आवै ।
 सोई होवै भक्त कृष्ण जाकूँ अपनावै ॥
 तजै न जब तक छल कपट, सत्संगति नहिं नित करै ।
 पावै कस प्रभु भक्ति रज, संतचरण सिर नहिं धरै ॥

कुपित भयो अति असुर पुत्र पृथिवी पै पटक्यो ।
 गर्जन करिके उठ्यो चरै सिंहासन चटक्यो ॥
 दैत्यनितें यों कहै—दुष्टकूँ मारो मारो ।
 जीवत खाल खिंचाय चील गीधनिकूँ डारो ॥
 मुनत असुर झपटे तुरंत, वज्र हृदय बिकराल मुख ।
 छेदें अंगनि शूलतें, विविध भाँतितें देंई दुख ॥

सबरी शक्ति लगाय असुर मिलि जुलिके मारें ।
 चट्ट पट्ट मुनि सिंह व्याघ्र भयतें चिञ्चारें ॥
 फूल सरिस सब शस्त्र भये दितिमुत घबरायौ ।
 सोच्यो और उपाय मत्त गजराज मँगायौ ॥
 रुँदवाये पैरनि तरे, गज बकरी सम बनि गयौ ।
 सूँधि सूँड़ितें सिर धरे, अति सूघो हाथी भयौ ॥

पुनि बिषधर बुलबाइ कटावै सुतकूँ खलमति ।
 सरल स्याँप सब भये करें क्रीड़ा सुन्दर अति ॥
 करवायौ अभिचार मूँठ जादू टौना सब ।
 भये बिफल सब जतन भयो संकित सुररिपु तत्र ॥
 गिरवाये गिरि शिखरतें, बहुतक माया हू करी ।
 काल कोठरीमहँ दये, पैरनि हू बेड़ी भरी ॥

हालाहल बिष दयो नहीं कछु भोजन दीयो ।
 शीत-वाततें त्रास दयो जल भीतर कीयो ॥
 होरी लैकें अग्निमौहिं बैठी मारन हित ।
 भये नहीं प्रह्लाद तनिकहू प्रनतें बिचलित ॥
 सागरमें बैठाइकें, पर्वत ऊपर चुनि दये ।
 मरे नहीं निकसे तुरत, सबरे पर्वत गिरि गये ॥

कोन्हें बिबिध उपाय सफलता नहि कछु पाई ।
 मनमहँ चिन्ता करै—कलैं का अब हों भाई ॥
 कहे कठिन कटु वचन बहुत बिधितें मरवायो ।
 बार न बाँको भयो तनिकहू नहि घबरायो ॥
 अवसि शत्रुता मानिकें, विष्णु पद्म लै लखेगौ ।
 मैं चाहें मरि जाऊँ परि, जिह बालक नहिं मरेगौ ॥

चिन्ता बहुबिधि करै बुद्धिमहँ कछु नहिं आवै ।
 पुनि पुनि सम्मति हेतु पुरोहित मित्र बुलावै ॥
 ठकुरसुहाती कहें असुरकुँ देई बड़ावो ।
 ज्यों अबोध शिशु हेतु नाथ ! ऐसे घबरावो ॥
 तब सम्मुख जिहि नैक सो, छोरा कैसे लखेगो ।
 गुरु पितुको अपमान करि, बिना मौतके मरेगो ॥

बोले गुरुके पुत्र—नाथ ! मति जाकूँ मारो ।
 भयवश भागि न जाय बाँधि पाशनिर्तें डारो ॥
 आवें श्रीगुरुदेव लौटिके जब तक पुरमहँ ।
 तब तक जाकूँ रखें प्रमो ! हम अपने घरमहँ ॥
 से वा गुरुजन की करै, कछु बय हू बढ़ि जाय जब ।
 बालकपनकी बुद्धि जिह, बिना यतन हटि जाय तब ॥

बिचश भयो सुरशत्रु बांत तिनकी स्वीकारी ।
 कह्यो जाइ लै जाउ देउ शिद्धा हितकारी ॥
 संग लियो प्रह्लाद गये गुरुपुत्र भवनमहँ ।
 सुघरै कैसे बाल जिही सोचें ते मनमहँ ॥

अर्थ काम अरु नीतिको, शिद्धा दैवें जाइकें ।
 सहपाठिनि प्रह्लादजी, सिखवें अवसर पाइकें ॥

इति श्रीभागवतचरितके तृतीयाहमें प्रह्लादचरित नामक
 सोलहवाँ अध्याय समाप्त ।
 (मासिक पारायण तेरहवें दिनका विश्राम)





प्रह्लाद-जननी को नारद जी द्वारा उपदेश पृ० २८८



ग्रहणाद द्वारा रामनामोपदेश पृ० २८५

अथ सप्तदशोऽध्यायः

[१७]

दोहा—शुक्रतनय सिखवें सतत, धरम कामको सार ।

कनहुँ भक्त प्रह्लादकी, लगै भक्ति चटसार ॥

छुप्पय—एक दिना गुरु गये करन घरके काजनिक्कूँ ।

दिँग बिठाइ प्रह्लाद देहिँ शिखा छात्रनिक्कूँ ॥

है दुरलभ नरदेह नाश होवैगो जाको ।

होवै प्रभुपद प्रेम सारथक जीवन ताको ॥

सुख तो होवै दैव बश, च्यौँ जाकूँ पचि पचि मरो ।

प्रभुपद पदुमनि प्रेम हित, होवै जिह चिन्ता करो ॥

करै कवल कव काल कहो को जाने जगमहँ ।

सदा घातमहँ रहै पकरि लै जावै पलमहँ ॥

क्रीड़ामहँ कौमार व्याधिमहँ बिती बुढ़ाई ।

मादकता अँग अँग युवावस्थामहँ छाई ॥

तातैं शिशुपनतैं सतत, भूलि जगतके करमकूँ ।

करो आचरन प्रेमतैं, शुद्ध भागवत धरमकूँ ॥

नहीं कठिन बैराग्य होहि नहिं यदि द्वै जगमहँ ।

कनक कामिनी पाश न लिपटै यदि नर पगमहँ ॥

प्राननि पै ऊ खेलि करै पैदा जा धनकूँ ।

तामैं अति आसक्त हटावै कैसे मनकूँ ॥

अति प्यारी प्रियतमाकी, बानी सरस सुभसनी ।

कैसे छोड़े शिशुनिकी, तोतरि बानी सोहनी ॥

कन्या रोवति जाइ दुखित पतिग्रह सुकुमारी ।
 भोली भाली बहिन भला कस छाड़ें प्यारी ॥
 आज्ञाकारी बन्धु पुत्र सुकुमार दुलारे ।
 छोड़े कैसे जाइँ मातु पितु बृद्ध दुखारे ॥
 दुग्धफैन सम शुभ्र शुभ, शैया सुखद सुहावनी ।
 स्वेच्छातें कैसे तजै, वस्तु सरस मन भावनी ॥

कुलगत अपनी वृत्ति छोड़ि जावें कस बनमहँ ।
 हाथी, घोड़ा, गाय बसे सुठि सेवक मनमहँ ॥
 सबतें ममता जोरि मोहको जाल बनायौ ।
 पूर्यो चारिहुँ ओर जानि निज अंग फँसायौ ॥
 होहि बिरक्त न विपति सहि, सुमिरै नहिँ सर्वेश हरि ।
 पोसै निज परिवारकुँ, आयु गँवावै पाप करि ॥

भोगै ज्यों ज्यों भोग बढ़ै त्यों त्यों तृष्णा नित ।
 परधन अरु परनारिमाँहिँ नित फँस्यो रहे चित ॥
 करै पाप नित नये भूठतें द्रव्य बटोरै ।
 बन हित तनकुँ वेचि हाथ नीचनिके जोरै ॥
 पोथी पत्रा पढ़ि भये, पंडित हू विख्यात है ।
 मोह ग्रस्त है मोक्षतें, बञ्चित ते रहि जात हैं ॥

विषयिनिकुँ तजि संग शरन श्रीहरिको जाओ ।
 जगचक्ररतें छूटि मोक्ष पदबीकुँ पाओ ॥
 हरि व्यापक सर्वत्र अनत दूंदन मति जानों ।
 सब भूतनिमहँ बसैं तिनहिँ हिय ई महँ मानों ॥
 मायाके परदा पर्यो, ज्ञान रूप दोखें नहीं ।
 दरशन होवें तुरत यदि, तम आबरन हटै कहीं ॥

धरम अरथ अरु काम मोक्ष हरि भक्त न चार्ये ।
प्रभु पादोदक पान करहिं नित हरिगुन गाये ॥
ते ई करम यथार्थ कुष्णकी भक्ति ददावें ।
अन्य जगतके कर्म अधिक भवबन्ध बढ़ावें ॥
शुद्ध भागवत धर्म जिह, श्री नारद मुखतें सुन्यो ।
दैत्यपुत्र सुनि हैंसि परे, हैंसत उदर सबको फुल्यो ॥

हैंसि सब बोले—मित्र ! व्यर्थ क्यों बादर फारै ।
नारद कब कहैं मिलै, गप्प हमतें मति मारै ॥
सुनि बोले प्रह्लाद—गये पितु तप हित जबई ।
जानि सुअवसर देव चढ़े दैत्यनिपै तबई ॥
हारे असुर रख्यो तबहिं, मैं माताके उदरमहैं ।
मम जननीकुँ अमरपति, पकरि लै चलयो स्वरगमहैं ॥

नारदजी मग मिले इन्द्रकुँ बहु बिककारे ।
जानि उदरमहैं मोइ मातु तजि स्वरग सिधारे ॥
मम माताकुँ लाय रख्यो निज आश्रम मुनिवर ।
मोकुँ करि उपदेश सुनावें कथा मनोहर ॥
माँ मुनिकी सेवा करै, पायौ इच्छा प्रसववर ।
सुन्यो भागवत धर्म तहँ, उदरमाँहिं मैंने सुघर ॥

असुर तनय सब कहें—हमेंहू ताहि सुनाओ ।
बोले श्रीप्रह्लाद—सुनाऊँ इत मन लाओ ॥
जन्म वृद्धि परिणाम जीर्णता नाश तथा क्षय ।
ये सब तनमहँ होहिं आतमा नित्य अनामय ॥
कनकमाँहिं मल मिलि गयो, साधनतें नर पृथक् करि ।
त्योही आत्मा देहतें, करे पृथक् तब मिलौ हरि ॥

यह संसार असार स्वप्नवत सत्य लखावै ।
 आत्मज्ञान गुरु कृपा बिना नर कबहुँ न पावै ॥
 जाग्रत स्वप्न सुषुप्ति वृत्ति को साक्षी जो है ।
 सत् चित् आनंद रूप ब्रह्मपद आत्मा सो है ॥
 जन्म मरन चक्कर छुटे, कर्मबीज जाते नसै ।
 करै योग साधन सतत, दिव्य ज्ञान हियमें बसै ॥

आत्मा अनुभव हेतु उपाय असंख्य जगतमहँ ।
 गुरु सुश्रूषा भक्ति निरंतर संतचरनमहँ ॥
 हरि उपासना कथा कीरतनमहँ रति नित नित ।
 प्रभु प्रतिमामहँ प्रेम कृष्ण चरननि चितन चित ॥
 काम, क्रोध, मद, मोह अरु, मत्सर, लोभ विहाय सब ।
 निरखै सबमहँ श्यामकूँ, पावै प्रभुपद-प्रेम तब ॥

गोबिंदको गुरु रूप जानि श्रद्धा चित् लावै ।
 गुरु मेरे सरबस्व कबहुँ नहिं तिनहिं भुलावै ॥
 गुरुतें पहिले उठे अंतमहँ गुरुके सौवै ।
 गुरु आज्ञा का देहिँ सतत तिनको मुख जौवै ॥
 गुरु मूर्तिको ध्यान करि, गुरु चरनामृत लेइ नित ।
 गुरुहित सोंपै देहकूँ, गुरु चरननिमहँ रखइ चित ॥

गुरु सेवा जिन करी कर्यो तिन सब जगमाहीं ।
 गुरु सेवन नहिं कर्यो कर्यो तिनने कछु नाहीं ॥
 गुरुकी मूर्ति मधुरे ज्ञानकी ज्योति जगावै ।
 गुरु अनुकम्पा करै हियेको तम नसि जावै ॥
 प्रभु प्रसाद समुझै सबहिँ, कहे—नाथ ! नहिं कछु मम ।
 करि अरपन बिनली करै, हे हरि ! हियकौ हरौ तम ॥

सदा साधु सत्संग करै विषयिनितें बचिकें ।
 समुझै सरवसु साधु करै सेवा रचिपचिकें ॥
 तनतें मनतें और द्रव्यतें जथा शक्ति नित ।
 हरि उपासना करै हृदय तत्र होवै प्रमुदित ॥
 जे उपासना ईसकी, करें नहीं जगमहँ फसैं ।
 तें पामर पशु पतित नर, मरिकें नरकनिमहँ बसैं ॥

कृष्ण कथा दै चित्त प्रेमतें सुनैं सुनावैं ।
 नित नव नव अनुराग बढे कबहुँ न अघावैं ॥
 ज्यों मधुमहँ अनुरक्त रहे मधुलोलुप मधुकर ।
 त्यों ई हरि गुन गान कृष्ण कीर्तनमहँ तत्पर ॥
 कथा कीर्तन गुन श्रवन, करि करि हरि हिय महँ धरैं ।
 इत उत कबहुँ न जाय चित्त, चरन कमल चिन्तन करैं ॥

अर्चामहँ अति प्रेम नेमतें पूजैं नित हरि ।
 सबरी सेवा करें इष्टकूँ सदा हिये धरि ॥
 दिव्यदेशमहँ जायँ भक्तितें भगवत सेवैं ।
 सिर धरि हिय निरमाल्य विष्णु पादोदक लेवैं ॥
 अरचन पूजन निरखि जे, अतिशय हिये सराहिँगे ।
 ते सब पापनि ते छुटैं, कृष्णचरन रति पाइँगे ॥

इष्ट विषयकी प्रीति कहैं रति ताकूँ बुधजन ।
 जामैं नित ई फँस्यो रहे व्याकुल हैकें मन ॥
 कान मनक परि जाय नाम होवै तनु पुलकित ।
 सुमिरि सुमिरि गुन करम होहिँ अति उत्कंठित चित ॥
 है अधीर रोवैं कबहुँ, गद्गद गिरा गँभीर स्वर ।
 हँसैं कबहुँ पुनि पुनि कहैं, गिरधर नटवर ब्रजेश्वर ॥

कबहू करें विलाप ध्यानमहँ मग्न हेहिं पुनि ।
 गावैं कबहूँ गान होहिँ हरषित हरि गुन सुनि ॥
 सम्मुख देखैं जाइ पैर परि परिकैं रोवैं ।
 कबहूँ नाचैं ठुमकि कबहूँ पृथिवीपै सोवैं ॥
 लोकलाल संकोच तजि, यों तन्मय हूँकैं रहैं ।
 नारायण, हरि, जगतपति, राम, कृष्ण, वामन, कहैं ॥

लड़खड़ात मग चलैं परैं पग इत उत अनिमित ।
 चलत चलत पुनि गिरैं फिरैं उतकंठित जित तित ॥
 रहै प्रेमकी ज्योति प्रज्वलित हिये निरंतर ।
 जरैं बासना बीज दिखैं जब श्रीराधाबर ॥
 फँस्यो चित्त चितचोरकी, रूप माधुरीमें सतत ।
 जगब्रंधन कटि जात सब, होहिँ फेरि जगतैं विरत ॥

मलिन हृदय जे मनुज फँसे जग चक्करमाँहीं ।
 काटन बन्ध उपाय कृष्ण चरननि तजि नाहीं ॥
 तातैं तजि व्यौहार जगतके हरि चित धारौ ।
 ज्ञान खड्गकुँ धारि काम क्रोधादिक मारौ ॥
 जिही मुक्ति निर्वाण है, जाहि परमपदहू कहैं ।
 हृदयेश्वर हरि सर्वदा, हृदयमाँहिं दीखत रहैं ॥

धन, दारा, पशु, पुत्र अश्व, सम्पति, रथ, हाथी ।
 नाशवान सब छनिक जीवके जे नहिँ साथी ॥
 जो सबके हैं सुहृद आतमा अन्तरयामी ।
 अविनाशी अखिलेश चराचर जगके स्वामी ॥
 ते अति घाटेमें रहैं, हरि तजि विषयनिक्कूँ भजैं ।
 चाकचिक्य लखि काँच को, करगत हीराकुँ तजैं ॥

भैया ! सोचो नैंक जगतमें कितने सुख हैं ।
 गर्भवासतैं मरन काल तक दुखई दुख हैं ॥
 करिकैं नाना करम जीव पैंसि जाय जगतमहैं ।
 करै कामना सहित कर्म चित देइ न हितमहैं ॥
 देह कर्म अशिवेकतैं; होहिं तिनहैं तातैं तजौ ।
 आश्रय जिनके विश्व है, तिन सर्वेश्वरकूं भजौ ॥

नहीं नियम है जिही तिनहैं आगधैं द्विज ई ।
 होहिं असुर, विट, शूद्र, नारि चाहैं अन्त्यज ई ॥
 करिकैं भक्ति अनेक तरे नर पशु गीधादिक ।
 नहीं रिझावैं तिनहैं दान, तप, व्रत, शोचादिक ॥
 आवश्यक नहिं विपन, ऋषिनहू अरु अमरपन ।
 प्रभु प्रसन्नताके निमित, आवश्यक परि अपनपन ॥

सुखद सारको सार शास्त्र सिद्धान्त सुनाऊँ !
 मुख्य जीवको धरम कह्यो जो ताहि बताऊँ ॥
 हरिमय सबकूं जानि करौ सम्मान सबनिको ।
 विषय चिन्तना त्यागि रहे नित चिन्तन उनिको ॥
 खग, मृग, नर, सुर असुर अत्र, नाम लेत तरि जाई सब ।
 तातैं तजि मद मोह तुम, गहौ कृष्णकी शरन अत्र ॥

दोहा—सुन्दर सुखमय सरस सिख, शिशु सब सुनहि सिहायँ ।
 असुर सुनि प्रह्लादजी, भक्ति रसामृत प्यायँ ॥

इति श्रीभागवत चरितके तृतीयाहमें प्रह्लाद असुरबालक
 सम्वाद नामक सत्रहवाँ अध्याय समाप्त ।

अथ अष्टदशोऽध्यायः

[१८]


देहैं सीख प्रह्लाद अमुर सुत अति हरषावैं ।
 मानैं श्रद्धा सहित प्रेमतैं हरि गुन गावैं ॥
 आये इत गुरुपुत्र निरखिकैं अति घबराये ।
 हैकैं अति भयभीत दैत्यगतिके ढिँग आये ॥
 कहैं दीन है—प्रभो ! अब, कुमर बिगारै सबनिक्कूँ ।
 कृष्ण नाम कीर्तन करो, यों सिखवै सब शिशुनिक्कूँ ॥

सुनत दुखद संवाद दैत्यगति बहुत रिस्यान्यो ।
 भगवद् भक्त सुशील तनयक्कूँ रिपुसम मान्यो ॥
 कहै—ढीठ अति भयो म्यानतैं खड्ग निकारूँ ।
 नैक कृपा नहिँकरूँ दुष्टक्कूँ अबई मारूँ ॥
 पठये पकरन पुत्रक्कूँ, सेवक दुरतहिँ गये सब ।
 करत कीरतन सबनि सँग, आये श्रीप्रह्लाद तब ॥

मुखतैं मधुमय मधुर नाम माधवके गावत ।
 शीलवान अति सरल लख्यो इत सम्मुख आवत ॥
 किटकिटायकैं दाँत दैत्य गर्जन करि बोल्यो ।
 मानौं विषतैं भर्यो स्याँपने निज मुख खोल्यो ॥
 दुर्बिनीत कुलरिपु अधम, बोल्यो बिष उगिलत बचन ।
 बोलि बिष्णु तेरो कहाँ, पठऊँ तोक्कूँ यमसदन ॥



हिरण्यकशिपु-वध पृ० २६४



नासुह और हिरण्यकशिपु पृ० २६३

त्रिष्णु कहाँ रे ! दुष्ट, ताहि यमसदन पठाऊ ?
 यत्र तत्र सरवत्र कहाँ हौं तिन्हें बताऊँ ॥
 मो में ? हाँ, का सभामाहि ? है अत्रसि तहाँ हूँ ।
 खम्भमाँहि ? कहि दई पिताजी ! रहें वहाँ हूँ ॥
 सुनि सिंहासन तैं उठ्यो, खम्भ माहि घूँसा दयो ।
 सुरत तहाँते भयङ्कर, सिंहनाद भीषण भयो ॥

प्रकटे हुं हुं करत फिरत गर्जत अरु तर्जत ।
 बदन महा विकराल क्रोधतैं अँग अँग फरकत ॥
 सिर तो सिंह समान शेष घड़ नर सम सुन्दर ।
 लपलपात अति जीम भयङ्कर मुख जनु कन्दर ॥
 जन्तु विचित्र निहारि खल, नहीं डर्यो ठाढ़ो रख्यो ।
 हरि मायात्री है जिही, दैत्यराज हँसिकें कह्यो ॥

मायात्री तू त्रिष्णुमारिवे मोकूँ आयौ ।
 बहुरूपी सुरअधम आजु अस वेष बनायो ॥
 तकिमें मारूँ गदा धरनिपै तोइ गिराऊँ ।
 मिल्यो बहुत दिनमाँहि बन्धु ऋण आजु चुकाऊँ ॥
 यौं कहि दौर्यो गदा लै, अट्टहास नरहरि कर्यो ।
 प्रभुके बल्युत तेजमहँ, खल पतङ्ग सम गिरि पर्यो ॥

ज्यों ई दौर्यो दैत्य पकरि नरहरिने लीन्हों ।
 छुटपटाइकें यत्न निकसिवे को बहु कीन्हों ॥
 श्रीहरि लीला करी दीलि दीयो छुटि भाग्यो ।
 जानि अमुरकूँ बलो सुरनि अति विस्मय लाग्यो ॥
 हरि हाथनितैं निकसिकें, बेग सहित इत उत फिरै ।
 नीचे ऊपर उछरेकें, रन कौतुक बहुविधि करै ॥

कछुक भुलाइ खिलाइ ठठाको मारि हँसे हरि ।
 गरुड़ सरपकूँ गहै असुर त्यों पकरि लयो फिरि ॥
 छुटपटाइ अकुलाइ निकसिबेकूँ ब्याकुल अति ।
 किन्तु छूटि कस सकै जाइ कसि पकरै श्रीपति ॥
 पर्यो असुर पुनि फन्दमें, भूल्यो सब फाँद अत्र ।
 सिंहनाद हरिने कर्यो, नेत्र है गये बन्द तत्र ॥

अति विकराल कराल नयन नरहरिके चमकै ।
 गर्जन तर्जन करै केश कंधाके दमकै ॥
 लपलपाइ हरि जीभ ओठकूँ चाटै पुनि पुनि ।
 काँपै सबरे असुर भयङ्कर सिंहनाद सुनि ॥
 सभा द्वार सन्ध्या समय, जाँघनिपै धरि नखनितै ।
 फार्यो नरहरिने उदर, बच्यो नहीं विधि बरनितै ॥

फर्र फारिकें पेट सरतैं आँत निकारीं ।
 अट्टहास करि गरेमाँहिं माला समधारीं ॥
 रक्त-बिन्दुतें रँगो केश अति सुन्दर लागैं ।
 देखि भयंकर रूप असुरगन भयतैं भागैं ॥
 अस्त्र शस्त्र लै धृष्ट कछु, असुर चले रनहित तुरत ।
 नख आयुधतैं मरत कछु, गिरत बचे रन तजि भगत ॥

तितिर बितिर घन होयँ केश नरहरि फटकारैं ।
 ग्रहगन फीके परैं क्रोध करि जवहिँ निहारैं ॥
 प्रलयानल सम स्वाँस नाद सुनि सब डरि जावैं ।
 जव पटकैं प्रभु पैर असुर भयतैं मरि जावैं ॥
 सिंहासन खाली लख्यो, जाइ विराजे धम्मतैं ।
 यों सेवक हित सर्वगत, प्रगटे नरहरि खम्मतैं ॥

दो०—सिंहासन पै सिहनर, बैठे मुख बिकराल ।
नख आयुष भ्रुकुटी कुटिल, आँतनिकी गल माल ॥



इति श्रीभागवतचरितके तृतीयाहमें नृसिंहप्रादुर्भाव हिरण्य-
कशिपुवच नामक अठारहवाँ अध्याय समाप्त ।

अथ—एकोनविंशतितमोऽध्यायः

[१६]

मृतक असुरकुँ निरखि उतरि सुर नमतेँ आये ।
 नरहरि क्रोधित लखे विनययुत बचन सुनाये ॥
 विधि बोले—हे विभो ! विश्व के तुमही करता ।
 पालनहू तुम करो अंत होओ संहरता ॥
 शिव बोले—अब क्रोध को, काम कहा केशव रह्यो ।
 करहु कृपा प्रह्लाद पै, अधम असुर तो मरि गयो ॥

इन्द्र कहै—हरि हमें असुर मल भाग न दीये ।
 करवाये लघु काज सदा अपमानित कीये ॥
 करुणासिन्धु कृपालु कृपा करि सुररिपु मार्यो ।
 सुरगन अति ई दुखित दुष्ट हनि दुख सब टार्यो ॥
 ऋषि बोले—तब तप हि तनु, करै सदा परि भय भयो ।
 मैटे सब तप असुरने, तिहि हनि तर अवसर दयो ॥

अब तो क्रमतेँ करहि विनय नरहरिकी सबई ।
 ब्रह्मा, शिव, देवेन्द्र, हटे आये सुर तबई ॥
 पुनि मुनि, ऋषि, मनु, पितरं, सिद्ध, चारन, विद्याधर ।
 नाग, प्रजापति, यक्ष, भूत, बैतालहु किन्नर ॥
 आई मृदुतनु अपसरा, देव और उपदेवगन ।
 हरि पार्षद नन्दादि हू, विनय करहि भयभीत मन ॥

दूरहिँ तैं डंडौत करैं सुर पास न जावैं ।
 तू जा तू जा करैं दूरितैं सैन चलावैं ॥
 लक्ष्मी बोलैं—अबहिँ कलैं ब्रश च्यौ घबरावत ।
 करि सोलह शृंगार चलीं नूपुर खनकावत ॥
 हरि चिंघारे श्री डरीं, भगीं लौटि आईं तहीं ।
 थर थर काँपैं पुनि कहैं, जे मेरे दुलहा नहीं ॥

कमलयोगि प्रह्लाद बुलाये बोले बानी ।
 बेटा ! बिभु अति कुपित डरीं कमला पटरानी ॥
 तुम प्रभुके हो मक्त चरन दिँग उनिके जाओ ।
 करि विनती परि पैर कुपित नरहरिहिँ मनाओ ॥
 तब बोले प्रह्लाद—त्रिधि ! नरहरि दिँग हौं जाउँगो ।
 विनय करौं अतिदीन हूँ, सब त्रिधि प्रभुहिँ मनाउँगो ॥

हैं जो जगके ईश प्रनतके प्रनप्रतिपालक ।
 हौलैं हौलैं गये जोरि कर प्रभु दिँग बालक ॥
 परे दण्डवत भूमि माँहि चरननि लिपयये ।
 देखि दया बश दौरि देवने तुरत उठाये ॥
 शिशुकपोल करतैं गह्यो, पुनि पुनि मुख चुम्बन कर्यो ।
 सिर सँध्यो पुनि लाइ उर, अभयकरन सिर कर धर्यो ॥

दोहा—नरहरि कर परसत तुरत, भरत नयनतैं नीर ।
 करन लगे प्रह्लादजी, इस्तुति गिरा गँभीर ॥

प्रह्लाद-स्तुति

जब परी जनपिपै भीर तबहिँ दुख टारे ।
 हे कृपानाथ करुणेश जगत रखबारे ॥

नित सत्य प्रकृति सुर तुमहिँ रिभावैं ध्यावैं ।
 अज शिव सनकादिक पार न पावैं गावैं ॥
 हम नीच असुर अति क्रूर अधम कहलावैं ।
 क्यों करी कृपा शुभ दरशन दीये प्यारे ॥१॥ हे कृपा०

नाहँ कोई तुमकुँ तप प्रभावतैं पावैं ।
 यदि भक्त होहि तो पशुपै हू दुरि जावैं ॥
 हों भक्तहीन द्विज चहिँ तिनि मखमहँ आवैं ।
 अगगित खल श्वश्रुचहु भक्त भक्तिनैं तारे ॥२॥ हे कृपा०
 जो जैसे तुमकुँ नरहरि भगवन् ! ध्यावै ।
 वह तैसो दरशन नाथ ! तुम्हारो पावै ॥
 ज्यो दरपनमें प्रनिविग्ध स्वरूप लखावै ।
 है प्रकट खंभतैं मेंटे दुःख हमारे ॥३॥ हे कृपा०

भक्तनि हित नित नव कच्छ मच्छ वषु धारो ।
 जो शत्रु भावतैं भवैं तिनहिँ संहारो ॥
 असुरनिकुँ दैकें मुक्ति सुरनि दुख टारी ।
 जग जीवनि हित अति मधुर चरित विस्तारे ॥४॥ कृपा०

नित तुमरे चरितनि भक्त जननिमें गाऊँ ।
 तिन रूप मनोहर तुमरो नरहरि ध्याऊँ ॥
 भवन्तरनि चरन गगि नाथ ! पार है जाऊँ ।
 हैं जग जीवन अति सुखमय चरन तिहामे ॥५॥ हे कृपा०

यह जीवन जगतमें तुमकुँ तजिकें भटक्यो ।
 मायाके फन्दे फँस्यो गुननिमहँ अटक्यो ।
 चौरासी चक्कर माँहिँ अविद्या पटक्यो ।
 हो तुमही नरहरि केवल एक सहारे ॥६॥ हे कृपा०

नहिँ उत्तम मध्यम अघम बुद्धि है तुमरी ।
 है तुमकूँ सृष्टि समान चराचर सबरी ॥
 हम काल व्यालने डसे लेउ सुधि हमरी ।
 ये काम क्रोध मद लोभ मोह अहि कारे ॥३॥ हे कृपा०
 यह मन मेरो है नरहरि ! चंचल भागी ।
 नहिँ सुनै तुम्हारी कथा सकल अग्रहारी ॥
 हौं दीन हीन अति छीन गँवार मिलाारी ।
 हे नाथ ! लगाओ डूबत नाव निवारे । ८॥ हे कृपा०
 है माया अरम्भार तुम्हारी स्वामी ।
 कैसे पावैं हम तुम्हें असुर खल कामी ॥
 हो घट घट व्यापी प्रभुवर अन्तरायामी ।

निगमागम सबरे नेति नेति कहि हारे ॥९॥ हे कृपा०

हे कृपानाथ करुणेश जगत रखवारे ।
 जब परी जननिपै भीर तबहिँ दुख टारे ॥

छप्पय—बोले श्रीप्रह्लाद—कृतारथ भयो नाथ ! अब ।

परसे पावन पाद पदुम दुख दूरि भये अब ॥

किहि विधि विनती करूँ आपु हरि अन्तरायामी ।

भटकैं जगमहँ जीव उबारौ तिनकूँ स्वामी ॥

विनतीसुनि प्रह्लादकी, भये मुदित श्रीरामपति ।

मधुर बचन बोले बिहँसि, बारबार करि प्यार अति ॥

अति प्रसन्न हों ब्रह्म माँगु तूँ बर मन चाह्यौ ।

सकल मनोरथ सफल करन हितही हौं आयौ ॥

सुनि बोले प्रह्लाद—न हरि बरतैं ललचावैं ।

बिषयनितैं करि दूरि अखिलपति अब अपनावैं ॥

नहिँ माँगहुँ बर बिषय सुख, सदा नाथ ! हियमहँ बसहिँ ।

करुनामय करुना करहु, कबहुँ कामना उठहिँ नहिँ ॥

हँसि बोले भगवान—विषय चाहें नहीं हरिजन ।
 करहिं निरन्तर भक्ति सदा राखें मो में मन ॥
 मन्वन्तर तऊ तऊ मोग सब भोगो जगमहँ ॥
 कथा निरन्तर सुनौ चित्त बाँधौ मम पगमहँ ॥
 सुखतैं पुन्यनि नाश करि, दुखहू मख करिकें नसौ ।
 पुन्य पापतैं मुक्त है, मम समीपमहँ फिरि बसौ ॥

बारबार बर हेतु कही तब बर जिह माँग्यो ।
 मेरो शुभ आचरन पिताकुँ खोटो लाग्यो ॥
 हरि निन्दा नित करी दासकुँ दुख बहु दीन्हों ।
 पग पग पै अपमान नाथको मम पितु कीन्हों ॥
 अति दुरन्त दुस्तर दुसह, दोष दैत्यपतिने करे ।
 छुपैं नाथ ! यद्यपि सबहिँ, दृष्टि मात्रतें अघ हरे ॥

नरहरि बोले—वत्स ! तरे कुल पितु महतारी ।
 पीड़ी पावन भई पुत्र । इक्कीस तुम्हारी ॥
 तुम सम जाके तनय नरक कैसे वह जावै ।
 पुत्र पुन्य परभाव परपमद पितु तब पावै ॥
 मृतक करम पितुके करो, अब बेटा ! तुम जाइकैं ।
 नित मम परिचर्या करो, मो में चित्त लगाइकैं ॥

हरि आयसु सिरफारि, असुरके करे कर्म सब ।
 राज्यासन अभिषिक्त मुनिनि प्रह्लाद करे तब ॥
 कीन्हीं ब्रह्म विधि विनय विश्वपति भल अति कीन्हों ।
 असुर मारि प्रह्लाद तथा देवनि सुख दीन्हों ॥
 हँसि विधि तैं नरहरि कहैं, बीज तुम्हारे ई बये ।
 तुमने बाबा विधाता, दुरलभ वर जाकुँ दये ॥

अब कबहूँ नहिं देंइ दुष्ट दैत्यनिक्कूँ अस वर ।
 करै सुधाको पान सदा त्रिष उगलैँ त्रिषधर ।
 यौ सबकुँ समुझाइ भये अन्तरहित नरहरि ।
 बिदा करे प्रह्लाद देव ऋषि अति आदर करि ॥
 हरनकाशपु उद्धार अरु, चरित असुसुतको कह्यो ।
 यौ द्वेषी शिशुपाल हरि, हाथनि मरि तन्मय भयो ॥

इति श्रीभागवत चरितके तृतीयाहमें प्रह्लादसाद नृहरि तिरो-
 भाव नामक उक्तीसवाँ अध्याय समाप्त ।



अथ विशतितमोऽध्यायः

[२०]

छप्पय—पूर्व जन्ममहँ हते, त्रिप्र प्रह्लाद यशस्वी ।
 मातु पिताके भक्त धर्मरत परम तस्वी ॥
 लैन परीक्षा पिता देहमहँ कुष्ट बनायो ।
 घृणा तनिक नहि करी, अमृत को घड़ा भरायो ॥
 पुत्र भक्तितै पिताहू, अति प्रसन्न तिनिरै भये ।
 आशिष दै दीक्षा दई, पत्नी सँग बनकूँ गये ॥

मातु पिता बन जाइ मुनिनिके सब व्रत धारे ।
 अंत समय तनु त्यागि धाम बैकुण्ठ सिधारे ॥
 करै योग व्रत नियम सोमशर्माहू सब त्रिधि ।
 सुख दुखमहँ सम रहैं त्यागतै भये तपोनिधि ॥
 अन्त समय आयौ जवहिँ, अमुर शब्द मुनि डरि गये ।
 दैत्य भाव हियमहँ धँस्यो, हिरनकशिपुके सुत भये ॥

नाम धर्यो प्रह्लाद मातुके अति ई प्यारे ।
 देवासुर संग्राम माँहिँ श्रीहरिने मारे ॥
 रुदन करै नित जननि तहाँ नारद मुनि आये ।
 कमला देखी दुखित दया करि वचन सुनाये ॥
 प्रकटै तेरे उदरतै, तजो सोच सुत जिही तब ।
 नाम होहि प्रह्लाद ही, वही रूप गुण शक्ति सब ॥

होहि भागवत परम आसुरी भाव न उनमें ।
 होवै प्रेम अनन्य सदा श्रीहरि चरननिमें ॥
 यो कहि नारद गये जनम प्रह्लाद लयो पुनि ।
 उदर मौंहि शुभ ज्ञान दयो तिनि श्रीनारद मुनि ॥
 श्रीनरहरिको चरित अति, पावन यह मैंने कस्यो ।
 ऐसे श्रीप्रह्लादने, जनम असुर कुलभहँ लयो ॥

जामें भगवत भक्त चरित अति मधुर मनोहर ।
 ज्ञान भक्ति वैराग्य ललित लीला अति सुन्दर ॥
 नारद बोले—धर्मराज ! तुम अति बड़भागी ।
 सेवैं जिनकुँ सदा भक्त ज्ञानी वैरागी ॥
 रहैं सदा सेवक सरिस, ते हरि तुम्हरे पास नित ।
 सग्वन्धी प्रिय सुहृद बनि, रहैं नित्य हितमहँ निरत ॥

अज शिव, ऋषि, मुनि इन्द्र भेद जिनको नहिं पावैं ।
 नेति नेति कहि जिन्हें वेद चारिहु डरि गावैं ॥
 जग, तप, जोग, विराग, करैं जिनहित मुनि सब तजि ।
 होवैं खल अति त्रिमल नाम जस तस जिनको भजि ॥
 निज कैकर्य कराइकें, कृपा करैं कसनायतन ।
 दूर करैं दुख दरस दै, सफल करैं निज जन नयन ॥

राजन् ! जिनकरि त्रिपुरनाश शिव यश विस्तार्यो ।
 त्रिपुरारी शिव भये असुर मायासुर हार्यो ॥
 कनक रजत पुर लोह मयासुर तीनि बनाये ।
 नभमहँ घूमैं गुप्त दैत्य लखि अति हरषाये ॥
 डरे देव शिव ढिँग गये, पशुपति तान्यो निज घनुष ।
 हर सरतैं मरि मरि असुर, गिरत वुरत पुरतैं निकस ॥

मरै अमुर जे तिन्हें बेगि माथासुर लावै ।
 अमृतकुंडमहँ डारि सवनिहँ तुरत जिवावै ॥
 त्रिपुरारी मय सिद्धि निरखि अतिशय घबराये ।
 मायापतिकी शरन शम्भु मनही मन आये ॥
 कामधेनु श्रीहरि बने, त्रिधि बनाइ बछरा लये ।
 अमृतकुण्डके जाइ ढिँग, पान अमृत सब करि गये ॥

फिरि हरि हर ढिँग आय धरम रथ दिव्य बनायो ।
 ज्ञान सारथी कर्यो धनुष तप तीव्र सुहायो ॥
 ध्वजा विरक्ति बनाय अश्व ऐश्वर्य लगाये ।
 धार्यो विद्या कवच क्रियाके बान चढ़ाये ॥
 अस रथपै चढ़ि सदाशिव, प्रभु सुमिरत आगे बड़े ।
 बान धनुषपै धारिकें, त्रिपुर निवासिनितैं भिड़े ॥

कीन्हौ त्रिपुर बिनाश भये त्रिपुरारी शंकर ।
 ऋषि, मुनि, सुर, गन्धर्व कहैं—जय शंकर शिवहर ॥
 सबको यश विस्तार करैं ये ही श्रीनरहरि ।
 करे पूज्य प्रह्लाद हिरनकशिपू को बध करि ॥
 नारदजीके वचन सुनि, धरमराज प्रमुदित भये ।
 पुनि बर्णाश्रमधर्मकूँ, मुनिवरतैं पूछत भये ॥

चारि बरनके धरम देव-ऋषि पृथक् बताये ।
 कौन कौन का कर्म करैं कहि सब समुझाये ॥
 पुनि नारिनिके धर्म कहे सुनि सहमी शारद ।
 ब्रह्मचर्य ब्रत गृही धर्म भाखै सब नारद ॥
 बानप्रस्थ संन्यासके, पृथक् पृथक् लक्षण कहे ।
 धर्मराज नारद निकट, यदुनन्दन बैठे रहे ॥

यह प्रसंग अति धन्य पुण्यप्रद परम सुहावन ।
 धर्म वृद्धि नित करै मोक्षप्रद अतिशय पावन ॥
 भक्ति सहित नर नारि जाइ जे सुनै सुनावैं ।
 जगवन्धनतैं छूटि मोक्षकी पदवी पावैं ॥
 धर्मराज प्रति देवऋषि, कह्यो सुखद संवाद अति ।
 श्रवन मननतैं अवसि ही, हरिचरननिमहँ होहि रति ॥

इति श्रीभागवतचरितके तृतीयाहमें धर्मराज नारद सम्वाद नामक
 बीसवाँ अध्याय समाप्त ।

इति तृतीयाह

(मासिक पारायण चौदहवें दिवसका विश्राम)



अथ चतुर्थाह

प्रथमोऽध्यायः

(१)

दो०—पद्मनाभ पद पद्मको, पावन पुण्यपराग ।
सिर घरि चाहूँ नित बदै, प्रभुपद-रज-अनुराग ॥

छप्पय—कह्यो चरित तृतियाह माँहिं जड़ भरत सुहावन ।
अमल अजामिल चरित नाममहिमा अति पावन ॥
पुण्य प्रचेता वृत्त दक्षकन्यनिकी सन्तति ।
सुर असुरनि को वंश हिरनकशिपू को तप अति ॥
करी कृपा प्रह्लादपै, 'भक्तबल्लल नरहरि यथा ।
सुनहु विमल अति पुण्यप्रद, चौथे दिनकी शुभ कथा ॥

कहैं परीक्षित—प्रभो ! प्रथम मनु बंश सुनायौ ।
मनुपुत्रिनि पति भये प्रजापति सर्ग बढायौ ॥
अन्य मनुनिको बंश कृपा करि और सुनावैं ।
भये कौन अवतार कर्म गुन नाम गिनावैं ॥
शुक बोले—जा कल्पमहँ, छै मनु बीते आठ अरु ।
होगे, प्रकटैं हरि सबनि, महँ भूपति सब श्रवन कर ॥

यज्ञ पुरुष प्रभु भये प्रथम मन्वन्तर माहीं ।
तप स्वायम्भुव करत असुर सोचें तिनि खाई ॥
जान्यो तिनको भाव मारि उद्धार कर्यो प्रभु ।
मन्वन्तर जब द्वितिय भयो प्रकटे वे ई बिभु ॥
ब्रह्मचर्य व्रत आयुभर, पालनकी शिद्दा दीई ।
सहस्र अठासी मुनिनिने, उनहीतैं दीक्षा लई ॥

उत्तम प्रियव्रत पुत्र तीसरे मनु विख्याता ।
इन्द्र सत्यजित हते भये प्रभु तिनिके ज्ञाता ॥
धर्मपति सूरता उदरतैं प्रकटे श्रीपति ।
सत्यसेन विख्यात सुरनिकी एकमात्र गति ॥
ता मन्वन्तर मध्यमहँ, सखा सत्यजितके बने ।
सुरद्रोही दुःशील खल, दुष्ट यक्ष राक्षस हने ॥

चौथे मनु जगमाँहिँ भये तामस प्रियव्रत सुत ।
मन्वन्तर अवतार भये हरि अति शोभायुत ॥
पितु हरिमेघा भये मातु हरिनी कहलाई ।
कीन्हों गज उद्धार ग्राहतैं तुरत गुसाई ॥
व्यों गज पकर्यो ग्राहने, शंका राजाने करी ।
भयो युद्धकहँ, कै दिवस, कैसे दुख मेढ्यो हरी ॥

बोले शुक—मुनि नृपति ! क्षीर सागर ढिग गिरिवर ।
हतो त्रिकूट प्रसिद्ध सहस्रदश योजन सुन्दर ॥
लता गुल्म द्रुम सघन शृंग सुखकर सब सोहैं ।
भर भर भरना भरैं सिद्ध सुर मुनि मन मोहैं ॥
क्रीड़ा कानन जहँ वरुण, को सुन्दर ऋतुमान अति ।
सुरललना घूमत फिरत, हुरति निरत निज सहितपति ॥

तहँ मनहर सर स्वच्छ सलिलयुत मुखकर सुन्दर ।
 खिले अरुन वर कमल नील कहार मनोहर ॥
 लता तीरके निकट लिपटि द्रुम नेह दिखावैं ।
 पुष्पित शाखा हिलहिं मनहुँ कर पथिक बुलावैं ॥
 रहैं जन्तु बलके बहुत, मत्स, सरप, कच्छप, मगर ।
 तहीं ग्राह बलवान इक, बिपुलकाय निवसै निडर ॥

तिहि वनमहँ गजराज वसै जनु जीवित गिरिवर ।
 सिंह व्याघ्र भगि जायँ गन्धर्व मृग, अहि, सूकर ॥
 छोटे बड़े अनेक पुत्र पौत्रादिक तिहि संग ।
 क्रीड़ा करै अनेक सँडतैं सूँघे पितु अंग ॥
 इक दिन सबकुँ संगलै, जल पीवन सर ढिँग गयो ।
 बुरस्यो सरोवर सलिलमहँ, हथिनिनि संग खेलत भयो ॥

कबहुँ जल भरि सँडि बहुनिके अंग उडेलै ।
 कबहुँ मारै हुड्ड पकरिकें दूरि टकेलै ॥
 यों हैकें मदमत्त शान विज्ञान बिसार्यो ।
 कुंजर करत कलोल काल नहिं निकट निहार्यो ॥
 चट आयो तहँ ग्राह इक, पट्ट पैर पकर्यो जकड़ि ।
 कछु न गिन्यो बल दर्पतैं, खीचै तिहि पुनि पुनि अकड़ि ॥

पूरो कर्यो प्रयत्न यथामति शक्ति लगाई ।
 करीं अनेकनि युक्ति एकहू काम न आई ॥
 ग्राह सलिलको जन्तु बदै नित नित वह बलमहँ ।
 भगे संगके छोड़ि होहि गज निरबल जलमहँ ॥
 अन्य शरन जब नहिं लखी, शरन गही घनश्यामकी ।
 करे शिबिल साधन सबहिं, टेर करी हरि नामकी ॥

गजेन्द्र-स्तुति

जो निराकार साकार सार, उन परमपुरुषको नमस्कार ।
 जो जगत रूप सब करें काज, वे राखें मेरी आइ लाज ॥
 जिनकी दृष्टी है नित अलुप्त, जो जगें सतत होवें न सुप्त ।
 जग प्रलय काल जब तम गँभीर, तब रहें पार तमके सुधीर ॥
 मुनि देव सिद्ध जानें न जिन्हें, कैसे पहिचानें अन्य तिन्हें ।
 नटराज करें क्रीड़ा अगर, उन परम पुरुषको नमस्कार ॥१॥
 ऋषि मुनि जिनके दर्शन निमित्त, तजि विषय भोग गृह नारि वित्त ।
 करि कंद मूल फलको अहार, वनमें बसि तनकूँ करें छार ॥
 जो जीवनि के हैं आत्मरूप, सच्चे सुहृद् पितृ मातृ रूप ।
 जिनि जनम करम नहीं नाम रूप, जो जड़ चेतनके एक भूप ॥
 तिनकूँ ध्याऊँ हों बारबार, तिनि परम पुरुषको नमस्कार ॥२॥
 जो स्वीकारें जग हेतु देह, लीलातेँ मानें कुटुम गेह ।
 जिहि जोनि माहिँ प्रकटें अनन्त, रत्नेँ सुर सज्जन घेनु सन्त ॥
 जो मोक्षधाम सबगुण निधान, नित करें भक्त गुन नाम गान ।
 जो नित निरीह नव निरविशेष, जो रहें अन्तमें एक शेष ॥
 जो मूल प्रकृतिके आदि सार, उन परम पुरुषको नमस्कार ॥३॥
 जो कारन कारज करन प्रान, जो सत्य सनातन नित्य ज्ञान ।
 पशु पास निकृन्दन दया सिन्धु, मम पशुपै डारैं कृपात्रिन्धु ॥
 जो चतुरवर्ग दाता दयालु, जो अभिमत फलप्रद अतिकृपालु ।
 जीवनको मोकूँ नहीं मोह, मिटि जाय मान मद काम कोह ॥
 हे विश्वनाथ हरि अति उदार, तव पद पदुमनि मई नमस्कार ॥४॥
 जो शक्तियुक्त सबके स्वरूप, जो अज अनादि अच्युत अनूप ।
 जो जीव ईश माया अतीत, जो सबके स्वामी सुहृद मीत ॥
 हौँ ग्रस्यो ग्राहने सहज आय, थाक्यो करि करके सब उपाय ।
 अवलम्ब लयौ तव कमल चरन, लैं कमल एक अशरनशरन ॥
 पद पदुमनिमई है बारबार, प्रभु नमस्कार प्रभु नमस्कार ॥५॥

छुप्पय—हे हरि ! अशरन शरन दीन दुख मेंटन हारे ।
 हे करुनाके अयन ! प्रनतप्रन पालनवारे ॥
 आइ अस्यो तम ग्राह सच्चिदानंद उवारो ।
 कैसे हूँ करि कृपा कष्ट हरि हरो हमारो ॥
 निरविशेष त्रिनती सुनत, नहिं आये सुर अन्य जब ।
 गरुडध्वज चढ़ि गरुड़पै, आये गज ढिँग तुरत तब ॥

त्रिनती गद्गद कंठ करै नयननिक्कूँ मूदे ।
 गजकूँ निरख्यो विकल गरुड़तैं श्रीहरि कूदे ॥
 एक हाथतैं पकरि ग्राह सँग गजहिं उवार्यौ ।
 जलतैं बाहर करयो चक्रतैं मुहड़ौ फार्यौ ॥
 नयनानंद निहारि हरि, शान्ति हृदय गजके भई ।
 भवभयहारी विष्णुने, मुक्ति ग्राह हूँ कूँ दई ॥

ग्राह योनि तजि भयो तुरत गन्धर्व मनोहर ।
 पूर्व जन्ममहँ करत रह्यो क्रीड़ा जल अन्दर ॥
 देवलमुनिको चरन हँसीमहँ हूहूँ पकर्यो ।
 चौँके मुनि है भीत तबहि हँसि बाहर निकर्यो ॥
 समुक्ति अवज्ञा शाप तब, ग्राह बननको दै दयो ।
 सुर गायक गन्धर्व सो, नक्र शाप बश है गयो ॥

पूर्व जन्म गज चरित मुनौँ श्रद्धातैं अब तुम ।
 इन्द्रद्युम्न द्रविडेश हतो राजा सुरपति सम ॥
 ध्यान मग्न इक दिवस रह्यो मलयाचल माहीं ।
 शिष्यनि सहित अगस्त्य गये नृप निरखे नाहीं ॥
 करै तपस्या मौन है, बाल बड़े व्रतमहँ निरत ।
 अतिथि धर्मतैं च्युत निरखि, मुनि अगस्त्य कोपे तुरत ॥

बोले मुनिवर—अधम ! करै तू अतिथि निरादर ।
 हैकें क्षत्रिय नहीं करै विप्रनिको आदर ॥
 गज सम बैठ्यो रह्यो होइ तू जड़मति गजई ।
 दैकें दारुन शाप गये तत्क्षण मुनि तबई ॥
 हर्ष न विस्मय नृपतिक्कूँ, समुक्ति दैवगति रहि गये ।
 तेई दूसर जन्ममहँ, बारणेन्द्र भूपति भये ॥

करि गजको उद्धार भये आनंदित श्रीहरि ।
 बोले कृष्णा सिन्धु सबनिक्कूँ सम्बोधित करि ॥
 ये मेरे हैं रूप कंदरा बन, गज, सरवर ।
 त्रिषि हरिहरके घाम, बाँस, परबत, गिरि गह्वर ॥
 शेष, शारदा, सप्तऋषि, सूर्य, चन्द्र, ध्रुव, घर्म हैं ।
 गंगा, यमुना, सरसुती, यज्ञ आदि शुभ कर्म हैं ॥

कौस्तुभ मणि, श्रीवत्स और मेरी बनमाला ।
 पाञ्चजन्य शुभ शंख गदा मम दिव्य विशाला ॥
 असुर बिनाशक चक्र सुदर्शन मेरो भारी ।
 सुर मुनि अरु अवतार पुरुष सब शुभव्रत धारी ॥
 इन सबकुँ जो प्रात उठि, अर्घ्याँ सुमिरन करै ।
 भवसागरकुँ मनुज ते, बिनु प्रयास निश्चय तरै ॥

इति श्रीभागवतचरितके चतुर्थाहमें हरि अवतार, गजग्राह मोक्षण
 नामक प्रथम अध्याय समाप्त ।

अथ द्वितीयोऽध्यायः

[२]

दोहा—कहैं सूत—मुनिवर ! कहे, मन्वन्तर ये चारि ।

अब पंचम मनुको चरित, सुनो हृदय हरि धारि ॥

छप्पय—भये पाँचवे रैवत मनु मन्वन्तर अविपति ।

लियो विष्णु अवतार नाम 'वैकुण्ठ' रमापति ॥

कमला हित बैकुण्ठ रख्यो सबलोक नमस्कृत ।

मन्वन्तर पति भये छटे चालुस मनु श्रीयुत ॥

सम्भूतीके गर्भतैं, भये विष्णु बैराजसुत ।

अजित नाम अच्युत रख्यो मथ्यो, सिन्धु श्री अमृत हित ॥

घरि कछुआको रूप मंदराचलकूँ धार्यो ।

सुरनि संग इक अजितरूप घरि अमृत निकार्यो ॥

अमृत कलश लै प्रकट भये हरि घन्वन्तरि बनि ।

दैत्य छले है नारि अमृत दैदीयो देवनि ॥

कहैं परीक्षित—कथा सब, सिन्धु मथनकी कहहु प्रभु ।

श्री अन्तरहित भई च्यौं, चार रूप च्यौं धरे विभु ॥

शुक बोले—इक दिवस गये बन दुर्वासा मुनि ।

श्यामा विद्याधरी खड़ी चौंकी पग-धुनि सुनि ॥

सर समीप लग् लिये सुगंधित सुन्दरता जनु ।

मुनि मन चंचल भयो निरखि माला बाला तनु ॥

बोले 'विद्याधरी यह, माला मोकूँ दै अबहिं ।

लखि दुर्वासा डरी वह, माला दै भागी तबहिं ॥

माला धारी जटनिमोहिँमुनि मगन चलै मग ।
चितवन इत उत मत्त अटपटे परै पंथ पग ॥
मगमहँ निरखे इन्द्र जटनितें माल निकारी ।
फैकी सुरपति उपरि गर्वतें इन्द्र न धारी ॥
ऐरावत मस्तक धरी, कुचली पैरनि तासु जत्र ।
दुर्वासा क्रोधित भये, शाप इन्द्रकुँ दयो तब ॥

जा, तेरी श्रो नष्ट होहि तोनिहु लोकनिकी ।
शाप होत ही कान्ति परी फीकी देवनि की ॥
असुरनि घेर्यो स्वर्ग देवता मारि भगाये ।
राज्यहीन श्रीभ्रष्ट दुखी सुर विधि दिँग आये ॥
ब्रह्मा बाबा सवनि सँग, क्षीर सिन्धुके दिँग गये ।
लक्ष्मीपति सबैशकी, करि विनती गद्गद भये ॥

सोरठा—करि मन करन निरोध, श्रुति सम्मत, शिव सर्वगत
जो अवगत अवरोध—अज्ञ इस्तुति करिबे लगे ॥

अजित—स्तुति

जय निर्विकार हरि, सब जगकुँ करि, रहौ नित्य निस्संगा ।
जय सत्य सनातन, पुरुष पुरातन, प्रकटीजिन पद गंगा ॥
जय अलख अगोचर, अच्युत अक्षर, आदि अन्ततें रहिता ।
जय अपरम्परा, चक्रं अघारा, रहौ सदा श्री सहिता ॥
जय मायातीता, परमपुनीता, जय अनादि असुरारी ।
जय जग के करता, हरता भरता, जय मदहरन सुरारी ॥
जिनि स्वेदज उद्भिज, अंडज, पिंडज, रचे विविध विधि पालै ।
जो जनक जननि बनि, सुर शत्रुनि हनि, सखा सुहृद बनि लालै ॥

जिनिको जगही तन, उड़गनपति मन, जो जल अन्न पचावें ।
 जो सर्वसार हैं, मुक्ति द्वार हैं, तिनि पद शीश नवावें ॥
 जय प्राननि प्राना, प्रभु भगवाना, जय जय सर्वस्वरूपा ।
 जय ब्रह्म क्षत्रवर, वैश्य शूद्र नर, सरब वरन जिहि रूपा ॥
 शुभ अशुभ बनावें, खेल रचावें, सबमें व्यापें सब छिन ।
 जय अजित अकारन, मुनिमन हारन, करहि सकल सुर सुमिरन ॥
 यह जगत कल्पना सब जग सपना, जिनविनु जीव न जानें ।
 जो अनिल सरिस शुभ, सत्यरूप ध्रुव, वेद उपनिषद मानें ॥
 ज्यों जड़ जल पावै, तब हरिआवै, त्यों ही तुमरी सेवा ।
 जो तुमकुं ध्यावैं, सब सुख पावैं, तुष्ट होहि मुनि देवा ॥
 जय जय जग जीवन, जय आनंदधन, जय जय कमला कन्ता ।
 जय जय प्रभु पावन, जनमन भावन जय जय अजर अनन्ता ॥

छप्पय—हे अच्युत ! अखिलेश ! दया देवनिपै कीजै ।
 दुखी द्वारपै परे दयानिधि दरसन दीजै ॥
 विमो ! भये ऐश्वर्य हीन तव चरननि आये ।
 रिपुनि स्वर्गतैं भ्रष्ट करे हम मारि भगाये ॥
 विधि बिनती विश्वेश सुनि, तुरत तहाँ परकट भये ।
 सुरगन हरि दरशन लहे, अति प्रसन्न सब है गये ॥

इति श्रीभागवत चरितके चतुर्थाहमें सुरविनय नामक द्वितीयोऽध्याय
 समाप्त ।

(पाक्षिकपाठ-सप्तमदिवस विश्राम)

अथ तृतीयोऽध्यायः

[३]

छप्पय—सुर प्रसन्न अति भये विष्णुकी करिकें भाँकी ।
 कोन्हीं गद्गद गिरा सन्ननि मिलि बिनती बाँकी ॥
 है प्रसन्न खिलवाड़ करनकूँ बोले नटवर ।
 मम सुर सम्मति सुनो करो मिलिकें सब सत्वर ॥
 कच्छ छिपावै अंग ज्यों, त्यों निज भाव छिपाइकें ।
 असुरनितैं कछु कालकूँ, करो मित्रता जाइकें ॥

दोहा—सम्मति सुनि सरवेशकी, सुरगन शीश नवाय ।
 कहैं—जायँ शत्रुनि निकट, कैसे भाव दुराय ?

छप्पय—स्वाभाविक जो प्रेम द्वेष छूटे नहिं कबहूँ ।
 करैं मित्रता दैत्य करैं फिरि भगवन् ! हमहूँ ॥
 देवनिकी सुनि बात हँसे प्रभु अन्तरयामी ।
 क्रीड़ाके हित रचैं विविध कौतुक सुरस्वामी ॥
 हरि बोले तब सुरनितैं, स्वार्थ जगत्महँ श्रेष्ठ है ।
 सधै स्वार्थ जब जाहि सों, सोई जगमहँ ज्येष्ठ है ॥

धुस्यो पिटारीमोंहिं सर्प इक निज भोजनकूँ ।
 मोटो मूसो तहाँ धुस्यो काटे कपड़निकूँ ॥
 करीं पिटारी बन्द लगायो स्वामी तारो ।
 मूसक अतिशय डरै भयो चितित अहि कारो ॥
 सर्प बिचारै भूखबश, जो जाकूँ भलि जाउँगो ।
 तो फिरि घुटिकें पिटारी, में ही हौं मरि जाउँगो ॥

सोचि समुझिकें करी मित्रता मूसकर्तें अहि ।
 कटवाई सन्दूक प्रेमकी बातें कहि कहि ॥
 जब जान्यो पथ बन्यो तुरत मूसक भलि लीन्हों ।
 यों बैरी तैं मेल कर्यो कारज निज कीन्हों ॥
 देवनितैं श्रीहरि कहैं, ऐसे ही तुम जाइकें ।
 दैत्यनितैं मैत्री करौ, साधौ स्वार्थ फँसाइकें ॥

हरि सम्मति सिर धारि गये असुरनि ढिँग सुरगन ।
 शत्रुनि आवत निरखि दैत्य सोचें मनहीं मन ॥
 किहि कारन सुर शस्त्र त्यागि हमरे ढिँग आये ।
 करि स्वागत सत्कार असुरपति बलि बैठाये ॥
 बोले सुरपति सबनितैं, भाई हैं हम सुर असुर ।
 पिता एक माता पृथक्, ज्यों फिरि भगुरैं परस्पर ॥

करिकैं सब पुरुषार्थ उदधितैं अमृत निकारैं ।
 मरन धरमकूँ त्यागि अमर बनि मृत्युहिं मारैं ॥
 लडैं परस्पर बीर मरैं नहिं कोई रनमहँ ।
 मनमहँ हो विद्वेष घाव होवै नहिं तनमहँ ॥
 असुरनि सुर सम्मति सुनो, साधु साधु सबने कही ।
 अमृत निकारैं मिलि उभय, बात जिही पक्की रही ।

सबतैं पहिले चले उभय लैवे गिरि मन्दर ।
 लीयो तुरत उखारि चले लैकें देवासुर ॥
 भार सह्यो नहिं जाय सबनिकूँ चक्कर आवै ।
 सब अकुलाये कहैं—माइमहँ अमृत जावैं ॥
 अड़इ धम्म करि गिरि गिर्यो, पिचे देव दानव सबहिं ।
 हतोत्साह जब सब भये, प्रकटे गरुडध्वज तबहिं ॥


हैंसिकें बोले विष्णु—डारि गिरिवर च्यौ दीयो ।
 व्यथित दुखित सुर लखे गरुड़पै गिरि धरि लीयो ॥
 लाइ सिन्धुदिङ्ग धर्यो गरुड़तैं बोले—जाओ ।
 पुनि देवनितैं कहैं—वासुकी नागहिं लाओ ॥
 गये वासुकी निकट सब, अम्भृतको लालच दयो ।
 लाइ लपेटे दाम करि, मथो विहँसि हरिने कह्यो ॥

पीताम्बर की फैंट बाँधि हरि पकर्यौ मुख जब ।
 सुरहू पीछे लगे क्रोध करि कहैं असुर सब ॥
 हम कुलीन विद्वान् अमङ्गल पूँछ न पकरैं ।
 लूँगटि यदि तुम करो यहाँतैं हम सब निकरैं ॥
 हरि हैंसि बोले—व्यर्थ च्यौ, बाद बढाओ बन्धुवर ।
 सब सुर पकरो पूँछकूँ, मुखकूँ पकरैं जे असुर ॥

युक्ति सहित यों देव विपतितैं अजित बचाये ।
 तुरत सर्प मुख छोड़ि पूँछ दिङ्ग हर सँग आये ॥
 यों करि पृथक् विभाग सिन्धुकूँ मथिबे लागे ।
 कसि कसिकें सब फैंट, होड़ करि खींचें आगे ॥
 पाहिले खींचें असुर सब, पुनि सुर खींचें दामकूँ ।
 धँस्यो जाइ गिरि उदधिमहँ, सुमिरें सुर सब श्यामकूँ ॥

असुर कहैं—सुर दीलि देहँ ये कम सब बलमहँ ।
 सुर सोचें—यह निराधार गिरि झूवत जलमहँ ॥
 कछुक कहैं—विघ्नेश न पूजे अब फल पाओ ।
 कछु अनन्य यों कहैं—हृदयतैं अजित मनाओ ॥
 हरि निरखे भयभीत सुर, तुरत कूर्म तनु धारिकें ।
 धार्यो मंदर पीठिपै, उछरे बुड़की मारिकें ॥

मन्दर उठतो निरखि सुरासुर सबई हरषे ।
 भये मुदित मुनि सिद्ध सुमन बहु नभते बरषे ॥
 नीचे ऊपर देव दैत्य मन्दरमहँ श्रीहरि ।
 बासुकि तनमहँ धुसे रूप तिनिमहँ तस तस धरि ॥
 धर्मर करि मथै सब, मन्दर मथनी सम किरै ।
 कच्छप प्रभुकी पीठिपै, जनु प्रमदा खुजली करै ॥



बायु विषैली लगी दैत्य झुझसे रिसियाने ।
 अमृत निकसै नहीं सुरासुर सब खिसियाने ॥
 सबकुँ निरख्यो बिकल अजित हँसि बोले बानी ।
 हो कश्यप संतान थाह तुम सबकी जानी ॥

लाओ मारूँ हाथ द्वै, अमृत देऊँ निकारिकेँ ।
मोजकूँ मिलि जाय कछु, खँचूँ रई रिस्याइकेँ ॥

अजित उठाई नेति रईकूँ खींचि घुमावैं ।
कुटिल केश जनु हिलें सर्प सुत-शीश डुलावैं ॥
पीताम्बर बनमाल श्याम तनुपै सोहैं जनु ।
इन्द्रधनुष नभमौहिँ लपेटें विद्युतकूँ मनु ॥
सोहैं अपर सुमेरु सम, गिरिधर गिरिवर ढिँग खड़े ।
द्वन्द युद्ध हित मल्ल जनु, कसि कछुनी निज प्रन अड़े ॥

कसिकेँ मारे हाथ जीव जलके घबराये ।
मेढक मछली मगर मत्स्य ऊपर उठि आये ॥
खलबलाइ सब उदधि जीव चिंधारी मारैं ।
विश्वविजयिनी बाँह घुमावैं नहिँ हरि हारैं ॥
हालाहल सबतैं प्रथम, निकस्यौ विष अति उग्रतर ।
दशहु दिशनिमहँ व्यास वह, भयो भगे सब सुर असुर ॥

दोहा—देव असुर सब ई भये, गरल निरलि भयभीत ।
विष निकस्यौ, अमृत नहीं, कहैं बचन विपरीत ॥
छोड़ि मथन लड़िवे लगे, कौन करै विष पान ।
प्रथम ग्रास मकली मिली, हँसे अजित भगवान ॥
इति श्रीभागवत चरितके चतुर्थाहमें समुद्रमन्थन नामक तृतीय
अध्याय समाप्त ।

अथ चतुर्थोऽध्यायः

[४]

दोहा—कौतुक हित हरि कौतुकी, दोउनिको लखि भाव ।
बीच आइ ठाढ़ भये, करिवे बीचबिचाव ॥

छप्पय—हरि बीले—हर निकट प्रजापति सँग सब जाओ ।
करिकेँ अनुनय विनय हलाहल उनहिँ मिआओ ॥
शिव सँग बिहरै शिवा प्रेमतैं पुलकित अँग अँग ।
पहुँचे बिषतैं दुखी प्रजापति सब सत्त्वनि सँग ॥
दंड सरिस सब भुइँ परे, कहहिँ दयानिधि दुख हरहु ।
सब जग भयवश अति दुखित, निरभय करुणाकर करहु ॥

शरन तिहारी लई जगतके तुम हो स्वामी ।
अज अच्युत अखिलेश अनामय अन्तरयामी ॥
पालन अरु संहार करौ तुमहीं जग रचिकै ।
तीनिहु कारज करो विष्णु हर विधि बपु धरिकै ॥
रुण्डमाल गल गंग सिर, मस्तक शशि शिव नाम है ।
उमा सहित सर्वेश पद, पदुमनि मौहिँ प्रनाम है ॥

हे शम्भो ! सुख शान्ति शक्ति सरबसुके दाता ।
आशुतोष अखिलेश भवानीपति भयत्राता ॥
कालकूटतैं दुखी विपतितैं नाथ बचाओ ।
पान हलाहल करो दुखिनिके दुःख मिटाओ ॥
उमा बिचारैं स्वारथी, हैं सबरे ये प्रजापति ।
कालकूट बिष पान हौं, करन न दुंगी तीक्ष्ण अति ॥

अन्तरयामी शम्भु उमाके मनकी जानी ।
 सती करन संतोष मधुर बर बोले बानी ॥
 प्रिये ! प्रजा अति दुखित परी संकटमहँ मारी ।
 शरणागत प्रतिपाल करनकी बानि हमारी ॥
 जीवनिपै किरपा करै, हरि प्रसन्न तिनपै रहै ।
 पान हलाहल विष करूँ, दुखित होहि ये सब कहै ॥

दया घरमको मूल मरम मूरख नहिं जानै ।
 छिनभंगुर यह देह अज्ञ अजरामर मानै ॥
 शिवको सद् उपदेश सती सुनि दीन्हैं सम्मति ।
 पान करन विष चले शम्भु मनमहँ अति हरषित ॥
 ब्यापि रह्यो विष जगत्महँ, जीव दुखी सबई रहै ।
 पान कर्यो विष शम्भुने, सज्जन परहित सब सहै ॥

लीयो तुरत समेंटि बनायो विषको गोला ।
 पान करन हर लगे उमापति शंकर मोला ॥
 राम नाम सँग लीलि गरेतैं नाहिं उतार्यो ।
 निगल्यो उगल्यो नहीं कंठमें ही विष धार्यो ॥
 जलमल हलाहल हरषि, पान सतीपति करि गये ।
 कंठ नील विषतैं भयो, नीलकंठ तबतैं भये ॥

हृदय माँहिँ हरि बसैं विश्वपति विष नहिं निगल्यो ।
 अध अंगीकृत त्याग सोच बाहर नहिं उगल्यो ॥
 दोषनि लेहिं पचाय दोष अपनेमहँ आवैं ।
 प्रकट दोष यदि करैं तुरत निज अँग लपटावैं ॥
 तातैं कंठहिमहँ धर्यो हर शोभा अतिशय बढी ।
 सुनिकें शोभा मुरनितैं, मुरसरि शिव सिरपै चढी ॥

२१ फा०

है आराधन श्रेष्ठ त्यागि सब हरि आराधैं ।
 जप, तप, पूजा, पाठ, योग नियमादिक साधैं ॥
 इन सबतैं उत्कृष्ट परम आराधन भारी ।
 परदुखमहँ हों दुखी यही पूजा प्रभु प्यारी ॥
 समुझैं सबमहँ श्यामकूँ, ते ही भक्त अनन्य हैं ।
 परकारज हित सहहिँ दुख, जगमहँ ते नर धन्य हैं ॥

फैली जगमहँ बात शम्भु हात्ताहल पीयो ।
 दुखी प्रजाको कष्ट वृषध्वज सब हरि लीयो ॥
 साधु साधु सब कहैं विष्णु, विधि, शिव, यश गावैं ।
 दुँदुभि नभतैं बजैं सुमन सुरगन बरसावैं ॥
 हर भोलाकी भूलतैं, गोलातैं कछु विष गिर्यो ।
 सो अहि, विच्छू औषधिनि, थावर जंगम विष कर्यो ॥

दोहा—महादेव हर है गये, करिकें विषको पान ।
 जे परकारजमहँ निरत, ते पावैं बहुमान ॥

इति श्रीभागवतचरितके चतुर्थाह में शंकर विषपान नामक
 चतुर्थ अध्याय समाप्त ।

अथ पञ्चमोऽध्यायः

[५.]

शिव पीयो विष सिन्धु सुरासुर मथिवे लागे ।
 कामधेनु पुनि प्रकट भई रत्ननिर्तै आगे ॥
 अग्निहोत्रके हेतु सुरभि मुनिगन स्वीकारी ।
 उच्चैःश्रवा महान अश्व फिरि प्रकट्यो भारी ॥
 घोड़ा राजा बलि लयो, पुनि ऐरावत गज भयो ।
 सो वाहन देवेन्द्रको, हरि अनुमतिर्तै है गयो ॥

पुनि कौस्तुभमनि भई चित्त चितचोर चलायौ ।
 रत्न अमोलक निरखि हरषि श्रीहरि हथियायौ ॥
 कल्पवृक्ष सुरबधू भई सुर असुर सिद्धाये ।
 सार्वजनिक करि दई, सुनत सबई हरषाये ॥
 सुरलक्षणा गति ललित अति, चुभी चित्त चितवन चपल ।
 पठई हरि सुरपुर वरत, लखि सुर असुरनिक्कूँ विकल ॥

पुनि प्रकटी प्रमुप्रिया रमा निजशोभा बिकसित ।
 विधुवत् शुभ्र प्रकाश करत जगक्कूँ अनुरञ्जित ॥
 यौवन रूप सुवर्ण भाव गुणगरिमा अनुपम ।
 सुर, नर, किन्नर, असुर, भये लखि सबई जड़ सम ॥
 करै भेंट बहुमूल्य मिलि, रमा-प्रेम मई सब पगे ।
 लैवेकी इच्छा भई, सब सेवा करिबे लगे ॥

स्वीकारे उपहार बाद्य बहु बजहिँ मनोहर ।
 हरषि विप्रगन पढ़हिँ वेद मंत्रनिक्कूँ सस्वर ॥
 पितृ पीताम्बर दयो पहिनकैँ हरषी वाला ।
 पहिनी वरुणप्रदत्त वृहद बैजन्ती माला ॥
 बल्लाभूषन पहिनकैँ, श्रीशोभा अनुपम भई ।
 निज वर खोजनके निमित्त, जयमाला करमहँ लई ॥

माला करमहँ हिलत भ्रमत मधुलोभी मधुकर ।
 कुण्डल लोल कपोल हास मधुमय मुख ऊपर ॥
 पीनोन्नत बरभक्ष मृदुल कटि भार नमित-सी ।
 छीन उदर वर नयन मृगी सम चितै चकित-सी ॥
 नूपुर कंकन करघनी, कलारव पग पगपै करत ।
 हंसिनिकी गतितैँ चलत, चितवत सबको मन हरत ॥

सब सद्गुणसम्पन्न करै अन्वेषन निज वर ।
 तेज ओज तप युक्त होहि सुरवर अजरामर ॥
 लखि सबके गुण दोष फिरत पतिहित गजगामिनि ।
 नहिँ निरखे निरदोष चकित है चितवत भामिनि ॥
 आभा अतसी कुसुम सम, निरखे नयनानन्द हरि ।
 गुणसागर निरबद्य लखि, ठिठकी नीचे नयनकरि ॥

निरगुन सबगुन युक्त सरस सुन्दर मुखसागर ।
 सरस सलौने श्याम सनातन शोभा आकर ॥
 मम अभीष्ट वर जिही बिष्णु निश्चय करि जाने ।
 रमा मुदित अति भई पुरातन पति पहिचाने ॥
 नव कमलनिकी मालपै, गुंजें बहु मधुकर निकर ।
 करकमलनि तैं कंठमें, डारि बरे श्री अजित वर ॥

हरिको बद्ध विशाल निरखि श्री अति हरषाई ।
रमाभाव पहिचानि बिष्णु उर-माल बनाई ॥
हरि हिय आसन मिल्यो जगन्माता पद पायो ।
लखे जीव श्रीहोन कृपा करि तेज बढ़ायो ॥
बिधि, हर, सुर, मुनि, ऋषि सबहिं, मंत्र पढ़हिं बिनती करहिं ।
नाचैं मिलि सुरसुन्दरी, बिबिध बाद्य बिधिवत बजहिं ॥
तब पुनि मध्यो समुद्र बारुनी कन्या निकसी ।
हरि असुरनिक्कूँ दई पाइ तिनिकूँ सो हरसी ॥
घमर घमर सब मयै भये पुनि पुरुष पुरातन ।
अमृत कलशकूँ लिये बिष्णुके अंश सनातन ॥
सुन्दर सौम्य शरीर सुभ, देवनिक्कूँ देखैं बिहँसि ।
मुखपै लटकैं लट मनहुँ, अहि शिशु पीवैं सुधा शशि ॥
धन्वन्तरि भगवान भये भक्तनि सुखदाई ।
कुंडल मंडित करन हृदय बनमाल सुहाई ॥
हरषे दानव दैत्य दौरिकें देखैं पुनि पुनि ।
गुन गावैं गन्धर्व पढ़ैं मंत्रनिक्कूँ ऋषि मुनि ॥
अजितेन्द्रिय अति ई असुर, अमृत निरखि व्याकुल भये ।
आव गिन्यो नहिं ताव कछु, छीनि अमृतकूँ मगि गये ॥
देवनिके मुख फक्क परे अतिशय घबराये ।
कहि कहि सुन्दर वचन अजित सब बिधि समुझाये ॥
ठगिकें छीनूँ अमृत अंतमहँ सींग दिखाऊँ ।
चिन्ता कछु मति करो पेट भर तुमहिं पिआऊँ ॥
सुरनि सान्त्वना दई पुनि, अन्तरहित श्रीहरि मये ।
मैं पीऊँ तू पिये कस, असुर अमृत हित लड़ि गये ॥
इति श्रीभागवतचरितके चतुर्थाहमें रत्नोत्पत्ति नामक
पञ्चम अध्याय समाप्त ।

अथ षष्ठोऽध्यायः

[६]


असुरनि मोहन हेतु मोहिनी बने मुरारी ।
 पँचरँग चूनरि ओढ़ि नासिकामहँ नथ धारी ॥
 लहँगा धारीदार हरी-सी पहिनी चोली ।
 करि सोलह शृंगार नारि सम बोलें बोली ॥
 नील कमल सम श्यामरँग, अँग अँगमहँ यौवन उठनि ।
 हंसगमनि अनुपम हँसनि, लीलायुत चितवनि चलनि ॥

कारे कुंचित केश भालपै बेंदी मनहर ।
 नयन, नासिका, गंड अंग सब अतिशय सुन्दर ॥
 बल्लाभूषण धारि चली यौवन मदमाती ।
 कंदुक क्रीड़ा करति फिरति इत उत अलसाती ॥
 सुन्दरता साकार है, शोभा भई सजीव मनु ।
 असुर मृगनिक्कूँ फाँसिवे, व्याधिनि बिहँसति चली जनु ॥

आये सब मिलि असुर कहें—को तुम का नामा ।
 को पति काकी नारि फिरहु अस कस जन श्यामा ॥
 अमृत हेतु हम लरहिँ हमारी रार मिटाओ ।
 बटवारो करि देउ यथामति अमृत पिआओ ॥
 सुनि हँसि बोली मोहिनी, कश्यपसुत सिरीं भये ।
 मम बेश्याके रूपपै, ज्यों मदमाते है गये ॥



शिवजी और मोहिनी पृ० ३३४



ठगिनी मोहिनी पृ० ३२७

बालाकी सुनि बात बढ्यो बिश्वास सबनिक्कूँ ।
 अमृत कलशकूँ लाइ तुरत दै दीयो तिनिकूँ ॥
 तिरछी चितवन निरखि बिहँसि बोली बर बानी ।
 कहियो फिरि मति कछू, करौंगी हौं मनमानी ॥
 सब बोले—परमेश्वरी, हमकूँ सब स्वीकार है ।
 तुम जो चाहौ सो करौ, मार तुम्हारी प्यार है ॥

हाव भाव बर कुटिल कटाच्छनितैं मन मोहै ।
 बैणी भोटा खाइ कलश करमहँ शुभ सोहै ॥
 भूलि न जावैं भूप ! फिरै जो भामिनि सुन्दर ।
 नाहिं कामिनी अन्य स्वयं मायावी नटवर ॥
 असुर मोहिनीने ठगै, अमृत पिआयो सुरनिकूँ ।
 समुक्ति सकै को जगत महँ, तिरियनि के चक्करनिकूँ ॥

राहु समुक्ति हरि कपट देव बनि रवि शशि टिँगई ।
 बैछ्यो पीयो अमृत जानि मार्यो प्रभु तबई ॥
 राहु केतु द्वै अमर भये ग्रह संग बिराजैं ।
 नवग्रह तबतैं भये अनुर सुरवत् बनि भ्राजैं ॥
 अमृत सुरनिकूँ प्याइकैं, अमुरनि सींग दिखाइकैं ।
 त्यागि मोहिनी रूथकूँ, बनै पुरुष पुनि आइ कैं ॥

ठगिया है यह विष्णुं समुक्ति पुनि दैत्य रिस्थाने ।
 खिसियाये करि कोप अस्त्र देवनिपै ताने ॥
 अमृत हेतुं इक काल कर्म सबने सम कीयो ।
 कोरे दानव रहे अमृत देवनिने पीयो ॥
 हरि हिय घरि श्रद्धा सहित, कर्म करैं जे भक्तितैं ।
 उत्तम फल पावैं अवसि, मनमोहनकी शक्तितैं ॥

अबला रूपी परम प्रबल माया है भारी ।
 मोहे सुर अरु असुर इन्द्र ब्रह्मा त्रिपुरारी ॥
 मित्र शत्रु बनि जायँ नृपति सर्वस्व गँवावै ।
 सहज प्रेम तजि बन्धु नारिहित लरि मरि जावै ॥
 पुरुषनि नारायन लखै, नारिकूँ लक्ष्मी गनहिँ ।
 ते साधारन नर नहीं, कवि तिनकूँ हरिही भनहिँ ॥
 जग रक्षाके हेतु विष्णु अवतारनि धारै ।
 भक्तनिको करि त्राण दुष्ट दैत्यनिकूँ मारै ॥
 ऊँच नीच लघु ज्येष्ठ भेद उनमहँ कछु नाहीं ।
 कच्छ मच्छ नर नारि कबहुँ सूकर बनि जाहीं ॥
 शिव स्वरूप मङ्गलभवन, जीव मात्रके सुहृद हरि ।
 करै विश्व कल्याण नित, विविध भाँतिके वेष धरि ॥
 सुन्द और उपसुन्द बन्धु दोऊ अति प्यारे ।
 एक प्राण द्वै देह होहिँ कबहुँ नहिँ न्यारे ॥
 उग्र तपस्या करी कठिन वर बिधितै पाये ।
 जीते तीनहु लोक स्वर्गतै अमर भगाये ॥
 विश्वविजय करि विषय सुख, महँ दोऊ ई फँसि गये ।
 मृत्यु गर्तमहँ गबतै, असुर मोहबश घँसि गये ॥
 कामी दैत्यनि हेतु सुघर विधि बधू बनाई ।
 खलनि फँसावन रूप जाल लै मामिनि आई ॥
 मेरी मेरी करत परस्पर भिड़े प्रेम तजि ।
 मरे नारिके हेतु लड़े दोऊ ही सजि बजि ॥
 करै कर्म हरि भावतै, जीवमात्रकूँ होहिँ सुख ।
 स्वार्थ हेतु श्रम जे करै, ताको भ्रुव परिणाम दुख ॥
 इति श्रीभागवतचरितके चतुर्थाहमें मोहिनी चरित नामक
 छठवाँ अध्याय समाप्त

अथ सप्तमोऽध्यायः

[७]

अमृत पान सुर कर्यो असुर मिलि लरिवे आये ।
 अमर सबल सुर भये न पीछे पैर हंटाये ॥
 दोऊ ही रनसूर परस्पर शस्त्र चलावें ।
 नाना बाहन चढ़े युद्ध कौशल दिखलावें ॥
 गुत्थम गुत्था है गई, मारो काटो मचि गई ।
 कटि कार सिर बसुधा भरी, सरिता शोणितकी भई ॥

चढ़िकें दिव्य विमान बिरोचन सुत बलि आये ।
 इत ऐरावत चढ़े शचीपति परम मुहाये ॥
 निज निज शङ्ख बजाइ सुरासुरपति हरषावत ।
 दिव्य अस्त्र लै भिड़ें बज्र अरु गदा धुमावत ॥
 युद्ध इन्द्र बलिको लख्यो, सब जोड़ी खोजन लगे ।
 वीर हृदय उमगन लगे, कायर रन तजिके भगे ॥

तारक संग कुमार मयासुर संग शिल्पी सुर ।
 वरुण हेतितैं लड़ैं त्रिपुररिपु संग जम्भासुर ॥
 त्वष्टा शम्बर संग सूर्यतैं लड़ैं बिरोचन ।
 अपराजित संग नमुचि बृहस्पतितैं इकलोचन ॥
 वृषपरबा सुर बैद्य संग, राहु चन्द्रमातैं लड़ैं ।
 महिषासुर सुरबदन संग, सौ बलिसुत रवितैं भिड़ैं ॥

नरवाहुर शनि संग कामके सँग दुरमरषन ।
 क्रोधव्रशनितै करै युद्ध निर्भय है शिवगन ॥
 अष्टवसुनितै कालकेय मुनि सँग बातापी ।
 देवी काली संग लड़ै खल शुम्भ प्रतापी ॥
 एक दूसरेतै लड़ै, छोड़ि प्राणके मोहकूँ ।
 छोड़ि सकै नहिं देवहू, सहज रिपुनिके द्रोहकूँ ॥

बलि सुरपतितै लड़ै करै वाननिकी वृष्टी ।
 छूटत अस्त्र अमोघ प्रलय होगी जनु सृष्टी ॥
 शतक्रतु मारन हेतु त्रिविध विधि अस्त्र चलाये ।
 बार न बाँको भयो विपतितै विष्णु बचाये ॥
 दैत्यराज ढिँग युक्ति जत्र, कोई नहिँ बाकी बची ।
 तत्र मायावी असुरने, अति अद्भुत माया रची ॥

माया निर्मित अंधकार सब जगमहँ छायो ।
 बिद्युत चमकै तीक्ष्ण बिना ऋतु धन धिरि आयो ॥
 नमतै बरषै सर्प व्याघ्र सिंहादिक तरजै ।
 राक्षस प्रेत पिशाच भूतगन घूमै गरजै ॥
 चंडी मुंडी कालिका, लै त्रिसूल घूमत किरत ।
 मारौ काटो सुरनिकूँ, डाँइन करकस ख करत ॥

माया निरमित जनु जगतमहँ चहूँदिशि छाये ।
 निरखी माया प्रबल आसुरी सुर घबराये ॥
 अन्य शरन नहिँ लखि, शरन श्री हरिकी लीन्हौ ।
 है कै परम अधीर विनय देवनि मिलि कीन्हौ ॥
 प्रभु प्रकटे माया नसी, करी कृपा करुनायतन ।
 मनमोहनकी माधुरी, निरखि भये सुरगन मगन ॥

कालनेमि लखि विष्णु सिंह चढ़ि लरिवे आयो ।
 मार्यो तकि तिरशूल असुर यमसदन पठायो ॥
 पुनि माली अति बली सुमाली माल्यवान जव ।
 अस्त्र शस्त्र लै आइ करें घनघोर युद्ध सब ॥
 हरि संहारे देवरिपु, सद्गति शत्रुनिक्कूँ दई ।
 अति प्रसन्नता सुरनिक्कूँ, असुरनिके क्षयतैं मई ॥

वज्रगाणि देवेन्द्र लड़न पुनि बलि सँग आये ।
 अरिक्कूँ सम्मुख लख्यो बहुत कटु बचन सुनाये ॥
 मार्यो तकिक्कूँ वज्र गिर्यो बलि मूर्छित हैक्कूँ ।
 ललि बलि मूर्छित जम्म लड़न सर आयो लैक्कूँ ॥
 जम्म मारि सुरपति दयो, नमुचि सुनत आयो तुरत ।
 अस्त्र शस्त्र लै युद्धमें, रण दुर्मद इत उत फिरत ॥

नमुचि, पाक, बल असुर वान मिलिकैँ बरसाये ।
 इन्द्र, सारथी अश्व ढके सुरगन घबराये ॥
 इन्द्र निकसि बल पाक वज्रतैं दोऊ मारे ।
 मरै नमुचि जब नहीं गिरानभ बचन उचारे ॥
 आर्द्र शुष्क तजि हनौ रिपु, वज्र फैनमय कर्यो हरि ।
 नमुचि शौश छेदन कर्यो, हृदय विष्णुको ध्यान धरि ॥

जीते देवनि शत्रु दैत्य दानव घबराये ।
 ब्रह्मा बाबा डरे तुरत नारन बुलवाये ॥
 कह्यो जाइक्कूँ सुरनि करौ उपरत तुम रनतैं ।
 विधि आज्ञा स्मिर धारि आइ बोले देवनितैं ॥
 अमृत पियौ जय श्री लही, करी कृपा श्री अजित अति ।
 आयसु विधि मानो करो, दैत्यनि को संहार मति ॥

मुनि बचननिक्कूँ मानि युद्धतैं त्रित भये सुर ।
 जयको शंख बजाय इन्द्र हरषित पहुँचे पुर ॥
 बलि सँग मृत सब असुर लाइ इत शुक्र जिवाये ।
 यदपि पराजित भये तदपि नहिँ बलि सकुचाये ॥
 देवासुर संग्राम अरु, क्षीरसिन्धु मन्थन कथा ।
 सुनहिँ पढ़हिँ जे प्रेमतैं, तिनकूँ नहिँ व्यापै व्यथा ॥



[देवता और असुरों द्वारा समुद्र मंथन]

इति श्रीभागवतचरितके चतुर्थाह में देवासुरसंग्राम नामक सप्तम
 अध्याय समाप्त ।

अथ अष्टमोऽध्यायः

[८]

श्रीपशुपति जब सुनी बने हरि नरतैं नारी ।
 रूप मोहिनी लखन भई उत्कंठा भारी ॥
 चढ़े बैलपै लई संग गिरिराजकुमारी ।
 पहुँचे हरिपुर हरषि कामरिपु हर त्रिपुरारी ॥
 करि बिनती हैंसि हर कहैं, नाथ ! बात अदभुत सुनी ।
 मोहन रूप दुराइकैं, आपु बने प्रभु मोहिनी ॥

हरि हैंसि बोले—देव ! भये न्यौं ऐसे उत्सुक ।
 असुर अमृत लै भगे कर्यो तब मैंने कौतुक ॥
 रूप मोहिनी धर्यो आँधरे दैत्य बनाये ।
 सुर संतोषित करे प्याइकैं अमृत छकाये ॥
 इच्छा उत्कट उमापति, तौ पुनि तुमहिँ दिखाउँगो ।
 सरस मोहिनी रूपकी, भौँकी अबहिँ कराउँगो ॥

अन्तरहित हरि भये तुरत हर निरखैं इत उत ।
 उत्सुकता अति प्रबल प्रेमतैं चहुँ दिशि चितवत ॥
 इतनेमें ई लखी नारि उपवनतैं आवत ।
 कंदुक क्रीड़ा करत कपरदी चित्त चुरावत ॥
 दमकै सौदामिनी सरिस, कटि लटपै अति छीन पट ।
 पीन पयोधर भारतैं, नमित फिरत सरबर निकट ॥

पग युम अटपट परत उदर कृश नमत निरंतर ।
 कंदुक श्रमतैं श्वेद बिन्दुयुत मुख अति सुन्दर ॥
 अलकनि पलकनि और कपोलनिकी भलकनिपै ।
 छटक सरसता रही भामिनीके अंगनिपै ॥
 तिरछी चितवनिते लखे, भूलि अवनपौ शिव गये ।
 छाँड़ि शील संकोच सब, मृगनयनी सँग चलि दये ॥

आवत देखे शम्भु चली द्रुत गति मुमुकावति ।
 सकुचि सहमि हँसि चलत मनहुँ मग रस बरसावति ॥
 गाय वृषभ उन्मत्त फिरै करिणी सँग जनु करि ।
 खिसके बल्ल सम्हारि भगै पुनि देखै फिरि फिरि ॥
 बैणी भोटा खाइ जनु, लता चढ़ी नागिनि हिलै ।
 हार हृदयको करन हित, हर सोचैं कैसे मिलै ॥

बढ़े बेगतैं केश पास पकरे त्रिपुरारी ।
 लीन्हें हृदय लगय सहमि सकुची सुकुमारी ॥
 हर हिय नम हरि-वदन इन्दु सम शोभा पावै ।
 इत ये पुनि पुनि कसैं मोहिनी बिचस छुड़ावै ॥
 बिखरी अलंकावलि सुधर, भूमत लागै अति भली ।
 बाहुपाशतै पृथक है, तुरत तहाँतै भगि चली ॥

चली मोहिनी भागि उमापत्ति दौरे परकन ।
 नदी सरोवर शैल फिरैं दोऊ बन उपवन ॥
 ऋषि मुनि आश्रम जाइ दरश दैकरैं कृतारथ ।
 हरि हर दरशन होहिं यही जग साँचो स्वारथ ॥
 तेज पतित पृथिवी भया, स्वर्ण रूप्य आलय भये ।
 समुझी माया मोहिनी, निवृत तुरत हर है गये ॥

तब बोले भगवान—मोहिनी देखी शङ्कर ।
 कहैं शम्भु—दुष्पार तुम्हारी माया प्रभुवर ॥
 है दुस्त्यज दुष्पार कहैं हरि माया मेरी ।
 अब न पराभव करैं होहि माया तब चेरी ॥
 चन्द्रमौलि ! चितपै चढ़ै, चपलाकी चितवन चपल ।
 तो फिर को थिर रहि सकै, होहि चाहिँ जितनो सबल ॥

पुनि हरितैं है विदा उमा सँग चले उमापति ।
 मगमहैं बोले—प्रिये ! लखी हरि मायाकी गति ॥
 मैं हूँ मोहित भयो जीव का करें विचारे ।
 वे बचि जावैं अवसि होहिँ जिन श्याम सहारे ॥
 आये शिव कैलाश पुनि, वृत्त मुनिनि सन सब कह्यो ।
 परम मनोहर मोहिनी—को चरित्र पूरन भयो ॥

इति श्रीभागवत चरितके चतुर्थाहमें शिवमोहिनी चरित नामक
 अष्टम अध्याय समाप्त ।

(मासिक पारायण पन्द्रहवें दिनका विश्राम)

अथ नवमोऽध्यायः

[६]

छप्पय—विवस्वान सुत भये सातवें मनु सुखदाई ।
 वामन बनि भगवान ठगे बलि देह बढाई ॥
 संज्ञा छाया संग व्याह दिनकरने कीन्हों ।
 श्राद्धदेव यम, यमी भये संज्ञाके तीनों ॥
 छायाकी तपती सुता, सुत सावणीं शनैश्चर ।
 करूयो सौतिर्या डाह जत्र, समुझे तत्र सब दिवाकर ॥

संज्ञा छाया छोड़ि गई बन बढवा बनिकें ।
 दुखित दिवाकर भये ससुरतैं सब कछु सुनिकें ॥
 बढवा बनिकें वैद्य अश्विनी कुमार जनाये ।
 संज्ञाकूँ लै संग ससुर दिँग सूरज आये ॥
 ससुर करूयो कछु तेज कम, रवि द्वादश है गये तत्र ।
 विवस्वान को बंश यह, राजन् ! तुमतैं कह्यो सब ॥

अष्टम मनु सावणिं होहिंगे सार्वभौम हरि ।
 नवें दक्षसावणिं प्रकट हरि ऋषभ नाम धरि ॥
 दशम ब्रह्मसावणिं विश्वसेनहु होंगे विभु ।
 एकादश सावणिं धर्म मनु धर्मसेतु प्रभु ॥
 रुद्रसवणीं बारवें, अंग सुवामा श्यामकें ।
 देवसवणीं तेरवें, योगेश्वर हरि नामके ॥

चौदहवें सावर्णिइन्द्र मनु होहि तपस्वी ।
 सत्रायणसुत बृहद्मानु हरि होहि यशस्वी ॥
 यों भविष्य अरु भूत कहे ये मन्वन्तर सब ।
 इन सबको का काज, करूँ ताको बरनन अब ॥
 मन्वन्तरको पुण्यमय, सुनै कथा जे प्रेमतैं ।
 हरिपद पावैं करैं जे, कथा कीरतन नेमतैं ॥

मन्वन्तर पर्यन्त करैं पालन मनु जगकूँ ।
 सब सप्तर्षि समूह बतावैं श्रुतिके मगकूँ ॥
 पृथिवी पालन करैं होहि जे मनुके बंशज ।
 लैकें हरि अवतार करैं पालन सुरपति अज ॥
 पावैं सब ही देवगन, भाग यज्ञ अरु हवनमहँ ।
 सुरपति बनि देवेन्द्र हू, पूजित होवैं सुरनिमहँ ॥

सिद्ध रूप धरि करैं ज्ञान उपदेश निरन्तर ।
 कर्मकांड विस्तार करैं जगमहँ है ऋषि वर ॥
 योगेश्वरको रूप बनावैं ज्ञान सिखावैं ।
 यों सबकूँ दै ज्ञान जगततैं अभय बनावैं ॥
 हरि माया अति प्रबल है, बरनन को नर करि सकै ।
 हरि बिनु या अज्ञानकूँ, दूसर नर नहिं हरि सकै ॥

कहैं परीक्षित—देव ! बने ज्यौ बामन श्री हरि ।
 लघुबनि मित्राकरी बड़े ज्यौ पुनि प्रभु छल करि ॥
 बोले शुक्र—सुनु भूप ! पराजित दैत्य भये जब ।
 अस्ताचल लै जाय जिवाये शुक्र असुर सब ॥
 गुरु सेवा ई अभ्युदय—को कारन बलि जानिकैं ।
 शुक्रहिँ सौँप्यो राज्य तनु, इष्ट देव सम मानिकैं ॥
 २२ फ०

सेवार्तै सन्तुष्ट शुक्र इक यज्ञ रचायौ ।
 नाम विश्वजित विदित वेदविद बिप्र करायौ ॥
 पूजित हैकै अग्नि दिव्य सुन्दर रथ दीन्हों ।
 द्वै अक्षय तूणीर कवच धनु अर्पण कीन्हों ॥
 दीन्हों माला पितामह, दिव्य शंख गुरुने दयो ।
 यों रनको सामान सब, एकत्रित बलिपै भयो ॥

सजि सेना सुर विजय हेतु नृपवर चलि दीन्हें ।
 सुरपुर घेर्यो हृदय रिपुनिके कंपित कीन्हें ॥
 सुर समृद्धि अति रम्य हृदय इन्द्रिनि सुखदाई ।
 बन उपवन बर बृक्ष चहूँ दिशि शोभा छाई ॥
 भुकि भूमैं चूमैं अवनि, सुरतरु फल दल सुमनयुत ।
 मधुकर खग कलरव करहिं, सुर ललना भूमत फिरत ॥

श्यामा सुभगा सदा सुहागिनि बिहरैं बाला ।
 केशपाशमहँ ग्रथित दिव्य सुमननिकी माला ॥
 तिनतैं लैं आमोद अनिल मग सुरभि बखेरै ।
 बनि परिखा नभ गंग अमरनगरीकुँ घेरै ॥
 नहिँ प्रवेश पापी करहिं, पुण्यप्राप्त जहँ भोग सब ।
 गुरु आशिषतैं सुरपुरी, घेरी असुरनि आइ तब ॥

सुरपति गुरु ढिँग जाय कहैं—गुरु ! असुर बड़े कस ।
 ओज तेज उत्साह बढ़्यौ च्यौ असुरनि बल अस ॥
 बोले सुरगुरु—करी कृपा गुरुने असुरनिपै ।
 हारैं हरि बिनु नहीं अबहिं ये स्वर्ग अवनि पै ॥
 तातैं तजिके स्वर्गकुँ, करो प्रतीक्षा कालकी ।
 मेटि सकै नहिं कबहुँ नर, लिखी रेख जो भाल की ॥

गुरु आयसु सिर धारि अमरगन छाँड़ि स्वरगमुख ।
 कामरूप धरि फिरै अवनिपै सहै विविध दुख ॥
 सुरपुर सूनो समुक्ति असुर अधिकार जमायौ ।
 बलिकूँ शुक्राचार्य इन्द्र पदपै बैठायौ ॥
 अश्वमेध शत बलि करै, इन्द्रासन ध्रुव होइ तब ।
 भृगुवंशी द्विज सोचि बिह, करवावै मिलि यज्ञ सब ॥

इति श्रीभागवतचरितके चतुर्थाहमें बलि बिजय नामक नवम
 अध्याय समाप्त ।



अथ दशमोऽध्यायः

[१०]

छुप्पय—अमर अवनिपै फिरैं कपट तनु धरिक्कैं इत उत ।
 अदिति सुतनि दुरदशा समुक्ति अति दुःख भयो चित ॥
 आये कश्यप जवहिं लखी घर अधिक उदासी ।
 पत्नी तनु अति छीन मलिन जनु भूखी प्यासी ॥
 मुनि पूछी कुशलात जव, अदिति दुखित बोली बचन ।
 इन दैत्यनि तव अमरसुत, करे पदच्युत तपोधन ॥

मम सुत यश ऐश्वर्य हीन असुरनिने कीये ।
 दुष्ट दैत्य मिलि दुसह दुःख देवनिक्कूँ दीये ॥
 सुरपुरक्कूँ सुर त्यागि फिरैं सब मारे मारे ।
 साधारन जन सरिस भूमिपै रहैं बिचारे ॥
 सब समर्थ सर्वज्ञ प्रभु, आपु प्रजापति महामुनि ।
 नाथ ! कृपा ऐसी करैं, पावैं सुत ऐश्वर्य पुनि ॥

प्रिया बचन मुनि भये चकित कश्यप मुनि ज्ञानी ।
 पुत्र शोक्तें दुखित अदितिकी पीड़ा जानी ॥
 सोचैं—माया प्रबल बिष्णुकी बिश्व नचावति ।
 मिथ्या मति चित धारि नारि पति पुत्र बतावति ॥
 सोचि समुक्ति बोले बचन, कृष्ण कृपा सब करिङ्गे ।
 सेवातें सन्तुष्ट है, हरि हियगत दुख हरिङ्गे ॥

अदिति कहे—हे देव ! कृपा करि कष्ट मिटाओ ।
 व्रत मन इच्छा पूर्ण करन हित तुरत बताओ ॥
 कश्यप बोले—करो पयोव्रत प्रभु आराधौ ।
 हरिकूँ हियमहँ धारि नियम व्रतके सब साधौ ॥
 अति उत्कंठित अदिति है, बोली—नाथ ! बताइ दें ।
 कहा करूँ त्यागूँ कहा, बिधि विधान समुझाइ दें ॥

बोले कश्यप—है जीवन जा जगमहँ छिनको ।
 हरि आराधन करो पयोव्रत बारह दिनको ॥
 केवल पीकें दूध करो पूजन आराधन ।
 इच्छा पूरन हेतु यही सर्वोत्तम साधन ॥
 वित्तशाठ्यकूँ त्यागिकें, व्रत श्रद्धातें जे करहिं ।
 सिद्ध करें हरि काज सब, अवसि दुःख दारिद हरहिं ॥

हरिपूजन अरु हवन विप्रभोजन बारह दिन ।
 कथा कीरतन करै नृत्य वादन अरु गायन ॥
 जा विधितैं जे भक्ति सहित श्रीहरिकूँ सेवैं ।
 प्रभु प्रसन्न है इष्ट वस्तु निश्चय करि देवैं ॥
 अदिति सुने व्रतके नियम, अति प्रसन्न मनमहँ भई ।
 सर्वयशमय पयोव्रत, विधितैं करिबे लगि गई ॥

निरखिअदिति व्रत नियम भये अति तुष्ट गदाधर ।
 भये प्रकट अखिलेश चतुरभुज बिष्णु मनोहर ॥
 सम्मुख श्रीपति लखे प्रेममहँ बिह्वल माता ।
 परी दण्डवत भूमि निरखि हरि भवभयनाता ॥
 अति उत्कंठित भरित 'हिय, लज्जातें पुनि झुकि गई ।
 विनय करन इच्छा भई, गद्गद बानी रुकि गई ॥

पुनि सुरमातु संहारि अपनपौ बोली बानी ।
 हे अनादि ! अखिलेश ! अखिलपति ! इच्छादानी ॥
 हे सुररक्षक देव ! विष्णु ! अज भंजन खल दल ।
 हे यज्ञेश्वर ! यज्ञरूप ! शरणागतवत्सल ॥
 निरखै कृपा कटाक्ष तैं, नासै तिनकी सब व्यथा ।
 सिद्ध मनोरथ करै पुनि शत्रु, विजयकी का कथा ॥

हँसि हरि बोले—मातु बात सब हियकी जानी ।
 कीन्है सुर श्रीहीन बड़े दिति सुत अभिमानी ॥
 स्वर्गहीन सुत भये विजय चाहो तुम तिनिकी ।
 मिलै स्वर्ग ऐश्वर्य वृद्धि होवै देवनिकी ॥
 यद्यपि असुर अजेय हैं, गुरुसेवामहँ निरत सब ।
 होहिं न निष्फल मम भजन, तदपि करहुँ कछु यत्न अब ॥

निज महत्त्वकूँ त्यागि बनूँ लहुरो देवनितैं ।
 तब सुत बनिकैं करूँ कपट छल इन दैत्यनितैं ॥
 कश्यप तपमय बीर्य माँहिँ हौँ होहुँ अवस्थित ।
 पति परमेश्वर समुक्ति करो सेवा सब समुचित ॥
 काहूतैं कहियो न जिह, यौ मोतैं प्रभु कहि गये ।
 यो दैकैं वरदान सिख, श्रीहरि अन्तरहित भये ॥

अदिति गर्भमें कछुक दिवसमहँ हरि अज आये ।
 दम्पति उर आनन्द भयो सुर सिद्ध सिहाये ॥
 जानि गर्भगत विष्णु आइ विधि विनती कीन्हीं ।
 शुभ मुहूर्त शुभ लग्न स्वतः सब शिव करि दीन्हीं ॥
 भादौ शुक्ला द्वादशी, अभिजितयुत अति दिन परम ।
 अज अविनाशी अदिति घर, लीयो बामन बनि जनम ॥

इति श्रीभागवत चरितके चतुर्थाहमें श्रीवामनप्रादुर्भाव
 नामक दशम अध्याय समाप्त ।

अथ एकादशोऽध्यायः

[११]

छप्पय—रूप चतुर्भुज गदा शङ्ख चक्रादिक घारे ।
 सुन्दर श्याम शरीर कमलमुख कच घुँघुरारे ॥
 कर कंकन गल्ल माला करघनी कटिमहँ सौहै ।
 मणि मुक्ता मय मुकुट मुनिनिके मनकुँ मोहै ॥
 दरशन करि कश्यप आदिति, सहसा भौचक्के भये ।
 लीलामहँ बाघा लखी, पुनि वामन बटु बनि गये ॥

जात कर्म संस्कार भये पुनि वामन बाढे ।
 घुटुअनके बल चलै, लगे पुनि हँवै ठाढे ॥
 पाँच बरसके भये पिता उपनयन करायौ ।
 रवि सावित्री दई जनेऊ गुरु पहिनायौ ।
 कश्यप दीन्हौ मेखला, अजिन अरुणि उत्तम दयो ॥
 मातातै कौपीन पट, दण्ड चन्द्रमातै लयो ॥

घन कुबेरने दयो पात्र भिक्षाको भारी ।
 माँ जगदम्बा उमा बिहँसिके भिक्षा डारी ॥
 लोभी वामन बने लाभतै लोभ बढ़ायो ।
 जग ठगिबेके हेतु कपट को बेष बनायो ॥
 अश्वमेध नृप बलि करै, चले ब्रह्मचारी सुनत ।
 विश्वमार लाटै अखिल, पृथिवी पग पगपै नमत ॥

दण्ड कमण्डलु लिये ओढ़ि तनपै मृगछाला ।
 पहिन मेखला मूँज चले बलिकी मखशाला ॥
 तेजपुंज सम लखे बिप्र बामन ब्रतधारी ।
 सहसा सबई भये खड़े लखि बटु लटधारी ॥
 भये प्रभावित बिप्रगन, अधिक मोद मन बलि भयो ।
 पद पखारि पुनि अर्घ्य दै, बैठनकूँ आसन दयो ॥

विधिवत पूजाकरी हृदय फूले न समाये ।
 पादोदक सिर धारि पान करि अति हरषाये ॥
 रानी पुनि पुनि लखै रूपपै बलि बलि जाई ।
 चरनामृत करि पान कहैं—गङ्गा घर आई ॥
 तनु पुलकित मन मोदयुत, पात्र निरखि अतिशय मगन ।
 बहु स्वागत सत्कार करि, दानी बलि बोले वचन ॥

कहो बिप्रसुत ! कृपा दासपै कीन्हों कैसे ।
 है अति दुरलभ दरश बिना कारन बटु ऐसे ॥
 मेरे मन अनुमान आपु कछु माँगन आये ।
 किन्तु निरखि द्विज भीर बाल मनमहँ सकुचाये ॥
 मम ढिँग कछु न अदेय है, शङ्का तजि द्विजवर ! कहहु ।
 अन्न, पान, धन, धान, पट, जो इच्छा सोई गहहु ॥

चाहो मनहर महल गुदगुदी सुखकर शैया ।
 अथवा गज रथ अश्व दूधकी सूची गैया ॥
 या जस बौने आप बौनटी दुलहिनि चाहो ।
 अबई कलैं बिबाह न मनमहँ बटु सकुचाओ ॥
 बहु सम्पतियुत ग्राम अरु, जो चाहो सोई कहहु ।
 अथवा मेरे महलमहँ, भूपति बनि द्विजवर रहहु ॥

सुनि नृप बलिकी बात बिप्र कपटो सुख पायौ ।
 असुर फँसावन हेतु कपटको जाल बिछायौ ॥
 बूढ़े बाबा सरिस कहैं—बलि ! तुम बड़भागी ।
 क्यों न होहि अस शील जहाँ भार्गव गुरु त्यागी ॥
 पिता विरोचन बिप्र हित, प्राण दये प्रन तज्यो नहि ।
 भये भक्त प्रह्लाद नर-हरि प्रकटाये कष्ट सहि ॥

सत्यहीन अरु कृपन भये तुमरे कुल नाहीं ।
 असुर वंशको सुयश व्याप्त सबरे जगमाँहीं ॥
 कल्पवृक्षके सरिस भये पूर्वज तुमरे सब ।
 इच्छा पूरन करो सबनिकी तुमहू नृप अब ॥
 हिरनकशिपु हिरनाच्छहू, प्रपितामहँ तुमरे भये ।
 लड़े बिष्णुतैं समरमहँ, नाम अमर जग करि गये ॥

हिरण्याक्ष नहिँ समरमाँहिँ काहूतैं हार्यो ।
 बनिक्कें बिष्णु बराह कपटतैं ताकूँ मार्यो ॥
 हरि हनि भये हताश पराजित आपुहिँ मान्यो ।
 बन्धु मृत्यु सुनि हिरनकशिपुने सर सन्धान्यो ॥
 चले बिष्णुतैं लड़न हित, सोवततैं श्रीपति जगे ।
 देखि वीरके तेजकूँ, तजि शैया पुरतैं भगे ॥

नहीं दुबकिये जोग ठौर देख्यो श्रीपति जब ।
 चारि सूक्ष्मतनु असुर हृदयमहँ प्रविशे डरि तब ॥
 खोजे स्वर्ग पताल भूमिपै पतो न पायो ।
 समुक्ति भगोड़ो छोड़ि लौटि अपने घर आयो ॥
 तुम उपजे तिहि वंशमहँ, विश्वविदित रणवीर हो ।
 याचक इच्छा कल्पतरु, सब दानिनिमहँ वीर हो ॥

राजन् ! तुमतै' तनिक भूमि हौं आयो याचन ।
 केवल जपके हेतु लगै जामें सुख आसन ॥
 दान ग्रहन अति अधम तरु निर्वाह करन हित ।
 लैवेमे नहिं दोष अधिक तृष्णा है निन्दित ॥
 केवल अपने पाँइतै', तीनि पैर पृथिवी चहूँ ।
 अधिक लेउँ नहिं एक डग, सत्य सत्य भूपति कहूँ ॥

हँसि बलि बोले—वटो ! बात वृद्धनिवत भाखो ।
 किन्तु स्वार्थमहँ बुद्धि तनिक वामन नहिँ राखो ॥
 मोकूँ करि सन्तुष्ट तीनि पग पृथिवी भिन्ना ।
 माँगी, मानो मिली नहीं स्वार्थकी शिन्ना ॥
 कपटी बटु बोले—बिभो, हौं लोभी वामन नहीं ।
 तुरत देहु संदेह मन, फिर नाहीं करदै' कहीं ॥

इति श्रीभागवत चरितके चतुर्थाहमें वामन याचना नामक ग्यारहवाँ
 अध्याय समाप्त ।



अथ द्वादशोऽध्यायः

[१२]

दोहा—कपटी बामनको कपट, नहीं समुझे बलिराज ।
 दैन तीन डग भूमिमें, तिनि अति लागी लाज ॥
 छप्पय—लै सुवर्ण जलपात्र कहै बलि—अच्छा लोजे ।
 शुक्र बीचमहँ रोकि कहै—नृप ! भूमि न दीजे ॥
 यह बटु बामन नहीं बदलिके बेष बनायो ।
 कमलापति यह बिष्णु कपटतैं ठगिवे आयौ ॥
 जब फैलावै पैर जिह, बटु बिराट बनि जायगो ।
 राज्यभ्रष्ट असुरनि करै, अमरनि आविष बनायगो ॥

धर्मभीरु बलि कहै—गुरो ! ज्यों पाप कमावै ।
 दान धर्ममहँ व्यरथ आपु रोड़ा अटकावै ॥
 वैसे ही बटु सकुचि बहुत धन दान न चायें ।
 उल्टी पट्टी तऊ आपु पुनि मोइ पढ़ायें ॥
 भई कहावत सत्य यह, जो प्रसिद्ध जग बात है ।
 बामन बामनकूँ लखै, कूकर वत गुराति है ॥

बोले शुक्राचार्य—व्यर्थ तू बात बनावै ।
 धर्म मर्म बिनु लखे मोइ उपदेश सिखावै ॥
 अर्थवृद्धि, यश, भोग, धर्म अरु स्वजन हेतु नर ।
 करै द्रव्य व्यय सदागृहीको यह मग सुलकर ॥
 अन्न वस्त्र बिनु नारि अरु, बालक भूखे घर मरै ।
 करै दान यश हेतु जे, बुध तिनकी निन्दा करै ॥

धरमहँ बालक नारि मातु पितु तजिकैं भाई ।
 बिनु पूछे जो दान करें सो पाप कमाई ॥
 बोले बलि—गुरुदेव ! दान दै दीन्हों मनतैं ।
 अब कस झूठो बनूँ ब्रह्मचारी बामनतैं ॥
 कहिकै देऊँ दान नहिं, तो पीछे पछिताऊँगो ।
 दोषी हौं है जाऊँगो, अन्त नरकमहँ जाऊँगो ॥

सुनिकैं शुक्राचार्य कहैं—तू धर्म न जानैं ।
 धर्म तत्त्व अति गूढ़ बिज्ञ नर ही पहिचानैं ॥
 हौं देंगे, ये वचन, अर्थ व्यापकके द्योतक ।
 सदा कहैं नहिं देहिं धर्म यशके ये शोषक ॥
 बिनु बिचार दै देहिँजे, ते पीछे माँगत फिरहिँ ।
 ऐसे दाताकुँ सदा, भिक्षुक नित पीड़ित करहिँ ॥

नहीं सर्वथा करै न निज सर्वस्व गँमावै ।
 भिक्षुक आवै देइ कछू कछु टाल बतावै ॥
 अपनी वृत्ति बचाय बित्त सम करै दान नित ।
 लोक और परलोकमाँहिँ रखै अपनो चित ॥
 रक्षा तन धनकी करै, सदा सत्य बोले वचन ।
 कहूँ असत्य बोले बिबश, है प्रसंगबस बिशजन ॥

हँसीखेलमहँ और कामिनीक्रीड़ा माहीं ।
 होहि जीविकानाश प्राण काहूके जाहीं ॥
 निज प्रातनिके हेतु विप्र गौ रक्षा होवै ।
 तो विशेष नहिँ दोष सत्यकुँ यदि नर खोवै ॥
 मातु पिता अति वृद्ध हैं, बालक अति अज्ञान हैं ।
 जस तस प्राणनिकूँ रखें, मुख्य देहमहँ प्राण है ॥

होहि स्वार्थ नहि नाश काम सुखहू बचि जावै ।
 बाधा काहू भौंति जीविकामहैं नहि आवै ॥
 होहि न अपयश जगतमौंहि कुत्सित कामनितैं ।
 गृहोधर्म है जिही शास्त्र सम्मत बचननितैं ॥
 हाथ पाँवकुँ बचानों, मूँजीकुँ टरकावनों ।
 कछु असत्य कछु सत्यतैं, अपनो काम चलावनो ॥

सुनि बलि बोले बोर बचन गुरुतैं सकुचाई ।
 भगवन् ! सुन्दर स्वार्थ सिद्ध हित नीति बताई ॥
 किन्तु लोभ बश देव ! सत्यकुँ कैसे त्यागूँ ।
 कैसे रिपु ललकारि, युद्धतै डरिकें भागूँ ॥
 हाँ कहि ना करिबो नहीं, दितिकुलके अनुरूप जिह ।
 पिता प्रान द्विज हित दये, प्रन नहि छौंढ्यो पितामह ॥

शिवि दधीचिने तजे प्रान दुस्त्यज हू परहित ।
 भूमि आदि अति दुच्छ भोग जगके जे परमित ॥
 नाशवान घन, घरा, विश्वके सबहि पदारथ ।
 अविनाशी यश एक यही जग जीवन स्वारथ ॥
 सहज शत्रु सँग शूरता—सहित समरमहैं मरन है ।
 किन्तु पात्रकुँ प्रेमयुत, द्रव्य दैन अति कठिन है ॥

यदि ये हैं भगवान बिष्णु सब जगके पालक ।
 वेष बदलि बिश्वेश बने बटु बौने बालक ॥
 तो चिन्ताको कौन बात ये मल्लके स्वामी ।
 जो जे चाहैं करै अखिलपति अन्तरयामी ॥
 सब साधनको यही फल, होहि कृष्ण पद सुहृदमति ।
 यह मेरो सौभाग्य अति, याचन आये विश्वपति ॥

बिप्र बेषतैं दंड देहिँ वा मोकुँ मारै ।
 अथवा धन गृह राज्य छीनिक्कें देश निकारै ॥
 दीयो जो कछु दान करौ नहिँ फिरि हौं नाही ।
 धन तो आवत जात रहै कीरति जगमाहीं ॥
 चाहै बामन बिप्र हों, शत्रु होहि अथवा सुहृद ।
 देहुँ तीन डग भूमि अब, पग लघु हों अथवा बृहद ॥

लखि बलिकी हठ शुक्र क्रोध करि बोले बानी ।
 अरे मंदमति ! मूर्ख ! अज्ञ ! शठ ! पंडितमानी ॥
 साधारण द्विज भिक्षु मोइ निज आश्रित जानै ।
 करै उपेक्षा अधम बात मेरी नहिँ मानै ॥
 जा तेरो ऐश्वर्य धन, छिनमहँ सब नसि जाइगो ।
 गुरु आज्ञा अवहेलना—को फल अब तू पाइगो ॥
 इति श्रीभागवत चरितके चतुर्थाहमें बलि शुक्राचार्य सम्वाद
 नामक बारहवाँ अध्याय समाप्त ।



अथ त्रयोदशोऽध्यायः

[१३]

भये देव प्रतिकूल भाग्यने पलटो खायो ।
 कहाँ इन्द्रपन अटल करनहित यज्ञ रचायो ॥
 गुरुने दीयो शाप पाप पूरबके प्रकटे ।
 तऊ न विचलित भये दान दैकुँ नहिँ पलटे ॥
 आपने जानै जीव सब, कारज सुखकर ही करहिँ ।
 किन्तु दैववश होहिँ फल, हाथ हवन करतहु जरहिँ ॥

जल कुश लै संकल्प पद्यो भू बामन दीन्हीं ।
 नन्हें नन्हें हाथ बढ़ाये बटु लै लीन्हीं ॥
 अब पुनि बामन बड़े लोभवश पग फैलाये ।
 उनके तनमहँ भूमि दिशा नभ सबहिँ समाये ॥
 भुवन चतुरदश भूत सब, काल करम मनु इन्द्रसुर ।
 बटु बामनके देहमहँ, चकित होहिँ निरखहिँ असुर ॥

शुक्र वचन प्रत्यक्ष भये बटु बामन बाढ़े ।
 अद्भुत अनुपम रूप असुर सब निरखै ठाढ़े ॥
 दंड कमंडलु त्यागि अन्न आयुष निज धारे ।
 लखि बिराटकुँ कँपै असुर सब भयके मारे ॥
 चक्रसुदरशन, घनुष, सर, गदा, खड्ग धारन किये ।
 दात, शङ्ख, क्रीडाकमल, आठहुँ हाथनिमहँ लिये ॥

फूली जनु कनैर अष्ट कर शस्त्र विराजै ।
 अंगद कुंडल मुकुट मेखला अंगनि आजै ।
 भ्रमर निकर गुञ्जायमान बनमाला सुन्दर ।
 मधु लोलुप मधु पियै गान कर मादक मधुकर ॥
 लम्ब तडङ्गे विश्वमय, बने विष्णु वामन छली ।
 जब नापै पगतै मही, सो शोभा अति ई भली ॥

सागर कानन शैल नदी, नद, सर निरभरिनी ।
 सात भूमि पाताल सहित सबरी यह धरनी ॥
 बलिकी जहँ लागि भूमि नापि बामनने लीन्हीं ।
 फैलाये पग विशद पाद अन्तरगत कीन्हीं ॥
 कायातें आकाशकूँ, अष्ट करनितें अष्ट दिशि ।
 गयो द्वितिय पद स्वर्गमहँ, जन तप सत्यहुमें प्रविशि ॥

फोर्यो अंडकटाह चरन नख पार गयो जब ।
 वही सलिलकी धार कमण्डलु बिधि धारी तब ॥
 विष्णुपदी पुनि भई पखारे पद श्रीहरिके ।
 श्रीगंगाजी चली भूमिपै बहीं उतरिके ॥
 शतयोजनपै बैठिके, जे गंगा गंगा कहहिं ।
 ते नर पावें परम पद, भूखे नंगे नहिं रहहिं ॥

जग जननी माँ गङ्गा ! अंग अंग सुख सरसावें ।
 मन पुलकित पयपान लहर लख हिय हरसावें ॥
 पाप पहाड़ ढहाय पुण्यको पोत उठावैं ।
 तापै चढ़ि माँ ! भक्त सहज भवनिधि तरि जावैं ॥
 प्रभु पद-रज तुलसी सहित, ब्रह्म कमण्डलुतें निकसि ।
 सब स्वर्गनि पावन करति, गिरि भू पुनि जलनिधि प्रबिसि ॥

द्वै डगतै जग नापि बने पुनि हरि बटुबालक ।
 लखि छल सबई दैत्य भये क्रोधित पुरपालक ॥
 मारौ, यह द्विज नाहिं बिष्णु छलिया असुरारी ।
 स्वामीकुँ छलि ठगी सबहिँ सम्पत्ति हमारी ॥
 जीवित जान न पाइ जिह, अब यमपुरको मग गहै ।
 क्रोधित असुरनितै बिहँसि, महा मनस्वी बलि कहै ॥

अरे असुरगन ! बात सुनो, मति शस्त्र चलाओ ।
 असमय लखि तुम तुरत लौटि रनतै सब जाओ ॥
 समय सबल ही करै-करै दुरबल वह भाई ।
 काल जनित यह विपत्ति, असुरकुलपै अब आई ॥
 मन्त्र, बुद्धि अरु दुर्गबल, अब न काम कुछ करिजे ।
 बनि विराट बटु बिप्रवर, सरबसु हमरो हरिजे ॥

सुनिकें बलिकी बात लौटि सुररिपु सब आये ।
 बाद बिबाद न बदै असुर पाताल पठाये ॥
 अन्युत आशय समुझि गरुड बलि बाँधे बरबस ।
 जगमहँ हाहाकार मच्यो हरि छीन्यो सरबस ॥
 चलित चित्त बलि नहिँ भये, हरयो बिष्णुने भुवन घन ।
 लखि लज्जित बलितै बिहँसि, बटु बामन बोले वचन ॥

हे दानिनिमहँ श्रेष्ठ ! तीनि पग पृथिवी दीन्हीं ।
 प्रथम पादतै स्वर्ग द्वितियतै भू सब लीन्हीं ॥
 तीसर पगके हेतु अवनि कहूँ अनत बताओ ।
 करो प्रतिशा पूर्ण नहीं नरकनिमहँ जाओ ॥
 दान प्रतिशा प्रथम करि, पुनि पूरी जे नहिँ करहिँ ।
 ते पापी पामर पुरुष, सब नरकनिके दुख सहहिँ ॥

कनक सरिस बलि बहुत दुसह दुख अनल तपाये ।
 परि न व्यथित बलि भये मनस्वी नहिँ घबराये ॥
 बोले—हे निश्वेश ! सत्यतें नहिँ मुख मोरूँ ।
 तीन पैरकी करी प्रतिज्ञा ताहि न तोरूँ ॥
 तीसर पग मम सिर धरो, बिना बात बटु च्यौ लड़ौ ।
 दान बस्तुकी अपेक्षा, दाता तौ सब विधि बड़ौ ॥

हो हरि माता पिता सुहृद सर्वस्व हमारे ।
 पकरि पितामह तरे पोत पदपदुम तिहारे ॥
 बन्धनतैं नहिँ डरौं नरकतैं भय नहिँ प्रभुवर ।
 स्वामी देवै दंड होहि सेवककूँ सुखकर ॥
 वैर भावतैं भक्ति करि, तरे असंख्यनि असुरगन ।
 जग सुख भोग्यो अंतमहँ, लह्यो परमपद त्यागि तन ॥

इति श्रीभागवतचरितके चतुर्थाहमें बलिबन्धन नामक
 तेरहवाँ अध्याय समाप्त ।

अथ चतुर्दशोऽध्यायः

[१४]

छप्पय—बलि वामन बतराई भये प्रह्लाद उदित रवि ।
 अरु ननयन पट पीत कृष्ण तनु अति मनहर छवि ॥
 निरखि पितामहँ नेह नीर बलि नयननि छायाँ ।
 पूजा कैसेँ करहिँ बँधे ही शीश नवायौ ॥
 बलि सिकुर्यो संकोच बश, वामन हरि सन्मुख खरे ।
 पुलकित तनु प्रह्लाद जी, है प्रसन्न प्रभु पग परे ॥

पुनि बोले प्रह्लाद—प्रभो ! यह अति भल कीन्हो ।
 दयो इन्द्रपद आपु आपु ही पुनि हरि लीन्हो ॥
 धन बैभवमें कहा होहि तब चरननिमहँ रति ।
 धन मदमहँ मदमत्त करै नर अघ अति नितप्रति ॥
 विनती करि प्रह्लाद जो, पुनि कीयो चरननि नमन ।
 तब बिन्ध्याबलि बलिप्रिया, बिनय सहित बोली बचन ॥

करता भरता और जगतके हरता तुम हरि ।
 अज्ञ सहै दुख व्यर्थ राज धनमहँ ममता करि ॥
 का हम दीयो देव ! आपु आपनो स्वीकार्यो ।
 यों कहि बैठी सती फेरि विधि बचन उचार्यो ॥
 बिधि बोले—विश्वेश बिभु, बलि सरवसु अरपन कियो ।
 फिर उदार यश असुरकुँ, बचन करि च्यों दुख दियो ॥

बिधिके सुनिकें बचन कहैं हरि हैंसिके बानी ।
 ब्रह्मन् ! तुम सर्वज्ञ वेदवित् पंडित जानी ॥
 जनम, करम, ऐश्वर्य, अवस्था अरु सुन्दर तन ।
 विद्या धन ये सबहिं प्रशंसित जगमें हैं गुन ॥
 इन सबमहँ मद रहतु है, धनमद अतिही प्रबलतम ।
 धनमदमहँ उनमत्त नर, नेत्र सहित हू अंध सम ॥

अपने आगे धनी गनहिं नहिं काहू जनकूँ ।
 बढै लाभतें लोभ पाप करि जोरै धनकूँ ॥
 तातैं जापै कृपा करहुँ हों सब मदहारी ।
 नासूँ धन ऐश्वर्य बनाऊँ ताहि भिखारी ॥
 धन, पशु, पुत्र, कलत्र जे, करें विधन हरि भजनमहँ ।
 देखि सकहुँ नहिं तिनहिं हों, नासि लेउँ निज शरनमहँ ॥

जे जन सब कुछ त्यागि शरन मेरीमहँ आवैं ।
 ते तजि सब अभिमान निरन्तर मम गुन गावैं ॥
 जाति बरन अभिमान करें नहिं धनमहँ ममता ।
 परहितमहँ नित निरत तजैं सब मद उद्धतता ॥
 त्यागि मान मद सबनिमहँ, निरखें श्री भगवान हैं ।
 सब अनर्थके मूल ये, मिथ्या ही अभिमान हैं ॥

माया मोहित जीव जगतमहँ सुख दुख देखें ।
 किन्तु भक्त सबमाँहिँ निरन्तर मोकूँ पेखें ॥
 हरि जस राखें रहैं खवावैं जो सो खावैं ।
 राखें जहँ रहि जायँ विष्णु बाँधें बँधि जावैं ॥
 ऐसी जिनकी मति सदा, कृपा प्रतीक्षा नित करहिं ।
 परम अनुग्रहपात्र मम, ते भवसागरतें तरहिं ॥

ब्रह्मन् ! बलिने जीति लई दुर्जय मम माया ।
 अजर अमर हूँ गई कीर्ति अरु इनकी काया ॥
 धन सम्पत्तितै' हीन बँधे बन्धनमहँ भूपति ।
 करे तिरस्कृत सुरनि यातना हू दीन्ही अति ॥
 दयो भयङ्कर शाप गुरु, जाति बन्धु सब तबि गये ।
 छल करिकेँ सरबसु हर्यो, तोऊ बिचलित नहिँ मये ॥

यों बिधिकूँ समुझाइ कहैं बलितै' बामन हरि ।
 इन्द्रसेन नृपवर्य ! करो मम आयसु सिर धरि ॥
 सुतल लोकमहँ बसौ दिव्य होवै तब सब अँग ।
 द्वारपाल बनि रहूँ द्वारपै हौं तुम्हरे सँग ॥
 भक्तानुग्रह निरखि बलि, बोले है गद्गद बचन ।
 अनुकम्पा अनुपम करी, हे अच्युत ! अशरनशरन ॥

पुनि हरि आयसु पाइ शुक्र मल पूर्ण करायौ ।
 बलि बामनको सुयश बिहँसि बलि गुरुने गायौ ॥
 यों करि सरबसु दान दैत्यपति अति हरषाये ।
 जगबन्धनकूँ, तोरि बिष्णु आधीन बनाये ॥
 आगे करि प्रह्लादकूँ, जाति बन्धु सब सँग लये ।
 रक्षक प्रभु वामन बने, सुतल लोककूँ चलि दये ॥

दोहा—रहैं सुतलमें बलि सतत, आगे होवें इन्द्र ।
 जिनके द्वारे छरीलै, निवसहिँ नित्य उपेन्द्र ॥

छप्पय—बलिके द्वारे द्वारपाल बनि बसै' जगत्पति ।
 बलि विरुद्ध जे होहिँ करै' तिनकी ते दुरगति ॥
 इक दिन रावन जाइ कहे बलितै' बल गरबित ।
 बिष्णु विजय हौं करूँ काज कीयो जिनि निन्दित ॥
 बलि बोले—पितु पितामह, हिरनकशिपु हरि सँग लरे ।
 श्री नरहरि बनि बिष्णुने, इने कान कुंडल गिरे ॥

मृतक असुरके प्रथम जाइ कुण्डलहिं उठाओ ।
 तब उन हरितें लड़न हेतु तिनके ढिँग जाओ ॥
 ठसतैं मस नहीं भयो लगायो रावन बल सब ।
 हँसि बोले बलि-वीर ! बिष्णु बल कछु समुके अब ॥
 जा कुण्डलकुँ कानमहँ, जे पहिनत ते हने हरि ।
 विजय प्राप्त कैसे करो, तिनि प्रभुतैं तुम युद्ध करि ॥

बलि बामनको विजय चरित यह नृपवर ! गायो ।
 अब तक बलि को सुयश चतुरदश भुवननि छाँयो ॥
 सुतल लोक बलि गये बिष्णु नित वहाँ बिराजै ।
 बलि वैभवकुँ निरखि अमर सुरपतिहू लाजै ॥
 यों बलि छलिके बिष्णुने, स्वर्ग-राज्य देवनि दयो ।
 अदिति कामना पूर्ण करि, पुनि उपेन्द्र पदहू लह्यो ॥

इति श्रीभागवत चरितके चतुर्थाहमें उपेन्द्रावतार नामक चौदहवाँ
 अध्याय समाप्त ।

अथ पञ्चदशोऽध्यायः

[१५]

विबिध वेष वपु धारि विष्णु विश्वेश्वर बिहरें ।
 रहें सदा रवि किन्तु कहें नर—सूरज निकरें ॥
 कच्छ मच्छ बाराह कबहुँ नरहरि तनु धारें ।
 साधुनि रक्षा करें दैत्य दानव खल मारें ॥
 लोक विनिन्दित मत्स्य तनु, लीलातैं श्री हरि धर्यौ ।
 प्रलय सरिस घूमत फिरे, गो द्विज सुर कारज कर्यौ ॥

बोले शुकतैं नृपति—मत्स्य प्रभु चरित सुनावें ।
 च्यौ हरि ऐसे विश्व विनिन्दित वेष बनावें ॥
 शुक हँसि बोले—भूप ! विष्णु घटघटके बासी ।
 बन्दित निन्दित कछु न विश्वपति अज अविनासी ॥
 धेनु, बिप्र, सुर, संत अरु, वेदनिकी रक्षा निमित्त ।
 धर्म अर्थ रक्षित रहैं, धारें तनु जग हित अजित ॥

धरम मूल भगवान धरम धरनीकुँ धारें ।
 जगमहँ होहि न धर्म मातु संतातकुँ मारें ॥
 दृढ़तर रक्षित धर्म करै रक्षककी रक्षा ।
 लैकें हरि अवतार धर्मकी देवै शिखा ॥
 सत्य सनातन धर्मकी, प्रभु युग युग रक्षा करत ।
 जलचर थलचर गगनचर, धर्म हेतु हरितनु धरत ॥

प्रथम एकरस रह्यो धरम सतयुग ही होवै ।
 किन्तु कपट व्यवहार नित्यता नरकी खोवै ॥
 पिप्पलादि मुनि पत्नि परीक्षा लई धरम जब ।
 कहे अटपटे बचन सती अति क्रुद्ध भई तब ॥
 पतिव्रताके शाप वश, धर्म बृद्धिद्वययुत भये ।
 त्रेता, द्वापर, सत्य, कलि, तबईतें युग बनि गये ॥

होहि धर्मकी हानि तबहिं हरि प्रकटित होवें ।
 तानि दुपट्टा अन्य समय पयनिधिमहँ सोवें ॥
 जब जस अवसर लखैं तबहिं तस वेष बनावें ।
 नाना लीला करैं वेद हू पार न पावैं ॥
 नैमित्तिक लय जब भयो, ब्रह्माजी निद्रित भये ।
 सत्यव्रत राजर्षि हित, श्रीहरि मछली बनि गये ॥

कृतमालामहँ करहिं द्रविणपति जलतैं तरपन ।
 अञ्जलिमहँ लघु मत्स्य निरखि कीयो जल अरपन ॥
 मछली हैकें दीन कहे—नृप ! रक्षा कीजै ।
 आई तुमरी शरन सत्यव्रत ! आश्रय दीजै ॥
 दीन बचन सुनि लाइ नृप, कलश रखी सो बढ़ि गई ।
 नाद, सरोवर, तालमहँ, धरी तहाँ लम्बी भई ॥

एक दिवसमहँ मत्स्य बढ़यो नृप चकित भये अति ।
 बाढ़ै छिन छिन माँहि बृद्धिकी अति अद्भुति गति ॥
 शतयोजन सर घेरि लियो नहिं बृद्धि रुकी जब ।
 हैकें अतिही दीन भीन नृपतैं बोली तब ॥
 नृप ! निर्बाह न होहि मम, सर छोडो हौं बड़ी बहु ।
 कैसे जीवित रह सकूँ, सोचि समुझि भूपति कहहु ॥

विस्मित नृपवर भये बिहँसिकें बोले बानी ।
 नहीं मत्स्य हैं आपु बिष्णु अन्यय हों जानी ॥
 काहे कारन धर्यो रूप मछलीको प्रभुवर ।
 नित नवलीला करो भक्त भयहारी सुखकर ॥
 हरि हँसि बोले—सात दिन, महीं होवै त्रैलोक्य लय ।
 एक होहिं सातहुँ उदधि, जगत होहि सब सलिलमय ॥

मम इच्छातैं तरनि निकट इक तुमरे आवै ।
 सप्तर्षिनिके संग चढ़ावै तुमहिं बचावै ॥
 बासुकि वरत बनाइ सींग मेरेमहँ बाँधौ ।
 जल बिहार मम संग करौ परमारथ साधौ ॥
 कहि हरि अन्तरहित भये, करैं प्रतीक्षा भूप अब ।
 अति उत्कंठा हिय बड़ी, आवै नौका दिव्य कब ॥

सात दिवस जब भये भई पृथिवी जलमय सब ।
 आई नौका एक ऋषिनि सँग चढ़े भूप तब ॥
 बाँधी शफरी सींग प्रलय जलमहँ बिचरैं हरि ।
 पूछे पावन प्रश्न नृपतिने अति बिनती करि ॥
 जो जगमय जगतेँ पृथक, देहिं ज्ञान गुरु रूप घरि ।
 गुरुके गुरु हरि हो तुमहिं, नाम सुमिरि बहु गये तरि ॥

देहिं मोइ उपदेश जगतगुरु सबके स्वामी ।
 देहिं ज्ञान का अश अंघ नर लोभी कामी ॥
 परमदेव, गुरु, पिता, सुहृद सम्बन्धी सब तुम ।
 छाँड़ि जगतकी आश शरन आये तुमरी हम ॥
 सुनत नृपतिके बचन हरि, मुस्काये प्रमुदित भये ।
 फिर भूपति सब ऋषिनिके, प्रश्ननिके उत्तर दये ॥

जगमहैं मत्स्यपुराण कहैं पंडित जन जाकूँ ।
 ते नर प्रभुपद पाहिं पढ़ें श्रद्धातै वाकूँ ॥
 यों विश्वंभर विष्णु रूप मछलीको धार्यो ।
 हयग्रीय खल दैत्य पकरि पाताल पछार्यो ॥
 भक्त भूप रक्षा करी, ज्ञान ऋषिनिके सँग दयो ।
 सुनत मोहतम नसि गयो, ततछिन भव भय भगि गयो ॥

परम पुण्यप्रद मत्स्यचरित जे सुनैं सुनावैं ।
 प्रभु पद प्रकटै प्रेम परमपद ते नर पावैं ॥
 सुनि शफरी हरि चरित परीक्षित अति हरषाये ।
 कथा प्रसंग चलाय, सामयिक बचन सुनाये ॥
 तेरह मन्वन्तर कथा, नाथ कृपा करिकैं कही ।
 वैवस्वत मनु वंशको कहहु कथा जो बचि रही ॥

इति श्रीभागवतचरितके चतुर्थाहमें मत्स्यावतार नामक पन्द्रहवाँ

अध्याय समाप्त ।

(मासिक पारायण सोलहवें दिनका विश्राम)



अथ षोडशोऽध्यायः

[१६]

बोले श्री शुक—श्राद्धदेव मनुवंश सुनहु अब ।
महाकल्प पश्चात् शयन सर्वेश करै जब ॥
होहिं निशाको अंत नाभितें प्रकटै पंकज ।
तातें श्रद्धा होहिं चतुर्मुख कमलासन अज ॥
मनतें पुत्र मरीचि मुनि, तिनिके कश्यप प्रजापति ।
बिबस्वान तिनके तनय, जिनको जगमहैं तेज अति ॥

बिबस्वानके पुत्र भये श्रीवैवस्वत मनु ।
तिनतें श्रद्धा माँहिं भये दश सुत इन्द्रिय जनु ॥
इक्ष्वाकू, शर्याति, दृष्टि अरु धृष्ट, नभग, कवि ।
नृग करूष नरिसन्त पृषध्रहु बंश विदित रवि ॥
इन सबके पहले भये, सुत सुद्युम्न विचित्र अति ।
नरतें नारी बनि गये, है विचित्र श्रीशम्भु गति ॥

श्राद्धदेव सुतहीन यज्ञ पुत्रेष्टि करायौ ।
मुनि बसिष्ठ आचार्य यज्ञको साज सजायौ ॥
रानी इच्छा करी पुत्र नहिं पुत्री होवै ।
होता आहुति दई लोभ संकल्पहिं खोवै ॥
इछा नाम कन्या भई, मनु मनमहैं चिन्तित भये ।
गुरुसन बोले दुखित है, मंत्र व्यर्थ ज्यों है गये ॥

मुनि बसिष्ठ धरि ध्यान कहैं—सब ज्ञान भयो अब ।
 रानी सम्मति मान कर्यो होता कौतुक सब ॥
 किन्तु न नृप घबराउ मंत्रबल देखो मेरो ।
 करि पुत्रीतैं पुत्र करौं हौं कारज तेरो ॥
 यो कहि प्रभु बिनती करी, है प्रसन्न हरि बर दयो ।
 सुता इला मुनि कृपातैं, पुनि सुद्युम्न कुमर भयो ॥
 एक दिवस सुद्युम्न सैन सजि मृगया खेलन ।
 होहि अश्व असवार गयो सँग सचिवनिके बन ॥
 मृग लखि पीछो कर्यो अश्व अपनो दौरायौ ।
 गिरि सुमेरु दिँग खण्ड इलावृतमहँ नृप आयौ ॥
 परी दृष्टि जब देह पै, नरतैं नारी बनि गये ।
 परम चकित इत उत लखत, सब घोड़ा घोड़ी भये ॥
 पूछैं नृप—गुरु ! नृपति भये च्यौं नारी नरतैं ।
 अद्भुत देश प्रभाव भयो जिह किनके बरतैं ॥
 हँसिकैं श्रीशुक कहैं—भूप अचरज मति मानों ।
 जगकुँ क्रीड़ाभूमि भवानीपतिकी जानों ॥
 मेरु निकट अति सुघर बन, जहँ भर भर भरना भरहिं ।
 उमा संग तहँ कपरदी, कमनीया क्रीड़ा करहिं ॥
 शिव दरशनके हेतु तहाँ इक दिन बहु ऋषि मुनि ।
 आये सोचत होहिं कृतारथ शिव शिद्धा सुनि ॥
 किन्तु प्रिया सँग करें रमण कामारि उमापति ।
 अङ्ग बिराजें उमा बिबला चित प्रसन्न अति ॥
 दाढ़ीवाले ऋषिनि लखि, पारवती लज्जित भई ।
 उठीं अंकतैं तुरत ई, लता ओटमहँ छिपि गई ॥

इति श्रीभागवतचरितके चतुर्थाहमें शिवाशिवक्रीड़ा नामक

सोलहवाँ अध्याय समाप्त

अथ सप्तदशोऽध्यायः

[१७]

निरखि रमणको समय भये लज्जित लौटे मुनि ।
 गये समुक्ति ऋषि, उमा अङ्ग पतिकी बैठी पुनि ॥
 पारवती प्रिय करन हेतु शिव बोले बानी ।
 आवत होवे नारि पुरुष इहैं कोई प्राणी ॥
 श्राद्धदेव-सुत भाग्यवश, भये पुरुषतै नारि तहैं ।
 सखिनि संग घूमत फिरत, पहुँचे बुध तप करहिं जहैं ॥

इला कामना करी बिकृति चित बुधके आई ।
 नेत्र नेत्र मिलि गये सरसता हियमहैं छाई ॥
 बिधिवत भयो विवाह इला अति मन हरषाई ।
 भूले बुध जप जोग भाग्यतै पत्नी पाई ॥
 छिन सम बीते बरष बहु, गृहीधर्ममहैं है निरत ।
 बुध प्रमुदित बनमहैं वसत, इला संग क्रीड़ा करत ॥

पुरूरवा सुत इला प्रिया बुधकी ने जाये ।
 नारदतै सुनि वृत्त पुरोहित सँग मनु आये ॥
 कीये शिव संतुष्ट दयो बर अद्भुत शङ्कर ।
 एक मास नर रहे नारि दूसरमहैं मनहर ॥
 लैकें सुत सुद्युम्न सँग, प्रतिष्ठानपुर चले मनु ।
 पुरूरवा अतिशय सुधर, मनहर दूसर चन्द्र जनु ॥

पुरुरवा ही चन्द्रवंशके पहिले थापक ।
 प्रतिष्ठानपुर बसैं भये सुत जिन त्रय पावक ॥
 शौनक पूछें—सूत ! चन्द्रवंशी इला कैसे ?
 इला और बुध भये सोम सम्बन्धित जैसे ॥
 सोमवंश क्रमकी कथा, हमकुँ सार सुनाइकेँ ।
 मेटो संशय सूतजी—कहन लगे इरषाइकेँ ॥

भये ब्रह्मसुत अत्रि चन्द्रमा जनमे तिनिके ।
 बिधि कीये पति सर्व ओषधिनि अरु बिप्रनिके ॥
 राजसूय मख कर्यो गर्वतैं सुरगुरु—दारा ।
 बलपूर्वक हरि लई बृहस्पति पत्नी तारा ॥
 देवासुर संग्राम अति, भीषण तारा हित भयो ।
 कमलासन परि बीचमहैं, निर्णय ताको करि दयो ॥

गर्भवती गुरु नारि गर्भ निज त्याग्यो तबहीं ।
 मेरो मेरो करै चन्द्र गुरु सुतहित जबहीं ॥
 बालक डाँटी मातु—सत्य तू च्यौ न जतावै ।
 तारा बिधितैं कही—सोम ही सुतकुँ पावै ॥
 निशानायकुँ सुत दयो, बुध ब्रह्माने नाम धरि ।
 चन्द्रवंश थापित कर्यो, इला संग सम्बन्ध करि ॥
 इति श्रीभागवत चरितके चतुर्थाहमें चन्द्रवंशी सुद्युम्न चरित
 नामक सत्रहवाँ अध्याय समाप्त ।

अथ अष्टादशोऽध्यायः

[१८]

इक्ष्वाकू नृग आदि भये सुत मनुके पुनि दश ।
 प्रथम पृषध चरित्र कहूँ फिरि औरनिको यश ॥
 कीये गुरु गोपाल कुमर रक्षक गाइनिक्कू ।
 हिंसक आवै सिंह व्याघ्र मारै नित तिनिक्कू ॥
 एक दिना निशि धेनुक्कू, पकरि सिंह भाग्यो तहाँ ।
 डकराई गैया जगहिं, लै असि सो पहुँच्यो वहाँ ॥

व्याघ्र न दीख्यो अंधकारमहँ खड्ग चलायो ।
 भ्रमवश व्याघ्र न मर्यो धेनु सिर काटि गिरायो ॥
 जानि दोष गुरु निकट जाइ सब वृत्त सुनायो ।
 सुनि पुनि दीयो शाप क्षत्रतै शूद्र बनायो ॥
 कीयो नहीं बिबाह पुनि, जीवन भर हरि ही भज्यो ।
 बन दावानलमहँ प्रविशि, अंत समयमहँ तनु तज्यो ॥

मनु सुत लघु सब माँहिं नाम कवि अतिशय त्यागी ।
 राज पाट परिवार त्यागि बनि गये बिरागी ॥
 जो करुष मनुपुत्र भये उत्तरके भूपति ।
 धृष्ट पुत्रतै धार्ष्ट्र भये द्विज ताकी संतति ॥
 मनुसुत नृगके सुमति सुत, भूतज्योति तिनतै भये ।
 नरिष्यन्तके वंशधर, आगे द्विज सब बनि गये ॥

दिष्ट पुत्र नाभाग कर्मतै बैश्य भये ते ।
 पुत्र भलन्दन भये क्षात्र कुलमाँहि रहे ते ॥
 शौनक बोले—सूत ! कथा यह अति अचरजयुत ।
 कौन कर्मतै भये बैश्य नाभाग दिष्ट-सुत ॥
 बैश्य भलन्दन पुत्रहू, पुनि क्षत्रिय कैसे भये ।
 पिता बैश्य नृपतै भये, गुप्त-पुत्र नृप बनि गये ॥

मुनि शौनक के वचन सूत हँसि बोले बानी ।
 बैश्य सुता इक हती रूप यौवनकी खानी ॥
 दृष्टि परी नाभाग बैश्यतै कन्या माँगी ।
 नृपति बैश्य अरु द्विजनि बात अति अनुचित लागी ॥
 बलपूर्वक कन्या हरी, पिता पुत्रको रन भयो ।
 बैश्य बनायो मुनिनि सुत, भूप भलन्दन बनि गयो ॥

मातु भलन्दन पुत्र पठायो गोपालन हित ।
 गयो नीप मुनि निकट बैश्य बनिवेतै दुःखित ॥
 नीप सिखाये अस्त्र युद्ध भाइनि तै कीन्हो ।
 करे पराजित बन्धु राज्य पुनि अपनो लीन्हो ॥
 भये भलन्दन भूमिपति, सुमति चरित पत्नी कहे ।
 अति आग्रह पितु तै कर्यो, बने न नृप वैश्यहि रहे ॥

बत्सप्रीति सुत भये भलन्दनके उत्साही ।
 दानव हन्यो कुजृम्भ बिदूरथ कन्या व्याही ॥
 मुदावतीतै भये पुत्र बारह तेजस्वी ।
 ज्येष्ठ श्रेष्ठ नृप प्रांशु जगत्महँ भये यशस्वी ॥
 भये प्रांसुके प्रमति सुत, उनके पुत्र खनित्र हैं ।
 अति पवित्र जगमहँ विदित, तिनके चारु चरित्र हैं ॥

नृप खनित्र अति विनयशील सेवक वृद्धनिके ।
 शौरि, उदावसु, सुनय, महारथ भ्राता उनिके ॥
 चारि दिशनिको राज दयो चारिहु भाइनिक्कूँ ।
 स्वयं बने सम्राट प्राण सम मानैँ तिनक्कूँ ॥
 शौरि सचिवने द्रोहब्रश, बन्धुनिमहँ विग्रह करी ।
 शौरि सिखायो बन्धु हति, हरहु राज्य जड़ मति हरी ॥

शौरि लोभ ब्रश भयो दुष्ट मंत्री मति मानी ।
 अन्य बन्धु हू फोरि पुरोहित सब अज्ञानी ॥
 चारिहु मिलि अभिचार भयङ्कर मारण कीन्हो ।
 प्रकटी कृत्या चारि सबनिक्कूँ दरशन दीन्हो ॥
 बोले—जाइ खनित्रक्कूँ, मारो प्रमुदित सब भई ।
 लै त्रिशूल गर्जन करति, नृप खनित्रके ढिँग गई ॥

निरखि नृपति अति तेज डरीं कृत्या घबराई ।
 नृप तनु परस्यो नहीं लौटि तिनहींपि आई ॥
 सहित पुरोहित चारि विश्ववेदी हू मारयो ।
 सुनि खनित्र सब वृत्त राज तजि बनहिँ सिघारयो ॥
 चाक्षुष पुत्र खनित्रके, चाक्षुषके सुत विविंशति ।
 रम्म विविंशतिके भये, तिनि खनिनेत्र हु भूमिपति ॥

कौन नृपति खनिनेत्र सरिस मख करै करावै ।
 कौन इन्द्र करि तुष्ट करन्धम सम सुत पावै ॥
 शत्रु सैन्य करि दाह करन्धम भूप कहाये ।
 वीर्यचन्द्र नृप सुता स्वयम्बरतैँ बरि लाये ॥
 पुत्र अर्जीक्षित तासुके, गर्भमाँहिँ पैदा भये ।
 सूर्यवंशमहँ एकतैँ, एक ख्याति नृप है गये ॥

भयो करन्धम पुत्र नृपति दैवज्ञ बुलाये ।
 सप्तम गुरु अरु शुक्र चन्द्र चौथे बतलाये ॥
 सूर्य शनैश्चर भौम अवीक्षित है यह बालक ।
 पारंगत परमार्थ पूर्ण पृथिवीको पालक ॥
 अह फल सुनि नृप मुदित मन, विप्रनिको आदर कर्यो ।
 रवि शनि मङ्गलतै अलख, नाम अवीक्षित नृप धर्यो ॥



भये अवीक्षित युवक करन्धमके सुत प्यारे ।
 वैदिश नृपकी सुता स्वयम्बर माँहि सिधारे ॥

कन्या लै जयमाल कुमरके दिँग जब आई ।
 बलपूर्वक सो पकरि अचोक्षित रथ बैठाई ॥
 सब नृप मिलि पकरे कुमर, आई छुड़ाये पिता जब ।
 कन्या दई विशाल जब, नहिं स्वीकारी कुमर तब ॥
 नहिं कन्या बर बर्यो तपस्यामहँ चित दीयो ।
 इत व्रत बीरा मातु किमिच्छुक सुत हित कीयो ॥
 पितुने माँगी भोख पौत्रकी सुत स्वीकारी ।
 तोरि प्रतिज्ञा बरी कुमरने राजकुमारी ॥



कुमर और वैशालिनी, धर्मसूत्रमहँ बँधि गये ।
 गये लोक गन्धर्वमहँ, सुत मरुत तिनके भये ॥

दयो करन्धम राज अभीक्षित नहिं स्वीकार्यो ।
 राज्य कलू नहिं कबहुँ समर शत्रुनितें हार्यो ॥
 राजा करे मरुत करन्धम बनहिं सिधारे ।
 नागनि मुनि गन डसे मरुतने शस्त्र सम्हारे ॥
 नाग अभीक्षित शरनमहँ, गये अभय तिनकुँ दई ।
 सुत पितुमहँ अहि विषयपै, तनातनी भारी भई ॥

नृप नागनिके हेतु अस्त्र संवर्तक छोड्यो ।
 पिता कर्यो अति कोप न सुत रनतैं मुख मोर्यो ॥
 परिकें ऋषिगन बीच अहिनि मुनि फेरि जिवाये ।
 ऐसैं सुत अरु पिता समरतैं मुनिनि बचाये ॥
 द्रव्य दानमहँ व्यय कर्यो, बल निर्बल दुखहरनमहँ ।
 नृप मरुत यश अब तलक, छायो तीनिहु भुवनमहँ ॥

सुत मरुतके पुत्र भये दम भूपति भारी ।
 नृप दशार्णकी सुता सुहृदरी सुमना प्यारी ॥
 बरे स्वयंवरमाँहिँ अन्य कामी ललचाये ।
 सब मिलि कन्या हरी कुमार दम नहिं धवराये ॥
 कर्यो युद्ध सब रिपु हने, निज बलतैं बाला वरी ।
 नैदिक विधितैं न्याह करि, सुमना प्रिय पत्नी करी ॥

नृप दमके सुत भये राज्यवर्धन तेजस्वी ।
 प्रजा पुत्रवत पालि भये अति भूप यशस्वी ॥
 श्वेत बाल लखि चले मानिनी सँग बन नरपति ।
 प्रजा दुखित अति भई, अराधे सब मिलि दिनपति ॥
 बरस सहस्र दश रवि दई, आयु भूप रवि पुनि भजे ।
 सबकी निज सम आयु करि, सबने ही सँग तनु तजे ॥

नृप मरुत्तै नवम भये पीढ़ीमहँ भूपति ।
 पृथिवीपति तृणबिन्दु रूप गुण महँ सुन्दर अति ॥
 अलम्बुसा अपसरा काम वश हैकें आई ।
 विधिवत कर्यो विवाह इडविडा कन्या जाई ।
 सुत पुलस्त्य मुनि विश्रवा, ता दुहिताके पति बने ।
 बनाव्यच उत्तर अधिप, श्री कुबेर तानें जने ॥

सुत विशाल तृणबिन्दु नृपति वैशालि बसाई ।
 हेमचन्द्र सुत तासु भये जग कीरति छाई ॥
 सुत तिनके धूम्राच तासु सुत संयम श्रीयुत ।
 तिनके पुत्र कृशाश्व सोमदत्तहु तिनके सुत ॥
 सोमदत्तके सुमति सुत, जनमेजय तिनके भये ।
 यशवर्धक तृणबिन्दुके, कुलमहँ ये नृप है गये ॥

इति श्रीभगवत चरितके चतुर्थाहमें पृषध्रादि मनुपुत्रचरित्र
 नामक अठारहवाँ अध्याय समाप्त ।



अथ—एकोनविंशतितमोऽध्यायः

[१६]

मनु सुत नृप स्याति वेद शास्त्रनिके ज्ञाता ।
तिनकी कन्या भई सुकन्या जग बिख्याता ॥
इक दिन कन्या सहित गये नृप घूमन बनमहँ ।
कन्या सखियनि संग फिरै बन प्रमुदित मनमहँ ॥



च्यवनाश्रमके निकट इक, दीमकको टीलो निरखि ।
चकित भई जुगनू सरिस, द्वै चमकीली बस्तु लखि ॥

यौवनको उन्माद कुतूहल कन्या उरमहँ ।
उत्सुकता शमनार्थ लये द्वै कंटक करमहँ ॥
आँखिनि दूये चुभोइ बही धारा शोणितकी ।
डरी भगी लखि रक्त बड़ी व्याकुलता चितकी ॥
इत मुनिवरके कोपतैं, सैनिक सब व्याकुल भये ।
वेग रुक्यो मलमूत्रको, मृतक सरिस ते है गये ॥

लखि दैवी उत्पात च्यवनको कोप समुक्ति मन ।
सोचैं—है यह शांत च्यवन मुनिको पावन बन ॥
पूछैं नृप—उत्पात क्यो जिनि मोहिँ बतावैं ।
जानि सुकन्या कृत्य नृपति मनमहँ घबरावैं ॥
दुहिता लीन्ही संगमहँ, चले तुरत मुनिके निकट ।
बिकट क्यो प्रस्ताव मुनि, हैकैं बामीतें प्रकट ॥

कन्या फोरीं आँखि भयो हौं अन्धो भूपति ।
नेत्रहीन नर जगतमोहिँ पावै दुख नितप्रति ॥
घरम करम कस करूँ पुण्यपथ कैसे पेखूँ ।
कन्या करो प्रदान नेत्र जाकेतैं देखूँ ॥
मुनि नृप अति विचलित भये, परि कन्या सहमत भई ।
समुक्ति बलाबल भूपने, मुनिक्छु पुत्री दै दई ॥

करिकैं कन्यादान गये भूपति रजधानी ।
पतिसेवा ही तरनि सुकन्या उत्तम मानी ॥
अमर वैद्य इक दिवस च्यवन मुनि आश्रम आये ।
करि सेना सत्कार महामुनि बचन सुनाये ॥

अति प्रसिद्ध सुरभिष्क तुम, तौऊ हों अति दुख सहूँ ।
 करौ बृद्धतैं युवक यदि, जो माँगो सोई दज्ज ॥
 कहैं अश्विनीकुमर—हमें हू सोम पिआओ ।
 सोम मखनिमहँ सदा देव पंगति बैठाओ ॥
 स्वीकारी यह बात कुंडमहँ च्यवन न्दवाये ।
 आयुर्वेद प्रभाव बृद्धतैं युवक बनाये ॥
 भये एकसे तीन नर, विनय सुकन्याने करी ।
 अति प्रसन्न है सुरभिष्क, च्यवन दये माया हरी ॥

करिकें मुनिक्कू तरुन गये रुजहा पुर जवहीं ।
 आये नृप सर्याति च्यवनमुनि आश्रम तवहीं ॥
 तरुण निकट निज सुता निरखि नृप अति दुख पायौ ।
 हैं प्रसन्न वृत्तान्त सुकन्या सब समुझायौ ॥
 सुता बचन सर्याति मुनि, मुनि तनु लखि प्रमुदित भये ।
 मख हित कन्या सहित मुनि-वर कूँ लै निज पुर गये ॥

सोमयाग करवाय भूपको मान बढ़ायो ।
 सुर बैद्यनि बुलवाइ सोमरस तिनहिँ पिआयो ॥
 तान्यो सुरपति वज्र कर्यो जब स्तंभित करकूँ ।
 सोमपान अधिकार सुरनि दीयो बैद्यनिक्कूँ ॥
 लखि प्रभाव मुनि च्यवनको, सबकूँ अति विस्मय भयो ।
 तनया नृप सर्यातिकी, को चरित्र पावन कह्यो ॥

दोहा—सुखद सुकन्या चरित जे, नारि सुनिहिँ सुख पाई ।
 पुरय पुरुष सुनि अति लहैं, बृद्ध तरुन है जाई ॥
 इति श्रीभागवत चरितके चतुर्थाहमें च्यवन सुकन्या चरित नामक
 उन्नीसवाँ अध्याय समाप्त ।

अथ विंशतितमोऽध्यायः

[२०]

छप्पय—अब मनुसुत सर्याति वंश शुभ सुनहु भक्तियुत ।
 भूरिषेण उत्तानबहिं आनर्त भये सुत ॥
 छोटे सुत आनर्त द्वारका जिननि बसाई ।
 रेवत सुत तिन भये तामु शत सुत सुखदाई ॥
 ज्येष्ठ, ककुद्भी सबनितै, जनक रेवतीके भये
 सुता रेवती संग लै, बर खोजन विधि दिँग गये ॥

तपप्रभावतैं ब्रह्मलोकमहँ पहुँचे भूपति ।
 निरख्यो सरस समाज होहि संगीत मधुर अति ॥
 गावैं गुन गोविन्द चतुर गंधर्व तहाँ सब ।
 नृत्य अपसरा करैं अनवसर समुझ्यो नृप तत्र ॥
 कछुक देर ठाढ़े रहे, जब समाप्त गायन भयो ।
 तत्र प्रणाम करि ककुद्भी, निज कारज विधि सन कह्यो ॥

प्रभो ! रेवती सुता भई लम्बी अति भारी ।
 किन्तु योग्य बर मिल्यो नहीं अब ही यह क्वारी ॥
 जिहि सँग आयसु करें ताहि सँग जाहि बिबाहूँ ।
 हँसि कमलासन कहैं—नृपति ! अब कहा बताऊँ ॥
 चारिहुँ युग छब्बीस इक, बार बीति भूपति ! गये ।
 पुत्र पौत्र पीढ़ी सहस, नष्ट भूप सुत सब भये ॥

प्रकट भये भगवान भक्त भय हरिबे वारे ।
 ज्येष्ठ बन्धु बलराम भये तिनिके अति प्यारे ॥
 तिन सँग करो बिबाह ककुद्मी सुनि हरषाये ।
 लई रेवती संग द्वारका छिनमहँ आये ॥
 हरषि नृपतिने रेवती. बलदाऊकूँ दै दई ।
 खैचो हलतै बल बहू, लग्नी ठिगनी करि लई ॥



मनुके इक सुत नमग भये कै ई तिनि के मृत ।
 तिनिमहँ इक नाभाग वेदविद् पंडित गुनयुत ॥
 पढ़न गये घर बन्धु कर्यो पीछे बटवारो ।
 लौटि कह्यो नाभाग—कहाँ है भाग हमारो ॥
 बन्धु कहँ—नाभाग ! तब, पिता भाग तुम्हरे रहे ।
 करि प्रनाम नाभागने, बन्धु बचन पितुतँ कहे ।

सुनि सुत बचन उपाय नमगने नयो बतायो ।
 करै यज्ञ आङ्गिरस षष्ठ दिन कृत्य मुलायो ॥
 तिन्हँ बताओ जाय सुनत नृप सुतउहँ आये ।
 कृत्य बताओ द्विजनि दयो धन स्वरग सिघाये ॥
 रुद्र द्रव्य अपनो कह्यो, नमग समर्थन हू कर्यो ।
 तब अर्पित सरबसु कर्यो, शिव प्रसन्न है वर दयो ॥

हर बरतें नाभाग भयो जगमहँ अति ज्ञानी ।
 अम्बरीष सुत तासु यशस्वी दृढव्रत दानी ॥
 सप्तद्वीपको अविष अतुल वैभव सब पायौ ।
 किन्तु स्वप्न सम समुक्ति कृष्ण चरननि चित लायौ ॥
 भयो चित्त चितचोरकी, सरस माधुरी पान करि ।
 भई जीभ यश नामको, नित्य निरन्तर गान करि ॥

करै कृष्ण-कैकर्य कमल कर नृपके नित प्रति ।
 कृष्णकथा सुनि कान उमय होवें प्रमुदित अति ॥
 माधव मन्दिरमाँहिँ निरखि मनमोहन मूरति ।
 छल छल छलकै नयन कमल सम होवें विकसित ॥
 मिलै भक्त भगवानके, गाढ़ालिङ्गन नृप करहिँ ।
 पुलकित होवें अंग अंग, पाप ताप जगके जेरहिँ ॥

चरन चढ़ी चितचोर मंजरी तुलसीजीकी ।
 प्राणेंद्रिय लै गंध जगावै सुधि निज पीकी ॥
 नन्दनंदन नैवेद्य पाइ रसना हुलसावै ।
 विनु अर्पित यदि अमृत मिलै तोऊ नहिं खावै ॥
 निरखि नमित है जात सिर, निज प्रभुपद पंकजनिक्कू ।
 चरन चलै अति हुलसिकै, हरि क्षेत्रनि दरशननिक्कू ॥



राजकुमरि इक सुनी भक्ति नृप पति बरि लीन्हे ।
 भगवद्भक्ति प्रभाव भूप निज बशमहँ कीन्हे ॥
 अन्यहु रानिनि सुनी विष्णुपूजा स्वीकारी ।
 प्रजा भूप रख निरखि भये सब भक्त पुजारी ॥
 भरी भक्ति सब देशमहँ, नृपहिँ सराहँ साधुगन ।
 सवाहँ कहँ—जस होहिँ नृप, तस ही होवँ प्रजाजन ॥

करहिँ भूय जो काज कृष्ण अरपन करि देवँ ।
 सेवा श्रद्धा सहित करहिँ नित प्रति हरि सेवँ ॥
 बन जन सुत परिवार कबहुँ अने नहिँ जानँ ।
 विषय भोग सब रतन जगतके मिथ्या मानँ ॥
 तन्मय नित हरि भक्तिमहँ, रहँ सोच हरिकुँ भगो ।
 रिपु भय हेतु नियुक्त प्रभु, चक्र सुदर्शन करि दयो ॥

काम क्रोधकुँ जीति दुष्ट मनकुँ नृप मारँ ।
 हरिबासर उपवास करहिँ वैष्णव व्रत धारँ ॥
 पूछँ शौनक—सूत ! कह्यो हरिबासर काकुँ ।
 करँ मनुज उपवास अन्न खावँ नहिँ जाकुँ ॥
 एकादशी महान व्रत, सूत कहँ सब पापहर ।
 करहिँ नियमतै व्रत सदा, ते जावँ बैकुण्ठ नर ॥

दो०—शौनक पूछँ—सूत ! कह्यो, एकादशि उत्तरति ।
 देहि मुक्ति त्रिनु अन्नके, जाकी ऐसी शक्ति ॥
 सूत कहँ—एकादशी, हरिबासर जिहिनाम ।
 मुनि गन ! ताको महाफल, कहूँ भारि हियश्याम ॥

छप्पथ—सुरनि कह्यो—सुर करै पाप हरि चले हननकुँ ।
 सोच्यो एक उपाय असुर खलके मारनकुँ ॥
 बदरीवनकी गुफामाँहि सोये खल आयो ।
 तनुतैं कन्या निकरि असुरकुँ मारि गिरायो ॥
 सोई एकादशी तिथि, पावन अति जगमहँ भई ।
 पापनाशिनी मुक्तिप्रद, श्रीहरिने सो करि दई ॥

हरिबासर उपवास करै ते नरक न जावैं ।
 ऋद्धि सिद्धि सम्पत्ति सहज फल चारिहु पावैं ॥
 रुक्माङ्गद भूपाल राज्यमहँ व्रत करवावैं ।
 सब राखैं उपवास दार, सुत सहित न खावैं ॥
 सप्तद्वीपके अधिप नृप, सबई आज्ञा सिर धरैं ।
 कछु भयवश कछु भक्तितैं, हरिबासर सब व्रत करैं ॥

व्रती भक्त च्यौ परै भयङ्कर यमके पल्ले ।
 नरक न कोई जाय भये यमराज निठल्ले ॥
 चित्रगुप्त की बही फटी टाँके सब टूटे ।
 भयो नरक सब शून्य यातनागृह सब फूटे ॥
 चित्रगुप्त यम सँग लये, कमलासनके ढिँग गये ।
 त्यागपत्र सम्मुख धर्यो, हाथ जोरि ठाढ़े भये ॥

ब्रह्मा पूछें—त्यागपत्रको हेतु सुनाओ ।
 च्यौ तुम धौरे भये विपत्तिको वृत्त बताओ ॥
 सकुचि कहैं यमराज—व्यरथमें वेतन पाऊँ ।
 काम काज कछु रह्यो न च्यौ जग अयश कमाऊँ ॥
 रुक्माङ्गद व्रत सबनितै, हरिबासर करवाइ नित ।
 सबकुँ पठवै विष्णुपुर, नरक न कोई आइ इत ॥

रुक्माङ्गद व्रत वृत्त सुन्यो त्रिषि भन मुसकाये ।
 व्रत प्रभाव बहु कह्यो बहुत त्रिषि यम समुभाये ॥
 जत्र बहु हठ यम करी मोहनी नारि बनाई ।
 गई भूप ढिँग मोहि बनी रानी पुर आई ॥
 हरिबासर व्रत छोड़िवे, को आग्रह रानी कर्यो ।
 व्रत न तज्यो सुत सिर तज्यो, तत्र श्रीहरि दर्शन दयो ॥

ताही व्रतको अम्बरीष उद्यापन कीन्हों ।
 धेनु रतन धन धान दान विप्रनिक्कूँ दीन्हों ॥
 त्रिविवत विप्र जिमाइ पाइ पारणकी अनुमति ।
 जेवन बैठे जत्रहिं तत्रहिं आनन्द भयो अति ॥
 दुर्वासा मुनिवर तहाँ, आये नृप ठाढ़े भये ।
 दयो निमंत्रन भोजहित, हाँ कहि सन्ध्या हित गये ॥

आधी रही मुहूर्त द्वादशी नृप घबराये ।
 पारन कैसे करहिं वेदविद विप्र बुलाये ॥
 जल पो पारन करो द्विजनि मिलि दीन्हों अनुमति ।
 द्विज आयसु सिर धारि कर्यो व्रत पारन भूपति ॥
 दुर्वासा आये तत्रहिं, क्रोध अवश लखि कर्यो ।
 कृत्या केश उखारिके, करी प्रकट नहिं नृप डर्यो ॥

कृत्या तत्क्षण मारि सुदर्शन चक्र गिराई ।
 निरपराध भूपाल भक्त की भीति भगाई ॥
 कृत्याकुँ करि मरुम चक्र मुनिवरके आगे ।
 भूपत्यो डरिकेँ तुरत तहाँतें मुनिवर भागे ॥
 पृथिवी, जल, आकाशमहँ, सबहिं लोक दौरे गये ।
 दई शरन का नहीं, दुर्वासा व्याकुल भये ॥

रक्षा कहूँ नहीं भई डरे विवि दिँग मुनि आये ।
 समाचार सब सत्य सकुचि दुख सहित सुनाये ॥
 सब मुनि कहैं बिरंचि—करूँ का अब मैं भाई ।
 हमहूँ हैं परतन्त्र पार हमरी न बसाई ॥
 है निराश शिव दिँग गये, हर बोले—गहु शरन हरि ।
 कृपा करहि करुनायतन, बिनय करहु तुम पैर परि ॥

हर आयसु सिर धारि गये हरिपुर दुर्वासा ।
 शरनागत प्रतिपाल करहि मुनि मन बड़ आसा ॥
 त्राहि त्राहि कहि पैर परै प्रभु हों अब कीन्हों ।
 महिमा जाने बिना शाप बैष्णवकूँ दीन्हों ॥
 भक्ताधीन सदा रहौं, विश्वम्भर बोले गरजि ।
 और बात हों सब सहौं, निज जनको अपमान तजि ॥

जे सबसुकूँ त्यागि शरन मेरीमहँ आये ।
 मम हित मल-तप तोर्थ करे जिन दुख बहु पाये ॥
 धन, सुत, दारा, बन्धु लोष्ट सम सबकूँ जानें ।
 मोकूँ तजि सब तुच्छ स्वर्ग अरवर्गहि मानें ॥
 वस्तु जगतकी अन्य कछु, मोकूँ तजि जानें नहीं ।
 ऐसे भक्तनिकूँ कबहुँ, त्यागि सकें स्वामी नहीं ॥

फिरहु एक उपाय बताऊँ तुमकूँ मुनिवर ।
 अम्बरीष नृप निकट जाहु चूको नहीं अवसर ॥
 शान्त होइगो चक्र मिटैगे दुःसह दुख सब ।
 प्रभु आज्ञा स्वीकारि चले मुनि नृपके दिँग तब ॥
 दुःखित दुर्वासा तुरत, नृप पैरनिमहँ परि गये ।
 अस प्रयत्न मुनिको निरखि, अति लज्जित भूपति भये ॥

चक्र विनय नृप करी लखे भयभुत दुर्वासा ।
 शान्त सुदर्शन भयो भई मुनिवरकुँ आसा ॥
 बोले—नृप ! तुम धन्य धन्य तुमरी है जननी ।
 धन्य नभग शुभ वंश प्रजा दारा धन धरनी ॥
 महिमा भक्तनिकी लखी, गर्व खर्व मेरो भयो ।
 दुतकार्यो मोकुँ सवनि, शरण हेतु जहँ जहँ गयो ॥

दुर्वासाको विनय निरखि नृप अति सकुचाये ।
 करि सादर सत्कार स्वादयुत अन्न जिमाये ॥
 दीयो आशिर्वाद भक्तकी महिमा जानी ।
 भक्ति श्रेष्ठ जग माँहि महामुनि मनमहँ मानी ॥
 अम्बरीष नृप भक्ति करि, अति प्रसिद्ध जगमहँ भये ।
 राज्यभार सुत सिर धर्यो, भजन करन बनमहँ गये ॥

अम्बरीषके तनय तीन त्रिभुवन विख्याता ।
 भूपति बड़े त्रिरूप प्रजाके भय दुख त्राता ॥
 केतुमान अरु शम्भु बन्धु अनुकूल रहैं नित ।
 सुत विरूप पृषदश्व रथीतर तिनके शुभ सुत ॥
 नृपति रथीतर सुत रहित, भये अङ्गिरस क्षेत्रसुत ।
 वीर्य अङ्गिरातैं भये, क्षात्र कर्म द्विज तेजयुत ॥

इति श्रीभागवत चरित के चतुर्थाह में शर्याति नभग वंश वर्णन
 नामक बीसवौं अध्याय समाप्त ।

अथ एकविंशतितमोऽध्यायः

[२१]

छप्पय—ज्येष्ठ श्रेष्ठ मनुपुत्र भये इक्ष्वाकु यशस्वी ।
 प्राणिमात्रके सुहृद पितामह सम तेजस्वी ॥
 पालैं सुत सम प्रजा दया जीवनिपै राखैं ।
 करैं संत सम्मान अनृत कबहूँ नहिं भाखैं ॥
 नारि सुदेवाके सहित, मृगया हित बनमहँ गये ।
 सिंह व्याघ्र बाराह बहु, हिन्स्र जन्तु मारत भये ॥

सूकर मारयो एक सूकरी कथा सुनाई ।
 द्विज कन्या हौं रही बुद्धि बिपरीत बनाई ॥
 कीयो पति अपमान नरकमहँ दुःख उठायो ।
 भोगि यातना विविध सूकरीको तनु पायौ ॥
 पातिव्रत इक वर्षको, पुण्य सुदेवाने दयो ।
 छुटी सूकरी योनितैं, दिव्य देह ताको भयो ॥

पृथिवीपति इक्ष्वाकु तनय शत सूर भये अति ।
 सबतैं बड़े शशाद बिकुक्षी भये भूमिपति ॥
 पिता श्राद्धहित मेध्य जन्तु पठये लैवेकूँ ।
 लाये बहु मृग मारि पिंड पितरनि दैवै कूँ ॥
 मगमहँ खायो शशक इक, सुनि नृप क्रोधित है गये ।
 देश निक्कास्यो दयो पितु, ते शशाद नरपति भये ॥

दोहा—सबहिं सराहैं कुमरको, तेज, ओज, बल, रूप ।
 गये स्वरग इच्छाकु जब, भये विकुक्षी भूप ॥
 छप्पय—पालन सुत सम कर्यो प्रजाको रञ्जन कीन्हों ।
 यश याग बहु करे दान बहु विप्रनि दीन्हों ॥
 भये पुरञ्जय पुत्र बने जिनि बाहन सुरपति ।
 भये ककुत्स्थ प्रसिद्ध इन्द्रबाहु ते नरपति ॥
 दैत्यनिके सँग सुरनिको, रण अति हो भीषण भयो ।
 वीर पुरञ्जयके निकट, आइ देव निज दुल कह्यो ॥

रुच सुनि बोले भूप—अवसि आयमु स्वीकारूँ ।
 किन्तु इन्द्र यदि बनै वृषभ तो असुरनि मारूँ ॥
 लज्जित सुरपति भये जगतपति हरि समुभाये ।
 हरिआशा सिर धारि, वृषभ शतक्रतु बनि आये ॥
 वृषभ ककुदपै चढ़ै नृप, असुर नगरपै चढ़ि गये ।
 लखी वीरता भूपकी, भौचक्के सुररिपु भये ॥

भीषण रण अति भयो, दैत्य जे सम्मुखआये ।
 शरवीर भूपाल तुरत ते मारि गिराये ॥
 भगे छोड़ि रण असुर सुरनि आनंद मनायौ ।
 धन सम्पतियुत स्वरग देवतनि सहजहिं पायौ ॥
 इन्द्र बने बाहन समर, इन्द्रबाहु सब कहहिं नर ।
 रिपुपुर जीत्यो पुरञ्जय, स्वरग माँहिं भाषैं अमर ॥

पुत्र पुरञ्जय भये अनेना तिनके पृथुसुत ।
 विश्वरन्धि तिन तनय चन्द्र तिनके सुत श्रीयुत ॥
 चन्द्र तनय युवनाश्व कीर्ति जिन त्रिपुल कमायी ।
 तिनके सुत शावस्त जिननि शावस्ति बसायी ॥

भये पुत्र वृहदश्व तिन, कुबलयाश्व तिनके तनय ।
मुनि उतङ्क बध धुन्धु हित, जिनहिँ लै गये करि बिनय ॥

असुर धुन्धु अति बली बालुके भीतर सोवै ।
छोड़े जब फुरकार प्रजा सब दुखतैं रोवै ॥
मुनि उतङ्क वृहदश्व बली भूपति ढिँग आये ।
कह्यो वृत्त मुनि भूप तुरत निज पुत्र पठाये ॥
कुबलयाश्व पुत्रनि सहित, मुनि प्रसन्न अतिई भये ।
मुनि उतङ्ककूँ संग लै, धुन्धु मारिवे चलि दये ॥

धुन्धु बदनतैं अनल भई जारे सुत सबई ।
रहे तीनि ही शेष हन्यो दानव नृप तबई ॥
नृपने मार्यो धुन्धु देव नर सब हरषाये ।
तबई ते जग धुन्धुमार भूपति कहलाये ॥
सुत दृढाश्व कपिलाश्व अरु, रहे शेष भद्राश्व बर ।
नृप दृढाश्व हर्यश्व सुत, शूर बीर अति श्रेष्ठ नर ॥

सुत हर्यश्व निकुम्भ भये तिनि बर्हणाश्व सुत ।
तिनके भये कृशाश्व सेनजित तिन सुत बल्युत ॥
नृपति सेनजित् पुत्र भये युवनाश्व यशस्वी ।
मान्धाता तिनि पुत्र चक्रवर्ती तेजस्वी ॥
माता बिनु पैदा भये, पिता गर्भमहँ बास कर ।
मुनहु कथा आश्चर्ययुत, पुण्य प्रदायिनि मनोहर ॥
इति श्रीभागवत चरितके चतुर्थाहमें इच्छाकु वंशवर्णन-
नामक इक्कीसवाँ अध्याय समाप्त ।

अथ द्वाविंशतितमोऽध्यायः

[२२]

छप्पय—पुत्रहीन युवनाश्व नारि शत संग लिये बन ।
 गयो तनय बिनु खिल भूपको परम दुखित मन ॥
 बनमहँ मुनि मिलि पुत्र हेतु इक यज्ञ करायौ ।
 मंत्रपूत घटनीर निरखि निशि नृप सहँ आयौ ॥
 प्यासो नृप जल शीत लखि, मनमहँ अति प्रमुदित भयो ।
 बिनु पूछे अनजानमें, घटको जल सब पी गयो ॥

प्रातकाल मुनि उठे कहैं—जल कौनों पीयो ।
 हाथ जोरि भूपाल वृत्त सवतैं कहि दीयो ॥
 मुनि मुनि धार्यो मौन समुझि गति प्रबल बिधाता ।
 कुलि फोरिकें प्रकट भये नृपतैं मान्वाता ॥
 बिन्दुमती रानी बरी, स्वयं जाइ नृप स्वयम्बर ।
 कने पुत्र पुरुकुतस अरु, शम्भुग्रीव मुचुकुन्द वर ॥

कन्या जनीं पचास सुन्दरी अति सुकुमारी ।
 बड़ी भई सब संग कमल नयनी पितु प्यारी ॥
 ब्रजमंडलमहँ परम तपस्वी सौभरि मुनिवर ।
 यमुना जलमहँ पैठि तपस्या करें उग्रतर ॥
 बाल ब्रह्मचारी रहे, भये वृद्ध तनु छीन अति ।
 वरस सहस्रदश तप कर्यो, नहिं निरखी संसार गति ॥

इकदिन जलमहँ मत्स्य राजकूँ निरख्यो मुनिवर ।
 निज परनीके संग करत क्रीडा अति सुखकर ॥
 अति अनुराग समेत नीर नयननिमहँ भरि कै ।
 किलकै इत उत पुत्र पौत्र पैरनिमहँ परिकै ॥



इच्छा मुनि मन महँ भई, व्रत करि करि अति सहे दुख ।
 जप तप महँ जीवन गयो, नहिँ चाख्यो संसार सुख ॥

व्याह करन अभिलाष भई सब नियम भुलाये ।
मान्धाता ढिँग पुरी अयोध्यामहँ मुनि आये ॥
बोले—पुत्री हैं पचास तुमरें हे भूपति ।
करूँ याचना एक व्याहकी इच्छा चित अति ॥
मुनि नृप अति विस्मित भये, घबराये सब अँग थके ।
वृद्ध देह तप अधिक लखि, हों ना कछु नहिँ करि सके ॥

पुनि नृप बोले सम्हरि—महामुनि भीतर जाओ ।
वरण सुता जां करै ताहि सुख तैं लै आओ ॥
समुक्ति भूपको भाव योग तैं युवक भये मुनि ।
आये मुनिवर सुधर भई प्रमुदित कन्या सुनि ॥
प्रथम बरे पति मुनि हमनि, कलह करन कन्या लगौं ।
सब स्वीकारों ऋषि ब्रिहँसि, निरखि प्रेममहँ सब पगौं ॥

विधिवत कर्यो विवाह फेरि सुनरख मुनि आये ।
सबकुँ सुन्दर महल पृथक् सौमरि बनवाये ॥
सबकुँ भूषन बसन सुखद शैयादिक दीन्हीं ।
सबकी इच्छा पूर्ण तपस्यातैं मुनि कोन्हीं ॥
सब महलनिमहँ सरोवर, स्वच्छ नीर नीरज सहित ।
असन बसब उबटन सतत, रहहिँ पवन सुखप्रद बहत ॥

मुनि पचास धरि बेष रमण नित सब सँग करहीं ।
तब प्रभावतैं ताप व्यथा तनमनकी हरहीं ॥
आये नृप इक दिवस देखि वैभव विस्मित अति ।
भये, सबनि ढिँग गये कहैं नित इतहिँ बसहिँ पति ।
सुरपुरको सुख अवनिपै, लखि प्रमुदित नृप हूँ गये ।
सब सुख भोगे तृप्ति हित, किन्तु तृप्त मुनि नहिँ भये ।

शाप गरुड़कुँ दयो न सौभरिसर पुनि आवें ।
 रमणक नामक द्वीप तहाँ नागनि नित खावें ।
 पारीतैं सब जाहिं गरुड़ सँग सन्धि कराई ।
 कछुक दिवसमहँ काली अहिकी पारी आई ॥
 काली अहिने मत्त है, भंग गरुड़को प्रन करयो ।
 लडूयो पराजित है गयो, सौभरिसरमहँ छिपि गयो ॥

गरुड़ शापवश तहाँ फेरि कबहूँ नहिं आये ।
 अहिकूँ दीयो बास शेष सुनि अति हरषाये ॥
 कालिय हृद अहिबास भयो विख्यात जगतमहँ ।
 अहि बहु युग पर्यन्त रख्यो परिवार सहित तहँ ॥
 अब तक जगमहँ ख्यात हैं, हलधरपूजक त्रिप्रवर ।
 अहिबासी के नाम तैं, सौभरिऋषिके वंशधर ॥

स्वस्थचित्त इक दिवस बैठि मुनि सोचें मनमहँ ।
 हाय पतन मम भयो रहूँ मुनि हूँ महलनिमहँ ।
 तजिकैं सब जन संग सलिलमहँ ध्यान लगायौ ।
 ठग्यो तहाँ हूँ दैव मत्स्य संभोग दिखायौ ॥
 मिथुन धर्ममहँ निरत नर-नारीको जे सँग करें ।
 ते पुनि जनमें पुनि मरें, स्वर्ग जाहिँ नरकनि परैं ॥

रहै सदा निस्संग चित्त श्रीहरिमहँ राखै ।
 बाणी संयम करै व्परथ तनिकहु नहिं भाखै ॥
 साधु संग ही करै कथा कीर्तनमहँ जावै ।
 नहिं तो है चुपचाप ध्यान एकान्त लगावै ॥
 नर फँसिकें निकसत नहीं, मायिक गुण हैं प्रबल अति ।
 इत उत भटकै लोभ वश, होवै नहिं जग त्रिमञ्जमति ॥

यों करि पश्चात्ताप त्यागि गृह बनहिँ सिंघाये ।
 पत्नी लागीँ संग विषय अरु भोग भुलाये ॥
 कर्यो घोर तप बुद्धि विमल करि काटे कलमष ।
 ब्रह्म सत्य जग असत् कर्यो दृढ़ निश्चय मुनि अस ।
 ब्रह्मलीन सौभरि भये, संग सती पत्नी भई ।
 अग्निनि बुझतही लपट जनु, मनहुँ शान्त सब है गई ॥

सौभरिऋषिको विमल चरित जे सुनें सुनावैं ।
 श्रद्धातैं जो मनन करैं ते प्रमुपद पावैं ॥
 यों मान्वाता सुता विवाहीं सौभरि मुनिवर ।
 यौवनाश्व अत्र वंश कहूँ पुनि अति पावन तर ॥
 भये भूप पुरुकुत्स सुत, मान्वाताके विमल मति ।
 नारि नर्मदा नागकी, व्याही तनया सुघर अति ॥
 इति श्रीभागवत चरितके चतुर्थाहमें सौभरि ऋषि चरित नामक
 बाईसवौं अध्याय समाप्त ।

(पाञ्चिक पारायण-अष्टम दिवस विश्राम)

अथ त्रयोविंशतितमोऽध्यायः

[२३]

त्रसद्दशु सुत तासु भये अनरण्य पुत्र तिन ।
 तिनके सुत हर्यश्व अरुण तिन तिनहिं त्रिबन्धन ॥
 भूप त्रिबन्धन तनय सत्यव्रत भये कुमति अति ।
 शङ्कु तीनि जिन करे त्रिशंकु ख्यात भूमिगति ॥
 गुरु बशिष्ठके शापतैं, श्वपच भये अति दुख सहे ।
 चांडालनिके बीचमहँ पितु आयसुतैं ते रहे ॥

दारा त्रिश्वामित्र भरन पोषन नृप कोन्हों ।
 है प्रसन्न मुनि नृपहिं मनोवाञ्छित फल दीन्हों ॥
 इच्छा राजा करी सहित तनु स्वर्ग सिधाजैं ।
 बोले त्रिश्वामित्र—यज्ञ करि तुरत पठाजैं ॥
 तपतैं भेजे स्वर्ग नृप, सुरनि ढकेले गिरे नभ ।
 लटके अघर त्रिशंकु तत्र, मध्यहिं डाँटे मुनि ऋषभ ॥

सुत त्रिशंकु हरिचन्द्र भक्ति जिन दृढ़ श्रीहरिपद ।
 सन्तति त्रिनु अति दुखित वरुण दिँग पठये नारद ॥
 वरुण कह्यो हाँ होहि होमि यदि देवो तिहि सुत ।
 स्वीकार्यो भूपाल भये सुन्दर सुत रोहित ॥
 भयो मोह भूपालकूँ, सुत पठयो बन वरुन भय ।
 सुरपति रोक्यो किन्तु, लै आयो बदले द्विज तनय ॥

पिता बरुनकी इष्टि करी बुलवाये मुनि सब ।
 कौशिक युक्ति बताइ बचायो शुनःशेष तब ॥
 बरुन भये सन्तुष्ट दयो रथ हरिश्चन्द्रकूँ ।
 लख्यो वंशधर पुत्र भयो सुख परम इन्द्रकूँ ॥
 हरिश्चन्द्र दानी महा, भये दुःख कौशिक दयो ।
 त्रिश्वामित्र वशिष्ठमें, महा युद्ध जिहि हित भयो ॥

मृगया हित इक दिवस गये नृप क्रंदन धुनि मुनि ।
 गये लक्ष्य करि नारि लखी तहँ अरु कौशिक मुनि ॥
 अबला सुनत बिलाप धनुषपै वान चढ़ायो ।
 अन्तरहित ते भई क्रोध कौशिककूँ आयो ॥
 बोले—तू दाता बड़ो, हाँ सुपात्र हूँ योग्य अति ।
 करो दान सर्वस्व तुम, दयो तुरत सब भूमिरति ॥

दायो सरबसु दान नगरतैं निकसे नरपति ।
 लखि सुत दारा जात प्रजाजन भये दुःखित अति ॥
 करिकैं हमें अनाथ नाथ ! तुम कहँ अब जाओ ।
 संग हमहिँ लै चलौ नहीं मझघार डुवाओ ॥
 प्रजारुदन मुनि दुःखित नृप, ज्यों ही मग ठाढ़े भये ।
 त्यों ही डंडा मारि मुनि, रानीकूँ धक्का दये ॥

मुनि रोक्यो मग कह्यो साङ्गता धन अब दीजै ।
 नृप बोले—मुनि ! एक मास घोरज अरु कीजै ॥
 यों कहि काशी गये कपर्दीकी रजधानी ।
 अवधि पूर्ण लखि पहुँचि नये कौशिक अभिमानी ॥
 द्रव्य याचना करी मुनि, नृप रानी बिक्रय करी ।
 रोहित हूबेच्यो स्वयं, बिके दक्षिणा द्विज भरी ॥

श्वपच दास बनि मृतक बल्ल धरि मघटमाही ।
 लेवै नृप तहँ बसहिँ दार सुधि बिसरत नाही ॥
 डस्यो सर्प सुत गोद लिये शैव्या तहँ आई ।
 पहिचानी पुनि कथा भूप दुख सहित सुनाई ॥
 मृत सुत सँग नृप नारि लै, जरिवेकूँ उद्यत भये ।
 त्यों ही देवनि सहित त्रिवि, धर्म इन्द्र दरशन दये ॥

तन धन सबसु तज्यो धर्म हरिचन्द न छोर्यो ।
 परी त्रिपतिपै त्रिपति नहीं सत तैं मुख मोर्यो ॥
 गये नृपति बैकुण्ठ भये रोहित नृप श्री-युत ।
 रोहितके सुत हरित हरितके चम्प भये सुत ॥
 चम्प नृपति चम्पापुरी, रची बोर बर तिन तनप ।
 नृप सुदेव हैं विदित जग, भये तासु सुत नृप विजय ॥
 इति श्रीभागवत चरितके चतुर्थाहमें त्रिशंकु हरिश्चन्द्रादि
 चरित नामक तेईसवाँ अध्याय समाप्त ।



अथ चतुर्विंशतितमोऽध्यायः

[२४]

मये विजय के भरुक भरुकके बृक तिनि बाहुक ।
 शत्रुनि छीन्यो राज गये बन पृथिवीपालक ॥
 बनमहँ नृप तनु तज्यो गाभिनी तिनकी रानी ।
 सौतिनि गर दै दयो सगर सुत जनम्यो मानी ॥
 मये सगर अतिही बली, शत्रुनिको शासन कर्यो ।
 दान पुण्य मख अधिक लखि, सुरपति हू तिनतैं डर्यो ॥

द्वै रानी तिन हतीं एकके सुत असमंजस ।
 दूसरि साठिसहस्र जने सुत मानी नीरस ॥
 अश्वमेध नृप सगर धूमतैं यज्ञ रचायौ ।
 भय बश सुरपति आइ यज्ञको अश्व चुरायौ ॥
 कपिलाश्रममहँ इन्द्र ने, मख हय बाँध्यो कपट करि ।
 साठिसहस्र सुत भूमि खनि, पहुँचे नाना रूप धरि ॥

सप्तद्वीपके मध्य द्वीप जम्बू अति पावन ।
 तामें हैं नववर्ष इलावृत मध्य सुहावन ॥
 कमल कर्णिका सरिस इलावृतकुँ पहिचानों ।
 अन्य आठ जो वर्ष कमल दल सम तुम मानों ॥
 पहिले नौक एक हे, सगर सुतनि खोदी मही ।
 तातैं भारत भूमि चहुँ, दिशितैं है गई जलमयी ॥

कपिलाश्रमपै अश्व निरलि नृपसुत हरषाये ।
 कोलाहल अति कर्यो कपिल मुनि चोर बताये ॥
 इन्द्र रच्यो षडयन्त्र बुद्धि नृप सुतनि त्रिगारी ।
 मुनि मारन हित चले देहिँ गिनि गिनकै गारी ॥
 कोलाहल सुनि सहज ही, नेत्र कभिलके खुलि गये ।
 दृष्टि परत निज पापतै, सगरपुत्र सब जरि गये ॥

सुत नहिँ आये सोचि सगरने पौत्र पठाये ।
 अंशुमान चलि दये कपिल मुनि आश्रम आये ॥
 कुमार विनय अति करी महामुनि अति हरषाये ।
 गंगा लाओ पितर हेतु ये बचन सुनाये ॥
 अश्व पाइ मल पूर्ण करि, सगर तपोवन चलि दये ।
 तदनन्तर मनु बंशके, अंशुमान भूपति भये ॥

अंशुमान तप कर्यो अवनिपै गंगा आवैं ।
 मृतक पितर पय परसि नरक तजि सुरपुर जावैं ॥
 भये कुमार दिलीप राज तजि जाय बसे वन ।
 गंगा आई नहीं स्वरग नृप गये त्यागि तन ॥
 कुमार दिलीप पराक्रमी, पितु पीछे भूपति भये ।
 गंगा हित तप करनकुँ, हिमगिरिपै तेहू गये ॥

करत करत तप भूप दिलीपहु स्वर्ग सिधारे ।
 तिनके सुत नृप भये भगीरथ सबके प्यारे ॥
 पिता पितामह मरे नहीं श्रीगंगा आई ।
 पितर परे यमसदन दुःखतै ते विललाई ॥
 भूप भगीरथ राज तजि, गंगाजी लैवे गये ।
 अबकै जननी तुष्ट है, नरपतिकुँ दरशन दये ॥

गंगा बोलीं—वेग बड़ो रोकै को मेरौ ।
 औरहु चिन्ता एक करूँ हों कारज तेरौ ॥
 हौं सबके अघ हलूँ हरै मेरे को अघ नर ।
 कहैं नृपति—तब वेग सहेंगे शिव हर शंकर ॥
 अघहारी हरि हिथ बसहिं, साधु पाप काटहिं सबहिं ।
 है प्रसन्न अवतरन हित, गंगाजी गमनी तबहिं ॥

गर्जत तर्जत चलीं वेगतैं गंगा माता ।
 गिरीं जहाँ गिरिजेश विराजैं भवभय नाता ॥
 सोचैं शिवकुँ संग लिये पाताल पधारूँ ।
 जीजाजीकी जटनिमोहिं जल धारा डारूँ ॥
 भोले बाबा भंगकी, बैठे सहज तरंगमहूँ ।
 जटनिमोहिं गंगा गिरीं, परी भंग तिनि रंगमहूँ ॥

इत उत सुरसरि फिगहिं जटनिमहूँ मग नहिं पावैं ।
 भूप भगीरथ निरखि खेल अतिशय घबरावैं ॥
 शिव सन विनती करी जटनितैं छोड़ी गंगा ।
 हैकें चंचल चलीं अवनिपै तरल तरंगा ॥
 हिमगिरि नग तोरति बहहिं, सुर नर मुनि जय जय करहिं ।
 रथ पीछे पीछे फिगहिं, चलत दरशतैं अघ हरहिं ॥

उतरि हिमालय अंक अवनिपै नीचे आई ।
 सामग्री मुनि जहु यज्ञकी सबहिं बहाई ॥
 लखि अविनय मुनि कर्यो कोप गंगा पी लीन्हीं ।
 भूप भगीरथ विनय बहुत बिधि मुनिकी कीन्हीं ॥
 छोड़ी गंगा कानतैं तनया तिनकी है गई ।
 तबई तैं भागीरथी, ख्यात जाहूवी जग भई ॥

अवनि उतरि अब बढ़ीं रहीं नहिं गंगा छोटी ।
 चंचलता छुटि गई भई अब कृश तैं मोटी ॥
 संग भगीरथ लिये कपिल मुनि आश्रम आये ।
 गंगाजलकूँ परसि पितर सब स्वर्ग सिधाये ॥
 भस्मभूत माँ पय परसि, सगर सुतनि छूटी व्यथा ।
 तट निवसै नित पय पियै, तिन सुकृतिनिकी का कथा ॥

गंगा गंगा कहैं नित्य गंगाजल पीवैं ।
 सदा बसै तट निकट गंग जलतैं ई जीवैं ॥
 गंगारज तन लाइ नहावैं गंगा जलमहैं ।
 बसैं गंग पय परसि, अनिल बिहरै जिहि थलमहैं ॥
 श्रीगंगा के नाम तैं, कोटि जन्म पातक नसहिं ।
 भोगें भूपै भोग बहु, अन्त जाहि सुरपुर बसहिं ॥
 इति श्रीभागवत चरितके चतुर्थाहमें श्रीगंगावतरण नामक
 चौबीसवाँ अध्याय समाप्त ।



अथ पञ्चविंशतितमोऽध्यायः

[२५]

धन्य भगीरथ गंग लाइ जग कीन्हों पावन ।
 तिनके सुत श्रुत भये तासु सुत 'नाभ' सुहावन ॥
 सिन्धु द्वीप तिनि तनय भये तिनि के अयुतायू ।
 तिनके सुत ऋतुपर्ण सखानलके परमायू ॥
 दमयन्तीपति नल भये, तिनि कलि दीये दुःख अति ।
 हूँ विरूप ऋतुपर्णके, बने सारथी भूमिपति ॥

दमयन्ती पति तजी भाग्यवश आई पितु घर ।
 पति खोजन हित रख्यौ दुबारा मृषा स्वयम्बर ॥
 नल ऋतुपर्ण समेत ससुर गृह रथ लै आये ॥
 नल दमयन्ती मिले, सुनत सब जन हरषाये ॥
 काया तैं कलियुग भग्यो, जब नृपके दिन फिर गये ।
 गयो राज फिरितैं मिल्यो, जग यश भागी नल भये ॥

हयविद्या ऋतुपर्ण नृपतिवर नलतैं लीन्हों ।
 पासो फेंकन कला तिनहिं बदलेमहँ दीन्हों ॥
 सर्वकाल ऋतुपर्ण पुत्र बलवान शूर अति ।
 सुत सुदास तिनि भये सुरानी मदयन्तीपति ॥
 मृगया हित बनमहँ गये, हन्यो राकछस भूप तहँ ।
 तिहि आता धरि सूद वपु, करै रसोई महलमहँ ॥

राँध्यो नरको मौँस परोस्यो नृपति पुरोहित ।
 देखि अमेध्य पदार्थ भये गुरुवर अति कोपित ॥
 दयो शाप पुरुषाद बने भूपति अति कोप्यो ।
 दैवे गुक्कूँ शाप चल्थो मदयन्ती रोक्यो ॥
 शाप-नीर पैरनि धर्यो, भयो भूप कल्माष पग ।
 नरभक्षी नृप मित्रसह, भये ख्यात सौदास जग ॥

भुनि बशिष्ठको शाप नृपति राक्षस बनि विचरै ।
 द्विज दम्पति बनमौँहिँ सुवर संतति हित त्रिहरै ॥
 लगी बुभुक्षा भूप पकरि द्विज खायौ जबहीं ।
 द्विजगत्नी अकृतार्थ शाप नृप दीन्हों तबहीं ॥
 गर्भाधान करौ जबहिँ, तबहिँ होइगी मृत्यु तब ॥
 वंशनाश को शाप सुनि, भये दुखित अति सचिव सब ॥

बीते बारह धरस शाप उद्धार भयो जब ।
 करिवे गर्भाधान भये उद्यत भूपति तब ॥
 बरजे रानी नृपति शाप की याद दिखाई ।
 महिषी संतति बिना बहुत रोई घबराई ॥
 वंशनाशको भय समुक्ति, लख्यो न अन्य उपाय तब ।
 गुरु बशिष्ठतैं विनय करि भूप प्रार्थना करी तब ॥

बोले नृप सौदास—प्रभो ! अब रक्षा कीजै ।
 चलै जासु मनु वंश पुत्र इक गुरुवर दीजै ॥
 कीयो गर्भाधान भई अति हर्षित रानी ।
 नष्ट वंश नहिँ होय बात जिह सबने जानी ॥
 सात बरस तक उदरतैं, नहीं पुत्र पैदा भयो ।
 मदयन्ती अति दुखित है, बचन पुरोहिततैं कह्यो ॥

भगवन् ! का भैरि दयो उदर मँहँ जो नहि निकसत ।
 अटक्यो एकहि ठौर तनिक तहँ तैं नहिं खिसकत ॥
 मुनि हँसि लीयो अश्म मन्त्र पढ़ि उदर छुवायो ।
 मदयन्तीने तुरत सुघर सुत श्रम विनु जायो ॥
 प्रमुदित सबही जन भये, राजारानी पुरोहित ।
 तेहँ अश्मक नामतैं, भये भूष जगमहँ विदित ॥

अश्मकके सुत भये राजकुञ्जके जो मूलक ।
 तबई प्रकटे परशुराम क्षत्रियकुल शूलक ॥
 नारिनि कवच बनाइ वचाये मनुकुल त्राता ।
 नारीकवच कहाय भये जगमहँ विख्याता ॥
 मूजक सुत दशरथ भये, एडविड हु सुत तासुके ।
 पुत्र एडविड विश्वसह, खट्वाङ्ग हु नृप जासुके ॥


दो०—रहैं स्वर्ग खट्वाङ्ग जब, देव कहें वर लेहु ।
 वय मुहूर्त मुनि नृप कहें, सुर ! सत्संगति देहु ॥

छाप्य—जानी एक मुहूर्त आयु सब जग विसरायो ।
 करि कै ध्यान अखण्ड परमाद नृपने पायो ॥
 तिनके पुत्र दिलीप यशस्वी दीर्घबाहु बर ।
 सन्तति विनु अति दुखित गये निबसैं जहँ गुरुवर ॥

महिषी संग सुदक्षिणा, लिये जाय गुरुद गहे ।
 आशिष दै निज शिष्य तैं, वचन मुदित मन गुरु कहे ॥

गौ-सेवातैं पुत्र होहि यह मैंने जानी ।
 करि सादर स्वीकार नंदिनी सेवा ठानी ॥

कृपा नन्दिनी करी भये रघु रविकुल भूषण ।
 रघुके अज सुत भये तनिक जिनमहँ नहिँ दूषण ॥
 अज अति अनुपम नृप भये, इन्दुमतीने जो वरै ।
 एकछत्र जगमहँ नृपति, अगणित मख जिनने करै ॥
 इति श्रीभागवतचरितके चतुर्थाहमें रघुवंशवर्णन नामक
 पच्चीसवौं अध्याय समाप्त ।



अथ षड्विंशतितमोऽध्यायः

[२६]

छाप्यय—दाशरथी श्रीराम रमे योगीजन जिनिमें ।
 प्रथम वन्दना करूँ मृदुञ्ज तिनिके चरननिमें ॥
 रघु-कुल पावन परम अधिक यश श्रीहरि दीयौ ।
 जामें लै अवतार कृतारथ कुञ्ज करि दीयौ ॥
 को कवि उपमा करि सकै, अवधपुरी सुखघाम की ।
 कहूँ कथा करुनामयी, अब श्री सीताराम की ॥

अजके दशरथ पुत्र यशस्वी अति ई पावन ।
 जिनके यशतैं विमल घवल अब तक यह त्रिभुवन ॥
 भूपति परम उदार दान बहु विप्रनि दीन्हें ।
 भूरि दक्षिणायुक्त विषद मल जिन बहु कीन्हें ॥
 देवासुर संग्राममहैं, असुर पराजित जिन करे ।
 दिव्य अस्त्र आघात तैं, अगनित सुर कंटक मरे ॥

सब सुख नृपके निकट पुत्र बिनु परि अति चिन्तित ।
 रानी सब सुतरहित वंशघर बिनु अति दुःखित ॥
 विनती गुरुतैं करी रचायौ मल सुतके हित ।
 ऋष्यशृंग पुत्रेष्टि यज्ञ करवायो प्रमुदित ॥
 बह्यो भूमिको मार बहु, सुर सब मिलि हरि दिँग गये ।
 सेतु करन भव उदधिपै, अब अन्युत प्रकटित भवे ॥

अग्नि कुण्डलै प्रकट भये पायस नृप दोन्हों ।
 तोनिहु रांनिनि दियो भाग न्यायोचित कीन्हों ॥
 गर्भवती सब भई सवनिके हिय हुलसाये ।
 शुभ मूहूर्त शुभ समय गम कौशल्या जाये ॥
 शुक्लपक्ष मधुमासकी, नवमी अति पावन परम ।
 प्रकटे रघुकुलचन्द्र शुभ, भयो अजन्माको जनम ॥

कैकेयीने कुमार भरत कुलदीपक जाये ।
 जनम सुतनिकों सुनत अवनिपै बजत बधाये ॥
 सती सुमित्रा जने संग लछिमन रिपुसूदन ।
 चारि पुत्र मुख निरखि भूप को अति प्रमुदित मन ॥
 नामकरन संस्कार गुरु, सबके कीन्हें नेमतैं ।
 हौ हरषित महिषी सबहिं, पुत्रनि पालैं प्रेमतैं ॥

अब कछु घुटुअनचलत फिरतइत उतमहलनिमहैं ।
 बलि बलि जावैं मातु बुलावति हँसि सैननिमहैं ॥
 छोटी छोटी लटैं लटकि आनन पै त्रिथुरैं ।
 चमकीली लखि वस्तु दौरि ताहीकूँ पकरैं ॥
 पानीकूँ पप्पा कहैं, हप्पा मार्गैं मातुतैं ।
 बप्पा भूपतिकूँ कहत, धूलि मलत निज गाततैं ॥

चलिबो. सिखवन हेतु मातु पग धुँधुरू बाँधे ।
 पाँ पाँ पैया चलैं मातुको उँगली साधे ॥
 कुत्ता बिल्ली काक पकरिवे हाथ बढ़ावैं ।
 जत्र नहिं आवैं हाथ रोइ जननी ढिँग जावैं ॥
 सम्मुख निरखत वस्तु जो, कर उठाय मुखमहैं धरत ।
 तोरत फोरत हँसत सब, मनहर शिशु क्रीड़ा करत ॥

सखनि संग मिलि करै खेल अब चारिहु मैया ।
चरित निरखि नृप सहित मुदित हों तीनिहु मैया ॥
बड़े भये उपनयन कर्यो गुरु-गृह भिजवाये ।
मुनि बशिष्ठ प्रभु शिष्य पाइ अति हिय हरषाये ॥
गुरु सुश्रूषा करहि सच, पढ़हि पाठ एकाग्र चित ।
समय शील संकोचयु, सुनहि शास्त्र श्रुति तन्त्र नित ॥

सीखे साखे राम लोक ब्यौहार दिखावैं ।
गुरु महिमाको मर्म शिष्य बनि सबहि सुनावैं ॥
स्वल्प समयमहैं शास्त्र पढ़े गुरु चकित भये अति ।
स्वयं सच्चिदानन्द समुक्ति अति विमल भई मति ॥
वयकिशोरने बरे जनु, ओठनि छाई कालिमा ।
पदतल, अधर, कपोलनिहि बड़ी सबनिकी लालिमा ॥

दोहा—तबहि सरसता रामके, कहै कानमें आइ ।
बिना शक्ति का करि सकौ, खोजो ताकूँ जाइ ॥
इति श्रीभागवतचरितके चतुर्थाहमें राघवेन्दुचरित अन्तर्गत
प्रथम बालचरित नामक छब्बीसवाँ अध्याय समाप्त ।



अथ सप्तविंशतितमोऽध्यायः

[२७]

हे सीतापति राम ! प्रणतपालक परमेश्वर ।
 हे मिथिलापथपथिक ! मुनिनि मखरक्षक सुखकर ॥
 हे लक्ष्मिन सरवस्व ! जानकीजीवन जगपति ।
 हे रघुकुलके तिलक ! दीन दुखियनिकी गति मति ॥
 खण्डन करि हर चापकूँ, अपनाई सीता यथा ।
 तव पदरज सिर धारि प्रभु, कहूँ व्याहकी शुभ कथा ॥

राम-नाम अति मधुर सुखद सबकूँ सुखकारी ।
 राम-धाम अति विमल पुण्यप्रद सब अघहारी ॥
 राम-रूप अति सुधर मनोहर सुख सरसावन ।
 राम-प्रिया जग जननि जीव जग-जरनि जरावन ॥
 राम-अनुज आदरश अति, राम भक्त सुख सार हैं ।
 राम-चरित पावन परम, होवें सुनि भवपार हैं ॥

वनमें विश्वामित्र करें तप यज्ञ रचावैं ।
 यातुधान तहैं आइ यज्ञको अग्नि बुझावैं ॥
 बार बार बहु विघ्न करें मिलिकें खल आवैं ।
 मुनि मन सोचैं—शाप देहूँ सब सुकृत नसावैं ॥
 करन कृतारथ जननि हरि, धरम सेतु बाँधन निमित ।
 मये अवधमहैं अवतरित, भक्त, धेनु, सुर, संत हित ॥

जाऊँ तिनिकी शरन तिनहिँ सब विपति सुनाऊँ ।
 दशरथकूँ समुक्ताइ अनुजयुत उनकूँ लाऊँ ॥
 मखरति जगपति सकल विश्वपति वनमहँ आवैं ।
 तो संतनिके सकल शोक दुख भय भगि जावैं ॥
 प्रभु दरशन करि सब सुकृत, जप तपको फल पाउँगो ।
 द्वार देवके जाइकैं, अवसि तिनहिँ लै आउँगो ॥

तिनि की बिद्युरी शक्ति मिलाऊँ जग यश पाऊँ ।
 जोरी बनै मज्जुक युगल छुविऊँ नित ध्याऊँ ॥
 शक्ति सिया मिलि जाई होहिँ अवतार सरस अति ।
 कविगन होहिँ कृतार्थ भनैं शुभ चरित यथामति ॥
 विश्वामित्र विचार करि, अति प्रसन्न मनमहँ भये ।
 राम लखन याचन निमित्त, अवधपुरीकूँ चलि दये ॥

आये विश्वामित्र राम लङ्घिमन तिनि माँगे ।
 वचन शूल सम नृगति हियेमहँ मुनिके लागे ॥
 गुरु बशिष्ठ समुक्ताइ दये मुनिकूँ दोऊ सुन ।
 मुनिके पीछे चलैं राम लङ्घिमन अति प्रमुदित ॥
 मिली ताड़का पन्थमहँ, मारी गुरु आज्ञा दई ।
 प्रभु छोड़्यो शर सरतैं, लग्यो हियेमहँ मरि गई ॥

मारि ताड़का चले फेरि सिद्धाश्रम आये ।
 गुरु मन्त्र दीक्षित भये राम रक्षक कहलाये ॥
 पूर्णाहुति के दिवस निशाचर दल इक आयौ ।
 मार्यो राम सुबाहु लंक मारीच पठायौ ॥
 मखरक्षक श्रीरामपै, अति प्रसन्न मुनिवर भये ।
 आशिष दुलहिनि देनहित, धनुषयज्ञमहँ लै गये ॥

सोरठा—सम्मुख निरखे राम, अति विनीत शोभासदन ।
 प्रेम सहित लै नाम, कौशिक सिर सूँघन लगे ॥

छप्पय—बोले विश्वामित्र—तात ! मिथिला मल भारी ।
 भूप जनककी परम सुन्दरी एक कुमारी ॥
 चलो तहाँ सो मिलै घनुष मल अति सुखदायक ।
 मुनिवर की मुनि बात सहमि सकुचे रघुनायक ॥
 सिर नोचा करि सिकुड़िकें, बोले श्री रघुनाथ तब ।
 चाहैं जहँ प्रभु लै चलें, सौंपे पितु हम हाथ तब ॥

कौशिक मुनि हँसि परे कहें—तुम क्यों सकुचाओ ।
 मिथिला मम सँग चलो अवसि दुलहिनि तुम पाओ ॥
 यों कहि लैकें संग चले मुनि कथा सुनावत ।
 निरखें मुनि हँसि जवहिँ राम तवही सकुचावत ॥
 चलत चलत मगमहँ मिली शिला, नारिके सरिस बन ।
 प्रभु पूछें—कैसी शिला, मुनि मुनि बोले तपोधन ॥

गौतम ऋषि की नारि अहल्या है यह रघुवर ।
 छल कर नास्थो धरम कपटपति बन्यो पुरन्दर ॥
 आये मुनि सब समझि इन्द्रकी दुरगति कीन्हीं ।
 शाप नारिकूँ दयो शिला सम सा करि दीन्हीं ॥
 निज पदरज दै अब हरहु, गुरु अनुशासन मानि हरि ।
 परसी पगतैं सो तुरत, करै विनय उठि पैर परि ॥

(१)

हे हरि ! हों अति निन्दित नारी ।
 नहिँ प्रभु जप तप पूजा कीन्हीं, करी न विनय तुम्हारी ।
 विषय भोगमहँ सब छिन खोये, पाप करे अति भारी ॥ हे हरि०

यौवन मदमहँ 'है मदमाती, नहीं मजे मदहारी ।
 निजपति परपति भेद न समुझ्यो तन मन, बुद्धि विसारो ॥ हे हरि०
 हों पतिप्राना परमप्रेयसी, अति सुन्दर सुकुमारी ।
 पतन हेतु अभिमान बढ़ायो, मदन मोर मति मारी ॥ हे हरि०
 पतित उधारन सब जग पावन, आये द्वार खरारी ।
 करी कृतारथ भई यथारथ, चरन कमल बलिहारी ॥ हे हरि०

(२)

प्रभुजी ! तुमरो एक सहारो ।

पाप करत निसि बासर बीते, रट्यो न नाम तिहारो ।
 भववारिधि में डूबि रही हूँ, दीखै नाहिँ किनारो ॥ प्रभुजी०
 माता पिता सगे सम्बन्धी, कोई नहीं हमारो ।
 शरण गही है सब बरननिकी, अशरनसरन उबारो ॥ प्रभुजी०
 परमारथ पथ लगै न हितकर, पाप लगै अति प्यारो ।
 पतित उधारन हो तुम भुव्वर, पापिनिकूँ हू तारो ॥ प्रभुजी०
 बनी पषान परी प्रभु पगमहँ, नहिँ कोई रखवारो ।
 स्वयं आइ अपनाई राघव, अब नहिँ कबहुँ, विसारो ॥ प्रभुजी०

छुपय—सुनी अहल्या बिनय राम मनमहँ मुसकाये ।

करि सेवा स्वीकार सरल शुभ वचन दुनाये ॥

पतिपदमहँ अनुराग करो तनि ईश्वर जानो ।

भामिनि मेरो रूप उनहिँकूँ निशि दिन मानो ॥

यो शिद्धा दै राम पुनि, जनकपुरीकूँ चलि दये ।

शुद्ध अहल्याकूँ निरखि, गौतम अति प्रमुदित मये ॥

मगमहँ गौतम नारि तारि मिथिलापुर आये ।
 राम सहित मुनि पूजि जनक निज महिलनि लाये ॥
 राम निहारी सीय हियेमहँ दुरत छिपाई ।
 निरखें सीता राम मनहुँ खोई निधि पाई ॥
 भूप स्वयम्बर सीय हित, रच्यो शम्भु धनु धरि दयो ।
 खींचि धनुष सिय बर वनै, शतानन्द नृप प्रन कह्यो ॥

सत्रई याके भूप धनुष नहिँ उठै उठाये ।
 गुरु आयसु सिर धारि राम सम्मुख धनु आये ॥
 सीय दीठितैं दीठि मिली दोऊ मुख मोरयो ।
 सिय मुख दीठि न लगै रामने धनु नृन तोरयो ॥
 धनुष भंग शिवको भयो, अङ्ग अङ्ग सियके खिले ।
 चकवा चकवी सरिस सिय, राम नसैं धनु तम मिले ॥

मेजे भूपति दूत सुनत दशरथ हरषाये ।
 सजि बरात गुरु भरत शत्रुहन सँग नृप आये ॥
 राम लखन इत भरत शत्रुहन चारिहुँ भाई ।
 उत सीता उर्मिला मांडवी कीर्त्ति सुहाई ॥
 विधिवत भये विवाह शुभ दुलहा दुल्हान संगमहँ ।
 सुतनि बहूनि समेत लखि, नृप समाहँ नहिँ अंगमहँ ॥

विदा करन बर बधुनि सकुचि महलनिमहँ आये ।
 माता पुत्रिनि परम पतिव्रत धरम सिखाये ॥
 जनक जननि तैं मिलीं बिलखि चारिहुँ सुकुमारी ।
 पुत्रिनि रोवत निरखि जनक मुधि देह विसारी ॥
 करि बिवाहहूँ कै विदा, बधुनि सहित नृप घर चंले ।
 क्षत्रिय कुलनाशक परशु—राम कुपित मगमहँ मिले ॥

गर्जे तर्जे परशुराम रघुपति मुख मोर्यो ।
 दयो विष्णु कां धनुष ताहि रघुनायक तोर्यो ॥
 जामदग्न्यकी आँखि खुलीं बिनती बहु कोन्हीं ।
 !गरि महेन्द्रकूँ गये शक्ति तिनिकी हरि लीन्हीं ॥
 नृप दशरथ हैकें मुदित, आये पुर वरबधुनि सँग ।
 ज्यों-ज्यों पुर आवत निकट, होहिँ सबनिके पुलक अँग ॥

इत महलनिमहँ मातु मनावें कब सुत आवें ।
 कब सुकुमारो सकल सुन्दरी दुलहिनि लावें ॥
 इतनेमें संवाद सुन्यो दुलहिनि सब आवत ।
 भई मुदित मन मातु हरष हिय नाहिँ समावत ॥
 कर्यो आरतो अरघ दै, नेग जोग सबही करहिँ ।
 दुलहिनि धूँघट मारिकें, सब सासुनिके पग परहिँ ॥


सबके पाँइनि लगीं सुतनि सँग बहू निहारीं ।
 लेइँ बलैयों मातु रूप लखि जावें वारीं ॥
 मुँह दिखाव को नेग भयो सब धन मनि देवें ।
 सकुची सहमी बहू देखि धूँघटतैं लेवें ॥
 कनकभवन कैकेयिने, जनकदुलारीकूँ दयो ।
 देउँ कहा हौं बहूकूँ, सोच मातुके मन भयो ॥

कौशल्या सुत-बधू रूप छवि पुनि पुनि देखें ।
 म न हिये समाइ चकित चित दोउनि देखें ॥
 मनि मुक्ता धन रत्न, देहुँ का तुन्छ सबहिँ हैं ।
 मेरी जीवन मूरि परम धन रामललहिँ हैं ॥
 यों माता मन सोचिकें, राम कमलकर कर लयो ।
 जनकदुलारीके मृदुल, करकमलनिपै धरि दयो ॥

मन मुसुकाई सीय राम अतिशय सकुचाये ।
 सब दुलहिनि इस्नान शयन भोजन करवाये ॥
 चारिहु विहरें रमा उमा रति शचि सम दुलहिनि ।
 हरि हर काम सुरेन्द्र संग लै मानों महलनि ॥
 होहिँ मुदित माता सकल, पुत्र वधुनि लखि कमलमुख ।
 करि क्रीड़ा रघुनाथ, प्रिय पितु मातनि नित देहिँ सुख ॥

इति श्रीभागवतचरितके चतुर्थाहमें राववेन्दु चरित अन्तर्ग
 द्वितीय विवाह चरितनामक सत्ताईसवें अध्याय समाप्त ।





श्री सीताराम

अथ अष्टाविंशतिमोऽध्यायः

[२८]

भरत शत्रुहन गये मातुगृह कैकयपुरमहँ ।
 राम होहिँ युवराज भई इच्छा नृप उरमहँ ॥
 सबनि समरयन कर्यो तिलकको भई तयारी ।
 किन्तु कूबरी कुटिल नीचमहँ वात बिगारी ॥
 कान केकयीके भरे, मँगवाये द्वै वर तुरत ।
 वसैं चतुरदश बरस बन, राम राज्य पावहिँ भरत ॥

दशरथ अनुनय विनय करी रानी न पसीजी ।
 वज्र हृदय वनि गई मन्यरा विषमहँ भीजी ॥
 प्रात सूततैं तुरत भूय रघुवर बुलवाये ।
 मातु पिताकी दया देखे रघुरति घबराये ॥
 जब नहिँ बोले नृपति कछु. कथा केकयी सब कहो ।
 उठे विलखि नृप राम कहि, परि पापिनि बैठी रही ॥

कौशल्या दिँग जाय राम चरननि सिर नायो ।
 लखन कोपअति कर्यो नृपति मत नहिँ मन भायो ॥
 माताकुँ. समुझाय बन्धुकुँ शिखा दोन्हों ।
 जस तस घर्म बताइ जननितैं अनुमति लीन्हों ॥
 वैदेही बन चलन हित, हठ अति कीन्हों सँग लई ।
 चले राम पाछें लखन, मध्य जानकी चलि दई ॥

सुनी कालि युवराज वनें परि अत्र वन जाहीं ।
 हककी बककी भई मातु तनकी सुधि नाहीं ॥
 भोरी भारी कुसुमकली सी सिय सुकुमारी ।
 जाइ राम सँग मातु निरख अति भई दुखारी ॥
 राम कहाँ मेरे तनय, कहाँ जनककी नन्दिनी ।
 रहूँ हाय ! कैसे यहाँ, हौँ बैरिनि बनि वन्दिनी ॥

तड़फै पुनि पुनि गिरै उठै इत उतकूँ भागै ।
 राम कौन मग जाइँ शून्य सवरो जग लागै ॥
 हे सुकुमारी प्रानपियारी बेटी सीता ।
 जनकदुलारो अरी होहि वनमहँ भयभीता ॥
 राम मोइ वन लै चलो, अवधपुरी नहिँ रहुङ्गी ।
 सहों विपति तेरे निमित, बेटा ! अत्र नहिँ सहुङ्गी ॥

मेरो भोरो राम निरदयी कौनें कीन्हों ।
 मोइ संग नहिँ लेइ लखन हूँ सँग लै लीन्हों ॥
 बेटा लछिमन पैर परूँ सँग लै चलि मोकूँ ।
 छाँह करति मग चलूँ कष्ट दुङ्गो नहिँ तोकूँ ॥
 डकरावै निज सिर धुनै, माँ पगली अट पट बकै ।
 दशा देखि दयनीय अति, धीरज को नर धरि सकै ॥

इत पितुके पग वन्दि केकयीतैं पट पाये ।
 पहिने बलकल वसन सीय सँग रघुवर आये ॥
 लछिमन पीछे चलैं निरखि पुरजन डकरावैं ।
 रघुनन्दन तजि कबहुँ लौटि हम घर नहिँ जावैं ॥
 हरष विषाद न राम मन, रथपै बैठे आइकें ।
 निरखि मातु विह्वल भई, घेरयो रथकूँ जाइकें ॥

बिना बत्सके धेनु सरिस माता रथ घेर्यो ।
 रोवत लखि नर नारि राम मुख रथमें फेर्यो ॥
 बिहरै बाल बखेरि राम कहि रोवै जननी ।
 वहाँ नयन जलधार मई गीली सब घरनी ॥
 राम कहाँ ? लछिमन कहाँ ? बड़भागी सीया कहाँ ?
 मैं हूँ जाऊँ संगमहँ, जाइँ लाल मेरे जहाँ ॥

सोरठा—इतने में चिल्लात, निकसे भूपति महलतैं ।
 रोवत नंगे गात, डगमग डगमग परत पग ॥
 राम कहैं बिलखाइ, दृश्य भयो जब करन अति ।
 अब नहिँ देख्यो जाइ, हाँकौ रथकूँ सूतजी ॥
 हाँकि दयो रथ सूत, नृप घड़ाम धरनी गिरे ।
 कहाँ गये मम पूत, नृप कौशल्या मिलि कहैं ॥

छप्पय—राम गये बन नृपति फेरि सुरलोक सिधारे ।
 गुरु बुलवाये भरत वृत्त सुनि भये दुखारे ॥
 पितुके सब करि करम मनावन चले राम बन ।
 रटत राम रज चरणमाँहिँ तनु छविमहँ लय मन ।
 चित्रकूटपै लखन सिय, राम भरत लखि पग परे ॥
 है आधार रोये भरत, नयन नीर सबके मरे ॥

पुचंकारे लघुबन्धु धरम अरु नीति सिखाई ।
 पितु गौरवकी बात बिबशता राम बताई ॥
 भरत मरम सब समुक्ति दण्डवत् पग परि कीन्हीं ।
 रामरजायसु पाइ पादुका प्रभुकी लीन्हीं ॥
 निवसैं नन्दीग्राममहँ, छाल बसन अति छीन तन ।
 राम रटहिँ यवव्रत करहिँ, राम चरनमहँ लीन मन ॥
 २७ फ०

चित्रकूटतैं चले राम इत दंडकवनमहैं ।
 निरखि राम सिय लखन होहिँ मुनि प्रमुदित मनमहैं ॥
 अत्रि अगस्त्य सुतीक्ष्ण आइ मुनि पावन कीन्हैं ।
 भये कृतारथ सबहिँ स्वयं हरि दरशन दीन्हैं ॥
 बसहिँ राम सिय संगमहैं, पंचवटीमहैं करि कुटी ।
 रामरूप फँसि भई जहँ, रावणभगिनी नरककुटी ॥

दूषण खर अरु त्रिशिर रामतैं लड़िवे आये ।
 निशिचर चौदह सहस राम यमसदन पठाये ॥
 निशिचर कीट पतंग राम लौमहैं जरि जावैं ।
 गूलर सम गिरि जायँ राम जब बान चलावैं ॥
 यातुघान जब सब मरे, चली लंककूँ नरककुटी ।
 मगहिँ निशाचर बेगि कत्र, लगी रामकूँ चटपटी ॥

रावणके दिँग जाय रोइ बोलो नरककुटी मुनि ।
 पंचवटीमें रहैं राम लछिमन बनिकैं मुनि ॥
 सङ्ग सीय इक सुघर नारि रति सम सुकुमारी ।
 भाभी मेरी बनें बात मनमाँहिँ विचारी ॥
 तिनि मुनि मम प्रस्तावकूँ, नाक काटि मेरी लई ।
 खर, दूषण, त्रिशिरा मरे, अपकीरति तेरी भई ॥

निरखि बहिन अग्रमान रक्त खोलै नहिँ तेरो ।
 रावण बोल्यो—बहिन ! निरादर है जिह मेरो ॥
 छल बल तैं तिनि मारि नारि दिनकी लै आऊँ ।
 मृग यनाइ मारीच तहाँ हौँ अगई जाऊँ ॥
 डरि रावनतैं कनकको, बनि मरीच मृग चलि दयो ।
 पंचवटी दिँग फिरहि खल, सीताकूँ म्स्मय भयो ॥

इति श्री भागवत चरितके चतुर्थाहमें राघवेन्दुचरित अन्तर्गत तृतीय
 वनचरित नामक अष्टाईसवाँ अध्याय समाप्त ।

अथ एकोनत्रिंशत्तमोऽध्यायः

[२६]

हे सीतारति ! लखनबन्धु ! भक्तनि मुन्नदाता ।
 हे अनाथके नाथ ! पतित पावन भयत्राता ॥
 हे शोभाके धाम ! राम ! जग रमित्रे वारे ।
 हे वनवासी राम ! मुनिनि मन हरित्रे वारे ॥
 हे जगपावन ! तत्र चरन-रेखारञ्जित धूरि जो ।
 कहूँ कथा सिर धरि विमल, भक्तनि जीवनि मूरि जो ॥

राम ! हृदयमहँ वसो कामकुँ तुरत भगाओ ।
 राम ! मलिन मारीच बन्यो मन मारि गिराओ ॥
 राम ! सिन्धु भव बहत सेतु करि पार लगाओ ।
 राम ! निहारै राह आह तन तपन बुझाओ ॥
 राम ! न साधन भजन मन, बने परे पाषाण हम ।
 राम ! छुआओ चरन निज, हो जड़ चेतन करन तुम ॥

कनक हिरन वनि गयो दुष्ट मारीच निशाचर ।
 मनि मुकाकी पूँछ रूप अति अद्भुत सुन्दर ॥
 क्रीड़ाकानन जनकनन्दिनीके में आयो ।
 चरित्रे लाग्यो दूब सीय लखि मन ललचायो ॥
 करति प्यार अति मृगनिर्ते, नृप विदेहकी प्रिय लली ।
 जाइ जिवाऊँ मुखर अति, सोचि प्रानपति दिँग चली ॥

बोली पतितैं लिपटि—हरिन जिह अद्भुत प्रियतम ।
 पकरो जाकूँ खेल कर्यो करिहैं मिलि हम तुम ॥
 सीताकूँ सुख दैन चले शर घनु लै रघुवर ।
 अति उत्सुकता बढ़ी कनक मृगको हित हरिउर ॥
 घनुघारी रघुनाथकूँ, ललि पीछे भाग्यो असुर ।
 मारहिं नहिं पकर्यो चहैं, सोचहिं प्रभु मृग अति सुधर ॥

नहिं जब आयौ हाथ तीर तकि सियपति मार्यो ।
 हा सीता ! हा लखन ! रामस्वर माँहिं पुकार्यो ॥
 ललि रजनीचर राम भये व्याकुल इत सीता ।
 पति आरत सुनि शब्द भई भामिनि भयभीता ॥
 पग पगपै प्रिय प्रेममहँ, अनहित आशङ्का रहत ।
 बचन कहे कछु कटु कुमरि, दास लखन सिरधुनि सहत ॥

बोले लल्लिमन—त्रियाचरित मत मातु दिखाओ ।
 कहैं जानकी—मरूँ राम दिँग यदि नहिं जाओ ॥
 लखन दुखित है चले दशानन तत्र तहँ आयो ।
 साधु समुझिकैं सीय सहमि सादर बैठायो ॥
 दुष्ट सीय लै चलि दयो, धेनु बधिक फंदे परी ।
 दुखित गीध स्वर सुनि भयो, जानि दशानन सिय हरी ॥

दूट्यो नभतैं गीध भूपट्टा रथपैं मार्यो ।
 तोर्यो रथ हय मारि सारथी हूँ संहार्यो ॥
 रुदन जानकी करें तात कहि कहि चिल्लावैं ।
 इत उत दौरें गिरें परें मूर्छित है जावैं ॥
 करि विलाप पुनि पुनि कहति, हे खग मृग तुम बन फिरत ।
 कहियो मम पति तैं तुरत, लै हरि रावन गयो इत ॥

बैनी भोटा खाइ गिरै केशनि की माला ।
 जेट नगनिकी भरै फिरै व्याकुल बनि बाला ॥
 सचर अचर सम भये डरै सबई रावन तैं ।
 जनकसुता दुरदशा लखैं खग मृग छिपि बन तैं ॥
 हा प्यारे देवर लखन ! हा जीवनधन प्रानपति ।
 परी दुष्टके फंदमें, गीघहु पाई परमगति ॥

समर दशानन सङ्ग गीघने अद्भुत कीन्हों ।
 अश्व सारथी मारि निशाचर मूर्छित कीन्हों ॥
 पुनि घायल करि गृद्ध चलयो सीता लै रावन ।
 किष्किन्धायै फौकि दये सिय पट आभूषन ॥
 पुरी लंक लै जाय सिय, बन अशोकमहँ रखिदई ।
 असन बसन तिनि सब तजे, पति त्रियोगमहँ कुश भई ॥

इत मारीचहिँ मारि लखन ललि राम रिस्यावत ।
 कुटी सीय त्रिनु निरखि त्रिलखिरोवत पछितावत ॥
 जइ चेतनको भेद भूलि भामिनि हित भटकै ।
 खग मृगतैं सिय पतो पूछि सिर धुनि कर पटकै ॥
 इत उत चितवत चकित है, नयन नीर धारा बहत ।
 तात धीर धारन करो, राम अनुज पुनि पुनि कहत ॥

सोरठा—दुखी प्रिया त्रिनु राम, राजिवलोचन भुवनपति ।
 लै लै सियको नाम, पूछत सबईतैं फिरै ॥

छप्पय—निम्ब ! कदम्ब ! रसाल ! पनस ! सिय पतो बताओ ।
 प्रिया छिपी तुम कहौं शीघ्र शशिवदन दिखाओ ॥
 जाइ तरुनि ढिँग कहत जनकतनया तुम देखी ।
 सरिता गोदावरी ! कहो सखि सिय तुम पेखी ॥

यो प्रलाप पुनि पुनि करें, सिरी सरिस राघव भये ।
सर, सरिता, वन, कन्दरा, ढूँढ़त दिशि दक्षिण गये ॥

निरखि सीय पद चिन्ह पुष्प मृत हयट्ठ्यो धनु ।
सियसिर सेवित मुमन भये लखि मृत अमृत जनु ॥
गुह्यराजकी दशा देखि भूले सिय बिछुरन ।
चाचा कहि-कहि चरन पकरि प्रभु लागे रोवन ॥
जनम मरनतैं छूटि तनु, दज्यो गीध भरि मोद महँ ।
रामरूप हिय राम मुल, देह रामकी गोद महँ ॥

गीध कर्म सब करे परमगति ताहि दिवाई ।
कियो कबन्ध कृतार्थ सुरति शबरीकी आई ॥
शबरी निरखे राम धाम शोभा शुभ खानी ॥
समुक्ति साधना सफल सकल फलकर्म भुलानी ।
प्रातिथ करि रघुनाथको, भगतिनि अति प्रमुदित भई ।
राम नाम मुख हृदय छवि, धरि तनु तजि हरिपुर गई ॥

ढूँढ़त ढूँढ़त राम गये सबरीके आश्रम ।
निरखि मुदित अति भई तापसी समुक्ति सफल श्रम ॥
चखि चखि लाई वेर प्रेम लखि हरि हुलसाये ।
लखन संग अति ललकि वेर भिक्षिनि के खाये ॥
सबरी बोली—जगतपति, पंपासर टिँग जाइकें ।
कपिपतितैं मैत्री करो, लावै सिय दुदवाइकें ॥

प्रेम वेर चखि चले सोच सीता हित भारी ।
कपि कस होवै मित्र भिलै कस जनकदुलारी ॥
अगनित जे छिनमोंहिँ विश्व ब्रह्माण्ड बनावैं ।
ते कपि मैत्री चहैं करुन नरनाथ्य दिखावैं ॥

राम लखन सुग्रीव लखि, पवनतनय पठये तहाँ ।
सिर चढ़ाई लाये तुरत, डरि कपिवर बैठे जहाँ ॥

रघुवर परिचय पाइ आइ बैठे सब बानर ।
करे सखा सुग्रीव राम करुनाके सागर ॥
रोइ रोइ सुग्रीव दुखद निज कथा सुनाई ।
दशा देखि अति दीन दया राघवकूँ आई ॥
भुज उठाइ प्रभु प्रन कर्यो, सखा काज हौँ करहुँ सब ।
सिय पट भूषन कपि दये, लखि प्रभु व्याकुल भये तब ॥

एक बानरैँ सात ताल वेधे जब रघुपति ।
भइ प्रतीति कपि हृदय हर्ष मनमहँ बाढ्यो अति ॥
संग लिये सुग्रीव बालि बध हित हरि आये ।
समर हेतु सुग्रीव बालि दिँग तुरत पठाये ॥
बालि मिढ्यो सुग्रीवतैँ, गुत्थम गुत्था है गई ।
भग्यो दुखित लघु बन्धु जब, पुनि पठये उर सग दई ॥

मालातैँ पहिचानि बालि उर शर हरि मार्यो ।
राम बानरैँ मरत तुरत हरिलोक सिधार्यो ॥
सुत अङ्गदकूँ सोंपि परमपद पायो कपिपति ।
राज पाइ सुग्रीव काममहँ फँसी तासु मति ॥
चारि मास गिरि गुहा भहँ, बसे राम कपि काममहँ ।
फँस्यो, किन्तु हनुमानमन, सदा बसै श्रीराममहँ ॥

इति श्रीभागवतचरितके चतुर्थाहमें राघवेन्दुचरित अन्तर्गत
चतुर्थ सीताहरणचरित नामक उन्तीसवाँ अध्याय समाप्त ।

अथ त्रिंशत्तमोऽध्यायः

[३०]

हे रघुनायक राम ! गीधकूँ शुभ गति दाता ।
 हे भुवनेश्वर ! सकल जगतके तुम पितु माता ॥
 हे सबरी सरस्व ! भिक्षिनी प्रिय रघुनन्दन ।
 हे बदरी प्रिय ! सखा कपिनिके दुष्ट निकृन्दन ॥
 हे प्रनपालक विरहरत, हे सीताहित दुखित अति ।
 सीय मिलनकी शुभ कथा, कहूँ होहि तब चरन गति ॥

राम कामनाहीन करें क्रीड़ा करुणाकर ।
 नीरस जगकूँ सरस करन प्रकटें प्रभु दुखहर ॥
 मनुज सरिस शुभ चरित दिखावहिँ जन मनरंजन ।
 सुखी करन निज जननि करहिँ हरि करुणाक्रन्दन ॥
 करें कामना भक्त जब, तब तैसे बनि जात हैं ।
 हैकें सर्व समर्थ प्रभु, भक्तनि हाथ बिकात हैं ॥

हनुमत सिखतैं सीय खोजिवे दूत पठाये ।
 राम रजायसु पाइ लखन कपिपति घमकाये ॥
 त्यागि काम सुग्रीव काम रघुपतिके आये ।
 इत उत मेजे और पवनसुत लंक पठाये ॥
 अंगदादि कपि सँग चले, दई मुद्रिका सीयपति ।
 सिन्धु लाँघि लंका गये, हनुमत हिय उत्साह अति ॥

इत उत दूँदत फिरे मिली नहिँ जनकदुलारी ।
 करूँ कहा मरि जाऊँ पवनसुत बात विचारी ॥
 पुनि कछु घरिकें धीर गये जत्र पुरके बाहर ।
 उपवन लख्यो अशोक लखीं जननी तहँ तरुतर ॥
 वृक्ष शिशिपा छाँहमें, राम राम प्रति पल रटत ।
 निरखी कपि साकार छवि, आलोकित उपवन करत ॥

निकट पहुँचि हनुमान रामको चरित सुनायो ।
 सुनत राम गुन गान हृदय माँको भरि आयो ॥
 पूछें— को तुम तात ! उड़ैलो भवननिमहँ रस ।
 प्याओ मधुमय अमृत परम दुरलभ रघुपति यश ॥
 अञ्जलि बाँधैं पवनसुत, आये सम्मुख सीयके ।
 भक्त समुक्ति पूछन लगौ, समाचार सब पीयके ॥

विनय सहित इतिहास पवनसुत सकल सुनायो ।
 सुनत रामको विरह सीय नयननि जल छायाँ ॥
 रोवैं अरु पछिताहँ शोकमहँ गिरि गिरि जायें ।
 नेह नाथको सुमिरि लखनकी भक्ति सरायें ॥
 प्रभुपद कपिको नेह लखि, आशिष सीताने दहँ ।
 अरपन कीन्हीं मुद्रिका, निरखि मुदित अतिशय भहँ ॥

मातु कहैं—कछु कंद मूल फल बेटा ! खाओ ।
 छिपिकें पत्तनिमाहिँ राति इक यहाँ बिताओ ।
 कपि हिय हर्ष अपार खाइ फल वृक्षनि तोरें ।
 दूरि उखारें फेंकि कछुनिपै चढ़ि भूलभोरें ॥
 आये लड़िबे निशाचर, मारि पठाये यमसदन ।
 नागपाशमहँ धँधि गये, कुपित कहै लखि दशानन ॥

मारौ कपिकूँ तुरत बिभीषन नीति बताई ।
 कपड़ा तेल लपेटि पूँछमहँ आगि लगाई ॥
 कपिहित शीतल अनल भये सब पुरकूँ जारैं ।
 पकरन आवैं निकट पूँछ कसि मुँहपै मारैं ॥
 मैया बप्पा करि भगें, खिलखिलाय हनुमत हँसैं ।
 बिना जरे निरखैं भवन, कूदि तुरत तामें धुसैं ॥

अनल लपट अति उठत जरत सब चटचट चटकत ।
 निकरि निकरि सब भगत फिरत बिलखत सिर पटकत ॥
 यातुधानिनी जगहिँ देहिँ रावनकूँ गारी ।
 जिह हरि लायो सीय रूपमहँ मृग्यु हमारी ॥
 इरि फिरि जार्यो नगर सब, पवनतनय प्रमुदित भये ।
 पुनि सागरमें न्हायकैं, जगजननीके ढिँग गये ॥

हाथ जोरि कपि कहैं—चिन्हारी दैं कछु माता ।
 आवैं सजिकैं सेन अनुज सँग भवभयत्राता ॥
 अनुमति सियकी पाइ चले पुनि गर्जत तर्जत ।
 करत सबनि भयभीत यातुधाननि मद मर्दत ॥
 यों लंकाकूँ जारिकैं, कूदि पार सागर गये ।
 निरखे विजयी पवनसुत, अंगदादि प्रमुदित भये ॥


है प्रसन्न सब चले रामढिँग मिलि कपि आये ।
 सुखद सीय सम्बाद आइ सियपतिहि सुनाये ॥
 चूड़ामणि हनु दई पाइ प्रभु हिये लगाई ।
 उर अस बाढ्यो प्रेम मनहु वैदेही पाई ॥
 कपिपति सेना बानरी, साजि समर हित चलि दये ।
 लौंघि नदी गिरि नीरनिधि, तीर पहुँचि बिस्मित भये ॥

इत जारी कपि लंक शङ्क रावन हिय पैठी ।
 देहुँ जानकी नहीं बात खल्लके मन बैठी ॥
 सब हुत सचिव बुलाइ समर हित सम्मति पाई ।
 किन्तु न सहमत भये विभीषन छोटे भाई ॥
 नीति विभीषनकी सुनी, भयो कुपित अति दशानन ।
 नाश समय लखि भक्त वर, तुरत गये तत्र हरि शरन ॥

दोहा—सचिवनि सँग रावन अनुज, पहुँचे प्रभुदिँ ग जाय ।
 बिलखि विनय लागे करन, सीतापतिहिँ सुनाय ॥
 छप्पय—आयो तुमरी शरन दीनवत्सल सुनि स्वामी ।
 सुनत शरन हरि लये कृपानिधि अन्तरयामी ॥
 सचिवनि करी कुतर्क राम एकहु नहिँ मानी ।
 तनिक न शङ्का करी भक्तहियकी सब जानी ॥
 बन्धु तिरस्कृत विभीषन, लखे राम दुःखित भये ।
 तुरत मैगाधो सिन्धुबल, भट लंकापति करि दये ॥

पाइ विभीषन राज चरन प्रभुके गहि लीन्हें ।
 कहें—कृपानिधि ! प्रनतपाल प्रन पूरे कीन्हें ॥
 तामस तनु रिपुअनुज बन्धुने मारि भगायो ।
 साधनहीन अनाथ नाथ ! फिरिहू अपनायो ॥
 राज पाट ऐश्वर्य सुख, नहिँ चाहूँ अपवर्ग गति ।
 जत्र जत्र जनमूँ तत्र चहूँ, प्रभु पद पद्मनि सुदृढ़ रति ॥
 सुनी विभीषन विनय कृपामय बोले बानी ।
 मोकुँ पावैं भक्त नहीं पावैं अभिमानी ॥
 अब जलनिधितें पार होनकी युक्ति बताओ ।
 कहें विभीषन—सिन्धु शरनमें प्रभुवर जाओ ॥
 लछिमन यह मत नहिँ रुच्यो, किन्तु राम अनशन कर्यो ।
 कुश बिछाय मौनी बने, लखि जघ तीर घरनो घर्यो ॥

पार जान हित सिन्धु विनय रघुपति अति कीर्णी ।
 किन्तु जलधि जड़ गैल नहीं रघुवरकूँ दीर्णी ॥
 कर्यो कोप करुणेश घनुषपै शर सन्धान्यो ।
 लख्यो वेष विकराल नाश निज जलनिधि जान्यो ॥
 तुरत रूप रखि भेंट लै, आयो राघवकी शरन ।
 हाथ जोरि गद्गद गिरा, लग्यो विनय इस्तुति करन ॥



हे अनाथके नाथ ! दीन दुखियन दुखत्राता ।
 हे कृपालु करुणेश ! शान्ति सत सुखके दाता ॥
 हे अनादि अखिलेश ! अनामय अज अवधारी ।
 हे अच्युत अवधेश ! अमरपति लीलाधारी ॥
 जीव विवश गुण प्रकृतितै, करै कर्म है कै अवश ।
 मोइ अगाध अपार तुम, रच्यो तजौ मर्याद कस ॥

हौ हरि सर्वसमर्थ विश्व छिनमौंहि बनाओ ।
 मोपै बाँधौ सेतु पार प्रभुवर पुनि जाओ ॥
 बालमीक मुनि चरित सेतु करि जगकूँ तारें ।
 सिन्धु सेतु कपि करें सैन्य सब पार उतारें ॥
 रामचरित मुनि सेतु करि, स्वयं अवशि तरि जायेंगे ।
 बने रहैं पुनि जगतमहँ, सब सेवैं सुख पायेंगे ॥

बोले करुनासिन्धु—सेतु शत योजन भारी ।
 बेगि बँधे सो युक्ति बताओ अति हितकारी ॥
 कहै सिन्धु—नरनाथ्य नाथ यदि आपु दिखावैं ।
 तो नल डारें शिला नीरमें सो उतरावैं ॥
 लावैं कपि पाषाण मिलि, जोरें शिल्पी नील नल ।
 प्रभु यश व्यापै जगतमें, होहिँ न जलचर हू बिकल ॥

नल सुरशिल्पी-तनय सेतु सुखकर बाँधै बर ।
 सुघर सेतु बनि जाइ ताहितैं जावैं बानर ॥
 मम मर्यादा रहै रहै यश तुमरो जगमहँ ।
 नरलीला हरि करहु नहीं नाप्यो जग पगमहँ ॥
 राम बुलाये नील नल, अन्तरहित सागर भयो ।
 बाँधौ बानर सिन्धुपै, सेतु बिहँसि राघव कश्यो ॥

राम रजायसु पाइ सेतु सब बाँधन लागे ।
 लैन वृक्ष अरु उपल बीरवर बानर भागे ॥
 उपल उठाइ उठाइ सलिलमहँ फेकैं सबई ।
 देहिँ सबहिँ उत्साह बँध्यो पुल बीरो ! अबई ॥
 घम्म घम्म पत्थर गिरैं, धूमं घड़ाको मचि गयो ।
 आर पारतैं सूधिमहँ, सूत सामने खिचि गयो ॥

बानर चंचल दौरि दौरिकें इत उत जावैं ।
 नाना कौतुक करें परस्पर हँसैं हँसावैं ॥
 वृक्षनि सहित उखारि शिला परबतकी लावैं ।
 नभतैं दूदैं फेरि धम्म जलमें गिरि जावैं ॥
 हनूमान डपटैं सबनि, चंचलता अति मति करौ ।
 हिलि मिलि लाओ शिला सब, हौलेंतैं जलपै धरौ ॥
 सोरठां—आइ गये नल नील, राम लखन पद बन्दिकें ।
 दोऊ परम सुशील, श्रीगणेश अव करि दयो ॥
 छप्पय—माप दण्डतैं नापि बनायो चौदह योजन ।
 द्वितीय दिवस जब बीस बन्यो तब कीयो भोजन ॥
 तृतीय दिवस इक्कीस बन्यो बाइस चौथे दिन ।
 पहुँचे पंचम दिवस पार रचि तेइस योजन ॥
 सिन्धु सेतु पूरो भयो, रामेश्वर थापित करे ।
 आशुतोषके दरश करि, नयन नीर सब के भरे ॥
 पार पहुँचि सुग्रीव निशाचरपति समुझायो ।
 मूढ़ न मानी बात राम अंगदहु पठायो ॥
 रणके बाजे बजे घुसे लंकामहँ बानर ।
 तोड़ैं फोड़ैं उछरि कूदि सब घूमैं घर घर ॥
 बन उपवन सब नगरमहँ, बानर ही बानर भरे ।
 क्षत बिक्षत नगरी भई, घर दूटे निशिचर मरे ॥
 नख दाँतनिहँ काटि करी क्षत लंका नगरी ।
 मनु मसली नर करिनि नायिका सरिता सगरी ॥
 इत उत बानर फिरहिँ करहिँ मिलि धक्कम धक्के ।
 निरखि कपिनि उत्साह, छुटे रावनके लुक्के ॥
 उत निशिचर इत भालु कपि, दोऊ सेना सजि गई ।
 दोऊ विजयी बनन हित, करि रव भोषण भिड़ि गई ॥

पठये कुम्भ निकुम्भ इन्द्रजित निशिचरपति जव ।
 समर करन सब चले विभीषन भेद कब्यो सब ॥
 मेघनाद रन छोड़ि भग्यो माया फैलाई ।
 नर लीला प्रभु करी गिरे रन दोऊ भाई ॥
 निशिचरदलमहँ हर्ष अति, कपिदलमहँ चिन्ता भई ।
 राम जगे कपि लखन हित, लाये संजीवनि दई ॥

आये विनतातनय नाग सब तनुतैं भागे ।
 सँधि सँजीवन लखन उठे जनु सोवत जागे ॥
 राम लखन लखि स्वस्थ भये कहि प्रमुदित भारी ।
 सोचैं माया व्यर्थ रामपै भई हमारी ॥
 मायापतिपै निशाचर, करिकैं माया नहि डरत ।
 जनु नानीके व्याहकी, बात सुतासुत मिलि करत ॥

चले राम रनमौहि संग सुग्रीव सहायक ।
 जागबवान, नल, नील, पनस, अंगद सब नायक ॥
 धनुष, प्राश, शर, शक्ति युक्त रावनकी सैना ।
 पकरि पकरि कपि मालु चबावैं मनहुँ चढ़ैना ॥
 सर्र सर्र शर समरमहँ, चलैं चपत हूँ चटाचट ।
 जहँ देखो तहँ है रही, पटका पटकी खटापट ॥

अंगद मार्यो बज्रदंष्ट्र धूम्राक्ष पवनसुत ।
 आयो लड़न प्रहस्त भये नहि वानर विचलित ॥
 मरे मुख्य सब वीर दशानन अति खिसियायो ।
 स्वयं साजि सब सेन रामतैं लड़िबे आयो ॥
 हनूमान अरु बालिसुत, नील लखन मूर्छित करे ।
 पवनतनयको पीठ चढ़ि, रावनतैं राघव लरे ॥

रामवानतैं बिकल दशानन लंका आयौ ।
 कुम्भकर्ण लघु बन्धु नीदतैं तुरत जगायौ ॥
 जगिकें बोल्यो वीर—रामतैं रनमहँ लरिहौं ।
 लहूँ विजय करि कीर्ति नहौं हरि सम्मुख मरिहौं ॥
 यों कहि अंजन-गिरि सरिस, चल्यो देखि बानर भगे ।
 भगदड़ कपिदलमहँ निरखि, अंगद समुभावन लगे ॥

अंगदकी सुनि सीख रुके कषि लड़िबे लागे ।
 कुम्भकर्ण सुग्रीव लखन सेनाके आगे ॥
 भयो भयानक समर लखन रन अद्भुत कीन्हों ।
 पुनि राघवतैं भिड़्यो असुरकुँ अवसर दीन्हों ॥
 रामवानतैं कर कटे, पग मस्तक हू कटि गये ।
 कुम्भकर्ण खल मरि गयो, सुनि हर्षित सुर मुनि भये ॥

कुम्भकर्ण सुनि निधन दशानन दुख अति पायो ।
 तबहिँ तनय अति शूर युद्धकुँ तुरत पठायो ॥
 देवान्तक अतिकाय गये पुनि आये नहिँ फिरि ।
 इन्द्रजीत पुनि छले राम सौमित्र गये गिरि ॥
 है चेतन लछिमन चले, सुनत सचनि अति सुख भयो ।
 यतिबर लछिमन हाथतैं, इन्द्रजीत मार्यो गयो ॥

इन्द्रजीत रन मरन दशानन सुनि घबरायौ ।
 बैदेही बध हेतु खड्ग लै निशिचर घायौ ॥
 अनुचित कहिकें सचिव निवारयो सम्मति मानी ।
 मारूँ या मरि जाऊँ लंकपति मनमहँ ठानी ॥
 समर हेतु रथ चढ़ि चल्यो, राम बिरथ लखि अमरपति ।
 पठयो रथ मातलि सहित, चढ़े राम कपि मुदित अति ॥

समर निशाचरनाथ लख्यो प्रभु कोप दिखायो ।
 नयन अरुन करि कहैं—नीच सम्मुख अन्न आयो ॥
 चोर भीरु निरलज्ज निशाचर पामर कामी ।
 पीठ पिछारी प्रिया हरी तू है खल नामी ॥
 अति मुकुमारी जानकी, दयिता दुःख दुसह दयो ।
 पृथक् करहुँ धड़तैं शिरनि, उदय पाप खल तव भयो ॥

सुनत राम के बचन क्रोध करि रावन धायौ ।
 धनुषत्रानकुँ तान समरमहँ सम्मुख आयौ ॥
 उभय ओरतैं बान चलैं सुरमुनि मुख पावहिँ ।
 भयो समर अति कठिन उभयशर दिव्य चलावहिँ ॥
 ज्यों सागर, नभ, चन्द, रवि, की उपमा अनुपम कहीँ ।
 त्यों रावन अरु राम की, रन समता जगमहँ नहीँ ॥

लीला रघुपति करहिँ लरहिँ जीतैं अरु हारैं ।
 श्रमित होहिँ जय करहिँ सहहिँ शर पुनि पुनि मारैं ॥
 कबहूँ आगे बढ़हिँ फिरहिँ घूमैं मुरि जावहिँ ।
 कबहूँ उछरैं दुवकि कुदकि भट सम्मुख आवहिँ ॥
 भक्तनि हित अवतार धरि, नरलीला रघुवर करहिँ ।
 बँवहि सेतु प्रभुचरितको, जाते सब भवनिधि तरहिँ ॥

खँचि कान तक बान राम रावनके मार्यो ।
 काट्यो धड़तैं शीश घम्म घरतीपै डार्यो ॥
 उदित भयो पुनि शीश तुरत पुनि काट्यो रघुपति ।
 ज्यों ज्यों काटहिँ उगहिँ नये लखि प्रभु बिस्मित अति ॥
 मोहित सम चेष्टा करहिँ, मातलि बोल्यो बचन तब ।
 ज्यों नर लीला करहु हरि, ब्रह्म अस्त्रकुँ लेहु अन्न ॥
 २८ फ०

मातलि सम्मति मानि ब्रह्मसर धनु पै धार्यो ।
 करि अभिमंत्रित तुरत निशाचरपति तत्र मार्यो ॥
 मरत निशाचर देव, बिप्र, ऋषि, मुनि सुख पायो ।
 सुनि रावन बध बन्धु विभीषन ढिँग तत्र आयो ॥
 लंकापतिको निघन सुनि, आई तहाँ निशाचरी ।
 शिर पटकहँ छाती धुनहिँ, मृतक पतिहिँ लखि गिरि परी ॥

बार बार पति देह अङ्गमहँ घरि घरि रोवैं ।
 मृतक वदन लखि दुखित होहिँ धीरजकुँ खोवैं ॥
 दृढ़ आलिङ्गन करहिँ शीश घरनीमें मारैं ।
 पटतै पोछैं रक्त धूरि पतिशवकी आरैं ।
 निशाचरी रोवैं सतत, क्रन्दन ध्वनि नभमहँ भरी ।
 तबई रानिनितैं धिरी, आई तहँ मन्दोदरी ॥

प्राणनाथकुँ निरलि मृतक मन्दोदरि रोई ।
 ह्वैकें व्याकुल गिरी बिरहमहँ तनु सुधि खोई ॥
 प्राणनाथ हृदयेश प्राणपति कहि डकरावै ।
 क्रन्दन कुररी सरिस करै दुखतैं बिललावै ॥
 राम बवंडर बायुतैं, पति पादप जड़तैं कट्यो ।
 विधवा लंका है गई, मम सिंदूर सिरको मिट्यो ॥

परे घरनिपै प्रभो ! न दासिनितैं बोलैं अब ।
 लाये जिनकुँ जीति प्रिया रोवैं ठाढ़ी सब ॥
 रावनके सब कर्म विभीषणने सोचे अब ।
 घृणा हृदयमहँ भई मृतक नहिँ कर्म करे जब ॥
 रघुनन्दन अति प्रेम तैं, प्रेत करम आयसु दई ।
 समुझाई मन्दोदरी, पृथक देह पतितैं भई ॥

राम रजायसु पाइ विभीषन अनुमति दीन्हौ ।
 सामग्री सब पितृ करम एकत्रित कीन्हौ ॥
 चन्दन चिता बनाइ ताहिपै धर्यो बन्धु तन ।
 निरखत मृतक शरीर सवनिको दुखित भयो मन ॥
 धू-धू करिकें चिता जव, जरी निशाचर नायकी ।
 एक संग फूटी तबहिँ, चूड़ी रानिनि हाथकी ॥

डकरावें सब नारि दृश्य अति ई दुखदायक ।
 दाह करम करि दई तिलाञ्जलि निशिचरनायक ॥
 धूम धामके सहित विभीषन क्रिया कराई ।
 भस्म देहकी भई परमगति रावन पाई ॥
 सब सौतिनिक्कूँ संग लै, मन्दोदरि महलनि गई ।
 सब बानर प्रमुदित भये, विजय रामदलकी भई ॥

आइ विभीषन रामचरनमहँ शीश नवायो ।
 पूछे राघव—सीय कहाँ तब पतो बताओ ॥
 जानि नगरतैं दूरि गये रघुनायक नेही ।
 विरह व्यथातैं लखी तहाँ बैठी वैदेही ॥
 मलिन वसन कच जटा बनि, त्रिपुरे इत उत म्लान मुख ।
 पति दरशनतैं भयो अति, सीय हृदयमहँ परम मुख ॥

पवनतनय सुग्रीव विभीषन लङ्घिमन आये ।
 वैदेही पद पदुम आइ सब शीश नवावे ॥
 लज्जित देवी भई अधिक आभार जनायो ।
 राम रजायसु पाइ विभीषन यान मँगायो ॥
 रथ चढ़ि वैदेही सहित, उपवनमहँ राघव गये ।
 जगजनी जगजनककूँ, लखि बानर प्रमुदित भवे ॥

दोहा—कुमुदिनि सम सिकुरीं सिया, खिलीं पाइ रघुचन्द्र ।
 भई मुदित मनमहँ मनहु, मिली चकोरी चन्द्र ॥
 चकवा चकवी राम सिय, रावन रात्रि समान ।
 इत उत सागर पार बसि, मिले निशाश्रवसान ॥

इति श्रीभागवतचरितके चतुर्थाहमें राघवेन्दुचरित अन्तर्गत
 पंचम सीतासंयोगचरित नामक तीसर्वो अध्याय समाप्त ।



अथ एकत्रिंशत्तमोऽध्यायः

[३१]

सीता के सरवस्व ! सकल जगपालक ! प्रभुवर !
रावणारि ! रघुतिलक ! राम ! रघुनायक ! रघुवर !!
कैसे कैसे करुन चरित रघुनाथ दिखाये ।
प्रिया हेतु करि सेतु कपिनि सँग लंका आये ॥
खल दल दलि रावन हन्यो, हरी सियाकी सत्र व्यथा ।
कहूँ युगल पदचन्दिके, राजतिलककी शुभ कथा ॥

मारि दशानन प्रिया शोक कृन्ताप मिटावो ।
दरश युगल छत्रिकरें कपिनि अतिशय सुख पायो ॥
करि सोलह शृंगार पिया निज पति सँग भ्राजें ।
बरसावैं सुर सुमन दुंदुभी नभतैं बाजें ॥
जबहिं विभीषन शरनमहँ, गये तिलक तबही करूँ ।
अब लज्जिमन बुलवाइकैं, सिंहासन विधिवत दयो ॥

लंकामहँ अभिषेक. विभीषणको करवायो ।
 जानि अवधिको अंत यान पुष्पक मँगवायो ॥
 पवनतनय सुग्रीव लखन अंगद बैठाये ।
 बैठे सीया सहित स्वयं रघुपति हरषाये ॥
 प्रानप्रियाकूँ सबहिँ थल, लीलाके दिखरावते ।
 यानमाँहिँ नभमहँ चले, प्रेम सहित बतरावते ॥

जनक सुतातैं कहैं—प्रिये ! देखो लीला थल ।
 यह त्रिकूट गिरि समर भूमि यह सागरको जल ॥
 है यह सुन्दर सेतु नील नल कपिनि बनायो ।
 यह रामेश्वर धाम विभीषण यहि थल आयो ॥
 किष्किन्धा पम्पापुरी, पंचवटी गोदावरी ।
 चित्रकूट सीते ! लखो, यह तिरबैनी सुखकरी ॥

जहाँ गंग अरु जमुन मिलें मन मोद बढ़ावैं ।
 जहाँ सिद्ध सुरवृन्द नित्य दरशनकूँ आवैं ॥
 जहाँ सरसुतो धार गुप्तहू अति सुखदैनी ।
 गंगा यमुना संग होहि मिलिकैं तिरबैनी ॥
 जहँ अक्षयवट वर विटप, सोमेश्वर भगवान हैं ।
 तहँ उतरूयो प्रभु भाव लखि, पुष्पक पुण्य विमान हैं ॥

पग पग प्रभुजी चले संगमहँ जनकदुलारी ।
 अति सुशील लघु बन्धु लखन पाछैं धनुधारी ॥
 भरद्वाज जब सुन्यो राम आगमन सुहावन ।
 दौरि द्वारपै आइ निहारे प्रभु जगपावन ॥
 पग पकरन मुनिके बड़े, ज्योंही शोभा धाम विभु ।
 त्योंही भरि मुनि अंकमें, कसि चिपटाये राम प्रभु ॥

सीता अनुज समेत निहारत मुनि हरषावत ।
 बार बार छत्रि निरखि सिंहावत भाग्य सराहत ॥
 दर्शनतैं मम भये सफल जप तप व्रत आजू ।
 घन्य घन्य हौं भयो घन्य यह तीरथराजू ॥
 सोई आश्रम पुण्यप्रद, परैं जहाँ भगवान पग ।
 पदरजतैं पावन बनें, पशु, पामर, पाषान, खग ॥

भरद्वाज मुनि लखे राम सौमित्र सीय सँग ।
 निरखि सबनिकूँ कुशल भये मुनिके पुलकित अँग ॥
 करि बहु विधि आतिथ्य सबनिकी कुशल-वताई ।
 भरत तपस्या सुनी दया हरि उरमहँ आई ॥
 पवनतनय पठये तुरत, भरत जहाँ त्रिही बसहिँ ।
 स्वाँस स्वाँस रघुपति जरहिँ, तप करिकें तनकूँ कसहिँ ॥

निरखि भरतकी दशा वायुसुत अति हरषाये ।
 बोले—हे नरदेव ! अवधपति अब ई आये ॥
 सुनत सुखद शुभ बचन सुधा रसमहँ साने जनु ।
 ब्यारो अँग अँग हरष भयो पुलकित सबरो तनु ॥
 मुनि रघुपतिको आगमन, भरत मुदित मनमहँ भये ।
 समाधान सब भाँति करि, पवनतनय प्रभु दिँग गये ॥

सब मुनि मुनितैं कहैं राम—भगवन् ! अब जाऊँ ।
 मातु भरत सब प्रजा दुखी तिनि दुःख भियाऊँ ॥
 मुनिभरि नयननिनीर कहैं—प्रभु हिय बसि जाओ ।
 छौंड़ि हृदय मम नाथ अनत कितहूँ मति जाओ ॥
 एवमस्तु कहि कृपानिधि, पुष्पकपै पुनि चढ़ि गये ।
 सीता सखनि समेत उड़ि, अवधपुरीकूँ चलि दये ॥

इत सजिकें सब साज भरत स्वागत हित धाये ।
 बाल बृद्ध नर नारि चले उठि सुनि प्रभु आये ॥
 चले पदत द्विज वेद गीत ललना शुभ गावत ।
 बाहन चढ़ि चढ़ि चले हरषि हय वीर नचावत ॥



रामपादुका शीश धरि, राम चरनमहँ रोवते ।
 परे लकुटसम भरतजी, अँहुअनि भूमि भिगोवते ।

लखे भरत कृशगात राम रघुनायक रोये ।
 आलिङ्गन करि नयन नीरतैं चीर भिगोये ॥
 भरत रामको मिलन निरखि उपमा सकुचावै ।
 करुणा हू है द्रवित नयनतैं नीर बहावै ॥
 जनकसुता चरननि परे, रोवत अति बिलखात हैं ।
 मातु भरतकी दशा लखि, हृदय द्रवित है जात हैं ॥

लछिमन पकरे चरन भरत अति ही सकुचाये ।
 लीये हृदय लगाय अश्रु इस्नान कराये ॥
 बार बार पुचकारि कहैं—लछिमन बड़भागी ।
 कीयो जीवन सफल राम हित बने त्रिरागी ॥
 सीता लछिमन सहित प्रभु, मिलि सबतैं पुष्पक चढ़े ।
 हैकें सत्कृत सबनितैं, बिनय सुनत आगे बढ़े ॥

नरनारिनितैं घिरे राम पुष्पकमहँ आजैं ।
 मनहुँ ग्रहनिके बीच पूर्ण शशि नभमहँ राजैं ॥
 भरत पादुका लिये त्रिभीषन चँवर डुलावैं ।
 श्वेत छत्र हनुमान व्यजन सुग्रीव हिँ लावैं ॥
 धनु रिपुसूदन तीर्थजल, सीय लिये अंमद खड्ग ।
 ढाल भालुपति लै खड़े, जनु शोभित शचिपति स्वरग ॥

बोलैं नर अरु नारि मुदित मन जय जय मिलि सब ।
 सबकुँ दरशन देत चले पुष्पकतैं राघव ॥
 अटा अटारी चढ़ी सुमन सब तिय बरसावैं
 रामदरश हित बाल बृद्ध इततैं उत धावैं ॥
 तजि पुष्पक शिबिका चढ़े, जनसमूह अति राम लखि ।
 नयननीर सबके भरे, मुनिव्रतयुत रामहिँ निरखि ॥

करि सबको सम्मान मातु महलनि प्रभु आये ।
 सबतैं पहिले भरतमातु चरननि सिर नाये ॥
 भैंप छुड़ाइ हँसाइ सुमित्राके पग पकरे ।
 कौशल्या रघुनाथ मिलन लखि रोये सबरे ॥
 चूमैं चाटैं प्रेमतैं, धेनु बत्स अति लघुहिँ लखि ।
 कौशल्या प्रमुदित भई, त्यों रघुनन्दनकूँ निगलि ॥

ढगमँगात सब गात हृदय उमड़त तनु पुलकित ।
 कंठ भयो अवरुद्ध नयन जल अविरल बरसत ॥
 कहन चहति कछु बात न निकसति बानी मुखतैं ।
 भये शिथिल सब अंग राम दरशनके सुखतैं ।
 सीता लछिमन रामकूँ, निरखि निरखि मन नहिँ भरत ।
 तनु कृश हरष अपार अति, बार बार वेटा कहत ॥

राम मातु कृश गात निरखि बालक सम रोये ।
 सिकुड़े अति सुकुमार चरन अँसुअनितैं धोये ॥
 सीय लखन प्रति प्यार कर्यो माँ आशिष दीन्हों ।
 तबहिँ सुअवसर पाइ भरत यह विनती कीन्हों ॥
 राम सम्हारे राजकूँ, हम सब मिलि सेवा करहिँ ।
 पावैं प्राणी परम पद, बिनु प्रयास सब भव तरहिँ ॥

भरतवचन सुनि सचिव सहित सब जन हरषाये ।
 निरखि राम रुख तुरत पुरोहित विप्र बुलाये ॥
 विधिवत क्षौर कराइ बस्त्र आभूषन पहिने ।
 सासुनि सीय न्दवाय दिव्य पहिनाये गहने ॥
 सप्तद्वीप अंकित करे, बाधंवरपै विप्र गन ।
 शुभ सिंहासन सजि गयो, आइ विराजे सुखसदन ॥

चहुँ दिशि जय-जयकार जुर्यो सब बरन समाजा ।
 सब हिय हरष अपार भये रघुनायक राजा ॥
 अवनि गगनमहँ मधुर मधुर बर बाजे बाजें ।
 सुर, नर, मुनि, गन्धर्व सकल शोभायुत भ्राजें ॥



सब नर नारिनिके नयन, भये वृत्त लखि राम नृप ।
 चिर आशा पूरन भई, भये अवध अन्युत अविप ॥

सीय सहित रघुनाथ राजसिंहासन राजें ।
 शोभा अमित अपार काम रति सँग लखि लाजें ॥
 करि नखशिख शृंगार विराजें सिय निज पिय सँग ।
 भाँकी करि नरनारि, समावें नहिँ फूले अँग ॥
 गुरु बशिष्ठ मंत्री सचिव, प्रजा सहित प्रमुदित भये ।
 धन, आभूषन, अश्व, गज, रथ, पट, पुर विप्रनि दये ॥

जबतें राजा राम भये सब मुख जगमाहीं ।
 आधि, व्याधि, भय, शोक, जरा, दुख, श्रम कछु नाहीं ॥
 जोते बोये बिना अवनि ओषधि देवे अघ ।
 बन, परबत, नद, नदी, द्वीप, सागर सुखकर सब ॥
 भये बिटप सुरद्रुम सरिस, चिन्तामनि सम भूमिकन ।
 भई अवनि पावन परम, परे जहाँ रघुवर चरन ॥

क्षमा, दया, विश्वास, शील, तप, संयम शम दम ।
 ब्रह्मचर्य, नय, विनय राममहँ राज ऋषिनि सम ॥
 भरत शत्रुहन लखन सदा सेवामहँ तत्पर ।
 रहै प्रजा सब सुखी करे नहिँ कोई मत्सर ॥
 हरहिँ चित्त रघुनाथको, नारी सुलभ विलासतैं ।
 सती शिरोमनि जानकी, विनय हास परिहासतैं ॥

रामराजमहँ परम मुदित जड़ चेतन प्राणी ।
 लखि तून तोरें मातु राम राजा सिय रानी ॥
 लौकिक गति दरसाइ रामने यज्ञ रचाये ।
 वेद-विज्ञ आचार्य, विप्र, ऋषि, मुनि बुलवाये ॥
 उत्तम सामग्री सहित, सहस्र यज्ञ रघुपति करे ।
 सरबसु दीन्हों दानमहँ, धन रत्निनि द्विज घर भरे ॥

हैकें अति सन्तुष्ट द्विजनि आशिष मिलि दीन्हों ।
 इष्ट देव सम राम सबनिकी पूजा कीन्हों ॥
 यों महत्व तप योग यज्ञको राम जतायो ।
 गृही धरम करि स्वयं लोककुँ पाठ पढ़ायो ॥
 श्रेष्ठ करें जिह कर्मकुँ, अनुवर्तन सब नर करें ।
 जावें जा पथ महत जन, तिहि पथ सब रज सिर धरें ॥
 भूमि दान सब करी कोष धन धान लुटाये ।
 चारिहुँ दिशि दै दई दान करि परम सिद्धाये ॥
 विप्र बासनाहीन परा विद्या जे जानें ।
 दानपात्रतें श्रेष्ठ राम यह मनमहँ मानें ॥
 त्याग प्रेम अरु दान लखि, गद्गद हैकें विप्र गन ।
 राजपाट लौटाइकें, प्रेम सहित बोले बचन ॥
 प्रभो ! कहा नहिँ दयो हमें तुम सर्वसु दाता ।
 करहु मोह तम नाश तिमिरहर भवभयनाता ॥
 हम नित तपमहँ निरत राजको काज न जानें ।
 तुमहिँ विश्वपति सकल जगतको पालक मानें ॥
 पुण्यश्लोक शिरोमणो, हे विश्वम्भर ! जगतपति ।
 देहिँ दया करि दान यह, तब चरननिमहँ होहि रति ॥
 समुक्ति द्विजनिको न्यास प्रजाकुँ पाखैं सुत सम ।
 राम शील, संकोच, न्याय, नय, शम, दम अनुपम ॥
 सोवत जागत सतत प्रजाकी चिंता राखैं ।
 निरखैं नहिँ रिसियाय कबहुँ कटुबचन न भाखैं ॥
 त्रेतामें सतयुग कर्यो, रामराज आदरश अति ।
 अवसर रह्यो न सबनि की, भई धरममहँ सहज मति ॥

इति श्रीभागवत चरितके चतुर्थाहमें राघवेन्दुचरित अन्तर्गत षष्ठम
 राज्याभिषेकचरित नामक इकत्तीसवाँ अध्याय समाप्त ।

अथ द्वात्रिंशत्तमोऽध्यायः

[३२]

हे राजा रघुनाथ ! प्रजारञ्जक ! परमेश्वर ।
 हे कोमल अति कठिन ! सत्यपालक सरवेश्वर ॥
 हे सीता सरस्व ! प्रेम आदर्श निन्नाहक ।
 हे दयिता दुख दुखी ! दयानिधि दीननि पालक ॥
 जनकमुता प्रति कठिनता, करी प्रजाहित दुखमयी ।
 भद्रायुत तत्र बन्दि पद, कहूँ कथा करुनामयी ॥

वैदेही पदधूरि घरूँ सिर आँजूँ नयननि ।
 दीयो जीवनदान जगतके पीडित जीवनि ॥
 पतिव्रतनिक्कूँ पुण्यपाठ पतिप्रेम पढ़ायौ ।
 सहि सहि भीषण विपति धरमको मरम जतायौ ॥
 अति कोमल माँ कमल सम, तत्र चरननि आश्रित रहूँ ।
 हृदयविदारक दुखकथा, वन बियोगकी अब कहूँ ॥

जननि जानकी ! जड़ जीवनि टिँग च्यौँ तुम आयीं ।
 च्यौँ अति करुनामयी दुखद लीला दरसारीं ॥
 तब करुना के पात्र अज्ञ जड़ जीव नहीं माँ ।
 करुनावश है जगत हेतु अति विपति सहीं माँ ॥
 हाय ! कहाँ अति मृदुल पद, कहूँ कंकड़युत पथ विकट ।
 हैकै अति प्रिय रामकी, रहि न सकीं तनते निकट ॥

बन्धु पुरोहित सचिव प्रभुहिं श्रद्धायुत सेवें ।
 राजधर्ममहँ निरत राम सबकुँ सुख देवें ॥
 दुख सुख सबको मुनहिं सतत संतोष सिखावें ।
 सदाचार करि स्वयं सबनितें नित करवावें ॥
 पिता करहिं जस सुतनिको, तस चिन्ता रघुपति करहिं ।
 बेष बदलिकें निशामहँ, गुप्त रूप पुरमहँ फिरहिं ॥

जिनमहँ योगी रमें ज्ञानतें ज्ञानी जानें ।
 अन्तरयामी राम भाव सबके पहिचानें ॥
 मोते को है दुखी उठी उत्कण्ठा उरमहँ ।
 नरलीलाके हेतु फिरैं छिपि छिपिके पुरमहँ ॥
 रजक एक दिन रातिमें, निज नारीके कच पकरि ।
 रही रातिमें कहाँ तू, पुनि पुनि पूछै क्रोध करि ॥

दाँत पीसि यों कहै लाज कुलटा नहिँ तोकुँ ।
 परघर कैसे रही राम तू समुझै मोकुँ ॥
 सीयरूमहँ फँसे रामने वही लुगाई ।
 रावन घर दस मास रही फिरितें अपनाई ॥
 बड़े करें सो सत्य सब, छाजै सबई रामकुँ ।
 करुँ दूसरो ब्याह मैं, जा तू अपने गामकुँ ॥

मुनि अपयस अति विकल भये रघुबर मनमौहीं ।
 सोचें—सेवा सरल सुखद यहि जगमहँ नाही ॥
 कठिन हृदय करि त्याग संती सीताको करिहौ ।
 मन ही मन निशि दिवस बिरह ज्वालामहँ जरिहौ ॥
 दृढ़ निश्चय करि बात प्रभु, भरत शत्रुहनतैं कहौ ।
 मुनत तुरत विष सरिस बच, मूर्छा दोउनिकुँ भई ॥

भरत शत्रुहन लखे मूरछित राम विचारें ।
 सुकुमारी सिय परम कवन बिधि जाहि निकारें ॥
 वन निरखनकी करी सीय इच्छा मोतें कलि ।
 पठजँ लखिमन संग प्रियाकुँ गंगा तट छलि ॥
 बुलवाये लखिमन तुरत, दई शपथ निज देहकी ।
 अति विनीत प्रिय बन्धुकी, लई परीच्छा नेहकी ॥

लखिमन हाँमी भरी कहें—सीता लै जाओ ।
 छोड़ि घोर बनमाहिँ आइ सम्वाद सुनाओ ॥
 अति व्याकुल है गये महलमहँ बोले माता ।
 ऋषि मुनि दरशन हेतु चलो बन भेज्यो आता ॥
 सब सासुनि पाइँनि लगौं, चली मुदित मन है तुरत ।
 मुनि-पतिनिनि पूजा निमित, पट आभूषन लै अमित ॥

बैठी रथमहँ आइ कहें—कहँ तुमरे आता ।
 राजकाजमहँ फँसे कहें लखिमन सुनु माता ॥
 मनसा बन्दन कर्यो भवन परदच्छिन कीन्हौं ।
 सहज भावतैं विहँसि लखन सँग बन चलि दीन्हौं ॥
 लखिमन अति चिन्ता करत, परम दुखित मगमहँ चलत ।
 इत उत चितवत व्यथित अति, बिलखत विलपत हिय फटत ॥

सेवकको अति कठिन घरम समुभ्यो घबराये ।
 प्रभु आयमु सिर धारि सीय सँग बनहिँ सिघाये ॥
 सीय सिहावत जाइ तापसिनि के बन्दौं पद ।
 करिकें मुरसरि पार लखन रोये है गदगद ॥
 मुनि निर्वासन सहमि सिय, पति प्रति श्रद्धा प्रकट करि ।
 शून्य सरिस संसार लखि, बोली नयननि नीर भरि ॥

आरज सुतने त्याग कर्यो देवर ! किहि कारन ।
 अति कठोरता करी कान्तने कैसे धारन ॥
 प्राननाथ बिनु देह रखूँ कैसे हौं लल्लिमन ।
 मेरे तो सरवस्व प्रानपति ही जीवनधन ॥
 हाय ! वत्स हौं लुटि गई, कितहूकी अब नहिँ रही ।
 अवधपुरीतें चले जब, तब तुमने क्यों नहिँ कही ॥
 थर थर काँपै लखन बहुत रोवै बिललावै ।
 है अंधार भयभीत निरन्तर अश्रु बहावै ॥
 बिलखि कहैं—हे मातु ! राम राजा को शासन ।
 है कठार अति गुप्त मिली आज्ञा निरवासन ॥
 पराधीन हूँ मातु हौं, बिक्यो रामके हाथमें ।
 भयो विवश बनि वज्र हिय, आयो परवश साथमें ॥
 रजक बात पै कर्यो मातु ! यह अनरथ आरज ।
 जगमें अतिडे कठिन प्रजारंजनको कारज ॥
 छौंड़ि अकेला तुमाहँ अवध अब कैसे जाऊँ ।
 दोष न मोकूँ देहिँ जननि ! चरननि सिर नाऊँ ॥
 हौं मरिबे में हूँ अवश, नृप आयसु भीषन जननि ।
 करि निरवासन लौटिकें, आइ देहु सम्वाद पुनि ॥
 जिनने परजा हेतु तजी माँ ! तुम मुकुमारी ।
 ऐसे भूप कठार करै का प्रीति हमारी ॥
 इक दिन माँकूँ तजै नहीं कछु दुष्कर उनकूँ ।
 बालमोक इत बसाहँ बिताओ विपति समयकूँ ॥
 लखन विवशता समुझि सिय, भई दुखित अति खिन्न मन ।
 सती धरम पुनि सोचकें, कहन लगीं—सुनु प्रिय लखन ॥
 २६ फ०

मंगलमय पथ होहि जाउ देवर ! रजधानी
 अब भिखारिनी बनी रही जो कल तक रानी ॥
 दिवरानिनिर्तै जाइ अबसि आशिष मम कहियों ।
 नृपकुँ अबसर पाइ यादि मेरी करबइयों ॥
 दोष देहुँ काकुँ लखन, हौँ अभागिनी जनमकी ।
 सासुनिकी कबहुँ नहीं, सेवा समुचित करि सकी ॥

पति यश जगमहँ अमर होहि तुम सब सुख पाओ ।
 देवर ! मेरो उदर निरखि नृपके दिँग जाओ ॥
 गरभवती हूँ दोष फेरि मोकुँ मत दइयों ।
 पति परमेश्वर चरन कमलमहँ बन्दन कहियों ॥
 लखन सुनत मूर्छित भये, गिरे भूमिपै है विकल ।
 लखि प्रसङ्ग अति ईं करुन, भये विकल खग मृग सकल ॥

बोले लज्जित लखन—मातु ! मत पाप लगाओ ।
 अति लज्जित हूँ प्रथम देवि नहिँ अधिक लजाओ ॥
 बनमहँ चौदह बरस रामके सँगमें तबहुँ ।
 केवल चरननि छौँडि अपर अँग लख्यो न कबहुँ ॥
 अब अरण्य एकान्तमें, उदर लखूँ कैसे कहो ।
 ब्रज परै संसारपै, तुम बनमहँ निरभय रहो ॥

निन्दा प्रिय संसार खलनिकी निन्दित करनी ।
 कुटिल हृदयके जीव तुम्हारे योग न जननी ॥
 बिलखि बिलखिकें मातु वत्स सम्मुख मत रोओ ।
 होवै पुत्र कुपुत्र कुमाता तुम मत होओ ॥
 परे दंडवत भूमिपै, करि प्रनाम आगे बढ़त ।
 पुनि झौटत चितवत चकित, गिरत परत रोवत चलत ॥

चरन धूरि सिर धारि लखन लौटे इत जवहीं ।
 हँके मूर्छित गिरीं जगतजननी पुनि तवहीं ॥
 करुना क्रन्दन मुन्यो मुनिनिशिशु दौरे आये ।
 लखि सीता सौंदर्य जाइ मुनि वचन सुनाये ॥
 भगवन् ! वनमें अति सुघर, बैठी रोवति सुन्दरी ।
 नहीं मानवी सो लगति, है देवी या किन्नरी ॥

शिशुनि संग बाल्मीक जनकतनया दिँग आये ।
 बेटी ! धारो घोर मृदुल मुनि वचन सुनाये ॥
 मुनि के चरननि परी बिलखि बोली सुकुमारी ।
 प्रभो ! पापिनी भई उभयकुल कीर्ति बिगारी ॥
 परित्याग पतिने करयो, कैसे अब जगमहँ रहूँ ।
 दोष रहित हौं सर्वदा, कैसे निज मुखतें कहूँ ॥

धरिकें सिय सिर हाथ कहैं मुनिवर विजानी ।
 बेटी ! तू अति शुद्ध योगतें मैंने जानी ॥
 जनक हमारे शिष्य पुत्रि मम पीछे आओ ।
 निज पितुको घर समुक्ति सकुच तबि समय बिताओ ॥
 गंगाजल सम शुद्ध तूम, रघुवरहू जानत मरम ।
 किन्तु प्रजारञ्जन परम, क्रूर कठिन निरदय करम ॥

यो आश्वासन पाइ चली मुनि सँग सुकुमारी ।
 पहुँची आश्रममौहिँ जनककी पुत्री प्यारी ॥
 मुनि पतिनी सँग रखी मुता सम राजदुलारी ।
 सेवा मुनिकी करै सबनिकी भई पियारी ॥
 समय पाइ द्वै सुत जने, मुनि सब अति हरषित भये ।
 करन जाति संस्कार मुनि, तुरत जानकीदिँग गये ॥

रिपुसदन तिहि समय लवन बध हित मधुवनमहँ ।
 जात रहे विश्राम करन उतरे आश्रममहँ ॥
 तहाँ सुन्यो सुतजनम सीयके दिँग तब आये ।
 गुप्त रहे यह बात शत्रुहन मुनि समुझाये ॥
 मुनि शौनक शंका करी, कौन लवन जिहि हनन हित ।
 पठये रघुपति शत्रुहन, बल प्रभाव जिनको अमित ॥

सुत कही सब कथा लवन मधु राक्षस को सुत ।
 पायो शिव सन शूल दिव्य अति ई प्रभाव युत ॥
 क्रूर समुझि मधु सुताहँ शूल दै सिन्धु सिधार्यो ।
 शिव त्रिशूलते लवन न कबहूँ रनमहँ हार्यो ॥
 ताहि अजेय विचारि मुनि, गये दुखित हरिको शरन ।
 लवन हनन हित तुरत हरि, पठये रघुवर शत्रुहन ॥

जाइ लवन के द्वार शत्रुहन बैठे जवहीं ।
 करिकें खल आखेट द्वारपै आयो तबहीं ॥
 दौर्यो लैन त्रिशूल शत्रुहन जान न दीन्हों ।
 गुत्थम गुत्था भई शत्रु मरमाहत कीन्हों ॥
 राम दत्त शर तानिकें, मार्यो तकि उर शत्रुहन ।
 मरयो शत्रु शिव शूल हू, गयो तुरत शिवकी शरन ॥

यों लवनासुर मारि करी मथुरा रजधानी ।
 रहैं शत्रुहन तहाँ रामकी आयसु मानी ॥
 बृद्ध पुरोहित मेजि युधाजित भरत बुलाये ।
 करन विजय गन्धर्व तक्ष पुष्कल सँग घाये ॥
 कोटि पुत्र सैलूषके, अति दुर्मद रनमहँ निपुन ।
 आये लड़िबे भरत हू, भिड़े धारि हिय हरिचरन ॥


सात दिवस तक युद्ध उभय दल कीयो डटिकें ।
 लड़े वीर गन्धर्व गये नहिं कोई हटिकें ॥
 भरत और सैलूष भिड़े लखि सब ध्वराये ।
 विजय भरतकी मई शत्रु सुरसदन सिघाये ॥
 तच्छिला सुत तच्छूँ, पुष्कलकूँ पुष्कलवती ।
 चले सुतनि दै द्वै पुरी, रखि सेना तहँ बलवती ॥

भरत अवधमहँ आई राम चरननि सिर नाथो ।
 बोले प्रभु नहिँ लखन कहूँको भूप बनायो ॥
 लछिमनके सुत चन्द्रकेतु अङ्गद नृप होवें ।
 तब हम है निश्चिन्त नींद फिरि सुखकी सोवें ॥
 देश कारुपथ सुघर अति, भूमि उरबरा त्रिपुल बल ।
 कही भरत सुनि विजयहित, चले लखन सँग त्रिपुल बल ॥

पुरी कारुपथमाहिँ अङ्गदीया रचवाई ।
 अंगद राजा करे प्रजा सुनि अति हरषाई ॥
 चन्द्रकेतु हित चन्द्रकान्त शुभ पुर बनवायो ।
 लखन तनय नृप भये, हृदय हरिको भरि आयो ॥
 सब बन्धुनिके पुत्र नृप, भये सुनो अब सिय कथा ।
 अति करुणामय अति दुखद, सुनत होहिँ हियमहँ न्यथा ॥

सियवियोग में दुखित राम नित मख करवावें ।
 दान, पुन्य, तप, यज्ञ माहिँ सब समय बितावें ॥
 अश्वमेध मख बृहद् रज्यो बहु ऋषि बुलबाये ।
 छोड़्यो मखको अश्व शत्रुहन संग पठाये ॥
 चलयो अश्व स्वच्छन्द गति, घूमत देशनि बन विकट ।
 आयो चहुँदिशि घूमिकें, बालमीक आभम निकट ॥

द्वै सीताके तनय नाम लव कुश अति सुन्दर ।
 मुनि आश्रममहँ पले शूर तेजस्वी दुरधर ॥
 धनुर्वेद अरु वेद शास्त्र बाल्मीक पढ़ाये ।
 अस्त्र शस्त्रके भेद यथाविधि सबहिँ सिखाये ॥



उभय वीररसके सरिस, सुर वैद्यनि सम सुधर अति ।
 धरें रूप द्वै काम जनु, विहरहिँ बनमें यथामति ॥

इक दिन घूमत लख्यो अश्व वनमहँ अति भारी ।
 पकरै चड्डी लेहिँ बात मनमाहँ विचारी ॥
 अश्वमेधको अश्व पकरि लव कुशने लीयो ।
 नहिँ छोड्यो नहिँ डरे समर डटिकें तिनि कीयो ॥
 भयो घोर संग्राम अत्रि, सब सैनिक मूर्छित भये ।
 पवनतनय सुग्रीव कपि, पूँछ बाँधि हयकी दये ॥

अति प्रसन्न है गये मातु दिँग दोऊ मैया ।
 भरि उमंगमहँ कहैं— विजय कर आये मैया ॥
 अति ही सुंदर अश्व पकरि हम अबई लाये ।
 बँधे पूँछ द्वै कोश मनोहर परम सुहाये ॥
 अवधपुरी को राम नृप, भाई तिनिको शत्रुहन ।
 घोड़ा तिनिके यज्ञको, लै आये हम जीति रन ॥

सेना मूर्छित करी शत्रुहन हमने मार्यो ।
 पुष्कल राजकुमार लइयो सोऊ संहार्यो ॥
 सुनत रामको नाम भई ब्याकुल अति सीता ।
 मरन शत्रुहन जानि दुखित चिंतित भयभीता ॥
 बोलीं—तुम अति दीठ हो, चाचा तुमरे शत्रुहन ।
 अश्व तुम्हारे पिता को, कर्यो तुमनि अति लडकपन ॥

द्वै कपि लाये कौन तुरत चलि मोइ दिखाओ ।
 तुम अति चंचल भये नई नित रारि मचाओ ॥
 सुनि माताकी डाँट आइ कपि मातु दिखाये ।
 पहिचाने कपि डरौ तुगत दोऊ छुड़वाये ॥
 बिलखि बिलखि बोलीं वचन, पवनतनय ! सुग्रीव ! अब ।
 हौं तो बनवासिनि बनीं, है करमनिको खेल संब ॥

च्यौ मोकूँ कपिराज ! जीति लंकारें लाये ।
 च्यौ बिछुरे पतिदेव सबनि मिलि मोइ मिलाये ॥
 मरि जाती हौं तहाँ धीर बैधि जातौ उनकूँ ।
 नहिँ मिलते अपमान सहित ये दिन देखनकूँ ॥
 अपकीरति जगमहँ भई, निज पतिने हू तजि दई ।
 मरी नहीं पापिनि तऊ, दुख देखनकूँ रहि गई ॥

आजु सुमंगल घरी, मिले तुम दऊ वनमहँ ।
 कर्यो लड़कपन शिशुनि बुरी मत मानों मनमहँ ॥
 कपि बोले—ये मातु ! हमारे स्वामीसुत हैं ।
 स्वामीतैं तो सतत पराजित सेवक नित हैं ॥
 तुमरी कीरतितैं सतत, जननि ! व्याप्त त्रिभुवन रहै ।
 सतीशिरोमनि भगवती, को तुमकूँ अनभल कहै ॥

सिय कीयां संकल्प जगी तत्र सबरी सेना ।
 रिपुसूदन इत लखे उभय कपिपति तहँ हैं ना ॥
 सीय चरन सिर नाइ फेरि कपि दोऊ आये ।
 नहीं दुरदशा कही न सिय संवाद सुनाये ॥
 भूमण्डलकूँ विजय करि, पुनि पहुँच्यो हय अवधपुर ।
 हरषित सबई जन भये, सिय चिन्ता नित राम उर ॥

रामचन्द्र मख अश्वमेध मुनि मुनिगन आये ।
 बालमीक भगवान सहित आदर बुलवाये ॥
 लीये लवकुश संग आइ डेरा कीयो मुनि ।
 प्रभु प्रमुदित अति भये आगमन मुनिवरको मुनि ।
 संग सचिव नृप बन्धु सब, मुनि चरननिमहँ परि गये ।
 दयो अरघ मधुपरक प्रभु, कुशल प्रश्न इतउत भये ॥

रामायन मुनि रची कंठ कुश लवने कीन्हीं ।
 बालमीक स्वर सहित यथाविधि शिखा दीन्हीं ॥
 आयसु मुनिने दई करो गायन सब मखमहँ ।
 करौ सबनिक्कूँ मुग्ध न सकुचाओ तुम मनमहँ ॥
 लवकुश बीना लै चले, गायन रामायन करत ।
 अमृत की बरसा करत, नर नारिनि के मन हरत ॥

राम प्रशंसा सुनी कुमार द्वै मखमें आये ।
 सबकी इच्छा समुक्ति सभामें तुरत बुलाये ॥
 सुनिकेँ गायन मधुर राम अति भये सुखारी ।
 सब तनु पुलकित भयो देहकी सुरति बिसारी ॥
 समाचार सब जानिकेँ, जनकसुताकूँ लैन हित ।
 पठये लल्लिमन रथ सहित, पहुँचे तिनिं दिँग खिन्न चित ॥

कही राम की बात लखन सिय पग परि रोये ।
 नयन नीरतें मृदुल चरन माता के ढोये ॥
 है अधीर सिय कहें—न देवर ! मख लै जाओ ।
 ज्यों त्यों काटूँ दिवस खिलौना अब न बनाओ ॥
 सुतनि शुद्ध समुझें नृपति, तो राखें निज पासमें ।
 व्याह समय जो छवि लखी, तिहि सुमिरूँ प्रति स्वासमें ॥

दुखित भये मुनि लखन लौटि पुनि प्रमुदिँग आये ।
 सब मुनि दै सन्देश तुरत पुनि लखन पठाये ॥
 पति आयसुसिर धारि सहमि सिय अनुमति लीन्हीं ॥
 सबतैं मिलि जुलि रोय बैठि रथमें चलि दीन्हीं ॥
 उतरीं मखमहँ मुनि निकट, पद वन्दन ऋषि के करे ।
 लिपटे लवकुश मातुतें, लखि सिय सबके उर भरे ॥

आशा रघुवर दई सभामें सीता आवै ।
 है चरित्र मम शुद्ध सबनि विश्वास दिलावै ॥
 मुनि स्वीकारी बात चले सीताकुँ लैकै ।
 मुनिवे सीता शपथ चले सब उत्सुक हैकै ॥
 सहमी सुकुड़ी लाजतैं, मुनि पाछे श्रुति सरिस सिय ।
 जनु करना सँग शान्तरस, चलहि रामपद धारि हिय ॥

सीय तापसी वेष लख्यो रोये नर नारी ।
 चहुँदिशि हाहाकार मच्यो सब सुरति बिसारी ॥
 मुनिको आदर कर्यो न सिय रघुवीर निहारी ।
 पतिपद मनतैं बन्दि खड़ी तहँ जनकदुलारी ॥
 बालमीक मुनि उठे तब, सम्बोधन करि सबनिकुँ ।
 कहन लगे गंभीर स्वर, साक्षी दै मख सुरनिकुँ ॥

बालमीक मम नाम प्रचेता सुत व्रतधारी ।
 सत्य शपथ करि कहूँ विशुद्धा जनककुमारी ॥
 अब तक मैंने करे यज्ञ तप तीरथ सेवन ।
 यदि अब सियमें होहिँ होहिँ सब निष्फल तत्छिन ॥
 प्राचेतस को शपथ मुनि, भये राम अति हो विकल ।
 शुद्ध जाह्नवी सरिस सिय, लगे कहन मिलिकैं सकल ॥

राम सभामहँ शपथ प्रचेता सुतने कीन्हों ।
 सुर नर ऋषि मुनि सबनि विशुद्धा सीता चीन्हों ॥
 पाइ राम रुख सीय धरातैं बोली बानी ।
 पतिपरायणा मोइ जननि ! यदि तुमने जानी ॥
 तो अपनेई उदरमहँ, करहु लीन अपनाउ अब ।
 सुनतं भूमि फाटी तुरत, घँसन लगीं सिय दुखित सब ॥

धरा धँसत लखि मातु भगे लवकुश जब पकरन ।
 बोलीं सिय—पितु ! गहँ सुतनिहूँ राखँ चरनन ॥
 लवकुश लीये पकरि महामुनि दोऊ रोवत ।
 हाय हाय करि बिकल सभासद इतउत बिलखत ॥
 मणिमय सिंहासन परम, दिव्य तहाँ प्रकटित भयो ।
 सिय बिठाइ पुनि तुरत ही, धरनी भीतर धँसि गयो ॥



निरखि विकल रघुनाथ भये साहस सब छूट्यो ।
 पुरुवारथ अब घट्यो धैर्य को हट पुल दूट्यो ॥
 प्रेम सहित टिंग बैठि मातु सम कौन खवावै ।
 हाय ! प्रिये ! कहँ गई कौन अब सीख सिखावै ॥
 को रम्भाके सरिस सुख, देहि बात केहि संग करूँ ।
 जीऊँ काको मुख निरखि, क्रोड बदन काको धरूँ ॥

सुनि विधि रघुवर शोक लोक आनेतैं आये ।
 करि बिनती बहु भाँति सीयसर्वस्व मनाये ॥
 त्यागि तुरत सब शोक बात ब्रह्माकी मानी ।
 यज्ञ पूर्ण करि गये दुखित रोवत रजधानी ॥

सिय वियोग हिय धारिकें, राज काज सब ई करत ।
 भूले भटकेसे रहत, नयन नीर भर भर भरत ॥
 इति श्रीभागवत चरितके चतुर्थाहमें राघववेन्दुचरित अन्तर्गत सप्तम
 सोता-वियोगचरित नामक बत्तीसवाँ अध्याय समाप्त ।



अथ त्रयस्त्रिंशत्तमोऽध्यायः

[३३]

जय जय सीतानाथ ! जयति कौशल्यानन्दन ।
 जय रघुकुलके तिलक ! जयति भक्तनि उर चन्दन ॥
 जय जय प्रभु परमेश प्रणतपालक रघुनाथक ।
 जय जय करुणासिन्धु धर्मरक्षक प्रणपालक ॥
 बनि भूगति निज सुख तजे, उन्नति करी समाजकी ।
 चरनवन्दना करि कहूँ, कथा रामके राजकी ॥

बरष सहस्रदस तोनि राज करि राम बिताये ।
 एक दिवस मुनि विकट निकट रघुवरके आये ॥
 लखन आगमन कह्यो राम मुनि तुरत बुलाये ।
 इति उत शंकित चकित निरखि मुनि बचन सुनाये ॥
 अति रहस्यमय बात इक, कहहुँ ताहि प्रभु चित धरहि ।
 बीच आई कोई मुनिहि, ताको निश्चय बध करहि ॥

पण प्रभु करि स्वीकार द्वारपै लखन बिठाये ।
 पुनि मुनिसन प्रभु कह्यो—काल किहि कारन आये ॥
 समय समुझिकेँ काल बेष मुनिको धरि आयो ।
 प्रभु आयसु सिर धारि ब्रह्म संदेश सुनायो ॥
 अंशानियुत अवतार धरि, भार उतार्यो, अवनिको ।
 नियत काल जितनो कर्यो, भयो पूर्ण सो सबनिको ॥

अब इच्छा यदि होइ नाथ ! निज धाम पधारें ।
 करि नरतनु संवरन नित्यलोला त्रिस्तारें ॥
 कृपायतन मुनि काल कथन बोले मृदु बानी ।
 तिरोभाव तिथि काल प्रथम हम सवने जानी ॥
 कही कालतैं प्रभु—करहुँ, होवे जातैं जगत हित ।
 तबई आये द्वारपै, क्रोधी दुर्वासा कुपित ॥

रामचन्द्रतैं मिलहुँ कहैं पुनि पुनि दुर्वासा ।
 मुनि नहिं माने लखन गये तजि जीवन आसा ॥
 बुलवाये मुनि बिदा काल रघुवरने कीन्हों ।
 करि आदर सत्कार स्वादयुत भोजन दीन्हों ॥
 पूर्ण प्रतिज्ञा करनहित, रघुपति लछिमन तजि दये ।
 राम बिरहमें तनु सहित, दुखित लखन सुरपुर गये ॥

लखन बिरह अति दुसह राम तेहि सहि न सके जब ।
 लवकुश कीन्हें नृपति चले तन धन जन तखि सब ॥
 भरत शत्रुहन संग चले पुरके नर नारी ।
 खग, मृग, वानर, वृक्ष, भीर लागी संग भारी ॥
 राम प्रेमके पाशमहँ, बँधे चले सब हरषिके ।
 अति प्रमुदित सुरपति भये, हरष बतावैं बरषिके ॥

अब पुरीतैं सकल चले सिवपतिहिं धारि उर ।
 निखिल जीव निर्मुक्त भये सब शून्य भयो पुर ॥
 कीयो प्रभुपद प्रेम सफल तनु तिननैं, कीन्हों ।
 जगजीवनको लाभ जथारथ तिनही लीन्हों ॥
 बिबि विमान अगणित ब्रिये, सरयूतट आये दुरत ।
 बैठि पधारे परमपद, रघुनन्दन निज तनु सहित ॥

जिहि पदपावन हेतु करहिँ जप जोग विरागी ।
 त्रिविध भाँति तनु कसहिँ तेजयुत तपसी त्यागी ॥
 सो पद पायो सहज अवधवासी जीवनिने ।
 रामकृपातैं लोक उच्चतम पायो तिनिने ॥
 पल्लो पकरैं प्रेम तैं, आत्म समरपन जे करहिँ ।
 ते तप तीरथ जोग त्रिनु, भवसागर छिनमहँ तरहिँ ॥
 बिरहमौँहिँ अवसान चरित रघुनन्दनको सुनि ।
 शौनक अतिई दुखित सूतजीतैं बोले पुनि ॥
 सूत ! चरित दुःखान्त नैंक नहिँ हमहिँ सुहावै ।
 सुमिरि राम निर्वाण हृदय पुनि पुनि भरि आवै ॥
 सब सुनि बोले सूत जी, मुनिवर ! राम अखंड अज ।
 तिनकी आद्या शक्ति सिय, जाहि कबहुँ नहिँ तिनहिँ तजि ॥
 सुनहु मुखान्त चरित्र राम स्वामी त्रिभुवनके ।
 भरत लखन रिपुदलन, रहैं आज्ञामहँ तिनके ॥
 पतिकूँ सरवसु समझि सदा सीया सुख पावैं ।
 राम निरखि सिय कमल बदन छिन छिन हरषावैं ॥
 कनकभवन अति ई सुघर, सब सामग्री सुखद जहँ ।
 दरपत है रघुवंशमनि, रमन करहिँ सिय संग तहँ ॥
 राम मातु पितु सुहृद सखा स्वामी बनि जावैं ।
 पति परमेश्वर पुत्र रूप घरि सबहि कहावैं ॥
 जो जैसे ही भजै भजैं वे ताकूँ तैसैं ।
 क्राडा अनुपम करैं भक्त पावैं सुख जैसैं ॥
 मन विषयनितैं मोड़िकैं, प्रभु सेवा संलग्न चित ।
 ते रघुबरलीला लखहिँ कनकभवनमहँ होहि नित ॥
 इति श्रीभागवतचरितके चतुर्थाहमें राघवेन्दुचरित अन्तर्गत
 अष्टम उत्तरचरित नामक तैंतीसवाँ अध्याय समाप्त

अथ चतुर्विंशत्तमोऽध्यायः

[३४]

जय शोभाके धाम ! राम ! चरननि सिर नाऊँ ।
 वरदाता ! वर देहु रूप तुमरो नित ध्याऊँ ॥
 रटूँ तुमारो नाम अन्य बानी नहिँ भाखूँ ।
 निरखूँ जग तव रूप भक्ति भक्तनिमें राखूँ ॥
 धाम तुम्हारेमें बसूँ, नित लीला चिन्तन करूँ ।
 राम राम रटिवो करूँ, अन्त राम कहिकें मरूँ ॥

राम नाम हो नाम और सब नाम असत हैं ।
 राम रटैतैं पाप कटै सब सन्तनि मत हैं ॥
 राम नामके लेत मधुर बानी है जावै ।
 राम स्थादरस मिल्यौ जिनहिँ तिनि अन्य न भावै ॥
 राम नाम काननि प्रविसि, हियके मेंटै शोक सब ।
 रोम रोम रमिजात है, राम रूप है जाय तब ॥

राम रूप लखि अचर सचर बनि द्रवहिँ पसीजें ।
 धन्य धन्य ते पुरुष रामरसमें जे भीजें ॥
 यातुधानहू रूप लखैं मांहित है जावें ।
 इकटक निरखत रहें समरमहँ लड़िवे आवें ॥
 रूपजालमें जे फँसैं, खल जन लखि उनकूँ हँसैं ।
 तिनिंके भवबन्ध नसैं, रामधाममें जे बसैं ॥

परमधाम साकेत अयोध्या सुख सरसावनि ।
हरन सकल संताप जगतके दुःख नसावनि ॥
सरयूको शुभ नीर पीर सब ई हरि लेवै ।
हियकूँ शीतल करै अन्तमें प्रभु पद देवै ॥
करैं धाममहँ बास जे, ते निश्चय तरि जायँगे ।
धामी सब अब मेंटिकें, धाम प्रभाव दिखायँगे ॥

जीवनको फल जिही रामलीलाको सुभिरन ।
अष्टयाममहँ करै चित्त चरितनिको चिन्तन ॥
लीला अपरम्पार शेष शारद सकुचावैं ।
कैने प्राकृत पुरुष तुच्छ भाषामें गावैं ॥
नरतनु घरि लीलाकरी, जग जीवनि कल्याण हित ।
तिनहिँ सुनहिँ समुझहिँ पढ़हिँ, होवै तिनिकूँ सुख अमित ॥

जो अज अच्युत राम जनम तिनि रघुकुल लीयो ।
दशरथ कोशलसुता जनक जननी पद दीयो ॥
भरत शत्रुहन लखन भये अंशनि सँग प्रकटित ।
जननि, जनक, जगजीव जनम मुनि भये प्रफुल्लित ॥
प्राकृत शिशु सम दिव्य अति, करी सरस लीला सुधर ।
जिनिके सुभिरनतैं हृदय, होहि बिमल अतिशय मधुर ॥

दशरथ सुखमयसदन कर्यो क्रीड़ा करि पावन ।
बालकालके खेल करे अतिशय मनभावन ॥
पढ़न गये गुरुगेह गुरुनिको मान बढ़ायो ।
यों शिशुपनको चारु चरित अति मधुर दिखायो ॥
मुनि कौशिक मुनि सँग गये, मारे मखके शत्रु सब ।
घनुषयज्ञ मिथिला सुन्यो, राम लखन मख चले तब ॥

३० पा०

तारि अहल्या गैल गये तिरहुत दुलसावत ।
 लैन सुमन चहुँ ओर फिरहिँ रस सो बरसावत ॥
 राजा रानी सीय प्रजा सबके मन धाये ।
 निश्चय सबकुँ भयो सियाके दुलहा आये ॥
 राम लखन तप तेज सम, शोभित धनुधर मुनिनि सँग ।
 भये मुग्ध नर नारि सब, निरखि नयन तनु रूप रँग ॥

शिवको तोर्यो धनुष वरीं सिय अति मुकुमारी ।
 जोरी भोरी लखी भये प्रमुदित नर नारी ॥
 चारिहुँ भाइनि संग ब्याह करि पुर चलि दीये ।
 परशुराम मग मिले मदिँ मद विनु मद कीये ॥
 जननिनि नयननि सफल करि, सिय सँग सुख सरसाइकेँ ।
 चोरि चित्त सबके लिये, दम्पति दृश्य दिखाइकेँ ॥

कैकेयी चित कुमति बसी कुबरी मतिमानी ।
 राम न राजा भये गये तजि निज रजधानी ॥
 गमने सुरपुर भूप भरत सुनि पुरमहँ आये ।
 पुरजन, मन्त्री, सचिव, मातु, गुरुने समुभाये ॥
 नहिँ मानी सिख सबनिकी, चित्रकूट प्रभु दिँग गये ।
 राम लखन सिय वेष मुनि, निरखि भरत विह्वल भये ॥

चरन पादुका लईं न लौटे जब रघुनन्दन ।
 नन्दिग्राममहँ बसहिँ भरत करि करुनाक्रंदन ॥
 इत रघुवर सिय लखन संग लै बन बन बिहरत ।
 कन्द मूल फल खात मुनिनिके आश्रम ठहरत ॥
 पंचवटीमें लखननै, सूपनखा नकटी करी ।
 राम निरखि हिय कामकी, लपट लगी कुलटा जरी ॥

हैकै रावन कुपित हरिन मारीच बनायो ।
 निरखि कनक मृग सिया पकरिवे चित्त चलायो ॥
 गये हरिन सँग राम लखन पीछेंतें धाये ।
 रावन आयो तहाँ कपट मुनि वेष बनाये ॥
 करि छल बल हरि सीयकुँ, गीष मारि पुर लै गयो ।
 बगदे प्रभु सिय नहिँ लखी, हृदय शोक भीषन भयो ॥

खोजत खोजत राम करी मग पावन शबरी ।
 ऋष्यमूक मग मिले पवनसुत प्रभुके प्रहरी ॥
 सुग्रीवहिँ करि मित्र बालि कपि मार्यो छलतें ।
 कीये कपि एकत्र गये हनु लंका बलतें ॥
 मुन्यो सीय सम्बाद सत्र, सागर सेतु बनाइकें ।
 गए विभीषन लंक लै, शरणागत अपनाइकें ॥

रावन सेना सहित मारि सुर कष्ट मियाये ।
 जनकसुता अपनाइ विभीषन भूप बनाये ॥
 अवधि अन्त जब भयो अवधपुर रघुवर आये ।
 भरत हृदय अति हरष चरन कमलनि सिर नाये ॥
 राजतिलक रघुनाथको, भयो राम राजा भये ।
 शोक मोह भ्रम दुःख भय, सब प्रानिनिके भगि भये ॥

राखी प्रजा प्रसन्न सती सीता-सी त्यागी ।
 आशापालन कठिन करी लल्लिमन बड़भागो ॥
 तेऊ त्यागे अंत संवरन लीला कीन्हों ।
 त्याग ग्रहनतें श्रेष्ठ राम जग शिखा दीन्हों ॥
 लीला मधुमय रामकी, सुनि हिय करुनातें भरै ।
 राम बिना या जगतकुँ, मर्यादायुत को करै ॥

रामचरित जे पुरुष प्रेमते पढ़ें पढ़ावें ।
 तिनके छूटें बन्ध परम पदवी ते पावें ॥
 श्रवनिपुटनिर्ते पिये हिये आवे कोमलता ।
 मिथि कठिनता निखिल होहि जीवनमहँ मृदुता ॥
 नित प्रति नव दिन नियमते, रामायन जे नर सुनहि ।
 ते न भूलि भवजालमहँ, श्रवन रसिक कबहूँ फँसहि ॥
 ग्राम्यकथामहँ व्यर्थ जीव जीवन सत्र खोवें ।
 अंत समय यमदूत निरखि डरि पुनि पुनि रोवें ॥
 रामकथा यदि सुनहि दुःख काहेकुँ पावें ।
 देखें नहि यमसदन नित्य बैकुण्ठ सिधायें ॥
 चिन्ता, दुख, भय, शोकयुत, नीरस यह संसार है ।
 है यदि जामें तत्व तो, रामचरित ही सार है ॥
 सोरठा—सुनै भक्त दै चित्त, राघवेन्दु को शुभ चरित ।
 ते पावें प्रसुदत्त, भक्ति भक्त भगवन्त की ॥
 इति श्रीभागवत चरितके चतुर्थाहमें राघवेन्दुचरित अन्तर्गत
 नवम महिमाचरितनामक चौतीसवाँ अध्याय समाप्त ।



अथ पञ्चत्रिंशत्तमोऽध्यायः

[३५]

कुशके सुत नृप अतिथि निषध नृप तिनके नभ सुत ।
 हिरणनाभ नृप दशम पीढ़िमहँ भये योगयुत ॥
 जैमिनि मुनिहँ योग सीखि कीरति बहु पाई ।
 याज्ञवल्क्यहँ जिननि योग विधि सरल सिखाई ॥
 तिनकी छठवीं पीढ़िमहँ, भूप वंशधर मरु भये ।
 वंश बचावनके निमित्त, अजर अमर नृप है गये ॥

मरुतँ अष्टम पीढ़िमहँ नृप भये वृहद्बल ।
 जिनकी द्वापरमहँ मई कीरति अति उज्ज्वल ॥
 भारतमहँ अभिमन्यु संग लडि स्वर्ग सिधारे ।
 कुमार वृहद्गण बचे बने राजा अति वारे ॥
 पीढ़ी उत्तिसमहँ भये, अन्तिम नृपति सुमित्र वर ।
 फिरि कलिमहँ इक्ष्वाकुके, रहे विशुद्ध न वंशधर ॥

अब इक्ष्वाकु कुमार द्वितीय निमि वंश सुराज ।
 गुरु बशिष्ठहँ कह्यो नृपति—हौं यज्ञ कराज ॥
 ऋत्विज बनि गुरुदेव ! यथा विधि मन्त्र करवावें ।
 बोले गुरु—सुरराज बुलायो तहँ है आवें ॥
 भये मौन सुनि निमि नृपति, इन्द्र यज्ञ हित गुरु गये ।
 छिनमंगुर जीवन निरखि, चिन्तित नृप सोचत भये ॥

है यह देह अनित्य यज्ञ अविनाश करारुँ ।
 यदि गुरु आवें नहीं अन्य आचार्य बुलाऊँ ॥
 करि दृढ़ निश्चय तुरत यज्ञ आरम्भ करायो ।
 मुनि वशिष्ठ पुनि आइ नृपति प्रति क्रोध दिखायो ॥
 देहपात को शाप मुनि, दयो भूर क्रोधित भये ।
 नृपहु शाप मुनिऊँ दयो, तनु दोउनिके गिरि गये ॥

तनु तजि मित्रावरुण वीर्यतैं प्रकटे पुनि मुनि ।
 निमिहू नेत्रनिमाँहिँ बसहिँ नित पलक निमिष बनि ॥
 निमिको मृतक शरीर मध्यो बैदेह भये द्रुत ।
 आदि जनक मिथिलेश मुक्त जीवन समाधियुत ॥
 तबतैं निमि वंशी नृपति, जनक बिदेह कहाहिँ सत्र-
 छिनभंगुर सभूँ सबहिँ, राज पाट बाहन विभव ॥

ष्ठजिस पीढ़ीमाँहि हस्वरोमा जनमे सुन ।
 सीरध्वज तिजि पुत्र जगतमहँ परम कीर्तियुत ॥
 भये यशस्वी पुत्र कुशध्वज तिनिके प्यारे ।
 पुत्री सीता भई उमय कुल जिनने तारे ॥
 जनकदुलारी मैथिली, जनकदुता सीता सती ।
 बैदेही जनकात्मजा, जिनहिँ जपहिँ जोगी जती ॥

सीरध्वज मल करन भूमि शोधन हित आये ।
 ऋषि मुनि शानी विप्र शोधिवे तहाँ बुलाये ॥
 शोधी सबने भूमि जनक हल तहाँ चलायौ ।
 तबहिँ अवन्तितैं प्रगटि, सीय निज रूप दिखायौ ॥
 सीर माँहि सीता भई, लखि कृतार्थ नृप है गये ।
 पाली पुत्री मानिकें, सीरध्वज तातैं भये ॥

सीय पिता बनि जगतमोहिँ यश विपुल कमायो ।
 कियो राम सँग व्याह नृपति निज भाग्य सरायो ॥
 आदि शक्ति हैं सीय जगत छिनमोहिँ बनावें ।
 पालें पोसैं सतत अंतमहैं प्रलय करावें ॥



यह प्रपंच सब शक्तिको, क्रीड़ा थल ऋषि मुनि कह्यो ।
 जगदम्बाके पिता बनि, सीरध्वज अति यश लह्यो ॥

सीरध्वज सुत भये कुशध्वज जनक अमानी ।
 धर्मध्वज तिनि पुत्र कर्मयोगी अति ज्ञानी ॥
 लोकवेदमहँ निपुण सबनिहँ ज्ञान सिखावै ।
 परमारथके प्रश्न पूछिवे पंडित आवैं ॥
 भयो सुखद संवाद शुभ, सुलभा योगिनी संगमहँ ।
 घुसी योगिनी योगतै, जनक नृपतिके अंगमहँ ॥

भये योगिनी संग जनक नृपके प्रश्नोत्तर ।
 योग ज्ञान अध्यात्मयुक्त सुन्दर अति सुखकर ॥
 दोऊ ज्ञानी परमज्ञानकी गंग बहाई ।
 जनक त्याग तप तेज निरखि सुलभा हरषाई ॥
 स्वयं तरे तारे बहुत, द्वै तिनि के अनुरूप सुत ।
 भये कृतध्वज प्रथम नृप, द्वितिय मितध्वज योगयुत ॥

पुत्र कृतध्वजमोंहिँ भये केशिध्वज ज्ञानी ।
 भूप मितध्वज तनय भये खाण्डिक्य अमानी ॥
 केशिध्वज अध्यात्म ज्ञानमहँ विदित दिवाकर ।
 कर्म तत्व परबीन नृपति खाण्डिक्य उजागर ।
 क्षत्रिय धर्म कठोर अति, समर उभय दलमहँ भयो ।
 हार्यो लघु खाण्डिक्य नृप, डरिकें बनमहँ भगि गयो ॥

इत केशिध्वज कर्यो यज्ञ इक अतिशय भारी ।
 सिंह यज्ञकी घेनु खाइ सब बात बिगारी ।
 पूछ्यो प्रायश्चित्त सबनि खाण्डिक्य—बताये ।
 तिन ढिँग भूपति गये, वृत्त सब तिनहिँ सुनाये ॥
 प्रायश्चित्त सुन्यो जनक, आइ कर्यो बिधिवत सकल ।
 सोचें गुरु, खाण्डिक्यहँ, दई दक्षिणा नहिँ बिपुल ॥

दैन दक्षिणा गये न याच्यो राज कोष धन ।
 कह्यो दक्षिणा देहु असत सत समुक्ते कस मन ॥
 हैंसि केशिध्वज कह्यो—लाभ जग तुमही पायो ।
 समुक्ति विषय विष सरिस न तिनिमहँ चित्त फँसायो ।
 देही देह पृथक् संतत, सुनहु ज्ञान परमार्थयुत ।
 देही नित्य अनित्य तनु, तत्सम्बन्धी गेह सुत ॥

यों दीयो बहु ग्यान भये कृतकृत्य जनक जव ।
 कीयो बहु सत्कार गये केशिध्वज गृह तव ॥
 करन योग खाण्डिक्य गये बन भूपति करि सुत ।
 केशिध्वज हू क्लेश कर्म तजि भये योग युत ॥
 जगमहँ जीवनमुक्त नृप, केशिध्वज हू है गये ।
 तिनिके पीछे तनय तिनि, भानुमान भूपति भये ॥

पीढ़ी सत्ताईसमोंहिँ अंतिम मैथिल कृति ।
 भये जनक कुलमोंहिँ परम ज्ञानी सब भूपति ॥
 ऋषि मुनि नित प्रति आइ करहिँ सतसंग सदा हों ।
 या कुल कोई कृपण अज्ञ नृप प्रकट्यो नाहीं ॥
 शुक सम त्यागी जनक ढिँग, परमारय सीखन निमित ।
 आये तिनिके शुभ चरित, करहिँ सतत संसार हित ॥

जनक वंशको विमल चरित अति सुखद सुनायो ।
 तिहि जगमहँ यश ज्ञान दानदैँ बिपुल कमायो ॥
 प्रकटीँ आद्या शक्ति अमर कुल भयो भुवनमहँ ।
 करन जीव कल्याण फिरीँ प्रभुसँग बन बनमहँ ॥
 यों बिकुक्षि निमि वंशकी, कही कथा अति सुखमयी ।
 दंडक तीसर तनयकी, सुनहु कथा अब दुखमयी ॥

सुत इच्छाकु तृतीय गयो दंडक बनमाँहीं ।
 शुक्रमुता लखि भई विकलता अति मनमाँहीं ॥
 अनुचित करि प्रस्ताव कुपित कन्या तिनि कोन्हीं ।
 भयो कामवश शिखा पकरि कन्याकी लोन्हीं ॥
 गुरुकी कन्या द्विजसुता, विरजा संगमतैं रहित ।
 बुद्धि भ्रष्ट नृपकी भई, करि अनुचित कीयो अहित ॥

लज्जित पितु दिँग गई शुक्रतनया जत्र रोवति ।
 दुहिता देखी दुखित कुपित तब भये शुक्र अति ॥
 दयो शाप नृप राज नष्ट है जावै सबई ।
 बरसी बालू तत भयो दंडक-वन तबई ॥
 घोर पापतैं पलकमहँ, धूरि माँहि बैभव मिल्यो ।
 नष्ट भयो परिवार सब, फिर दंडक कुल नहिँ चल्यो ॥

इति श्रीभागवत चरितके चतुर्थाहमें निमि दंडक चरित नामक
 पैतीसवाँ अध्याय समाप्त ।

(मासिक पारायण सत्रहवें दिवसका विश्राम)



अथ षट्त्रिंशत्तमोऽध्यायः

[३६]

कहैं सूत—अब प्रथम शीश शुक चरननि नाऊँ ।
तब अति पावन चन्द्रवंशकी कथा सुनाऊँ ॥
नारायण के नाभि-कमलतैं अब चतुरानन ।
प्रकटे तिनके पुत्र अत्रि कुल जिनको पावन ॥
चन्द्र तनय तिनिके भये, अति तेजस्वी तपस्वी ।
राजसूय करि दिग्बिजय, भये जगतमहँ यशस्वी ॥

यौवन, धन, सम्पत्ति और प्रभुता जगमौहों ।
होवै यदि अत्रिबेक सहित तो फल शुभ नाहों ॥
यौवनतैं उन्माद मान धनतैं है जावै ।
सम्पत्ति प्रभुता पाइ सवनिक्कूँ कुटिल सतावै ॥
सुन्दरताकी ठसकमहँ, सोमकार्य अनुचित कर्यो ।
यौवन मद ऐश्वर्यने, सब विवेक तिनिको हर्यो ॥

अत्रि तनय अद्वितीय सुघर अतिशय त्रिभुवनमहँ ॥
लखैं उनहिं जे नारि काम प्रकटै तिनि मनमहँ ॥
रूप निरखि आसक्त भइँ मुनिपत्नी सबहीं ।
निज निज पति तजि गई समुक्ति सोमहिंसरबसुहीं ॥
अति साहस तब सोमको, बढ्यो पाप मनमहँ बँस्यो ।
तारा गुरुपत्नी हरी, रूप अनूपम चित बस्यो ॥

४७५

दाराको सुनि हरन देवगुरु दुख अति पायो ।
 धर्मनोति कहि चन्द्र विविध विधिगुरु समझायो ॥
 मयो काम बश चन्द्र सीख गुरुकी नहिं मानी ।
 लियो सोमको पक्ष शुक्रने अवसर जानी ॥
 शिव सुरगुरुको पक्ष लै, तारा हित लड़िवे चले ।
 अलख शस्त्रतैं सजि असुर, आइ चन्द्रमातैं मिले ॥

कमलयोनिढिँग जाइ अङ्गिरा वृत्त सुनाये ।
 सुनि चतुरानन तुरत शुक्र शिवगुरु ढिँग आये ॥
 भिड़के आकैं चन्द्र कोप करि डाँट बताई ।
 कीयो बीच विचाव देवगुरु दार दिवाई ॥
 देखि गर्मिणी बृहस्पति, आग बबूला है गये ।
 कछुक कहे कटु दुर्बचन, पत्नीपै क्रोधित भये ॥

पूछ तौछ विधि करी भेद तारा बतलायो ।
 जानि चन्द्रको तनय तुरत बुध तिन्हैं दिवायो ॥
 गुणी तपस्वी परम सुघर बुध वनमहैं तपहित ।
 निवसैं तबई फँस्यो इलामहैं चन्द्र पुत्र चित ॥
 मनु कुमार सुद्युम्न इक, दिवस सेन सजि वन गये ।
 तहैं शिवजीके शापतैं, छोरातैं छोरी भये ॥

घोड़ा घोड़ी भये लोग सब भये लुगाई ।
 नरतैं कैसे नारि बने सुधि बुधि बिसराई ॥
 परम सुन्दरी भई फिरैं इत उत सब वनमहैं ।
 इला रूप सर काम घुस्यो श्रीबुधके मनमहैं ॥
 सैनिके संकेत तैं, सट्ट पट्ट कछु है गई ।
 सहमत दोऊ ई भये, इला बधू बुध की भई ॥

नृप पुरुरवा भये इलामहँ बुधसुत मनहर ।
मुनि बशिष्ठ तहँ आइ शैव मख कीन्हो सुन्दर ॥
भये तुष्ट शिव कह्यो मास भरि नृप नर होवै ।
रहँ मास भरि नारि जाइ महलनिमहँ सोवै ॥

प्रतिष्ठानपुर आइ गय, पुत्र बिमल उत्कल भये ।
नृप पुरुरवहिँ राज दै, तपहित पुनि बनमहँ गये ॥
प्रतिष्ठानपुर अधिप जगत महँ अति ही सुन्दर ।
भूप रूप लखि घँस्यो उरबशी हृदय काम शर ॥
निज ऊरुतँ प्रकट करी नारी-नारायन ।
भई उरबशी श्रेष्ठ स्वरगको सुन्दर-भूषन ॥
सो पुरुरवा रूप पै, भ्रमरी सम मोहित भई ।
अमृत, इन्द्र, सुर स्वरग तजि, बिहल है नृपपुर गई ॥

बन उपवन सर हाट बाट बिस्मित हैकँ अति ।
निरखै इत उत चकित भट्ट भूली भ्रमरावति ॥
लै रम्भाकुँ संग उरबशी पहुँची पुरमहँ ।
प्रतिष्ठानपुर निरखि भई प्रगुदित अति उरमहँ ॥
यल पल भारी है रह्यो, बनी भ्रमरिका रूपकी ।
महल बाटिकामहँ सखी, करें प्रतीक्षा भूपकी ॥

आवत निरखे नृपति सखा सँग अति हरषाई ।
किन्तु न लखि एकान्त भूप सम्मुख नहिँ आई ॥
नृपति मनोगत भाव जानिवेकुँ छिपि इत उत ।
सुनै करें जो बात सखातँ नृप बिहल चित ।
चित्त उरबशीमहँ फँस्यो, नृपको रम्मा जानिकँ ।
आई सम्मुख सखीसँग, हरषे नृप पहिचानिकँ ॥

करि स्वागत नृप कहैं—आजु हौं भयो कृतारथ ।
 पृथिवीपति नरदेव नाम मम भयो जयारथ ॥
 देवि उरवशी देखि चन्द्रमुख तब हौं हरष्यो ।
 मनहु मृतक द्रुम उपरि सुवारस बरवस बरस्यो ॥
 प्रानशन दयिता दयो, दुरलभ दरश दिखाइकैं ।
 जनम सफल मेरो करो, अनुचर मोहि बनाइकैं ॥

कहे उरवशी—देव ! कौन ललना जग माहीं ।
 जो लखि तुमरो रूप होहि बरवस बश नाहीं ॥
 प्यारे पुत्र समान मेष बालक द्वै मम सँग ।
 पालन तिनको करहिं न रति तजिलखहुं नगन अँग ॥
 घृतको भोजन करहुं नित, दुख सुख सब कछु सहज्जी ।
 प्रन यदि पूरे भये नहिं, तो न यहाँ फिर रहज्जी ॥

सब स्वीकारे नियम उरवशी नृप अग्रनाये ।
 पाइ ऐल सुरबधू हियेमहैं अति हरषाये ॥
 सचिवनि शासन सौंपि प्रिया सँग है प्रमुदित अति ।
 बन उपवन गिरि निकट नदीतट विहरहिं भूपति ॥
 जाने पाँच सुत अग्रसरा, आयु श्रुतायु शतायु रय ।
 सब सुन्दर सब सर्वविद्, भये पाँचवें सुत विजय ॥

इत सुरपति लखि स्वरग उरवशी विनु घबराये ।
 प्रेरित करि गन्धर्व ऐलपुरमाँहि पठाये ॥
 लै मेषनि गन्धर्व रातिमहैं छिपिकें भागे ।
 सुनिकें तिनको शब्द उरवशी सँग नृप जागे ॥
 भूपतिहुँ कोसन लगी, चोरनि सुत मेरे हरे ।
 भये व्यरथ नृपके नियम, लगन समयमहैं जो करे ॥

प्रियावचन सुनि परुष नगन नृप असि लै बाये ।
करि प्रकाश गन्धर्व मेष तजि तुरत बिलाये ॥
जब नृप निरखे नगन-उरबशी अति सकुचाई ।
अन्तरहित है गई, फेरि सुरपुरमहँ आई ॥
फिरे नृपति नहि लखी तहँ, प्रिया अधिक बिहल भये ।
अन्वेषण हित तुरत ही, रोवत बनकूँ चलि दये ॥

सुमिरि सुमिरि गुन रूप भूप रोवें पछिनावें ।
कस्तूरी मृग सरिस फिरैं बिहल डकरावें ॥
जड़ चेतनको भेद भाव भूले भ्रम छायो ।
पूछें पक्षी पशुनि पतो कोई न बतायो ॥
जाति, बरन, पद, प्रतिष्ठा, सब अभिमान विसारिकें ।
इत उत भूले फिरहिं हिय, रूप उरबशी भारिकें ॥

बैठें तर तर तनिक तुरत औचक उठि पावें ।
भ्रम बश प्रिया निहारि बढैं आगे गिरि जावें ॥
अंट संट कछु बकैं सिङ्गी पागल सम रोवें ।
निशिबासर पथ चलें करें भोजन नहिँ सोवें ॥
चलत चलत द्वादश दिवस, महँ पहुँचे कुरुक्षेत्र ढिँग ।
भूख प्यास भ्रम नींदतैं, भये नृपतिके शिथिल अँग ॥

लखी उरबशी तहाँ पाँच सखियनि के रँगमहँ ।
अति प्रसन्नता भई प्रिया लखि नृप अँग अँगमहँ ॥
बोले—जाया । प्राण तुम्हारे बिनु ये जावें ।
तब निरखत तन मृतक होहि गोदड़ वृक खावें ॥
कहै उरबशी—कामिनी, करैं प्रीति निज स्वार्थतैं ।
नष्ट करहिं सर्वस्वकूँ, भ्रष्ट करहिं परमार्थतैं ॥

नृपवर धारो धीर कष्ट कब तलक सहोगे ।
 एक बरष पश्चात् रात्रि मम संग रहोगे ॥
 होवेगो सुत और शोक सब मनको त्यागो ।
 गन्धर्वनिक्कू पूजि मोइ उनतैं तुम माँगो ॥
 नृप सँग निशि बसि गई पुनि, राजा तप लागे करन ।
 भये तुष्ट गन्धर्व तब, भूपतितैं बोले बचन ॥

बर माँगो सुनि नृपति नीर नयननिमहँ छायो ।
 बोले—यदि बर देहु उरबशी मोइ दिवाओ ॥
 अग्निस्थाली दर्ई कह्यो करि तीनि भागमहँ ।
 करो यजन पुनि जाइ उरबशी बसहिँ सदा जहँ ॥
 तब ई आई उरबशी, दै सुत निज पुरकूँ गई ॥
 थाली रखि सुत संग पुर, गये लुप्त पावक भई ॥

बिनु पावकके पात्र लख्यो चित चिन्ता छाई ।
 गन्धर्वनिने आइ नृपतिकूँ युक्ति बताई ॥
 मथो अरनि द्वै प्रकट होहिँ पावक मानो सुत ।
 कीन्हो मन्थन भये प्रकट लै गये अनलयुत ॥
 यज्ञ याग पुर पहुँचिकैं, करे उरबशी मिलन हित ।
 दान, धरम, शुभ करम, मख, करहिँ प्रिया महँ फँस्यो चित ॥

भयो कामतैं क्रोध शाप विप्रनिने दीन्हो ।
 जीवित है तप घोर जाइ बदरीबन कीन्हो ॥
 नारायणने कृपा करी नृप स्वरग सिंघाये ।
 निज शरीरके सहित गये सुर लखि हरंघाये ॥
 सुरपति सँग बैठाइकैं, सब सुख सामग्री दर्ई ।
 पतिहिँ पाइ पुनि उरबशी, प्रेम सहित प्रमुदित भई ॥

पाइ अपसरा संग सुखी भूपति अति मनमहँ ।
 दिव्य बिमान विठाइ प्रिया सँग विहरें वन महँ ॥
 नित अबरामृत पान करें सुधि बुधि विसराई ।
 नाहँ जाने कबदिवसहोहि पुनि निशि कब आई ॥
 मोह दाममहँ फँस्यो मन, रहै अतृप्त दुखी सतत ।
 विषयनिमहँ संतोष नहिँ, भयो फेरि नृप चित विरत ॥

नृपकुँ भयो त्रिवेक मोह निद्रातैं जागे ।
 निज स्वरूप पहिचान विषय विष सम अब लागे ॥
 अब न उरवशी भली लगे गुन सग्न गिलाने ।
 समुक्ति दोष की खानि हाथ मलि मलि पछिताने ॥
 हाड़, माँस, मल, मूत्रिको, तनु थैला दीखन लग्यो ।
 भक्त भये भगवानके, विषय भांग मल भ्रम भग्यो ॥

भयो ज्ञान तन नाशवान अविनाशी श्रीहरि ।
 साधक तरे अनेक काम तजि प्रभु चिन्तन करि ॥
 नारि फँसे नर रूप निरखि नर नारि रूपमहँ ।
 दोऊ तजि परमार्थ गिरैं जग अंध कूपमहँ ॥
 चरम, मांस, रज, बीर्यमहँ, अश लिपटि समुझैं सुखी ।
 ज्यों-ज्यों विषयनिमहँ फसैं, होहिँ अधिक त्यों-त्यों दुखी ॥

करै न कबहूँ संग कामिनी कामुक जनको ।
 नहीं करै विश्वास पंचइन्द्रिय अरु मनको ॥
 योगी ज्ञानी सिद्ध त्रिवेकी हूँ फँसि जावैं ।
 त्यागि तपस्या योगकाम भोगनि अपनावैं ॥
 तातैं है निस्संग नित, निरत भजन ही महँ रहै ।
 विषयनितैं बचिकैं चलै, मम मनबश कबहुँ न कहै ॥

३१ का०

यों करि मनहिं प्रबोध भये विषयनिर्तै उपरत ।
 त्यागि उरबशी लोक आत्म सुखमाहिं निरत नित ॥
 बिखरी मनकी वृत्ति योगतै बशमहँ कीन्हीं ।
 करि स्वरूप संधान चित्तकूँ शिच्चा दीन्हीं ॥


मन पुरुरवा उरबशी—माया पुर तनकूँ कहें ।
 फँसिकें ताके फंदमहँ, जीव विविध विधि दुख सहें ॥
 इति श्रीभागवतचरितके चतुर्थाहमें चन्द्रवंशी ऐल चरित
 नामक छत्तीसवां अध्याय समाप्त ।



अथ सप्तत्रिंशत्तमोऽध्यायः

[३७]

भये ऐलके विजय विजयके भये भीम सुत ।
तिनिके काँचन भये होत्र तनि भये धरमयुत ॥
होत्र पुत्र जगमाहिं जहु ऋषि बड़े तपस्वी ।
गंगा सब पी गये जगतमहँ भये यशस्वी ॥



मख सामग्री गंगने, जलमहँ दई डुबोइ जब ।
पान करीं जनि फानतैं, भयो जाहवी नाम तब ॥

जह्नु तनय नृप पुरु पुरुके पुत्र बलाक हु ।
 परम प्रसिद्ध बलाक भये तिनके सुत अजक हु ॥
 अजक जगतमहँ भये यशस्वी तिनके कुश सुत ।
 तिनतैं कौशिक गोत्र भयो जगमौहिं घरमयुत ॥
 पुत्र चारि तिनके भये, भिन्न भिन्न पुरके अधिप ।
 श्री कुशाम्बु भूतप बसू, चौथे भये कुशाम्बु नृप ॥

अति सुन्दर कुशनाभ घृताची लखि नृप दृढ व्रत ।
 पत्नी बनिकें रही मई तातैं कन्या शत ॥
 कन्या क्रीड़ा करहिं अनिल तिनकें दिँ ग आयौ ।
 कर्यो व्याह प्रस्ताव कुमारिनिने ठुकरायौ ॥
 कुपित बायु अति ही भयो, सब कन्या कुबरी करीं ।
 रोवत सब पितु दिँ ग गई, नृप चरननिमहँ गिरि परीं ॥

बायु बात सब सुनी क्षमा भूपतिने कीन्हीं ।
 ब्रह्मदत्त बुलवाइ तिनहिं सब कन्या दोन्हीं ॥
 पति परसत ही मई सुन्दरी सब सुकुमारी ।
 लखि घर बर अनुकूल भूप सुधि देह बिसारी ॥
 कन्या अपने घर गई, पुत्र हेतु हरितैं बिनय ।
 करी यश करि नृपतिने, भये गाधि तिनके तनय ॥

ते कुशाम्बुके पुत्र कहाये गाधि भूमिपति ।
 तिनको कन्या सत्यवती जगमहँ सुन्दर अति ॥
 आइ महर्षि ऋचोक याचना कन्या कीन्हीं ।
 सुनि घबराये बात बदलि भूपतिने दीन्हीं ॥
 बोले—देउ सहस्र हय, स्वच्छ, शुभ्र जिनको बरन ।
 नेगवान अति कान्तियुत, एक कृष्ण होवै करन ॥

मुनि मुनि नृपमन भाव समुक्ति जललोक पंचारे ।
 वरुण कर्यो आतिथ्य प्रेमतै पाद पखारे ॥
 श्यामकरन हय सहस दये लै नृप दिंग आये ।
 मुनि प्रभाव तप निरखि गाधि अतिशय सकुचाये ॥
 सत्यवती कन्या दई, मुनि प्रसन्न अति है गये ।
 मिले प्रेमतै बर बधू, अंगुलीय नग सम भये ॥

सत्यवती मुन और बन्धुहित इच्छा कीन्हीं ।
 द्वात्र ब्रह्म द्वै पृथक् तेज धरि पायस दीन्हीं ॥
 सुता भागकूँ श्रेष्ठ समुक्ति माताने खायौ ।
 स्वयं मातुको भाग खाय सब वृत्त छिपायौ ॥
 जानि योगतै मुनि कह्यो, निज अनर्थको भोगि फल ।
 तब सुत क्षत्रिय दंडधर, करै बन्धु तब तप प्रबल ॥

पति चरननिमहँ सत्यवती बिनती बहु कीन्हीं ।
 होहि पुत्र नहि पौत्र घोर मुनि आयसु दोन्हीं ॥
 भयो कछुक संतोष जने जमदग्नि तपोनिधि ।
 जाति नाम सब करम करे मुनि हरषि यथाविधि ॥
 रेणुसुता श्रोरेणुका, संग न्याह मुनिने कर्यो ।
 परशुराम तिनतै भये, भूमिभार जिनने हर्यो ॥

छोटे से बड़ राम धनुष कंधापै धारें ।
 शस्त्र शास्त्रमहँ निपुण' निशानों तकिके मारें ॥
 परशु प्राप्त जव भयो निरखि अतिशय हरषाये ।
 तबहीतै मुनि परशुराम जगमौहि कहाये ॥
 क्षत्रिय अति निर्दय भये, अभिमानो अब नित कहिं ।
 वेद विप्र मानें नहीं, ऋषि मुनिहू तिनतै डरहिं ॥

तिनके बध हित विष्णु विप्र बनि बसुबा तल्लपै ।
 प्रकटे लै कैं परशु विजय कीन्हों शत्रुनिपै ॥
 कर्यो न मनमहँ मोह जनक हित माता मारी ।
 आशा अनुचित उचित पिताकी सिरपै धारी ॥
 पितु रख लखि कारज करहिं, डरहिं न रुठहिं पितु कहों ।
 पितृभक्तिको दिव्य अस, उदाहरन जगमहँ नहीं ॥

पूछें शौनक—सूत ! रामकी कथा सुनाओ ।
 सूत कहहिं—सब कहहुँ कथामहँ चित्त लगाओ ॥
 एक दिवस जल भरन रेनुका गई लखे तहँ ।
 सुर वनितनि सँग करहिं चित्ररथ खेल नदीमहँ ॥
 रति क्रीड़ा नृप रूप लखि, भयो कामयुत तिय हृदय ।
 बीत्यो मुनिको तबतलक, अग्निहोत्र सन्ध्या समय ॥

आई अति भयभीत रेनुका कोपे तब मुनि ।
 कही सुतनितैं मातु हनो चुप रहे पुत्र सुनि ॥
 सोचैं मुनिवर—अधिक धृष्टता पुत्रनि कीन्हों ।
 आये तबई राम सबनि बध आशा दीन्हों ॥
 पितु प्रभाव तप राम लखि, मातु भ्रात मारे तुरत ।
 पितु प्रसन्नता बर लह्यो, सब जीवित ह्वैकें फिरत ॥

सहसबाहु बलवान भूप हैहय कुल भूषन ।
 दत्त प्रभुहिं आराधि प्राप्त कीन्हें जिन बहुगुन ॥
 तेज, ओज, पुरुषार्थ, सहसभुज, अव्याहत गति ।
 यश अजेयता आदि लहे गुन भयो मत्त अति ॥
 रावन त्रिभुवन विजय करि, घूमत बल मदमहँ भर्यो ।
 पशु समान तिहिं पकरिकें, दलन दर्प तांको कर्यो ॥

मुनि पुलस्त्य निज पौत्र परामव अति सकुचाये ।
 उतरि अवनियै तुरत नृपति अर्जुन दिँग आये ॥
 कार्तवीर्य सत्कार कर्यो मुनि आयसु दीन्हीं ।
 छोड़ो रावण तबहिँ मित्रता गाढ़ी कीन्हीं ॥
 यों जग जीत्यो जोगतैं, अतिशय मद बलको बढ़्यो ।
 मम समान जगको बली, भूत भूपके सिर चढ़्यो ॥

एक दिवस आखेट करन वन भूप पधारे ।
 तेज पुञ्ज जमदग्नि निजाश्रममाँहिँ निहारे ॥
 हैहय बंशी नृपति समुक्ति मुनि कीन्हों आदर ।
 कर्यो निमंत्रन सैन्य सहित नृप मान्यो सादर ॥
 कामधेनुकी कृपातैं, करे तृप्त सैनिक सकल ।
 धेनु सिद्धि लखि सहसभुज, लोभ भयो मनमहँ प्रबल ॥

माँगी नृप मखधेनु नहीं मुनिवरने दीन्हीं ।
 बल प्रयोगकरि पकरि धेनु भृत्यनिने लीन्हीं ॥
 बारबार चिल्लाह नयनतैं नीर बहावै ।
 बछरा बनिकें बिकल लखै जननी डकरावै ॥
 नृपहठ जगमहँ अति बिकट, कामधेनु पुर लै गये ।
 परशुगम आये तबहिँ, सुनत रुद्र सम है गये ॥

फरसा लीन्हों हाथ चले नृप कुल संहारन ।
 राम रूप लखि उग्र लगे हाथी चिंघारन ॥
 सहस करनि शर धनुष लिये नृप लरिवे आयो ।
 सम्मुख निरख्यो शत्रु राम तर्कि परशु चलायो ॥
 कर शर धनु तनु मृग चरम, अवन नयन रिसयुत बदन ।
 मनहुँ परसु लै बीररस, दर्प-दर्प आयो दलन ॥

भयो युद्ध घनघोर बीर हैहयपति रथ चढ़ि ।
 आयो इततैं परशुराम नृप लखि आये बढ़ि ॥
 तीक्ष्ण परशुतैं भुजा काटि अर्जुनकी दीन्हों ।
 सुत सैनिक सब भगे राम गर्जन पुनि कीन्हों ॥
 नृपसिर बड़तैं पृथक् करि, कामधेनु लै चलि दये ।
 कही कथा पितु सन सकल, मुनि मुनि हरषित नहिं भये ॥

बोले मुनि जमदग्नि—राम ! भल कियो न कारंज ।
 विप्रनि भूषन क्षमा जिही मर्यादा आरज ॥
 अरे, कहा जिह कर्यो विप्र है नरपति मार्यो ।
 कर्यो कर्म अति क्रूर कलंकित कुल करि डार्यो ॥
 नृपबध द्विजबधतैं अधिक, प्रायश्चित जाको करहु ।
 हरि चित धरि कीर्तन करत, पावन तीर्थनिमहैं फिरहु ॥

पितु गौरवकूँ मानि हरषि आयसु सिर धारी ।
 तीर्थनिमहैं अघ हरन फिरहिं द्विजवर अघहारी ॥
 सम्बतसरमहैं सकल अवनि परदक्षिन कीन्हों ।
 पुनि पितु आये निकट निरखि आशिष बहु दीन्हों ॥
 इत पितु आशातैं परशु—राम यज्ञ जप तप करत ।
 उत हैहय क्षत्रिय अधम, बदलौ लैवेकूँ फिरत ॥

परशु पराक्रम पराभूत पापी पामर खल ।
 क्षात्रधर्म तजि फिरहिं करहिं नहिं रण सब निरबल ॥
 एक दिवस सँग बन्धु गये वन परशुराम जब ।
 आये छिपिकें सहसबाहु सुत अस्त्र लिये सब ॥
 बिष्णु ध्यान लवलौन मुनि, निरखि भये हर्षित सकल ।
 प्रतिहिंसा हियमहैं जगी, बध हित उद्यम करहिं खल ॥

लखि आश्रम सब शून्य शीघ्र सिर मुनिको काट्यो ।
मृतक लख्यो पतिदेह रेणुकाको हिय फाट्यो ॥
रोवै कुररी सरिस पुकारै राम धुनै सिर ।
मुनि जननीको रुदन राम तब आये सत्वर ॥
जनक मृतक तनु निरखि तब, परशुगम रोवन लगे ।
गये तात तजि हमहिँ कहँ क्रूर कालने हम ठगे ॥

पितुतनु बन्धुनि सौपि चले क्षत्रिनि संहारन ।
पहुँचे पुरमहँ तुरत परशु लै लागे मारन ॥
हैहय कुल संहार कर्यो पुनि जे ई पाये ।
क्षत्रिय सब ई मारि मारि यमसदन पठाये ॥
युवक, वृद्ध, शिशु उदरमहँ लखहिँ जहाँ क्षत्रिय तनय ।
तुरत पठावै यमसदन, सुनहिँ नहीं अनुनय विनय ॥

करयो क्रूर अति काज कृपा कीन्हों नहिँ तिनपै ।
नहीं बचै ते कोप कालको होवै जिनपै ॥
चिड़ राजनितैं मई जहाँ देखें तहँ मारैं ।
पकरैं बलिपशु सरिस साथ सबकुँ संहारैं ॥
रक्त कुण्ड नौ भरि दये, सम्मुख नहिँ कोऊ लख्यो ।
पितरनिको ग्वा रक्ततैं, परशुराम तरपन कर्यो ॥

पुनि पितु सिर धड़माहि जोरि मंत्रनितैं दीन्हों ।
सर्वदेवमय यज्ञपुरुषको पूजन कीन्हों ॥
करे यज्ञ अति विषद भूमि कश्यपकुँ दीन्हों ।
कारि अवभृत इस्नान प्रतिज्ञा पूरी कीन्हों ॥
स्यागि रोष अति शाँत है, भूमि द्विजनिकुँ सौपि सब ।
पूजित प्राणिनितैं भये, गिरि महेन्द्रपै बसहिँ अब ॥

जब जस निरखें समय रूप तब तस हरि धारैं ।
 साधुनि रक्षा करहिँ नीच खल दुष्टनि मारैं ॥
 करन धरम उत्थान सदा प्रकटे जगमाहीं ।
 ऊँच नीच ब्यौहार जगत को उनमहैं नाहीं ॥
 क्षत्रानिनिके उदरतैं प्रकटे सुररिपु अवनिपै ।
 राम प शुत ते हने, करी कृपा सुर नरनिपै ॥

इति श्रीभागवतचरितके चतुर्थाहमें श्री परशुराम चरित
 नामक सैंतीसवाँ अध्याय समाप्त ।



अथ अष्टात्रिंशत्तमोऽध्यायः

[३८]

सत्यवतो की मातु ब्रह्ममंत्रनि चरु खायो ।
तातै द्विज गुनयुक्त परम ज्ञानी सुत जायो ॥
तेई विश्वामित्र कर्यो जिन तप अति दुष्कर ।
विघ्ननि सिर धरि पैर भये क्षत्रियतैं द्विजवर ॥
विश्वामित्र बशिष्ठमहैं, लागडाँट अतिशय भई ।
कामधेनु हित परस्पर, गुत्यम गुत्या है गई ॥

भयो परस्पर युद्ध गाधिसुत रनमहैं हारे ।
ब्रह्मनेजहित कान तपस्या बनहि सिधारे ॥
कामक्रोधने आई तपस्या नष्ट कराई ।
आई रम्भा कबहुँ मेनका कबहुँ आई ॥
पुनि पुनि आये विघ्न बहु, किन्तु निराशा नहिं भई ।
है प्रसन्न विधि ब्रह्म ऋषि, की पदवी तबई दई ॥

मुनिवर विश्वामित्र करें तप पुष्करमाहीं ।
शुनःशेषकूँ भूप यज्ञ बलि हितलै जाहीं ॥
मामा विश्वामित्र विनयके मंत्र सिखाये ।
अति प्रसन्न सुर भये यज्ञमहैं प्रान बचाये ॥
मातु पिता दिँग पुनि नहीं, शुनःशेष कबहुँ गये ।
गाधितनय सुत सम करे, मार्गवतैं कौशिक भये ॥

निज सुत विश्वामित्र प्रेमतैं पास बुलाये ।
 देवरातकुँ ज्येष्ठ करो बहु भिधि समुझाये ॥
 आधे माने नहीं शापदै म्तेच्छ बनाये ।
 शेषनि करि स्वीकार मनोवाञ्छित वर पाये ॥
 ब्राह्मण क्षत्रिय म्तेच्छ हू, कौशिक गोत्री ही रहे ।
 विमल चरित सत्प्रेमहँ, गाधितनयके कछु कहे ॥

अब पुरुरवा पुत्र आयुकी बरनों संतति ।
 नहुष, रम्भ, रजि और अनेना क्षत्रवृद्ध अति ॥
 भीर पाँच सुत भये पाँचहू परम यशस्वी ॥
 क्षत्रवृद्धके काशि काशिके राष्ट्र तपस्वी ॥
 घन्वन्तरि तिनि सुत तनय, बनि हरि प्रकटित है गये ॥
 कुवलाश्व ज्ञानी नृपति, पंचम पीढ़ीमहँ भये ॥

भूष शत्रुजित बत्स ऋतध्वज शूवीर अति ।
 पालहिं पितु सम प्रजा धर्ममहँ रखहिं सदा मति ॥
 गालव दीन्हों अश्व पवन मनतैं द्रुतगामी ।
 तापै चढ़ि पातालकेतु, मार्ग्यो खल नामी ॥
 कुवलाश्वकी कृपातैं, नृप पतालतलमहँ गये ।
 विश्वावसु तनया तहाँ, भिली पाइ प्रमुदित भये ॥

सँग मदालसा लई ऋतध्वज पितुपुर आये ।
 जननी पितु अति सुधर बहूलखि अँग न समाये ॥
 अति प्रगाढ़तर प्रेम परस्पर कुँवरि कुँवर महँ ।
 जन रक्षा हित गये अश्व चढ़ि नृप-सुत बनमहँ ॥
 तालकेतु पातालको, बन्धु कपटतैं बन्धो हुनि ।
 खल मदालसातैं कर्यो, मरी प्राण गति मृत्यु हुनि ॥

नाग अश्वतर पुत्र ऋतध्वजके प्रेमी अति ।
 करिवे प्रत्युपकार करी सुत पितु मिलि सम्मति ॥
 पितु मदालसा फेरि तपस्या करि प्रकटाई ।
 कुमार पताल बुलाइ प्रिया फिरि तिननि मिलाई ॥

पाइ परस्पर प्रियाप्रिय, अति प्रसन्न दोऊ मये ।
 नितु प्रयाण सूरपुर कर्यो, भूप ऋतध्वज है गये ॥



सुत मदालसा जने चारि ज्ञानी ते सबई ।
 तीनि त्यागि घर गये नृपति लखि बोले तबई ॥
 चौथेकुँ मति मोक्षधर्मको पाठ पढ़ाओ ।
 गृहीधर्मकी सीख देहु निज वंश चलाओ ॥
 सुत अलर्क राजा करे, धर्म प्रवृत्ति सिखाइकेँ ।
 गुप्त मंत्र दै वन गई, बन्धु प्रबोधे आइकेँ ॥

सेना सहित सुबाहु काशिराजा सँग आये ।
 पुर अलर्कको घेरि लयो नृप अति घबराये ॥
 दत्तात्रेय समीप गये माँ मंत्र मानिकेँ ।
 पाइ ज्ञान समभाव दिखायो रिपुहिं आनिकेँ ॥
 लखि अलर्ककुँ बोधयुत, काशिराज निजपुर गये ।
 पायो पुनि निर्वाण पद, तिनि सुत संतति नृप भये ॥

संतति सुतहु सुनीथ सुकेतन सुत शुभ तिनिके ।
 धर्मकेतु तिनि पुत्र सत्यकेतु सुत उनिके ॥
 क्षत्रवृद्धको वंश कह्यो कुल रम्भ भयो द्विज ।
 नृपति अनेना छठी पीढ़ि तक चल्यो वंश निज ॥
 आयु तनय रजि अति बली होहिं चरनमहँ इन्द्र नत ।
 भये पुत्र रण बाँकुरे, तेजस्वी तिनि पंचशत ॥

गये पिता परलोक पंचशत राजा बनिकेँ ।
 सब ई हैं हम इन्द्र कहें शतक्रतुतैं तनिकेँ ॥
 सुर गुरुने अभिचार यज्ञ करि भ्रष्ट बनाये ।
 भये धर्मरिपु तुरत इन्द्र यमसदन पठाये ॥
 इन्द्र बज्रतैं मरे सब, चल्यो नहीं रजिवंश पुनि ।
 आयु तनय नृप नहुषको, शिषद चरित अब सुनहु मुनि ॥

दत्त दयो फल आयु नृपतिरत्नीने खायो ।
 फल प्रभावतै इन्दुमतीने. सुत इक जायो ॥
 नहुष नाम विख्यात हुण्डने ताहि चुरायो ।
 पाचक राँघन दयो प्रेमवश कुँअर छिपायो ॥
 मुनि वशिष्ठ पालन कर्यो बड़े भये रिपु हनन हित ।
 चले दैत्य टिँग जासुको शिवपुत्रीमहँ फँस्यो चित ॥
 दो० — शौनक जी शंका करी, सुत ! सुता शिव कौन ।
 सुत कहें—मुनि ! उमाशिव, गये शक्रके मौन ॥

छप्पय—सुरपुर उमा अशोकसुंदरी पैदा कीन्हों ।
 कल्यवृद्धतै भई शिवा पुत्री करि लीन्हों ॥
 नहुष होहिँ पति हरषि उमा आशिश तिहि दीन्हों ।
 विप्रचित्ति सुत हुँड करी माया से चीन्हों ॥
 कर्यो व्याह नृप नहुषने, गुरु आज्ञातै हुँड हनि ।
 गये पितृ गृह निरखि सुत, प्रमुदित जनु अहि पाइ मनि ॥

रानी पाइ अशोकसुन्दरी नहुष सुखी अति ।
 गये आयु बन करी तपस्या लहो परम गति ॥
 सुत यति और ययाति वयति संयाति यशस्वी ।
 आयति कृति सव षष्ठ भये यति ज्येष्ठ तपस्वी ॥
 वृत्त मारि हत्या प्रसित, है शतक्रतु जत्र छिपि गये ।
 तब सुर-सम्मतितै नहुष, त्वर्गमाँहि सुरपति भये ॥

इन्द्रासनपै बैठि नृपति मनमाँहि सिहावें ।
 देव, उरग, गन्धर्व, सिद्ध सिर आइ झुकावें ॥
 ऋषि मुनि विनती करें अप्सरा चँवर हुलावें ।
 गुन गावें गन्धर्व नृत्य सुरबधू दिखावें ॥

अमृत असन, भूषन परम, दिव्य गन्ध, नन्दन भ्रमन ।
 सुखलननिको सतत सँग, पाइ भयो उन्मत्त मन ॥
 पाइ स्वर्गको राज नहुष मन गर्व भयो अति ।
 लह्यो अतुल ऐश्वर्य भूपको भई भ्रष्ट मति ॥
 शची समीप सँदेश पठायो मोइ भजो अब ।
 सती भई भयभीत बृहस्पति निकट गई तब ॥
 करि सम्मति गुरुतैं शची, कहवायो तब बरुङ्गी ।
 ऋषि दोवैं शत्रिका जवहिं, इच्छा पूरी करुङ्गी ॥

शिवकामहँ ऋषि लगे नहुष चढि शचिगृह गमने ।
 पद प्रहार करि सर्प, कहैं मुनि भये अनमने ॥
 दुष्ट होहि तू सर्प—शाप बुझ्मज मुनि दीन्हो ।
 तुरत सर्प हँ गिर्यो, पापको फल चलि लीन्हो ॥
 धर्मराज सत्संगतैं, सपे योनिहँ छुटि गये ।
 सब तजि यति जव बन गये, तब ययाति भूपति भये ॥

इति श्रीभागवतचरितके चतुर्थाहमें पुरुरवा वंशवर्णन
 नामक अड़तीसवाँ अध्याय समाप्त ।

अथ एकोनचत्वारिंशत्तमोऽध्यायः

[३६]

उल्ला०—ईश भजनतें सब तरहिँ, होहिँ वासनातें पतित ।

अति शिद्धाप्रद मुनि ! मुनहु, अब ययातिको शुभ चरित ॥

छप्पय—नृप ययातिने ब्याह शुक्र तनया सँग कीन्हों ।

शौनक शंका करी धर्म नृप च्यौं तजि दीन्हों ॥

सूत कहें—मुनि ! सुनो, कथा अति कहौं मनोहर !

गुरु—सुत कच सुरस्वार्थ हेतु व्रत कीन्यो दुष्कर ॥



सीखन मृतसंजीवनी, विद्या उशना ढिँग गये ।

मारे अमुरनि द्वेषबश, गुरु प्रसाद जीवित भये ॥

३२ फ०

४६७

असुरनि कच बाधे सुरा संग गुरु उदर पठायो ।
 शुक्र सिखायो मंत्र मृतकलै फेरि जिवायो ॥
 है कृतार्थ कच चले देवयानी बोली तब ।
 करो ब्याह मम संग न कचने स्वीकार्यो जब ॥
 शाप दयो विद्या नहीं, होहि फलवती निकट तब ।
 मिलहि न तोकुँ विप्रवर, कचहु कुशित है कह्यो तब ॥

वृषपर्वाकी सुता नाम शर्मिष्ठा युवती ।
 लै सखियनि बन गई देवयानी संग हँसती ॥
 शोभा निरखि बसंत मोदमहँ नाचें गावें ।
 है बिबला जलमाहिँ करें क्रीड़ा सब न्हावें ॥
 निरखे आवत वृषभ चढ़ि, पशुपति पारवती सहित ।
 है लज्जित सरतैं निकसि, पहिनत पट लोचन चकित ॥

उलटे पुलटे बायुदेवने पट अरु गहने ।
 गुरुपुत्रीके बला भूलि शर्मिष्ठा पहिने ॥
 शुक्रपुताने कहीं बहुत अनकहनी बानी ।
 वृषपर्वाकी सुता सुनत मनमाहिँ रिसानी ॥
 अन्धकूप धक्का दयो, गिरी देवयानी तबहिँ ।
 छाँड़ि बिबला कूपमहँ, आई लै पुरमहँ सबहिँ ॥

दैवयोगतैं नृप ययाति मृगया हित आये ।
 नंगी निरखी कूप देवयानी सकुचाये ॥
 दयो दुपट्टा डारि दयावश तुरत निकासी ।
 दया उलटिके परी भूपके गरमहँ फाँसी ॥
 पितु दिँग आई दुखित है, द्विजतनया नृप बरि लये ।
 सुनि घटना तनया सहित, उशना अति दुःखित भये ॥

भृगुसुत कीन्हीं शान्त न मानी सुता हठीली ।
 लाङ्ग्यारमहँ पत्नी लड़ैती अति गरबीली ॥
 पुत्री हठकूँ मानि त्यागि वृषपर्वा पुरकूँ ।
 चले सुता सँग शुक्र त्यागि वृष शिष्य असुरकूँ ॥
 सुनि सब सुर हरषित भये, असुरनि के छक्के छुटे ।
 यदि गुरु तजि सुरपुर गये, तो अघंवरमहँ हम लुटे ॥

पुत्री सँग गुरु जहाँ तहाँ सब दानव धाये ।
 गुरु चरननिमहँ परे विविध विधि शुक्र मनाये ॥
 शांत भये गुरु कहें—सुताकूँ नृपति मनाओ ।
 सुनि नृप पैरनि परे देवि ! अब लाज बचाओ ॥
 दासी शर्मिष्ठा बने, गुरुपुत्री बोली—कहूँ ।
 सब सेवा सादर करै, सहस सखिनि सँग जहँ रहूँ ॥

सुनि वृषपर्वा तुरत बुलाई सुता दुलारी ।
 बन्धु त्रिपति सुनि असुरकुमारी बात विचारी ॥
 यदि दासी हों बनूँ निरापद होवें परिजन ।
 परस्वारथमहँ लगे बही बड़भागी है तन ॥
 गुरुपुत्री पद पकरिकै, बोली—दासी बनुझी ।
 जहाँ विवाहें पिता तव, तहाँ संगही चलुझी ॥

शर्मिष्ठा वृषसुता देवयानीकी दासी ।
 बनी असुर भय रहित भये परि चित्त उदासी ॥
 प्रतिहिंसामहँ पगी देवयानी इतरावै ।
 शर्मिष्ठानै सदा चरनसेवा करवावै ॥
 बाही बनमहँ एक दिन, पुनि ययाति आये नृपति ।
 गुरुपुत्री प्रस्ताव पुनि, कर्यो देव ! अब होहु पति ॥

नृप शंका कछु करी देवयानी समुभाये ।
 नृपकुँ निरभय करन तुरत पितु शुक्र बुलाये ॥
 अनुमोदन पितु कर्यो साज सखियनिने साजे ।
 कड़क कड़क धुं लगे ब्याहके बाजन बाजे ॥
 शर्मिष्ठा सँग सुता दै, बोले पितु—पावें न दुख ।
 दोऊ आदर पाइँ परि, शर्मिष्ठा नहिं सेज सुख ॥

लै शर्मिष्ठा सङ्ग देवयानीकुँ भूपति ।
 आये पुरमहँ हरषि मनायौ प्रजा मोद अति ॥
 शुक्रसुताकुँ सदा शैल सर सरित घुमावें ।
 सरस हास परिहास करें अति सुख सरसावें ॥
 पुत्रवती उशना सुता, कछुक कालमहँ है गई ।
 शर्मिष्ठा है ऋतुमती, नृप संगम इच्छुक भई ॥

बोली—हे नरदेव ! धर्मके तुम मेरे पति ।
 दासिनिकी सब भौति बताये स्वामी ही गति ॥
 बौर्य दान अब देहु पसारुँ पल्लो प्रियतम ।
 दासीपै मति बनो दयासागर अस निरमम ॥
 रूपवती अरु ऋतुमती, शर्मिष्ठाकी सुनि विनय ।
 शुक्र प्रतिज्ञा भंग करि, दयो दान हैकें सदय ॥

शर्मिष्ठा सुत जन्यो देवयानी सुनि आई ।
 भई क्रोधतैं लाल असुरतनया धमकाई ॥
 इत उत बात बनाय देवयानी टरकाई ।
 गुरु पुत्रिहिं बहकाइ दैत्यपुत्री हरषाई ॥
 शर्मिष्ठामहँ फैस्यो मन, बस्यो दंभ नृपके हिये ।
 भये कामवश शील तजि, रति सुख हित कारज किये ॥

यदु अरु तुर्वसु तनय देवयानीते जाये ।
 शर्मिष्ठा हू तीनि तनय भूपतिनै पाये ॥
 द्रुह्यु और अनु पुरु नाम तिनिके अति मनहर ।
 प्रकट न बाहर होहि रहै मइलनि के भीतर ॥
 शर्मिष्ठाके रूपमहँ, रँग्यो रँगिलौ नृप हृदय ।
 देव सरिस सुन्दर भये, ताईसैं तीनिहु तनय ॥

एक दिवस नृप संग देवयानी उपवनमहँ ।
 घूमत घूमत गई परम प्रमुदित है मनमहँ ॥
 देव कुमार समान निहारे द्वै शिशु सुन्दर ।
 रूप रंग उनिहार शील नृप सरिस मनोहर ॥
 पूछै पति तैं प्रेम बश, जीवनघन ! ये शिशु सुवर ।
 है निर्भय क्रीडा करहि कहहु कौनके हैं कुमर ॥

भये भूप भयभीत न बोले कछु घबराये ।
 करि करको संकेत कुमर द्विजमुता बुलाये ॥
 पूछै किनके पुत्र शिशुनि सच बात बताई ।
 शर्मिष्ठा दिँग कुपति देवयानी सुनि आई ॥
 बात खरी खोटी कही, शर्मिष्ठा डरपी न जब ।
 मरी क्रोधमहँ नृपहिं तजि, पितु दिँग रोवत गई तब ॥

लखी भूपने जात देवयानी फुफकारत ।
 पीछे पीछे चले पुकारत है अति आरत ॥
 पुनि पुनि पैरनि परें कहैं—मत पितु दिँग जाओ ।
 तुम ही देओ दंड न मोकुँ अधिरु लजाओ ॥
 दिये सौतिया बाह अति, शुक्रमुता मानी नहीं ।
 भूपतिकी करतूत सब, रोइ रोइ पितुनै कहैं ॥

वृत्त मुन्यो सब शुक्र शाप भूपतिकूँ दीन्हों ।
 करी प्रतिज्ञा भंग अनादर मेरो कीन्हों ॥
 तातैं तुरतहि जरा देह तेरीमहँ आवै ।
 भोगि सके नहि भोग अनृतको अब फल पावै ॥
 नृप बोले—तब सुतातैं, ब्रह्मन् ! तृप्ति भई नहीं ।
 उभय ओरतैं विषयकी, इच्छा अबहि गई नहीं ॥

मुनि प्रसन्न पुनि भये भूपतैं बोले बानी ।
 नृपवर ! मनकी बात तुम्हारी सब हौं जानी ॥
 जाओ अपनी जरा बदलि तनयनितैं लेओ ।
 सुतको यौवन पाइ जथा रुचि विषयनि सेओ ॥
 राजा बोले—जरा जो, स्वीकारे मेरो तनय ।
 पावै सो सम्राट पद, जगमहँ यश कीरति विजय ॥

एवमस्तु मुनि कही बिहँसि नृप पुरमहँ आये ।
 पाँचहुँ प्यारे पुत्र प्रेमतैं पास बुलाये ॥
 शुक्र शापकी बात बताई यौवन माँग्यो ।
 यदु, अनु दुर्बसु, द्रुह्यु सुनत बच सरसम लाग्यो ॥
 चारिहुँ ही पितृवचन सुनि, वय दैवतैं नटि गये ।
 छात्रधर्मतैं शाप दै, अष्ट भूपने करि दये ॥

पुत्र पुरुतैं भूप अन्तमहँ माँग्यो यौवन ।
 सुनि सुत बोल्यो—पिता तुम्हारोई सब तन मन ॥
 यों कहि यौवन दयो जरा भूपतिकी लीन्हों ।
 अति प्रसन्न पितृ भये हरषि आशिष बहु दीन्हों ॥
 बोले नृप गम्भीर है, पुत्र शब्द कीयो सफल ।
 बनहु चक्रवर्त्ती तुमहि, लहो जगतमहँ यश विपुल ॥

यों सुत यौवन पाइ भोग भोगे संसारी ।
 तोऊ तृप्ति न भई चित्त अति भयो दुखारी ॥
 भयो विषय बैराग्य बिचारें नहिँ सुख पायो ।
 बनि विषयनिको दास समय सब व्यर्थ गँवायो ॥
 तृप्ति करि सकें विषय ये, विषय ग्रस्त नरकूँ नहीं ।
 शान्त होहि कहु प्रज्जलित, अग्नि बिन्दु घृततैं कहीं ॥

राग द्वेषतैं रहित शान्त नर होवै जवहीं ।
 समदरसीकूँ होहिँ दशहु दिशि सुखमय तबहीं ॥
 तृष्णा दुखको मूल सहज गुन सब ही खोवै ।
 बूढ़ो होहि शरीर न तृष्णा बूढ़ी होवै ॥
 पावै सत् सुख तबहिँ जब, होवै विषयनितैं विरत ।
 जो सुख चाहै जगतमहँ, तृष्णाकूँ त्यागै दुरत ॥

ज्येष्ठा श्रेष्ठा होहि पूजनीया हू नारी ।
 युवती होवै बहिन मातु पुत्री अति प्यारी ॥
 तबहू है एकान्त न बैठे इनके संगमहँ ।
 सावधान नित रहै सटावै अँग नहिँ अँगमहँ ॥
 प्रबल प्रचण्ड पिशाच सम, यह इन्द्रिय समुदाय अति ।
 होवै सम्मुख विषय लखि, पंडितहूकी भ्रष्ट मति ॥

नृपति ययाति बिचार करें—हा ! पाप कमायौ ।
 पायौ दुरलभ देह भजन त्रिनु व्यर्थ गँवायौ ॥
 सुतको यौवन लयो भोग भोगे निशि बासर ।
 तोऊ तृप्ति न भई लख्यो नहिँ सुखमय अवसर ॥
 तातैं अब सब त्यागिकें, तप हित बनमहँ जाउँगो ।
 विषयाशा तजि भक्तितैं, चित हरिमाहिँ लगाउँगो ॥

यों करि पश्चात्ताप पुरु सुत तुस्त बुलायो ।
 यौवन दैकें लई जरा बहु त्रिवि समुझायो ॥
 सबकुँ दीयो राज पुरु सम्राट बनाये ।
 राज पाट सब त्यागि गये बन मन हरषाये ॥
 करै बोंसला त्याग ज्यों, पत्नी परके जमत ही ।
 त्यों विरागमें विरत है, बन गमने नृप तुस्त ही ॥

घोर तपस्या करी चित्त भगवतमहँ लाग्यो ।
 त्रिभुवन व्यापी कीर्ति अंतमहँ नृप तनु त्याग्यो ॥
 गये स्वरग तर अहँकारतैं, गिरि भुवि आये ।
 करि सज्जन सत्संग फेरि हू स्वरग सिधाये ॥
 सब लोकनिके भोगि सुख, करी नहीं तिनमहँ रती ।
 पहुँचे पुनि बैकुण्ठ नृप, पाई भागवती गती ॥

इति श्रीभागवतचरितके चतुर्थाहमें यथातिचरित नामक
 उन्तालीसवौ अध्याय समाप्त । °

अथ चत्वारिंशत्तमोऽध्यायः

[४०]

नृप ययाति लघु पुत्र पुरु को वंश सुनाऊँ ।
जन्मेजय तिनि पुत्र भये तिनि कुल यश गाऊँ ॥
चौदहपीढ़ी माँहि भये दुष्यन्त भूपवर ।
परम यशस्वी वीर शत्रुजित वंश यशस्कर ॥
भयो वर्ष जिनि नामतैं, भरत तनय तिनके भये ।
देववधूटी मेनका, हुता प्रेममहँ पंसि गये ॥

मृगया हित नृप गये सेन सजि निरजन बन महँ ।
सिंह व्याघ्र मृग मारि श्रमित हूँ सोचैं मनमहँ ॥
ऋषि आश्रम इत होहि मिटाऊँ श्रम तहँ जाई ।
कण्वाश्रम तब दिव्य दूरितैं दयो दिखाई ॥
राज चिह्न तजि चले नृप, ब्राह्मी श्री लखि है चकित ।
खग मृग सेवित पुष्पफल—युत आश्रम शोभा लखत ॥

होहि हवन कहूँ साम बैठि बटु सस्वर गावैं ।
नाचैं केकी कहूँ कहूँ मृग पूँछ हिलावैं ॥
कौई समिधा कुशा पुष्प फल लैकैं आवैं ।
कौई बल्कल बस्त्र उटजपै डारि सुखावैं ॥
तरुछायामहँ बैठि मृग, करहि जुगार खुजाइ तन ।
आश्रम शोभा निरखिकैं, भयो भूपको मुदित मन ॥

कहो भूप—को यहाँ ? सुनत इक युवती आई ।
 सहज सुन्दरी निरखि नृपहिं मनमहँ सकुचाई ॥
 लज्जातैं सिर नाइ अरघ दै आसन दीन्हों ।
 करे भेंट फल फूल यथाविधि स्वागत कीन्हों ॥
 करि स्वागत स्वीकार जच, नृप परिचय पूछन लगे ।
 कह्यो सुता हँ कण्वकी, पूछें नृप ऋषि पितु सगे ॥

कण्व न कीयो ब्याह भई पुत्री तुम कैसें ।
 सखी कहे—नृप कहूँ सुता मुनिकी यह जैसें ॥
 विश्वामित्र महर्षि करें तप डरप्यो सुरपति ।
 करन तपस्था भंग पठाई सुरललना रति ॥
 परमसुन्दरी मेनका, रति सँग भेजी मुनि निकट ।
 डरपति पहुँची सुरवधू, करहिं जहाँ मुनि तप चिकट ॥

यौवन रूप निहारि भये मोहित मुनि शानी ।
 कीयो भोग विलास दिवस अरु निशा न जानी ॥
 भये चेत इक दिवस मेनका भागी डरिकें ।
 गई स्वरग एक सुता सुन्दरी वनमहँ जनिकें ॥
 कुलपति कन्या वन लखी, धिरी शकुन्तनितें विवश ।
 तातैं नाम शकुन्तला, धर्यो करी कन्या सरिस ॥

क्षत्रिय कन्या जानि नृगति मनमोहि सिहाये ।
 भूप कामवश भये नांतिके वचन सुनाये ॥
 मैं पौरव तुम कुशिकवंशकी राजकुमारी ।
 वरण करहु पति मोहिं प्रीति यदि होहि तुम्हारी ॥
 ब्राह्म, दैव, गान्धर्व अरु, राजस, आसुर, आर्ष वर ।
 प्राजापत्य विशाच यों, व्याह अष्ट संतानकर ॥


करि गान्धर्व विवाह होहु पत्नी तू मेरी ।
 सब विधि इच्छा करूँ सकल पूरन हौँ तेरी ॥
 राज पाट धन धाम वस्तु सब मेरी जो है ।
 देह, प्राण सर्वस्व आजतैं तेरी सो है ॥
 बोली सोचि शकुन्तला, यदि अधर्म है नहीं नृप ।
 करूँ बरन यदि ममतनय, होहि सकल भूको अधिप ॥

नृप स्वीकरो भयो ब्याह गान्धर्व तुरत तहँ ।
 पति पत्नी बनि गये निरत दोऊ रति सुखमहँ ॥
 मुनितनया तन अरपि अतिथिक्क अति सुख दीन्हों ।
 रज अरु वीये अमोघ गरम थापन नृप कीन्हों ॥
 भयो प्रात अति कष्टतैं, बिलग भये दोऊ विकल ।
 रति श्रम प्रिया त्रियोगतैं दोउनिके सब अँग शिथिल ॥

कण्वशापतैं हरपि प्रियातैं अनुमति माँगी ।
 महिषी समुक्ति त्रियोग दुःखतैं रोवन लागी ॥
 दै आश्वासन तुरत निकसि निज पुरक्क धाये ।
 इतनेमहँ फल पुष्प लिये कुलपति मुनि आये ॥
 तब शकुन्तला लाजवश, मुनि समीप आई नहीं ।
 सोचे—पितु होवें न रिस, पति परमेश्वरपै कहीं ॥

मुनि आश्वासन दियो ब्याह अनुमोदन कीन्हों ।
 पुत्रवती हो पुत्रि ! हरषि कुलपति वर दीन्हों ॥
 समय पाइके पुत्र जन्यो ऋषि मुनि हरषाये ।
 जाति करम संस्कार कण्व विधिवत करवाये ॥
 अति सुन्दर अति स्वस्थ सुत, लखि प्रमुदित सब जन रहैं ।
 करै दमन सिंहादिको, सबै दमन सब मुनि कहैं ॥

दोहा—नहीं नृपति आये बहुरि, मेज्यो नहिं संदेश ।
मुनि सोचें मेजें हमहिं, का पतिघर अंदेश ॥



कृष्ण—सुत शकुन्तला सहित पठाई पुनि पतिग्रह मुनि ।
दुखित निहारत चली खता, तरु, खग मृग पुनिपुनि ॥
कुलपति करुना करी हृदयतैं सुता लगाई ।
पितृग्रहतैं है बिदा, राजमहलनिमहैं आई ॥

सभा भवनमहैं आइकें, नृपकूँ निज परिचय दयो ।
सुनि अवाकं से रहे नृप अति, बिस्मय सबकूँ मयो ॥

राजा बोले—कौन कहाँकी है तू नारी ।
जान नहीं पहिचान बने तू बहू इमारी ॥
है शकुन्तला क्रुद्ध कहे—कायर तुम भूपति ।
करिके छल ब्योहार बनो अब इत भोरे अति ॥

करि गान्धवं विवाह बन, गर्भ कर्यो थापन तहाँ ।
कणाश्रममहैं जन्यो सुत, है समुपस्थित यह यहाँ ॥

पुनि शकुन्तला शपथ करी भूपति नहिं मानी ।
है निराश जब चली भई तब नभतैं बानी ॥
माता धारन करै पिताकी वस्तु कहावै ।
पति ही बनिकें पुत्र उदर जायाके आवै ॥

यह कुमार तुमरो तनय, भूप भरन जाको करो ।
पितर सहित पुं नरकृतै, पाइ जाइ सुखतैं तरो ॥

स्वीकार्यो सुत नृपति प्रजा अनुमोदन कीन्हो ।
जानि बूझिके भूप पुत्रअपनो नहिं चीन्हो ॥
सबकूँ भई प्रतीति निरखि सुत सबहिं सिहाये ।
घर घर मंगल भयो राजमहैं बजत बजाये ॥

सर्वदमन युवराज करि, नाम भरत नृपने घर्यो ।
भरत वंश जिनतैं चल्थो, जग उज्ज्वल यशतैं कर्यो ॥


भरत सरिस जग माँहिँ बीर को ज्ञानी दानी ।
 परम यशस्वी युद्ध क्षेत्रमहँ अति ही मानी ॥
 अगणित दीये दान अश्व, भू, रथ, गज, गोधन ।
 कीये रिपु बश बाह्य भीतरी मन इन्द्रिय गन ॥
 भोगे सब संसार सुख, तोऊ तुष्ट न नृम भये ।
 भोग सकल मिथ्या समुक्ति, उपरत तिनतैं ह्वै गये ॥

नृम विदर्भकी सुता सुंदरी राजदुलारी ।
 पत्नी तिनकी तीनि सुशीला अति सुकुमारी ॥
 तिनतैं जे सुत भये, भरत अनुरूप न माने ।
 त्यागे पत्नी वंश वितथ लखि नृम खिसिआने ॥
 भाभी ममता गर्भतैं, पैदा सुरु-गुरु कर्यो सुत ।
 त्यागि दियो पितु मातुने, मरुत उठायो शिशु तुरत ॥

दयो मरुत् गन लाइ भरतने सुत निज जान्यो ।
 पायो मरुत् प्रसाद वंश निज उज्ज्वल मान्यो ॥
 वितथ नामतैं ख्यात जगतगहँ भये भरतसुत ।
 त्यागि राज परिवार गये बन नरपति तप हित ॥
 बन शकुन्तला संगमहँ, रहैं करें तर रोकि मन ।
 मिथ्या समुक्ति प्रपंच सब, योग मार्गतैं तज्यो तन ॥

भये वितथके मन्यु पाँच सुत तिनके सुन्दर ।
 बृहत्ब्रत, जय, गर्ग, भये नर महावीर्यवर ॥
 नर सुत संकृति भयो तासु सुत द्वै जगभूषन ।
 प्रथम भयो गुरु रन्तिदेव दूसर निष्किञ्चन ॥
 विनु पुरुषारथ दैववश, मिलहि अयाचित जो अशन ।
 दै अभ्यागत अतिथिकूँ, पावैं ह्वै सन्तुष्ट मन ॥

रन्तिदेवके सरिस कौन नर जगमहैं दानी ।
 अतिथि हेतु निज लुधा पिपासा जिन नहिँ जानी ॥
 भये दिवस चालीस आठ त्रिनु पीये खाये ।
 उनन्वासवें दिवस स्वादयुत व्यंजन आये ॥
 जेमन बैठे कुटुम सँग, त्रिप्र वृषल चांडाल बनि ।
 यात्रा हरि हर अज करी, नृपति अन्न जल दयो सुनि ॥



हरषे तीनिहु देव देंन दुरलभ बर लागे ।
 हरिचरननि अनुराग त्यागि जगमुख नहिँ माँगे ॥
 साया भई त्रिलीन प्रेम प्रभु हियमहैं छायो ।
 नृप अनुयायी सबनि सहज ही परपद पायो ॥

ज्येष्ठ श्रेष्ठ सुत मन्युके, वृहत्क्षत्र भूपति भये ।
 रच्यो हस्तिनापुर जिननि, हस्ति सुघर सुत है गये ॥
 हस्ती सुत अजमीढ़ नील सुत शान्ति भये तिनि ।
 उनके पुत्र रुशान्ति पुरुज सुत अर्क लहे जिनि ॥
 अर्क पुत्र भरम्याश्व पुत्र मुद्गल द्विज तिनि की ।
 भई अहल्या सुता नारि मुनिवर गौतमकी ॥
 शतानंद तिनि तैं भये, पुत्र सत्यधृत तासुके ।
 शरद्वान सुत धनुर्बिंद, कृपाचार्य सुत जासुके ॥
 लखी उरवशी शरद्वान चित चंचलता अति ।
 भई काम बश वृत्ति तुरत सतधृति सुतकी मति ॥
 तनु तो रोक्यो किन्तु रुक्यो नहि रेत गिर्यो जहँ ।
 कुशा भाड़के मध्य भये सुत सुता प्रकट तहँ ॥
 लाये शन्तनु कृपावश, दोउनिको पालन कर्यो ।
 जानि विप्र संतान शुभ, नाम कृपी कृप नृप धर्यो ॥
 कुरुकुलके कृप भये सुतनिके शिक्षक घरमहँ ।
 युवती निरखी कृपी भई चिन्ता नृप उरमहँ ॥
 भरद्वाज-सुत आइ ब्याह की इच्छा कीन्हीं ।
 है प्रसन्न नृप कृपी द्रोणकूँ विधिवत दीन्हों ॥
 द्रोण वीर्यतैं कृपीमहँ, अश्वत्थामा सुत भये ।
 जगमहँ द्रोणाचार्य द्विज, वीर अग्रणी है गये ॥
 दिवोदास सुत भये भूप मित्रेयु च्यवन तिनि ।
 च्यवन कुमार सुदास भये सोमक आदिक उनि ॥
 सोमकके शततनय पृषदसुत छोटे सत्रतैं ।
 पृषद पुत्र नृप द्रुपद द्रौपदी तनया तिनतैं ॥
 धृष्टद्युम्न आदिक तनय, भये द्रुपदके जग बिदित ।
 शत्रुसेन धन दूरि करि, रवि सम रनमहँ है उदित ॥

हस्ती सुत अजमीढ़ नृपतिके ऋत्त अपर सुत ।
 तासु पुत्र संवरण तेज तप परम कीर्तियुत ॥
 नृप बडभागी परम सेन सँग मृगया हित बन ।
 गये प्रकृतिसौंदर्य निरखि प्रभुदित नृपको मन ॥
 लख्यो विशाल बराह बन, एकाकी पीछो कियो ।
 दौरत ठोकर खायकें, गिर्यो तुरत हय मरि गयो ॥

पाँइ पियादे अश्वहीन नृप बनमहँ डोलें ।
 परम मनोहर प्रान्त मधुर सुर शुक पिक बोलें ॥
 शीतल मंद सुगंध पवन बहि सुख उपजावें ।
 हरित दूब इल नीर निरखि नृप नयन जुड़ावें ॥
 निरखी निभृत निकुञ्जमहँ, नारी नयनानन्दिनी ।
 करत प्रकाशित प्रान्तकूँ, कनकलता सम कामिनी ॥

निरखि भये आसक्त देहकी मुधि त्रिसराई ।
 मूर्छित भूपति लखे सुन्दरी नृप ढिँग आई ॥
 समुझाय बहु भाँति कहें संवरण—भामिनी ।
 तीनिलोकमहँ लखी नहीं तव सरिस कामिनी ॥
 मोहि वचाओ कामतैं, मारहि शर घायल करहि ।
 अपनाओ यदि मोई तुम, तो यह अरि डरिकें भगहि ॥

बोली तपती—नृपति ! मोइ रबि तनया मानों ।
 कन्या जनक अधीन होहि तुम सब कछु जानों ॥
 करो याचना जाइ दान यदि पितु दे देवैं ।
 तो हम तुम मिलि धर्मयुक्त कामहि नित सेवैं ॥
 यों कहि अन्तरहित भई, नृप पुनि मूर्झातैं जगे ।
 तपती हित उपवास व्रत, दृढ़ जप तप करिबे लगे ॥

गुरु बशिष्ठ रश्मि निकट गये बिनती बहु कीन्हीं ।
 माँगी तपती हरषि सूर्य नृप हित दै दीन्हीं ॥
 विधिवत कश्यो विवाह भयं दोऊ अति प्रमुदित ।
 प्रिया प्रेममहँ फँस्यो संवरण भूगतिको चित ॥
 रानी तपती गर्भतै, भये पुत्र कुरु जग विदित ।
 कुल कौरवके नामतै, भयो पुत्र तिनि पराक्षित ॥

सुधनु जह्नु निषधाश्व तानि सुत औरहु तिनके ।
 रहे प्रथम सुतहीन सुहांत्र हु भयं सुधनुके ॥
 च्यवन सुहोत्र कुमार च्यवनक कृता भय सुन ।
 कृती पुत्र बसु नृपति उपरिचर अष्ट सिद्धि युत ॥
 सुरऋषि बाद विवादमहँ, पक्षपात नृपने कियो ।
 क्रुद्ध भये ऋषि भूपकूँ, पतन शाप मिलिकें दियो ॥

स्वर्गच्युत हूँ भूमि-विबरमहँ बसहि उपरिचर ।
 नारायणको मंत्र जपै पूजामहँ तत्पर ॥
 नारायणको नाम निरन्तर नित-नित गावैं ।
 नारायणको ध्यान करै तन्मय हूँ जावैं ॥
 नारायण आज्ञा दई, गरुड़ शाप मोचन कश्यो ।
 नारायणने नृपतिको, ताप शाप सबई हर्यो ॥

बसुके चेदि नरेश बृहद्रथ तिनि कुशाग्र सुत ।
 तिनिके सुत नृप ऋषभ ऋषभके पुत्र सत्य हित ॥
 नृपति बृहद्रथ अपर नारि द्वै भाग देहके ।
 जने मृतक लखि तुरत फिँकाये निकट गेहके ॥
 जरा नामकी राक्षसी, भाग उभय जोरे जबहिँ ।
 जीव-जीव कहिबे लगी, उठि रोयो सो शिशु तबहिँ ॥

जरासन्ध अति बली भयो नृप सेवें पदरंज ।
 जातें डरि रणछोड़ द्वारका भगे त्यागि व्रज ॥
 तासु पुत्र सहदेव भये सोमापि तासु सुत ।
 श्रुतश्रवा तिनि तनय चेदि कुत्त भूषण रणजित ॥
 कुरुसुत तीसर जह्नुकं, पौत्र बिदूरथ है गये ।
 तिनिकी नौमी पीढ़िमहँ, नृप प्रताप भूपति भये ॥
 नृप प्रतापके तीनि तनय देवापि बड़े सुत ।
 गय राज तजि नृपति भये शन्तनु शोभायुत ॥
 परसैं करतैं जाहि शान्ति पावैं सो प्राना ।
 जानि अग्रभुक् इन्द्र नहीं बरमायो पाना ॥
 भोजि सचिव षड्यन्त्र करि, बेद भ्रष्ट अग्रज कश्यो ।
 तब सुरपति बरषा करी, यों नृप सबको दुख हश्यो ॥
 शल अरु भूरिश्रवा भूर बह्मक नृगनिसुत ।
 शन्तनुकं सुत भाष्म भय बसु ज्ञाना श्रयुत ॥
 पितु प्रसन्नता हेतु प्रतिज्ञा दुष्कर कान्हीं ।
 संतति सुख ऐश्वर्य भोग इच्छा तजि दान्हीं ॥
 नहीं पुत्र तोऊ सकल, द्विजं तरपन नित प्रति करैं ।
 होहि जगतमहँ यशस्वी, जो पितु आयमु भिर धरैं ॥
 सोरठा—चर्यौ बसु लायो जन्म, शौनक मुनि शंका करो ।
 सुनो कथाको मरम, कहैं सुन, मुनिवर कहूँ ॥
 छप्पय—वसुगण इक दिन जान रहे नभमहँ है प्रमुदित ।
 मुनि बशिष्ठ मग मिले भूलि नहिँ करा दण्डवन ॥
 निरखि अवज्ञा क्रोध ब्रह्मसुत तनिपै कान्हों ।
 जनमो भूपै सकल शाप तिनि सबकुँ दान्हों ॥
 ते ई गंगा गरभतैं, नृप शन्तनुके सुत भये ।
 जनमत फेंके सात सुत, एक भाष्म ही बचि गये ॥

५१६ श्रीभागवत चरित, चतुर्थाह अध्याय ४०
 गंगा जननी करयो भीष्मको पालन बनमहँ ।
 शन्तनुकू पुनि दये पाइ सुत हरषित मनमहँ ॥
 लाइ करे युवराज राजमहँ चहुँदिशि मंगल ।
 शन्तनु नृप इक दिवस गये मृगया हित जंगल ॥
 बहु हिंसक पशु बध करे, पहुँचे नृप यमुना जहाँ ।
 लखी पार पथिकनि करत, दाशराज कन्या तहाँ ॥
 जिनतैं कीन्हें प्रकट पराशर व्यास महासुनि ।
 योजनगंधा तुरत भई कन्या सुनि जनि पुनि ॥
 लखि कन्या सौन्दर्य नृपति अतिशय हरषाये ।
 कन्या याचन हेतु दाशपतिके ढिँगा आये ॥
 नृप प्रस्ताव निषाद सुनि, हरषित ह्वै बोल्यो बचन ।
 सत्यवती त होहि सुनृप, देहुँ करहिं यदि आप प्रन ॥



शन्तनु भये उदास लौटि निजपुरमहँ आये ।
 निज पितु इच्छा जानि कुँवर केवटढिँग धाये ॥
 समुक्ति दाशपण भीष्म प्रतिज्ञा दारुण कीन्हौ ।
 त्यागो पद युवराज सीख सब जगकूँ दीन्हौ ॥
 जीवन भर क्यारे रहे, पितु प्रसन्नताके निमित्त ।
 सत्यवतीके गरभतैं, द्वै शन्तनुके भये सुत ॥

चित्राङ्गद नृप भये हते गन्धर्वराज रन ।
 दूसर कुँवर विचित्रवीर्य नृप करे प्रजागन ॥
 काशिराजकी सुता तीनि हरि लई दुलारी ॥
 शन्तनु लघु सुत संग बिबाही उभय कुमारी ॥
 बोली अम्बा भीष्मतैं, बरे शाल्व मैंने प्रथम ।
 धर्म जानि पठओ तहाँ, इच्छा पूरन करहु मम ॥

अम्बा इच्छा जानि शाल्व ढिँग भीष्म पठाई ।
 कन्याने निज प्रीति बिबशता नृपहिँ जनाई ॥
 बल अभिमानी शाल्व कहै—पर बिजित कुमारी ।
 करूँ ग्रहण तो होहि जगतमहँ हँसी हमारी ॥
 अति अनुनय अम्बा करी, घुड़कि कहै नृप-च्यौ बकै ।
 अपर गृहीता नारिका ? नृप पटरानी बनि सकै ॥

ह्वै निराश बनमाँहिँ लौटि अम्बा तब आई ।
 बिलखि-बिलखि निज बिपतिकथा सब मुनिनि सुनाई ॥
 दैवयोगतैं परशुराम मुनिवर तहँ आये ।
 सुनि अम्बा वृत्तान्त राम जल नयननि छाये ॥
 अम्बाके हित भीष्मतैं, परशुराम लड़िवे चले ।
 शुभांगमन मुनि सुनि तुरत, हरषि भीष्म गुरुतैं मिले ॥

करिबे अम्बा ग्रहण भीष्मतै राम कही परि ।
 मानी नहिँ जब बात कही मुनि—आ मोतैँ लरि ॥
 भयो युद्ध घनघोर देवव्रत परि नहिँ हारे ।
 भये राम संतुष्ट सकुचि बनमाँहि सिधारे ॥
 अम्बा बनिकेँ शिखंडी, भीषमतैँ बदलो लयो ।
 नृप बिचित्र आसक्त अति निज रानिनिमहँ हँ गयो ॥

भयो रोग क्षय पुत्र हीन नृप स्वर्ग सिधारे ।
 माता सुमिरन करे व्यामसुनि तुरत पधारे ॥
 कुरुकुलको क्षय जानि व्यामतैँ करवाये सुत ।
 अंध भये धृतराष्ट्र पांडु अरु बिदुर नीतियुत ॥
 पुत्रवती रानी लक्ष्मी, भये हृदय सबके हरे ।
 शन्तनु सुतने सब तनय, पालि पोसि समरथ करे ॥

अंध न राजा होहि बिदुर दासीके जाये ।
 तातैँ मझिले पांडु प्रजाने भूप बनाये ॥
 अंध-कुमर धृतराष्ट्र संग व्याही गान्धारी ।
 जानि अंध पति कबहुँ स्वयं नहिँ बस्तु निहारी ॥
 पति समान अन्धी भई, नयननि पट्टो बाँधिकेँ ।
 बिपुल कीर्ति जगमहँ लही, यों अखंड व्रत साधिकेँ ॥

एक सुता शत पुत्र जने गान्धारी रानी ।
 दुर्योधन जिनिमाँहि ज्येष्ठ अतिशय अभिमानी ॥
 कौरव सबकुँ पांडुसुत पाँचहु पाण्डव ।
 अर्जुन हरिके सखा जरायो जिन बन खाण्डव ॥
 भारतमहँ कौरव मरे, पुत्र मित्र बान्धव सहित ।
 कुन्ती माद्रीमहँ भये, पाँच पांडु के अमरसुत ॥

भये धरमतै' धरमराज बृकउदर बायुतै' ।
 पार्थ इन्द्रतै' जने पृथाने परम चावतै' ॥
 नकुल और सहदेव अश्विनीकुमर मिषक्वर ।
 मार्द्रतै' उत्पन्न करे दोऊ सुत सुन्दर ॥
 पाँचहुँकी पत्नी भई, द्रुपदसुता अति सुन्दरी ।
 पूर्व जन्मको वृत्त सुनि, आपति काहू नहिं करी ॥
 धर्मराज प्रतिबिन्ध्य पुत्र तामें प्रकटायो ।
 भीम पुत्र अतसेन द्रौपदीदेवी जायो ॥
 अर्जुनतै' श्रुतिकर्ति नकुलतै' सतानीक सुत ।
 श्रुतकर्मा सहदेव तनय अति भये धरमयुत ॥
 अश्वत्थामा सबनिके, काटे सिर सोवत शिबिर ।
 अनव्याहे सबही मरे, चलयो बंश तिनको न फिर ॥
 धर्मराजकी पत्नि पौरवातै' सुत देख ।
 भीम घटोत्कच कश्यो हिडिम्बामहँ सुत सेवक ॥
 दूसरि कालीमाहिं सर्वगत सुत प्रकटाये ।
 श्रीसहदेव सुशोत्र कुमर विजयाने जाये ॥
 नकुल करेणुमती उदर—तै' कीन्हें नरमित्र सुत ।
 अर्जुन रानो तीनितै', भये तीनि सुत विनययुत ॥
 दोहा—पुत्र घटोत्कच भीमके, भये हिडिम्बा माहि' ।
 कहूँ कथा सन्धेपमहँ, सब प्रसंग मिलि जाहि' ॥
 छप्पय—लक्ष्मागृहतै' भागि राहन बन आये पाण्डव ।
 लखि हिडिंबने बहिन हिडिंबा तहँ पठई तब ॥
 मारन आई स्वयं भीम लखि भई बिमोहित ।
 जान्यो भाव हिडिम्ब भामतै' मिड़यो क्रूरचित ॥
 द्वंद्युद्ध भीषण भयो, भिड़े भीम नहिं भय कश्यो ।
 यातुधानको बल घट्यो, मरि धरनीपै गिरि पश्यो ॥

करी हिडम्बा बिनय दया कुन्तीकूँ आई ।
 आयसु दीन्हों भीम राक्षसी बहू बनाई ॥
 ताहातै सुत भयो घटोत्कच अति बलशाला ।
 इन्द्र-दत्त जो शक्ति कर्णकी कीन्हों खाला ॥
 अर्जुन बध हित सुरक्षित, रखा कर्णेने यत्न करि ।
 बीर घटोत्कचकें लगा, लगत भूमिपै पश्या मरि ॥

इरावान सुत जन्यो उलूपातै अरजुनने ।
 दई पुत्रिकाधर्म सहित मणिपुरनरेशने ॥
 सुता व्याहि प्रण कश्यो पुत्र जो पुत्रा जावै ।
 सो हांवै युवराज हमारा पुत्र कहावै ॥
 तासु गर्भतै अति बली, पुत्र बभ्रुवाहन भयो ।
 लखि रण कौशल जासुको, विस्मित अरजुन है गयो ॥

अश्वमेधको अश्व बभ्रुवाहनने पकश्यो ।
 रनको बानो पहिन पितातै लड़िबे निकश्या ॥
 अति ई भाषण युद्ध भयो पितु सुततै हाश्यो ।
 सुनी मातु जिह बात पुत्रने मम पति माश्यो ॥
 अति बिलाप पनि हित कश्यो, आई उलूपा समरमहँ ।
 मणितै पति जीवित करे, गय पार्थ निज नगरमहँ ॥

रचवायो अति स्वाँग सूत्रधर सखा कृष्णने ।
 हरी सुभद्रा जाय द्वारकामहँ अरजुनने ॥
 तिनके सुत अभिमन्यु बीरगति भारत पाई ।
 नारि उत्तरा गर्भवती हरि चरननि आई ॥
 तातै जनमे भागवत, देवरात नृप पराक्षित ।
 सुर-तरु सम पूरन करहिँ, प्रजा मनोरथ धरमवित ॥

भूप भागवत भये अंतमहँ भये भक्तियुत ।
जनमेजय श्रुतसेन भीम अरु उग्रसेन सुत ॥
जनमेजय जो ज्येष्ठ भये सुत शतानीक तिनि ।
पञ्चिस पीढ़ीमाँहिँ भये क्षेमक भूपतिमनि ॥

क्षेमक ही जा वंशके, सबतें अंतिम नृप भये ।
कलि प्रभावतैं शुद्ध कुल, छिन्न भिन्न अब है गये ॥

। इति श्रीभागवतचरितके चतुर्थाहमें पुरुवंश वर्णन नामक
चालीसवाँ अध्याय समाप्त ।



अथ एकचत्वारिंशत्तमोऽध्यायः

[४१]

नृप ययातिके भये पुत्र चौथे जो नरपति ।
 तिनि अनु को अबवंश सुनहु जो है पावन अति ॥
 भये सभानर, चहु परोक्षहु अनुसुत रत्नजय ।
 पुत्र सभानर भये कालनर तिनि के सृञ्जय ॥
 जनमेजय सृञ्जय तनय, महाशील तिनि पुत्र बर ।
 महामना तिनि के तनय, तिनितैं नृपवर उशीनर ॥

बनिकें अग्नि कपोत उशीनर नृप ढिँग आये ।
 शक्र श्येन धरि रूप भूषकूँ बचन सुनाये ॥
 यह कपोत आहार हमारो जाकूँ त्यागो ।
 नृपति कहैं—तजि जाहिं, और चाहैं जो माँगो ॥
 माँग्यो नृपतनमांस जब, हरषि कश्यो तन समरपन ।
 कृष्ण धैर्यतैं करैं वश, लह्यो अन्तमहँ भक्तिधन ॥

तिनि के सुत शिबि भये क्रोधजित धैर्यवान अति ।
 माँग्यो द्विज सुत—मांस दयो हरषित हूँ भूपति ॥
 लैन परीक्षा महलमाँहि द्विज आगि लगाई ।
 तनिक न बिचलित भये बात द्विज शीश चढ़ाई ॥
 आये अज द्विज बेष धरि, लई परीक्षा कठिन अति ।
 मृतक पुत्र जीवित भयो, शिबि नरपतिकी बिमल मति ॥

भये चारि ' शिवितनय पिताके सम तेजस्वी ।
 वृषादर्भ कैकेय सुवीरहु मद्र यशस्वी ॥
 नृपति तितित्त सुशील उशीनर नृप लघुभ्राता ।
 पुत्र उशद्रथ भये हेम सुत तिनि सुख दाता ॥
 हेमपुत्र सुतपा भये, सुतपा सुत बलि जग बिदित ।
 राज पाट धन धान्य पशु, सुख सब किन्तु न एक सुत ॥

भूपति बलि सुत बिना रहें मनमहँ अति चिन्तित ।
 सूँ नहीँ उपाय नृपतिकूँ सुत हितममुचित ॥
 गंगातटपै बैठि बात नृप मनमहँ आई ।
 द्विजतैं सुत करबाहुँ नाव इक दर्ई दिखाई ॥
 दीर्घतमा तामें बँधे, पड़े तपस्वी अन्ध मुनि ।
 नाव पकरि तटपै करी, भये मुदित मुनिनाम सुनि ॥

दीर्घतमातैं भये नृपति सुत क्षेत्रज सुखकर ।
 अंग बंग अरु कलिँग सुह्य अरु पुण्ड अन्धवर ॥
 निज निज नामनि पूबदेशमहँ थापित कीन्हें ।
 दासीसुत मुनि दीर्घतमा निज सुत करि लीन्हें ॥
 अङ्गराज खनपानसुत, दिबिरथसुत तिनके अधिप ।
 तिनके सुत नृप धरमरथ, पुत्र चित्ररथ भये नृप ॥

रोमपादहू नाम न तिनके कोई सन्तति ।
 शान्ता कन्या दर्ई मित्र लखि दशरथ भूपति ॥
 बिप्रनिको अपमान कर्यो नहिँ सुरपति बरसेँ ।
 भीषण पश्यो अकाल अन्न बिनु सब जन तरसेँ ॥
 भये चित्ररथ दुखित अति, सम्मति मन्त्रिनितैं करी ।
 कौन पापतैं घोर यह, बिपदा हम सबपै परी ॥

बोले द्विज—यदि ऋष्यशृङ्ग मुनिवर पुर आवें ।
 तो सुरपति अविलम्ब राजमहँ जल बरसावें ॥
 मुनि आगमन उपाय बतायो सब मिलि मंत्रिनि ।
 ऋषि कुमार तप निरत न निरखी नारी नयननि ॥
 यदि प्रमदाको मुख कमल, निरखैं तो फँसि जायँगे ।
 रूपाकर्षन डोरिमहँ, बँधे बिवश है आयँगे ॥

मानी सम्मति नृपति बारबनिता बुलवाईं ।
 मुनि मोहनकी बात सुनी सबई वचवाईं ॥
 बोली वेश्या वृद्ध—प्रभो ! यदि आज्ञा पाऊँ ।
 ता छल बल करि ऋष्यशृङ्ग मुनिवरकूँ लाऊँ ॥
 सब सामग्री सौँपि नृप, वेश्याकूँ आयसु दई ।
 ठगिनी तनया दास सँग, चढ़ि नौकापै चलि दई ॥

वीर्य बिभाण्डक पान नीर सँग हरिनी क्रीयो ।
 जन्यो शृङ्ग सिर पुत्र नाम शृङ्गी धरि दायो ॥
 विषयनितै अनभिज्ञ बृत्ति तपमाँहिँ लगाई ।
 नारि न कबहूँ लखी करन छल वेश्या आई ॥
 परमसुन्दरी षोडशी, लखि समुक्ते मुनि तपोधन ।
 आलिङ्गन छलतै कर्यो मोहित मुनिको कर्यो मन ॥

अति भोरे सब बात कपट बिनु पितुहिँ बताई ।
 समुक्ति गये मुनि यहाँ कामिनी कुलटा आई ॥
 सुत समुक्तायो वत्स ! न मुनि खल तोहिँ भुलायो ।
 अब करियो मत बात असुर माया करि आयो ॥
 पितु आयुस मानी नहीं, दशा अनोखी सी भई ।
 घायल करि शर सैनतैं, ठगिनी ठगिकें लै गई ॥

मुनि सुतके छिपि पास बारबनिता पुनि आई ।
 नौकापै ले गई नाव पुनि तुरत चलाई ॥
 गावति रसमय गीत नृत्य करि बाद्य बजावति ।
 अंग देश लै गयी चितमहँ अति हरषावति ॥
 ऋष्यशृङ्ग 'पहुँचे जबहिँ', राज्यमाँहिँ बरषा भई ।
 भये सुखी सब प्रजागन, बिपति भूतिनी भगि गई ॥

शान्ता कन्या संग व्याह मुनि सुतको कीन्हों ।
 सुकुमारी लहि बहू जगत-सुख मुनि अब चीन्हों ॥
 कोप विभाण्डक कश्यो रोषतै नृप पुर आये ।
 बहु स्वागत नृप कश्यो बहू सुत पैर गिराये ॥
 पुत्रबधू सँग पुत्रकूँ, लखि मुनिवर लटटू भये ।
 उड्यो क्रोध कर्पूर सम, पुत्र बधूकूँ बर दये ॥

ऋष्यशृङ्ग मुनि गृही बने बहु मख करवाये ।
 दशरथ अरु नृप रोमपाद जिनि तै सुत पाये ॥
 रोमपादके भये पुत्र चतुरङ्ग अमानी ।
 दशवीं पीढ़ी भये कर्ण कुन्ती तै दानी ॥
 सुनं ययाति अनु-वंशमहँ, भये धरमयुत भूप सब ।
 कह्यो वंश अनु पुरुको, कहँ द्रुह्युको वंश अब ॥

नृपति द्रुह्यु सुतबभ्रु बभ्रु सुत सेतु जिनहिँ तै ।
 सेतुपुत्र आरव्य भये गान्धार तिनहुँ तै ॥
 चौथी पीढ़ी माँहिँ प्रचेता भये शक्तियुत ।
 तिनतै अति बलवान भये तेजस्वी शत सुत ॥
 उत्तर दिशिके भूप ये, म्लेच्छनिके राजा विदित ।
 अब तुर्बसको सुनहु कुल, जो ययातिके द्वितिय सुत ॥

तुर्बसुके सुत बह्वि बह्विके भर्ग भूमिपति ।
 भानुमान् तिनि तनय त्रिभानुहु तिनि सुत दृढमति ॥
 नृप त्रिभानुके तनय करन्धम भूप मनस्वी ।
 मरुत नृपति तिनि पुत्र यज्ञ करि भये यशस्वी ॥
 पुरुवंशी दुष्यन्ताकूँ, गोद लयो परि लोभ वश ।
 निजकुलमहँ पुनि मिलि गयो, बढ्यो न पुनि तिनि बंशयश ॥

इति श्रीभागवतचरितके चतुर्थाहमें अनुवंश वर्णन नामक
 इकतालीसवाँ अध्याय समाप्त ।

अथ द्विचत्वारिंशत्तमोऽध्यायः

[४२]

यदुनन्दनके पाद पद्ममहँ शीश नवाऊँ ।
 अब ययातिके ज्येष्ठ पुत्र यदु-वंश सुनाऊँ ॥
 भये चारि यदुपुत्र सहस्रजित, क्रोष्ठा, रिपु, नल ।
 नृप सहस्रजित पुत्र भये शतजितहु अमितबल ॥
 शतजितके सुत मङ्गाहय, हैहय दूसर बेगुहय ।
 हैहय कुल बलवान अति, करी जिननि दश दिशिबिजय ॥

हैहय नृपतै भये आठवीं पीढ़ी अरजुन ।
 कार्तवीर्य अति बली, सहस्रभुज सिद्ध सर्वगुन ॥
 दत्तकपातै सिद्धि सहस्रसुत सब सुख पाये ।
 परशुरामतै सुतनि संग मरि स्वरग सिधाय ॥
 सहस्रानमहँतै पाँच सुत, बचे जयध्वज मधु बृषभ ।
 सूरसेन ऊजित नृपति, सुनहु जयध्वज कुल ऋषभ ॥

तालजङ्ग तिनि पुत्र भये तिनिये हू शत सुत ।
 बीतिहोत्र ही बचे शेष लरि मरे शक्तियुत ॥
 बीतिहोत्रके पुत्र भये मधु बृष्णि भयं तिनि ।
 माधव अरु बाष्पेय नामतै पालहिं देशनि ॥
 क्रोष्ठा यदुके द्वितिय सुत, बृजिनवान तिनिके तनय ।
 बृजिनवानके वंशकूँ, सुनहु विप्रगन है सदय ॥

चौथी पीढ़ीमाँहिं भये शशविन्दु योगिबर ।
 भोग, योग, ऐश्वर्य बसहिं जिनमहँ गुन सुखकर ॥
 दश सहस्र तिनि नारि कोटिदश सुत उपजाये ।
 जिनको बैभव देखि स्वर्गपति इन्द्र लजाये ॥
 पृथश्रवा तिनिके तनय, धर्मपुत्र तिनि श्रेष्ठतर ।
 उशना—उशनाके तनय, रुचक पञ्च तिनि सुत सुधर ॥

पुरुजित, पृथु, रुक्मेष, रुक्म व्यामघहु रुचकके ।
 व्यामघ छोटे नृपति न संतति कोई तिनके ॥
 शैब्या नृपकी नारि भूप निजवश करि लीन्हों ।
 संतति इच्छा रही व्याह डरि और न कीन्हों ॥
 सीमावत्ती भूपकी, कन्या हरि लाये नृपति ।
 रथासीन युवती लखी, बोली शैब्या कुपति अति ॥

कुहक ! कहाँतै सौति पकरि रथपै बैठाई ।
 डरिके बोले भूप—पतोहू रानी । आई ॥
 बोली रानी—बन्ध्या हौं च्यौं बात बनाओ ।
 कैसे मेरी होहि पतोहू मर्म बताओ ॥
 बोले नृप—भावी तनय, बने बधू बर सुर दियो ।
 गर्भवती शैब्या भई, सुत विदर्भ पैदा कियो ॥

कुश, क्रथ, नृपवर रोमपाद तीनिहुँ विदर्भ सुत ।
 क्रथकी पीढ़ी बीस माँहिं प्रकटे नृप सात्वत ॥
 सात्वतके भजमान, दिव्य, भजि, बृष्णि हु अन्धक ।
 देवावृध अरु महाभोज सातहुँ सुत धार्मिक ॥
 षष्ठ पुत्र भजमानके, देवावृधके बभ्रु सुत ।
 पिता पुत्र दोऊ परम, ज्ञानी तारक योगयुत ॥

महाभोजते भये भोजवंशी यादवगन ।
 वृष्णिवंश बाष्ण्येय कहावै यदुकुलनन्दन ॥
 वृष्णि तनय नृप भये युधाजित पौत्र वृष्णि पुनि ।
 सुत स्वफल्क तिनि पुत्र भये अक्रूर सरिस मुनि ॥
 अन्धक दशमी पीदिमहँ, उग्रसेन देवक भगत ॥
 देवकतनया देवकी, उग्रसेनको कंस सुत ॥
 नृप विदर्भकी सुता बिबाही उग्रसेनकूँ ।
 सुता प्रेमतै नृपति पठाये दूत लेनकूँ ॥
 मातु पिता घर जाय भई स्वच्छन्द दुलारी ॥
 सखियनि सँग सजि फिरै बनमहँ राजकुमारी ॥
 मदमाती पद्मावती, बिहरति ह्वै स्वच्छन्द जहँ ।
 धनददास गोभिल असुर, आयो घूमत फिरत तहँ ॥
 उग्रसेनको रूप धर्यो रानी बहकाई ।
 कर्यो कपट छल असुर कुमरि एकान्त बुलाई ॥
 थापन कीयो गर्भ जानि पीछे पछिताई ।
 आई महलनि तुरत पिता पतिघर पहुँचाई ॥
 कालनेमि आयो उदर; होनहार सो ह्वै गयो ।
 जन्यो पुत्र दश बरष महँ, असुर कंस सोई भयो ॥
 दो०—भोज वंशमें कंस खल, भयो दुष्ट अति क्रूर ।
 वंश विदूरथ को सुनो, भये पुत्र जिनि शूर ॥
 छप्पय—पुत्र चित्ररथ भये विदूरथ शूर तनय तिनि ।
 शूर तनय भजमान भये तिनिके सुत नृप शिनि ॥
 शूर मारिषा माँहिं जने दशसुत तेजस्वी ।
 तिनिमहँ सबतै बड़े भये बसुदेव यशस्वी ॥
 तिनिनी पत्नी त्रयोदश, भाग्यवती अति देवकी ।
 अजर अमर जगमहँ भई, जननी बनि हरिदेवकी ॥
 ३४

सुता शूरकी पाँच बहिन बसुदेव भूपकी ।
 पृथा सबनिमहँ वड़ी खानि जो रही रूपकी ॥
 कुन्तिभोजकूँ दई नृपति पुत्री करि लीन्हीं ।
 दुर्वासाने देव बुलावन बिद्या दीन्हीं ॥
 आवाहन रबिको कश्यो, मंत्र परीक्षा करन हित ।
 आये सम्मुख सूर्य जब, भयो कुँवरि चित संकुचित ॥
 दो०—हाथ जोरि कुन्ती कहे, छमहु देव मम दोष ।
 बाले रवि हूँ के विवश, मनमहँ राग न रोष ॥
 छप्पय—व्यर्थ आगमन होहि न मेरो तेरो अनहित ।
 थापन कीयो गर्भ भई कुन्ती अति लज्जित ॥
 करो प्रकट नहिँ वात जन्यो छिपिके सुन्दर सुत ।
 अति तेजस्वी बीर कवच पहिने कुंडलयुत ॥
 कन्या सुत अनुपम निरखि, लोक लाज बश डरि गई ।
 प्यायो पय मुख चूमिके, पुनि पुनि लखि व्याकुल भई ॥
 धरि मन्जूषामाँहि नदीमहँ बत्स बहायो ।
 चंबल, यमुना, गंग बहत चम्पारन आयो ॥
 अधिरथ पकरयो तुरत मुदित हूँ पुत्र बनायो ।
 राधाकूँ दै दयो कर्ण राधेय कहायो ॥
 पृथा बिबाही पाण्डुकूँ, पाण्डव जाके भये सुत ।
 श्रुतदेवातैं भयो खल, दन्तवक्र सुत पापयुत ॥
 केकयकूँ श्रुतकीर्ति बिबाही बूआ हरिका ।
 चौथी बूआ भई सुरानी अवन्तीशकी ॥
 श्रुतश्रवाने चेदिराज शिशुपालहु जायो ।
 मारि चक्रतैं कृष्णचन्द्र बैकुण्ठ पठायो ॥
 नौ चाचा भगवान् के, कछु मौसिनके पति भये ।
 कछु इत उततैं बहू लै, बेटावारे बनि गये ॥

शूर पुत्र बसुदेव बंशकूँ अबहौँ गाऊँ ।
 तेरह रानी हतीं सबनिके नाम गिनाऊँ ॥
 सुनहु रोहणी, इला, पौरबी अरु धृतदेवा ।
 भद्रा, मदिरा, देवरक्षिता अरु सहदेवा ॥
 शान्तीदेवा सुन्दरी, श्रीदेवा हु नामकी ।
 उपदेवा इन सबनिमहँ, सबतैं छोटी देवकी ॥

आठ सात दश एक सबनिके जनमे सुत बर ।
 आठ देवकी जने भये अष्टम श्री गिरिधर ॥
 जब जब होवै धरम नाश बाढ़ें अघ अतिशय ।
 तब तब लै अवतार करहिँ धरि धरम अभ्युदय ॥
 कौन कहि सके कौतुकी—के कारण अवतार को ।
 कौतुकबश क्रीड़ा करत, काज सरत संसारको ॥

जापै चितवन मधुर मंद मुसकानमयी है ।
 नयन पुटनितैं पान करन छबि सुधामयी है ॥
 कानन कुण्डल सुघर कपोलनि आनन दमके ।
 चक्षु रश्मिके परत सुदामिनि सम सो चमके ॥
 इकटक निरखहिँ नारि नर, मन अटकै चित चकित है ।
 परे' पलक व्यवधान तो, निमिकूँ कोसे' दुखित है ॥

जन्म अष्टमी पक्ष कृष्ण भादोंकी रजनी ।
 बिद्युत घनमहँ चमक उठै काँची जनु बजनी ॥
 पितुकुँ आज्ञा दर्ई गये गोकुल गिरिधारी ।
 नन्द यशोदा महल मनहुँ खिलि गई उजारी ॥
 गो गोपी अरु गोप गन, सँग नित हरि क्रीड़ा करहिँ ।
 असुर देहिँ दुख सबनिकूँ, हनि तिनकूँ जग-भय हरहिँ ॥

गोकुलतैं पुनि लौटि सबल मथुरामहँ आये ।
 डरि हरि रनकूँ छोरि भगे रनछोर कहाये ॥
 आइ द्वारका व्याह सहस सोलह करवाये ।
 पुत्र पौत्र बहु बड़े निरखि यादव गरबाये ॥
 करि कुलको संहार हरि, उद्धवकूँ शिचा दई ।
 यों प्रभासमहँ अन्तकी, पूरन भूलीला भई ॥

सो०—सब अवतारहि अंश, परिपूरनतम कृष्ण हैं ।
 कृष्ण चन्दको वंश, सुनि सुख पावें सकलजन ॥

इति श्रीभागवतचरितके चतुर्थाहमें यदुवंशवर्णन नामक
 बयालीसवाँ अध्याय समाप्त ।

(मासिक पारायण अठारहवें दिवसका विश्राम)
 इति चतुर्थाह समाप्त ।



अथ पञ्चमाह

अथ प्रथमोऽध्यायः

[१]

जय जय अखिल अनन्त अनामय अज अविनाशी ।
जय जय राधारमन गोप गोलोक निवासी ॥
जय मथुराधिप वासुदेव जय देवकिनन्दन ।
जय नन्दनन्दन दुष्ट निकन्दन जन-मनरञ्जन ॥
जय वृन्दावनचन्द्र जय, जय ब्रजवनितनि हृदयधन ।
जय रसमय गाऊँ चरित, तव चरननिमहँ रमहि मन ॥

कहत कहत हरिवंश भरयो शुक मुनिको हिय जब ।
सुधि बुधि तनकी भूलि भये अति प्रेम मगन तब ॥
अश्रुधार बहि गङ्ग धारकूँ अधिक बढ़ावै ।
कण्ठ भयो अवरुद्ध वचन मुखतें नहिँ आवै ॥
तनु पुलकित सब अँग शिथिल, रस सरिता में बहि गये ।
प्रभुपद मनमें बन्दिकें, ज्योंके त्यों ई रहि गये ॥

प्रभुचरननिकूँ बन्दि व्याससुत मौन भये जब ।
सुनि संचिप्त चरित्र बिकल ह्वै बोले नृप तब ॥
चन्द्रवंश रबिवंशमाँहिँ बहु भये भूप गन ।
सुनि शुभ तिनिके चरित मुदित अति भयो मोर मन ॥
अब अति रसमय सारमय, सुखमय अनुपम शक्तिमय ।
कृष्णचरित गुरुवर ! कहहु, हृदय होहि प्रभु शक्तिमय ॥

तनय रोहिणी देव ! प्रथम बलदेव बताये ।
 मातु देवकी पुत्र आठमहँ फेरि गिनाये ॥
 एक देहतै द्वै उदरनिमहँ जनमें कैसैं ।
 कहैं शेषकी कथा, भये संकर्षण जैसैं ॥
 घर तजि ब्रजमहँ दुबकिरैं, बसे अहीरनिवंश च्यौं ।
 च्यौं भागे रन छोड़िकैं, मारे मामा कंस च्यौं ॥

नंद यशोदा त्यागि फेरि च्यौं मथुरा आये ?
 च्यौं मथुरातैं बन्धु द्वारका लाइ बसाये ?
 च्यौं अति मधुमय चरित गोप गोपिनिहिं दिखाये ?
 च्यौं ब्रजमहँ नहिं लौटि यशोदानन्दन आये ?
 ब्रज मथुरा अरु द्वारका, महँ जो लीला करी हरि ।
 पावन परम प्रसङ्ग प्रभु, मोहिँ सुनावहिं कृपा करि ॥

सुनत परीक्षित प्रश्न महामुनि शुक हरषाये ।
 तनु अति पुलकित भयो अश्रु नयननिमहँ छाये ॥
 अति उत्कण्ठित चित्त नृपतिकी करें प्रशंसा ।
 धन्य धन्य अभिमन्युतनय कुरुकुल अवतंसा ॥
 सफल जन्म भूपति भयो, कृष्ण चरनमहँ भई रति ।
 अन्त समय हरि कथामहँ, उमग्यो अस अनुराग अति ॥

राजन् ! हरि की कथा गङ्ग सम सबकूँ तारै ।
 जो पूछै जो सुनै प्रेमतैं जो उच्चारै ॥
 मज्जन, दरशान, परश, बालु, मिट्टी अथवा जल ।
 नाम श्रवन गुन कथन सबहिँ मेटें मनके मल ॥
 अथवा नियमित देशमहँ, ही श्रीगङ्गाजी बहहिं ।
 किन्तु कथा मन्दाकिनी, नर सबई थल पै लहहिं ॥

अब नृप ! उत्तर देहुँ करे जो प्रश्न जगत हित ।
 प्रभु अवतार निमित्त कहहुँ चित करहु समाहित ॥
 वाढ़े भूपै असुर बेष भूपतिको धारें ।
 करे यथेच्छाचार साधु गो विप्रनि मारें ॥
 प्रकटे अगनित असुरगन, अवनि अधिक पीड़ित भई ।
 घेनु रूप धरि दुखित है, अज चतुरानन ढिँग गई ॥

अश्रुबिमोचन करति दुखित मनमहँ पछितावति ।
 कमलासनने लखी बिकल भूदेवी आवति ॥
 अज प्रनाम करि कहें—मातु ! च्यौँ अश्रु बहाओ ।
 निज दुख कारन जननि ! मोइ अबिलम्ब बताओ ॥
 वसुधा बोली—बत्स ! बहु, बोरु बढ्यो भारी भई ।
 सहनशीलता नृप बने, असुरनि मेरी हरि लई ॥

सुरगन करहु उपाय भार मेरो उत्तरे सब ।
 जाउँ रसातल चली बहनकी शक्ति नहीं अब ॥
 सुनिकें भूकी बात सुरनि ब्रह्मा उकसाये ।
 सुनि बोले अज—असुर अवनिपै अगनित आये ॥
 गंगाधर शिव ढिँग चलहु, वे कछु युक्ति बतायँगे ।
 फिर उनकुँ हू संग लै, कमलापति ढिँग जायँगे ॥

ब्रह्मादिक सब देव अवनि सँग शिवढिँग आये ।
 पुनि अज, हर, सुर अन्य क्षीर सागरहिँ सिधाये ॥
 देखि अपार पयोधि बिष्णुकुँ खोजें सब सुर ।
 परि दर्शन नहिँ भये अधिक चिन्ता व्यापी उर ॥
 है अधीर श्रद्धा सहित, लगे करन बिनती सबहिँ ।
 अज आयसु हरिकी सुनी, बोले देवनि तै तबहिँ ॥

होवें यदुकुलमाँहिं शीघ्र अवतरित मुरारी ।
हरितें अबिदित नहीं बिपतिकी बात तुम्हारी ॥
प्रभु प्रकटें बल सहित योगमाया हू आवैं ।
पूजित जगमहँ होहि असुर संहार करावैं ॥
यदुकुल गोकुलमाँहिं सब, सुर सुरललना देह धरि ।
प्रकटि करहु सुर तनु सफल, ऐसी आयसु दर्ई हरि ॥

हरि सन्देश सुनाइ धराकूँ धीर बँधायो ।
ब्रह्मलोक अज गये सबनिको मन हरषायो ॥
निज ललननिके संग अवनिपै जनमे सुरगन ।
जिन सौँप्यो सर्वस्व कृष्णकूँ निज तन मन धन ॥
सुनहु कथा पावन परम, श्रीमथुराकी मधुर अव ।
शूरतनय बसुदेवजी—के बिबाहको वृत्त सब ॥

श्रीबसुदेव बिबाह देवकीके सँग कीन्हों ।
देवक अधिक दहेज बिदाबेलामहँ दीन्हों ॥
रोवत रोवत चली देवकी पीछे वरके ।
अश्रु बिमोचन करत गये रथ तक सब घरके ॥
सब परिजन रोवन लगो, नेह कंस हिय हू जग्यो ।
कश्यो सारथी दूर रथ, स्वयं हरषि हाँकन लग्यो ॥

पथमहँ सहसा सुनी कंसने नभतें वानी ।
जाकूँ लैकें जाय प्रेमतें ओ ! अज्ञानी ॥
ताको अष्टम पुत्र पकरिकें तोड़ पछारै ।
भरी सभामहँ खेंचि मञ्चतें निश्चय मारै ॥
कंस सुनत अति कुपित है, चल्यो देवकी बध करन ।
लखि उद्यम बसुदेवजी, सहमि सरल बोले बचन ॥

शूर कुलीन प्रवीन भोजकुलभूषण सज्जन ।
 च्यौ कायरता करहु बहिनकूँ मारौ राजन ॥
 अरे, जीव तो नित्य देह छिनभंगुर नश्वर ।
 जनम्यो सो ध्रुव मरै, देरमहँ अथवा सत्वर ॥
 भगिनी भोरी भययुता, अबला दुहिताके सरिस ।
 थर थर काँपति देहु अब, अभय दान तजि द्वेष रिस ॥

कंस कहे—बसुदेव ! सुनी नहिं नभ की बानी ?
 कौन मृत्युकूँ प्यार करै प्रानी अज्ञानी ॥
 सुनि बोले बसुदेव देवकीतैं नहिं कछु डर ।
 अष्टम सुततैं मृत्यु कही सोई भयको घर ॥
 अच्छा हौं यह प्रन करहुँ, अष्टम सुतकी का कथा ।
 जनमत सुत सौंपों सबहिं, होहि न तुमकूँ अब व्यथा ॥

कंस कर्यो बिश्वास बहिन निज फिर नहिं मारी ।
 आये घर बसुदेव देवकी दुखित बिचारी ॥
 प्रथम पुत्र बसुदेव देवकी जाया जायौ ।
 भयो न मनमहँ मोद हरष हियमहँ नहिं छायौ ॥
 अति कोमल अति सरल शिशु, सुन्दर सरसिज सम वदन ।
 सुनत कंस पन मातुको, अति ई कातर भयो मन ॥

बोले श्रीबसुदेव—प्रिये ! मत मोह बढ़ाओ ।
 निज पन पूरन करूँ, कुमरकूँ अब ई लाओ ॥
 बिलखि हियेतैं लाइ प्याइ पय सुत मुख चूम्यो ।
 कंपित कर ह्वै गये मातुको माथो घूम्यो ॥
 बिलखत जाया छोड़ि सुत, लयो अंक बसुदेव पुनि ।
 क्रूर कंसके गये ढिँग, बिहस्यो सुतको जनम सुनि ॥

जीजाजी ! तुम दृढ़ प्रतिज्ञ समदरसी ज्ञानी ।
 शुचिता समता सत्य सरलता तुमरी जानी ॥
 शिशुकूँ घर लैजाउ काम का मेरो जाते ।
 अष्टम जो हो पुत्र बतायो सुर भय ताते ॥
 सुनि लौटे बसुदेवजी, दुष्ट बचन नहीं सत गने ।
 समुक्ति महाखल कंसकूँ, भये पुत्र लखि अनमने ॥

लौटि गये बसुदेव तबहिं नारद मुनि आये ।
 कंस कर्यो सत्कार कहें मुनि—सुत च्यौं लाये ॥
 कंस कहानी कही बताई नभकी बानी ।
 नारद बोले बिहँसि—नीति नृप नहीं तुम जानी ॥
 नंद और बसुदेवके, बन्धु दार सुत सुहृदगन ।
 सुर सुरललना सबहिं ये, चहत भार भूको हरन ॥

नभबानीमहँ छिपी गूढ़ अतिशय चतुराई ।
 कमल कुसुममहँ सबहिं आठवें दल तो भाई ॥
 यादव तुमरे शत्रु करो इन सबतैं कुट्टी ।
 मुनिने खलकूँ तुरत पढ़ाई उलटी पट्टी ॥
 नारद आगि लगाइकें, गये कंस चिन्ता भयी ।
 आयसु यादवदमनकी, सेनापतिकूँ दै दयी ॥

मँगवाये पुनि तुरत पकरि बसुदेव देवकी ।
 जंजीरनितैं जकड़ि हनै सुत कंस पातकी ॥
 पितु पग बेड़ी डारि बनाये बन्दी भूपति ।
 सिंहासनपै स्वयं बिराज्यो पापी खलमति ॥
 अनाचार नित प्रति करै, अति दुःखित यादव भये ।
 कोशल, कुरु, केकय, निषद, सब देशनिमहँ भगि गये ॥

वृणावर्त चाणूर पूतना और बकासुर ।
 धेनुक, केशी, द्विबिद, प्रलम्बहु असुर अघासुर ॥
 कंस सचिव सब बने करें उतपात निरन्तर ।
 कछु यादव बचि गये न पावें परि ते आदर ॥
 बिनय करत सब अति दुखित, होयँ अवतरित हे प्रभो ।
 करहिँ असुर अब अघ अमित, हरहु भार भूको विभो ॥

इति श्रीभागवतचरित के पञ्चमाह में वसुदेव विवाह श्रीकृष्ण-
 जन्मोपक्रम नामक प्रथम अध्याय समाप्त ।

अथ द्वितीयोऽध्यायः

[२]

भर्यो पापको घड़ा हिल्यो हरिको सिंहासन ।
 आयसु नटवर दर्ई योगमायाकूँ तत्छिन ॥
 रहैं रोहिनी मातु नंद बावाके घरमहँ ।
 तेजोमय मम अंश देवकी बसै उदरमहँ ॥
 ताहि रोहिनी गर्भमें, थापित करि प्रकटो तुमहु ।
 बासुदेव हम होहिँ तुम, सुता यशोदा की वनहु ॥

हरिकी आयसु पाइ योगमाया तहँ आई ।
 मातु देवकी गर्भ खेंचिकें गोकुल लाई ॥
 कर्यो रोहिनी उदर तेज माता मुख छाँयौ ।
 दशम मासमहँ पुत्र राम संकरषण जायौ ॥
 भाद्र शुक्ल छटि तिथि लगन, शुभ मुहूर्तमहँ उदित है ।
 दये दरश ब्रज जन सकल, नाचैं उदितइ मुदित है ॥

इत ब्रजपति नँदराय पुत्र हित मख करवाये ।
 बिप्र बेदवित् बहुत मंत्र जप करन बिठाये ॥
 उदर यशोदामाँहिँ योगमाया आई जब ।
 ब्रजमहँ मङ्गल भये परस्पर कहहिँ गोप सब ॥
 लाल होइगो नंदके, हल्ला ब्रजमहँ मचि गयो ।
 गऊ गोप गोपीनिको, तप्त हियो शीतल भयो ॥

जाया श्री वसुदेव देवकी जन्यो न लल्ला ।
 गिर्यो सातमों गर्भ मच्च्यो मथुरामहँ हल्ला ॥
 अति ई चिन्तित कंस भयो अब अठमों आवै ।
 जीवित यदि रहि जाय मोइ यमसदन पठावै ॥
 इत रक्षा साधन सुदृढ़, करे विविध मथुरेशने ।
 उत मनमहँ वसुदेवके, कश्यो प्रवेश परेशने ॥

विश्वम्भरको तेज शूर-सुत धार्यो मनमहँ ।
 सुखद सौम्य दुर्धर्ष तेज तिनि प्रकट्यो तनमहँ ॥
 पतितें सोई तेज देवकी देवी धार्यो ।
 दिव्य कान्ति लखि कंस सभय हियमाहिं विचार्यो ॥
 निश्चय जाके गर्भमहँ, बास शत्रुने करि लयो ।
 बिनु प्रकाशकी निशामहँ, भवन प्रकाशित है गयो ॥

बालकपनतें लखी देवकी घरके माहीं ।
 किन्तु कबहुँ अस प्रभा अनोखी देखी नाहीं ॥
 होहि न जब तक प्रसव तबहि तक जाकूँ मारूँ ।
 प्रथमहिं दुख जड़ काटि बिपति भावीकूँ टारूँ ॥
 लैकें कर करवाल खल, पुनि मनमहँ सोचन लग्यो ।
 क्याइ समय वसुदेवने, छल करिकें मोकूँ ठग्यो ॥

अब यदि मारूँ जाहि बात मेरी बिगरेगी ।
 बध भगिनीको सुनत प्रजा सबरी भड़केगी ॥
 अबला बंदिनि बहिन गर्भिनी भयकी मारी ।
 जाके बधतें होहि नाश श्री कीर्ति हमारी ॥
 तेज देवकीको लख्यो, कुल कलंक कातर भयो ।
 साँप छछूँदरिके सरिस, असमंजसमहँ परि गयो ॥

निश्चय कीयो जिही बहिन बध सबबिधि अनुचित ।
 दृढ़प्रतिज्ञ बसुदेव होहिं नहिं तिनतैं अनहित ॥
 बधको त्यागि बिचार निरन्तर हरिहिं बिचारै ।
 असन बसन अरु शयनमाँहिं जगदीश निहारै ॥
 बैरभावतैं विष्णु भजि, तदाकार मन बनि गयो ।
 शत्रु समुक्ति सर्वेशकूँ, अति सर्वोत्तम पद लह्यो ॥
 समुक्ति देवकी गर्भमाहिं हरि हर चतुरानन ।
 सब सुर मुनि सँग आइ करे हरिको अभिवादन ॥
 प्रभुकी इस्तुति करे मधुर स्वरमहँ मिलि सुरगन ।
 जय सर्वेश्वर, सत्य, नित्य शिव, अगजग भावन ॥
 विश्ववृक्षके बीज तुम, सब भूपनिके भूप हो ।
 सगुण सर्वगत सत्वमय, सुखकर सत्य स्वरूप हो ॥

गर्भस्तुति

हे सत्संकल्पा सत्य स्वरूपा, तीनिकालमहँ सत्या ।
 हे ऋत सत्नेता, चितके चेता, नाथ ! निरञ्जन नित्या ॥
 जगवृक्ष सनातन, पुरुष पुरातन एकाश्रय बनवारी ।
 सुखदुख द्वै फल हैं तीनि मूल हैं, पुरुषारथ रसचारी ॥
 पञ्चेन्द्रिय विध हैं, छै स्वभाव हैं, त्वचा सात सब मानें ।
 शाखा आठहु हैं, नौ कोटर हैं, पत्र प्राण दश जानें ॥
 बैठे द्वै खग हैं ईशजीव हैं, तुमही सबके कारन ।
 कल्याण करन जग, यही सत्य मग, करहिं रूप बहु धारन ॥
 तब चरन नाव करि भवसागर तरि, स्वयं तरे जग तारे ।
 जे अहंकार वश, गाड़ै न तव यश, वृथा मनुज तनु धारे ॥
 जे तव चरनन रत, भजहिं सतत सत, ते न जगत पुनि आवें ।
 जो अलख अगोचर, रहें निरन्तर तिनि कूँ कैसे गावें ॥


जो चिन्ते चरनन, करहिं कीरतन, नाम रूप नित ध्यावें ।
 ते घरमें रहिकें, द्वन्दनि सहिकें, अन्त परमपद पावें ॥
 तब जनम, करम, गुन, साधक, साधन, सब है लीला खेला ।
 तनु समय समय धरि, खलनि दमन करि, दुख मेंटें अब बेला ॥
 भूभार बढ़यो है, धरम घटयो है, आइ असुर दलमारे ।
 हम चरन परत हैं, विनय करत हैं, भूको भार उतारे ॥
 यों विनती कीन्हीं, जननो चीन्हीं, सब मिलि धीर बँधावें ।
 मुख मातु मलीना, है अति दीना, देवनि पद सिर नावें ॥

छप्पय—देखि देवकी देव दीन है बोली बानी ।
 हे चतुरानन ! शम्भु ! सुरेश्वर ! बीनापानी ॥
 हौं अबला अति अधम दया दासीपै कीजे ।
 कंस न मारै सुतहिं कृपा करि जिह बर दीजे ॥
 सुरगन बोले—मातु ! तुम, जगजननी मत भय करो ।
 अखिल भुवनपति होहिं सुत, हनहिं कंस धीरज धरो ॥

आश्वासन दै देव विनय करि स्वर्ग सिधारे ।
 भये सकल अनुकूल लगन, ग्रह नखतहु तारे ॥
 वृष्टि करहिं सुर सुमन दुन्दुभी मधुर बजावें ।
 विद्याधर गन्धर्व अपसरा नाचें गावें ॥
 कृष्णा भादौ अष्टमी, नखत रोहिणी शुभ समय ।
 अर्धरात्रि बेला सुखद, तब प्रसु प्रकटे प्रेममय ॥

अप्राकृत शिशु सुधर चतुरभुज कमलनयन बर ।
 शङ्ख, चक्र, अरु गदा पद्म सुन्दर आयुधधर ॥
 पीताम्बर बर अङ्ग सजल जलधर शोभा तनु ।
 कारे कुञ्चित केश रूप साकार भयो जनु ॥

सुंदर श्याम शरीरकी, शोभा अति अद्भुत बनी ।
शोभित तनुकी कान्तितै, कंकन कुण्डल करधनी ॥



बनि विस्मित बसुदेव वत्स को बहुरि बिचारे ।
नहिं सुत ये सरवेश चतुरभुज शुभ वपु धारे ॥
कश्यो मानसिक दान ध्यानतै चीन्हें श्रीहरि ।
परम पुरुष परमेश, जानि बिनवें बन्दन करि ॥
आप अखिल जगदीश हैं, पहिचाने प्रभु परावर ।
अज, अनादि, विश्वेश, बिभु, व्यापक सुखकर तत्व-पर ॥

वसुदेव विनय

(१)

प्रभु ! तुम पुरुष पुरातन ईशा ।

सबके साक्षी शुद्ध सनातन, जगन्नाथ जगदीशा ।

प्रथम करो रचना जा जगकी, मालो बनि अबनीशा ॥१॥ प्रभु तुम०

प्रकृति, महत्, मन अहंकार गुन, देव कोटि जो तीसा ।

करे काज तुमरी अनुमतितें, हो तुम भुवनाधीशा ॥२॥ प्रभु तुम०

जो जा जगकूँ सत्य बतावें, बुद्धि हीन ते कीशा ।

करो कृपा करुनाके सागर, तब पद नाऊँ शीशा ॥३॥ प्रभु तुम०

(२)

विभु तुम अखिलेश्वर दुखहारी ।

निरगुन, निष्क्रिय निरबिकार, नित, उत्पति थिति लयकारी ॥१॥ विभु०

तुमरे आश्रित हैं गुन तीनिहु, तुम अज हरि त्रिपुरारी ।

शुक्त, रक्त अरु श्याम वरन बनि, गुन-लीला विस्तारी ॥२॥ विभु०

करी विनय सुरगन सब मिलिकें, बहुविधि नाथ तुम्हारी ।

शरणागत प्रतिपालक हौ प्रभु, बिनती सुर स्वीकारी ॥३॥ विभु०

जगकूँ करन कृतारथ मम घर, प्रकटे श्याम बिहारी ।

कंसत्रासतें दुखी दयानिधि, नासौ विपति हमारी ॥४॥ विभु०

दोहा—नारायन निज सुत निरखि, विनय करति है मातु ।

कंस कुटिलता सुमरिकें, थर थर काँपतु गातु ॥

नाथ ! तुम सदानन्द सुखराशी ।

नेति नेति कहि बेद बखानत, हौ घट घटके बासी ॥१॥ नाथ तुम०

अज, अखिलेश, अनामय, अच्युत, अजर, अमर, अविनाशी ।

अभिमानि तुमकूँ नहिँ पावैँ, पावैँ नर विश्वासी ॥२॥ नाथ तुम०

रूप चतुरभुज देव छिपाओ, होहि हमारी हाँसी ।

जामें बास करतु जग सबरो, सो मम उदर निवासी ॥३॥ नाथ तुम०

कंस कहावै बन्धु हमारो, परि है सत्यानाशी ।

ग्वार्ते अभय करौ अखिलेश्वर, हौँ तब चरननिदासी ॥४॥ नाथ तुम०

छप्पय—करी देवकी बिनय बिबशता बहुरि बताई ।

बोले श्रीभगवान—मातु तू च्यौँ घबराई ॥

पृथिनगर्भ अरु रूप बनायो बामन मैंने ।

तृतीय चतुरभुज रूप निहारयो अबई तैंने ॥

डरहु कंसतैं मोहि तो, गोकुलमहँ पहुँचाइकैं ।

छोरी नँदरानी जनी, धरहु यहाँ तिहि लायकैं ॥

दोहा—हरि दरशन दम्पति करे, भये प्रसन्न महान ।

गोकुलमहँ बसिबो चहैं, सोचैं अब भगवान ॥

इति श्रीभागवतचरितके पञ्चमाह में चतुर्भुज श्रीकृष्ण जन्मनामक
द्वितीय अध्याय समाप्त ।

अथ तृतीयोऽध्यायः

(३)

छप्पय—आयसु हरि सिर धरी करी गोकुल की ल्यारी ।
 परीं हथकरीं हाथ जाउँ कस बात बिचारी ॥
 स्वयं हथकरी गिरीं कटीं पाँइनिकी बेरी ।
 धरे सूपमहँ श्याम चले नहिं कीन्हीं देरी ॥



शेष छत्रवत बनि गये, बरषातैं बालक बच्च्यो ।
 इत गोकुलकी गैलमें, यम-भगिनी कौतुक रच्च्यो ॥

गर्जन तर्जन करति बहत यमुना मदमाती ।
 भावी पतिकूँ निरखि उछरि मनमाँहि सिहाती ॥
 लैकें हरिको नाम शूर-सुत जलमहँ प्रविशे ।
 कालिन्दीके कमल नयन निज पति लखि बिकसे ॥
 पद परसन हित बढीं जब, समुझि गये बसुदेव सब ।
 लै चरनामृत घटि गईं, भये प्रेमतैं पार तब ॥
 इत यमुदाके भये गर्भके पूरे दिन जब ।
 साजि प्रसवको साज प्रतीक्षा करहिं नारि सब ॥
 गोबर, तिल, शिल, सींक, शस्त्र, घट, जल, फल, मिट्टी ।
 धूप, तेल, रंग, दुग्ध, दीप, सरसों, पट, घुट्टी ॥
 और प्रसवकी वस्तु सब, लै बूढ़ी गोपी जुरीं ।
 इत उत बिहरत मुदित मन, खनखनाई कंकन चुरीं ॥
 पल पलमहँ सब करे प्रतीक्षा नंदलालकी ।
 नंदरानीके होहि न पीरा प्रसवकालकी ॥
 लीला अपनी तहाँ योगमाया फैलाई ।
 सोये सबई योगनींदमहँ लोग लुगाई ॥
 परी पलंग पै यशोदा, तनिक आँखि सी झपि गई ।
 भयो कछू परि सुधि नहीं, छोरा वा छोरी भई ॥
 दोहा—उत आये बसुदेवजी, पहुँचे नंदके द्वार ।
 कैसे जसुमतिके निकट, पहुँचूँ करैं विचार ॥
 छप्पय—लखि ब्रजमहँ बसुदेव गोप गोपी सब सोवत ।
 पुनि पुनि सुत मुख कमल नेहतैं जोहत रोवत ॥
 कंपित करतैं कृष्ण यशोदा शयन सुवाये ।
 कन्या लई उठाय नीर नयननिमहँ छाये ॥
 हौलैं तैं मुख चूमिकें, कन्या लैके चलि दये ।
 करि कालिन्दी पार पुनि, चुपके घरमहँ घुसि गये ॥

सुत वियोग अरु कंस त्रासतै माँ घबराई ।
 पतिते कन्या लई सेजपै साथ सुवाई ॥
 पहिनीं श्रीवसुदेव हथकरीं बेरीं फिरतै ।
 दम्पति थर थर कँपै कंस पापीके डरतै ॥
 रुदन योगमाया करच्यो, द्वारपाल सब जगि गये ।
 बाल जन्म सुनि कहनकूँ, तुरत कंस ढिँग भगि गये ॥

कहें कंसतें—देव ! देवकी बालक जायौ ।
 उपसेन-सुत सुनत जन्म रिपु अति घबरायौ ॥
 हड़बड़ाइकें उठ्यो मूँड़ चौखटमहँ लाग्यो ।
 सुधि न मुकुटकी रही केश खोले ही भाग्यो ॥
 आयो काराबास महँ, सराटेतै घुसि गयो ।
 कन्या देखी पलंगपै, निरखि तेज बिस्मित भयो ॥

कन्या माँगी रोइ देवकी बोली—भैया ।
 पुत्री सम लघु बहिन तुम्हारी मैं हूँ गैया ॥
 मारे सब सुत किन्तु कृपा कन्यापै कीजे ।
 परि पैरनिपै करूँ याचना जाकूँ दीजे ॥
 अंतिम मेरी धीय है, जिह अनरथ का करेगी ।
 रँगौ रक्ततै हाथ च्यौँ, देह सदा नहिं रहेगी ॥

एक न खलने सुनी सुता पत्थरपै पटकी ।
 सटकी कर तै तुरत, बनी देवी नभ चटकी ॥
 अष्ट भुजी बनि गई दिव्य आयुध धारे कर ।
 शङ्ख, चक्र, धनु, खड्ग चर्म, तिरशूल, गदा, शर ॥
 लक्ष्य कंसकूँ करि कहे, मंद मोइ मारे वृथा ।
 प्रकट्यो तेरो शत्रु तो, मति दै बालनिकूँ व्यथा ॥



यों कहि अन्तरधान भई फिरि दीखी नाहीं ।
 विन्ध्याचलमहँ जाइ भई पूजित जगमाहीं ॥
 सुनि चिन्तित अति भयो कंस पुनि पुनि पछितावै ।
 जाइ देवकी निकट दुखित हूँ कें समुझावै ॥
 करि बन्धनतँ मुक्त पुनि, करहि प्रदर्शित प्रेम अति ।
 चिकनी चुपरी बात करि, देहि मुलायो मूढ़ मति ॥

बोल्यो—भगिनी ! भाम ! छमहु अपराध हमारे ।
 मैंने शठता करी तुम्हारे शिशु सब मारे ॥
 सुरनि कर्यो छल कपट पाप मोतें करवाये ।
 करि नभवानी मृषा बहिनके सुत मरवाये ॥
 अस्तु, भई सो भई अब, हौं लज्जित अरु दुखित अति ।
 भोगें हूँ प्रारब्ध वश, सब सुख दुख सम्पति बिपति ॥
 सुख दुखकूँ को देहि, भाग्य ही सब करवावै ।
 दैवाधीन बियोग दैव ही लाइ मिलावै ॥
 अहं बुद्धि अज्ञान जन्म प्रारब्ध बनावे ।
 हर्ष, शोक, भय, लोभ, मोह आदिक उपजावे ॥
 ऐसैं ज्ञान बधारिकें, करि प्रसन्न दोऊ लये ।
 कारागृहहैं मुक्त हैं, हरि चित धरि निज घर गये ॥
 इत हैं कैं अति दुखित कंस घर अपने आयौ ।
 मन्त्री लये बुलाय बृत्त सब सत्य सुनायौ ॥
 सुर-द्रोही खल दैत्य कहें—का चिन्ता स्वामी ।
 अज हरि हर सुर करे कहा हम स्वेच्छागामी ॥
 सुर निरबल परि बिप्रगन, मख करि पोसैं रिपुनिक्कूँ ।
 मारे जहँ द्विज मुनि मिलहिँ, आयसु देवें सबनिक्कूँ ॥
 कुटिल कुमन्त्रिनि कही कंस सो सब कुछ मानी ।
 गो, द्विज, तप, मख, वेद नाशकी मनमहँ ठानी ॥
 काल-पाशमहँ फँस्यो असुर हिंसा हित मानै ।
 समुझे संतनि शत्रु द्विजनि निज नाशक जानै ॥
 यों मथुरामहँ असुर गन, धेनु द्विजनि दुख देहिँ नित ।
 मातु यशोदा सुत जन्यो, सुनहु भयो जो बृत्त इत ॥
 इति श्रीभागवत चरितके पञ्चमाहमें कंस चिन्ता नामक
 तीसरा अध्याय समाप्त ।
 (पाक्षिक पारायण नवम दिवस विश्राम)

अथ चतुर्थोऽध्यायः

[४]

धरि हरिकूँ वसुदेव गये तब जर्गी लुगाई ।
 अति संभ्रमके सहित दौरि सौहरि घर आई ॥
 बनि नीलम नवनीत यशोदा ढिँग जनु बिकसित ।
 नील कमल जनु खिले चंद्र जनु मिलिके अगनित ॥
 बोलि उठीं सब एक सँग, यशुमतिने लल्ला जन्यो ।
 छिनभरमहँ श्रीनन्दघर, आनंदको सागर बन्यो ॥

जाइ सुनन्दा कह्यो—जन्यौ भाभीने लाला ।
 छिनमहँ फैली बात सुनत दौरीं ब्रजबाला ॥
 नंद अकबके भये देहकी दशा भुलानी ।
 छायो नयननि नीर पुलक तनु गद्गद बानी ॥
 आवें गावत गीत सब, अति उमङ्गमहँ गोप गन ।
 पकरि नचावें नन्दकूँ, डगमग डगमग होहि तन ॥

ज्योतिषविद्या-विज्ञ बहुतसे विप्र बुलाये ।
 नन्दमहरि सुत जन्यो सुनत सब द्विज उठि धाये ॥
 सबने आशिष दर्ई ग्रहणिके सुफल बताये ।
 सबकी सम्मति समुक्ति नन्द यमुनामहँ न्हाये ॥
 बूढ़े बाबा पहिन पट, आज अनङ्गके सम खिले ।
 बृद्ध गोप अरु द्विजनि सँग, प्रमुदित अन्तःपुर चले ॥

गोपिनितैं घर घिरयो गीत सोहरिके गावैं ।
 सुधि बुधि भूलैं खड्डों हटैं नहिं बिप्र-हटावैं ॥
 ज्यों त्यों भीतर गये द्विजनि सामान मँगाये ।
 जातकरम अरु देव पितर पूजन करवाये ॥
 ब्रज सुख सागर शान्त सम, उमड़ि हरष प्रकटित करे ।
 उदित भये ब्रजचन्द्र हरि, रत्ननितैं तटकूँ भरे ॥

लौकिक बैदिक कर्म करे सुतके मंगल हित ।
 निरखि निरखि सुत बदन हृदय होवै आनन्दित ॥
 चितमहँ अति उत्साह बिचारे का दै डारूँ ।
 ऐसे सुतकूँ पाइ च्यौ न सरबसु हौं वारूँ ॥
 यौं बिचारि चौपारिमहँ, कोषाध्यक्ष बुलाइकैं ।
 बोले—ताले खोलिकैं, धन सब देउ लुटाइकैं ॥

पुनि बुलवाये गोप कही—खिरकनिकूँ खोलो ।
 मनमानी द्विज धेनु लेहिं मत तिनतैं बोलो ॥
 चाँदीके खुर करो सींग सोनेतैं मदिकैं ।
 सुन्दर बख्ख उड़ाइ पूँछ मोतिनितैं जड़िकैं ॥
 माँगैं जितनी जो गरु, तितनी तिनकूँ दानमहँ ।
 देहु न होवै नैकहू, कमी मान सम्मान-महँ ॥

सब गोपनि ब्रजराज नंद आज्ञा सिर धारी ।
 कनक रतन लै धेनु दान की कीन्हीं तयारी ॥
 हल्ला ब्रजमहँ मच्च्यो सुनत सब द्विजगन आवैं ।
 छाँटि छाँटिकैं धेनु लेहिं अतिशय-हरषावैं ॥
 पाँच, सात, दश, बीस, सौ, लेऔ चाहे सहस हू ।
 आज खिरक सबई खुले, रोक टोक नहिं नैक हू ॥

बीस लक्ष दै धेनु नहीं सन्तुष्ट भयो चित ।
 तिलके परबत सात रत्न पट दीये हरषित ॥
 दयो शुद्धि हित दान यही सद्ब्यय धनको है ।
 शुद्ध कालतै भूमि तोष कारन मनको है ॥
 मञ्जनतें तनु बस्तुको, शुद्धि शौचतें कहें मुनि ।
 गर्भादिक संस्कारतै, आशय होवै शुद्ध पुनि ॥

तपतै इन्द्रिय शुद्ध होहिं मखतै सब द्विज जन ।
 हरि भक्तनितै देश दानतै होहि शुद्ध धन ॥
 सब बस्तुनिकी शुद्धि विविध विधि वेद बताई ।
 नन्दनन्दनके जन्म समय त्रिधिवत करवाई ॥
 देशकालवित नन्दको, दान देत नहिं भरहि मन ।
 आवें दशहू दिशानितै, मागध बन्दी सूतगान ॥

सबकी आशा लगी नित्य ही टोह लगावै ।
 नन्दरानी कब कमलनयन लालाकूँ जावें ॥
 धुनि भेरीकी सुनी सुनत सब जन हरषाये ।
 जामा पगड़ी पहिन दौरि गोकुलमहँ आये ॥
 दूरिहिं तै अति मुदित मन, जय जयकार सुनाइकें ।
 आशिष सुतकूँ देहि शुभ, गीत मनोहर गाइकें ॥

दो०—पीरी पगरी पहिनके, वृद्ध एक हरषात ।
 आयो, पूछें नन्दजी—आप कौन हैं तात ?
 नन्दबचन सुनि मुदित मन, करि पुनि पुनि परनाम ।
 कवितामें बूढ़ो कहे, हरष सहित निज नाम ॥
 गोपेश्वर ब्रजराजजी ! मैं तुम्हरो हूँ सूत ।
 दौख्यो आयो सनत ही, भयो तुम्हारे पूत ॥

सवैया

ब्रजराज ! कहैं सब सूत हमें, मुनि व्यास कृपा करिके अपनाये ।
सुनिकें सत जन्म उमंग भरे, हियमहँ हुलसे सरसे इत आये ॥
दान निहारि निहाल भये, धन धेनु सुमेरु समान लुटाये ।
ब्रजमहँ बिहरे धुँधची पहिरे, बर देहु जिही तनु धूरि लगाये ॥

कवित्त

धरती धन धाम धान मानहू न माँगो भूप
मोहनकी मोहनी-सी मूरति निहारौंगो ।
पढ़िके पुरान ज्ञान भयो नाहिं वाढ़्यो मान,
दान पाहि आइ ब्रजमाँहि डेरा डारौंगो ॥
कुलको तुम्हारो सूत नयो नयो भयो पूत,
धूतताई छाँड़ि अब जीवन सुधारौंगो ।
नेहतै निहारि मुख समुझि श्याम सत्यसुख,
साँवरी-सी सूरतपै सरबसु हौं वारौंगो ॥

दो०—नंद सूत सत्कार करि, लख्यो वृद्ध पुनि एक ।
पूछे—तुम को ? सो कहै, शीश भूमिमें टेक ॥
मढ़्यो ऋगा सोने तगा; दगा करूँ नहिं नैक ।
हरो पेच तुरा पगा, 'जगा' हमारो बैक ॥
पुनि हँसि पूछे नंद जी, को यह तुमरे पास ।
कहै जगा ब्रजराज यह, आयौ तै बड़ आस ।

सवैया

घोती फटी कछु नाक कटी पिचकी चिपटी हमरो जिह भैया ।
कंठ सुरीलो रंगीलो बड़ो चटकीलो छबीलो बड़ो ही गवैया ॥
भाँग चढ़ाइ नहाइ मलाई चढ़ाइ चुराइ सदाहिं रुपैया ।
दूबर दूध बिना ब्रजराज ! बड़ोहि लबार जि माँगतु गैया ॥

दो०—बालक पकरेँ ऊँट लखि, परिचय पूछें नंद ।
जगा कहे मुसकाइके, उर छायाँ आनंद ॥

सवैया

ऊँट बिठाइ सिहाइ रह्यो करहाइ रह्यो करमहँ बड़ फोरा ।
गोरो छिछोरो लुटेरो बड़ो चख'चाहि रह्यो जिह माँगत तोरा ॥
मगमहँ बतरावतु आवतु हो शरमावत माँगत पाग पिछौरा ।
ब्रजराज ! बतावत लाज लगे जिह छत्तिस छोरनिमहँ इक छोरा ॥

दो०—लखी लुगाई नन्दजी, पूछें—तुमरी कौन ।
झाँकि बगल बोल्यो जगा, सुनों भूप यह जौन ॥

सवैया

हे ब्रजराज ! करूँ नहिँ लाज समाज जुरयो जिह फूहरि नारी ।
सोवै सिदौसि अबेरि उठे नित देइ परोसिनिकूँ गिति गारी ॥
आवत देखि पिछारि परी चटकीलि रँगीलि टरी नहिँ टारी ।
घरवारि हमारि हिलावति हार चलावति सैन मँगावति सारी ॥

दोहा—लदे ऊँट लखि नंदजी, पूछें का इन माहिँ ।
हूँ प्रसन्न बोल्यो जगा, मनमहँ गोप सिहाहिँ ॥
दोहा—बही पुरानी सबनिमहँ, सब गोपनिके बंश ।
आपु सबनिके मुकुटमनि, गोपबंश अवतंश ॥
बंश बखानों जगाजी, आयसु दीन्हीं नंद ।
खोलि बही बाँचन लग्यो, करि नयननिकूँ बंद ॥
छप्पय—प्रथम गोपकुलमुकुट भये नृप चन्द्र सुरभिजी ।
भीमक तिनके पुत्र भये तिनि, 'महाबाहु' जी ॥
तिनिके सुत गोपेश 'काननेचर' बड़ भागी ।
'कञ्जनाभि, तिनि तनय यशस्वी अति अनुरागी ॥

कंजनामिके पुत्र सुठि, 'बीरभानु' आभीरवर ।
'कृती' तनय तिनि गोपपति, 'धर्मधीर सुत धीरधर ॥

धर्मधीर के भद्रश्रवा, तिनि 'देवराज' सुत ।
देवराज के 'नवल, नवलके द्वै सुत श्रीयुत ॥
'काननेन्दु' सुत द्वितिय पुत्र 'जयसेन' भये तिनि ।
देवमीढ़ मथुरेश संग ब्याही कन्या जिनि ॥
ताके सुत परिजन्यजी, नानाकी गोदी गये ।
तिनिके अति सुन्दर सुघर, पुत्र पाँच पैदा भये ॥

दोहा—ते पाँचों ई शूर अति, भये ज्येष्ठ उपनन्द ।
नन्दनअरु सन्तनन्दजी, अभिनन्दन श्रीनन्द ॥

छप्पय—मातामहकी गोद गये गोकुल महँ गोपति ।
वृद्ध भये परिजन्य गये तपहित हरषित अति ॥
गद्दीको अधिकार पाइ उपनन्द सिहाये ।
सुकृति मूर्ति श्रीनन्द यशस्वी भूप बनाये ॥
इतनो जानूँ बंश मैं, नारायन किरपा करी ।
वृद्धावस्थामहँ बहुरि, गोद यशोदा की भरी ॥

दोहा—दान मान करि जगाको, नन्द निहारें फेरि ।
करिके जयजयकार तब, बन्दी बोल्यो टेरि ॥

कवित्त—नंदको दुलारो सुत प्यारो ब्रज-बासिनिको,
कोई कहे कारो परि जगको उजारो है ।
बेद नहिँ पायौ भेद ताहीको नाल छेदि,
आँगनमें गाढ़ि तापै अगिहानो बारो है ॥

भक्तनि को जीवनधन गोपिनिको प्रान मन,
 बालनिको बन्धु धेनु धनको रखवारो है ।
 यशुमतिको लाल ब्रज गोपिनिको ग्वाल बाल,
 दर्शनतें निहाल होहुँ सरबसु सो हमारो है ॥
 दो०—रायभाट ज्यों चुप भये, त्योंही गायक आइ ।
 बाजे सबहिँ मिलायकें, गावै भजन बनाइ ॥

पद

नंद घर आजु भयो आनन्द ।
 मातु यशोदा लाला जायो, ज्यों पूनोंने चंद ॥१॥
 गोपी गोप गाय गायक-गन, सबहिय सरसिज बन्द ।
 नंदनंदन रबि उदित भये हिय, बिकसे पंकज वृन्द ॥२॥
 बसुधा मुदित समोर बहत वर, शीतल मंद सुगन्ध ।
 गरजत मंद मंद घन नभमहँ, प्रगटे आनंद कंद ॥३॥
 माया-बन्धु सिन्धु सब सुखके, स्वयं सच्चिदानन्द ।
 प्रभुके प्रभु बिभु विश्वविदित वर, काटैं यमके फंद ॥४॥

पद

यशोदा कैसो लाला जायो ।
 कोई कहे कुसुम अरसी सम, अंजन अपर बतायो ॥१॥
 कोई दूर्वा घन सम शोभा, उत्पल द्युति कहि गायो ।
 कोई कहे जनम नहिँ याको, छिपि मधुबनतें आयो ॥२॥
 कोई कहे ब्रह्मको बाबा, बेदहु भेद न पायो ।
 कैसो कहें कहत संकुचावत नहिँ, हम दरशन पायो ॥३॥
 गोविंद गोकुल कुँवर गोपपति, गोपीश्वर कहलायो ।
 कहा कहूँ कछु कहत न आवै, चरन कमल सिरनायो ॥४॥

छप्पय—अति आनंदित नंद सबनिको स्वागत कीन्हों ।
जाने जो जो करी याचना सो सब दीन्हों ॥
बार बार है मुदित गीत लालाके गावें ।
गोप गान अरु बाद्य सुनत अतिशय हरषावें ॥
नंदलालके जनमको, घर घरमें उत्सव भयो ।
मानों ब्रजमंडल सकल, उत्सवमय ही बनि गयो ॥

सकल राजपथ गली गिरारे घर पिछवारे ।
सबनि स्वयं मिलि सींक सोहनी लाइ बुहारे ॥
चन्दनको छिरकाव इतर करपूर मिलायौ ।
करि केशरिकी कीच सबनि निज घर लिपवायौ ॥
टाँगीं बन्दनवार वर, घर घर सुघर बनाइकें ।
बिच बिच कलियाँ कुसुमकी, पल्लव ललित लगाइकें ॥

लीपे पोते द्वार बार घर अटा अटारी ।
आँगन, :पौरी; बगर, रसोई और तिवारी ।
नीली पीली हरी गुलाबी पचरँग सारीं ।
टाँगीं द्वारनि लाइ कबहुँ जो नहीं निकारीं ॥
दीप चौमुखा बारिकें, कलशनिके ऊपर धरे ।
मंगलदायक द्रव्य सब, घर घर एकत्रित करे ॥

गैयाँ सव बगदाइ खिरकमहँ फिरितैं लाईं ।
तेल फुलेल लगाइ न्दवाईं फेरि सजाईं ॥
मोरपंखके मुकुट लसैं घुघुरु पग जिनिके ।
गेरु तेल मिलाइ रंगे तन सींग सबनिके ॥
गंडा गरमहँ चमकनों, कनकहार पहिराइकें ।
हरषित है पूजन करें, शाल दुशाल उढ़ाइकें ॥

बछरा गोप कुमार सजावें सब हरषावें ।
 बहुबिधि करे कलोल तुरावें मूँड़ हिलावें ॥
 अति चंचलता करें फुदुकि इततैं उत आवें ।
 मानों बालगुपाल जनमको हरष मनावें ॥
 बहु उमंगमहँ उछरिकें, सबई भागें नन्द घर ।
 मनहु मुनमुने सखाकी, लगी चटपटी दरश उर ॥

सजिबजिकें सब गोप ढोल करताल बजावत ।
 नन्द महलकी ओर जाहिं सब रसिया गावत ॥
 पहिन अँगरखी पाग दुपट्टा उरमहँ डारे ।
 लम्बे तिलक लगाइ मूँछ अरु बाल सम्हारे ॥
 चले विविध बिधि भेंट लै, प्रेम रसिकतामहँ पगे ।
 मनहुँ कमल विकसित सुनत, भ्रमर तुरत उतई भगे ।

मिलहिं परस्पर गहकि हृदयतैं हृदय सटावैं ।
 कोई छूवै पैर गहकिकें ताहि उठावैं ॥
 कोई केशर मलै सुपारी बीरी देवैं ।
 कोई लैन न पाहिं रूपति तिनि करतैं लेवैं ॥
 सिद्धिनि सब सत्कार करि, जनम सुफल अपनो कश्यो ।
 गोकुल धन, मणि, अन्न अरु, सबई वस्तुनितैं भश्यो ॥

इत गोपिनि सम्बाद सुन्यो सुत यशुमति जायो ।
 रोम रोममहँ हरष सुनत सबईकें छायो ॥
 नन्दभवनकुँ गमन करनकी करी तयारी ।
 लहगा नये निकारि पँचरँगी ओढ़ी सारी ॥
 सुमन लगाइ सजाइ कच, बैणी बाँधी विधि बिहित ।
 सिर सिंदूर लगाइ पुनि, अधर रँगो शोभा सहित ॥

मुखमहँ मिस्सी पान नाक नकवेसरि सोहै ।
 कुच कुंकुमकी कीच कठिनता रति मनमोहै ॥
 वैदी, कुंडल, हार, भूमका, कंठा लटकन ।
 चम्पकली, जौमाल, वरा, बाजूबंद कंगन ॥
 मुदरी, छल्ला, आरसी, पगपान हु पायल, कड़े ।
 पहिने पैरनि साँट अरु, पाइजेव, छमछम, छड़े ॥



करि सोलह शृङ्गार बनों रति सम सब नारीं ।
 चाँदीको लै थार चावकी वस्तु सम्हारीं ॥
 किसमिस, गोलागिरी, छुआरे और मखाने ।
 पिस्ता अरु बादाम, चिरौंजी, एला दाने ॥
 हँसली, कठुला, कौंधनी, कुरता, टोपी, खिलौना ।
 न्योछावर, राई, नमक, लथो ललाकूँ मुन्मुना ॥

लीये कर उपहार भावमहँ भरिक्कें भामिनि ।
 कटि कुचभार सम्हारि नमित-सी ह्वै गजगामिनि ॥
 नेह पागमहँ पर्गी सरसता-सी सरसावति ।
 मुखरित पथकूँ करति चलति रस-सो बरसावति ॥
 देह गोह सुधि बुधि न कछु, कृष्ण कृपाकी कामिनी ।
 नवजलधरमहँ चमकिबे, चली मनहुँ सौदामिनी ॥

काननि कुण्डल कनक समुज्ज्वल मणिमय विलसत ।
 चमकैँ दमकैँ हार मनहुँ नभ उड़गन बिकसित ॥
 घूँघटतैँ मुख ढक्यो मनहु छिपि घनमहँ निशिपति ।
 भरहिँ सिरनितैँ सुमन मनहु शर छाँड़ैँ रतिपति ॥
 हृदय हार अरु कुचनमहँ, होवें संघर्षण प्रबल ।
 ज्यों भ्रुकभोरे मीन द्वै, मानसरोवर हृत्कमल ॥

ब्रजरजमहँ पदकमल परहिँ पृथिवी हरषावें ।
 जा रजकूँ अज शम्भु चहें परि ते नहिँ पावें ॥
 प्रकटे ब्रजमहँ नंदलला हम सबके भरता ।
 मिलन चलीं जिमि जाहिँ उदधितैँ मिलिबे सरिता ॥
 यह अभिसार विचित्र अति, जामें नहिँ ईर्ष्या कपट ।
 छाँड़ि सौतिया डाह सब, जाहिँ हँसति खेलति प्रकट ॥

यों सब मिलिके नन्दमहलमहँ पहुँची बाला ।
जहँ गुलगुलसे परे मुनमुना यशुमति लाला ॥
बाँधे मुट्ठी नयन मूँदि कछु ध्यान लगावत ।
चरननि रहे हिलाय मनहुँ जग सार बतावत ॥
बोली बुढ़ियाँ—बत्स ! तुम, चिरजीवो सुखतैं रहो ।
बेगि बढौ बेटा ! बिहँसि, यशुमतितैं मैयो कहो ॥

महरानेतैं गोप लालकूँ देखन आये ।
भोतर आदर सहित नन्द बाबा जब लाये ॥
गोपिनि तुरतहिँ अधिक तैलमें हरदी घोरी ।
छिरकें रसमहँ पगी 'मची भादौमहँ होरी ॥
लै पिचकारी गोपहू, फेंट बाँधि ठाढ़े भये ।
रँग रस बरसैं संगई, सब रस-रँगमहँ रँगि गये ॥

मेरी, तुरही, चङ्ग, मजीरा मधुर मधुर स्वर ।
ढोल, खोल, करताल, बजैं बंशी बीनावर ॥
कृष्ण जन्मकी मची धूम जड़ चेतन हरषें ।
कल्पवृक्षके सुमन गगन फुलभरिया बरषें ॥
ब्रजमंडलके गोपगन, सब मिलि दधिकौँदौं करें ।
दूध, दही, घृत, उलचि घट, खाली करि पुनि पुनि भरे ॥

मुखमहँ मक्खन मारि गोप कोई भगिजावें ।
कोई चुपके आइ दही मुखमें लपटावें ॥
कोई दूध उढ़ेलि हरषमहँ नाचें गावें ।
कोई पटकें पकरि पिछौरा पाग भिगावें ॥
यों खेलत लोटत हँसत, नाचत गावत गोप सब ।
घड़ी कालकी सुधि न कछु, उदित भये रवि अस्त कब ॥

प्रेम पुलकि ब्रजराज आजु सर्वस्व लुटावें ।
 जो माँगै जो बस्तु ताहि सो तुरत दिवावें ॥
 राय, भाट अरु कथक सूत सब पढ़िवे वारे ।
 नर्तक, नट अरु भाँड़ विविध विधि बाजेवारे ॥
 देत सिंहावत अति मुदित, पुनि पुनि देवें पुनि कहैं ।
 और लेउ संकोच नहिं, बिनु लीये कोउ न रहैं ॥

नन्दराय सब करत धरत बिसरत नहिं श्रीपति ।
 अद्भुत सुत तनु निरखि भई चितकी चंचल गति ॥
 दान धरमतेँ होहि सुखी सुत सोचत मनमहँ ।
 तनय अभ्युदय सुमिरि रही आसक्ति न धनमहँ ॥
 याचक याचक रहे नहिं, नन्दभवनतेँ लेत हैं ।
 पावें जो गो, रत्न, धन, पुनि बनि दाता देत हैं ॥

नन्दभवनमहँ रहें रोहिनी पतितेँ न्यारी ।
 मलिन बसन परिधान न बैणी माँग सम्हारी ॥
 किंतु कृष्णको जन्म सुनत सजिबजिकेँ विधिवत ।
 आज करत सत्कार सबनिको इत उत बिहरत ॥
 कहें स्वामिनी नारि नर, करि आदर आयसु चहहिँ ।
 समाधान सबको करहिँ, मधुर बचन सबतेँ कहहिँ ॥

उत्सव ब्रजमहँ नये नारि नर नित्य मनावें ।
 गावत गोपी गीत ग्वाल गोधन सँग आवें ॥
 दूध दहीकी बहें नदी घृत कोउ न खाई ।
 मंदिर मंदिर भरीं मनोहर मनहु मिठाई ॥
 केसरि कीच भरी सकल, गोकुल गाँव गलीनिमहँ ।
 मणि मुक्ता बिखरे फिरै, कोउ न पूछे सेंटिमहँ ॥

दो०—नन्दोत्सव घर घर भयो, नर नारिनि मन मोद ।
 आवें निरखें लालकूँ, लेवें पुनि पुनि गोद ॥
 नँद-नन्दन निरखत तुरत, सब उर उमड़त प्यार ।
 छटवें दिन छट्टी भई, पूरी और कसार ॥

इति श्रीभागवतचरितके पञ्चमाहमें नन्दोत्सव नामक चतुर्थ
 अध्याय समाप्त ।



अथ पञ्चमोऽध्यायः

[५]

भई लाल की छटी राजकर चिन्ता व्यापी ।
 सोचें श्री ब्रजराज—कंस नृप अति ई पापी ॥
 वार्षिक कर नहिँ जाइ करै उत्पात न दुरजन ।
 छकरनिमहँ भरि दूध दही घृत चले गोपगन ॥
 गोकुल रक्षाको सकल, करि प्रबन्ध मथुरा गये ।
 पुण्य पुरी शोभा लखी, गोप परम हरषित भये ॥

दर्ई भेंट कर सहित रतन अगनित घृत पय धन ।
 पाइ अमोलक बस्तु कंस पूछत प्रसन्न मन ॥
 ब्रजमहँ सबजन कुशल बहुत दिनमहँ कर आयो ।
 सकुचि कहें ब्रजराज—महरि घर लाला जायो ॥
 कंस कहे—जुग जुग जिये, पालन सब ब्रजको करै ।
 बिजयी होवे सुत सतत, सब प्राणिनिको दुख हरै ॥

नंद दयो कर कंस लौटि डेरा पै आये ।
 समाचार बसुदेव सुनत तुरतहिँ उठि धाये ॥
 सजल नयन तनु पुलकि ललकि हिय नंद लगाये ।
 दोऊ सुधि बुधि भूलि गहकि हिय उभय सटाये ॥
 दर्ई बघाई नंदकूँ, कुशल प्रश्न पुनि पुनि करे ।
 सुमिरि सुमिरि बल कृष्ण कूँ, नीर नयन नीरज भरे ॥


बोले श्री बसुदेव—दयो कर भेंट भई अब ।
अधिक रहें नहिं यहाँ काज सम्पन्न भये सब ॥
ब्रजमहँ नव उत्पात कौनसे कब का आवें ।
तातैं अब अबिलम्ब आपु गोकुलकूँ जावें ॥
राम कृष्णमहँ मन फँस्यो, नंद हृदय शंका भई ।
तुरतहिँ गोकुल गमन की, गोपनिकूँ आज्ञा दई ॥

छकरनि जोरे बैल नंद बसुदेव मिले पुनि ।
गोकुलकूँ चलि दये कथा अब एक कहूँ मुनि ॥
निज रिपु हनिबे हेतु पूतना कंस पठाई ।
सब थल मारत शिशुनि खेचरी गोकुल आई ॥
पीन पयोधर भारतैं, नमित चलति छैलिनी बनी ।
केशपाशमहँ मल्लिका, गुँथी कुसुम माला घनी ॥

मायातैं अति सुघर नारिको रूप बनायो ।
मधुर मधुर मुसकाइ सबनिको चित्त चुरायो ॥
महराने की समुक्ति रोहिणी बिहँसि बिठाई ।
यशुमति समुक्ती नई बहू मथुरातैं आई ॥
गगरी सोनेकी मधुर, भरि विषतै ढकिँ धरी ।
त्यौं ठगिनी गोरी बनी, कारेके पल्ले परी ॥

बनि अति सुन्दरि नारि महलमहँ बैठी लुच्ची ।
गरल लपेटी दई लालके मुख महँ चुच्ची ॥
हरिकूँ आयो रोष पकरि कर बोबो लीन्हीं ।
कचकचाइकें चढ़े घुटुमुनि मुखमहँ दीन्हीं ॥
पीवें पय प्रभु प्रान सँग, अति अद्भुतछवि लालकी ।
मातु निहारति चकित चित, बनी अकबकी-सी बकी ॥

अरे छोड़दैं लाल छोड़दैं बकी पुकारै ।
 किन्तु लालकी बानि पकरिकें अवसि उबारै ॥
 हाथनि पाइनि पटकि पटकि कैं हा हा खावै ।
 दैया बप्पा मरी राँड़ कहि कहि डकरावै ॥



चुची में पीड़ा अधिक, माया ताकी खुलि गई ।
 मुह फाट्यो निरजीव है, बाल बखेरें गिरि गई ॥

गिरी पूतना तुरत नाश सब ब्रजको कीन्हों ।
 कंस बाग छै कोस ताहि चौपट करि दीन्हों ॥
 मुख मानो गिरि गुहा दाढ़ खूँटा सम ताकी ।
 चूची पर्वत शिखर आँखि कूआ सम बाकी ॥
 सूखे सर सम उदर अति, थूल देह पग सेतु सम ।
 डरपैं गोपी गोप गन, बज्र गिरयो अस भयो भ्रम ॥

छातीपै प्रभु परे प्रेमतैं करत किलोलें ।
 मामा भेज्यो बँध्यो खिलौना मानो खोलें ॥
 नहिं भय नहिं कछु रोष सरकि इततैं उत आवैं ।
 मैया हाहाकार करै गोपी घबरावैं ॥
 भई रोहिणी बिकल अति, गिरी लिये बलरामकुँ ।
 मृपटि एक गोपी तुरत, लै आई घनश्यामकुँ ॥

घरि धीरज गोपूँछ लाल अँग अंग घुमाई ।
 द्वादश गोबर तिलक करे गोरज लिपटाई ॥
 करि कर अंगन्यास नाम पढ़ि मंत्र उचारैं ।
 पद अज रक्षा करें जानु मणिमानः सम्हारैं ॥
 यज्ञ पुरुष उरुउभयकी, कटि अच्युत केशव हृदय ।
 हयग्रीव प्रभु उदरकी, ईश होहिं हियपै सदय ॥

सूर्य कण्ठ, भुजविष्णु, उरुक्रम मुख, सिर ईश्वर ।
 रक्षैं चक्री अग्र, हलायुध बाहर भीतर ॥
 मधुसूदन अरु अजिन करें रक्षा पार्श्वनिकी ।
 पृष्ठ गदाधर, परम पुरुष शं सबहिं दिशानि की ॥
 कौण्णिमहँ उरुगाय प्रभु, हृषीकेश इन्द्रिय सकल ।
 श्वेतद्वीपमति चित्तकुँ, योगेश्वर मनकुँ प्रबल ॥

अहङ्कार भगवान् बुद्धिक् पृथिनगर्भं प्रभु ।
 क्रीडामहं गोविन्द सयन रत्नं माधव बिभु ॥
 चलिबेमहं बैकुण्ठ बैठिबेमहं शं श्रीपति ।
 करे यज्ञमुक् अशन माँहि भयते कमलापति ॥
 सुनि रत्ना हरि हँसि गये, स्तन पीयो कीयो शयन ।
 इत गोपनि मगमहं लख्यो, पश्यो पूतना भीमतन ॥

कृष्ण करनितै मरी पूतना सद्गति पाई ।
 काटि कूटि सब अंग गोप मिलि आँच लगाई ॥
 विष पिआइवे द्वेषभाववश दुष्टा आई ।
 दई धाई गति श्याम बकी निज लोक पठाई ॥
 बकी परमगतिकी कथा, पढ़े सुने जे नेमतै ।
 इह सुख भोगे अंतमहं, पाहि परमपद प्रेमतै ॥

इति श्रीभागवतचरितके पञ्चमाहमें पूतना मोक्ष नामक
 पञ्चम अध्याय समाप्त ।

अथ षष्ठोऽध्यायः

[६]

कहें परीक्षित—प्रभो ! अपर हरि-चरित सुनावें ।
 भक्तनि सुख हित श्याम अवनिपै तनु धरि आवें ॥
 बोले शुक—सुनु भूप ! श्यामने करवट लीन्हों ।
 मैया अति मन मुदित बुलायो ब्रजमहँ दीन्हों ॥
 आई गोपी चाव लै, सजी बजी सब आज हैं ।
 जन्मोत्सव करवट बदल, एक पंथ द्वै काज हैं ॥

द्विजनि दीन अरु दुखिनि दान दिनभर करवायो ।
 बुलवाये बहु बिप्र महारि अभिषेक करायो ॥
 पीवत पीवत दूध लालकूँ निंदिया आई ।
 छकरा नीचे सुघर पलकिया मातु बिछाई ॥
 हौलें हौलें जाइकें, मातु सुवाये श्याम तहँ ।
 भई लीन सत्कारमहँ, गोपी उत्सव करहिं जहँ ॥

खुली लालकी आँखि मातु तहँ नाहिं निहारी ।
 रोये बालक बने साम जनु ऋचा उचारी ॥
 हूहल्लामहँ फँसी सुनी नहिं माता बानी ।
 घूमघड़ाको करूँ लालने मनमहँ ठानी ॥
 नव पल्लव सम सुघर पग, लखि छकरा सूधे करे ।
 छुवत भाँड़ रस घट शकट, अड़ड़ घम्म करिकें गिरे ॥

गोपी इत उत भर्गी भई भयतैं ब्याकुल अति ।
 एक मात्र घनश्याम नंदरानीकी गति मति ॥
 दौरी छकरा ओर अबहिं जहँ श्याम सुवाये ।
 उलट्यो देख्यो शकट झपटिकें लाल उठाये ॥
 प्यायो पय द्विज आइ तब, शांति पाठ सबने कस्यो ।
 अति बिस्मित सबई भये, गोपनि छकरा पुनि धस्यो ॥

कागासुर इक दिवस काक बनि हरिढिँग आयो ।
 पकरि टेंदुआ तुरत कंसके पास पठायो ॥
 पुनि द्विज श्रीधर असुर कंस को बनिकें सेवक ।
 आयो हरिकूँ हनन परे जहँ जगके रक्षक ॥
 श्रीहरि-लीलाशक्तितैं, दंत भंजि मुख खीर भरि ।
 ब्रजतैं वाहर कस्यो नैद, अद्भुत कीयो कृत्य हरि ॥

पलनामहँ पौढ़ाइ लालकूँ मातु झुलावैं ।
 थपथपाइ कछु कहैं हलावैं अति सुख पावैं ॥
 लीन्हीं करबट श्याम लगे रोवन जगबन्दन ।
 दीयो आँचल मातु पियो पय पुनि नैदनन्दन ॥
 पय पिआइ मुख चूमिकें, गोदीमहँ बैठाइकें ।
 मातु खिलावति मगनमन, इत उत बस्तु दिखाइकें ॥

वृणावर्त हरि लख्यो देखिकें मन मुसकाये ।
 अति भारे बनि गये मातुके अङ्ग पिराये ॥
 भूमि बिठाये श्याम मातु मनमहँ घबरावैं ।
 च्यौँ सुत भारी भयो भेद माता नहिँ पावैं ॥
 लगी मातु गृह काजमहँ, असुर बवन्दरबनि गयो ।
 लै हरिकूँ नभमहँ उड़्यो, अन्धकार ब्रजमहँ भयो ॥

सैर सपट्टो करत असुर सँग नभमहँ डोलत ।
 इत गोपी अरु गोप बिरह महँ सब मिलि रोवत ॥
 हरि सब देखे दुखी असुरको गरौ दबायो ॥
 पटियापै लै गिरे ताहि परलोक पठायो ॥
 निरखि लालकूँ कुशल सब, मुदित मातु गोदी धरे ।
 बालकृष्ण अद्भुत चरित, यों ब्रजमहँ बहुतक करे ॥

एक दिवस लै अङ्क लालकूँ मातु खिलावै ।
 मातृनेहमहँ मरत मधुर पय मुदित पिआवै ॥
 निरखि मंदमुसकान मातु मनमाँहि सिहाई ।
 जमुहाई हरि लई मातु तब चुटकि बजाई ॥
 मुखमहँ माताने लखे, रवि, शशि, सागर, द्वीप, बन ।
 अनिल, अनल, जल, नभ, अवनि, सरिता, पर्वत, जीवगन ॥

सहसा सुत मुख माँहि निरखि सब सहमी जननी ।
 थर थर काँपहिँ मनहुँ जाल लखि डरपति हरिनी ॥
 जिहि हित तरसत बिज्ञ मातु सो बिपदा चीन्हिँ ।
 निश्छल निरख्यो नेह संबरन लीला कीन्हिँ ॥
 सूत कहें—बल श्याम की, नाम करन लीला कहूँ ।
 भूख्यो हौँ आवेशमहँ, कृष्ण भाव भावित रहूँ ॥

इति श्रीभागवतचरितके पञ्चमाहमें शकटासुर काकासुर तृणावर्त
 मोक्ष तथा विश्वरूप दर्शन नामक छठवाँ अध्याय समाप्त ।

अथ सप्तमोऽध्यायः

[७]

एक दिवस बसुदेव पुरोहित गर्ग बुलाये ।
करि पूजा सत्कार बिनययुत बचन सुनाये ॥
बोले—गुरुवर ! आज आप गोकुलकूँ जावें ।
तहँ द्वै बालक बसहिं नाम तिनके धरि आवें ॥
शौरि बचन सुनि गर्गमुनि, अति ही आनन्दित भये ।
पोथी पत्रा बाँधिके, तुरत नंद ब्रजमहँ गये ॥

नन्द निहारे गर्ग विष्णु सम पूजा कीन्हि ।
करि पूजा स्त्रीकार हरषि मुनि आशिष दीन्हि ॥
नामकरन संस्कार सुतनिको कीजे मुनिवर ।
मुनि समुझाये नंद न मेरो करिबो हितकर ॥
बोले ब्रजपति—जाति कुल, के जन नहीं बुलाउँगो ।
गुप्त भावतैं गोष्ठमहँ, नामकरन करवाउँगो ॥

सोरठा—नन्द विनय स्वीकारि, नामकरन अनुमतिःदई ।
सबई सांज सम्हारि, आई मैया गोष्ठमें ॥

छप्पय—श्याम रोहिणी लिये रामकूँ मैया यशुमति ।
बोले मुनिवर गर्ग—रोहिणी सुत जिह ब्रजपति ॥
संकर्षण, बल, राम नामतैं बोले जावैं ।
जे यशुमति-सुत बासुदेव हरि कृष्ण कहावैं ॥
नारायण सम तनय तव, ब्रजकी रक्षा करिगे ।
हरि-सुर-द्रोही असुर दलि, भूमि भार भय हरिगे ॥

सोरठा—धुपकें धरिकें नाम, गर्ग मधुपुरीकूँ गये ।
 लैकें बल अरु श्याम, गई मातु पुनि महलमहँ ॥
 छप्पय—मैया पूछें—धरयो नाम का मुनि छोरनिको ।
 जशुमति बोलीं—नाम कृष्ण बलराम ललनिको ॥
 भारी हैं कछु नाम कहें हम कनुआ बलुआ ।
 उत्सव भयो न कछू पठाओ घर घर हलुआ ॥
 हरि कनुआ बलुआ बने, गोकुलमहँ बढिबे लगे ।
 कछुक दिवसमहँ रेगिकें, घुटुअन बल चलिबे लगे ॥
 बन्दर बालक सरिस हाथ पाँइनि बल किदिरे ।
 इत उत भोरे बने नन्द आँगनमहँ बिहरे ॥
 घिसिरि घिसिरिकें कबहुँ गोष्ठमें घुटुअनि जावें ।
 गोशालाकी कीच चलत निज तन लपटावें ॥
 पग नूपुर कटि करधनी, चलिबे महँ रुनु मुनु बजहिं ।
 शब्द सुनत इत उत लखत, हिय हुलसत किलकत भजहिं ॥
 समुक्ति नन्द लखि बृद्ध संग ताके लगि जावें ।
 जब मुरि देखें पुरुष मातुके ढिँग भगि आवें ॥
 अम्मा बब्बा मधुर तोतली बोली बोलें ।
 गोबर अरु गोमूत्र पंकमहँ बिहरत डोलें ॥
 जब देखो तब गोष्ठमहँ, चंचलता अद्भुत करे ।
 गैवतिके पैरनि परे, मैया अति मनमहँ डरे ॥
 करि उबटन अन्हवाइ मातु मँगुरी पहिरावें ।
 गोरोचनको तिलक डिठौना भाल लगावें ॥
 इत उत दीठि बचाइ गोष्ठमहँ लाला जावें ।
 बछरा, गोबर-घास कीचतैं दुँद मधावें ॥
 मातु उठावत डरि तुरत, पुनि पुनि चूमति मधुर मुख ।
 छातीतैं चिपटाइकें, हियमहँ पावैं परम सुख ॥

चंचलताकूँ निरखि मातु खीजें हरषावें ।
 कच्छ मच्छ बाराह कबहुँ बडु बिप्र बतावें ॥
 पाँ पाँ पैयाँ चलें खाई अब माखन रोटी ।
 करे' मातुतें रारि रोषमहँ पकरे' चोटी ॥
 मधुर मधुर बतिआँ करे', ब्रजबासिनिके मन हरे' ।
 रसिया गावें नाचिकें, नित नूतन लीला करे' ॥

बछरनिकी गहि पूँछ लटकिकें इत उत जावें ।
 गैया मैया भैंसि चमरिया कहि कहि गावें ॥
 पकरै' गैयनि सींग कुदकि ऊपर चढ़ि जावें ।
 ताता थैया करे' लुगाइनि नाच दिखावें ॥
 कण्ठ मधुर स्वर मनहरन, बाल सुलभ कूजत कलित ।
 होहि मुदित मन मातु अरु, गोपी लखि लीला ललित ॥

कबहुँ साँड़के सींग पकरिकें तिनितैं खेलें ।
 कबहुँ पकरै' श्वान सर्प तिनि मुख कर मेलें ॥
 कबहुँ ताता करे' आगिकूँ पकरन जावें ।
 कबहुँ बन्दर मोर खगनिकूँ पकरि नचावें ॥
 कबहुँ शस्त्रागारमहँ, असिपै हाथ फिराइकें ।
 किलकैं होवैं मगन अति, वस्तु अनौखी पाइकें ॥

कबहुँ खेलन चन्द्र मातुतैं पुनि पुनि माँगें ।
 कबहुँ पीकें दूध गोदतैं झटपट भागें ॥
 कबहुँ जलमहँ घुसैं भिगोवें तन पट सगरे ।
 कबहुँ पक्षिनि पकरि करे' गोपितितैं झगरे ॥
 कबहुँ द्विजकूँ देखिकें, करि प्रनाम भगि जात हैं ।
 कबहुँ परसी खीरिकूँ, चाटि चाटिकें खात हैं ॥

कबहुँ घरकी वस्तु लाइकेँ बाहर खोवें ।
 कबहुँ दूटे दाँत दिखावें पुनि पुनि रोवें ॥
 कबहुँ कंटकाकीण गैलमहुँ बरवश जावें ।
 माता लावें पकरि नहीं आवें चिल्लावें ॥
 बहु बिधि लीला लालजी, ललित ललित नित प्रति करहिं ।
 ब्रजमहुँ बसि बलदेव सँग, ब्रजवासिनिके मन हरहिं ॥
 एक दिवस बल श्याम गोप बालनि सङ्ग खेलें ।
 यमुना तटपै जाइ दंड सब मिलिकेँ पेलें ॥
 पेलि पालिकेँ दंड कदम तर गये कन्हारि ।
 मीठी माटी निरखि दुबकि थोरी-सी खाई ॥
 लखि बोले बलदेवजी, कनुआ ! माटी खातु है ।
 मैयातैं अबही कहूँ, अब तू बिगड़यो जातु है ॥
 यों कहि पकरे श्याम राम माता ढिँग लाये ।
 डरे मातुकूँ देखि कमल नैननि जल छाये ॥
 पूछें माता—कहो श्याम ! च्यों माटी खाई ।
 बोले नटवर—तनिक न खाई माटी माई ॥
 नहिं पतिआवे देखि मुख, दै दिखाइ, फाड़यो वदन ।
 सुत-मुखमहुँ माता लखे, तीन लोक चौदह भुवन ॥
 लखि मुखमहुँ ब्रह्माण्ड गोप गोपीपति ब्रजकूँ ।
 निरखत पकरें श्याम अकबकी ठाढ़ी निजकूँ ॥
 जगदीश्वर की शरन गई तारी सी लागी ।
 ब्रह्मज्ञानकी बात करै ममता सब भागी ॥
 सुत सनेहमय तुरतई, माया फेरी श्याम जब ।
 फिरि कनुआ कहिबे लगी, भूली मुखकी बात सब ॥
 इति श्रीकृष्ण चरित के प्रथम विश्राम में नामकरण बाललीला तथा
 मृद्मक्षणा नामक सप्तम अध्याय समाप्त ।

अथ अष्टमोऽध्यायः

[८]

वय जब कछु कछु बढी नन्दलालाकी थोरी ।
 सीखी बिद्या प्रथम दही माखनकी चोरी ॥
 संग सखा सब लिये खेलिवे घर घर जावे ।
 कहँ माखन दधि धरयो सैनतें ताड़ लगावे ॥
 भाभी कहि भापैं भवन, कहैं नई पहिनी चुरी ।
 बतियाँ बोलें मधुर अति, मुख मिश्री हियमहँ छुरी ॥

चोरीके सब साज सजे संगी शिशु कीन्हे ।
 भेद लगावे कछू कछू इत उत करि दीन्हे ॥
 कछू बहानों करें सरलता मुँहपै लावे ।
 इत उत बात बनाइ श्याम घरमाहिँ घुसावै ॥
 चोर कलामहँ निपुण अति, नंदनंदन घनश्याम हैं ।
 चोरे मन, माखन मदन-मोहन शोभाधाम हैं ॥

भोरो बदन बनाइ बिहँसि घरमहँ घुसि जावे ।
 चाची भाभी कहें प्यारतें गहकि बुलावे ॥
 यदि देखें नहिँ डौल लौटिकें पुनि पुनि आवे ।
 जब घर सूनों लखें चोरि दधि माखन खावे ॥
 गोपी अति उत्सुक रहहिँ, कथा कृष्णकी ही कहहिँ ।
 माँगहिँ बिधितें सतत बर, कब हरिकी साँसति सहहिँ ॥

ब्रजबनिता श्रीकृष्ण ललित लीलनिपै रीर्मी ।
जब लाला अति लगे करन तब कछु कछु खीर्मी ॥
मनमहँ तो अति मोद क्रोधयुत बदन बनायो ।
यशुमति ढिँग चलि कहहिँ सबनिमिलिमतोकमायो ॥
सजि बजिकेँ सब मिलि मुदित, उपालम्भ दैवे चलीं ।
गोकुलकी सब गलिनिमहँ, खिलीं मनहुँ पंकज कलीं ॥

लखि गोपिनिकूँ मातु कुशल पूछी बैठाई ।
करि पालागन सबनि कृष्णकी बात चलाई ॥
नहिँ हम ब्रजमहँ रहै कान्ह अब बहुत सतावै ।
घर घर चोरी करे नित्य तकरार मचावै ॥
दूध, दही, नवनीत, घृत, चोरि सखनि सँग खातु है ।
कहनी अनकहनी कहे, ढीठ भयो सतरातु है ॥

चुपके घरमहँ घुसे घरयो दधि माखन पावै ।
संगी साथी मोर बानरनि तुरत खवावै ॥
यदि न मिलहि नवनीत कुपित हूँ मटुकी फोरै ।
पटक पुरातन पात्र लाइ आँगनमहँ तोरै ॥
पकरै गोपी तुरत तो, छोरनिके सँग भगतु है ।
घरमहँ आगि लगाइकेँ, मारि ठठाको हँसतु है ॥

जिह छोटो है नहीं छोकरा खोटो भारी ।
मुँहफट अति ई भयो देइ छूटत ई गारी ॥
छींकैपै चढ़ि जाय जानि दधि माखन जावै ।
चोरी बिद्या निपुण बिबिध बिधि युक्ति चलावै ॥
कबहुँ बाबाजी बनै, छोरी हूँ बनि जातु है ।
मूसे बिल्लीकी तरह, घुसि घरमहँ दधि खातु है ॥

कबहुँ फिरकै आइ हमें ही चोर बतावै ।
 रानी तेरो पूत भूत बनि कबहुँ डरावै ॥
 बन्दर लावे पकरि कहें—जे तोकूँ काटें ।
 खिलखिलाइ हँसि जाइ जबहिं हम जाकूँ डाँटें ॥
 चितवनमहँ टोना भइयो, बानी मिसरी सम मधुर ।
 करै काज अन्यायके, तोऊ लागै अति सुघर ॥

मैया ! कहँ लगि कहैं बात कछु कहत न आवै ।
 निशिदिन चोरी युक्ति सोचि उत्पात मचावै ॥
 मुखतैं सीटी मारि बाल गोपाल समेटै ।
 देखै आँगन लिप्यो वहीं टट्टीकूँ बैठै ॥
 खाइ, बिगारै, उलीचै, बर्तन फोरै हँसि परै ।
 त्यागि देहि मल मूत्र हू, घर आँगन मैलो करै ॥

नँदरानी सुनि हँसी कहें—मदमाती तुम सब ।
 कनुआ ममढिँग रहै करै घर घर चोरी कब ॥
 ऊपरतैं करि रोष कहें गोपी—तुम रानी ।
 पक्ष करोगी पुत्र प्रथम ही हमने जानी ॥
 जो जिह बाहर करतु है, सो घरमहँ हू करैगो ।
 चोरी पकरो दंड फिरि, दैवो तुमकूँ परैगो ॥

सोचैं मनमहँ मातु—बने जिह कैसें छोरी ।
 कैसें घर घर जाइ करे माखनकी चोरी ॥
 करि करि क्रीड़ा सरस श्याम सुख सबकूँ दीन्हों ।
 मातु मनोरथ सिद्ध करहुँ हरि निश्चय कीन्हों ॥
 मोर भये जननी उठी, दधि परौँदि मथिबे लगी ।
 घमर घमरको मधुर रव, सुनि हरिकी निदिया भगी ॥

मातु मथहिँ दधिहिलहिँ कान कंडल बोबो कर ।
स्वेदबिन्दुयुत बदन कमलपै जनु हिम-कन बर ॥
राजमालती सुमन भरहिँ सिरतैँ अति सुन्दर ।
मनहुँ कुसुम बरसाइ करहिँ सुर मान निरन्तर ॥



श्याम त्यागि शैया तुरत, मातु मथानी पकरिँ ।
अम्मा बोबो प्याइ दै, पुनि पुनि बोले अकरिँ ॥

सम्मुख सुतकूँ निरखि नेहतेँ मातु उठायौ ।
 अङ्ग लाइ मुख चन्द्र चूमि पय पान करायौ ॥
 इत जननी हिय हरषि कृष्णकूँ दूध पिआवै ।
 धरयो बरोसी दूध उफनि उत आगि बुझावै ॥
 दूध पूत इक संगई, उफने माता सुतहिँ तजि ।
 दूध उतारन आगितैँ, लैयाँ पैयाँ गई भजि ॥

नहीं अघाये श्याम रोष मैयापै आयौ ।
 लोढ़ा ढिँगई धरयो क्रोध करि ताहि उठायौ ॥
 मास्यो तकिके भाण्ड दहीको फूट्यो फटई ।
 फुटत मथानी भगे श्याम माखन लै भट ई ॥
 आइ यशोदा दृश्य लखि, हँसी पुत्र पकरन चली ।
 सोचेँ मनमें श्याम की, चोरी की कलई खुली ॥

माता चुपके चली चोरकी चोरी पकरन ।
 निरखत इत उत सभय चपल दृग जनमनरञ्जन ॥
 जननी आवत लखी ओखरी तजि हरि भागे ।
 पीछेँ दौरी मातु कृष्ण डरि काँपन लागे ॥
 करमहँ छोटी सी छड़ी, भार नितम्बनतैँ नमित ।
 खुले केश सिरतैँ सुमन, गिरहिँ भगहिँ तन अति श्रमित ॥

जिनकूँ जप, तप, ध्यान योगत पकरि न पावेँ ।
 तिनकूँ जननी छरी लिये डर सहित भगावेँ ॥
 देह थूल सुकुमार श्रमति जब जानी माता ।
 स्वयं पकड़महँ आइ गये तब भवभयत्राता ॥
 निजकरतैँ हरि कर पकरि, बोली—च्यौँ चोरी करी ।
 रोये आँखिनि मीढ़ि प्रभु, तब जननी फेँकी छरी ॥

कसिकेँ पकरे श्याम दई मीठी-सी गारी ।
हरिकूँ बाँधन हेतु कचनितैँ डोरि निकारी ॥
दयो लपेटा एक कमरमहँ बाँधन लागी ।
द्वै अंगुल कम रही जेबरी दूसरि माँगी ॥
पुनि द्वै अंगुर कम परी, पुनि बाँधी पुनि कम भई ।
घरकी सब रस्सी चुकीं, हँसी मातु बिस्मित भई ॥

चकित चकित ह्वै मातु लालको उदर निहारे ।
पुनि पुनि पकरे पेट भयो का सभय विचारे ॥
भयो स्वेद सब अङ्ग थके खुलि बाल गये सब ॥
माला खिसकीं गिरे फूल हरि रोकि गये तब ।
कृष्ण कृपा जिनपै भई, तिनिके कारज सँध गये ।
श्याम नेह बश आपु ही, प्रेमपाशमहँ बँध गये ॥

गोपी कीन्ही बिदा करै गृह कारज मैया ।
ग्वाल बाल मिलि कहै—खेल कछु होवै मैया ॥
दाम उदरमहँ कसी उल्लखलमहँ सो बाँधी ।
उलटयो गाड़ी बनी बैल बनि प्रभु ने साधी ॥
ग्वालबाल तिकि तिकि करे, हाँकेँ हरि खींचन लगे ।
सम्मुख यमलार्जुन लखे, धनदपुत्र धनमद ठगे ॥

बड़ो अटपटो पन्थ प्रेमको नहिं सब जानै ।
जिनकूँ योगी यती जगन्मय जगपति मानै ॥
तिनकूँ मैया पकरि बाँह मारै धमकावै ।
पिटि पिटाइकेँ श्याम गोद वाहीकी आवै ॥
जिनकी लीला ललित सुनि, सब जग आनँदमहँ मर्यो ।
जगदीश्वर जिनि सुत बने, कौन सुकृति यशुमति कश्यो ॥

दोहा—सूतकहें—ऋषिगन सुनहु, नंद यशोदा वृत्त ।
 पूर्वजन्ममें जो कश्यो, हरिहित चारु चरित्र ॥
 छप्पय—नंद द्रोण द्विज हते धरा पत्नी संग बनमहँ ।
 भिक्षापै निर्बाह करहिं धरि श्रीहरि मनमहँ ॥
 करन परीक्षा बिष्णु अतिथि द्विज बनि बन आये ।
 धरा कश्यो सत्कार मातु पितु विप्र बिठाये ॥
 करी थाचना अन्नकी, धरा अधिक चिंतित भई ।
 पति अभावमहँ अन्नहित, स्वयं बनिकके घर गई ॥
 बनिक अन्न घृत दयो रूपने जादू डारो ।
 लखि कुच करि संकेत मूल्य माँगत मतवारो ॥
 सतां प्रतिज्ञा करी काटि कुच दोऊ दीन्हें ।
 लै सामग्री आइ अतिथि पद बन्दन कीन्हें ॥
 अतिथि बिष्णु बनि बर दयो, ममहित कुच काटे जननि ।
 पुत्र बनूँ तव स्तन पिऊँ, तू प्रकटै मम मातु बनि ॥
 बसु बनि पुनि द्विज द्रोण भये ब्रज नन्द गोपपति ।
 धरा यशोदा भई बने सुत कृष्ण जगतपति ॥
 बाँधि उलूखल दये कृष्ण खींचे गाड़ी सम ।
 बाल बृषभ सम चलें श्याम शोभा अति अनुपम ॥
 यमलार्जुनके मध्य हरि, गये उलूखल फँसि गयो ।
 खींच्यो बलतैं बाल प्रभु, गिर्यो बृहन्न अति रव भयो ॥
 दूटत तरु अति सुघर देव-सुत प्रकट भये तहँ ।
 करत प्रकाशित दिशनि नम्र ह्वै आये हरि जहँ ॥
 नलकूबर मणिग्रीव धनद-सुत बुद्धि गँवाई ।
 पायो नारद शाप भये तरु दोऊ भाई ॥
 कृष्ण दरशतैं दुख कटे, विषय बासना हू जरी ।
 तनु पुलकित गद्गद गिरा, दामोदर बिनती करी ॥

यमलार्जुन-विनय

कृष्ण ! करुणामय कहलाओ, पार परमेश्वर पहुँचाओ ।
 सबके तुम तनु प्राण हो, मन इन्द्रियके ईश ।
 काल कालके सत्य तुम, जगनायक जगदीश ॥
 सृष्टि लीलार्ते रचवाओ, पुण्यपथ प्रभुवर दरशाओ ॥१॥ पार परमे०
 कैसे इन्द्रिय करि सकें, ग्रहन तुमहि हे नाथ ।
 पकरें कैसे असत् ये, भौतिक तनके हाथ ॥
 बुद्धि, मन, अहं सबहिं हारे, हमें यदुनंदन अपनाओ ॥२॥ पार परमे०
 को तव महिमा कहि सके, वेदहु गये भुलाइ ।
 स्वयं भये अवतीर्ण अब, ब्रजमण्डलमें आई ॥
 परम मङ्गलमय सुखकारी, मातृकुँ लीला दिखलाओ ॥३॥ पार परमे०
 नारदजीके शाप वश, भये वृक्ष हम आई ।
 करे कृतारथ रूप यह, दामोदर दिखलाइ ॥
 विनय हमरी है अघहारी ! मोह हियको हरि हटवाओ ॥४॥ पार परमे०
 बानी गावै गुन सदा, कथा सुनें नित कान ।
 कर परिचरियामें रहें, चित्त चरनके ध्यान ॥
 नव सिरजगनिवास तुमकुँ, संत दरशन नित करवाओ ॥५॥ पार परमे०
 आप्य—प्रभु प्रसन्न है परम प्रेम दुरलभ वर दीन्हों ।
 आयसु हरिकी पाइ गमन निज पुर तिनि कीन्हों ॥
 पूछें—शौनक सूत ! धनद सुत का अघ कीयो ।
 च्यों मुनि नारद शाप वृक्ष बनिबेको दीयो ॥
 हँसिकें बोले—सूतजी, भगवन ! धनमद अति विकट ।
 तिहि मदमहँ मदमत्त बनि, बिहरहिं दोऊ सर निकट ॥

सङ्ग अपसरा वस्त्रहीन नंगे हैं न्हावें ।
हरि गुन गावत परम रसिक नारद मुनि आवें ॥
लखि मुनि युवती निकरि पहिन पट ऋषि सन्माने ।
किंतु धनद-सुत सत्त नम्र ठाढ़े भौं ताने ॥



शाप दयो मुनि तरु वनों, यमलार्जुन ते हैं गये ।
पुनि द्वापरके अन्तमहँ, परसि प्रभुहिँ पावन भये ॥

दोहा—यह प्रसंगवश धनसुत—कथा कही अभिराम ।

प्रकृत कथा मुनिवर सुनो, चरित कश्यो जो श्याम ॥

छप्पय—वृद्ध पतन रव सुनत नन्द गोपादिक धाये ।

बँधे उलूखल कृष्ण करत क्रीड़ा तहँ पाये ॥

कहें परस्पर—गिरे वृद्ध नहिँ आँधी पानी ।

बालनि सच सब कही बात काहू नहिँ मानी ॥

गिरे दूधके दाँत नहिँ, जिह छोटो सो छोकरा ।

तरु उखारि कैसे सके, कहें युवक अरु डोकरा ॥

बँधे बिलोके श्याम नन्दबाबा ढिँग आये ।

दाम खोलि मुख चूमि प्रेमतै हृदय लगाये ॥

बाबा बोले—बत्स ! गोद मैयाकी जा अब ।

मैया मारे मोइ न जाऊँ, बोले हरि तब ॥

यशुमति मन संताप अति, तब मम मति मारी गई ।

नहिँ सुत आयो अब तलक, सुमिरि मातु व्याकुल भई ॥

साँझ भई पुनि श्याम मातुके हिय लपटाये ।

उमग्यो पुत्र सनेह नयनके नीर न्हावाये ॥

यों ब्रजमहँ हरि नित्य नई ई धूम मचावें ।

साधारन शिशु सरिस हरिहिँ युवती फुसलावें ॥

बेद बिदित बंदित जगत, भोरे शिशु सम बनि गये ।

जाके बशमहँ सब जगत, ते ब्रजवासिनि बस भये ॥

कबहूँ नाचें नाच गीत कबहूँ बर गावें ।

मार्गे माखन कबहूँ कबहूँ हठि रार मचावें ॥

कबहूँ माँगें भीख मिखारी बेश बनाई ।

कबहूँ घर घर जाइ दिखावें स्वाँग कन्हाई ॥

कबहूँ आँगन लीपिकें, चौक पूरि ज्योनार करि ।
ब्याह करे दुलहा बने, मोरपंख शिरमौर धरि ॥

काम बतावें मातु पिता ततछिन करि लावें ।
माँगें माता वस्तु दौरिकें ताहि उठावें ॥
बाट तराजू लाइ धरे आगे मैयाके ।
कपड़ा लावै दौरि बड़े हलधर भैयाके ॥
धोवें पग नँदराय जब, लाइ खड़ाऊँ प्रभु धरे ।
भक्तबश्य श्रीजगतपति, सेवक सम कारज करे ॥

जगमहँ भटकै जीव प्रेम बिनु शान्ति न आवै ।
छिन भंगुर जग भोग भोगिके सुख नहिं पावै ॥
प्रेम धाम हैं श्याम हियेमहँ यदि बसि जावें ।
होवै जीव कृतार्थ दुःख संताप नसावें ॥
प्रेमपन्थ अति अटपटो, बिनु बोले दिन दिन बढ़ै ।
चाहै वइ यइ फेरि मुख, जाय रङ्ग गहरो चढ़ै ॥

इति श्रीभागवत चरितके पञ्चमाह में माखनचोरी तथा
दामोदर लीला नामक प्रथम अध्याय समाप्त ।

अथ नवमोऽध्यायः

(६)

ब्रजमहँ काछिनि हती एक सुखिया हरिप्यारी ।
 कृष्ण प्रेममहँ रहति सतत पगली मतवारी ॥
 हरि हियकी सब जानि उपेक्षा भाव दिखावें ।
 यों उत्कण्ठा तासु दिनिहिँ दिन अधिक बढ़ावें ॥
 जब अति उत्कण्ठा बढ़ी, सद्य साँवरो है गयो ।
 अभिलाषा पूरन करी, सुखियाकूँ अति सुख दयो ॥

नंदभवनके निकट 'लेउफल' सुखिया बोली ।
 जानी अनुगत कृष्ण कृपाकी गठरी खोली ॥
 पस भरि लाये अन्न दयो कर आगे कीये ।
 सुखिया सब फल तुरत करनिमें हरिके दीये ॥
 कृष्ण हाथ फलतैं भरे, हरि रतननि डलिया भरी ।
 यों सुखिया सब श्यामकूँ, फल दैकें जगतैं तरी ॥

अति क्रीड़ा प्रिय कृष्ण ग्वाल बालनि सँग जावें ।
 होहिँ खेलमें मगन बुलावें मातु न आवें ॥
 कहें मातु प्रिय बचन प्यार करिकें फुसलावें ॥
 आवें भरि तनु घूरि लाइ पुनि मातु न्हावें ॥
 मैया परसै प्रेमतैं, बाबा सँग भोजन करें ।
 कबहुँ लिपटैं प्रेमतैं, कबहुँ मातातैं लरें ॥

अति चंचल अति चपल गोदतैं उठि उठि भागैं ।
 निरखैं मैया भगत खड़ी है जामैं आगैं ॥
 जननी दृष्टि बचाइ कृष्ण हौलैंतैं सटकैं ।
 ऊधम नव नित करें जाइ पेड़नितैं लटकैं ॥
 बनमहँ बिहरत मुदितमन, नील पीत पट तन लसहिं ।
 ब्रजबासिनि सुख देहिं नित, श्याम राम गोकुल बसहिं ॥

यमलार्जुनको पतन अशुभ अति गोपनि मान्यो ।
 नहीं निरापद ठौर शिशुनि हितकर नहिं जान्यो ॥
 पंचायत सब करहिं होहिं उत्पात यहाँ अति ।
 नाना रूप बनाइ असुर इत आवैं नित प्रति ॥
 तातैं तजि गोकुल तुरत, श्रीवृन्दावन चलहु सब ।
 भूमि सरस जल थल बिमल, बोले श्री उपनन्द तब ॥

साधु साधु सब कहैं कश्यो अनुमोदन सबनैं ।
 बोले बूढ़े गोप—लख्यो वृन्दावन हमनैं ॥
 सबई तहाँ सुपास दूब, द्रुम, जल, बन, गिरिबर ।
 श्री यमुनाके निकट परम सुन्दर अति सुखकर ॥
 चलो आजई चलिङ्गे, निश्चय सब मिलिकैं कश्यो ।
 सुनत बँधे बिस्तर तुरत, छकरनिमहँ सब धन भश्यो ॥

तुरही बाजन लगी जोरि छकरा सब दीन्हें ।
 धनुष बानलै हाथ गोप कछु आगे कीन्हें ॥
 तिनके पीछे धेनु साँड़ बछरा सब जावैं ।
 छकरनि गोपी चढ़ीं गीत गोबिंदके गावैं ॥
 माता यशुमति रोहिनी, राम श्याम संग रथ चढ़ीं ।
 ज्यों मन संग इन्द्रिय चलहिं, त्यों हरि संग गैया बढ़ीं ॥

सुतनि गोदमहँ लिये मातु जावें वृन्दावन ।
 मगमहँ निरखत श्याम वृद्ध, खग, मृग, बन, पशुगन ॥
 कौतूहलके सहित मातुतैँ पूछें नटवर ।
 मैया ! जे को रहैं कहाँ कित है इनको घर ॥
 मैया प्यार दुलारतैँ, इत उतकी बतियाँ कहैं ।
 कहैं अटपटी बात जब, हँसि मुख फेरे' चुप रहैं ॥

वृन्दावनमहँ पहुँचि सबनिने डेरा डारो ।
 कृष्णचन्द्र है उदित कश्यो नम बन उजियारो ॥
 वन, गिरि, तटकी छटा निरखिहरि अति सुख पायौ ।
 वत्सपाल बनि मातु पिता मन मोद बढ़ायौ ॥
 गोपवत्स गोवत्स, संग, लिये विविध कौतुक करे' ।
 मुरली मधुर बजाइके', गावें नाचें स्वर भरे' ॥

पाई अपनी बेनु बिहँसि कर कमलनि धारी ।
 त्रिना बताये लगे बजावन श्रीबनवारी ॥
 मुरलीकी धुनि सुनी भये जड़ चेतन प्रमुदित ।
 मनहुँ प्रिया रव सुनत प्रेष्ठ हिय पंकज बिकसित ॥
 अधरामृत नितप्याइके', पालि पोसि मोटी करी ।
 बैरिनि बंशी बनि गई, ब्रजबासिनिकी मति हरी ॥

बछरनि लावैं घेरि लकुट लै मुरलीधारी ।
 नित प्रति वनमहँ जाइँ बजावें बेनु बिहारी ॥
 गोफिनमहँ धरि ढेल घुमावें तकिकें मारे' ।
 जावै मेरो दूरि मुदित सब ग्वाल पुकारे' ॥
 चरननि नूपुर बाँधिके', नाचैँ सैन चलाइके' ।
 चाई माई करि फिरै', गिरै' रेतपै जाइके' ॥

ग्वालनि गाय वनाय साँड़ सम स्वयं रम्हामें ।
 वने वाल कछु ग्वाल साँड़ ढिँग गाइनि लामें ॥
 कवहूँ द्वै वनि साँड़ परस्पर टक्कर मारे ।
 कवहूँ जीतें श्याम कवहूँ बलदाऊ हारे ॥
 सारस मोर चकोर सम, बोली बोलें हँसि परे ।
 यों प्राकृत शिशु सरिस हरि, वाल सुलभ क्रीड़ा करे ॥

वनमहँ बालनि सहित करे हरि हलधर खेला ।
 आयो तवई दुष्ट तहाँ इक दैत्य जरैला ॥
 वनिकें बछरा जाइ मिल्यो हरिके बछरनिमहँ ।
 समुझि गये हरि बलहिँ बतायो खल सैननिमहँ ॥
 मति कछु जानत नाहिँ जे, ऐसे भोरे वनि गये ।
 चितवत इत उत बालवत, चुपके खलतें सटि गये ॥

पकरि पूँछ अरु पाँइँ कुहकुआ सरिस धुमायौ ।
 बछराको तजि रूप असुर तनु खल प्रकटायौ ॥
 कैथनि माख्यो दैत्य वृक्ष फल दूटि गिरे तव ।
 निरखि दैत्यकूँ ग्वाल वाल बोले हसिकें सब ॥
 माख्यो सारो दुष्ट जिह, भलो कर्यो दुख हटि गयो ।
 वत्सासुर उद्धार लखि, देवनि अति विस्मय भयो ॥

यों वनि बछरापाल लाल डोलें वन वनमहँ ।
 इक दिन ग्वालनि लख्यो बड़ो बक सोचें मनमहँ ॥
 है यह निश्चय असुर खड़ो मुख ऊपर कीये ।
 जब तक सोचें ग्वाल लीलि ग्वाने हरि लीये ॥
 गये कृष्ण बक वदनमहँ, निरखि ग्वाल व्याकुल भये ।
 तुरत दुष्टके कंठमहँ, पावक सम इरि है गये ॥

सहन करि सक्यो नहीं उगल दीये खलने हरि ।
मारन दौड़्यो दुष्ट चोंचतैं तुरत कोप करि ॥
हरि हँसि पकरी चोंच ग्वाल लखि अति हरषाये ।
दयो बीचतैं फारि सुमन देवनि बरसाये ॥
अति बिस्मित बालक भये, आलिङ्गन हरिको करे ।
पत्र, पुष्प, फल, लाइके, हरष सहित सम्मुख धरे ॥

असुर मृतक हरि कुशल निरखि बालक हरषावें ।
मनहुँ मृतक तनु प्राण आइ इन्द्रिय सुख पावें ॥
लै बछरनिकूँ ग्वाल बाल वृन्दावन आये ।
अति उत्सुक है वृत्त सबनि यशुमतिहिं सुनाये ॥
बगुलासुरकी बात सुनि, सबकूँ अति बिस्मय भयो ।
कहें गोप—मुनि गर्गने, सब भविष्य पहिलिहिं कह्यो ॥

यह दुष्टनिकूँ मारि सबनिकूँ सुख अति देगो ।
करै अलौकिक कर्म सुयश जिह जगमहँ लेगो ॥
मारि न कोई सकै जिही असुरनिकूँ मारै ।
जीतै सबकूँ सदा नहीं बैरनितैं हारै ॥
यों नित हरि बलरामकी, कहें सुने सोचें कथा ।
रम्यो रहे मन उनहिं महँ, होहि न सांसारिक व्यथा ॥

खेलें वनमहँ चोर एक बालकहि बनावें ।
अपर बाल सब भागि जाहि इत उत छिपि जावें ॥
खोलै तब वह आँखि जाइ खोजै बालनिकूँ ।
बनि जावें ते चोर खोजि छूवै वह जिनिकूँ ॥
आँखमिचौनी खेल पुनि, खेलें पुल बन्धन करे ।
कसि कछनी बैठक करे, ताल ठोकि कबहूँ लरे ॥

कबहुँ सेन सजाइ विजय करि गाड़ें मन्डा ।

कबहुँ खेलें खेल भड्डू गुल्लीडंडा ॥

अन्धायापी और मलूकाघोड़ा खनखन ।

कैकैडंडा चीलभूपट्टा अटकनबटकन ॥

जा छप्पनके पेड़पै, कैइ कैइ दूनी कैइ ।

खेलें हरि सब मिलि कहें, श्रीकृष्णचन्द्रकी जैइ ॥

सोरठा—बनविहंगनि सँग श्याम, बिहरे' बन-बन बाल बनि ।

संग सखा बलराम, करहि' चरित अनुपम रुचिर ॥

इति श्रीभागवत चरितके पञ्चमाहमें वृन्दावन आगमन वत्सा-
सुर वकासुर उद्धार नामक नवम अध्याय समाप्त ।

(मासिक पारायण उचीसवें दिन का विश्राम)



अथ दशमोऽध्यायः

[१०]

एक दिवसकी बात सुनहु हरि निश्चय कीन्हों ।
 काल्हि कलेऊ करे बनिहि जिह आयसु दीन्हों ॥
 लड्डू, पूआ, खीरि, जलेबी, पेड़ा, पपड़ी ।
 हलुआ, मोहनथार, समौसे, फेंनी, रबड़ी ॥
 सब सामग्री साजिकें, श्याम सग्ननि संग चलि दये
 ग्वाल बाल सबई सजे, बन शोभा निरखत भये ॥

मुख करि हरिकी ओर प्रेमतैं बैठे आगे ।
 अब सब सुखतैं बैठि हँसी कछु करिबे लागे ॥
 कोई बालक बस्त्र बखतैं बाँधे चुपकें ।
 काहुकी लै छाक सखा कछु पेड़नि दुबकें ॥
 छींको लैं चम्पत करे, और औरकूँ देहि जब ।
 खिसिआवे रोवे सखा, खिलखिलाइ हँसि जाई तब ॥

जो कनुआकूँ छुप बीर ताहीकूँ जानें ।
 पहिले जो छू लेइ विजय गवाईकी मानें ॥
 करहि अनुकरन भ्रमर सरिस स्वर गुन-गुन गावें ।
 नाचें खेलें हँसे बाँसुरी मधुर बजावें ॥
 नभमह कछु दिखाइकें, जिहका जिहका कहि बकें ।
 बोलैं—कम्मक परि गई, कान भाद्रपदमह कैं ॥

नरसिंहाको शब्द करे' श्वाननि सँग भूकें ।
 सुनि कोकिलकी कूक ताहि सँग कोई कूकें ॥
 कोई बनिकें व्यास कथा बेदनिका बाँचें ।
 कोई पट फैलाइ बिहँसि मोरनि सँग नाचें ॥
 कोई खग-छाया लखें, सँग सँग दौरे' दूर तक ।
 हंसचाल अनुकरण करि, कोई पहुँचे प्रभु तलक ॥

कोई बगुला बनें ध्यानको ढोंग बनावें ।
 कहि कहि बगुला भगत अन्य गोपाल चिड़ावें ॥
 कोई वन्दर बनें चढ़ें तरु ताहि हिलावें ।
 कोई खों खों करे' कपिनि लखि मुँह मटकावें ॥
 बकरी बकरा भेड़ बनि, चेंमें चेंमें कछु करे' ।
 करि धुनि प्रतिधुनि सुनि शपै, कोई ऊँचेंतै गिरे' ॥

कोई मेढ़क बनें मलिन जलमहँ घुसि जावें ।
 कुदकि कुदकिकें चलें टरै करि शब्द सुनावें ॥
 जलमहँ लखि प्रतिबिम्ब, हँसैं इत उत भगि जावें ।
 लखि लखि लीला ललित लाल अति हिय हरषावें ॥
 भक्तनिके भगवान जो, ज्ञानिनिके जो ब्रह्म हरि ।
 कहैं अज्ञ शिशु आज ते, ब्रज बिहरे' नरवेष धरि ॥

जिनकूँ ग्वाल गँवार खेल में खेलि हरावें ।
 तिनि ग्वालनिके भाग्य इन्द्र बिधि शम्भु सरावें ॥
 यों करि क्रीड़ा कृष्ण सबनिको चित्त चुरायो ।
 तबई तहँ अघ असुर बकी बक भाई आयो ॥
 बहिन बन्धु मेरे हने, सोचै खल जा श्यामने ।
 मारुँ गोपनिके सहित, अब अरि आयो सामने ॥

यों करि निश्चय बन्यो असुर अजगर अतिभारी ।
 मुख गिरि गुहा समान सड़क सम जीभ निकारी ॥
 अवर धरापै धर्यो ओठ घन नभमहँ लाग्यो ।
 बालनिके उर दृश्य निरखि कौतूहल जाग्यो ॥
 उपमा अजगरतें करें, गिरिकी गुहा बताइकें ।
 कोई कछु कहि कहि हँसैं, तुलना करें सिहाइकें ॥

बाल सुलभ चांचल्य कहें—जामैं घुसि जावें ।
 होहि असुर बक सरिस मरै लखि सब सुख पावें ॥
 यों कहि अहिमुख घुसे बजावत बालक तारी ।
 पुनि बछरा घुसि गये भये चिन्तित बनवारी ॥
 अन्तरयामो असुरकौ, जानि सकल छल बल गये ।
 बालक बछरा बचें कस, मरै असुर सोचत भये ॥

नन्दनंदन सरबज्ञ सबनिके घटकी जानें ।
 असुर अघासुर तिन्हें बन्धु-घाती रिपु मानें ॥
 अघ मुख प्रविशे तुरत दयासागर बनवारी ।
 सब सुर हाहाकार करें असुरनि सुख भारी ॥
 अनुगत दासनिके निमित्त, सब कारज नटवर करहि ।
 भक्त-चरन रज लोभतैं, नित पीछे पीछे फिरहि ॥

मुखमहँ हरिकूँ निरखि अघासुर अति हरषायौ ।
 सुर मुनि चिन्तित लखे श्याम तनु तुरत बढायौ ॥
 स्वाँस रुकी स्वर रुद्ध नेत्र निकसे फाट्यो सिर ।
 बछरा बाल जिवाइ करे अघ मुखतैं बाहर ॥
 असुर बदनतैं ज्योति इक, दिव्य निकसि ठाढ़ी भई ।
 मुखतैं हरि निकसे तबहिं, श्याम अंगमहँ मिलि गई ॥

अथ उद्धार निहारि अप्सरा सुर मुनि आये ।
 नृत्य बाद्य संगीत श्यामकूँ मधुर सुनाये ॥
 बेदपाठ द्विज करें देव जय शब्द उचारें ।
 ब्रह्मलोक विधि बैठि बाद्यकी बात विचारें ॥
 होहि कहाँ चलिकें लखें, आनन्दोत्सव अवनिमहँ ।
 तुरत हंस चढ़ि चलि दये, आये ब्रजमहँ कृष्ण जहँ ॥

यह कुमार बय चरित शिशुनि पौगण्ड- बयसमहँ ।
 कहाँ आई ब्रज श्याम आजु अहि माइयो बनमहँ ॥
 शुकतेँ बोले भूप परीक्षित—प्रभु ! रुकि जाओ ।
 गयो कहाँ इक बरस कृपा करि भेद बताओ ॥
 कर्म दूसरे छिन कश्यो, ग्वाई छिन कहि सकहिं नहिं ।
 कौतूहल मम हृदयमें, समाधान गुरुवर ! करहिं ॥

सुनि भूपति को प्रश्न हृदय शुकको भरि त्वायो ।
 गद्गद बानी भई नीर नयननिमहँ छायो ।
 कुपित सेहके सरिस पुलकि तनु श्वेद युक्त जब ।
 भयो प्रेममहँ मगन इन्द्रियाँ शिथिल भई सब ॥
 उतरे लीला लोकतेँ, कृष्ण कथा संकल्प करि ।
 बाह्य दृष्टि जब कछु भई, बोले प्रभु छवि हृदय धरि ॥

इति श्रीभागवतचरितके पञ्चमाह में अघासुर उद्धार नामक
 दशम अध्याय समाप्त ।

एकादशोऽध्यायः

[११]

राजन् ! करि करि प्रश्न कथाकूँ नयी बनाओ ।
 सुनहु सतत हरिचरित तबहुँ नहिँ नृपति अघाओ ॥
 मन मनमोहनमाँहिँ लग्यो बानी गुन गावै ।
 श्रवन कथा रस मत्त तिनहिँ कछु नाहिँ सुहावै ॥
 जार पुरुष ज्यों कामिनी, कथा सुनहिँ हिय बढ़त रस ।
 बार बार सुनि वृत्त नहिँ, होवें तुम हूँ रसिक अस ॥

राजन् ! अब हम गुह्य चरित अति ताहि सुनावें ।
 भक्त शिष्य गुरु पाइ रहसहूँ नाहिँ छिपावें ॥
 करि अघको उद्धार तुरत हरि बाहर आये ।
 बिस्मित गोपनि निरखि बिहँसि प्रभु बचन सुनाये ॥
 यह अजगर अघ असुर है, समुक्ति घुसे गिरि गुहा तुम ।
 चलो भयो सो भयो अब, बन भोजन मिलि करहिँ हम ॥

यह यमुनाको पुलिन बालुका कोमल कैसी ।
 जैसी सुन्दर घास छटा हूँ अनुपम तैसी ॥
 खिले सरनिमहँ कमल तरुनिपै पक्षी फुदकें ।
 लागी भैया भूख उदरमहँ मूसे कुदकें ॥
 हम सब पावें छाककूँ, पी पानी बछरा चरें ।
 बैठौ गोलाकार सब, प्रीति-भोज बनमहँ करें ॥

सुनि नटवरके बचन बाल बैठे सुनियमतैं ।
छोटे छोटे प्रथम बड़े पुनि बैठे क्रमतैं ॥
कमलकर्णिका आस पास फैले मानों दल ।
सबने पत्तलि करीं पत्र बल्कल कोमल फल ॥
पत्तलि परसी प्रेमतैं, प्रिय पदार्थ पावन लगे ।
हँसत हँसावत ग्वाल सब, प्रेम सरसतामहँ पगे ॥

नटवर गोपनि सहित करत भोजन बर बनमहँ ।
मुरली पटमहँ कसी बेत अरु सींग बगलमहँ ॥
माखन दधि मधु भात हाथमहँ ग्रास सलोनों ।
हँसत हँसतावत सतत सखनिकूँ सुख अति दीनों ॥
विधि बिधानतैं मखनिमहँ, भाग गहहिँ जे नेमतैं ।
ते ग्वालनि सँग बैठिकें, जूठो खावे प्रेमतैं ॥

बिधिने लीला लखी मोह अति मनमहँ छायाँ ।
करूँ परीक्षा भाव चित्त चतुरानन आयौ ॥
बछरा लये चुराइ छिपाये निज पुर जाके ।
पुनि बालनि लै गये भोजके थलपै आके ॥
सोचें—अब का करतु है, जिह यशुमति को छोहरा ।
बछरनिकूँ ढूँढ़त फिरें, इत हरि गिरि गुह कंदरा ॥

पुनि नहिँ निरखे बाल लाल बिधिकृत सब जान्यो ।
कृष्ण कुपित नहिँ भये मोह मायाको मान्यो ॥
होवै नहिँ विधि ग्वाल बाल बछरनि जननिनि दुख ।
बालक बछरा बने बिष्णु सबकूँ देवैं सुख ॥
शोभा, शील, स्वभाव, स्वर, नाम, रूप, बय, बेष; सब ।
जैसे जितने जब हते, तितने तस हरि बने तब ॥

बनिकें पालक ग्वाल पाल्य बछरा हरि बनिकें ।
 वृन्दावनकी ओर चले प्रभु वनतैं चरिकें ॥
 बछरा बालक मातु उठीं हियतैं चिपटावैं ।
 चूमैं चाटैं बदन प्यारतैं अंक बिठावैं ॥
 अशन, वसन, उबटन, शयन, करवावैं सुत समुष्मिके ।
 बाल बने बन जाहिं हरि, बछरनि लावें घेरिके ॥

जैसी पहिले प्रीति कृष्णपै माँ यशुमतिकी ।
 तैसी ब्रजमहँ भई सुतनिपै सब गोपिनिकी ॥
 बाढ़ै छिन छिन प्रेम बेलि सब मरम न जाने ।
 उमड़ै अति अनुराग ब्रह्मकूँ सब सुत माने ॥
 वरष माँहिं कछु दिन बचे, समुमे श्रीबलराम तब ।
 कृष्ण कहा माया रची, श्याम बतायो वृत्त सब ॥

भैया ! चढ़ि अज हन्स चारि मुखबारो आयो ।
 देख्यो मेरो खेलमाल सारो घबरायो ॥
 लैके बछरा ग्वाल बाल चोरीतैं भाग्यो ।
 जानि ताहि कंगाल न मैं फिरि पीछै लाग्यो ॥
 मैं बछरा बालक बन्यो, मेरो प्रेम स्वरूप है ।
 करै प्रेम मोतैं सकल, भव तो अंधो कूप है ॥

समुष्मि रहस बल कृष्ण चरणमहँ प्रीति दृढ़ाई ।
 इत अज आये लौटि बुद्धि तिनकी चकराई ॥
 ज्यों के त्यों सब लखे ग्वाल बछरा घबराये ।
 दौरि गये तहँ लखे लौटि पुनि वनमहँ आये ॥
 बछरा, बालक, बाँसुरी, बेत्र, निरखि मत्र रूप हरि ।
 निरखे इत उत बिकल बनि, तुरत हंसतैं अज उतरि ॥

सबई निरखे श्याम चतुर्भुज शोभासागर ।
 शंख, चक्र अरु गदा, पद्म धारे नटनागर ॥
 सबके सिरपै मुकुट कंठमहँ माला सोहें ।
 विचरहिं अगनित कृष्ण भुवन-मोहन मन मोहें ॥
 जीव चराचर मधुर स्वर, करहिं प्रार्थना बेष धरि ।
 सेवे काल स्वभाव गुण, पूजा अर्चा सविधि करि ॥

अगनित निरखे कृष्ण पितामह मुनि-मन-रंजन ।
 सबई सत्य स्वरूप ज्ञानमय नित्य निरञ्जन ॥
 नित्यानन्द सरूप अगोचर अलख एकरस ।
 भासै जिनमें विश्व चराचर अग जग सरबस ॥
 शङ्कर विष्णु असंख्य अज, लखि अज मन अति होत सुख ।
 निरखे ब्रह्मा विविध विधि, दशमुख शतमुख सहसमुख ॥

अहि शैयापै विष्णु निरन्तर सुखते सोवे ।
 कमला पैर पलोति प्रेमतै श्रीमुख जोवे ॥
 निकसे बहु ब्रह्माण्ड श्वास प्रश्वासमाँहि नित ।
 जाने कितने लीन होहिं नित प्रविसे अगनित ॥
 परमैश्वर्य निहारि अज, हक्के बक्के-से भये ।
 लाये बछरा वाल सब, नन्दनँदन पग परि गये ॥

लकुट सरिस अज गिरे नयनतै नीर बहावै ।
 पुनि पुनि करे प्रनाम उठें पुनि पुनि परि जावै ॥
 रोमाञ्चित तनु भयो श्याम छवि सभय निहारे ।
 गद्गद बानी भई कष्टतै बचन उचारे ॥
 कछु आवेग घट्यो जबहिं, मानो सोवततै जगे ।
 करि नत मस्तक जोरि कर, बहुरि बिनय करिबे लगे ॥



ब्रह्मस्तुति

हे सजल मेघ सम हरि नटवर गिरिधारी ।

घनश्याम ! करो अब अविनय क्षमा हमारी ॥

काननिमें कुण्डल कनक मकर सम भ्राजे ।

लखि मुखकी शोभा कोटि सूर्य शशि लाजे ॥

शिर मोर मुकुटमहँ मिले कुटिल कच राजे ।

आनन सर सरसिज नयन मधुप मनु भ्राजे ॥

गरगुंजमाल बन बनमाल पँचरँगी प्यारी ॥१॥ घनश्याम०

सुकुमार पदनिते' कठिन भूमिपै विचरे' ।

कर कौर शृङ्ग बंशी लकुटी लै त्रिहरे' ॥

ब्रजकी रज अरु तृन धन्य गहकि पग पकरे' ।

बरसावे' नभते' सुमन नाथ जित निकरे'
हौं करूँ विनय गिरिधर पीताम्बरधारी ॥२॥ घनश्याम०

जे भक्ति छोड़ि दुरबोध बोध हित धावै' ।

वे नहीं परमपद प्रभुजी कबहूँ पावै' ॥

जे नाम निरन्तर नित प्रति तुमरो गावै' ।

वे फेरि नहीं जग अन्धकूपमें आवै' ॥

अगनित पतितनिकी तुमने नाव उबारी ॥३॥ घनश्याम०

करि सकै गुननिकी गिनती को जग माहीं ।

शिव शेष शारदा वेद थके परि पार न पाहीं ॥

जे कृपा प्रतीच्छा करे पुरुष तरि जाहीं ।

तव कृपा छोड़ि दूसर उपाय जग नाहीं ॥

मायाने मोह्यो मोइ मदनमदहारी ॥ ४ ॥ घनश्याम०

कहँ हौं मायाको चेरो परिमित प्राणी ।

कहँ तुम अचिन्त्य अखिलेश वेद जिनि बानी ॥

हौं निजकूँ कर्ता कहूँ परम अभिमानी ।

प्रति पल अगनित ब्रह्माण्ड रचौ अब जारी ॥

अपराध करै शिशु, छिमा करै महतारी ॥ ५ ॥ घनश्याम०

हौं पुत्र पिता तुम मेरे नाथ ! कहाओ ।

हौं डूबूँ भवजलमाँहि कृपालु बचाओ ॥

भव ग्राह ग्रस्यो लै चक्रमुदरशन आओ ।

करिके' सेवक स्वीकार चरन लिपटाओ ॥

ब्रजमें बसि जाऊं बनि पशु, तरु, तृन, झारी ॥६॥ घनश्याम०

ये धन्य धेनु ब्रजवासी सब नर नारी ।

कालिन्दी कोकिल कमल कुञ्ज बन क्यारी ॥

पी दूध गरल सँग बकी पापिनी तारी ।

पावैँ फिरि गति का धेनु सकल महतारी ॥

का दैकैँ होवेँ उरिन दयालु त्रिचारी ॥ ७ ॥ घनश्याम०

ये राग रोष हैं चोर तबहिँ तक स्वामी ।

जब तक न भक्त बनि भजैँ तुम्हें यह कामी ॥

अवतार लेहिँ भक्तनि हित अन्तरयामी ।

ते तरेँ भक्ति मारगके जे अनुगामी ॥

तब बार बार पद बन्दौँ हे बनवारी ॥ ८ ॥ घनश्याम०

छप्पय—बहु बिधि बिनती करी ब्रह्म निज लोक सिधाये ।

तब बछरनिकूँ घेरि श्याम भोजन थल आये ॥

मायावश सब भूलि कालकी जानी नहिँ गति ।

निरखि कृष्णकूँ भये ग्वाल सबई प्रमुदित अति ॥

बोले—कनुआ ! च्यौँ करी, देर कहाँ तक तू गयो ?

तेरी सूँ हमने नहीं, एक कौर मुँहमें दयो ॥

हरि हँसि भोजन करयो सबनि सँग लै ब्रज आये ।

समुक्ति आजके खेल सखनि ब्रजमाँहिँ बताये ॥

हरि माया वश जीव भूलि सब सुधि बुधि जावै ।

जातैँ होवे बन्ध ताहि हँसि हिये लगावै ॥

एक कृष्ण पुनि बनि गये, ग्वाल बाल बछरा भये ।

प्रेम पूर्ववत् पुनि भयो; बिसरि भाव पहिले गये ॥

देह आत्मा समुक्ति जीव जगमाहीं भटक्यो ।
 मैं मेरीमहँ फँस्यो मोह घाटीमहँ अटक्यो ॥
 कृष्ण कृपा जब करे घड़ा माया को फूटै ।
 पावै प्रभुको प्रेम ज्वाल जगको तब छूटै ॥
 कही अवासर की कथा, मोह नाश अजकी सुखद ।
 पढ़े सुने जे प्रेमतै, कटे सकल तिनकी विपद ॥

इति श्रीभागवत चरितके पञ्चमाहमें ब्रह्म-मोहनाश नामक
 ग्यारहवाँ अध्याय समाप्त ।



अथ द्वादशोऽध्यायः

[१२]

अब जब कछु हरि बड़े सखनि सँग गोपालन हित ।
 गैयनि लै बन जाहिँ कश्यो बलदेव सहित चित ॥
 कातिक शुक्ला बहुल अष्टमी जबई आई ।
 लै गैयनि हरि चले सखा सँगमहँ बलभाई ॥
 कुसुमित कानन अति सुखद, प्रविशि करहिँ क्रीड़ा तहाँ ।
 खग मृग बिहरहिँ सुख सहित, अलि कमलनि गूँजें जहाँ ॥

कोमल किसलय अरुन बरन शाखातँ मुकिके' ।
 कृष्ण और बल-चरन छुएँ जनु वृक्ष सकुचिके' ॥
 भैया देखो करे' सफल जीवन ये पादप ।
 बोले बलतँ श्याम—कश्यो का इनने जप तप ॥
 तुमहिँ अतिथि अनुपम समुक्ति, मुकि मुकि के स्वागत करहिँ ।
 पत्र, पुष्प, फल, नम्र ह्वै, सब तव पद-तलमहँ धरहिँ ॥

अलिगन गुन गुन करे' सुयश तुमरो जनु गावे' ।
 मुनि जन बेष छिपाइ भ्रमर बनि चरननि आवे' ॥
 अतिथि अलौकिक जानि प्रेमते' केकी नाचे' ।
 चकित चकित करि दृष्टि प्रणयरस हरिनी याचे' ॥
 कल कण्ठनितै कोकिला, कूजि कूजि कौतुक करहिँ ।
 रूप आधुरी तव सुखद, जीव नेत्र रंघनि भरहिँ ॥

धन्य धन्य तू न गुल्म लेता पादप ये बनके ।
 पावे' कर पद परस सफल जीवन ही इनके ॥
 विचरत निरखत तुमहिं धन्य ये खग, मृग अलिगन ।
 सरिता, पर्वत, पुलिन धन्य पावन वृन्दावन ॥
 लालायित नित श्री रहहिं, तव आलिंगन अति सरस ।
 ब्रज-बनिता बड़ भागिनी, पावे' तव हिय हिय परस ॥

यों करि बलकी बिनय बननि बिहरे' बनवारी ।
 शिशु सम क्रीड़ा करहिं सरस सुन्दर शुभ प्यारी ॥
 हंसनिकी चलि चालि कूजिकेँ हँसे हँसावे' ।
 मोरनिके सँग नाचि सखनिकूँ श्याम रिभावे' ॥
 घौरी धूमरि धूसरी, धेनुनिके लै नाम हरि ।
 टेरि बुलोवे' दूरितैं, छुएँ खुजावे' प्यार करि ॥

कबहुँ बलके करे' पाद संवाहन स्वामी ।
 कबहुँ डरिके' भगें ग्वाल सँग अन्तरयामी ॥
 मल्लयुद्ध करि कबहुँ सखनिकूँ पकरि पछारै' ।
 कबहुँ जावै' जीति कबहुँ गोपनितैं हारै' ।
 ब्रज ऐश्वर्य भुलाइके', त्रिभुवनपति हरि रमापति ।
 बाल सुलभ क्रीड़ा करहिं, सुख ब्रज-जीवनि देहिं अति ॥

एक दिवस बन गये गोप बोले—सुनि कनुआँ ।
 बलुआ भैया सुनों आज मचल्यौ अति मनुआँ ॥
 पके तालकी गंध सबनिको चित्त चुरावै ।
 मनमहँ उठै उचंग जीम पानी भरि लावै ॥
 पके पके फल परे परि, रहे धेनुकासुर तहाँ ।
 मारे पिछले पंगनि खर, जो जावै प्रानो वहाँ ॥

हरिहँसि बोले—चलो ताल फल सब मिलि खावे ।
जो बछु बोले असुर मारिके ताहि गिरावे ॥
यों कहि बल अरु श्याम ताल बनमाँहि सिघाये ।
पादप पकरि हिलाय तालफल बहुत गिराये ॥

सुनत शब्द धेनुक असुर, आइ दुलत्ती मारिके ।
भग्यो फिश्यो बल पकरिके, वृत्तनि फँक्यो मारिके ॥

दोहा—शौनक मुनि पूछ्यो तबहि, खर धेनुक को वृत्त ।
कहन लगे तब सूतजी, ताको पूर्व चरित्र ॥

छप्पय—असुर साहसिक बली युवक बलिसुत अति सुन्दर ।
गयो एक दिन दैत्य गन्धमादन गिरि ऊपर ॥
लखि तिलोत्तमा तहाँ कामसर आहत कीन्हों ।
सोऊ व्याकुल भई साहसिक संगम दीन्हों ॥
उभय गये गिरि गुहामें, करे काम—क्रीड़ा तहाँ ।
दुर्बासा मुनि प्रथम ही, ध्यान मग्न बैठे जहाँ ॥

उभय भये कामान्ध अत्रिसुत नहीं निहारे ।
समुझि तिन्हें निर्लज्ज होहु खर बचन उचारे ॥
सुरवनिता बनि बानसुता ऊषा धरनीपै ।
सुनत शाप मुनि पैर परे बिलखै करनीपै ॥
पुनि मुनिवर ने वर दयो, कृष्ण कृपा सद्गति लही ।
भये मुक्त हरि संगतैं, धन्य कथा धेनुक कही ॥

इत धेनुक बध सुनत कुपित खर दौरे आये ।
बन्धु विघाती राम श्यामपै बहुत रिस्याये ॥
पकरे दोऊ टाँग खरनिकूँ मारि गिरावे ।
मारि मारिके फेंकि ताल उरुवरनि हिलावे ॥

सकल कश्यो बन खर रहित, वृन्दावन हरि चलि दये ।
 आवत मुरलीधर सुने, नर नारी हरषित भये ॥
 साँझ समय श्री श्याम सखनि सँग सुखतै आवत ।
 मन्द मन्द मुसकात मधुर स्वर बेनु बजावत ॥
 अलकनि पलकनि और कपोलनिकी झलकनिपै ।
 गोरज छाई मुकुट, पीतपट, लकुट, लटनिपै ॥
 करि प्रवेश ब्रजमहँ सकल, बिरह ताप सबको हरयो ।
 भोजन करि दाऊ सहित, श्याम शयन शय्या कश्यो ॥

लिये ग्वाल अरु गाय गये यमुना तट ब्रजपति ।
 आज नसँग बलराम ग्रीष्म ऋतु घाम बिकट अति ॥
 कालियहृदके निकट प्यासतै सब घबराये ।
 करि बिषयुत जलपान ग्वाल गौ प्रान गँवाये ॥
 अमृतमयी लखि दृष्टितै, जीवित प्रभुने सब करे ।
 करी कृपा करुनायतन, दुःख आश्रितनिके हरे ॥

रमनक नामक द्वीप नाग सब बास करहिँ जहँ ।
 बिष बलतै उनमत्त नाग कालियहु रहै तहँ ॥
 गरुड़ आइ कछु खाइँ कछुनिकूँ मारि गिरावै ।
 विनतामुतको कृत्य निरखि अहि अति भय पावै ॥
 सब नागनि सम्मति करी, सन्धि गरुड़जातै करो ।
 शोकि जाति बिध्वंसकूँ, सब सर्पनिको भय हरो ॥

अरुणानुज के निकट सर्प सब मिलिके आये ।
 प्रति भावस बलि देहिँ सबनि मृदु बचन सुनाये ॥
 हरिवाहनने बात अहिनिकी सब स्वीकारी ।
 पर्व पाइके सर्प आइँ सब बारी बारी ॥

कालिय अति बल वीर्य मंद, युक्त भयो नहिँ देइ बलि ।
 स्वयं गरुड़ बलि खाइकेँ, पहिले ही खल जाहिँ चलि ॥
 गरुड़ कुपित अति भयो दुष्टकूँ दौरि दबायो ।
 कालिय हूँ भिड़ि गयो बहुत विष वीर्य चलायो ॥
 जब नहिँ लाग्यो दाव भागि कालीदह आयो ।
 सौभरि मुनिके शाप कवचतैँ प्रान बचायो ।
 रहै तहाँ विष बमन करि, जल अपेय सब करि दयो ।
 मरहिँ अचर चर जीव सब, हरि कौतुक अद्भुत कियो ॥

चढ़े कदँमपै कृष्ण कूदि कालीदह माहीं ।
 उठि उत्ताल तरंग उछलि जल तटनि डुबाहीं ॥
 सागरमहँ जनु तरी करेँ डगमग त्यों नटवर ।
 नीचे ऊपर उछरि करेँ क्रीड़ा विश्वम्भर ॥
 निकरि भवनतैँ अहि लख्यो, शिशु सुकुमार सुहावनो ।
 कर, पद, सब अँग अति मृदुल, मुख प्यारो मनभावनो ॥

दहमहँ क्रीड़ा करै न कछु भय मनमहँ मानेँ ।
 मेरो विष अति उग्र अज्ञ बालक नहिँ जानैँ ॥
 ऐसो मनमहँ सोचि क्रोध करि कालिय आयो ।
 डसै दुष्ट करि कोप कृष्ण तनु अँग लपटायो ॥
 अहि बन्धनमहँ श्यामकूँ, निरखि बाल व्याकुल भये ।
 गौ बछरा अरु ग्वाल तहँ, मूर्छित सबरे हूँ गये ॥

इत ब्रजमहँ उत्पात होहिँ अति उग्र भयङ्कर ।
 तन, मन, भू, आकाश सबनिमहँ उठै बवंडर ॥
 आज बिना बल गयो श्याम बन गाय चरावन ।
 नर नारी अति दुखित लगे सब बन बन खोजन ॥

ध्वज अकुश बज्रादितै, चिन्हित पद पहिचानिके ॥
पहुँचे कालियदह निकट, डरे मृतक सब जानिके ॥

लखि अहि अंगनि बँधे श्याम गोपिनि दुख दूनों ।
भयो निरखि अति करुन दृश्य सबरो जग सूनों ॥
करि करि हरिकी यादि दुखित होवे डकरावे ।
दौरि दौरिके मातु हूबिबे जलमह जावे ॥
है मूर्छित सब गोप गन, गिरे परे दहमह धँसे ।
बार बार बल बरजिके, हरि लीला लखिके हँसे ॥

समुफे हरि सब दुखी सुनी बलदाऊ बानी ।
कालियफनपै नृत्य करन नटवर मन ठानी ॥
समुफि श्याम संकेत सुमन सुरगन बरसावे ।
बीणा पणव बजाइ तालमह ताल मिलावे ॥
मधुर मधुर बीणा बजहि, नाचे नटवर फननिपै ।
जो न नवें रौंदें तिनहि, चरन चलावें सबनिपै ॥

बहत मुखनितै रक्त भयो कालिय मूर्छित तब ।
छिन्न भिन्न है गये नागफण छत्ररूप सब ॥
अनत शरन नहिं निरखि शरन हरिकी अहि आयो ।
अखिल भुवनपति पाद पदुममह चित्त लगायो ॥
पत्नी सब ही नागकी, आई पतिकू बिकल लखि ।
शिशु सम्मुख करि नयन भरि, श्रीहरितै बोली बिलखि ॥

दोहा—दमनदुष्ट अवतार तव, शत्रु पुत्र सम दृष्टि ।
प्रायरिचित हित दंड दै, है सब तुमरी सृष्टि ॥

नागपत्नी-स्तुति

नाथ ! तव दण्ड ज्ञानको हेतु, देवको कोप परम वरदान ।
नित्य अहि उगिलत विष करि क्रोध, मर्दि फन मेंट्यो मोहन मान ॥
ऋषयो जाने का जपतप योग, रीमि दीये घर दरशन आइ ।
चरन दरशन दुरलभ जगमाँहिँ, धरे सिर सो हरि आपु रिस्याइ ॥

चरनरज इच्छुक तुमरे भक्त, स्वर्ग अपवर्ग देहिँ ठुकराइ ।
रह्यो अब कौन कृत्य अवशेष, धूरि पग धरी शीश अकुलाइ ॥
करैं हम चरननिमाँहिँ प्रनाम, बने गोपाल आइ ब्रजमाँहिँ ।
आपु हैं साक्षी सत चित रूप, नित्य अज बेद भेद नहिँ पाहिँ ॥

अस्ति अरु नास्ति आपु ही शूल, सूक्ष्म सरवज्ञ प्रेमके धाम ।
प्रकृतितें परे परावर श्याम, करैं पुनि पुनि पद पदुम प्रनाम ॥
आपु ही संकरषण प्रद्युम्न, आपु ही वासुदेव अनिरुद्ध ।
आपु ही यदुपति जगपति इश, आपु ही नित्य शुद्ध अवरुद्ध ॥

आपु निष्क्रिय प्रपञ्चतें परे, तऊ जग रचैं कालके काल ।
दये दरशन धरि मनहर वेष, बने ब्रज ग्वाल बाल नँदलाल ॥
प्रजा जो करै प्रथम अपराध, झिमा कर देवें प्रभु भूपाल ।
प्रानको देवें दान दयालु, शरन आई हम लैकें बाल ॥

दयाकी अधिक पात्रहैं नारि, दीन अति अबला हम सुकुमारि ।
जानि सेवक अपनावैं नाथ, सकल अविनय अपराध बिसारि ॥
देर नहिँ कीजे राधारमन, शरनमें राखैं अशरनशरन ।
निहारैं नेह सहित गिरिघरन, गहे दुखहरन सुखद तव चरन ॥

छप्पय—हम सबके पति प्राण प्राणपति भिन्ना दीजे ।
 हैं अबला भयभीत अभय अखिलेश्वर कीजे ॥
 नाग बहुनिकी विनय करुन स्वर मुरलीधर सुनि ।
 कश्यो न पादप्रहार फननिपै नटनागर पुनि ॥
 नाग तज्यो तब सो कहे, नाथ ! तुमहिं सब कछु करो ॥
 तुमहीं डारो जगतमहँ, जीव विपति तुमहीं हरो ॥

सुनि बोले घनश्याम—यहाँतैं अहि तुम जाओ ।
 अब स्वदेशमहँ रहो सदा मेरे गुन गाओ ॥
 मम पद-अङ्कित शीश, गरुड़ लखि ढिँग नहिँ आवै ।
 कालियदहमहँ न्हाय सुकृत करि नर सुख पावै ॥
 कालिय दह अरु कृष्णको, अति पावन सुखकर चरित ।
 रहहिँ अभय ते अहिनिँतैं, पढ़हिँ सुनहिँ श्रद्धा सहित ॥

इति श्रीभागवत चरितके पञ्चमाहमें धेनुकमोक्ष तथा
 कालियदमन नामक बारहवाँ अध्याय समाप्त ।

अथ त्रयोदशोऽध्यायः

[१३]

दिव्य बस्त्र, मणि, माल पहिरि हरि दहतैं निकसे ।
मनहुँ उदधिमहँ नील सरोरुह मणियुत बिकसे ॥
मृतक देह जनु प्राण लौटिकें फिरतैं आये ।
त्यौं उठि सबने प्रेम सहित हरि हृदय लगाये ॥
आलिङ्गन पुनि पुनि करें, दये दान प्रमुदित भये ।
भूखे प्यासे ग्वाल गौ, ग्वा दिन तटपै बसि गये ॥

शीतल मंद सुगन्ध पवन बालू अति कोमल ।
सोये आधी राति उठी बनमहँ दावानल ॥
देखि अगिनिकी लपट गोप सबरे घबराये ।
दीन दुखी अति भये शरन श्रीहरिकी आये ॥
ब्रजवासिनिकूँ सभय लखि, हँसि मोहन ठाढ़े भये ।
नयन मुँदाये सबनिपै, तुरत अग्नि सब पी गये ॥

करि कालिय उद्धार प्रात आये वृन्दावन ।
नित नित जावैं श्याम सबल बन धेनु चरावन ॥
मोर मुकुट सिर धारि गले बैजन्ती माला ।
बनि ठनि बनकूँ जाहिं करें क्रीड़ा नँदलाला ॥
दादुर, केकी, हंस, अहि, चाल चलैं चंचल चपल ।
समर करहिं नृप बनि कबहुँ, करहिं खेल नित नव नवल ॥

घुड़चड़ीको खेल होहि बालक बोलें सब ।
 दलपति बनि बल श्याम उभय दल बँटे ग्वाल तब ॥
 शुभ अवसर लखि असुर गोप बनिकें तहँ आयौ ।
 प्रभु प्रलम्ब पहिचान पक्ष निज माँहिँ मिलायौ ॥
 हारे हरि निज दल सहित, जीते बल आगे बढ़े ।
 श्रीदामा हरिपै चढ़्यो, बल प्रलम्ब ऊपर चढ़े ॥

श्रीदामाकूँ लिये श्याम निरखें मुरि मुरिकें ।
 बलकूँ लीये असुर बेगतेँ चले उछरिकेँ ॥
 हँसि श्रीदामा कहै—इमारो घोड़ा अड़ियल ।
 बलदाऊको भगे देखिबे महँ जो सड़ियल ॥
 संकर्षणकूँ लै असुर, दाईतेँ आगे बढ़्यो ।
 गोप रूप तजि रूप निज, धारन करि नभमइँ उड़्यो ॥

अंजन परबत सरिस उड़त नभमहँ जनु सितघन ।
 प्रथम डर बलदेव फेरि सम्हरे संकर्षण ॥
 मस्तक मुक्का मारि असुरके सिरकूँ फाड़्यो ॥
 यों प्रलम्बकूँ तुरत रोहनीनन्दन माड़्यो ॥
 ग्वालबाल सब आइकेँ, साधुबाद बलकूँ द्यो ।
 लखि बल द्वारा असुर बध, अति विस्मय सबकूँ भयो ॥

पुनि भाण्डीरक निकट आइ खेलेँ सब बालक ।
 गैयाँ निकसी दूरि खेलमहँ तन्मय पालक ॥
 आई पुनि जब यादि दूढ़िबे गैयनि भागे ।
 दावानलकूँ देखि ग्वाल सब रोमन लागे ॥
 बिषद सघन बन मूँजके, दावानलतैं सब जरे ॥
 ढकरावेँ फँसि धेनुतहँ, ग्वाल लपट लखि अति डरे ॥

रक्षा अनत न समुक्ति शरन माधवकी आये ।
 समय शब्द सुनि श्याम अभय बर वचन सुनाये ॥
 मींचो तुम सब आँखि सुनत मीचीं सब गोपनि ।
 दावानल करि पान कहें हरि—निरखो गैयनि ॥
 आण्डीरक नीचे निरखि, सकुशल गैयनिके सहित ।
 भये सुखी पुनि चलि दये, लै गैयनि ब्रजकूँ तुरत ॥
 निरखे आवत श्याम हृदय गोपिनिके हरषे ।
 गीले भये कपोल श्याम-घन रस जनु बरसे ॥
 पल छिन जिन बिनु समय कोटि बरसनि समबीत्यो ।
 श्याम दीठितैं दीठि मिली सब जग जनु जीत्यो ॥
 मुरलीको रव श्रवन सुनि, कुंचित कच पट पीत बर ।
 अँग अँग लखि पुलकित भये, नटवरकी छवि अति सुघर ॥
 दोहा—वेनुगीतकी शुभ कथा, मेंटै सब संताप ।
 मुनिवर सुखमय सरसअति, सुनहिँ हुलसि हिय आप ॥
 छप्पय—सुखद शरदको समय सरित सर स्वच्छ भये सब ।
 गो गोपाल समेत श्याम प्रविशे बनमहँ तब ॥
 सघन सुभग-द्रुम सुमन सहित कोमल पल्लवयुत ।
 शुक पिक केका आदि उड़ैं खग जिनपै इत उत ॥
 शारदीय बिकसे कमल, प्रकृति बधू सब विधि सजी ।
 हिय मनसिजकूँ उदय करि, तब माहन मुरली बजी ॥
 श्रवन शब्द सुनि रहीं ठगी-सी सब ब्रजनारी ।
 कछु गुन बरनन करें बधुनि मन बात बिचारी ॥
 करयो कछुक आरम्भ यादि मोहनकी आई ।
 तब चित चंचल भयो देहकी सुरति भुलाई ॥
 अपर सम्हरि बोली—अली, मुरली अधरामृत भरहिँ ।
 पुनि भुकि फँके नँदनँदन, छिद्रनितैं बितरित करहिँ ॥

अपर कहे—जगमाँहिं सफल जीवन ही उनके ।
 कृष्ण मुखामृत पान करे' नित लोचन जिनके ॥
 आवत धेनु चराइ सखनि सँग बेनु बजावत ।
 सुषमा श्याम सिहाइ लुटावत सुख सरसावत ॥
 मुरली अधरनिपै धरे', इत उत निरखत दृग चपल ॥
 चोट करत कछु गाइके', बेनु माधुरी अति प्रबल ॥

एक कहे—बलराम श्याम दोऊ ही नटवर ।
 रंग भूमि अति सुघर सरस वृन्दावन सुखकर ॥
 नित नव अभिनय करें ग्वाल बालनि सँग आवें ।
 किसलय नूतन सुमन धातुतैं बेष बनावें ॥
 स्वर सब मुरलीमहँ भरहिं, नाचें गावे' हँसि परे' ।
 नील पीत पट धारिके', धेनुनि लै कौतुक करे' ॥

बेनु रेनु अति धन्य श्याम अँगमहँ जो चिपटैं ।
 बेनु अधरपै रहै रेनु सब अंगनि लिपटैं ॥
 बेनु बाँसकी सुता रेनु धरनीकी दुहिता ।
 पुत्रिनि भागि सराहि, मातु दोउनिकी मुदिता ॥
 यद्यपि ब्रज-रजके निमित्त, लालायित सुरगन रहहिं ।
 तदपि बेनुकूँ ही परम, भाग्यवती हम सब कहहिं ॥

जा मुरलीने करयो कौन तप श्याम रिझाये ।
 मुरलीधर जिहि हेतु जगत घनश्याम कहाये ॥
 अधरनि शय्यामाँहिं बेनुकूँ बिहँसि सुआवे' ।
 हौलै' हौलै' कमल करनितैं चरन दबावे' ॥
 करे' वायु मुखकमलतैं, एक पैर ठाढ़े रहें ।
 प्राननि प्यारी मुरलिका, मैयातैं नित हरि कहें ॥

लखि बंशी सौभाग्य बंशकुल अति सुख पावैं ।
 सरिता धाई सरिस रोम जनु कमल खिलावैं ॥
 पादप प्रमुदित होहिँ फूलि जावैं बन उपवन ।
 तिज दुहिताके करेँ गान गुन गरजि गरजि घन ॥
 मदधारा तरु बाँसके, आनन्दाश्रु बहाहिँ जनु ।
 बृद्धनि कुलमहँ भक्त लखि, बहे नयन जल पुलकि तनु ॥

यह बृन्दावन धन्य धराको धन जनु अनुपम ।
 चरननि नूपुर धारि चलें हरि जापै छमछम ॥
 बेनु बजावत श्याम मोर समुमेँ जनु घनरव ।
 गरजि रहे हिय जानि मत्त है नृत्य करेँ सब ॥
 मोहन मुरली मधुर सुनि, नाचेँ केकी तालमहँ ।
 हम सब बिलपति दिवस निशि, फँसी निठुरके जालमहँ ॥

है त्रिभङ्ग दै फूँक बजावेँ बेनु विहारी ।
 बंशी बंसी बनी फँसाईँ सब ब्रजनारी ॥
 मृगी पतिनि सँग सुनत तुरत जड़वत बनि जावेँ ।
 प्रनय कटाक्ष चलाय श्याम प्रति भक्ति दिखावैं ॥
 चढ़ि विमान सुनि बेनु धुनि, सुरनि सहित सुर सुन्दरी ।
 भईँ बिबश नीवीखिसीँ, शिथिल केश माला गिरी ॥

चरत चरत तन धेनु सुनीँ मादक मुरली धुनि ।
 श्रवनपुटनितैं पान करैँ हरषित है पुनि पुनि ॥
 नयननि नीर बहाइ हृदयमहँ छवि ले जावैं ।
 आलिङ्गन करि होहिँ सुखी सुधि तन त्रिसरावैं ॥
 बछरा मुखमहँ कौर धरि, ज्योंके त्यों ठाढ़े रहैं ।
 आग गिरेँ मोती सरिस, धुनि प्रवाहमहँ सब बहैं ॥

सखि ! इन बिहँगनि लखो बने मौनी बाबा मनु ।
 अपलक निरखत रहत करत साधक त्राटक जनु ॥
 बैठि तरुनिकी डार सुने बंशी धुनि नित प्रति ।
 हम लालायित रहें रूप रसकी प्यासी अति ॥
 बड़भागी सरिता सकल, भुज तरङ्गतै सुमन धरि ।
 आलिङ्गन हियमें करहिँ, रूप माधुरी नयन भरि ॥

घोर घाममहँ श्याम निरखि उमड़ें घुमड़े घन ।
 फुलभरियाँ बरसाइ करे छतरी छाया तन ॥
 कुच कुंकुमकी कीच सने पग बन बिहरे हरि ।
 दूबनिपै लगि जाई वनचरिति हृदय जाय भरि ॥
 हिय, मुख, कुच कुंकुम मलें, प्रेम व्यथा मेटें अलीं ।
 स्वर्ग सराहें सुरबधू, हमतैं तो भीलिनि भलीं ॥

गिरि गोबरधन धन्य श्रेष्ठ सब हरि भगतनितैं ।
 जापै श्रीहरि फिरै नित्य नंगे चरननितैं ॥
 हरषें हियमहँ निरखि ग्वाल गैयनि सँग नटवर ।
 दै तन, जल, फल, मूल करै सत्कार निरन्तर ॥
 हरि मुरलीकी तान सुनि, होहिँ अचर चर चर अचर ।
 पान करहिँ बेसुधि बनहिँ बेनुमाधुरी परस्पर ॥

दोहा—प्रिय मुरलीकी माधुरी, ब्रजबनिता करि पान ।
 मदमाती बनि बकहिँ नित, करहिँ न कुलकी कान ॥

इति श्रीभागवत चरितके पञ्चमाहमें दावानल पान, प्रलम्बासुर
 मोक्ष तथा वेणुगीत नामक तेरहवाँ अध्याय समाप्त ।
 [मासिक पारायण बीसवें दिन का विश्राम]

अथ चतुर्दशोऽध्यायः

[१४]

कहैं सूत—मुनि ! सुनहु कुमारिनिकी लीला अब ।
 कृष्ण प्रेममहँ परीं करें मिलि व्रत जप तप सब ॥
 व्रत कातिकको करहिँ नियमतैं जमुना न्हावैं ।
 न्हाय बालुकामयी भगवती मूर्ति बनावैं ॥
 माला चंदन धूप बर, अक्षत दल ताम्बूल फल ।
 पूजा सब विधिवत करहिँ, अरपि अन्न सुखादु जल ॥

करि पूजा सब बिनय करें दुर्गे ! जगदम्बे ।
 नँदनंदन पति होहिँ देहु बर बरदे ! अम्बे ॥
 यों हविष्य करि असन नियम व्रतके सब साधैं ।
 श्रद्धा भक्ति समेत भगवतीकूँ आराधैं ॥
 सुखद सरस लीलां करी, प्रेम निरखि निष्कपट हरि ।
 अपनाई चिरसंगिनी, सब दोषनिकूँ दूरि करि ॥

पट यमुनातट धरें न्हाय नित नंगी जलमहँ ।
 करन कृतारथ कृष्ण गये छलतैं तिहि थलमहँ ॥
 जल बिहार मिलि करें उलीचैं सलिल परस्पर ।
 लै सबके पट चढ़े कढ़बपै नागर नटवर ॥
 संग सखनिके हँसत हरि, धरि अधरनिपै बाँसुरी ।
 डरति लजति थर थर कँपति, सब सुकुमारी सुन्दरी ॥

सब बोलीं ब्रजबाल—लाल मति पाप कमाओ ।
 हैं हम नंगी नारि न ऐसी हँसी उड़ाओ ॥
 कँपति नीरमहँ खड़ी दया हम सबपै कीजे ।
 उतरि कदवते कुँवर बसन हम सबके दीजे ॥
 कहें कृष्ण—जलतै निकरि, अपने अपने लेउ पट ।
 सुमुखि ! सुनहु साखी सखा, करहुँ कबहुँ नहि छलकपट ॥

सुनी श्यामकी सरस रहसमय अनुपम बानी ।
 एक एककी ओर निरखि मनमहँ मुसकानी ॥
 पुनि बोलीं—घनश्याम ! निपट हम दासी तुमरी ।
 अरपन सबसु करे लाज लेओ मत हमरी ॥
 कहहिँ श्याम—सुन्दरि ! सुनहु, यदि दासी तो च्यौँ डरो ।
 जैसो जो कुछ कहहुँ हौं, तुम तैसो निर्भय करो ॥

जानि बिबशता निकरि बारितै बाला आई ।
 गुह्य अंग कर ढाँकि सहमि सबरीं सकुचाई ॥
 हरि बोले—अपराध वरुनको कीयो तुम सब ।
 न्हाई नंगी करहु बिनय करपुट सिर धरि अब ॥
 निजव्रतकूँ खंडित समुक्ति, धम भीरु सब डरि गई ।
 पाप प्रनाशक प्रभुचरन, कमल माँहिँ प्रनमत भई ॥

प्रभु प्रसन्न ह्वै गये तुरत पट सबके दीये ।
 पाइ बसन प्रिय परस पहिन निज निज तिनि लीये ॥
 प्रेम बिबश बनि गई सकुचिकेँ श्याम निहारे ।
 पूजन चाहें चरन न मुखतै बचन उचारे ॥
 जानि मनोगत भाव हरि, बोले—बाला डरहु मति ।
 शरद निशिनिमहँ रमन मम, संग करोगी सुखद अति ॥

सुनत श्याम बर बचन भयो सुखदुख सँग मनमहँ ।
हरि आयसु सिरधारि चलीं सब हठवश ब्रजमहँ ॥
आइ नियम व्रत भूलि प्रतीक्षा करहिं सदाहीं ।
कब मनमोहन मोद भरें सबकें मनमाहीं ॥
इत ब्रजबाला ब्रज गई, श्याम सखनि सँग बन गये ।
निरखि सफल पुष्पित द्रुमनि, तिनहिं संत समुक्त भये ॥

कहें सखनितैं श्याम—वृक्ष ये अति उपकारी ।
धाम, वायु, जल संहहिं करहिं परहित नित भारी ॥
सबई इनकी वस्तु काम सबके ही आवैं ।
इन ढिँग अरथी आईं विमुख कबहूँ नहिं जावैं ॥
झाया ईधन कोयला, पत्र, पुष्प, फल फूल दल ।
साधत सबके काज नित, जीवन इनको ई सफल ॥

गोप कहें सब—कल्पवृक्ष सम तू उपकारी ।
भैया ! जैसे बनें मेंटि तू विपति हमारी ॥
आज लगी अति भूख छाक अब तक नहिं आई ।
सुनि बालनिके बचन झिँसि बोले बलभाई ॥
सत्र आङ्गिरस करहिं द्विज, जाओ मखशाला तुरत ॥
करो याचना अन्नकी, सब बिनम्र हूँ के प्रनत ॥

हरि आयुस सब पाइ गये विप्रनि ढिँग बालक ।
कहें—सुनहु द्विज ! निकट कृष्ण आये पशुपालक ॥
होहि अन्न कछु देहु खाईं ते भूख बुझावैं ।
यज्ञ शेष चरु पाइ ग्वाल सब तुमहिं सरावैं ॥
करी न नाहीं नहिं दयो, मौनी सब द्विज बनि गये ।
लौटि सखनि हरितैं कही, नहिं निराश नटवर भये ॥

बोले—अबकें जाउ विप्रपत्तिनिके ढिँग तुम ।
 अन्न देहिं ते अवसि स्वादतैं खावैं सब हम ॥
 सुनि बोले गोपाल—यार ! च्यों हँसी करावैं ।
 च्यों उन कृपननि नारि निकट अब हमें पठावैं ॥
 नँदनन्दन हँसिके कहे, दूध बैल देवै नहीं ।
 लात दुधारहु गायकी, खाइ मनुज लेवे नहीं ॥

चले फेरि सब ग्वाल गये द्विजपत्तिनिपार्हीं ।
 हरिकी सबई बात बिनयतैं तिनिहिं सुनाई ॥
 अति प्रसन्न सुनि भई धन्य निज जीवन जान्यो ।
 आज होहिं हरि दरश सुदिन सबने अति मान्यो ॥
 मीठे, खट्टे, नमकयुत, कटुक, कसैले, चरपरे ।
 अति उज्ज्वल बर थाल सब, षडरस व्यञ्जनतैं भरे ॥

लै व्यञ्जन चलि दई निहारे आगे नटवर ।
 छैल चिकनिया बने सजे शोभित अति सुखकर ॥
 द्विजपत्तिनि लखि हँसे कहें हे—भामिनि ! आओ ।
 आई दरशन हेतु करे दरशन अब जाओ ॥
 सुनि अप्रिय अच्युत बचन, बोलीं—तुम प्रिय शिरोमनि ।
 प्रथम बुलावत खींचिके, दुतकारो पुनि कठिन बनि ॥

पुनि बोले घनश्याम-सुमुखि ! मखशाला जाओ ।
 यज्ञ-काज करि संतत चित्त मम चरन लगाओ ॥
 हृदय हृदयतैं मिले एकता मनके माँहीं ।
 अङ्गसङ्ग अनुराग प्रीतिको कारन नाहीं ॥
 हरि आयसु सुनि मन तहाँ, धरि तनतैं मखमहँ गई ।
 दरश श्यामके पाइके, धन्य विप्रपत्ती भई ॥

एक जाइ नहिं सकी रोकि निज पतिने लीन्हों ।
 करी तयारी चली बाँधि रस्सीतैं दीन्हों ॥
 दरशनमहँ व्यवधान पश्यो अतिशय घबराई ।
 श्याम-रूप हिय धारि त्यागि तनु स्वर्ग सिधाई ॥
 मन मनमोहनके निकट, तन मखशालामहँ पश्यो ।
 प्रेम प्रबलताने यहाँ, अति अद्भुत कौतुक कश्यो ॥

इत सब आईं लौटि द्विजनि अति प्रेम दिखायो ।
 यज्ञ-काज लै संग पूर्ण विधि सहित करायो ॥
 विप्रनि कोहू हृदय शुद्ध हरिने करि दीन्हों ।
 सबने पश्चात्ताप कृत्य अपनेपै कीन्हों ॥
 ये अबलाई धन्य हैं, हाय ! अभागो हम रहे ।
 आये प्रभु पूजे नहीं, कठिन बचन उलटे कहे ॥

करुणासागर कृष्ण कबहुँ तो कृपा करिङ्गे ।
 मलिन बासना दुःख शोक आसक्ति हरिङ्गे ॥
 माया मोहित जीव करम मारगमहँ भटकैं ।
 छुद्र स्वर्ग सुख हेतु अनलमहँ सिर नित पटकैं ॥
 नंदनंदन ! हम अधम अति, अधम उधारन ! नाथ तुम ।
 करहु छिमा अपराध प्रभु ! तब चरेननिकी शरन हम ॥

इति श्रीभागवत चरितके पञ्चमाह में वस्त्रापहरण तथा विप्रपत्नी
 प्रसाद नामक चौदहवाँ अध्याय समाप्त

अथ पञ्चदशोऽध्यायः

[१५]

द्वै द्विजपत्तिनि दरश दयानिधि ब्रज पुनि आये ।
 बसि बृन्दावन नन्दनन्दन बहु चरित दिखाये ॥
 एक दिवस हरि लखे गोप इततें उत जावैं ।
 जौ, तिल, चाँवर, घीउ सबहिं घर-घरतें लावैं ॥
 बाबा ! का उत्सव करो, प्रभु पूछे ब्रजराजतें ।
 धूमधाम अति मचि रही, होवेगो का आजतें ॥

तब बोले ब्रजराज—इन्द्रकी पूजा भैया ।
 जो बरसावें नीर होहि तृन खावें गैया ॥
 जल ही जीवन कह्यो इन्द्र हैं जीवनदाता ।
 त्रिभुवनपति सर्वेश स्वर्गपति विष्णु विधाता ॥
 नन्द बचन सुठि सरल सुनि, हँसि बोले ब्रजचन्द तब ।
 जड़ चेतन चर अचर जग, पिता ! कर्मबश भ्रमहिं सब ॥

जीव कर्मबश होहि कर्मबश हो मर जावैं ।
 करे शुभाशुभ कर्म दुःख सुख तैसो पावैं ॥
 बँधे कर्ममहँ जीव इन्द्र का करै बिचारो ।
 तैसो तब तनु मिले कर्म जस होहि हमारो ॥
 कोउ न सुख दुख दै सके, सबतैं कर्म बिशिष्ट है ।
 जाकी जातैं जीविका, चले तासु सो इष्ट है ॥

विप्र बेदतैं करे जीविका छत्रिय महितैं ।
 बैश्य बनिज कृषि धेनु व्याजके मिले धनहितैं ॥
 करिकें सेवा शूद्र द्विजनिकी वृत्ति चलावैं ।
 जो स्वधर्ममहँ रहैं अन्तमहँ सद्गति पावैं ॥
 देहिं घास, जल, मूल, फल, गोप इष्ट गिरिराज हैं ।
 पूजो गिरिवर धेनु द्विज, पूरन सब ही काज हैं ॥

पूरी छुन छुन छनैं कचौरी खस्ता सुन्दर ।
 रबड़ी लच्छेदार खीर केसरिया सुखकर ॥
 हलुआ मोहनथार जलेबी पेरा मठरी ।
 टिकिया पूआ बड़े सोंठ पापर अरु पपरी ॥
 व्यंजन सब सुन्दर बनें, दाल, भात, रोटी, कढ़ी ।
 साग रायते बिबिध बिधि, उड़द मूँग आलू बड़ी ॥

व्यंजन सरस बनाइ शैलकूँ भोग लगाओ ।
 भोजन द्विजनि कराइ प्रेमतैं माल उड़ाओ ॥
 पावैं सब परसाद महोत्सव मधुर मनावैं ।
 गिरि परिकम्मा करे गीत गोपी मिलि गावैं ॥
 मेरी तो सम्मति जिही, जिह मख मम मतिमहँ खरो ।
 सुनि सब बोले गोप तब, कृष्ण कहे सोई करो ॥

त्यागि इन्द्र मख गोप करे पूजा गिरिवर की ।
 भई विप्र, गिरि, धेनु यज्ञमहँ सम्मति सबकी ॥
 लागे छप्पन भोग श्याम गोबरधन तनिकें ।
 करि करि लम्बे हाथ उड़ाये व्यञ्जन तनिकें ॥
 खिचरी, पूरी, मिठाई, सटकें सट सट साग सब ।
 देखि देव प्रत्यक्ष गिरि, भयो सबनि विश्वास अब ॥

पूजा के ई समय मानसी प्रकटी गंगा ।
 सुन्दर निर्मल नीर निकट गिरि तरल तरङ्गा ॥
 गोबरधनकूँ पूजि द्विजनि परसाद पवायो ।
 परिकम्मा पुनि करी हर्ष हियमहँ अति छायो ॥
 पायो प्रेम प्रसाद पुनि, पय पी सब ब्रजमहँ गये ।
 गिरिवर पूजातैं सकल, प्रमुदित पुरवासी भये ॥

इत सुरपति जब सुनी नंद मम भाग न दीयो ।
 समुक्त्यो निज अपमान कोप गोपनिपै कीयो ॥
 सोचे सुरपति—कृष्ण काल्हिको छोरा छोटी ।
 मानि गोप तिहि बात काज कीयो अति खोटी ॥
 अच्छा इनके गर्वकूँ, अबई खर्ब कराउँगो ।
 बर्षा बिकट कराइकें, ब्रजकूँ आज डुबाउँगो ॥

करयो इन्द्र अति कोप भयङ्कर मेघ बुलाये ।
 करिवेवारे प्रलय मेघ साँवर्तक आये ॥
 बोले तिनतैं शक्र—शीघ्र तुम ब्रजमहँ जाओ ।
 गोपनिको धन धान धेनु सर्वस्व डुबाओ ॥
 गर्जत तर्जत धन चले, प्रलय सरिस वरषा करे ।
 प्रेरित पवन प्रचण्ड हिम, नर, पशु, पक्षिनिपै परे ॥

थर थर काँपैं गाय हाय सब लोग पुकारे ।
 ठिठुरत इत उत फिरत कहत हरि हमें उबारे ॥
 अनत शरन नहिँ लखी शरन सब हरिकी आये ।
 शरनागत के निकट दीन ह्वै बचन सुनाये ॥
 भक्तबल्लभ भगवान हे, हरि हम सबके दुख हरो ।
 कुपित इन्द्रके कोपतैं; प्रनतपाल रक्षा करो ॥

सुरपतिकी करतूत समुक्ति हरि मन मुसुकाये ।
 कछु चिन्ता मति करो सबनिक्कूँ बचन सुनाये ॥
 करपै गिरिवर धर्यो फूल सम ताहि उठायो ।
 चक्रसुदर्शन सोखन हित जल शैल बिठायो ॥
 मैया कर माखन मलै, लकुट लगावें गोप-गन ॥
 सात दिवस गिरि कर धर्यो, भयो न नैकहु मलिन मन ॥

प्रलयकालके मेघ शक्तिभर पूरे बरसे ।
 नीचे गिरिके गोप गाय सब सुखतें निवसे ॥
 जलतैं खाली भये गये सुरपतिके पाहीं ।
 बोले बरषा करी नन्द-ब्रज डूबत नाहीं ॥
 मद सब उतश्यो इन्द्रको, सुनत चकित सो रहि गयो ।
 रोके घन सब ब्रज चलो, गिरिधर गोपनितैं कह्यो ॥

कुशल सबनि लखि गोप अधिक हियमहँ हरषावें ।
 हरि आलिङ्गन करें प्रेमतैं उर चिपटावें ॥
 पूजन गोपी करें कृष्णकी कुशल मनावें ।
 सुर-गन सादर सुमन गगनतैं मिलि बरषावें ॥
 आनन्द त्रिभुवनमहँ भयो, सुखी संकल सुर नर भये ।
 चढ़ि छकरनिपै गोप सब, वृन्दावनकूँ चलि दये ॥

इति श्रीभागवत चरितके पञ्चमाहमें गोबर्धनधारण-लीला
 नामक पन्द्रहवाँ अध्याय समाप्त ।

[पाक्षिक पारायण, दशम दिवस विश्राम]

अथ षोडशोऽध्यायः

[१६]

प्रभु प्रभावतैं परम प्रभावित भये गोप अब ।
 नन्दतनय नहिँ श्याम करें शंका मिलि जुलि सब ॥
 कैसे जाने सात दिवस गोवर्धन धार्यो ।
 कैसे कालिय क्रूर कुण्डलें मारि निकास्यो ॥
 जाके सबई काज अति, अद्भुत परम विचित्र हैं ।
 करै अलौकिक काज नित, मधुमय दिव्य चरित्र हैं ॥

दश दिनको नहिँ भयो पूतना मारि पछारी ।
 वृणावर्त अरु शकट काक बक हने मुरारी ॥
 खल अघ, धेनुक, बत्स त्रिविध बेषनितैं आये ।
 आइ असुरता करी श्याम यम-सदन पठाये ॥
 दामोदर बनि यमज तरु, खेंचि गिराये बालने ।
 सात दिवस अब खेलमहँ, धर्यो शैल कर लालने ॥

पूछैं मिलि सब गोप नन्दतैं—को ये गिरिधर ।
 कहो सत्य ब्रजराज ! कौनके सुत ये नटवर ?
 सुनि बोले ब्रजराज—सत्य मैं बात बताऊँ ।
 मेरो ई सुत कृष्ण रहस परि तुम्हें सुनाऊँ ॥
 गर्ग प्रथम मोतैं कही, अवतारी तेरो तनय ।
 गुन सब नारायन सरिस, ह्री, श्री, बल, तप, नय, विनय ॥

करि मोकूँ आदेश गये घर गर्ग महामुनि ।
 हौँ अति विस्मित भयो पुत्रके ग्रह फल शुभ सुनि ॥
 तबतैं, जो जिह करै मोइ होवै नहिँ बिस्मय ।
 नारायन सुत समुक्ति सतत बिहरौँ हौँ निर्भय ॥
 समाधान सबको भयो, करेँ प्रशंसा नंदकी ।
 जय बोले मिलिकेँ सकल, नंदनंदन ब्रजचन्द्रकी ॥

ब्रजकी रक्षा करी कृष्णने यश जग छायो ।
 लज्जित ह्वैकें इन्द्र स्वर्गतैं प्रभु ढिँग आयो ॥
 कामधेनु गोलोक त्यागि सेवा महँ आई ।
 आय शक्र अति सकुचि मधुर स्वर विनय सुनाई ॥
 कर जोरे शतक्रतु कहे, शुद्ध सत्वमय नाथ ! तुम ।
 प्रभो ! छिमहु अपराध अब, माया मोहित जीव हम ॥

जनक अंकमहँ करहिँ तनय नित अगनित अभिनय ।
 पितु ताड़न हूँ करहिँ तदपि हिय रहहिँ प्रेममय ॥
 मेरे गुरु पितु मातु बन्धु तुम सब कछु स्वामी ।
 समुक्ति शक्र मद रहित कहैं हरि अन्तरयामी ॥
 इन्द्र ! जाहु निज लोककूँ, मम आयसु पालन करो ।
 कबहुँ न करियो गर्व अब, मम सिख यह हियमहँ धरो ॥

तब पुनि बोली सुरभि—श्याम तुम लीलाधारी ।
 मम संततिकी बिपति धारि गिरि हरि तुम टारी ॥
 अज अनुमतितैं आज आपु अभिषेक करावैं ।
 शक्र सुरनिके इन्द्र आप गोविन्द कहावैं ॥
 निज पयतैं प्रभुरुख निरखि, कश्यो धेनु अभिषेक पुनि ।
 हरषे हरि अभिषेक लखि, इन्द्र सहित सुर सिद्ध मुनि ॥

यों गिरिवर हरि धारि इन्द्र मख भङ्ग करायो ।
 करि मद मर्दन फेरि क्षमा करि मान बढ़ायो ॥
 हरि आयसु लै इन्द्र सुरभि निज लोक सिधाये ।
 कुञ्जबिहारी करत केलि वृन्दावन आये ॥
 जे श्रद्धातैं सुनहिँ नर, जा चरित्र कूँ नेमतैं ।
 काम क्रोध नसि जाइँ रिपु, प्रभुपद पावैं प्रेमतैं ॥

हरिबासर व्रत करें सबहिँ ब्रजमहँ नर नारी ।
 निर्जल कछु फल खाइ रहें कछु दूधाधारी ॥
 एकादशी पुनीत सुदी कातिककी आई ।
 निराहार ब्रजराज रहे दिन दयो बिताई ॥
 जानि प्रात उठि चलि दये, स्नान करन यमुना निकट ।
 धरि पट जलमहँ घुसि गये, जानी नहिँ बेला बिकट ॥

दूत पकरि लै गये तुरत जलपतिके पाहीं ।
 इत ब्रजमहँ नँदराय लौटिकें आये नाहीं ॥
 समाचार सुनि दुखद बरुनके पास गये हरि ।
 सौंपे श्रीब्रजराज बरुनने बहु पूजा करि ॥
 पिता संग घनश्याम लै, आये ब्रजमहँ सुखसदन ।
 सुनि अति बैभव कृष्णको, भयो सबनिको मन मगन ॥

गोप विचारे श्याम हमें बैकुण्ठ दिखावें ।
 गोता हमहूँ बैठि ब्रह्मसरमाहिँ लगावें ।
 सबकी इच्छा जानि बिष्णु निज लोक दिखायो ।
 सुखमहँ सबई मग्न भये सब जगत भुलायो ॥
 ब्रह्मानन्द चखाइ हरि, पुनि बैकुण्ठ दिखाइकें ।
 भये चकित सब गोपगन, हरिपुर दरशन पाइकें ॥

द्विभुज कृष्ण नहिँ देखि भई तिनकी विभ्रम मति ।
 लख्यो चतुर्भुज रूप भयो सबकूँ बिस्मय अति ॥
 ब्रह्मानन्द निमग्न गोप पुनि श्याम निकारे ।
 नटवर यमुना निकट निरखि सब भये सुखारे ॥
 यौ वैकुण्ठ दिखाइके, बिस्मय कीयो दूरि हरि ।
 नित नूतन अभिनय करे, छद्म ललित अति वेष धरि ॥

इति श्रीभागवत चरितके पञ्चमाह में इन्द्रसुरभिवरुण-विनय
 नामक सोलहवाँ अध्याय समाप्त ।



अथ सप्तदशोऽध्यायः

[१७]

ब्रजबन्धितनि अनुराग नवलमहँ नित नव विकसत ।
गिरिधर नटवर नाम सुनत अतिशय हिय हुलसत ॥
प्रथम श्रवन फँसि गये नयन पुनि भये पराये ।
मन अटक्यो लखि रूप जगतके काज भुलाये ॥
नाम श्रवन पुनि दरश करि, चित्त परस हित अड़ि गयो ।
परस पाइ पुनि केलि हित, सुरति भाव जाग्रत भयो ॥

इत गोपिनिको चित्त कृष्णके रूप लुभायो ।
करिबे रास बिलास श्याम उत मन ललचायो ॥
अति सुखदायिनि शरद पूर्णिमाकी निशि आई ।
सुषमा अति रमनीक दशहुँ दिशिमाहिँ सुहाई ॥
मनमोहनने मोहिनी, मायाको आश्रय लयो ।
आप्तकाम परिपूर्ण को, मन क्रीड़ाके हित भयो ॥

अति निर्मल नभ भयो नीलिमा गहरी छाई ।
शारदोय शशि बिहँसि चन्द्रिका शुभ छिटकाई ॥
प्राची दिशिकी ललित लालिमा लागे ऐसे ।
पति विदेशतैं आई रँग्यो प्यारी मुख जैसे ॥
प्रियारक्त पटतैं निकसि, पूर्णचन्द्र विकसित भये ।
सूर्यताप संताप दुख, निरखत शशि सब भगि गये ॥

नभकूँ झारि बुहारि रंग्यो नीलमतै' मानों ।
 मोती दये बिखेर खिले तारागन जानों ॥
 श्रीमुख मंडल सरिस सुखद शोभायुत निशिपति ।
 रक्ताञ्चलतै' निकसि करत जगकूँ प्रमुदित अति ॥
 प्राची दिशि कुंकुम रंगी, बर उडुगनपति शुभ्र अति ।
 मनहुँ प्रिया परिधान मुख, माँपि हँसत प्रिय प्रानपति ॥

हृदय भरित अनुराग चलत शशि सबकूँ हेरत ।
 मनहुँ किरन कर कमल राग चहुँ ओर बिखेरत ॥
 फेंकी कोमल किरन भयो बृन्दावन रञ्जित ।
 जपा कुसुमकूँ पाइ फटिक मनि जनु अति हरषित ॥
 बृन्दावन अति मनहरन, आये गोपीजनरमन ।
 नटनागर सजि बजि तुरत, रास करन यमुना पुलिन ॥

है त्रिभङ्ग मनहरन फैंतै' बेनु निकारी ।
 कर कमलनितै' परसि प्रेमतै' पौछि सम्हारी ॥
 पुनि अधरनिपै धरी करी कछु तिरछी प्यारी ।
 दाबे उंगलिनि छिद्र फूँक पुनि मुखमहँ मारी ॥
 स्वर लहरी प्रकटित भई, विश्व निखिल रव भरि गयो ।
 मधुर गान काननि पश्यो, युवतिनि चित चञ्चल भयो ॥

मनमोहनमहँ प्रथम चित्त आसक्त सबनिको ।
 करत प्रतीक्षा पश्यो श्रवन रव बंशी धुनिको ॥
 ज्यों जलनिधितै' मिलन जाहिँ द्रुतगतितै' सरिता ।
 अकबकाइ सब चलीं श्याम ढिँग त्यों ब्रजबनिता ॥
 काम काज बिसरें सकल, मंत्र मुग्ध-सी बनि गई ।
 तन मन घर परिवारकी, सुरति त्यागि सब चलि दई ॥

दूध दुह्योको दुह्यो गायके नीचे पटक्यो ।
 रही पालनो खोलि तज्यो ज्योंको त्यो लटक्यो ॥
 दही मथत ही छाड़ि चली माखन न निकास्यो ।
 छोड़ि चूल्हिपै दूध चली नीचे न उतास्यो ॥
 पति भोजन तजि चली इक, प्रेम चटपटी हिय लगी ।
 हलुआ घोटति रही इक, छोड़ि कढ़ाईमहँ भगी ॥

कछुक अङ्क बैठाइ पूतकूँ दूध पिआवें ।
 कछुक प्रानपति हेतु फूलकी सेज बिछावें ॥
 कछु भोजन करवाइ सबनिके बासन मार्जें ।
 कछु उवटन करि न्हाइ नेत्रमहँ अंजन आजें ॥
 कछु कुंकुम चंदन घिसति, कछु तनमाँहिँ लगावतीं ।
 कछुक केश काढ़ति रहीं, कछु बेदी चिपकावतीं ॥

कछु पट पहिनति रहीं कछुक आभूषन धारति ।
 कछु दर्पनमहँ देखि मांग सिंदूर सम्हारति ॥
 जो जो कारज करति रहीं त्यागो सो तिनने ।
 चली बेनु सुनि काज अधूरे छोड़े उनने ॥
 बरजीं पति पितु बन्धुने, रोकीं बहु परि नहिँ रुकीं ।
 कही बहुत परि ते नहीं, लोक लाज सम्मुख झुकीं ॥

कछुक रहीं घरमाँहिँ गमनकी करीं तयारीं ।
 किन्तु चलि नहिँ सकीं पिता पति बन्धु निवारीं ॥
 करिबे हठ जब लगीं दयो बाहरतैं तारो ।
 भीतर सोचैं बिबस नाथ ! बश नाहिँ हमारो ॥
 कृष्ण भावनामहँ सकल, तब तन्मय ते हूँ गई ।
 नयन मूँदि मनहरनके, मगन ध्यानमहँ सब भई ॥

कृष्ण-विरह अति दुसह बेदना भई तीव्र जब ।
 सकल अशुभ मिटि गये भावमहँ मगन भई सब ॥
 भावार्तिगन करत मिटे शुभ बन्धन दूटे ।
 त्रिगुन देह तजि दई जगतके बन्धन खूटे ॥
 दिव्य देहतैं तुरत ई, कृष्णसंग संगम कस्यो ।
 भयहारी भगवान्ने, भवबन्धन तिनिको हरयो ॥

कहें परीक्षित—प्रभो ! कान्तते मानति हरिकूँ ।
 ब्रह्म-भाव नहिँ भयो मिली च्यौँ शुभगति तिनिकूँ ॥
 डपटि कहें शुक—भूप ! भूलि का बात गये तुम ।
 भई मुक्ति शिशुपाल बताई बात प्रथम-हमः ॥
 वैर भाव करि तरि गयो, कस्यो कृष्ण महँ प्रेम नहिँ ।
 सदा बसत हिय श्यामघन, ते गोपी च्यौँ नहिँ तरहिँ ॥

काम क्रोध भय लोभ नेह सौहार्द भावतैं ।
 कैसे हू हरि भजो शुद्ध वा असद् भावतैं ॥
 जे तन्मय हू जायँ तरहिँ भवसागर तैं नर ।
 जो चाहे सो करहिँ सिद्ध दाता वे नटवर ॥
 राजन ! हरिकी दयातैं, संशय सब मिटि जाइगी ।
 ककरी चाकूपै गिरे, ककरी ई कटि जाइगी ॥


नृप बोले—गुरुदेव ! रही अब शंका नाहीं ।
 हरि चरित्र सो कहें गई गोपी प्रभु पाहीं ॥
 शुक बोले—ब्रजबाल गई ब्रजबल्लभढिँग जब ।
 हू ऊपरतैं निठुर कपटतैं बोले हरिः तब ॥
 आओ, बैठो, कुशल सब, कस्यो कष्ट किहि कामतैं ।
 राति अँधेरी बन बिकट, च्यौँ आई निज धामतैं ॥

अनल अनिल जल जनित कष्ट कछु बनमहँ आयो ?
 च्यों निशि बेला सरित पुलिनमहँ चित्त चलायो ?
 शीतल मंद सुगंध पवन पल्लव बन बिकसित ।
 अथवा सुषमा शारदीय अवलोकनके हित ॥
 आई अथवा नेहबश, प्रेम करहिं मोमें सबहिं ।
 पातिव्रत पालन करहु, जाओ निज निज घर अबहिं ॥

सुनत श्यामके कठिन बचन ब्रजबनिता रोईं ।
 भयो हृदय दुख दुसह सबनि तन मन बुधि खोईं ॥
 नयननि निकसत नीर कालिमा काजरकी सँग ।
 ढरकि हृदयपर गिरत मिलत कुच कुंकुम के रँग ॥
 गंगा यमुनाके सरिस, उमड़त हिय मुख मलिन अति ।
 बने भलें ही कठिन हरि, हमरी तो वे एक गति ॥

पुनि कछु धीरज धारि पोछि आँसू बोलीं सब ।
 प्रेमपाशमहँ फाँसि निठुर अति कहहु बचन अब ॥
 जाओ जाओ बार बार जिह बात कही है ।
 जाइ कहाँ सब त्यागि शरन तव चरन गही है ॥
 शरणागतको त्यागिबो, दुसह पाप वेदनि कह्यो ।
 तव चरननिमहँ आइ हम, धरम करम सब कछु लह्यो ॥

सुत पति सेवा करन दयो उपदेश हमें तुम ।
 परि समुमें सर्वस्व प्रानपति तुमकूँ सब हम ॥
 प्रियता जगमहँ होहि सबनिमहँ तुमरे कारन ।
 कैसे हम करि सकें आपुकी शिक्षा धारन ॥
 कुशल शास्त्रविद् सकल जन, करहिं प्रेम तुम प्रेष्ठमहँ ।
 का पति सुत जग प्रेमतैं, होवै यदि रति श्रेष्ठमहँ ॥



श्री रासविहारी जी

कमलनयन ! अब कठिन हृदय बनि मत ठुकराओ ।
 फूली आशा लजा ताहि नहिं नाथ ! जराओ ॥
 जाहिं कहाँ का करे चित्त नहिं बशमहँ प्यारे ।
 कर, पद अब गतिहीन अङ्ग सब भये हमारे ॥
 अरे निर्दयी ! प्रथम तो, जाल प्रेमको डारिकें ।
 अब फँसाइ व्याकुल करत, च्यों नहिं डारै मारिकें ॥

मंद मंद मुसकाय हृदयमहँ बान चुभोयो ।
 करी प्रज्वलित आगि कामकी सरबसु खोयो ॥
 प्यासी बनमहँ फिरहिँ दया हिरदेमहँ लाओ ।
 अधरामृत अति सुखद रमन ! भरिपेट पिआओ ॥
 बधिक ! बिरह बिष बानतैं, नहिं हम सब मरि जाइँगीं ।
 दिव्य देहतैं ध्यान धरि, चरन शरन तब पाइँगीं ॥

जा दिनतैं अति मृदुल पदुमपद हमने परसे ।
 ता दिनतैं अनुराग हृदय सर सरसिज सरसे ॥
 चरनकमल रज चहहिँ किंकरी करि अपनाओ ।
 दीनबन्धु दुख दलन दया करि हृदय लगाओ ॥
 बाहुकंठको हार करि, कर सरोज सिरपै धरो ।
 बक्षःस्थल पद कमल धरि, हृदय ताप गिरिधर हरो ॥

इति श्रीभागवत चरितके पञ्चमाह में रासोपक्रम नामक सत्रहवाँ
 अध्याय समाप्त ।

अथ अष्टादशोऽध्यायः

[१८]

ब्रजबनितनिकी बिनय बिहारी सुनि हरषाये ।
 प्रेम अलौकिक जानि नयन हरिके भरि आये ॥
 योगेश्वर मुसकाय कह्यो-हौं रमण करुझों ।
 चिर दिनको संताप सबनिको आज हरुझों ॥
 यों कहि गोपिनि मध्यमहँ, उड़गन सम शोभित भये ।
 श्याम परसतैं सबनिके, चन्द्रबदन बिकसित भये ॥

बाहु पाशमहँ जकरि फिरै बन रतिपति सम हरि ।
 ज्यों हरिनिनि सँग हरिन करिनि सँग मदमातो करि ॥
 कृष्ण कीरतन करति कंठ कल सब मिलि गावें ।
 नटवर बेनु बजाय तालमहँ ताल मिलावें ॥
 बन बन बिचरत सखिनि सँग, आये गिरिधर पुलिनमहँ ।
 यमुना तट शीतल सुखद, सरस बालुका रम्य जहँ ॥

चंचल तरल तरङ्ग संग शीतल मलयानिल ।
 कुसुम कुमुदिनी गंध पवन सँग खेलै हिलमिल ॥
 तहँ रासेश्वर आइ रमण रमणिनि सँग कीन्हों ।
 काम कलातैं सबनि अलौकिक सुख अति दोन्हों ॥
 तनु पुलकित हुलसित हृदय, हँसहि हाथ फैलाइकें ।
 मिलहि परस्पर प्रेमतैं, भरमामें चौकाइकें ॥

कबहूँ बिनवें दीन होहिं पुनि कबहूँ अकरें ।
 हिय मुख कर कटि केश करनितैं पुनि पुनि पकरें ॥
 करि करि क्रीड़ा कलित प्रेम रसमाँहिं भिगोईं ।
 कुंसुम कली सम सकल सरसतामाँहिं डुबोईं ॥
 जगपति परवश-से भये, करीं वृत्त अति सुख दयो ।
 पाइ मान अति श्यामतैं, मान सबनि हियमहँ भयो ॥

जिहि हियमहँ मनहरन मान तहँ रिपु घुसि आयो ।
 समुझि गये घनश्याम दृश्य अति दुखद दिखायो ॥
 करन कृपा मदहरन रमनतैं बिरत भये तब ।
 अन्तर्धान सुजान भये बिलखैं गोपी सब ॥
 पति बिनु नारी बिकल ज्यौं, हथिनी ज्यौं बिनु यूथपति ।
 त्यों व्याकुल गोपी भईं, निरखि निकुञ्ज न प्रानपति ॥

है चिन्तातुर करहिँ यादि हरिके कामनिकी ।
 मधुर मधुर मुसकान चलन चितवन सुहँसनिकी ॥
 लीला मधुर बिलास यादि करि करिकें रोवें ।
 है तन्मय उन्मत्त सरिस तन सुधि बुधि खोवें ॥
 उच्चः स्वरतैं हरि गुननि, गावें रोवें सिर धुनैं ।
 खग मृग गिरि तरु लतनितैं, पूछैं हरि कोउ न सुनैं ॥

वृक्षनिके लै नाम कहें—हे पीपर ! पाकर ।
 हे कदम्ब ! हे बकुल ! नीम, बट, चंपक, गूलर ॥
 हे रसाल ! रसराज श्याम इत तो नहिँ आये ।
 चितवन जाल बिछाय हमारे चित्त चुराये ॥
 समुझि स्वारथी नरनिकूँ, सब मिलि तुलसी ढिँग गई ।
 करि अतिशय अनुनय विनय, प्रेष्ठ पतो पूछति भईं ॥


हे वृन्दे ! हे तुलसि ! श्यामको पतो बताओ ।
 कहाँ छिपाये श्याम बहिन टुक तनिक दिखाओ ॥
 हतभागिनि हम भई त्यागि हम हरिने दीन्हीं ।
 रमन सँग श्रीप्रिया गई तुमने का चीन्हीं ॥
 सौति समुझि आगे बढ़ीं, पतो सबनि पूछन लगों ।
 ललित लता पुष्पित लखीं, समुझीं सब सजनी सर्गों ॥

हे मालति ! तुम सदा बसो श्रीजी केशनिमहँ ।
 स्वर्णमल्लिका रङ्ग बसै प्यारी अंगनिमहँ ॥
 माधव लये छिपाय माधवी ! कहाँ बताओ ।
 अरी, मल्लिके ! जाति ! यूथिके ! श्याम दिखाओ ॥
 प्रेम परस बिनु होहिँ नहिँ, मन प्रमोद अरु पुलक अँग ।
 श्याम अवसि करतैं परसि, निकसे इततैं प्रिया सँग ॥

हे धरनी ! तू धन्य पाद प्रभुके धारति नित ।
 लिये लाड़िली संग लाल गिरिधर निरखे इत ॥
 हे मृगबधु ! वर नयन नेहमहँ भीजे तुमरे ।
 बहिना ! देउ बताइ गये इत प्रियतम हमरे ॥
 राधा-कन्धा कर धरे, क्रीड़ा कमल घुमावते ।
 निरखे नैदनन्दन नयन, खग मृग कुल सरसावते ॥

शौनक पूछें—सूत ! कौन राधा ये प्यारी ।
 सूत कहें—मुनि ! शक्ति-स्रोत-सुख भरिबेवारी ॥
 श्रीवृषभानु कुमारि कीर्ति पुत्री सुकुमारी ।
 बरसानेकी लली किशोरी भोरी भारी ॥
 गोपी कान्ता राधिका, प्रिया, प्रेयसी, कामिनी ।
 नित्यकिशोरी लाड़िली, मनमोहनि मनभावनी ॥

श्री भागवत चरित—



श्री राधा जी

दिव्य देह धरि धरनि धामपै राधा आई ।
 निज परिकर पुर लाइ अवनिक्कूँ दई बड़ाई ॥
 धनि धनि श्रीवृषभानु कीर्ति जननी हूँ धनि धनि ।
 जिनकी दुहिता बनी राधिका बिहरै भवननि ॥
 यह अवनी पावन बनी, राधा पदरज परसिकें ।
 जिह रज सुरगन इन्द्र अज, शिव सिर धारे हरषिकें ॥

राधा रसकी खानि सरसता सुख की बेली ।
 नंदनंदन मुख चन्द्र चकोरी नित्य नबेली ॥
 नित नव नव रचि रास रसिक हिय रस बरसावै ।
 केलिकंलामहँ कुशल अलौकिक सुख सरसावै ॥
 गोरी भोरी सुन्दरी, रामा सुषमा श्यामकी ।
 सर्ताशिरोमनि स्वामिनी, श्रीवृन्दावन धामकी ॥

प्यारी प्रभुकी परम स्वामिनी सुखकी सरिता ।
 श्याम सिन्धु प्रति बहति भाव भावित रसभरिता ॥
 लै तिनिक्कूँ हरि छिपे लतनितै पूछति नारी ।
 निरखे इत कहूँ कृष्ण कन्हैया कुञ्जविहारी ॥
 नारी तुमहू नारि हम, निष्ठुर नरने ठगि लई ।
 चोर चोरिके चित चल्थो, गयो बिना चितके भई ॥

अरी, बेजि सुख केलि करत निरखे इत गिरिधर ।
 मंद मंद मुसकात मदनमोहन मद मनहर ॥
 अवसि तुमहिँ पद परसि प्रियानङ्ग इतहिँ सिंघाये ।
 तोरे तुमतै सुमन कामिनी केश सजाये ॥
 नख चततै अनुराग अति, उमड़ि रझो तुम अंगनितै ।
 पायो आलिङ्गन अवसि, तुम सबने प्रिय भुजनितै ॥

ऐसे कहि कहि बैन नैनतैं नीर बहावै ।
 कबहुँ करै प्रलाप कबहुँ रोवै पछतावै ॥
 करै कृष्णको ध्यान पुकारै नाम निरन्तर ।
 नाम ध्यानतैं भई गोपिका तन्मय सत्वर ॥
 कृष्ण सरिस क्रीड़ा करै, बनी पूतना अपर हरि ।
 ज्योंको त्यों अभिनय करै, नयन मूँदि पयपान करि ॥

एक बनि गई शकट कृष्ण बनि अपर गिरावै ।
 बृणावर्त बनि हरहि अपर हरि बन हरि जावै ॥
 बनि बत्सासुर एक कृष्ण बछरनि बिदुकावै ।
 कृष्ण बनी तिहि मारि परमपद ताहि पठावै ॥
 बनि वनधारी ब्रजबधू, बेनु बजावै बननिमहूँ ।
 कछुक गोप गैयाँ बनी, सुनि धुनि आवै रमन जहूँ ॥

बनि कालिय फुफकार एक गोपी जब मारै ।
 बनि नँदनन्दन अपर नाथिके ताहि निकारै ॥
 एक कृष्ण बनि गोवर्धनकूँ धारै बलतैं ।
 बनि यशुमति हरि बनी ताहि बाँधे ऊखलतैं ॥
 चेहःगेहकी सुधि न कछु, भ्रमति प्रेमरसमहूँ पगीं ।
 तन्मय हूँकैं अनुकरन, नटवरको करिबे लगि ॥

निरखे प्रभुके चरन-चिन्ह अयनीपै उभरित ।
 बज्राकुश, ध्वज, कमल जवादिक चिह्ननि चिह्नित ॥
 बिच बिच प्यारी चरन निरखि अतिशय अकुलावति ।
 करै सौतिया डाह प्रियाको भाग्य सराहति ॥
 है अनुपम अनुराग अति, राधाको ही कान्तमहूँ ।
 करहिं भ्रमर सम पान हरि, अधरासृत एकान्तमहूँ ॥

करत त्रिविध अनुमान बड़ीं कछु आगे बाला ।
एकाकी पद-चिह्न निरखि बोलौं इहँ लाला ॥
अवसि यान वे बने राधिका कन्ध चढ़ाई ।
यहाँ तोरिकें फूल श्यामने प्रिया सजाई ॥
फूली फूजी लतनितैं, उचकि सुमन तोरे अवसि ।
एड़ी बिनु पंजे बने, पुनि इततैं आये निकसि ॥

अरी, निहारो अली ! बनी बैठक दोउनिकी ।
प्रिया अंकमें धारि गुंथी है बैनी तिनिकी ॥
मोती सुमन पुरोइ प्रियाकी माँग सँवारी ।
अवसि यहाँ तिहि संग करी हैं क्रीड़ा प्यारी ॥
अवसि यहाँ हरि बश भये, अवसि व्यथा दोउनि बड़ी ।
श्याम दिखाई दीनता, अवसि सखी सिरपै चढ़ी ॥

अरी, रमनने रमन बढ़यो रमनी सँग तरुतर ।
अत्तो पत्तो मिल्यो श्याम श्यामाको गुरुतर ॥
धन्य लाड़िली भाग करे बशमहँ बनवारी ।
मनोकामना पूर्ण भई नहिं बीर हमारी ॥
कृष्णान्वेषणकातरा, इत रमनी बन बन फिरहिं ।
उत प्रियतम सँग राधिका, कामकेलि कौतुक करहिं ॥

उनके हू मन मान बढ़यो सोचैं हौं सरबस ।
अखिल भुवनपति श्याम करे अब मैंने निजबस ॥
जहाँ मान तहँ बास करे कैसे गिरधारी ।
परबश तब घनश्याम लखे तब बोली प्यारी ॥
पैदर अब नहिं चल सकौं, कितव कहाँ लै जात हैं ?
पग चाँपौ घोड़ा बनो, प्यारे ! पाँइ पिरात हैं ॥

तब हँसि बोले श्याम—चढ़ौ कन्धापै प्यारी ।
 सुनि अति हरषित भई चढ़नकी करी तयारी ॥
 त्यों ही अन्तर्धान भये हरि वे पछितावे ।
 इत उत खोजहिं फिरहिं डरहिं रोवहिं बिललावे ॥
 नाथ ! रमन ! प्रियतम परम ! जीवन धन ! अशरनशरन !
 देहु दरश अब दुखहरन, विश्वभरन ! भवभयहरन ॥

हाय ! कहाँ तजि गये रमन ! मुख कमल दिखाओ ।
 भयो दर्प मम दलन दयानिधि आओ आओ ॥
 भ्रमरी भूखी फिरहि कमल ! मधु अधर पिआओ ।
 मरत चातकी प्यास श्यामघन रस बरसाओ ॥
 यों प्यारी प्रिय बिरहमहँ, कुररी सम रोवति फिरति ।
 सम्मुख निरखतिचर अचर, पूछति पति बिलखति गिरति ॥

करि करि सुमिरन संग श्यामको रोवति राधा ।
 बन बन बिहरत बिकल बिरहकी बाढ़ी व्याधा ॥
 दीखति दशमी दशा दुखी दरसन बिनु प्यारी ।
 व्याकुल बिलखति बिरहमाँहिं तनु दशा बिसारी ॥
 इत प्यारी मूर्छित परीं, उत आई दूँदत सखीं ।
 अति अचेत आकुल अधिक, राधाजी सबने लखीं ॥

इति श्रीभागवत चरितके पञ्चमाह में श्रीकृष्ण अन्तर्धान
 नामक अठारहवाँ अध्याय समाप्त ।

अथ एकोनविंशतितमोऽध्यायः

(१९)

दोहा—देखि दशा कीरति सुता—की सबई पछिताई ।
निज दुखबिसरयो सकल मिलि, बहुबिधिधर बधाई ॥

छप्पय—गोपी बैठीं घेरि प्रियाकूँ सब समुभावे ।
गोदीमाँहिँ लिटाइ कमल दल ब्यजन डुलावे ॥
कछुक चेतना भई रसिककी बात चलाई ।
अपुबीती सब बात दुखित ह्वै प्रिया वताई ॥
एक प्रान मन मिलि सकल, मान रहित अति दीन सब ।
गावत गुन गोबिंदके, भई ध्यानमहँ लीन सब ॥

सुधि बुधि तजि घर द्वार बारकी कृष्ण पुकारे ।
उत्कंठित अति भई करुन स्वर नाम उचारे ॥
रूप सुमिरि घनश्याम हृदय पिधिले भरि आवै ।
देह कपकपी उठे चित्त चंचल ह्वै जावै ॥
करत प्रतीक्षा पुलिनमहँ, मिलि जुलि गावै गीतिकूँ ।
साधनसिद्धा सखी सब, प्रकट करे रस रीतिकूँ ॥

गावे गोपी गीत जयति जय ब्रजवनचंदन ।
ब्रजजीवन सरबस्व सुखद नटवर नंदनन्दन ॥
कमल बदन हम जोहि मधुकरी जीवन धारे ।
तिनहिँ अदरशन वायु बिना बल्लभ च्यौ मारे ॥
प्राणेश्वर ! तव दरश बिनु, प्रानहीन हम भई सब ।
खोजि थीं दश दिशि दयित, देहु दयानिधि दरश अब ॥

हमरे तन, मन, प्रान, कर्म सब तुम हित प्रियतम ।
 तब प्रसन्नता हेतु करहिं जीवन धारन हम ॥
 जिन नयननि तव रूप लख्यो पुनि और न भावै ।
 सुने श्रवन तव बचन अन्य पटतर नहिं आवै ॥
 नस्यो प्रियतमा प्रेयसी, को मद अब दासी भई ।
 आओ दरशन देउ अब, बन बन दूँदत थकि गई ॥

बनितनि बन्धन करन अधिकको वेष बनायो ।
 सुन्दर कोमल मृदुल रूपको जाल बिछायो ॥
 मोहकता कण फेंकि मधुर स्वर बेनु बजावै ।
 गाइ सुखद संगीत मृगिनि सम नारि फँसावै ॥
 भ्रुकुटि धनुष विष बुझे सर, सैन नैन सरसाइके ।
 तकि मारे, घायल करे, निरखे सतत सिहाइके ॥

कायर कपटी कुटिल कामिनीघातक कारे ।
 तीखे बान कटाक्ष ताकि अबलनिमहँ मारे ॥
 घायल सिसकति फिरहिं बान तनतै न निकारे ।
 छलिया छिपिके हँसत न आओ सतत पुकारे ॥
 दर्श सुधा हित दयित हम, दुःख दुसह दारुन सहें ।
 बिना मोलकी किकरी, कृष्ण कृष्ण कबतै कहें ॥

बध करनो ही हतो हमें च्यौं प्रथम बचायो ।
 च्यौं असुरनिक्कूँ मारि सबनिकौ दुःख छुड़ायो ॥
 कुपित इन्द्रने उपल प्रलयके घन बरसाये ।
 च्यौं गोवर्धन धारि नाथ ! हम सकल बचाये ॥
 च्यौं दावानल पान करि, कालियदहपै दुख हश्यो ।
 च्यौं अजगरके मुख घुसे, च्यौं बत्सासुर बध कर्यो ॥

बार बार च्यौं बिपति उदधितैं नाथ बचाई ।
 च्यौं नटवर कर पकरि रासमहँ बिहँसि नचाई ॥
 च्यौं कुंकुम मुख मल्यो प्रेमको खेला खेल्यो ।
 च्यौं गोदी सिर धारि अमृत मुखमाँहिं चढ़ेल्यो ॥
 च्यौं सरसायो नेह अति, ढीठ बनाई च्यौं हमें ।
 अब दरशन बिनु देहु दुख, लाज न लागत च्यौं तुमें ॥

नहिं नभमहँ हम कहें सुनो तुम सब कुछ स्वामी ।
 यशुमतिसुत ही नहीं आपु तो अन्तरयामी ॥
 अबला हम अति दुखित आपु चाहें मत मानो ।
 अधिक कहा हम कहें आपु घटघटकी जानो ॥
 जानि हमारो हृदय दुख, दै दरशन जग यश लहो ।
 जड़ चेतन जग जीव जे, तुम सबके हियमहँ रहो ॥

कृष्ण ! कृतारथ करहु कृपा कीजे कछु हमपै ।
 धरहु दया करि कान्त ! कामपूरक कर सिरपै ॥
 है हमरो हिय कठिन काम कंटकहू जामें ।
 तब अति कोमल चरन कठिनकूँ मृदुल बनामैं ॥
 धरहु चरन हियपै हुलसि, हरहु काम पीड़ा सकल ।
 सुने बचन जबतैं सरस, मधुर भई तबतैं विकल ॥

प्रिया पिपासित फिरहिं मधुर कछु पेय पियाओ ।
 अधरामृत मुख भरो निठुर कछु पुण्य कमाओ ॥
 प्याओ प्यारे परम स्वादयुत मीठो मीठो ।
 दुखहर अतिशय सुखद सौति बंशीको जूठो ॥
 कान कान्हकी कथा सुनि, होहिं कृतारथ रस लहहिं ।
 बड़भागी ते जगत नर, कथा तुमारी जे कहहिं ॥

धूरि धूसरित नील कुटिल कच कारे कारे ।
 मुखपै बिथुरे मधुर लगेँ मनकूँ अति प्यारे ॥
 फोटा खात बुलाक मोरको मुकुट मनोहर ।
 ऐसो बेष बनाइ जाउ जब बन तुम गिरिधर ॥
 तब पल पल युग युग सरिस, बीतत बिनु देखे तुम्हें ।
 अब निशिमहँ बन छाँड़ि तुम, छिपे छबीले छलि हमें ॥

आओ आओ श्याम हृदयकी तपन बुझाओ ।
 चरन कमल हिय धरो शोक संताप नसाओ ॥
 यों कहि रोई फूटि फूटिकेँ गोपीं सस्वर ।
 रहि न सके तब श्याम भये प्रकटित तहँ सत्वर ॥
 मथन मनोहर वेषतैं, मनमथके मनकूँ करत ।
 प्रकटे प्रभु तिनि मध्यमहँ; शोक मोह हियको हरत ॥

मोर मुकुट सिर धारि गरे बैजन्ती माला ।
 लखे शरद ब्रजचन्द्र भई प्रमुदित ब्रजबाला ॥
 करें निछावर प्रान सिहावें सब तृन तोरे ।
 प्रेम न अंग समाय उठें हियमाँहि हिलोरें ॥
 खावें पीवें युगल कर, रूपासव नयननि भरत ।
 भूखी प्यासी प्रेमकी, आलिंगन चुम्बन करत ॥

कोई हरि कर धारि कपोलनि परम सिहावें ।
 कोई पुनि पुनि पकरि प्रेमतैं हिये लगावें ॥
 कोई चर्वित पान कान्हको लेहि चबावें ।
 कोई हरिपद हृदय धारि संताप मिटावें ॥
 अकुटि कमान कटाक्ष सर, मारे काटें द्विज अधर ।
 बीधेँ बधिकिनिके सरिस, बाँधत करतैं पकरि कर ॥

कोई हरि मुख कमल माधुरी नयननि भरि भरि ।
 होहिँ चूष नहिँ पान प्रेमतै पुनि पुनि करि करि ॥
 नयन रन्ध्रतै मधुर मूर्ति कोई हिय लावे ।
 करे मानसिक परस परम सुख मनतै पावे ॥
 साधक सद्गुरु पाइके, आनन्दित अति होत ज्यों ।
 दरशन करि घनश्यामके, गोपी प्रमुदित भई त्यों ॥

इति श्रीभागवत चरितके पञ्चमाहमें रासेश्वर पुनर्दर्शन नामक
 उन्नीसवाँ अध्याय समाप्त ।

अथ विंशतितमोऽध्यायः

(२०)

लै सब सखियनि संग श्याम सरिता तट आये ।
 कुसुम कुन्द मन्दार कुमुदिनी लखि हरषाये ॥
 कालिन्दी निज करनि बिछाई बालु सुकोमल ।
 आसन हित पट प्रिया अंगको डारयो तिहि थल ॥
 तहँ बैठे राधारमन, ब्रजबनितनिके बीचमहँ ।
 सने पदुम पद सखिनिकी, कुच कुंकुमकी कीचमहँ ॥

पूछे करिके ब्यंग श्याम ! इक बात बताओ ।
 तीनि भाँतिके पुरुष साधुको शोक मिटाओ ॥
 एक प्रेमःलखि करहि प्रेम दूसर बिनु प्रेमहु ।
 करे तीसरे नहीं उभय पक्षनि तिनि नेमहु ॥
 इनमें कौन निकृष्ट हैं, को मध्यम को श्रेष्ठतम ।
 नीति निपुण तुम धरमवित, ताते पूछे तुमहि हम ।

बोले सुनिके श्याम—सुनहु सखि ! सत्य बताऊँ ।
 नीति धरमको मरम यथावत तुमहि सुनाऊँ ॥
 करे स्वार्थ हिय धारि प्रेम ते नर व्यापारी ।
 नहीं तहाँ सौहार्द प्रेम है वह व्यवहारी ॥
 करे प्रेम निरपेक्ष जे, ते कृपालु पितु मातु हैं ।
 तहाँ धरम कैतव रहित, बन्धु सुहृद ते तात हैं ॥

प्रेमहीन नर चारि श्रेष्ठ कछु अपर शतघ्नी ।
 आत्मराम अरु पूर्णकाम गुरुशत्रु कृतघ्नी ॥
 हौं इन सबतैं पृथक प्रेष्ठ पति सुहृद कारुनिक ।
 प्रेम बृद्धिके हेतु करयो मैंने सब नाटक ॥
 अति दुस्तर गृह शृंखला, कूँ आई तुम तोरिकें ।
 मम हित पति, सुत, गृह, कुटुम, तैं आईं मुंह मोरिकें ॥

जन्म जन्म हौं रहौं सुन्दरी ऋनी तिहारो ।
 क्रीतदास बनि गयो प्रेमतैं मोकूँ तारो ॥
 करि अर्पन सर्वस्व मोहि सुख अतिशय दीयो ।
 तजिकें सब सुख सगे संग तुम मेरो कीयो ॥
 बचन श्यामके सरस सुनि, दुःख शोक सबके भगे ।
 निज करतैं शृंगार हरि, श्रीजीको करिबे लगे ॥

परसि परसपर प्रेम पुलक अँग अंगनि होवें ।
 लखि प्यारी हरि रूप देहकी सुधि बुधि खोवें ॥
 निज कर केश सम्हारि प्रियाकी बाँधी बैनी ।
 भाल तिलक तिल चुबक अघर रँग रँगी सुनैनी ॥
 अंजन नयननिमहँ दयो, फूलनिके गजरा नये ।
 पहिराये सर कटि करनि, बीरा श्रीमुखमहँ दये ॥

कर पद नख रँग रँगे महावर चरन सजाये ।
 महँदी दिव्य लगाइ अरुन पद अरुन बनाये ॥
 भूषन बसन सम्हारि इतर अँग अङ्ग लगायो ।
 मलि हिय केशर कीच बिहँसि आदर्श दिखायो ॥
 नव तरङ्ग छिन छिन उठें, मन दोउनिके नहिँ भरे ।
 रूपासवको पान मिलि, दरपनमहँ दोऊ करे ॥

दोऊ रसमहँ पगे प्रेमकी बँधे डोरतैं ।
 करे' हियेमहँ ध्यान निहारे' नैन कोरतैं ॥
 भुकि भुकि चूमत बदन बिरह संताप मिटावैं ।
 ऊपर गिरि गिरि परत परसिकें प्रेम बढ़ावैं ॥
 अरसत परसत परस्पर, बहत तरङ्गनिमहँ उभय ।
 पीवत ज्यों ज्यों नेह रस, त्यों त्यों छूटत सकुच भय ॥

श्यामा श्याम सजाइ रास मंडलमहँ लाये ।
 जै निरखीं तहँ नारि श्याम तै रूप बनाये ॥
 द्वै गोपिनिके बीच बीच हरि सोहत कैसे ।
 स्वर्ण मणिनिके मध्य नीलमणि दमकत जैसे ॥
 गलबैयाँ डारे' चपल, नटवर बेष बनाइकें ।
 ताता थेई कहि हँसत, नाचत ताल मिलाइकें ॥

ताता थेई करे' फिरे' हियमहँ हरषावैं ।
 होहि परसपर परस फुरहरी पुनि पुनि आवैं ॥
 उरफि हारमहँ हार सरसता अधिक बढ़ावैं ।
 मिले चन्द्रिका मोरमुकुटमहँ लट सटि जावैं ॥
 चमकति चपला सम सखी, अगनित घन सम श्याम छबि ।
 अनुपम रास बिलासकी, उपमा को करि सके कवि ॥

ब्रज-युवतिनिके कंठ डारि कर नृत्यत नटवर ।
 रुनभुन नूपुर बजत झनक चुरियनिकी मनहर ॥
 हिलत झन कटि केश लोल लोचन अति चंचल ।
 पीताम्बर सँग मिलत हिलत युवतिनिके अंचल ॥
 पग पटकत कुण्डल हिलत, मुख मटकत लचकत कमर ।
 हिलत हार मुख मुख मिलत, करत गान इत उत भ्रमर ॥

क्रीड़ा कमलाकान्त करे' कल बेनु बजावें ।
 रमनिनि राधारमन रमन करि रहसि रिझावें ॥
 पाइ बिहारी अंग संग बिहरे' ब्रजबाला ।
 अस्त व्यस्त पट केश भये खिसकीं गलमाला ॥
 पाइ प्रेम प्रियको परम, अति प्रमुदित प्रमदा भई' ।
 आलिङ्गनतैं शिथिल अंग, मदमाती-सी बनि गई' ॥

पुनि पुनि परसत अधर चुवावत रस बरसावत ।
 सहसा चुटकी भरत करत सी-सी हरषावत ॥
 दंतद्वत करि हँसत हियेपै नखद्वत करिकें ।
 पान प्रसादी देहि' मुखनिमहँ रति रस भरिकें ॥
 करे' कामिनिनिपै कृपा, स्वेद-बिन्दु पौछें करनि ।
 सुधा मधुर मुसकानतैं, लखि मेंटत जियकी जरनि ॥

ह्वैकें गोपी थकित श्यामके अंक बिराजें ।
 ललना ललित दुकूज पीत पट मिलि अति भ्राजें ॥
 सुहरावें तिनि अंग पौछि' मुख पुनि पुनि जोहैं ।
 निरखि चकोरिनि चन्द्र द्रवें त्यों नटवर सोहैं ॥
 भरत न चित चितचोरको, चितवत अपलक अलीगन ।
 गोपी मुख पंकज निरखि, भयो श्याम अलि मत्त मन ॥

चले श्याम जल केलि करन बनि गायक मधुकर ।
 करत गान सँग चलत कँपकँपी उठति सखिनि उर ॥
 बायु डुलावत व्यजन सुशीतल मंद सुगंधित ।
 कृष्ण कँठमहँ डारि भुजा प्रमदा अति प्रमुदित ॥
 करनिनि सँग जल केलि ज्यों, करै करी अति हिय हरषि ।
 त्यों सखियनि सँग श्याम पुनि, करे' खेल जलमहँ प्रविशि ॥

विविध भाँति जलकेलि करी हरि बाहर आये ।
 पुनि पट पहिरे प्रियनि संग बन उपवन धाये ॥
 भद्र, लोह, श्री, ताल, बकुल, भाण्डीर, महावन ।
 खदिर, कुमुद मधु कान्य बारहों श्रीवृन्दावन ॥
 बारह बन उपवन बहुत, केलि, केतकी, रास थल ।
 शेषशायि बन केमद्रुम, सुललित, वत्सुक बन विमल ॥

इति श्रीभागवतचरितके पञ्चमाह में महारासलीला नामक बीसवाँ
 अध्याय समाप्त ।



अथ एकविंशतितमोऽध्यायः

[२१]

धन्य धन्य ब्रजधाम जहाँ पावन बन उपवन ।
 वृन्दावन अति धन्य धन्य सब सखा सखी-गन ॥
 नंद यशोदा धन्य धन्य हैं वे ब्रजवासी ।
 जिन सँग हरि नित करें शयन बन भोजन हाँसी ॥
 वृन्दावन ब्रजधाम नित, ब्रजलीला परिहास नित ।
 गो गोपी गोलोक नित, परिकर रास बिलास नित ॥

होवै गोपीभाव रासके दरसन पावें ।
 अभिमानी नर नारि नहीं तहँ फटकन पावें ॥
 नारद गोपी बने बने गोपी त्रिपुरारी ।
 अरजुन नर तहँ बने अर्जुनी गोपी प्यारी ॥
 रास रहस घनश्यामतैं, अरजुनने पूछ्यो जबहिँ ।
 रस सरमहँ मञ्जन कश्यो, पुरुषवेष बदल्यो तबहिँ ॥

सरतैं निकसैं अंगअंग महँ यौवन छायो ।
 तनुको सुन्दर बर्ण भयो मनु कनक तपायो ॥
 बिछुआ नूपुर पैर चुरी कर मत्तमत्त बाजें ।
 बनी रंगीली सखी कोटि रति द्युति लखि लाजें ॥
 त्रिपुरसुन्दरीने कृपा, करी कामिनी तनु भयो ।
 जातैं श्रीरासेश्वरी, राधाजी दरशन दयो ॥

हरि सँग रास बिलास कश्यो पुनि रससर न्हाये ।
 तुरत अर्जुनी रूप तज्यो प्रभु ढिँग पुनि आये ॥
 यों हरि कीन्हीं कृपा पार्थकूँ रास दिखायो ।
 नारद हूँ बनि सखी मनोबांछित फल पायो ॥
 समुक्ति सकैं नहिँ नीच नर, रास रहस अति गूढ़ हैं ।
 हरिलीला प्राकृत कहत, ते नर पापी मूढ़ हैं ॥

मुनी रासकी कथा परीक्षित शंका कीन्हीं ।
 गुरुवर ! हरि करि रास नरनि का शिचा दीन्हीं ॥
 परनारी संस्पर्श पाप सब शास्त्र बतावैं ।
 थापन करिबे धर्म अवनि पै अच्युत आवैं ॥
 च्यौँ अधर्म कारज कश्यो, रक्तक हूँ कैं धर्मके ।
 परनारिनितैं रति करी, साक्षी हूँ कैं कर्मके ॥

हँसि बोले शुकदेव—कृष्णकूँ पाप न परसे ।
 रवि रस सबतैं लेहि शुद्ध करि सब थल बरसे ॥
 नालो गंगा मिलत नाम गुन अपनो खोवै ।
 चाहें जो कछु परे अग्निमहँ स्वाहा होवै ॥
 सब कछु समरथ करि सकैं, विधि निषेध तिनि कूँ नहीं ।
 अनिल अशुचि नित प्रति भखत, खाय मलिन होवै कहों ॥

समरथको प्रतिकूल आचरन करिहैं प्राणी ।
 पावैं दुख इहलोक होहि परलोकहु हानी ॥
 कियो शम्भु बिषपान हलाहल हमहूँ करिहैं ।
 सोचि करे अनुकरन मौतिके बिनु ते मरिहैं ॥
 बेद शास्त्र गुरु वाक्यकूँ, धर्म समुक्तिकें जे करहिँ ।
 सुखी होहिं बिपरीत करि, दुख पावैं नरकनि परहिँ ॥

है सब दुखको मूल अहंता ममता जगमहँ ।
 मैं मेरीमहँ फँस्यो जीव भटकै भव-मगमहँ ॥
 बुद्धि न होवै लिप्त अहंता जाकूँ नाहीं ।
 चाहें सो वह करै बँधे नहिँ बन्धन माहीं ॥
 अर्थ अनर्थ न बिझकूँ, करै अशुभ वा शुभ करम ।
 अहंकारतैं होत है, यह अधर्म यह है धरम ॥

करिकें शुभ अरु अशुभ कर्म फल भोगहिँ मानी ।
 अनिल गंग रबि सरिस रहै निरमल नित ज्ञानी ॥
 ज्ञानी हू जग रहै कमल-दल जलमहँ जैसे ।
 तब हरि सर्व-समर्थ बँधे बन्धनमहँ कैसे ॥
 सबके साक्षी सर्वगत, अखिल जगपति अज अमल ।
 तिनकूँ पर अरु अपर का, घटघट बासी विभु विमल ॥

जग है दुख की खानि दुखी सब जगके प्रानी ।
 पावें दुख अरु मृत्यु जरा ज्ञानी अज्ञानी ॥
 अज्ञानी जग सत्य समुक्ति बन्धन बँधि जावें ।
 ज्ञानी समुक्त सत्य कृष्णलीला-सुख पावें ॥
 अज अच्युत हू अवनिपै, मानुष तनुतैं अवतरे ।
 करन अनुग्रह सबनिपै, श्याम सरस लीला करे ॥

जीव जगत अरु ब्रह्म बात कछु लगति अलौनी ।
 तातें क्रीड़ा करहिँ कृष्ण अति सरस सलौनी ॥
 गोपी अरु श्रीकृष्ण मिलन सुनि हिय सरसावै ।
 सुनिके प्रेम प्रसंग देह पुलकित हू जावै ॥
 जो सांभरकी मालमें, कैसे हू परि जाइगो ।
 तो फिर अपनो रूप तजि, तुरत नौन बनि जाइगो ॥

चिदानन्द घनश्याम देह प्राकृत नहिं तिनकी ।
 गोपी शक्ति अनंत दिव्य चिन्मय हैं उनकी ॥
 शक्तिमानतै' शक्ति विलग होवै नहिं ऐसे ।
 ज्यों श्रीशिवतै' शिवा विष्णुतै' कमला जैसे ॥
 अपनेतै' अपनो मिलै, कितनो सरस प्रसंग है ।
 मनमोहनतै' मन मिल्यो, पुनि नहिं दूसर अंग है ॥

ऊंच नीच निज अङ्ग हाथ सबहीकूँ परसै ।
 पावै प्रियको परस हृदय तन मन अति सरसै ॥
 विषयनिमहँ फँसि जीव दुखी तिनितै' ह्वै जावें ।
 दिव्य देहतै' होहि दिव्य सुख सब नहिं पावें ॥
 जब तक प्राकृत भावना, तब तक होवै रास नहिं ।
 दिव्य देह होवै जबहिं, गोपी बनि नाचै तबहिं ॥

दिव्य देहतै' रास रच्यो गोपी प्रभुके सँग ।
 पति शैयापै परे रहे प्राकृत तिनके अँग ॥
 तातै' निंदा नहीं करी काहूने उनकी ।
 समुक्ति सके को दिव्य रहसमय लीला तिनकी ॥
 हरिके रास बिलास महँ, दोषारोपन जे करै ।
 कहें जाहि व्यभिचार जे, ते पापी नरकनि परै ॥

यों वृन्दाबनमाँहिँ रास अति रसमय कीयो ।
 धरि नर बपु अति सुघर परम सुख गोपिनि दीयो ॥
 रसकी सरिता सुखद श्यामने सतत बहाई ।
 लीला जो गोलोक होहि सो अवनि दिखाई ॥
 करि करि क्रीड़ा कामकी, करी कृतारथ कामिनी ।
 होहि सुमिरि सब सुखी नर, लीला अति मनभाविनी ॥

निज निज घर पुनि प्रात होत आईं ब्रज-नारीं ।
 यों नित क्रीड़ा करे कृष्ण प्यारी सुखकारीं ॥
 जो नर श्रद्धा सहित रास लीलाकूँ गावें ।
 पढ़ें सुनें सुख लहें अन्तमहँ प्रभुपद पावें ॥
 बार बार जे प्रेमतैं, गद्य पद्य महँ गायँगे ।
 तिनके हियके रोग सब, काम क्रोध नसि जायँगे ॥

इति श्रीभागवत चरितके पञ्चमाह में रासपंचाध्यायी नामक
 इक्कीसवाँ अध्याय समाप्त ।

[मासिक पारायण इक्कीसवें दिन का विश्राम]



अथ द्वाविंशतितमोऽध्यायः

[२२]

अब आगेकी कथा अम्बिकावनकी मुनिवर ।
 सुनो कश्यो जो खेल तहाँ नँदनन्दन नटवर ॥
 एक समयकी बात अम्बिका शिव पूजन हित ।
 गये गोप लै सकट करी पूजा तहँ विधिवत् ॥
 तट सरस्वतीके बसें, करि केवल जलपान सब ।
 आयो अजगर दैववश, सोये सुखतै नन्द जब ॥

अहि पग पकश्यो नंद उठे चिल्लाये—आओ ।
 शरणागत प्रतिपाल कृष्ण मम त्रिपति मिटाओ ॥
 सुनि सब आये गोप सर्पकुँ बहु बिधि मारे ।
 परि नहिँ छोड़े पैर कृष्णकुँ नन्द पुकारे ॥
 नँदनन्दन आये तुरत, अहि सिरपै पग धरि द्यो ।
 पाइ परस पग सपै तनु, तजि बिद्याधर ह्वै गयो ॥

प्रभु पूछें—तुम कौन योनि च्यौँ अजगर पाई ।
 सुनि बोल्यो अहि—कहूँ कथा निज सुनहु कन्हाई ॥
 हौँ बिद्याधर प्रथम सुदर्शन सुन्दर सबतै ।
 सुन्दरता बिख्यात भई मद बाढ़्यो तबतै ॥
 लखि कुरूप सुनि हँसि पश्यो, मदवश भूल्यो धर्मकुँ ।
 सुख दुख दूसर देहिँ नहिँ, सब भोगे कृत कर्मकुँ ॥

लखि अशिष्टता मुनिनि शाप दीयो होओ अहि ।
 सुनत भयो मद चूर ऋषिनिके पश्यो चरन गहि ॥
 है प्रसन्न मुनि कही—नन्दनन्दन उद्धारे ।
 अब कृतार्थ हौं भयो नेहतैं नाथ निहारे ॥
 करि बिनती आयसु लई, गयो सुदर्शन लोक निज ।
 ब्रजमहँ आये गोप सब, कथा अन्य अब सुनहु द्विज ॥

एक दिवस बल सहित श्यामसखियनि सँग बनमहँ ।
 बिहरत इत उत नेह नीर उमड़त अति मनमहँ ॥
 मधुर राग स्वर ताल ललित लययुत हरि गावें ।
 विश्व बिमोहन गान गाइ गोपिनि हरषावें ॥
 मन्त्र मुग्ध सम सब सखीं, भई न सुधि तन पट कहाँ ।
 तबई अनुचर धनदको, शङ्खचूड़ आयौ तहाँ ।

कामी हियमहँ काम बान नारिनि लखि लाग्यो ।
 लई सुन्दरी पकरि दुष्ट उत्तर दिशि भाग्यो ॥
 गोपी करति बिलाप भगे बल हरि पीछे जब ।
 छोड़ि भग्यो हरि कश्यो शीश धड़तैं न्यारो तब ॥
 सिरचूड़ामणि लाइकेँ, बलदाऊकुँ दै दई ।
 शंखचूड़ उद्धारकी, कथा समापत है गई ॥

शौनक पूछें—सूत ! कहो कैसे गोपी-गन ।
 बिनु हरि दरशन रहें जाई जब गोचारन बन ॥
 सूत कहें—लै धेनु बेनुधर बन जब जावें ।
 तब सब गोपी गीत कृष्णके हिलि मिलि गावें ॥
 युगल गीत गावें सुनें, हरि लीला चिन्तन करे ।
 तनु पुलकित मन मोदयुत, नेह नीर नयननि भरे ॥

प्रथम गीत

गिरधर मुरली मधुर बजावैं ।

कर कपोल धरि राग अलापत, बाँकी भ्रुकुटि नचावैं ॥१॥
 मुख फूँकत मुरली को पुनि पुनि, छेदनि अँगुरि फिरावैं ।
 सुनत मधुर स्वर सुर ललनागन, सुमन सरनि विधि जावैं ॥२॥
 खिसकति नीवी सुमन भरत कच, खुलि इत उत फहरावैं ।
 लज्जा बश बिसमित-सी ह्वैकें, तनु सुधि बुधि बिसरावैं ॥३॥
 कोकिलकंठी सुमिरि सुमिरि हरि, नयननि नीर बहावैं ।
 धन्य धन्य ब्रजकी वे बनिता, नित गोबिँद गुन गावैं ॥४॥

द्वितीय गीत

मोहन मुरली मधु बरसावति ।

मत्त करति महिलनिके मनकूँ, कुलकी कानि नसावति ॥१॥
 अचर सचर अरु सचर अचर करि, विधिकी रेख मिटावति ।
 सुनि ब्रजबनिता यमुना सरिता, गति मति सब बिसरावति ॥२॥
 दशन दाबि तृन हरिन बधूटी, सुनि धुनि दौरी आवति ।
 धेनु छोरि तृन बेनु श्रवन करि, श्रवननि शंकि उठावति ॥३॥
 चित्र लिखित सब इकटक ठाढ़ीं, पलकनि नाहिं हिलावति ।
 लाज काज घरके छुड़वावति, हठि बन बेंनु बुलावति ॥४॥

तृतीय गीत

आली हम अबला हतभागिनि ।

बोली न सकैं श्यामतैं मुँहभरि, करि न सकैं पालागनि ॥१॥
 जब हरिरूप निहारति इकटक, अँखियाँ जल भरि बैरिनि ।
 बिघन करत निरखन नहिं देवै, माँपै आँसू नैननि ॥२॥

इत उत निरखि परसि पग डरपै, सासु जिठानी ननदनि ।
 दीखे बूढ़े, बड़े, दूरितैं, हठि हम ढाँके वदननि ॥३॥
 हम समान यमुना हू अबला, चूमन चाहे चरनननि ।
 किन्तु न चूमि सके बनि निश्चल, रोकति तुरत तरङ्गनि ॥४॥

चतुर्थ गीत

जो हम ब्रजकी रज बनि जातीं ।
 तो निशंक है आली हरिके अंगनिमहँ लिपटातीं ॥१॥
 प्रिय पद परसि पुलकि सँग धावति, तनिक न लोक लजातीं ।
 अलक पलक अरु भलक कपोलनि की द्युति अधिक बढ़ातीं ॥२॥
 जो घन बरसत पंक होहि, पग प्यारे के सटि जातीं ।
 लोक बेद कुल-कानि न मानति, द्वारेपै जमि जातीं ॥३॥
 देखत देखत सबके निर्भय, श्याम परस सुख पातीं ।
 घूँघट पटकी ओट न निरखति, नैननमें भरि जातीं ॥४॥

पंचम गीत

यशुमति ! मुरली हरि कहँ पाई ।
 कौनों कान छेदिकें जाकूँ, नककनछिदी बनाई ॥१॥
 कौनों मलि मलि चिकनी कीन्हीं, कौनों सौति पढ़ाई ।
 कौनों दई श्यामके करमहँ, मोहनकूँ च्यौं भाई ॥२॥
 जादू टोना जिह कहँ सीखी, कौनों कला सिखाई ।
 जाके मुखपै मुखकूँ धरिकें, गावत गीत कन्हाई ॥३॥
 ब्राजे तजे मुरुज बीणा बर, लकरी च्यौं अपनाई ।
 मैया ! तेरे सुतकी मुरली, ब्रज-बनितनि दुखदाई ॥४॥

षष्ठम गीत

बनतैं आवत श्रीगिरधारी ।

सबहिं श्रवन दै सुनहु सहेली, बजी बाँसुरी प्यारी ॥१॥

धेनु खुरनिकी धूरि उड़ति नभ, कोलाहल अति भारी ।

गावत गीत ग्वाल सब मिलिकें, नाचत बीच बिहारी ॥२॥

मलिनमुखी हम निशि सम नारी, बिनु हरि सदा दुखारी ।

कृष्णचन्द्र ब्रज-चन्द्र खिलें नभ, तब हम चन्द्र उजारी ॥३॥

मितै ताप संताप तबहिं जब, दृष्टि परै बनवारी ।

चलो चलें चित चोर बिलोकें, ठाढ़े कृष्ण मुरारी ॥४॥

सप्तम गीत

अब तो सखि संताप बिसारो ।

मंद मंद मुस्कात मदन सम, सस्मुख श्याम निहारो ॥१॥

अरुन नयन मदमाते मनहर, मोर मुकुट सिर प्यारो ।

कोमल लोल कपोलनि ऊपर, कुंडल करत उजारो ॥२॥

शशि सम शीतल सुखद श्याम मुख जीवन प्रान हमारो ।

रस बरसावत सैन चलावत गावत नंददुलारो ॥३॥

खोलो नयन विकलता त्यागो, मनमहँ धीरज धारो ।

आइ गये बनतैं अब तो हरि, तन मन तिनिपै वारो ॥४॥

उल्लास—ब्रज बनिता बिरहिनि बनी, मन मनमोहन महँ फँस्यो ।

सब मिलि हरि सुमिरन करति, नेह बान हियमहँ धँस्यो ॥

सोरठा—निशि दिन लीला गान, यह अहार तिनिको सतत ।

करे रूप रस पान, हरि चिन्तन महँ नित निरत ॥

हरिलीला आहार पान करि काल बितावें ।
 सब कछु कारज करे किन्तु नहिँ कृष्ण भुलावें ॥
 पालें यम अरु नियम बैठि आसन सब साधें ।
 करिके प्राणायाम धारणा धरि आराधें ॥
 करि प्रभु प्रत्याहार पुनि, ध्यान समाधि लगाइकें ।
 सदुपयोग पल पल करहिँ, हरिलीला नित गाइकें ॥

एक दिवसकी बात अरिष्टासुर ब्रज आयौ ।
 रूप छिपायौ दैत्य बैलको बेष बनायौ ।
 खुरतैं खोदत मही रम्हावै सींग चलावै ।
 बार-बार मल-मूत्र करै खल खेल दिखावै ॥
 गिरत गर्भ गैयानिके, बृषभ शब्द भीषन करत ।
 सकल गोप गोपी डरत, खल हरिकूँ खोजत फिरत ।

आवत लंख्यो अरिष्ट दुष्ट श्रीहरि ललकाश्यो ।
 भयो कुपित अति असुर श्यामने थप्पड़ मार्यो ॥
 सींग उखारे पकरि भयो निरबल डकरायौ ।
 मुखतैं उगिलै रक्त बृषभ प्रभु मारि गिरायौ ॥
 असुर मारि ब्रजमहँ गये, साधु साधु सबई कहें ।
 कृष्ण बाहु पालित सकल, ब्रजवासी निर्भय रहें ॥

इति श्रीभागवत चरितके पञ्चमाहमें अजगर शंखचूड़ अरिष्टोद्धार
 नामक बाईसवाँ अध्याय समाप्त ।

अथ त्रयोविंशतितमोऽध्यायः

[२३]

अब मथुराकी बात कंसकी सुनहु महामुनि ।
 भोजराज अति दुखित भयो बृषभासुर बध सुनि ॥
 मंत्र हेतु सब सचिव सभामें कंस बुलाये ।
 तबई कीर्तन करत देवऋषि नारद आये ।
 नारदजीने पोल सब, दर्ई खोलि बसुदेवकी ।
 रोहिनि सुत बलदेव हैं, जने कृष्ण सुत देवकी ॥

सुनि अति कोप्यो कंस तीक्ष्ण करबाल निकारी ।
 काढ़ँ सिर बसुदेव छलीको बात बिचारी ॥
 नारद रोक्यो तऊ कैदि पतिनी सँग क्रीये ।
 शल, तोशल, चाणूर टेरि सब मंत्री लीये ॥
 कहै कंस—सब सभासद, सुनहु आज नारद कहत ।
 मम रिपु बृन्दावन बसत, राम कृष्ण बसुदेव-सुत ॥

धनुरयाग इक करौ भूतपतिकूँ आराधौ ।
 जैसे मम रिपु मरै काज मिलि जुलि सब साधौ ॥
 द्वन्द युद्ध नर करहिं बिकट दंगल करवाऔ ।
 करौ निमंत्रित सबनि राम अरु श्याम बुलाऔ ॥
 दोऊ भैया अति बली, बल तिनिके तनमहँ अमित ।
 गाय चरावें पय पियें, माखन मिश्री खायँ नित ॥

दंगल सुनिकेँ रामकृष्ण गोपनि सँग आवें ।
 तिनि जे मारेँ मल्ल पारितोषिक ते पावें ॥
 पुनि हस्तिपतैं कहै—पुरानो तू मम साथी ।
 मत्त कुबलयापीड़ द्वारपै रखियो हाथी ॥
 आवें दोऊ बन्धु जब, तब हाथी दौड़ाइकें ।
 दीजो दोउनिकूँ कुचिल, अंकुश मारि रिस्याइकें ॥

यों सबकूँ समुझाइ कंस अक्रूर बुलाये ।
 करिकेँ बहु सम्मान प्रेमतैं पास बिठाये ॥
 कहै—मित्र ! तुम सदा रहे हमरे हितकारी ।
 अति हो सज्जन नहीं प्रशंसा करूँ तुम्हारी ॥
 आज काज गुरुतर परम, वृन्दावनमहँ जाइकें ।
 राम कृष्ण बसुदेव-सुत, लावो तिनहिँ लिवाइकें ॥

भयो देवकी व्याह भई तब नभतैं बानी ।
 जाको अष्टम पुत्र हनेँ तोकूँ अज्ञानी ॥
 निरखि देवकी बध करिबे उद्यत मोकूँ जब ।
 हाथ पकरिकें रोकि कही बसुदेव बात तब ॥
 सौँपि देहुँ बध मत करो, तनय देवकीके सबहिँ ।
 किन्तु सात दै छल कइयो, कहि नारद गमने अबहिँ ॥

राम कृष्ण मरवाइ फेरि बसुदेवहिँ मारूँ ।
 उपसैनकूँ मारि राज्यतैं अरिनि निकारूँ ॥
 सुनि बोले अक्रूर—नृपति ! खाओ मत तुम भय ।
 होनी हूँके रहै यही वेदनिको निश्चय ॥
 पुरुषारथ कर्तव्य है, फल प्रारब्ध अधीन हैं ।
 सिद्धि असिद्धि समान जे, लखें नहीं ते दीन हैं ॥

फिड़कि कहे पुनि कंस—मोहि उपदेश न दीजे ।
 कहूँ करन जो काज ताहि सत्वर अब कीजे ॥
 सुनि बोले अक्रूर—धर्मकी बात बताई ।
 होनी अति बलवान आपुके मन नहिँ भाई ॥
 आयसु सिर धरि भूपवर, काल्हि नंद-व्रज जाउँगो ।
 रथ चढ़ाइ गोपनि सहित, रामकृष्णकूँ लाउँगो ॥

सुनि प्रसन्न ह्वै कंस गयो भीतर महलनिके ।
 इत केशी बनि अश्व गयो ढिँग ब्रजबासिनिके ॥
 असुर समुझि सब लोग डरें भागें इत उतकूँ ।
 हिनहिनात खल फिरत निहारत नंदनंदनकूँ ॥
 दुष्टदलन लखि दैत्यकूँ, सिंहनाद भीषन कर्यो ।
 सम्मुख खल मुख फारिकेँ, रूपट्यो नहिँ मनमहँ डर्यो ॥

पिछले पकरे पैर दैत्यकूँ श्याम घुमायौ ।
 सौ धनु फेंक्यो दूरि गिर्यो सुररिपु घबरायौ ॥
 पुनि उठि काटन हेतु फारि मुख हरि ढिँग आयौ ।
 मुहमहँ डार्यो हाथ दैत्य हय मारि गिरायौ ॥
 ब्रजबासी प्रमुदित भये, बरसावें सुरगन सुमन ।
 वृन्दावनमहँ देवऋषि, पहुँचे गावत कृष्ण गुन ॥

करि इस्तुति बहु भाँति कहें—प्रभु ! नरबपु धार्यो ।
 सुररिपु मार अमित अबहिँ खल केशी मार्यो ॥
 परसों मथुरा जाइ केश गहि कंस पछारें ।
 नरकासुर, सुर, पवन, शङ्ख असुरनि पुनि मारे ॥
 ब्याह कर सोलहसहस, सुखमय लाला करिजे ।
 कल्पवृक्षकूँ स्वर्गतै, प्रिया हेतु हरि हरिजे ॥

धर्मराजके राजसूयकूँ पूर्ण करावें ।
 बूआसुत शिशुपाल दुष्टकूँ मारि गिरावें ॥
 पार्थ सारथी बनें अस्त्र लेंगे नहिं करमहँ ।
 काल रूपतै करै प्रलय कुरुक्षेत्र समरमहँ ॥
 सर्वेश्वर सबके सुहृद, परमानंद स्वरूप प्रभु ।
 यदुकुल-भूषन भुवनपति, विश्वम्भर विश्वेश बिभु ॥

इति श्रीभागवत चरितके पञ्चमाह में कंसचिंता केशीउद्धार
 नामक तेईसवाँ अध्याय समाप्त ।



अथ चतुर्विंशतितमोऽध्यायः

[२४]

करिकें नारद विनय बिहँसि बैकुण्ठ सिधाये ।
 इत गैयनि लै ग्वाल संग बन गिरिधर आये ॥
 भेड़-चोरको खेल भयो व्योमासुर आयो ।
 ग्वाल बालको बेष असुरने सुघर बनायो ॥
 कछू भेड़ बालक बने, चले ग्वाल कछू चोर बनि ।
 चोरनिमहँ मिलि व्योमहू, गुहा छिपावै खल सबनि ॥

ढापि गुहा मुख देहि शिलातैं सुर संतापी ।
 भक्तबल्लभ भगवान् जानि सब पकड़यो पापी ॥
 बृक सम दयो दबोचि सिंह सम गर्जन कीन्हैं ।
 वलिके पशु-सम मारि मुक्ति सुररिपुकूँ दीन्हैं ॥
 ग्वाल निकारे गुहातैं, व्योमासुरकूँ मारिकें ।
 आये ब्रज मिलि सखनि संग, बनतैं गाय चराइकें ॥

इत यादव अक्रूर कंस आयसु सिर धरिकें ।
 अपर दिवस ब्रज चले हरषि हरि सुमिरन करिकें ॥
 मगमहँ सोचत जात आज हौं हरि ढिँग जाऊँ ।
 करि हरि-दर्शन मनुज देहको शुभ फल पाऊँ ॥
 परूँ पगनिमहँ प्रभु रूपति, मोकूँ हिये लगाइंगे ।
 जनम-जनमके सकल अध, श्याम परसि कटि जाइंगे ॥

जिन चरननिक्कूँ सतत योगिजन हियमहँ ध्यावैं ।
 जिनकूँ कमला सदा हियेतैं हरषि लगावैं ॥
 कमल सरिस जे चरन अजादिक द्वारा बन्दित ।
 जाके आश्रय पाइ होहिं प्रानी अति प्रमुदित ॥
 तिनि चरननिमहँ जाइकें, दण्ड सरिस हौं परुजो ।
 यों जगजीवन सफल अब; नंदगाँवमहँ करुजो ॥

सहसा रथतैं उतरि अश्रुजल पाद्य चढ़ाऊँ ।
 हिय लगाइ हरि लेहिं लिपटि चरननिमहँ जाऊँ ॥
 जानि शत्रु को दूत अनादर करहिं न गिरिधर ।
 जानत सबके भाव सर्बगत हरि विश्वम्भर ॥
 मधुर मधुर मुसकाय मम, रामकृष्ण कर गदिङ्गे ।
 कोकिल कूजित कंठतैं, काका काका कहिङ्गे ॥

हरि हित सरबसु तजहिं भक्तबर तेई त्यागी ।
 अपनावैं अखिलेश जाइ सो जग बड़भागी ॥
 घरके भीतर पकरि तात कहि हरि लै जावैं ।
 करि सब बिधि सत्कार प्रेमतैं पास बिठावैं ॥
 जाति कुशल पूछहिं जबहिं, तब कछु नाहिं छिपाउँगो ।
 दुष्ट कंस व्यवहार सब, सर्वेश्वरहिँ बताउँगो ॥

यों बहुबिधि अक्रूर मनोरथ करत जात मग ।
 निरखे उभरे अवनि माँहि श्रीनंदनन्दन पग ॥
 वज्र, कमल, यव आदि दिव्य चिह्ननितैं चिह्नित ।
 समुझी जीवनमूरि भये अतिशय आनन्दित ॥
 निरखत प्रभु पदरज मुदित, तुरत कूदि रथतैं परे ।
 तनु पुलकित गद्गद हृदय, नयन नेह जलतैं भरे ॥

पायो श्रीअक्रूर जगतमहँ नरजीवन फल ।
 करि करि हरिकी यादि नेहमहँ अतिशय विह्वल ॥
 पल-पल छिन-छिन समय सुमिरि श्रीश्याम बितायो ।
 जग जीवनको लाभ संतजन जिही बतायो ॥
 चरन-चिह्न प्रभुके परसि, मदमातेसे ह्वै गये ।
 कछु सचेत ह्वै हाँकि रथ, नन्दगाँवकूँ चलि दये ॥

गोशालामहँ पहुँचि राम अरु श्याम निहारे ।
 नील पीत पट पहिन खड़े गोरे अरु कारे ॥
 काननि कुंडल कलित ललित बनमाला मनहर ।
 दोऊ अतिई सुघर सुखद शोभित अति सुन्दर ॥
 गाय दुहावन हित खरे, जनु सिँगार द्वै तनु धरे ।
 करि दर्शन अक्रूरजी, दंड सरिस महिपै परे ॥

माधव माधव लखे दौरि सत्वर ढिँग आये ।
 इरि बलपूर्वक पकरि प्रेमतैं हिये लगाये ॥
 पुनि भेंटे बलराम काम तजि घरपै लाये ।
 करि विधिवत् सत्कार स्वादु भोजन करवाये ॥
 नन्दराय भेंटे ललकि, पुनि पूछी सबकी कुशल ।
 गये नन्द ब्यालू करन, बात करें घनश्याम बल ॥

श्रीहरि पूछें—तात, कहो ब्रज कैसे आये ।
 समाचार अक्रूर आदितैं सबहिं सुनाये ॥
 कृष्णचन्द्र मम काल दुष्ट यह सब कछु जानें ।
 कंस क्रूरता करै यादवनि बैरी मानें ॥
 नारदतैं तव जन्मकी, सुनत क्रोधमहँ भरि गयो ।
 भैया भाभीकी तबहिं, हत्या हित उद्यत भयो ॥

नारद रोक्ख्यो युक्ति यज्ञकी ताहि बताई ।
 भेज्यो लैवे मोइ दुष्टकी मति बौराई ॥
 कपट-यज्ञ करि चहे मारिबो तुमकुँ स्वामी ।
 बोले हरि—अब मरे ममा रोवें सब मांमी ॥
 पुनि बोले नँदरायतैं, बाबा ! मथुरा जायँगे ।
 चरख चढ़ें दङ्गल लखें, गुल्लगप्पा हू खायँगे ॥

इति श्रीभागवत चरितके पञ्चमाहमें व्योमोद्धार अक्रूरागमन नामक
 चौबीसवाँ अध्याय समाप्त ।

अथ पञ्चविंशतितमोऽध्यायः

[२५]

सुनि गोपनि सँग नन्द गमन की करत तयारी ।
 इत रासेश्वर गये कुंज जहँ राधा प्यारी ॥
 कीयो बहु विधि प्यार हरष राधा नहिँ मनमहँ ।
 सुमिरि सुमिरि प्रिय बिरह दाह होवै सब तनमहँ ॥
 समुझावें बहु विधि सदय, हूँ हरि हृदय लगाइकें ।
 अश्रु पौछि निज करनितैं, पुनि पुनि धीर बँधाइकें ॥

बिलखति राधा कहति—प्रानपति ! यदि तुमजाओ ।
 तो नहिँ जीवत मोइ फेरि बरसाने पाओ ॥
 निशा चन्द्र बिनु नदी नीर बिनु सोह न जैसे ।
 देह प्रान बिनु मृतक बनै तुम बिनु हौँ तैसे ॥
 मछली जल बिनु नहिँ जिये, पिये चातकी स्वाति जल ।
 त्यों तुमरे बिनु प्रानपति, होहिँ हृदय अतिई बिकल ॥

हरि समुझाई प्रिया कुञ्जतैं आये घरमहँ ।
 जावें मथुरा श्याम बात फैली सब ब्रजमहँ ॥
 गोपी सुनि सब दुखित भई हिय अति अकुलायो ।
 करि करि हरिकी यादि सबनिको मुख मुरझायो ॥
 विधिकूँ कोसैं कुपित हूँ, नन्दभवन ढिँग आइकें ।
 मिलि बिलाप सबई करें, नयननि नीर बहाइकें ॥

कहें—विधाता परम अज्ञ तू बालक सम है ।
 सुन्दर श्याम सरूप दिखायो हमें प्रथम है ॥
 भई तृप्ति नहीं तऊ छीनिबे अब तू आयौ ।
 काम क्रूर अति करै नाम अक्रूर धरायौ ॥
 भये गोप बैरी सकल, जावें हम किहिके निकट ।
 परम क्रूर अक्रूर है, नन्दनँदन निर्दय निपट ॥

रथपै बैठत श्याम निरखि हमकूँ मुख मोरें ।
 लावें छकरा गोप बैल तिनिमें ते जोरें ॥
 जाहिं कहाँ का करे निवारै हरिकूँ कैसें ।
 करे लाज तजि वही रहें माधव ब्रज जैसें ।
 रथ-पथमहँ लोटो सकल, सत्याग्रह सब मिलि करौ ।
 जान न पावें नँदनँदन, लोक लाज चूल्हे परौ ॥

कैसें अबला नारि निवारै हरिकूँ बलतैं ।
 नहीं दीखेंगे श्याम हाय ! अब ब्रजमहँ कलतैं ॥
 अब न मंद मुसकानयुक्त मुख मनमोहनको ।
 दीखैगो नहीं मिटै ताप संतापित तनको ॥
 निशा बिताई श्याम सँग, निभृत निकुञ्जनिमहँ सरस ।
 मिलैं न रास बिलासमहँ, अब आलिङ्गन हरि दरश ॥

उड़गन तेज मलीन निरखि पुनि भये उदित रबि ।
 ब्रज बनितनिको बिरह दुसह अति बरनें को कबि ॥
 राम श्याम रथ चढ़े यशोदा रोवति आई ।
 रथके चारिहुँ ओर फिरै शिशु बिनु जिमि गाई ॥
 कुररी सम रोवति सकल, राम ! श्याम ! सब मिलि कहति ।
 डकरावति हा-हा करति, अश्रुधार सबके बहति ॥

इत नन्दादिक गोप सकल मिलि द्वारे आये ।
 पाग दुपट्टा पहिन स्वयं सजि बैल सजाये ॥
 हाँक्यो रथ अक्रूर घंटिका चहुँदिशि बाजै ।
 रथ के पीछे दुखित गोपिका रोवति भाजै ॥
 मूर्छित है गोपीं गिरिं, रथ अति आगे बढ़ि गयो ।
 दीखी ध्वज रज फेरि सब, आँखिनितै ओमल भयो ॥

भई निराशा लौटि सखी निज निज घर आई ।
 इत रथ आगे बढ़्यो दई रबिसुता दिखाई ॥
 रबि सिर ऊपर निरखि न्हाइवे रथ ठहरायो ।
 राम श्याम पय पान कर्यो अक्रूर जतायो ॥
 बैठो रथपै आई तुम, न्हाइ करूँ सन्ध्या अबहिं ।
 यों कहि जल बुड़की दई, लख्यो दृश्य जलमहँ तबहिं ॥

श्रीअनन्त फण सहस मुकुट मणिमय सिर सोहैं ।
 गोदीमहँ घनश्याम बिराजै जन मन मोहैं ॥
 कर, कपोल, कटि, कुटिल केश सब अँग अति मनहर ।
 कंकण, कुंडल कलित करधनीं आभूषणधर ॥
 लखि अद्भुत इस्तुति करी, दरशनतै प्रमुदित परम ।
 बोले—हरि ! अपवर्गपति, काम अर्थ तुमहीं धरम ॥

अक्रूर-स्तुति

जय राम हरे जय कृष्ण हरे । तुमने ही जड़ चैतन्य करे ॥
 माया तुमरी है अति अपार, पावै कैसे ये जीव पार ।
 हैं नित्य निरञ्जन निराधार, तब युगल चरनमहँ नमस्कार ॥
 अघ नाम जपततै सकल जरे ॥१॥ जय राम हरे०

सब रूपनितै तुमकूँ ध्यावैं, सब नामनितै तुमकूँ गावैं ।
सबके चरननिमें सिर नावैं, ते अवसि धाम तुमरो पावैं ॥

अगनित पामर खल जीव तरे ॥२॥ जय राम हरे०

हैं शक्ति शाक्त भक्तनिके हित, वैष्णव ध्यावें श्रीविष्णु अमित ।
गनपति रवि शिव हैं आपुअजित, सिरतव चरननिमें नाथ नमित ॥

अवतार जगतहित अमित धरे ॥३॥ जय राम हरे०

जड़ जीव भ्रमें तममें फँसिके, बन्धन स्वीकारे हँसि हँसिके ।
पकड़यो हौं मायाने कसिके, बिगड़यो विषयनिके बिच बसिके ॥

दैं दरशन सब अघ देव हरे ॥४॥ जय राम हरे०

जय जय यदुनन्दन हृषीकेश, जय जय करुनानिधि प्रभु ब्रजेश ।
जय जय गोपीश्वर राधिकेश, जय वासुदेव प्रद्युम्न शेष ॥

हम सेवक प्रभुके पगनि परे ॥५॥ जय राम हरे०

छप्पय—यों जमुनाजल माँहिँ करी अक्रूर विनय हरि ।

प्रभु अन्तरहित भये छिपै नट ज्यौं अभिनय करि ॥

जब नहिँ निरखे श्याम उछरि जल ऊपर आये ।

चहुँदिशि है के चकित लखें कित कृष्ण बिलाये ॥

शेष करम करि पट बदलि, यमुनातट ठाढ़े भये ।

पट निचोरि जलपात्र भरि, सूधे रथपै चलि दये ॥

दरशनतै अति चकित तुरत रथके ढिँग आये ।

पुनि मथुराकी ओर बैठि रथ अश्व चलाये ॥

पहिलेतै ही गोप बागमहँ डेरा डारे ।

करत प्रतीक्षा राम श्याम लखि भये सुखारे ॥

हरि हँसि बोले—चचाजी ! रथलै मथुरा जाउ तुम ।

कबहुँ चाची हाथके, माल उड़ावें आइ हम ॥

समुक्ति गये अक्रूर श्याम अबहीं नहीं जावें ।
 मारि कंसकूँ बन्धु सहित मेरे घर आवें ॥
 रथलै पहुँचे कंस निकट सब वृत्त सुनायो ।
 राम श्याम आगमन सुनत खल अति हरषायो ॥
 घर पहुँचे अक्रूर इत, उत हरि अति उत्सुक भये ।
 ग्वाल बाल बल सहित लै, मथुरा निरखन चलि दये ॥

देखी मथुरापुरी सजी नव बधू सरिस अति ।
 घर घर बन्दनवार पताका ध्वज शुभ सोहति ॥
 परम रम्य उद्यान मनोहर घर पथ मन्दिर ।
 परिखा चहुँदिशि खुदी सुघर गोपुर अति सुन्दर ॥
 बिड्ढुम, मोती, नील, मणि, बेदिनिमहँ जगमग करत ।
 शुक पिक पारावत मधुर, करि कलरव इत उत फिरत ॥

शुभागमन वसुदेव सुतनिको सुनि सब नारीं ।
 तनकी सुधि बुधि भूलि चलीं जनु चन्द्र उजारीं ॥
 असन बसन परिधान न्हान अंजन तजि भार्गी ।
 चितवति लीला सहित श्याम शोभा अनुरागीं ॥
 अटा अटारिनिपै चढ़ीं, रूपसुधा नयननि भरहिं ।
 मूँदि नयन हियभावतै, पुनि पुनि आलिङ्गन करहिं ॥

इति श्रीभागवतचरितके पञ्चमाहमें मथुरागमन नामक
 पचीसवाँ अध्याय समाप्त ।

अथ षड्विंशतितमोऽध्यायः

[२६]

मथुरामहँ हरि रूप सुधाको स्रोत बहायो ।
तबई लैकें धुवे वसन धोबी तहँ आयो ॥
रँगै रँगाये धुवे सुघर पट लखि बोले हरि ।
देहु चौधरी नील पीतपट हमहिं कृपाकरि ॥
रङ्गकार उद्धत रजक, बोल्यो आँखिनि लाल करि ।
च्यौ छोरा बौरे भये, अबहिं लेइगें चर पकरि ॥

बनचारी तुम ग्वाल कबहुँ देखे अस अम्बर ।
जाउ चराओ गाय लपेटो कारो कम्बर ॥
सुनि धोबीकी बात श्याम तकि मुक्का मास्यो ।
धड़तैं सिर करि पृथक बीच चौराहे डास्यो ॥
भगदड़ धोबिनिमहँ मची, डारि बख्ख सबई भगे ।
रामश्याम गोपनि सहित, चुनि चुनि पट पहिनन लगे ॥

ढीले ढाले पहिन बख्ख हरि आगे आये ।
बायक निरखे श्याम आइ मृदु बचन सुनाये ॥
काटि छाँटिकें प्रभो ! बेष हौं सुघर बनाऊँ ।
करिकें कछु कैकर्य मनुज जीवन फल पाऊँ ॥
मानी यदुवरने बिनय, बायक पट अनुपम किये ।
सजे सजाये करिकलभ, सम हरि बल शोभित भये ॥

अति प्रसन्न हरि भये कृपा बायकपै कीन्हीं ।
 लक्ष्मी, बल, ऐश्वर्य, भक्ति अनपायिनि दीन्हीं ॥
 लौकिक सुख परलोक मोक्ष फल दोऊ पाये ।
 बायक भयो कृतार्थ लौटि प्रभु पुनि पथ आये ॥
 ग्वाल बाल बलदेव सँग, हँसत जात मोहनमदन ।
 आगे माला हार युत, निरख्यो मालीको सदन ॥



करन कृतारथ चले सुदामा माली घर हरि ।
हड़बड़ाइ सो उठ्यो दंडवत करी भूमि परि ॥
बिधिवत पूजाकरी विविध विधि बिनती कीन्हों ।
सबकुँ चन्दन, फूल, पान अरु माला दीन्हों ॥
मालीकी माला गरे, धारे यों राधारमन ।
इन्द्र धनुष धारन किये, शोभित मानहुँ सजल घन ॥

पूजातें प्रभु तुष्ट कहें—बर माली ! माँगो ।
नहिं अदेय कछु मोइ व्यर्थ लज्जा भय त्यागो ॥
माँगी माली भक्ति भक्त भगवन्त चरनमहँ ।
जीवमात्रपै दया रहूँ नित नाथ शरनमहँ ॥
इच्छितवर, बल, आयु, यश, श्री, लौकिक सुख हू दये ।
यों मालीपै कृपा करि, पुनि हरि आगे बढ़ि गये ॥

आगे निरखी श्याम कूबरी युवती नारी ।
करमहँ चन्दन पात्र लिये मनहर मुखवारी ॥
रङ्ग रङ्गीले रसिक शिरोमनि बोले—भामिनि ।
चन्दन लैकें जाहु कहाँ सुमुखी गजगामिनि ॥
हमें देहु चन्दन सुखद, गंधयुक्त शीतल सरस ।
बोली दासी कंसकी, धन्य पाउँ हौं प्रभु परस ॥

चन्दनवारी सहित लेउ यदुनन्दन चंदन ।
अर्पित अच्युत ! करूँ तुम्हें सरबस तन मन धन ॥
प्यारे ! तुमकुँ पाइ जगततै हौं मुख मोरूँ ।
लोक-लाज कुल-लाज जगतके बन्धन तोरूँ ॥
सैरन्धी चन्दन दयो, अति आनन्दित हूँ गई ।
पगपै पग धरि चुबुक धरि, झटकी अति सीधी भई ॥

टेढ़ी सीधी भई सुन्दरी अति सुकुमारी ।
 मधुर मधुर मुसकात निहारे रासबिहारी ॥
 पल्लो पकड़्यो कहे—नाथ ! मेरे घर आओ ।
 मदन तापतें तपित रमन तन ताप मिटाओ ॥



तासु विनय बल ग्वाल सुनि, हँसे श्यामहूँ हँसि गये ।
 हौँ आऊँगो फिरि अवसि, यों कहि आगे चलि दये ॥

प्रिय वियोगतै' दुखित भई कुब्जा अति मनमहँ ।
 भयो काम-ज्वर व्याप्त होहि पीड़ा सब तनमहँ ॥
 मूर्छित हूँ कैं परी पलँगपै करवट बदलति ।
 करि करि हरिकी यादि आह भरि भरिकैं सिसकति ॥
 इत नर नारिनिके नयन, सफल करत प्रभु पथ चलत ।
 बनिज सुमन चंदन इतर, तै' हरिको स्वागत करत ॥

पुरवासिनितै' पूछि यज्ञशाला हरि आये ।
 देख्यो बलके सहित धनुष प्रभु परम सिंहाये ॥
 रक्तक रोकत रहे श्यामने धनुष उठायौ ।
 करि ज्यों तोरै ऊख तोरि त्यों तुरत गिरायौ ॥
 धनुष भङ्गको घोर रव, दशहुँ दिशनिमहँ भरि गयो ।
 अन्तःपुरमहँ कंस सुनि, रिपु भयतै' व्याकुल भयो ॥

आये सैनिक भृत्य श्याम बलरामहिँ पकरन ।
 मारो काटो पकरि लेहु चिल्लावैं खल गन ॥
 राम श्यामने लखे शस्त्र लै सैनिक आवत ।
 दोऊ भाई धनुष खंड लै चले भगावत ॥
 सबकुँ मारि भगाइकैं, निज डेरापै आइकैं ।
 सोये सुखतै' सखनि सँग, खीर सुहारी खाइकैं ।

इति श्रीभागवत चरितके पञ्चमाह में रजकोट्टार कुब्जानुग्रह
 नामक छब्बीसवाँ अध्याय समाप्त ।

अथ सप्तविंशतितमोऽध्यायः


[२७]

कंस धनुषको भंग पराजय सेनाकी सुनि ।
 भयो दुखित दुःस्वप्न निहारै डरपै पुनि पुनि ॥
 जागत देखै बृक्ष सुनहरे निज सिर धड़ बिनु ।
 निशिमहँ निरखै स्वप्न दिगम्बर तैल मले तनु ॥
 केश, कपास, कुलाल, कुश, काक कंक, कपि, कृष्ण-पट ।
 नकटी, बिधवा, मृतक नर, रुण्डमाल, यमभट, बिकट ॥

सुनत कंस धनुभंग निशा निद्रा नहिं आयी ।
 प्रातकाल उठि रंगभूमि खलने सजवायी ॥
 गाजे बाजे सहित मल्लशालामहँ आयौ ।
 गोपनिकूँ पुनि भेंट सहित सम्मुख बुलवायौ ॥
 कहै नंदतै—सुत कहाँ, राम श्याम जो सुदृढ़ अँग ।
 नंदराय बोले—प्रभो ! आवत होंगे सखनि संग ॥

राम श्याम बध हेतु प्रथम अम्बष्ठ सिखायौ ।
 रंगभूमिके द्वार कुबलयापीड़ पठायौ ॥
 इत सजि बंजि बल श्याम द्वारपै गज ढिँग आये ।
 हाथी तुरत हटाउ बचन हस्तिपहिँ सुनाये ॥
 सुनत कुपित हस्तिप भयो, रौद्रयौ करि हरिपै तुरत ।
 गज प्रहार पुनि पुनि करत, हँसत श्याम इत उत फिरत ॥

दामोदरने दुष्ट देखिके दाव दबोच्यो ।
 किचकिचाय सिर चढ़े शस्त्र हित मनमहँ सोच्यो ॥
 लीये दाँत उखारि दयो इक बल इक धार्यो ।
 हस्तिप हाथी सहित दाँततै ही हरि मार्यो ॥



छोड़ि मृतक गज सभामहँ, प्रविशे नहिँ देरी करी ।
 रही भावना जासु जस, तस ताकूँ दीखे हरी ॥

मल्लनि निरखे बज्र कामिनी काम बिचारे ।
 नर निरखें नररत्न गोप निज स्वजन निहारे ॥
 शासक खलनृप लखें जनक जननी निजशिशु सम ।
 जनसाधारन लखें भयंकर कंस मनहुँ यम ॥
 इष्टदेव यादव मनहिं, परमतत्व योगी लखहिं ।
 वस्तु एक परि भावतै, भली बुरी प्रानी कहहिं ॥

उत्सवमहँ हरि फिरत माधुरी सुधा पिआवत ।
 इतउत चितवत चलत चोर जनु चित्त चुरावत ॥
 कहें परस्पर नारि—कुमर ये अति बलशाली ।
 कृष्ण देवकी-तनय रोहिनी-सुत बल आली ॥
 मारे इनि अगनित असुर, तेज ओज सह बल निलय ।
 रक्षित यदुकुल होहि अब, पावै यश गौरव विजय ॥

राम श्यामकूँ निरखि नारि नर भये सुखारे ।
 कंस मल्ल चारूर गरबतै बचन उचारे ॥
 मल्ल युद्धमहँ निपुण सुने तुम दोऊ भैया ।
 ग्वालबालसँग लड़त चरावत वन वन गैया ॥
 करे चकित नरनारि सब, रंगभूमिमहँ आइकें ।
 आओ नृपको प्रिय करे, द्वै द्वै हाथ दिखाइकें ॥

सुनि बोले बल अनुज—बाल हम तुम बलसागर ।
 मल्लयुद्ध तब होहि जोड़ जब होहि बराबर ॥
 कहै बिहँसि चारूर—बली तो बलतै होवें ।
 जो न होहि बलवान बड़प्पन अपनो खोवें ॥
 नहिं शिशु तुममें बल अमित, आओ हम तुमतै भिड़ें ।
 हमरो तुमरो जोड़ है, मुष्टिक हलधरतै लड़ें ॥

हँसि बोले भगवान—नहीं मानो तो आओ ।
 तुम अति नामी मल्ल मल्लपन आजु दिखाओ ।
 यों कहि कछनी काछि अखाड़ेमहँ आये हरि ।
 शोभित बल सँग मनहुँ बीररस द्वै द्वै तनु धरि ॥
 ताल ठोकि दोऊ बली, लड़िबेकूँ उद्यत भये ।
 कृष्ण लड़ै चारणूरतै, बल मुष्टिकतै भिड़ि गये ॥

चटचट होवै शब्द उठावै पकरि घुमावै ।
 सटकें इतउत झपटि लपटिकें पटकि गिरावै ॥
 मारै उरमहँ चोट ढकेलै पुनि पुनि पकरै ।
 चित्तपट्ट है जायँ तुरत इततै उत निकरै ॥
 कहँ मुष्टिक चारणूर खल, कहँ हलधर हरि अमित बल ।
 करहि लोकवत काज सब, थापै जगमहँ यश विमल ॥

एक एककूँ पकरि पटकिके पेच चलावै ।
 कोई मुक्का मारि पकरिके टाँग गिरावै ॥
 पाँइनि अंटाडारि करनितै कंधनि कसिके ।
 पुनि पुनि ठोकें ताल निहारै दोऊ हँसिके ॥
 होहि चटाचट पटापट, चित्त पट्ट हैकें गिरै ।
 कबहुँ निकसै दावतै, पुनि दोऊ पकरे लरे ॥

मुष्टिक अरु चारणूर बज्रसम कठिन भयंकर ।
 अति सुन्दर सुकुमार सरस सुखकर बल नटवर ॥
 स्वेदयुक्त मुख निरखि नारिमहँ घबरावै ।
 बहुविधि करे बिलाप कंसकूँ कुटिल बतावै ॥
 बाँकी माँकी श्याम बल, की करिकें होवें मगन ।
 ब्रजबनितनिके भाग्य, सब सराहिं बोलें बचन ॥
 ४४

वृन्दावनकी धन्य भूमि जहँ बिहरें ब्रजपति ।
 ब्रजवनिता अति धन्य धन्य उनकी रति मति गति ॥
 असन वसन गृहकाज करति जे नहिँ बिसरहिँ हरि ।
 सदा रिभावें ब्रजवल्लभकूँ प्रिय कारज करि ॥
 बड़भागिनि ये गूजरी, जिनको प्रभुमहँ फँस्यो चित ।
 मधुर मधुर मुसकानमय, मुख माधवको लखहिँ नित ॥

हाय ! क्रूर चाणूर न कछु अनरथ करि डारै ।
 दुष्ट न कहूँ कुठौर चाँट माधवकें मारै ॥
 बनितनिकूँ लखि बिकल शत्रु बध निश्चय कीयो ॥
 तबई रिपुने उछरि श्याम-हिय मुक्का दीयो ॥
 हँसि हरिने पकरौं भुजा, गोफिनि सम चक्कर दये ।
 प्राणहीन ह्वैकें गिइयो, नर नारी हर्षित भये ॥

बल मुष्टिककूँ मारि अखाड़ेमें ठाढ़े जब ।
 करिकें अतिई कोप कूट लड़िबे आयो तब ॥
 इत शल तोशल लड़न श्यामके सम्मुख आये ।
 तीनिहुँ ही मरि गये परमपद सवने पाये ॥
 मुष्टिक अरु चाणूर शल, तोशल कूट मरे जबहिँ ।
 लै लै अपने प्राण सब, शेष मल्ल भागे तबहिँ ॥

ग्वाल बाल लै संग श्याम बल नाचत डोलें ।
 एक कंसकूँ छोड़ि शेष सब जय जय बोलें ॥
 कुपित कंस ह्वै गयो, कहै—इन गोपनि मारौ ।
 राम कृष्णकूँ पकरि नगरतैं तुरत निकारौ ॥
 समुक्ति गयो ये परस्पर, मिले जुले सब लोग हैं ।
 नंद गोप बसुदेव अरु, उग्रसेन बध योग हैं ॥

चक बक मामा करत तुरत हरि उछरे ऊपर ।
लीन्हीं चोटी पकरि धम्मतैं कूदे नटवर ॥
मामा नीचे गिइयो भानजो ऊपर आयौ ।
प्रभु तनु परसत तुरत परमपद मामा पायौ ॥



खान पान नित यानमहँ, चलत फिरत सुमिरत हरिहिँ ।
सुमिरन सतत प्रभावतैं, मिल्यो त्यागि तनु सो बिभुहिँ ॥
इति श्रीभागवत चरितके पञ्चमाह में कुबल मल्ल कंसोद्धार
नामक सत्ताईसवाँ अध्याय समाप्त ।

अथ अष्टाविंशतितमोऽध्यायः

[२८]

कंस अनुज पुनि आठ लड़े बल मारि गिराये ।
 मामी रोवत लखीं बचन हरि मधुर सुनाये ॥
 पुनि पितु माता निकट आइकैं काटे बन्धन ।
 शिशु सम गोदी बैठि करे करुणामय क्रन्दन ।
 कहैं—अभागे हम रहे, निरख्यो नहिँ पितु मातु सुख ॥
 हमरे पीछे दिवश निशि, सहे आपुने दुसह दुख ॥

गर्भ प्रसवमहँ सहति मातु दुख नित पालनमहँ ।
 कौन उरिन है सकै मातु पितुतँ सुत जगमहँ ॥
 बालक बिहरति फिरहिँ किलकिक्कैं हिय सरसावैं ।
 क्रीड़ा जननी जनक लखैं अतिशय सुख पावैं ॥
 कर कंसकी कुटिलता-बस हम तुम दुख सब सहे ।
 नेहीं दयो सुख नहिँ लह्यो, भयवश छिपि बन बन रहे ॥

मायापतिकी सुनी मधुर ममतामय बानी ।
 भूलि गयो सध ग्यान मोह ममता लपटानी ॥
 बार बार हिय लाइ करे अनुभव अति सुत सुख ।
 गोदीमहँ बैठाय श्याम बलको चूमैं मुख ॥
 मातु पिता परितोष करि, उग्रसेनके ढिँग गये ।
 सिंहासन आसीन करि, पुनि सबके नृप करि दये ॥

कंसादिकके मृतक करम बिधिवत करवाये ।
 पुनि परदेशनि गये बन्धु बान्धव बुलवाये ॥
 असन, बसन, धन, रतन, भवन सबहीकूँ दीन्हें ।
 करि सब बिधि सत्कार तुष्ट याद्व सब कीन्हें ॥
 राम श्यामको सदय मुख, लखि सब आनन्दित भये ।
 पीकें प्रभु मुखमाधुरी, बृद्ध युवक सम बनि गये ॥

आये दोऊ बन्धु नन्द ढिँग अति सकुचावत ।
 बोले गद्गद गिरा नयनतैं नीर बहावत ॥
 मातु यशोदा सहित करी अति ममता तुमने ।
 उरिन ह्वै सकें नहीं प्रेम पायो जो हमने ॥
 मैया रोवति होइगी, गैया जैसे बत्स बिनु ।
 बास मधुपुरीमहँ करे, आयसु दें तो कछुक दिन ॥

अकबकाइकें नंद कहें—का कहत कन्हाई ।
 तू न जाय तो मरै बिरहमहँ तेरी माई ॥
 अरे, निठुर मत बनें लाल तोकूँ समुझाऊँ ।
 एक कहै या लाख तोइ तजि नहिं घर जाऊँ ॥
 कपटी मथुरामहँ भयो, मुख माँठो हियमहँ छुरी ।
 अरे, सोचि तेरे बिना, होहि दशा ब्रजकी बुरी ॥

मुदित होहि बसुदेव प्रेमकी सीमा जानी ।
 रुदन करत घनश्याम नंदकी सुनि सुनि बानी ॥
 नंद कश्यो हठ बहुत श्यामने एक न मानी ।
 गोप सहित अति दुखित गमनकी मनमहँ ठानी ॥
 गोपिनकूँ सम्मानयुत, पट आभूषन बहु दये ।
 प्रेमाकुल दोऊ भये, दोऊ हियतैं सटि गये ॥

रोवत रोवत चले नन्द गोकुलमहँ आये ।
 रामश्याम नहिं लखे गोप गोपी घबराये ॥
 यशुमति सुनि सब बात बहुत रोई बिललाई ।
 हाय ! कहाँ रहि गये कुँवर बलराम कन्हाई ॥
 नन्दगाँव के नारि नर, व्याकुल है रोवत फिरे ।
 डकरावें हा हा करें, मूर्छित है हैकें गिरे ॥

इत बियोगतैं दुखित श्याम बल महलनि आये ।
 है प्रसन्न बसुदेव बिबिध मंगल करवाये ॥
 कनक, धेनु, धन, रत्न, दान भूदेवनि दीन्हें ।
 द्विजनि उचित उपनयन गर्ग आदिक मुनि कीन्हें ॥
 ब्रह्मचर्य व्रत धारिकें, गायत्री दीक्षा लई ।
 करन बास गुरुकुल चले, अनुमति सबई ने दई ॥

मुनि सान्दीपनि सौम्य सरल सुठि काशी बासी ।
 रहें अवन्तीपुरी तपस्वी विषय उदासी ॥
 तिनि ठिँग पढ़िबे गये कौन समुझै हरिकी गति ।
 सब विद्यानिके धाम श्याम बलराम जगत्पति ॥
 भई सिद्ध विद्या सकल, भाग्य आज मुनिके जगे ।
 जगदीश्वर हू शिष्य बनि, जिनके घर रहिबे लगे ॥

गुरुसेवा आदर्श दिखावें करिकें करनी ।
 सुश्रूषा नित करे त्यागि भगवत्ता अपनी ॥
 समिधा, कुश, फल, फूल, मूल, घट जलको लावें ।
 अति लघु सेवा करे, अधिक हिय माँहिं सिहावें ॥
 जाहिं सुदामा संगमहँ, ईधन लावें तोरिकें ।
 ब्रह्मचर्यव्रततैं रहै, विषयनितै मुख मोरिकें ॥

गुरुप्रसादतैं वेदशास्त्र सुनतहिं जाने प्रभु ।
 चौंसठ कला प्रवीन भये चौंसठ दिनमहैं बिभु ॥
 गीत^१, वाद्य^२ अरु नृत्य^३ नाट्य^४ चित्रनिकोलिखिबो^५ ।
 पत्रावलि सिर तिलक^६ धान कुसुमनि^७ को रचिबो ॥
 फूल सेज^८ पट दशन^९ रँग, मणिमय मही^{१०} बनामनों ।
 शयन^{११} रचन अरु जल^{१२} तरँग, चित्रविचित्र^{१३} दिखामनों ॥

हार^{१४} केश^{१५} नैपथ्य^{१६} कर्ण पत्रादिक^{१७} रचिबो ।
 गन्धयुक्त^{१८} आभूषन^{१९} सबकुं विस्मित^{२०} करिबो ॥
 धारेरूप^{२१} अनेक हस्त लाघव^{२२} वर भोजन^{२३} ।
 आसबादि^{२४} निर्मान सीमनो^{२५} डोरा खेलन^{२६} ॥
 बीणाढमरू^{२७} बजावन, ज्ञानपहेली^{२८} प्रतिकृती^{२९} ।
 अत्तोपत्तो^{३०} वांचिबो^{३१} नाटकादिमहँ^{३२} — बर गती ॥

काव्य^{३३} समस्यापूर्ति पट्टिका वेत्र^{३४} सुदीक्षा ॥
 तर्ककर्म^{३५} तत्त्वगुह^{३६} ज्ञानगृह^{३७} रत्नपरीक्षा^{३८} ॥
 धातुरसायन^{३९} ज्ञान रंगमणि^{४०} खानिज्ञानवर^{४१} ।
 तरुबिद्या^{४२} खगयुद्ध^{४३} जानिवो शुक पिककोस्वर^{४४} ॥
 उत्सादन^{४५} कचमारजन^{४६} मूँठी बस्तु^{४७} बतावनो ।
 भाषा^{४८} देशी बिदेशी^{४९} ज्ञान विमान^{५०} बनावनो ॥

प्रतिमा^{५१} लोचनमणिभेदन^{५२} परचित्त-बतावन^{५३} ।
 परमन कविता^{५४} ज्ञान छन्द^{५५} नारीमन^{५६} जानन ॥
 छलितयोग^{५७} पटगोपन^{५८} जूआ^{५९} क्रीड़ाकर्षन^{६०} ।
 बालक^{६१} क्रीड़ा ज्ञान शेष त्रय बिद्या दर्शन ॥
 वैजयिकी^{६२} वैनायकी^{६३} बैतालिकी^{६४} प्रसिद्धि हैं ॥
 चौंसठ हू ये सब कला, स्वयं श्यामक सिद्धि हैं ॥

करि गुरुकुलमहँ वास पढ़ी विधिवत बिद्या सब ।
 दोऊ गुरुतँ कहँ—दक्षिणा देहिँ कहा अब ॥
 अद्भुत महिमा निरखि बिचारे मनमहँ गुरुवर ।
 मागूँ इनतँ कहा करन सम्मति आये घर ॥
 गुरु पत्नी बोली—बिभो ! मेरी यह इच्छा प्रबल ।
 लावँ सुतहिँ समुद्रतँ, डूब्यो प्रथम प्रभास थल ॥
 दोऊ रथ चढ़ि चले नीरनिधिके ढिँग आये ।
 गुरु-सुत देहु समुद्र रोषतँ बचन सुनाये ।
 दीयो असुर बताइ पञ्चजन सो हरि माइयो ।
 गुरु-सुत तहँ नहिँ मिल्यो पञ्चजन शङ्ख निकाइयो ॥
 संयमनी यमकी पुरी, महँ दोऊ भाई गये ।
 रामकृष्णकूँ निरखि यम, अति ही आनन्दित भये ॥
 करि पूजा यम कहँ—नाथ ! तुम अन्तरयामी ।
 कीयो दास कृतार्थ करे कछु आयसु स्वामी ॥
 हरि बोले—गुरु-तनय यहाँ आयौ तिहिँ लाओ ।
 है विशेष यह नियम नहीं अब देर लगाओ ॥
 यमने दीयो तुरत शिशु, राम श्याम गुरुकूँ दयौ ।
 पाइ मृतक सुत सुख अधिक, गुरु गुरुआनीकूँ भयौ ॥
 आये मथुरा पुरी सुनत सबई उठि धाये ।
 राम श्यामके दरश पाइ सब अति हरषाये ॥
 द्वै पूरन शशि सरिस सबनिकूँ सुख सरसावै ।
 मथुरामहँ नित बसै, प्रेमको स्रोत बहावै ॥
 यहाँ छोड़ि कछु कालकूँ, श्रीमथुराजी की कथा ।
 हृदय थामि सोचो तनिक, विरहमाँहिँ ब्रजकी ब्यथा ॥
 इति श्रीभागवत चरितके पञ्चमाहमें ब्रजराजविदा
 गुरुकुलवास मृत गुरुपुत्रानयन नामक अट्ठाईसवाँ अध्याय समाप्त
 (मासिक पारायण—बाईसवें दिन का विश्राम)

अथ एकोनत्रिंशत्तमोऽध्यायः

[२९]

हलधर गिरिधर बिना लगै ब्रज सूनो सूनों ।
 लखि मैयाकी व्यथा बदै सबको दुख दूनों ॥
 खोई खोई रहै यशोदा कछु नहिँ सूमै ।
 देखे आवत पथिक बात बत्सनिकी बूमै ॥
 चार बार मैया कहे, बुढ़िया पै किरपा करो ।
 अरे दिखाओ सुतनि मुख, होवै मेरो हिय हरो ॥

कोई करुना करो मोइ मथुरा पहुँचाओ ।
 कौन गली महँ बसत श्याम बल पतो बताओ ॥
 नित माखन दै आउँ चूमिके मुख फिरि आऊँ ।
 इनकी मैया लगूँ भूलिकेँ नाहिँ बताऊँ ॥
 लुकि छिपिकेँ कबहूँ मिलूँ, नैन न नीर बहाउँगी ।
 कतुआ बलुआ हाय सुत, कहिकेँ नहिँ डकराउँगी ॥

यौँ पगली-सी फिरै मातु ब्रजमहँ इततें उत ।
 ग्वालबाल अति दुखित जाइँ बनकूँ रोवत नित ॥
 जहँ जहँ क्रीड़ा करीँ कृष्णने अति सुखकारी ।
 करि करि तिनकी यादि करेँ मनमहँ दुख भारी ॥
 अब कब निरखें श्याम मुख, बिलपि बिलपि पुनिपुनि कहें ।
 हरि सँग हँसिबो खेलिबो, सुमिरि सुमिरि रोवत रहें ॥

बन, उपवन, द्रुम, सुमन, सरित, सरवर लखि रोवें ।
 लीलनिकी करि सुरति देहकी सुधि बुधि खोवें ॥
 गाँव गाँव थल कुंड लखें लीला सुधि आवें ।
 कृष्ण कृष्ण कहि गिरे दुःखको पार न पावें ॥
 जब गोपनिकी जिह दशा, तो गोपिनिकी का कहें ।
 जे प्रियतमके प्रेममहँ, निशि बासर डूबी रहें ।

निशि निशि गोपी फिरति गये कहँ कृष्ण कन्हाई ।
 तिनिक्कूँ तजिकें नींद कृष्णके संग सिधाई ॥
 बिरह रोग अति दुसह सबनिके हियमहँ लाग्यो ।
 रोवत ही नित रहें शयन भोजन जल त्याग्यो ॥
 पछितावें सुभिरन करे, रास विलास मनाइवो ।
 दान, मान, होरी, हँसी, संग नाचिवो गाइवो ॥

वे ही शरद, वसंत, शिशिर, पावस, ग्रीष्म दिन ।
 वे ही भू, जल, अनिल, अनल, नभ, ग्रह, तारागन ॥
 किन्तु कृष्ण विनु लगें दुखद नीरस सूने अति ।
 ब्रजबनिता निशिदिवस बितावति हरिकूँ सोचति ॥
 सावन भूला भूलिबो, फागुन होरी रँग भरि ।
 रोवति लीला सुभिरि नित, शरद निशिनिमहँ जो करी ॥

इत ब्रज-बनिता बिरह-बारिमहँ डूबति उतरति ।
 उत यदुपति करि याद सखिनिकी होत दुखित अति ॥
 परम सुहृद निज सखा सचिव उद्धव ठिँग आये ।
 निरखि परम एकान्त रहसमय बचन सुनाये ॥
 सखे ! करो इक काज तुम, वृन्दावनमहँ जाइकें ।
 करो सुखी सब सखिनिकूँ, शुभ सन्देश सुनाइकें ॥

स्वामीको सन्देश सुन्यो सिर उद्धव घाश्यो ।
 नंदगाँवकूँ जाउँ सोचि रथ सुघर निकाश्यो ॥
 पाग दुपट्टा पहिन चले रथ चढ़ि ब्रज ऊघो ।
 बृक्ष लतनिर्ते घिश्यो निहाश्यो दगरो सूघो ॥
 सरस भूमि ब्रजरज मृदुल, सघन कुंज वन बिटप बर ।
 बरसावत द्रुम सुमन शुभ, गुंजत बर मधुकर निकर ॥

धेनु खुरनिकी धूरि उड़ति रस-सो बरसावति ।
 ढाँकति रथकूँ मनहुँ श्याम अनुराग दिखावति ॥
 ऐन भारतै नमित धेनु इततें उत जावें ।
 गैयनिके हित साँझ लडै पुनि पुनि डकरावें ॥
 ग्वालबाल बछरा लिये, बाँधत गोपी दुहति पय ।
 कृष्ण बिरहमहँ व्यथित सब, दीखत ब्रज अति दुःखमय ॥

गोपी बैठीं लखीं नयनतें नीर बहावति ।
 राम श्यामके चारु चरित तन्मय है गावति ॥
 अतिथि, अग्नि, रवि, धेनु, विप्र, सुर पितरनि पूजत ।
 को आवै को जाइ भावमहँ तिनहिं न सूझत ॥
 उद्धव निरखत जात सब, अति प्रभाव तिनिपै पश्यो ।
 नन्द पौरि ढिँग आइके, हौलें रथ ठाढ़ो कश्यो ॥

रथको सुनिके शब्द नन्द हैके आनन्दित ।
 आइ गये बलश्याम बड़े आगे मन सोचत ॥
 उद्धवजी जब लखे प्रेमतैं हिये लगाये ।
 पुनि पुनि सिरकूँ सूँघि बिकल है अश्रु बहाये ॥
 मानों आयो श्यामही, सुत समान आदर कश्यो ।
 पाद्य अरघ मधुपरक दै, दिव्य अन्न आगे घश्यों ॥

बर भोजन करवाइ बिछाई सुन्दर शैया ।
 दोऊ बैठे पास नंद अरु जशुमति मैया ॥
 कुशल प्रश्न करि कहें—कृष्ण ब्रज च्यों नहिं आयो ।
 परदेशी बनि गयो स्वजन घरबार भुलायो ॥
 लीलनिकी सबई सुरति, ब्रजरज कन कन महँ निहित ।
 कतिरखत नित प्रति ही रहत, मथुरा-पथ हैकें चकित ॥

निरखें जा जा ठौर यादि लीला है आवति ।
 चित्त कृष्णमय होहि आँखि नित नीर बहावति ॥
 बोले उद्धव—धन्य धन्य दम्पति बड़भागी ।
 कृष्ण प्रेममहँ छके रहो अतिशय अनुरागी ॥
 घट घट व्यापी भुवनपति, देवे दर्शन आइ हरि ।
 बासुदेव ब्रजचन्द्र प्रभु, प्रकटे नटवर रूप धरि ॥

बाबा ! धारौ धीर बेगि सुधि यदुपति लेंगे ।
 करे प्रतिज्ञा सत्य दयानिधि दर्शन देंगे ॥
 को तिनके हैं पिता सुहृद सुत माता भ्राता ।
 अखिल विश्वके बीज बिनोदा सब जगत्राता ॥
 सुख साधुनिकूँ दें हित, सरस सुखद क्रीड़ा करे ।
 देव, मनुज, पशु, पक्षि, अज, बिबिध रूप नटवर धरे ॥

करत करत यों बात रात बीती सब जागत ।
 अरुनोदय है गयो गोपिका दीप जरावत ।
 मथिबे लागीं दही बलय कंकन धुनि करहीं ।
 कुंकुम मंडित गंडचन्द्र बिद्युत द्युति हरहीं ॥
 चारु चरित चित चोरको, कल कंठनितै गाइके ।
 दशहुँ दिशानिकूँ भरति मनु, अनुपम भाव जनाइके ॥

दिनकर निजकर किरन प्रसारत उदित भये जब ।
 नन्दपौरिपै लख्यो कनकमय गोपिनि रथ तब ॥
 हैके' बिस्मित कहें परस्पर—को रथ लायौ ।
 का श्वफलक-सुत फेरि मधुपुरीतैं ब्रज आयौ ॥
 करति तरकना परस्पर, उपमा दै दैके' सबहिं ।
 नित्य कर्मतैं निबटिके', आये उद्धवजी तबहिं ॥

निरखे उद्धव कमलनयन पीताम्बर धारी ।
 कमल कुसुम बनमाल अलकबर चितवन प्यारी ॥
 समुर्झी कछु संदेस श्यामको लैके' आयौ ।
 मातु पिता संतोष हेतु घनश्याम पठायौ ॥
 करि आदर एकान्तमहँ, उत्कंठित है लै गई ।
 समाचार सब श्यामके, सहमि सकुचि पूछति भई ॥

प्यारेको सन्देश कहन ब्रज आपु पधारे ।
 हो कारेके सखा रंगके तुमहू कारे ॥
 समुष्मति हीं हम सदा प्रेम घनश्याम करिङ्गे ।
 छाया तन मन प्राण सरिस नित संग रहिङ्गे ॥
 फल हित खग, मधु हित भ्रमर, बिटप सुमन सँग प्यारहै ।
 निकसे कपटी कुटिल हरि, स्वारथको संसार है ॥

इति श्रीभागवत चरितके पञ्चमाह में उद्धव ब्रज गमन नामक
 उन्तीसवाँ अध्याय समाप्त ।

अथ त्रिंशत्तमोऽध्यायः

[३०]

उद्धव बैठे चुप्प व्यंग सुनि हिय भरि आयौ ।
 मधु लोलुप इक भ्रमर सहजही तहँ उड़ि आयौ ॥
 करि उद्धवकूँ लक्ष्य प्रेमको पाठ पढ़ायौ ।
 ताहि मानि हरिदूत कोप अरु मान दिखायौ ॥
 गुन गुन करि आयौ भ्रमर, कहति कुपित पद पकर मत ।
 तू मधुकर माधव सरिस, मधु-लोलुप स्वारथ-निरत ॥

जिनि कुंजनि सुख दयो न ते अब तनिक सुहातीं ।
 अधरामृतकूँ प्याइ बनाई हम मदमातीं ॥
 गये त्यागि मधुपुरी न अब ब्रजबास सुहावै ।
 तू हू करि मधुपान, त्यागि सुमननिकूँ जावै ॥
 स्वामी सेवक एक से, चोर चोर भाई सगे ।
 निज घरजा, हम अति व्यथित, हरि कटाक्ष सर हिय लगे ॥

धरि चरननिपै शीश बिनय अति भ्रमर दिखावै ।
 बार बार हरि चरित मधुर अति गाइ सुनावै ॥
 क्रूर कृष्णकी कथा कामिनी नाहिं सुनैगीं ।
 नकटी को तिहि बधिक निकट हरि जाइ बनैगीं ॥
 खाइ छेद पत्तल करै, बामन बनि बलि नृप ठग्यो ।
 करे कहा परवश भई, कठिन कुटिलमहँ मन लग्यो ॥

चाहें भूल्यो तऊ यादि आवें श्रीहरि नित ।
 करै नित्य मन मत्त मनन माधवकी मूरत ॥
 सोचे अवगुन सतत किन्तु चित तिनि गुन जाने ।
 कान्ह कथा नहिँ सुने कान परि सीख न माने ॥
 फँसी बधिकके जालमहँ, घरकी रहीं न घाटकी ।
 परि न दुबारा चढ़ि सकै, चूल्हे हंडी काठकी ॥

अच्छा, मधुकर ! फेरि पठायो प्रियतम तुमकुँ ।
 प्यारेको संदेश सुनाओ अब तुम हमकुँ ॥
 कैसे हरितैं मिलैं भ्रमर बर युक्ति बताओ ।
 उन उर पद्मा बसति सौतितैं पिंड छुड़ाओ ॥
 कुशल कहो कंसारिकी, करत कबहुँ ब्रजकी सुरति ।
 कब दासिनिपै दया करि, दर्शन देंगे प्रनतपति ॥

भूलि गये घनश्याम हमें प्यारे वनवारी ।
 करत हमारी यादि कबहुँ का कुंजबिहारी ॥
 उद्धव लखि अस नेह कहैं—तुम अति बड़भागी ।
 श्याम चरनमहँ सुरति सवन्तिकी निशिदिन लागी ॥
 जप, तप, सख, व्रत, धर्मको, यह ही अंतिम फल कह्यो ।
 सार भक्ति भगवन्तकी, सो फल तुम सहजहिँ लख्यो ॥

कर्यो कठिनतम काज त्यागि सब हरि अपनाये ।
 कृष्ण प्रेम हित देव द्रव्य पति स्वजन भुलाये ॥
 संसारी सुख तजे प्रीति प्रभुचरन लगायो ।
 प्रीति रीति करि प्रकट दीनपै दया दिखायी ॥
 बिनय करहुँ कर जोरिके, हौँ प्रभु-पद अनुरक्त हूँ ।
 अनुचर सेवक सचिव प्रिय, किंकर अति लघु भक्त हूँ ॥

जा अयोग्यके हाथ श्याम सन्देश पठायौ ।
 ज्ञानमानमहँ भयो दैरिके' हौं ब्रज आयौ ॥
 कृष्ण भक्ति ही सार दशा तुमरीतैं जानी ।
 निरखि अलौकिक भक्ति भयो मेरो हिय पानी ॥
 पढ़ौ प्रेम पाती स्वयं, पठयो जो सन्देश हरि ।
 गोपी बोलीं—आपुही, हमहिं सुनावे' कृपा करि ॥

करिके' शिष्टाचार सखिनिके आये आगे ।
 प्यारेको सन्देश पढ़न पुनि उद्धव लागे ॥
 हौं सर्वात्मा रहौं सकल प्रानिनिके घटमहँ ।
 सब बस्तुनिमहँ भूत सूत ज्यों व्याप्यो पटमहँ ॥
 स्वप्न सरिस जगके बिषय, मिटै मोह भ्रम ज्ञानतैं ।
 रजत सीप अहि रज्जुमहँ, दीखे तम अज्ञानतैं ॥

सब साधनको श्रेष्ठ साध्य हौं ही जा जगमहँ ।
 मैं अरु तुम सब एक भेद नहिँ तुममें हममहँ ॥
 प्रेम वृद्धिके हेतु भयो हौं तुमते' न्यारो ।
 ज्यों परोक्षमहँ प्रेष्ठ लगे प्राननितैं प्यारो ॥
 जितनो पाइ बियोगकूँ, सतत चित्त प्रियमहँ रहै ।
 उतनो नहिँ संयोग सुख, महँ मन तन्मयता लहै ॥

प्रियको सुनि सन्देश भई सब हरषित नारी ।
 प्रेम प्रकट अति करै' श्याम सुधि लई हमारी ॥
 पूछति पुनि पुनि कुशल—कहो उद्धव ! हरि सुखतैं ।
 उन बिनु ब्रजमहँ कटत हमारे दिन सब दुखतैं ॥
 वृन्दाबनमहँ शरदकी, निशा बिताई रासमहँ ।
 यादि करत हरि प्रियनि सँग, कबहुँ हास परिहासमहँ ॥

कहो कबहुँ घनश्याम आइ ब्रजपै बरसैंगे ।
 नेह नीरतै कबहुँ हमारे हिय सरसैंगे ॥
 कब कोमल अति मृदुल कमल करते परसैंगे ।
 आये ब्रज ब्रजनाथ सुनत कब सब हरसैंगे ॥
 नन्दनँदन अतिशय कठिन, निर्मोही निष्ठुर निपट ।
 किन्तु करे का फँस्यो मन, प्रेम फंद अति ही बिकट ॥

आशामहँ अति दुःख निराशा सुखकी जननी ।
 जानि बूझिके बिगारि गई भोरी मति अपनी ॥
 जिन प्रभु पायो परस सरस कैसे नहिँ भजिहँ ।
 कृष्ण कथा जिन श्रवन सुनी ते कैसे तजिहँ ॥
 कमला अति ही चंचला, किन्तु परम प्रिय पाइके ।
 होहि न पल भरकूँ पृथक, श्याम सिन्धुमहँ आइके ॥

कालिन्दीको सलिल श्याम सुधि सतत दिवावै ।
 गिरि गोवर्धन लखत हियो हमरो भरि आवै ॥
 श्याम ललित गति हँसी सुखद लीला शुभ चितवन ।
 यादि दिवावै धेनु, बेनु-रव, गिरि, बन, उपवन ॥
 करि करि सुमिरन श्यामको, करन लगीं गोपी रुदन ॥
 हाय ! नाथ, अशरन-शरन, हा ! दुख-भंजन नँदनँदन ॥

उमङ्ग्यो सागर विरह बहो ब्रज सबरो जावै ।
 तुम बिन राधारमन ! कौन अब आइ बचावै ॥
 हे मनमोहन ! रमन ! बेनु पुनि मधुर बजाओ ।
 अधरामृत भरि पेट आइ घनश्याम ! पिआओ ।
 ब्रजबनितनिके बिरहकूँ, लखि ऊधो व्याकुल भये ।
 कृष्णकथाके लालची, कछु दिन ब्रजमहँ बसि गये ॥
 ४५

नित कालिन्दी कूल कदमकी छाँह सिधारें ।
हरि-लीला थल कुञ्ज, कन्दरा, नदी, निहारें ॥
लखि गोपिनीकी दशा कहैं ऊधौ है प्रमुदित ।
अहो ! धन्य ब्रज-बधू इन्द्र अज हर पद बन्दित ॥
इनहीं को जीवन सफल, डूबे हम अभिमानमहँ ।
वीतत इनको सब समय, हरि सुमिरन गुन गानमहँ ॥

कहाँ अलख अखिलेश कहाँ ये ब्रजकी नारीं ।
करि हरि पद अनुराग भई सब जगतें न्यारीं ॥
जुग जुग जोगी करे जोग नहिं हरि पद पावे ।
तिनहिँ गँवारिनि गोप बधू नित हिय चिपटावें ॥
जो प्रसाद पायो नहीं कमला, अज, सुर-सुन्दरीं ।
ताकूँ नित सेवति रहति, ब्रजकी भोरी नागरीं ॥

मोड़ मिलै ब्रजबास बनूँ चाहे तन पाथर ।
ब्रज-बनितनि पद धूरि परै उड़ि उड़ि मम ऊपर ॥
जिनि चरननि अज शंभु योगिजन नित प्रति ध्यावे ।
तिनकूँ ये हिय धारि नारि तनु ताप मिटावे ॥
जिनको जगमहँ भइयो यश, तिनको का इस्तुति करूँ ।
केवल उनकी चरन रज, महँ पुनि पुनि निज सिर धरूँ ॥

यों उद्धव कछु दिवस रहे ब्रज अति सुख पायौ ।
कहूँ सँदेशो जाइ श्यामतैं सबनि सनायौ ॥
सुनि उद्धवको गमन नयन सबके भरि आये ।
ऊओ हूँ चलि दये लौटि वे ई दिन आये ।
कहि न सके कछु मलिन मुख, फटत हियो हाहा करहिँ ।
सिर धुनि धुनि रोवत फिरहिँ, भेंट लाइ रथमहँ धरहिँ ॥

राम श्यामकूँ सबनि सँदेशो निज निज दीन्हों ।
 ऊधो रथपै चढ़े सबनिको आदर कीन्हों ॥
 ब्रजबासी मिलि कहें—हमें अब जिह ही भावै ।
 कृष्ण चरण मन रमे नाम रसना नित गावै ॥
 तन हरि सेवामहँ निरत, सतसंगतिमहँ होइ मति ।
 जहँ जहँ जनमें करम वश, होहिं तहाँ हरिचरन रति ॥

सबको सुनि संदेश चलायो उद्धव रथ तब ।
 ब्याकुल हैकें गिरे नारि नर भये बिकल सब ॥
 उद्धव रथकूँ लिये फेरि मथुरामहँ आये ।
 ब्रजबासिनिके वृत्त श्यामकूँ संकल सुनाये ॥
 कुंकुम कज्जलतैं सनी, प्यारीकी चूनरि दर्ई ।
 लखि रोये राधारमन, हिय लगाइ सिर धरि लई ॥

बिलखि कहें—यदुनाथ न ऊधो ! ब्रज बिसरतु है ।
 गैयाँ गोपी ग्वाल यादि करि हिय दहलतु है ॥
 कहँ वे कुञ्जकुटीर कहाँ ये पाथरके घर ।
 कहँ क्रीड़ा कमनीय कहाँ ये चिन्ता दुस्तर ॥
 कहाँ रास-रस अति सुखद, माखन मिसिरी खाइबो ।
 कहाँ चरावन धेनु बन, ग्वाल बाल संग जाइबो ॥

इति श्रीभागवत चरितके पञ्चमाहमें प्रसरगीत नामक
 तीसवाँ अध्याय समाप्त ।

अथ एकत्रिंशोऽध्यायः

[३१]

करि करि ब्रजकी यादि श्यामने दुख अति पायो ॥
 उद्धवने बहु भाँति युक्ति करि धीर बँधायो ॥
 कुबजाकूँ जो दयो प्रथम बर सो सुधि आई ।
 ताकूँ पूरन करन गये तिहिँ भवन कन्हाई ॥
 दासीके घर जगतपति, गये प्रकट प्रन निज करयो ॥
 जोहति छिन छिन बाट जो, हृदय ताप ताको हरयो ॥

निरखि प्रानप्रिय भवन तुरत दासी उठि धाई ।
 कङ्कनयुत कर कमल पकरि हरि निकट बिठाई ॥
 पाइ मृदुल प्रभु चरन कमल मन माँहिँ सिहाई ।
 सुँधि हिये बिच धारि नारि तन तपन बुझाई ॥
 हाय ! पाइ प्रभु विषय सुख, माँग्यो दासी तुच्छ अति ।
 करि कृतार्थ उद्धव सहित, आये घर पुनि जगतपति ॥

इक दिन प्रभु अक्रूर भवन बल सहित पधारे ।
 श्वफलक-सुत अति मुदित नयनजल चरन पखारे ॥
 चरनोदक सिर धारि करी पूजा सुख पायौ
 अंक धारि पद कमल पुलक तनु भाग सराह्यौ ॥
 सिर नवाय अति बिनययुत, बार बार इस्तुति करी ।
 करुणाकर कीन्हीं कृपा, यदुकुलकी बिपदा हरी ॥

बिनय बचन सुनि श्याम कहें—चाचा ! तुम गुरुवर ।
 कुन्ती बूआ दुखी तुरत जावें हथिनापुर ॥
 नेत्रहीन धृतराष्ट्र खलनि मिलि बशमहँ कीन्हें ।
 पितृहीन असहाय पाण्डु पुत्रनि दुख दीन्हें ॥
 कछु दिन बसि सब मरम लै, आवैं तब कछु करिज्जे ।
 समुक्ति बलाबल बुआको, सुतनि सहित दुख हरिज्जे ॥

हथिनापुर अक्रूर चले हरि आयसु सिर धरि ।
 पहुँचत कुन्ती मिली गहकि नयननिमहँ जल भरि ॥
 करि विपतनिकी यादि बन्धु ढिँग भई दुखारी ।
 पुनि पुनि पूछति तात श्याम सुधि लई हमारी ॥
 हे यदुनन्दन अखिलपति, शरणागतबत्सल बिभो ।
 सहति सुतनि सँग दुख दुसह, आइ उबारो हे प्रभो ॥

बिदुर सहित अक्रूर पृथाकूँ धीर बँधायौ ।
 सुतनि प्रभाव सुनाइ समयको फेर बतायौ ॥
 यों बहु विधि समुझाइ चले मथुरा सुफलक-सुत ।
 अंध अम्बिका तनय निकट पहुँचे सनेहयुत ॥
 जाइ धरमयुत बचन बर, सब सचिवनि सम्मुख कहे ।
 कठिन बचन हितकर समुक्ति, अन्धराजने सब सहे ॥

निरभय हूँ अक्रूर अन्धकूँ डाँट बताई ।
 पाण्डु भूमिपति रहे तुम्हारे छोटे भाई ॥
 तिनिके पुत्रनि सज्ज करै तव तनय लड़ाई ।
 कौरव पाण्डव द्वेष बढ़ै नहिँ होहि भलाई ॥
 परपीड़ा दै पापको, आप घड़ा नित नित भरो ।
 तुमहु ओहवश सुतनिको, देहु साथ अघरम करो ॥

भये दुखित धृतराष्ट्र कहें—हे दानपते ! मुनि ।
 करता कारन काल कृष्णकूँ कहें सकल मुनि ॥
 नाचूँ हूँ अवश नाच जो श्याम नचावें ।
 अधरम अथवा धरम करूँ सब वे करवावें ॥
 अन्ध-ज्ञान अक्रूर मुनि, मथुरा लौटे सब कही ।
 हरन भार भू हरि गदा, असुर विनासिनि कर गही ॥

इति श्रीभागवतचरितके पञ्चमाहमें कुञ्जाप्रसाद कुन्तीसान्त्वना
 नामक इकतीसवाँ अध्याय समाप्त ।

[पाक्षिक पारायण ग्यारहवें दिन का विश्राम]

(इति पञ्चमाह)



अथ षष्ठाह

अथ प्रथमोऽध्यायः

(१)

हे यदुकुलके तिलक शूर-सुत-तनय मुरारी ।
हे मधुभोजदशार्ह शूरकुलके हितकारी ॥
हे हरि लोकातीत भगोड़े यवन सँहारी ।
हे माधव रणछोर असुर-नाशक कंसारी ॥
कहीं करीं लीला ललित, कछु ब्रज मथुरामें यथा ।
अब तब चरननि बन्दिकें, कहूँ द्वारकाकी कथा ॥

निज चरननितै करे कृतारथ ब्रजके सब थल ।
मथुराकूँ चलि दये सङ्ग लै संकरषण बल ॥
करन द्वारका धन्य बिचारे अन्तरयामी ।
मामाकूँ दै मुक्ति करीं विधवा सब मामी ॥
ज्यों निमित्त मामीं करीं, जरासन्ध आयौ यथा ।
ज्यों भागे रन छोड़िकें, सुनहु छठे दिनकी कथा ॥

जरासन्धकी सुता अस्ति अरु प्राप्ति सयानी ।
परम सुंदरी सुघर कंसकी दोऊ रानी ॥
कंस मरत समुराल त्यागि पितु घर अपनायौ ।
जरासन्धतैं सकल कंसको वृत्त बतायौ ॥
सुनत कुपित अति खल भयो, भारी सेन सजाइकें ।
आयो यदुकुल नाशहित, अति बलवश गरबाइकें ॥

घेरी मथुरापुरी सकल यादव घबराये ।
 राम श्यामके दिव्य अस्त्र रथ सुमिरत आये ॥
 चले साजि रन साज समरकूँ दोऊ भाई ।
 जरासन्ध बल लड़े भयंकर भई लड़ाई ॥
 इत हरि अतिशय छल कइयो, रिपु सेनामहँ आइकैं ।
 मागध बल आधो कइयो, डिम्मक हंस मराइकैं ॥

मनुजचरित हरि करत लड़त बल विपुल दिखावत ।
 सिंह पकरि जिमि हरिन छोड़ि पुनि खेल खिलावत ॥
 चतुरङ्गिनि रिपु सैन्य मारि यम सदन पठाई ।
 कइयो शत्रु संहार रक्तकी नदी बहाई ॥
 भयो पराजित मगधपति, रथ दूट्यो सेना मरी ।
 लगे शत्रु बध बल करन, तब तिनितैं बोले हरी ॥

छोड़ो भैया ! जाइ घेरि लावै असुरनिकूँ ।
 बिनु प्रयास परलोक पठावैं सब पापिनिकूँ ॥
 सुनि बल छोड़्यो चल्यो करन तपनृपति निवार्यो ।
 आयो सत्रह बार सेन सजि पुनि पुनि हाइयो ॥
 पुनि तप करि हर बर लह्यो, द्विजनि त्रिजय आशिष दई ।
 कालयवन मथुरा तबहिँ, घेरी हरि चिन्ता भई ॥

सोचैं माया मनुज—यवन जीत्यो नहिँ जावै ।
 जरासन्ध हू आज कालिमैं पुनि चढ़ि आवै ॥
 हर बरतैं खल बढ़्यो घेरि सब बन्धुनि मारै ।
 कालयवन सुत गर्ग यादवनितैं नहिँ हारै ॥
 तातैं तजि पुर द्वारका, महँ दृढ़ दुर्ग बनाइंगे ।
 भागि चलैं रन छोड़िकैं, तो रनछोड़ कहाइंगे ॥

बलदाऊतैं पूछि उदधिमहँ पुरी बनाई ।
 द्वादश योजन दुर्ग नीरनिधि ताकी खाई ॥
 दई सुधर्मा सभा इन्द्रने अति सुखदाई ।
 करी समर्पित सिद्धि सुरनि जो हरितैं पाई ॥
 सुरशिल्पी नगरी रची, शोभा मूर्तिमती जहाँ ।
 पहुँचाये हरि योग बल, तैं यादव सबई तहाँ ॥

सबनि द्वारका भेजि भगे भगवान भगोड़े ।
 मथुराके घर द्वार सभा सरवर सब छोड़े ॥
 कमल कुसुम गलमाल निरायुध भागे नटवर ।
 कालयवन पहिचानि भग्यो पीछे बिनु धनुसर ॥
 कहै—अरे यादव अधम, कायर सम भागै कहाँ ।
 चलि पीछो तेरो करूँ, भगिकें तू जावै जहाँ ॥

करत अनसुनी श्याम भगत मुरि पीछे निरखत ।
 पग पगपै जनु गहे यवन छिन छिनमहँ समुक्त ॥
 घुसे गुफामहँ श्याम निहाइयो तहँ नर सोवत ।
 निज पट ताहि उदाइ दुबकि रिपुको पथ जोहत ॥
 कालयवन रिसमहँ भइयो, पदप्रहार तिहिपै कइयो ।
 तिहि उठि निरख्यो यवन जब, दृष्टिपरत ही सो मइयो ॥

वे नरवर मुचुकुन्द धेनु द्विज सुर हितकारी ।
 असुरनि सतयुग प्रथम माँहिँ सुर सेन संहारी ॥
 गये लड़न भूपाल गये जब देव शरनमहँ ।
 मारि भगाये असुर भये विजयी सुर रनमहँ ॥
 देवनि बर माँगन कह्यो, माँगी निद्रा भूप बर ।
 करै बिघन मम नौदमहँ, सो ततछिन मरि जाय नर ॥

एवमस्तु कहि सुरनि समरथन नृपको कीन्हों ।
 अमित भूपकूँ गाढ़ नींदको मिलि बर दीन्हों ॥
 सोये तबतै गुफामाँहि बहु बरष बिताये ।
 कालयवनको अन्त करावन हरि तहँ आये ॥
 भस्म यवन जब हूँ गयो, तब दरशन नटवर दयो ।
 लखि अति सुंदर सुधर नर, भूपति अति विस्मित भयो ॥

पूछत बिनयावनत नृपति डरपत अति बोलत ।
 प्रभु ! अति कोमल चरन कठिन महिपै च्यौँ डोलत ॥
 हो त्रिदेवमहँ एक असुर सुर अथवा स्वामी ।
 अथवा अज अखिलेश अमरपति अन्तरयामी ॥
 हौँ मान्धाता नृपतनय, मोइ कहें मुचुकुन्द सब ।
 सुर बर लहि सोवत रह्यो, देवें परिचय आपु अब ॥

कहें बिहँसि बल-बन्धु—नाम निज कहा बताऊँ ।
 जनम करम गुन अखिल कहाँ तक तुम्हें गिनाऊँ ॥
 सुरनि बिनय जब करी जनम महिपै तब लीयो ।
 कंसादिक जे असुर नाश तिनि सबको कीयो ॥
 बासुदेव मोकूँ कहें, कृपा करन आयो यहाँ ।
 जहाँ रहैं मम भक्तगन, दौरि तुरत पहुँचूँ तहाँ ॥

सुमिरि गरगके बचन यादि मुचुकुन्दहिँ आई ।
 लिपटे चरननि दौरि बिनय धरि धीर सुनाई ॥
 हे मायापति ! ईश ! मोह बश तुमहिँ न जानें ।
 भरि मदमहँ अखिलेश नृपति अपनेकूँ मानें ॥
 का इनकूँ माँगूँ प्रभो ! छिन भंगुर ये विषय सुख ।
 तव चरननिमहँ होहि मति, है यह जगमहँ परम सुख ॥

मुचुकुन्द-स्तुति

हे ईश ! तुम्हारी मायामें, मैं मोहित हैकें भटक रह्यो ।
 सुखकी आशातैं या जगमें, स्वामिन् ! मैंने अति दुःख सह्यो ॥
 पायो नर तनहू अति दुरलभ, पर विषय-भोगमें नष्ट कर्यो ।
 नहिँ नाम जप्यो तब कथा सुनी; नहिँ नटवर ! तुमरो ध्यान धर्यो ॥
 मैं मानी हूँ सम्मानी हूँ, हूँ धनी यशस्वी गुनखानी ।
 योगी साधक हूँ तेजस्वी, हूँ बड़भागी ज्ञानी ध्यानी ॥
 अभिमान बढ़यो विश्वास घट्यो, विकराल काल सम्मुख आयौ ।
 संकल्प सकल मनके मनमें, अहि मूषकवत् तानें खायौ ॥
 सत्संग मिलै सब मान मिटै, तब चरननिमें चित लागि जावै ।
 मिट जाय मरन अरु जनम चक्र, भवबन्धनको भय भगि जावै ॥
 पीड़ित हूँ अति ही दुःखित हूँ, है चिन्ता इन छै शत्रुनिकी ।
 धन वैभवकी बांछा न प्रभो ! चाहूँ सेवा पदपदुमनिकी ॥
 सब छोड़ि छाड़ि जगकी आशा, आयो आश्रय अच्युत दीजै ।
 भय शोक मृत्युतें रहित चरन, तब गही शरन रक्षा कीजै ॥

सोरठा—मुनि इस्तुति घनश्याम, सदय भूपपै है गये ।

प्रभुजी पूरन काम, दई भक्ति मुचुकुन्दकूँ ॥

छप्पय—दयो भक्ति बरदान गुहातैं निकसे यदुवर ।

देखे नृप मुचुकुन्द कलियुगी लघु पशु, तरु, नर ॥

बदरीवन तप करन गये तहूँ मुनि व्रत साधें ।

संयम श्रद्धा सहित श्यामकूँ नित आराधें ॥

इत मथुरा आये मदन—मोहन सेना यवनकी ।

लूटि पाटि बाँधीं तुरत, पुटरीं सब धन रतनकी ॥

खच्चर बैलनि लादि द्वारका धन पहुँचावत ।
 तब ई निरख्यो जरासन्ध सेना सँग आवत ॥
 राम श्याम लखि सेन बाँधिके मुट्ठी भागे ।
 जरासन्धके सकल बीरवर पीछे लागे ॥
 भगत भगत दोऊ थके, चढ़े प्रवर्षणपै उछरि ।
 घेर्यो गिरि चहुँ ओरतैं, जावें नहिँ अब ये उतरि ॥

पर्वत लीयो घेरि आगि चहुँ ओर लगाई ।
 जरि जावें मम शत्रु जरासँध मनहिँ सिहाई ॥
 क्रूढ़े दोऊ बन्धु न भय कछु मनमहँ मान्यो ।
 कब गिरितैं गिरि गये न काहूने कछु जान्यो ॥
 जरासन्ध निजपुर गयो, शत्रु मरे हिय मानिकें ।
 इत सुखतैं यदुवर रहें, पुरी द्वारका आनिकें ॥

इति भागवत चरितके षष्ठाह में जरासन्धाक्रमण कालयवनोद्धार
 द्वारावती निर्माण नामक प्रथम अध्याय समाप्त ।

अथ द्वितीयोऽध्यायः

[२]

पूछें शौनक—सूत ! द्वारका वृत्त बताओ ।
 कै हरि किये विवाह भये कै पुत्र सुनाओ ॥
 हँसिके बोले सूत—कहाँ तक व्याह गिनाऊँ ।
 मुख्य भये जो आठ प्रथमकूँ प्रथम सुनाऊँ ॥
 नृप बिदर्भपति भीष्मके, पाँच पुत्र रुक्मी बड़ो ।
 बहिन रुक्मिनी अंश श्री, जाके हित हरितै लड़्यो ॥

नारदादि मुनि आइ कृष्णकी करी बड़ाई ।
 सुनत रुक्मिनी हृदयमाँहिँ हरि-मूर्ति समाई ॥
 इत हरि निश्चय कश्यो रुक्मिनीकूँ अपनाऊँ ।
 करिकें बिबिध उपाय प्रियाकूँ घर लै आऊँ ॥
 मातु पिता सहमत सबहिँ, हरि बरतै जग होहि यश ।
 रुक्मीने शिशुपाल सँग, करी सगाई द्वेष बश ॥

सुनत रुक्मिनी भई दुखित अतिशय घबराई ।
 बुलवाये बर विप्र वृद्ध निज विपति सुनाई ॥
 प्रेम पत्रिका लिखी विप्रके करमहँ दीन्हीं ।
 परि चरननिमें बिनय विप्रतै बहु विधि कीन्हीं ॥
 चले द्वारका द्विज तुरत, प्रभु पथको सब श्रम हर्यो ।
 निरखि विप्रकूँ मुदित मन, है हरिने स्वागत कश्यो ॥

करि पूजा पकवान प्रेमतेँ बिबिध खवाये ।
 पुनि शैया अति सुखद विछाई बिप्र सुवाये ॥
 लगे पलोटन चरन कुशल पूछत प्रभु पुनि पुनि ।
 वैदर्भीकी कथा भये प्रमुदित यदुवर सुनि ॥
 पीरी पाती निरखिकेँ, अति प्रसन्न मनमहँ भये ।
 बृद्ध बिप्र बाँचन लगे, प्रेम मगन हरि हँ गये ॥

लिखै रुक्मिनी—दयित ! भयो मम मन मतवारो ।
 सुनि गुन अनुपम रूप लिख्यो हिय चित्र तिहारो ॥
 हे हरि ! अशरन शरन आइ दासी अपनाओ ।
 खल शृगाल शिशुपाल हरे नरसिंह छुड़ाओ ॥
 यदि आवें नहिँ आपु तो, बिष खाऊँ मरि जाउँगो ।
 तुम बिनु चाहें मदन हू, आवे नहिँ अपनाउँगी ॥

कमलनयन ! सजि सेन तुरत कुंडिनपुर आओ ।
 रिपुसिरपै धरि चरन मोहिँ माधव ! ले जाओ ॥
 जाऊँ ब्याहके प्रथम दिवस देवी पूजन हित ।
 लैकें भागें मोहि नहीं क्षत्रियकूँ अनुचित ॥
 दीनबन्धु दुखहरन यदि, दया न दासीपै करहिँ ।
 तो तब तक जनमूँ मरूँ, जब तक नहिँ यदुबर बरहिँ ॥

सुन्यो प्रियाको पत्र नयन हरिके भरि आये ।
 प्रेम बिबश हँ गये बिप्रकूँ बचन सुनाये ॥
 द्विजबर ! मोकूँ प्रिया रुक्मिनी अतिशय भावै ।
 करि करि वाकी यादि रैनिमहँ नौद न आवै ॥
 चलो, चलै कुंडिनपुरी, अब द्वै दिन ही रहि गये ।
 सजि रथ द्विजकूँ संगलै, बहू हरन हरि चलि दये ॥


हरि कुंडिनपुर पहुँचि, रहे पुरकी अमराई ।
 इत अति विशद बरात चेदि राजाकी आई ॥
 जनमासो नृप दयो बराती अति हरषाये ।
 उत बल सुनि हरि गमनसेन सजि तिनि ढिँग आये ॥
 सकुचाये हरि बल हँसे, कछु मीठी चुटकी लई ।
 कहन वृत्त निज बिप्रकूँ, हरि चुपके आयसु दई ॥

हरि आयसु सिर धारि गये द्विज अन्तःपुरमहँ ।
 द्विजमुखबिकसतिनिरखि भयोसुख कन्या उरमहँ ॥
 कह्यो सकल संवाद कुमारी सुनि हरषाई ।
 द्विजकी रिनिया बनी अश्रु माला पहिनाई ॥
 सुन्यो आगमन कृष्ण बल, को नृप सुनि बिस्मित भये ।
 अतिथि समुक्ति भीष्मक नृपति, सादर निज गृह लै गये ॥

करि हरि बल आतिथ्य सकल सैनिक ठहराये ।
 आये पुर यदुचन्द सुनत नारी नर धाये ॥
 हरिको अनुपम रूप लखें पुनि पुनि न अघावें ।
 कन्याके बर योग्य श्यामकूँ सबहिँ बतावें ॥
 मची धूस हरिरूपकी, हाट बाट कूचे गली ।
 तबहिँ रुक्मिणी सखिनि सँग, गौरी पूजन हित चली ॥

पैदल मुनि व्रत धारि चलति शंकित सकुचावति ।
 नूपुर कंकन कड़े छड़े चूड़ी झनकावति ॥
 घरतैं मन्दिर तलक बाढ़ सम सैनिक लागे ।
 शूरवीर लै शस्त्र चलें कछु पीछे आगे ॥
 गौरी मन्दिर पहुँचिकें, प्रेम सहित पूजन कर्यो ।
 धूप दीप उपहार सब, देवी के सम्मुख धर्यो ॥

करि पूजा परसाद धारि सिर बिनती कीन्हीं ।
 होवें पति मम कृष्ण सुआशिष देवी दीन्हीं ॥
 गौरी गृहतै निकसि निहारे हरिकूँ इत उत ।
 शोभा बरनि न जाय मनहुँ सुन्दरता बिहरत ॥
 रूप, शील, वय, बिनय लखि, सचर अचर सम सब भये ।
 कामी नृप बाहन चढ़े, सुन्दरता लखि गिरि गये ।



गरुडध्वज रथ निरखि बड़ी उतहीकूँ वाला ।
 आवत देखी कुँवरि हाँकि रथ लाये लाला ॥
 कीयो ऊँचो हाथ पकरिकेँ रथ बैठाई ।
 पायो पति को परस पुरुहुरी अँग अँग आई ॥

आवै निर्भय भाग लै, सिंह सृगालनि मध्य ज्यों ।
देखत देखत नृपतिके, भगे भाग लै श्याम त्यों ॥

तब अति हल्ला मच्यो नृपति सब लड़िबे आये ।
यादव वीरनि सबहिं भूप खल मारि भगाये ॥
जनमासेमहँ आइ सबनि शिशुपाल मनायो ।
करि कारो मुख भागि रैनिमहँ निज घर आयो ॥
इत रुक्मी है क्रुद्ध अति, करी प्रतिज्ञा हौं लखूँ ।
हरि बध करि बिनु बहिन लै, नगरीमहँ नहिं पग धरूँ ॥

व्यर्थ प्रतिज्ञा करी चल्यो सेना सजि मानी ।
ललकारे घनश्याम बीरता बड़ी बखानी ॥
भये खड़े भगवान् बान तकि तकिकें मारे ।
कुण्डिनपुरके बीर भगे बोले—हम हारे ॥
रुक्मी है कें बिरथ लै, कर करबाल चल्यो लड़न ।
तबहीं रथतैं उतरि हरि, लगे खड़ग लै बध करन ॥

निरखि बन्धु बध परीं रुक्मिनी हरिचरननिमें ।
डरपि कहें मम बन्धु बधें नहिं नाथ ! शरनमें ॥
मानि प्रियाके बचन न रुक्मी फिरि हरि माख्यो ।
करि कुरूप कच कतरि बाँधि रथ पीछें डायो ॥
आइ छुड़ायो रामने, डाँटे हरि अनुचित कह्यो ।
गयो न पुर पुनि भोजकट, पुर बसाइ रुक्मिनी रह्यो ॥

भीष्मक दुहिता जीति द्वारकामहँ हरि आये ।
बहू आगसन सुनत नगरमहँ बजत बघाये ॥
लोग लुगाइनि पुरी और नवबधू सजाई ।
कीयो बिधिवत् ब्याह रुक्मिनी संग यदुराई ॥

पाग दुपट्टा सिरोपा, पहिन पहिन यादव सजें ।
नारी गावें गीत मिलि, मधुर मधुर बाजे बजें ॥

सुन्दर मंडप सज्यो बधू अरु बर बैठाये ।
गणपति ग्रह अरु मातृकादि पूजन करवाये ॥
भाँमर फिरि कर कह्यो खीलको हवन करायों ।
नेग जोग सब करे माँग सिन्दूर भरायो ॥
करिकें पलंगाचार पुनि, कर्म चतुर्थी हू कियो ।
यों श्रीरुक्मिनि संगमहँ, ब्याह श्यामको है गयो ।

इति श्रीभागवत चरितके षष्ठाह में रुक्मिणी विवाह नामक
द्वितीय अध्याय समाप्त ।

अथ तृतीयोऽध्यायः

[३]

सुखी भये सब स्वजन निरखि अति अनुपम जोरी ।
 मातु मनावैं होहि कृष्णके छोरा छोरी ॥
 जनै पुत्र नित बिप्र कहैं सुनि सकुचे बाला ।
 कृपा कपर्दी करी जन्यो बैदभी लाला ॥
 कामदेव जो प्रथम ही, शंभुकोपतैं जरि गयो ।
 सोई बनि प्रद्युम्न पुनि, प्रथम पुत्र हरिको भयो ॥

शम्बर तिहि रिपु समुझि सूतिकाघरमहँ आयो ।
 शिशुकूँ करिकैं कपट धाइ बनि घरतैं लायो ॥
 फँक्यो सागर बत्स मत्स्यने निगल्यो जीवित ।
 मछुआ ताहि फँसाइ लै गये शंबरके हित ॥
 निवसति रति शम्बर महल, मत्स्य उदरमहँ मिल्यो पति ।
 नारद मुनि परिचय दयो, पालति पति है मुदित अति ॥

प्रथम कृष्णको ब्याह पुत्र उत्पत्ति सुनाई ।
 मणि स्यमन्तकी कथा सुनो अब अति सुखदाई ॥
 सतभामा अरु जाम्बवती जिह कारन पाई ।
 हरिने लीला लोभ मोहकी दुखद दिखाई ॥
 मन्त्राजित यादव परम, सूर्यभक्त लोभी सरल ।
 है प्रसन्न ताकूँ दई, सूर्य स्यमन्तक मणि अमल ॥

सत्राजित मणि पहिन द्वारकामहँ जब आयौ ।
 समुक्ति सूर्य नर भगे कृष्ण सब भेद बतायौ ॥
 आठ भार नित कनक देहि दुख शोक नसावै ।
 हरि सोचें मणि दिव्य राज-महलनिमें आवै ॥
 माँगी हरि परि नहिँ दई, सत्राजित लोभी परम ।
 लोभ मोहमहँ फँसि पुरुष, खोवै सब गुण निज धरम ॥

सत्राजित लघु बन्धु प्रान सम प्रिय प्रसेन वर ।
 धारि कंठ मणि चलयो करन मृगया लै धनु सर ॥
 बनमहँ पहुँच्यो आइ सिंहने हय संग मार्यो ।
 लै मणि भाग्यो सिंह रीछने ताहि पछार्यो ॥
 जाम्बवान मणि ग्रहण करि, घुस्यो गुफामहँ मुदित मन ।
 जब प्रसेन आयो नहीं, सत्राजित लाग्यो कहन ॥

हरि माँगी मणि नहीं दई भाई मम मार्यो ।
 घर घर फैली बात श्याम मनमाँहिँ बिचार्यो ॥
 मिथ्या लग्यो कलङ्क करूँ हौँ मार्जन अबहीं ।
 संग लिये बहु लोग चले मणि खोजन तबहीं ॥
 हय प्रसेन निरख्यो मृतक, पुनि खोजत आगे गये ।
 मार्यो सिंह लखि पुनि गुहा, देखि रीछकी घुसि गये ॥

अट्टाइस दिन लङ्ग्यो रीछ परि हरि नहिँ हारे ।
 निज स्वामी रघुनाथ समुक्ति पुनि पैर पखारे ॥
 कन्या दई बिबाहि जाम्बवति लै हरि निकसे ।
 बारह दिन लखि बाट श्यामके साथी खिसके ॥
 दुखित द्वारकामहँ सकल, मिलि दुर्गा पूजन करहिँ ।
 जोहत प्रभुकी बाट नित, सत्राजितकूँ संज्ञ शपहिँ ॥



जाम्बवती सँग श्याम निरखि सब लोग सिहाये ।
 पुरवासी यों मुदित मृतक ज्यों घर फिरि आये ॥
 मणिको सुनि सब वृत्त भयो दुःखित सत्राजित ।
 हरि मणि सादर दई लई ताने हूँ लब्जित ॥

सोचत सत्राजित सतत, यह अपयश कैसे सँहूँ ।
 होहि तोष यदि मणि सहित, सतभामा हरिकूँ दऊँ ॥

शतधन्वा संग करी सगाई सतभामाकी ।
 तऊ कृष्णकूँ दई न चिन्ता कीन्हीं ताकी ॥
 तीन ब्याह करि गये बन्धु देखन हथिनापुर ।
 कुन्ती पांडव जरे सुनत पहुँचे तहँ सत्वर ॥
 जानत सब घनश्याम परि, लोक दिखावो करत हैं ।
 नरक्रीड़ा करि सबनिके, चंचल चितकूँ हरत हैं ॥

हथिनापुर बल संग पहुँचि दुख बहुत मनायौ ।
 भीष्म, द्रोण, कृप, बिदुर सबनि प्रति नेह जनायौ ॥
 गान्धारी धृतराष्ट्र नयनतैं नीर बहावैं ।
 बासुदेव ढिँग बैठि तिनहिँ प्रिय कहि समुझावैं ॥
 पृछत सबतैं अज्ञवत्, कैसे पांडव जरि गयें ।
 लोकोचित व्यवहार हित, वहाँ कछुक दिन रहि गये ॥

शतधन्वा इन दुखित श्यामकी करत बुराई ।
 कृष्ण बड़े उड़ण्ड सबनिकी हरत लुगाई ॥
 कृतबर्मा अक्रूर कहें अपमान हमारो ।
 है सत्राजित दुष्ट अधमकूँ सोवत मारो ॥
 सुनि शतधन्वा चलि दयो, हैकें दोउनितैं बिदा ।
 बजै पराई फूँकतैं, शंख और मूरख सदा ॥

नहीं द्वारका श्याम सोचि खल घरमहँ आयौ ।
 सत्राजित सुख सहित सदनमहँ सोवत पायौ ॥
 सिर धड़तैं करि पृथक भग्यो मणि लैकें पापी ।
 सतभामा अति दुखित चित्त चिन्ता बहु ब्यापी ।
 मृतक देह धरि तैलमहँ, रथ चढ़ि हथिनापुर गई ।
 सकल बात अति दुखित है, रोइ रोइ हरितैं कहौ ॥

ऊपरतैं करि शोक द्वारका यदुवर आये ।
 शतधन्वा अति डर्यो तुरत अक्रूर बुलाये ॥
 हरितैं रक्षा करो दीन ह्वै बोल्यो उनतैं ।
 सुनि बोले अक्रूर—बैर को साधै तिनतैं ॥
 खल बोल्यो घबराइके, अच्छा, मणिकूँ तो घरो ।
 हौं भागूँ पुर छोड़ि तुम, सुखतैं मंत्रीपन करो ॥

यों कहि चुपके भग्यो बधिक लोभी खल कामी ।
 हय ताको अति बेगवान् शतयोजनगामी ॥
 हरि बल सँग रथ चढ़े दुष्टको पीछो कीन्हों ।
 भगि मिथिला तक गयो चक्रतैं बध करि दीन्हों ॥
 मिली न मणि बल ढिँग गये, कपट ससुम्नि बल रिस भये ।
 जाइ बसे मिथिलापुरी, श्याम द्वारकाकूँ गये ॥

आइ ससुरको श्राद्ध कइयो बहु विप्र जिमाये ।
 मणि खल कहँ धरि गयो कल्लुक हरिघर खुजवाये ॥
 कृतबर्मा अक्रूर द्वारकातैं सुनि भागे ।
 काशीमहँ अक्रूर नित्य मख करिबे लागे ॥
 देहिं कनकको दान बहु, कहें दानपति सकल मुनि ।
 बुलवाये घनश्याम जब, गये द्वारका तुरत पुनि ॥


हरि कीयो सत्कार प्रेमतैं पास बिठाये ।
 कुशल प्रश्न करि सकल द्वारका वृत्त बताये ॥
 मन्द मन्द मुसकाय पकरि कर करतैं लीन्हों ।
 अति ही नेह जताय अपनपो प्रकटित कीन्हों ॥
 बोले—चाचाजी ! बड़े, बैभवशाली मख करें ।
 तुमही पै मणि स्यमंतक, आपसमहँ हम सब लरें ॥

बन्धु करे' सन्देह लड़े' सब रानी घरमहँ ।
 तुम मणि देहु दिखाय रहे तुमरे ही करमहँ ॥
 हरि आयसु अक्रूर मानि मणि सबहिं दिखाई ।
 सबकी शंका मिटी शान्त सब भई लड़ाई ॥
 मणि दीन्हि अक्रूरकूँ, सोनों सब घर घर बटत ।
 सुखतै' सब यादव रहत, कृष्ण कृष्ण सबई रटत ॥

देख्यो चन्दा चौथ भाद्रपदको श्रीयदुबर ।
 तातै' लग्यो कलङ्क सह्यो सब अपयश श्रीधर ॥
 जो स्यमन्त आख्यान प्रेमतै' सुने' सुनावें ।
 चौथचन्द्रको दोष मिटै सब शोक नसावें ॥
 अपयश अपकीरति बड़ी, दुखदायी अति कष्टप्रद ।
 मिलै शान्ति जा कथातै', अन्त पाहिँ नर परमपद ॥

इति श्रीभागवत चरितके षष्ठाहमें प्रद्युम्नजन्म स्यमन्तकोपाख्यान
 नामक तीसरा अध्याय समाप्त ।


[मासिक परायण--तेईसवें दिनका विश्राम]



अथ चतुर्थोऽध्यायः

[४]

कालिन्दी सँग व्याह कश्यो जैसे श्रीनटवर ।
 सुनो, ताहि अब कहूँ व्याह चौथो अति सुखकर ॥
 इन्द्रप्रस्थ हरि गये भये सब पाँडव राजा ।
 यदुनन्दनकूँ निरखि भयो सब सुखी समाजा ।
 एक दिन यमुना तट गये, मृगया हित कन्या जहाँ ।
 रबितनया हरि बरन हित, करति घोर अति तप तहाँ ॥



कृष्णचन्द्र सर्वज्ञ जानि ताकी अभिलाषा ।
 अर्जुनतै' बुलवाय पूर्ण कीन्हीं तिहि आशा ॥
 रथमहँ संग बिठाय युधिष्ठिरके ढिँग आये ।
 कालिन्दी रबिसुता निरखि सब जन हरषाये ॥
 आइ द्वारकामहँ बरी, भये व्याह यों चार अब ।
 छठे पाँचवें व्याहको, मुनि वरणौ बृत्तान्त सब ॥

देश अवन्ति प्रसिद्ध भूप जयसेन वहाँके ।
 परम रम्य बन, नगर, शैल, सर, दुर्ग तहाँके ॥
 हरि फूआको व्याह भयो जयसेन नृपतितै' ।
 बिन्द और अनुबिन्द भये द्वै खल सुत तिनतै' ॥
 सुता मित्रबिन्दा हती, सो हरि मनपै चढ़ि गई ।
 किन्तु सुयोधन मानि सिख, भाइनि नाहीं करि दर्ई ।

गये स्वयम्बरमाँहिं डरयो सुनिकें दुरजोधन ।
 कन्या लै हरि भगै लखे' बिस्मित है नृप जन ॥
 बिधिवत् कश्यो बिवाह भई वो पंचम रानी ।
 ज्यों भद्रा सँग व्याह भयो सो कहूँ कहानी ॥
 भद्रा फूआकी सुता, केकय नृप तनया सुघर ।
 भाइनि दीन्हीं मुदित मन, स्वीकारी तब गदाधर ॥

भयो सातवों व्याह श्याम को सत्या सँगमहँ ॥
 कोशलेशकी सुता सुन्दरी सुविदित जगमहँ ॥
 नृप प्रन कीयो सात बैल जो नाथे भूपति ।
 ताकूँ कन्या देहुँ सुनत तहँ पहुँचे श्रीपति ॥
 प्रन सुनि उतरे फँट कसि, सात रूप हरि धरि लये ।
 हँसत हँसत नाथे वृषभ, निरखि मुदित सब जन भये ॥

हूँ प्रसन्न नृप कश्यो ब्याह सत्याको हरिसँग ।
 पति परमेश्वर पाइ समाई नहिं फूली अँग ॥
 दीयो बहुत दहेज द्वारका चले भुवनपति ।
 पथमहँ नृप बहु मिले करी जिन वृषभनि दुरगति ॥
 भेड़निकूँ ज्यों भेड़िया, छिनमहँ देइ भगाइकें ।
 नृपति भगाये पार्थ त्यों, दिव्य बान बरसाइकें ॥

आये सत्या संग द्वारका यदुनन्दन पुनि ।
 मद्र देशमहँ गये लक्ष्मणा नृप कन्या सुनि ॥
 भयो स्वयम्बर भूप देश देशनिके आये ।
 अनुपम कन्या निरखि नृपतिगन सब ललचाये ॥
 रङ्गभूमि आई लली, जयमाला कर धारि जब ।
 रथमहँ पकरि बिठाइ हरि, भगे निहारें भूप सब ॥

मद्राधिप नृप बृहत्सेन पुनि धन लै धाये ।
 कश्यो लक्ष्मणा ब्याह श्याम सँग मन हरषाये ।
 यों पटरानी आठ ब्याहको वृत्त कह्यो सब ।
 जैसे सोलह सहस बरों सो कथा कहूँ अब ॥
 भौमासुर नृप अति प्रबल, डरपे सुर नर दैत्य सब ।
 स्वर्ग, भूमि, पातालमहँ, करत फिरत उत्पात नब ॥

बरुनदेवकूँ जीति छत्र अरु चँवर उड़ाये ।
 स्वर्गलोकमहँ गयो अदिति कुंडल अपनाये ॥
 मेरुशिखरतैं मणिपर्वत अपने घर लायौ ।
 जहँ जहँ निरखे रत्न छीनिके खल लै आयौ ॥
 सुर सुरपति अति है दुखित, द्वार दयानिधिके गये ।
 कहे सकल खलके चरित, सुनत श्याम सकुचित भये ॥

बोले सब सुनि श्याम—बात सुरपति सब जानी ।
 भौमासुर हूँ गयो दुष्ट अतिशय अभिमानी ॥
 अदिति मानुडिँग जाइ सुखद सन्देश सुनावे ।
 लैकें कुंडल शीघ्र स्वर्गमहँ हमहूँ आवें ॥
 पाइ बचन घनश्यामतैं, सुरपति निजपुर चलि दये ।
 सतभामा सँग गरुड़ चढ़ि, नरकासुर-पुर हरि गये ॥
 गिरि, शर, जल, अरु अनिल, अनल परकोटापुर के ।
 दश सहस्र अति घोर पाश घेरें फिरि मुरके ॥
 श्याम गदा, शर, चक्र सुदर्शनतैं काटे सब ।
 पुरपालक मुर असुर देखि लड़िबे आयो तब ॥
 भये मुरारी मारि मुर, हरि सिर काटैं चक्रतैं ।
 शोभित धड़ पर्वत सरिस, कटे शिखर जनु शक्रतैं ॥
 सुनिकें मुरको मरन असुरगन अति घबड़ाये ।
 ताम्र आदि सुत सात पीठ सँग नरक पठाये ॥
 ते जब सब मरि गये स्थयं भौमासुर आयो ।
 लड़्यो प्रानपन सहित श्याम बल पार न पायो ।
 चक्र सुदर्शनतैं नरक—को सिर काट्यो श्रीहरी ।
 सुनत मरन सुत आइ भू, भेंट लाइ इस्तुति करी ।

भू-विनय

पद

अखिलपति ! अबला अति अकुलावै ।
 शंखचक्रधारी बनमाली, चरन कमल सिर नावै ॥१॥ अखिलपति०
 कमलनयन कमलानन कारक, नाभि कमल उपजावै ।
 कमलमालपद कमलसरिस प्रभु, वेद विदित गुन गावै ॥२॥ अखिल०

त्रिगुन त्रिवेद त्रिदेव त्रिलोकी त्रिभुवन सृष्टि रचावै ।

सर्वतँ अलग व्याप्त सबहीमें, पार न कोई पावै ॥३॥ अखिल०

पुरुष प्रधान, काल, मन, इन्द्रिय, तुम बिनु कछु न लखावै ।

जगत चराचर भ्रमवश तुममें, दीखै नहीं नसावै ॥४॥ अखिल०

शरणागतके सब भ्रम भागें, माया नहिं भरमावै ।

यह भगदत्त शरण तुमरीमें, परि पग बिनय सुनावै ॥५॥ अखिल०

दोहा—सुनि बिनती यदुवर तबहिं, धरनीकूँ दै धीर ।

कृपा करी भगदत्तपै, बोले गिरा गँभीर ।



सोरठा-अवनि ! त्यागि भय, शोक, होहि पौत्र तव भूपवर ।

नरक जाय सुरलोक, होहि अभय भगदत्त अब ॥

छप्पय—अभय दान हरि दयो नरक सुत नृपति बनायो ।

अवनि पुत्र भगदत्त प्रभुहिं निज पुर लै आयो ॥

निरखीं सोरह सहस बन्दिनी कन्या पुरमहँ ।

होवै पति घनश्याम भई इच्छा तिनि उरमहँ ॥

जानि सत्य संकल्प हरि, पठइ द्वारका सब दई ।

मनबांछित ते पाइ बर, अधिक मुदित मनमहँ भई ॥

दैवे कुंडल अदिति स्वर्गमहँ गये मुरारी ।

पाइ श्यामको दरश मातु मन भई सुखारी ॥

सतभामाकूँ पूजि शर्चाने आदर कीन्हों ।

किन्तु मानवी मानि देवद्रुम-सुमन न दीन्हों ॥

समुझि घोर अपमान निज, लै हरि सँग उपबन गई ।

कल्पवृक्ष लखि लैन हित, प्रेम सहित तहँ अड़ि गई ॥

वृक्ष उखाड़यो श्याम गरुड़की पीठि धर्यो जब ।

रक्षक रोवत गये इन्द्रतैं वृत्त कह्यो सब ॥

शची उभारे इन्द्र सेन सजि लड़िबे आये ।

रवि, शशि, यम, अरु, बरुण, देव हरि सकल हराये ॥

अस्त्र-हीन सुरपति भये, भगे भूमि रन छोरिकें ।

सतभामा कटु बचन बहु, कहे हँसी मुँह मोरिकें ॥

अब सब समुझे शक्र सकुच तजि बोले बानी ।

हैं अच्युत अखिलेश आपु हौं अति अभिमानी ॥

माया तुमरी प्रबल भूलिकें उरभूयो स्वामी ।

क्षमा करें अपराध अखिलपति अन्तरयामी ॥

सुनत इन्द्रके बचन मृदु, भये सदय करुणायतन ।

पुर आय सुरद्रुम लिये, थाप्यो सतभामा सदन ॥

पुनि जो सोलह सहस एक सत कन्या आई ।
 बनवाये बहु भवन सकल सुखतैं ठहराई ॥
 विधिवत् करयो विवाह रूप उत्तने धरि लीन्हें ।
 सबकुँ भूषन बसन दास दासी बहु दीन्हें ॥
 भवन भवनमहँ भुवनपति, पृथक पृथक निज तनु धरें ।
 सुखद सरस सुन्दर सतत, क्रीड़ा सबके सँग करें ॥

पूछें शौनक—सूत ! ब्याह हरि बहुत बताये ।
 किन्तु पुत्र कै भये आपुने नाहिँ गिनाये ॥
 हँसिकें बोले सूत—कहाँ तक पूत गिनाऊँ ।
 मुख्य मुख्य जे भये तिनहिँ के नाम बताऊँ ॥
 शौनक बोले—प्रथम तुम, श्रीप्रद्युम्न कहो कथा ।
 शम्बरपुर मायावती, रतिने पाले वे यथा ॥

इति श्रीभागवत चरितके षष्ठाह में श्रीकृष्ण अन्य विवाह
 नामक चौथा अध्याय समाप्त ।

अथ पञ्चमोऽध्यायः


(५)

कहें सूत—सब सूद दयो शिशु रतिकूँ मनहर ।
 निज पतिकूँ पहिचान करे पालन छिपि भीतर ॥
 भये युवक पति सरिस भाव लखि वे घबराये ।
 रतिने तब सब पूर्वजन्मके वृत्त बताये ॥
 रति माया प्रद्युम्नकूँ, दीन्हीं वे निर्भय भये ।
 एक दिन शम्बरतै स्वयं, बिना बात ही भिड़ि गये ॥

कहा सुनी कछु भई युद्धकी नौबत आयी ।
 हूँकें दोऊ कुपित परस्पर गदा चलायी ॥
 पुनि मायातै लड़े असुर नभ गयो उड़ाई ।
 माया कीन्हीं बहुत श्याम सुतकूँ सुधि आई ।
 सत्वमयी माया महा, छोड़ी शम्बर मरि गयो ।
 असुर सकल दुःखित भये, सुरगन हिय अति सुख भयो ॥

मायावति लै संग चले प्रद्युम्न मुदित मन ।
 शोभित नभमहँ मनहुँ दामिनी दमकति सहघन ॥
 पहुँचि द्वारका गये भवन रानी सकुचार्यी ।
 कृष्ण सरिस नर निरखि कामवश भई लजार्यी ॥
 तब आये घनश्याम तहँ, नारदतै सब जानिकें ।
 भई सुखी अति रुक्मिणी, निज सुतकूँ पहिचानिकें ॥

पहिचाने बसुदेव देवकी बल हरि सबने ।
 बन्दन सबको करयो वधू सँग हरिनन्दनने ॥
 छातीतैं चिपटाइ नेह सबने दरसायो ।
 मृतक सरिस सुत पाइ हियो सबको हुलसायो ॥
 बैदर्भीके प्रथम सुत, श्रीप्रद्युम्न कथा कही ।
 अब आठनिके सुतनिकी, सुनहु कथा जो बचि रही ॥



बैदर्भीके पुत्र भये प्रद्युम्न आदि दश ।
 सतभामाने भानु आदि जनि पायो जग यश ॥
 जाम्बवतीने शाम्ब सुमित्रादिक सुत जाये ।
 नाम्नजितीके वीर चन्द बभ्रु आदि सुंहाये ॥
 श्रीकालिन्दीके भये, श्रुत कवि आदिक तनय दश ।
 जनि प्रघोष आदिक तनय, लह्यो लक्ष्मणाने सुयश ॥

बृक, हर्षादिक लाल मित्रबिन्दाने पाये ।
 भद्राने संग्रामजीत दश बेटा जाये ॥
 कहूँ कहाँ तक नाम सत्रनि सुत दश दश मानो ।
 एक लाख इकसठ हजार अस्सी सुत जानो ॥
 भये पुत्र प्रद्यम्नके, श्रीअनिरुद्ध महारथी ।
 रुक्मी जिनके व्याहमहँ, मरे द्यूतके स्वारथी ॥

शौनक पूछें—सूत ! हने रुक्मी च्यौँ बलने ।
 सूत कहें—मुनि ! रच्यो खेल यह काल प्रबलने ॥
 करन व्याह अनिरुद्ध भोजकट आये यादव ।
 रुक्मी पौत्री संग व्याह सम्पन्न भयो जब ॥
 भयो द्यूतको खेल तहँ, बल रुक्मी दलपति भये ।
 रुँगट रुक्मीने करी, कुपित देवबल ह्वै गये ॥

लाल लाल करि आँखि सर्प सम बल फुफकारे ।
 रुक्मी सिरमहँ परिघ जमायो प्राण निकारे ॥
 पुनि कलिङ्ग नृप पकरि तुरत बत्तीसी झारी ।
 जो खल भूपति हँसे सबनिकी दशा बिगारी ॥
 भलो बुरो नहिं हरि कह्यो, शील बन्धु तियको कश्यो ।
 यदुपति सोचत जात मग, भलो भयो सारो मश्यो ॥

यों अनिरुद्ध बिबाह भयो आये निजपुर सब ।
 हरि विनोद ज्यों कश्यो रुक्मिनी संग कहूँ अब ॥
 इक दिन निरखी प्रिया हँसति हरिने ढिँग आवति ।
 पग पगपै जनु सुखद मधुर रस-सो बरसावति ॥
 अलक, पलक, मुख, नासिका, कंठ, जघन, कटिबर, हृदय ।
 चुवत सबनितै मधुर रस, मुख मनहर मुसकानमय ॥


देख प्रियाको रूप हँसीकी हरिकूँ सूझी ।
 मंद मंद मुसकाय पहेली पिछली बूझी ॥
 कहो प्रिये ! च्यों छाँड़ि नृपतिगण मम संग आई ।
 शूरवीर शिशुपाल संग तव भई सगाई ॥
 हम निर्गुण निष्पृह परम, निष्किञ्चन निर्धन निपट ।
 तातैं तजि हमकूँ अबहुँ, जाउ अपर नृपके निकट ॥

सुनि पति-बचन कठोर रुक्मिणी अति घबरायी ।
 मूर्छित है महि गिरी तुरत उठि श्याम उठायी ॥
 प्रेमालिङ्गन कश्यो पौछि मुख केश सम्हारे ।
 पलंग पास बैठाइ मधुर स्वर बचन उचारे ॥
 अरे, प्रिये ! रूठी बृथा' हँसी हँसीमें हौं कही ।
 नरक रूप घरमहँ सरस, है प्रसङ्ग सुखकर जिही ॥

सुनत रुक्मिणी हँसी शोक दुख हियको त्यागो ।
 प्रियको कठिन बिनोद दूध तातो-सो लाग्यो ॥
 बोलीं—तुम अति गुनी निरगुनी हौं हूँ स्वामी ।
 हौं अबला अति अधम आपु अज अन्तर्यामी ॥
 नित नित नूतन नारि हौं, तुम प्रभु पुरुष पुरान हो ।
 ैं तिरिया तिरगुनमयी, आपु अजित भगवान हो ॥

नाशवान नर छाँड़ि बरे तुम अज अबिनाशी ।
 जन्म जन्म हौं रहूँ चरन कमलनिकी दासी ॥
 त्वचा, रोम, नख, केश, मूत्र, मलयुत निन्दत तन ।
 नजि विषयनिकूँ संग लगायो प्रभु चरननि मन ॥
 फरि कबहुँ नहिं कहै, बचन बज्र सम अति कठिन ।
 प्रियको प्रेम लखि, हँसि बोले करुनायतन ॥

मानिनि लीयो मोल प्रेम सेवा करि मोकूँ ।
 नहीं दै सकूँ कछू प्रिये ! बदलेमें तोकूँ ॥
 पौत्र और निज व्याह समय जो धीरज धार्यो ।
 तातैं हौं बनि गयो भामिनी ऋनी तिहारो ॥
 पति पत्नीमहँ प्रेमकी, बात भयी दोऊ मिले ।
 पाइ परसपर परस तनु, उभय हृदय सरसिज खिले ॥
 ऐसे ही इक दिवस सत्यभामा संग नटवर ।
 खेल खेलमहँ कह्यो पुण्य कातिक हरिबासर ॥
 नारदकूँ दै तुलादान सतभामा आई ।
 पूछें निज सौभाग्य भये कस श्याम गुसाई ॥
 बोले हरि—कातिक सदा, अरु व्रत हरिबासर कश्यो ।
 तातैं मम अर्धाङ्गिनी, प्रिया बनी मम मन हर्यो ॥



प्राकृत पुरुष समान सबनिकूँ हरि सम्मानें ।
 तिनकूँ राजकुमारि स्ववश पति नर सम जानें ॥
 औरनिकी का कहें शम्भु ही लड़िबे आये ।
 बाणासुरको पक्ष लयो पीछे पछिताये ॥

शौनक पूछें—सूतजी ! च्यौं हर श्रीहरितैँ लड़े ।
 सूत कहें—मुनि ! भक्त हित, वृषभध्वज प्रभुतैँ भिड़े ॥

इति श्रीभागवत चरितके षष्ठाहमें प्रद्युम्नचरित रुक्मिणी-परिहास
 नामक पञ्चम विश्राम समाप्त ।

अथ षष्ठोऽध्याय

[६]

बैरोचनि शत पुत्र बड़े सबमें बाणासुर ।
 शूरवीर रणधीर दये तिनि हर इच्छित बर ॥
 शोणितपुरमहँ बसें करें हर पुररखवारी ।
 कन्या ताकी परम सुन्दरी ऊषा प्यारी ॥
 तानै इक दिन स्वप्नमहँ, लखे बीर अनिरुद्ध बर ।
 पति समान क्रीड़ा करत, बेधत हियमहँ काम-शर ॥

ऊषा बोली—बहिन ! स्वप्नमहँ नर इक आयो ।
 मन मेरो लै गयो तनिक अधरामृत प्यायो ॥
 जो न मिलै वह बीर धीर हियमहँ नहिं धारूँ ।
 तजूँ प्रान विष खाइ अग्निमहँ तनकूँ जारूँ ॥
 चित्र चित्रलेखा लिखे, नर किन्नर, सुर, असुर बर ।
 लखि यदुवर अनिरुद्धकूँ, बोली—जिह मम चित्तहर ॥

समुक्ति कृष्णको पौत्र चित्रलेखा घबराई ।
 योग शक्तितै उड़ी द्वारका छिनमहँ आई ॥
 देखे श्रीअनिरुद्ध सुखद शैया पर सोवत ।
 शशि सम करत प्रकाश कामिनिनिके मन मोहत ॥
 बिकल प्रियाके प्रेममहँ, लखि बाला बिस्मित भई ।
 शैया सहित उठाइकें, शोणितपुरमहँ लै गई ॥

शोणितपुरमहँ आइ सखीकूँ कुमर दिखायो ।
 कुमरि मुदित अति भई सुघर बर प्रियतम पायो ॥
 खान, पान, स्रक्, धूप, दीपतैं पति सन्माने ।
 ऊषा सँग अनिरुद्ध नहीं दिन बीतत जाने ॥
 गर्भवती ऊषा भई, द्वारपाल सब जानिकें ।
 बाणासुरतैं कह्यो जब, चल्थो असुर सर तानिकें ॥

आइ असुरने लख्यो कुँवरि ढिँग नर इक कारो ।
 अति सुन्दर मनहरन सुघर बर अतिशय प्यारो ॥
 कछुक कहे कटु बचन न यदुबर सुनि घबराये ।
 तबई सैनिक समर साज सजि लड़िबे आये ॥
 लौह परिघ अनिरुद्ध लै, लड़न लगे सैनिक डरे ।
 प्रबल प्रहार न सहि सके, कछु भागे कछु गिरि मरे ॥

महाबली तब बाण कोप करि आयो रनमहँ ।
 करे युद्ध अनिरुद्ध न शंका कीन्हि मनमहँ ॥
 सहसबाहुने नागपाशमहँ बाँधे लाला ।
 पतिको बन्धन निरखि भई अति बिह्वल बाला ॥
 इति नारद द्वारावती, आइ कह्यो वृत्तान्त जब ।
 सुनत कुपित यादव भये, चले सेन सजि तुरत सब ॥

राम, कृष्ण, प्रद्युम्न, साम्ब आदिक सब आये ।
 शोणितपुरकूँ घेरि शंख अरु पणव बजाये ॥
 सुनि पुर-रक्षक शम्भु षडानन सब गन गनपति ।
 करन युद्ध मिलि चले भिड़े रन भयो बिकट अति ॥
 कार्तिकेय प्रद्युम्नतैं, सात्यकि बाणासुर लड़त ।
 भिड़े शम्भु श्रीकृष्णतैं, अद्भुत नरलीला करत ॥

ब्रह्म बायु अरु अनल अस्त्र त्रिपुरांगरी छोड़े ।
 जोड़ तोड़के छोड़ि श्यामने सबही तोड़े ॥
 जम्भणास्त्र हरि छोड़ि लिबाई जमुहाई पुनि ।
 आयौ तबई बाण भगत अपनी सेना सुनि ॥

आइ कृष्णतै भिड़ि गयो, हरि हय सारथि मारिकें ।
 करयो विरथ तब मातु लखि, खड़ी नम्र हूँ आइकें ॥

नम्र नारिकूँ निरखि नयन हरि पीछे फेरे ।
 बाण गये पुरमाँहिँ शम्भु सम्मुख हरि हेरे ॥
 छोड़्यो शिव ज्वर उष्ण शीत ज्वर आइ दबायो ।
 करी कृष्णकी विनय उष्णज्वर पिंड छुड़ायो ॥

बाण आइ हरि सँग लड़्यो, हाइयो सब सेना मरी ।
 कर काटन लागे हरी, आइ शम्भु इस्तुति करी ॥

शिव-स्तुति

पारब्रह्म जगदीस जगत्पति जगनिवास प्रभु ।
 व्यापक नित्य निरीह निरामय निराकार विभु ॥
 नाभि कही आकाश अग्नि मुख वीरज जल है ।
 श्रवण दिशा सिर स्वर्ग पदुम पद ही सब थल है ॥
 सूर्य नेत्र मन चन्द्र अहं शिव जलधि उदर है ।
 औषधि ही सब रोम इन्द्र भुज केशहु घन है ॥
 धर्म हृदय अज बुद्धि उपस्थहु कहे प्रजापति ।
 करन जगत उपकार होहिँ अवतरित रमापति ॥
 आदिपुरुष सरवेश सकल घटके बासी ।
 जग प्रपंचतैं रहित सर्वगत अज अविनासी ॥

जो पाई नरदेह करे तुमरो नहिँ सुमिरन ।
 मायाने वह ठग्यो लगावै नहिँ तव पद मन ॥
 हौँ अज सुर-गन इन्द्र सबनिकेँ तुम हो स्वामी ।
 हो सबके पितु मातु सुहृद सत अन्तर्यामी ॥
 बाणासुर मम भक्त अभय अब जाकूँ दीजै ।
 जानि दासको पौत्र कृपा करुणानिधि कीजै ॥

छप्पय—इस्तुति सुनि हरि हँसे बाणपै दया दिखाई ।
 अजर अमर करि दयो प्रतिज्ञा प्रथम निभाई ॥
 भयो बाणकूँ ज्ञान लाइ वर-बधू दिखाये ।
 पाइ दान सम्मान सकल यादव हरषाये ॥
 हरि हरतै अनुमति लई, पुरी द्वारका चलि दये ।
 बधू सहित अनिरुद्ध लखि, अति प्रसन्न सब जन भये ॥

स्वयं सूत पुनि कहें—चरित नृग नृपति सुनाऊँ ।
 कैसे हरि उद्धार कश्यो सो बृत्त बताऊँ ॥
 यदुकुलके कछु कुमर गये खेलन बनमाँहीं ।
 लगी प्यास इक लख्यो कूप जल तामें नाहीं ॥
 परबत सम गिरगिट पश्यो, ताहि निकारत दयावश ।
 नहिँ निकस्यो तब आइ तहँ, कश्यो प्रकट प्रभु तासु यश ॥

करत कृष्ण कर-परस तुरत सुर तनु सो धार्यो ।
 पूछ्यो परिचय श्याम—कहे हौँ दास तिहारों ॥
 नृप इक्ष्वाकु कुमार नाम नृग मेरो स्वामी ।
 करूँ धेनु नित दान आपु तो अन्तर्यामी ॥
 द्विज गैया इक भूलतैं, दूसर द्विजकूँ हौँ दर्ई ।
 दोऊ द्विज ममढिँग लड़े, तातैं मम दुर्गति भई ॥



मश्यो तुरत यमसदन गयो यम पूछ्यो हँसि तब ।
 पाप पुण्यमहँ प्रथम आपु भोगिङ्गे का अब ॥
 प्रथम पाप हौँ कह्यो मिल्यो गिरगिट तनु तबई ।
 प्रभुपद परसत नस्यो पाप जग-बन्धन अबई ॥

यों कहि हरि अनुमति लई, दिव्य लोककूँ नृग गये ।
 तब हरिने यदुबरनिकूँ, सदुपदेश सुखकर दये ॥

यादव ! कबहूँ भूलि बिप्रको धन मत खाओ ।
जो नहिँ मानो सीख अवसि नरकनिमहँ जाओ ॥
अहिफन, पारो भक्ति हलाहल बिषहु पचावें ।
किन्तु न द्विजधन पचै खाय दुख अधिक उठावें ॥

यों सबकूँ उपदेश करि, गये सबनिसँग श्याम पुर ।
इत इच्छा ब्रज-गमनकी, उपजी श्रीबलदेव उर ॥

इति श्रीभागवत चरितके षष्ठाह में हारहरं संमर नृगोद्धार
नामक छठवाँ अध्याय समाप्त ।

अथ सप्तमोऽध्यायः

(७)

रथ चढ़ि ब्रजमहँ गये सुनत ब्रजवासी धाये ।
मिले ललकि जनु प्रान मृतक तनमहँ पुनि आये ॥
सिर सूँघत पितु मातु और सब हिये लगावें ।
करि करि पिछली याद नयनतैं नीर बहावें ॥
प्रणय कोपयुत सब सखी, व्यंग वचन पुनि पुनि कहें ।
कहो निगोड़े श्याम अब, रानिनि सँग सुखतैं रहें ॥

जिन हित हम पितु, मातु, स्वजन, परिजन सब त्यागे ।
रुन समान ते तोरि नेह हमकूँ तजि भागे ॥
कपट प्रेमको जाल रच्यो हम मृगीं फँसाई ।
कैसे तिनि को तहाँ करति विश्वास लुगाई ॥
प्रेम कोपमहँ भरि कहति, सबहिं श्याम रँगमहँ रँगों ।
हरि चितवनि बोलनि चलनि, सुमिरि सुमिरि रोवन लगीं ॥

समुझाई बलदेव करीं क्रीड़ा तिनि सँगमहँ ।
मधु माधव द्वै मास सबनि लै बिहरहिँ बनमहँ ॥
कालिन्दी इक दिवस करन जलकेलि बुलाई ।
किन्तु समुझि उन्मत्त न तिनके ढिँग सो आई ॥
संकर्षण अति कोप करि, हलतैं खँचीं तानिकें ।
बरीं तुरत चरननि परीं, आई लोहो मानिकें ॥

क्षमा करीं पुनि सखिनि सहित सुखतैं बल न्हयै ।
 उलचि उलचि जल प्रचुर परस्पर अङ्ग भिगाये ॥
 ब्रज बनितनिको मान करें सुख सबकूँ देवै ।
 पलक नयन कर देह सरिस ते तिनकूँ सेवै ॥
 नन्दगाँव बल निवसि इत, करत सतत क्रीड़ा मधुर ।
 उत द्वारावति कृष्ण ढिँग, पौडूक पठयो दूत वर ॥

दूत कहे—कारुष नृपति सन्देश पठायो ।
 बासुदेव हौं एक भार भू हरिबे आयो ॥
 बासुदेव तू बनै चिह्न सब धारे मेरे ।
 तजे नाम नहिँ करूँ दाँत खट्टे हौं तेरे ॥
 पौण्ड्रकको सन्देश सुनि, श्याम हँसे सब हँसि गये ।
 रथ चढ़ि लड़िबे ढीठतैं, पुर कुरुषकूँ चलि दये ॥

रत्न हित हरि नृप लखे सेन सजि सम्मुख आयो ।
 धारि शङ्ख चक्रादि विष्णु सम रूप बनायो ॥
 लखिके भाँड़ समान हँसे हरि खल ललकाइयो ।
 कीन्हों कछु दिन युद्ध अन्तमहँ ताकूँ माइयो ॥
 काशिराज आयो लड़न, तासु काटि सिर श्यामघन ।
 फेंक्यो सो काशी पश्यो, लखि रोवत सुत प्रजाजन ॥

यों दोउनकी करी मुक्ति हरि आये निज पुर ।
 इत पितु-बधतैं दुखी काशि नृप-सुत सोचत उर ॥
 पितु-बध बदलौ लेउँ कृष्ण पुरसहित जराऊँ ।
 शिव आराधन करूँ मनोबांछित फल पाऊँ ॥
 करत सुदक्षिण शैव मख, प्रकटित कृत्यान्तल भई ।
 करन भस्म हरि द्वारका, कूँ कृत्या गर्जत गई ॥

कृत्याकूँ लखि डरे द्वारकावासी सब जन ।
 छोड़ि चक्र हरि दाह करायो नगर सुदक्षिण ॥
 पुर, द्विज, कृत्या, नृपति दग्ध करि सबनि अस्त्र हरि ।
 आयो द्वारावती निमिषमहँ सब कारज करि ॥
 काशिराजके दाहकी, कही कथा शुकदेवने ।
 सुनो द्विबिद बानर चरित, ज्यों माख्यो बलदेवने ॥

त्रेतायुगको द्विबिद बली बानर चंचल अति ।
 नरकासुरको मित्र संगतैं भई दुष्ट मति ॥
 कृष्णमित्रध्रुकु मानि लैन बदलो खल आयो ।
 जारे घर, पुर, गाँव दुष्ट अति दुंदु मचायो ॥
 इक दिन गिरि रैबतकपै, बलदाऊ मदपान करि ।
 हँसत हँसावत प्रेमतैं, बिहरत बनितनिकूँ पकरि ॥

तहाँ द्विबिदने आइ करी अत्रिनय घट फोड़्यो ।
 हल मूसल बल लयो मारि बानर सिर तोड़्यो ॥
 कपि तरु फेंकत काटि देहिँ बल खल घबरायो ।
 द्वन्द युद्ध पुनि कश्यो पकरि बल गरौ दबायो ॥
 हुच्च हुच्च करिवे लग्यो, मरि धड़ाम धरनी गिर्यो ।
 साधु साधु सुर मुनि कहत, सबने बल आदर कश्यो ॥

अपर चरित बल सुनो कश्यो हथिनापुर जाई ।
 जाम्बवती-सुत शाम्ब सुयोधन सुता उड़ाई ॥
 गही स्वयम्बरमाँहिँ चलयो घेस्यो कौरव पुनि ।
 पकरि बन्द करि दयो भये क्रोधित यादव सुनि ॥
 करिवे बीच बचाव बल, हथिनापुरकूँ चलि दये ।
 संकर्षण सन्देह सुनि, कौरव अति क्रोधित भये ॥

बल बोले—सब सुनो, शान्तिके हित हौं आयो ।
 उपसेन भूपाल—अधिपने मोइ पठायो ॥
 आज्ञा तुमकूँ दई शाम्बकूँ छोड़ो अब तुम ।
 कौरव यादव एक रहैं चाहत यह सब हम ॥
 भूल समुक्ति माँगो क्षमा, बिगरी फिरि बनि जायगी ।
 तुरत पठावो बर बधू, नहीं बात बढ़ि जायगी ॥
 सुनिकें कौरव कुपित भये बोले यादव सब ।
 भूपति बनिक्कें पतित देहिं हमकूँ आयसु अब ॥
 नाच भगोड़े फिरें नेक नहिँ इनकूँ लाजा ।
 मारे मारे फिरत भये अब माठू राजा ॥
 हमने ही ऊँचे करे, संग विठाइ खवाइकें ।
 सत्य कहत मुनि विष बढ़त, पय पन्नगनि पिआइकें ॥
 यौ कौरव कटु वचन कहत निज नगर सिधारे ।
 हल मूसल ह्वै कुपित तुरत बलदेव निकारे ॥
 मारी हलकी फार उभाइयो सब हथिनापुर ।
 तरनी सम डगमगे नगर भय व्याप्यो सब उर ॥
 कौरव कुल, धन, कुटुम्बको, सब मद तजि सूधे भये ।
 तुरत साम्ब अरु बधू लै, बलदाऊके ढिँग गये ॥
 हाथ जोरिकें कहें—प्रभो ! हम अति अभिमानी ।
 आपु अनादि अनंत शेष समुक्कें मुनि ज्ञानी ॥
 भूल चूककूँ भूलि करे अब अभय अखिलपति ।
 साम्ब बधूसंग खड़े देहिँ हरषित आशिष अति ॥
 विनय सुनत कौरव अभय, करे मुदित पुनि पुर गये ।
 संकर्षणकी बिजय सुनि, यादव आनन्दित भये ॥
 इति श्रीभागवत चरितके षष्ठाहमें बलदेवचरित नामक
 सप्तम अध्याय समाप्त ।

अथ अष्टमोऽध्यायः

(८)

बसहिँ द्वारका श्याम सबहिँ रानिनि संतोषें ।
 सबके पुत्रनि प्रेम सहित नित 'पालें पोषें ॥
 नारद मन संदेह भयो हरि अति अलबेले ।
 रानी सोलह सहस किन्तु हैं आपु अकेले ॥
 एक नारि मैंने बरी, भयो कछुक दिनमहँ बिरत ।
 इतनिनिकूँ सन्तुष्ट, करि, कैसे यदुनन्दन रमत ॥

इच्छा मनमहँ भई लखूँ गृहचरिया हारिकी ।
 देखें चलिकें हृदय भावना सब नारिनिकी ॥
 सोचि द्वारका चले घुसे पहिले इक घरमहँ ।
 प्रियासंग हरि हँसत लसत बनमाला उरमहँ ॥
 नारद लखि ठाढ़े भये, बैठाये सतकार करि ।
 करि इत उत्त दूसर महल, गये तहाँ हू लखे हरि ॥

तहँ देखे घनश्याम प्रियासँग चौसर खेलत ।
 देखि दाव निज हँसत प्रियाकूँ करते' ठेलत ॥
 नारद निरखे अतिथि कहें अनजान सरिस हरि ।
 करे कृतारथ देव ! दये शुभ दरश दया करि ॥
 करि पूजा मिष्ठान्न अति, अधिक खवायो पेट भरि ।
 तुरत तहाँतँ चलि दये, नारद दंड प्रनाम करि ॥

अपर भवन ऋषि गये तत्राँ शिशु श्याम खिलावत ।
 कानावाती कुरु करेँ हँसि तिन्हें हँसावत ॥
 आटे बाटे खेल गुलगुली चपत लगावें ।
 गोदीमें बैठाइ चूमि मुख हिय चिपटावें ॥
 द्विज लखि शिशु दुलहिनि दये, बैठाये पग धोइकें ।
 रसगुल्ला आगे धरे, हँसे बिप्र मुख जोइकें ॥
 खाइ भगे ऋषि तुरत न अब फिरि सम्मुख आवें ।
 लखि चुपके हरि कृत्य अपर घरमहँ भगि जावें ॥
 कहूँ निहारे' न्हात खात कहूँ हवन करत हैं ।
 कहूँ प्रियनि सँग हँसें कहूँ द्विज चरन परत हैं ॥
 कहूँ करहिँ सन्ध्या हवन, कहूँ दान व्रत हवन जप ।
 कहूँ श्राद्ध तर्पन क्रिया, कहूँ बेद बिधि यज्ञ तप ॥
 हरि कहूँ गर्भाधान आदि संस्कार करावें ।
 जात कर्म पुंसवन कहूँ शिशु नाम धरावें ॥
 कहूँ मुण्डन उपनयन कहूँपै ब्याह रचावें ।
 कहूँ पुत्रिनि करि ब्याह पतिव्रत पाठ पढ़ावें ॥
 घर घरमहँ नटवर लखे, नरलीला बिधिवत् करत ।
 नारद अति बिस्मय सहित, इततें उत छिपि छिपि फिरत ॥
 इतनेमहँ इक नारि लखी अतिशय सुकुमारी ।
 रुनुमुनु रुनुमुनु करत फिरत ऋषि दौरि निहारी ॥
 कहैं पैर परि—प्रभो ! नारि च्यौ रूप बनायो ।
 हरि हँसि बोले—पुत्र तोइ निज खेल दिखायो ॥
 बेटा ! रक्षा धर्मकी, सहित योगमाया करूँ ।
 निज दासनिको शोक भय, भ्रम माया सबई हरूँ ॥
 इति श्रीभागवतचरितके षष्ठाहमें हरिगार्हस्थदर्शन नामक
 आठवाँ अध्याय समाप्त ।

४८ (मासिक पारायण—चौबीसवें दिवसका विश्राम)

अथ नवमोऽध्यायः

[६]

यों नारद हरि चरित निरखि है मुदित गये पुनि ।
 अब दिनचर्या कृष्णचन्द्रकी शौनक मुनि सुनि ॥
 हरि अति तरकें उठें धोइ मुख ध्यान लगावें ।
 न्हावें सन्ध्या हवन करे पुनि धेनु मँगावें ॥
 पितर देव पुनि पूजिकें, करे दान बहु धेनु नित ।
 जाइ सुधरमा सभामहँ, रथ चढ़ि उद्धवके सहित ॥

सिंहासन अति सुखद नृपतिके निकट विराजें ।
 जनु यादव नक्षत्र मध्य शशि सम हरि भ्राजें ॥
 इक दिन बैठे सभामाँहिँ तहँ नर इक आयो ।
 जरासन्धतैं दुखित नृपति सन्देश सुनायो ॥
 शरनागत रक्षक बिभो, बन्दी हम खलने करे ।
 प्रभु अनाथके नाथ हैं, कारागृहमहँ हम परे ॥

भक्तबल्लल भगवान् सबनिकी बिपदा टारो ।
 फँसे फंदमहँ प्रभो ! कृपा करि हमें उबारो ॥
 भयो दूत कहि मौन तबहिँ नारद मुनि आये ।
 करि स्वागत सत्कार श्याम मुनि निकट बिठाये ॥
 बोले—मुनि करुनायतन ! धर्मराज दरशन चहत ।
 राजसूय मख करन हित, लग्यो चित्त तिनको सतत ॥

इत शरणागत काज सुहृद मख इच्छा जानी ।
 बोले श्रीघनश्याम मधुर मायायुत बानी ॥
 दुबिधामहँ परि गये प्रथम हम कितकूँ जावें ।
 यादव रनकूँ कहें मुख्य मुनि मखहिँ बतावें ॥
 उद्धवजी अब पञ्च हैं, ये ही दुबिधा हरिज्जे ।
 ये निर्णय जैसे करें, तैसो ही हम करिज्जे ॥

उद्धव मुनि हरि बचन सकुचिकें बोले बानी ।
 हैं स्वामी सरबज्ञ कहूँ का हौं अज्ञानी ॥
 परि आयसु सिर धारि कहूँ मुनि बचन निभाओ ।
 इन्द्रप्रस्थमहँ प्रथम युधिष्ठिर मख हित जाओ ॥
 शरणागत रक्षा परम, धर्म कह्यो मख मुख्य अति ।
 तहाँ काज दोऊ बनें, कहूँ सुनो हे जगत्पति ॥

जरासन्ध अति बली ताहि को रनमहँ मारे ।
 बिना दिग्विजय राजसूय व्रतकूँ को धारे ॥
 प्रथम पहुँचि मखमाँहिँ भीम अरजुन संग लावें ।
 बिप्र बेष धरि द्वन्द युद्धकी भीख मँगावें ॥
 यह खल छल हीतैं मरै, प्रभुने तो बहु छल करे ।
 उद्धव सम्मति सुनि सकल, साधु साधु कहिँ हँसि परे ॥

इन्द्रप्रस्थकूँ चले प्रथम निश्चय करि हरि तब ।
 आयसु सबकूँ दर्ई चले हरषित द्वैकें सब ॥
 रानी सोलह सहस पाइ पति अनुमति आई ।
 सजि बजि शिविकनि चढ़ी अधिक मनमाँहिँ सिहाई ॥
 चले मङ्ग नट नर्तकी, पथमहँ नित नाटक करत ।
 सेवक सैनिक अश्व गज, रथ चढ़ि कछु पैदल चलत ॥

करे पार आनर्त, मत्स्य, मरु देश सुघर वर ॥
 लाँघि नदी, नद नगर-निकट पहुँचे पाँडवपुर ॥
 मुन्यो श्याम आगमन पाण्डु-सुत अति हरषाये ।
 करिबे स्वागत संकल नगरतैं बाहर आये ॥
 धरमराज पग परनहित, इत हरि दौरे ललकिरैं ।
 हिय चिपटाये युधिष्ठिर, बाहु पाशमहँ जकरिैं ॥

नयननि नीर बहाइ न्हावाये बख्ख भिगोये ।
 तनु पुलकित चित मुदित भश्योहिय पुनिपुनि रोये ।
 पुनि प्रभु सबतैं मिले प्रेम अतिशय प्रकटायो ।
 अति बिह्वल सब भये मनुज तनुको फल पायो ॥
 करि स्वागत सम्मान अति, चली सवारी श्यामकी ।
 चढ़ि छज्जनि नारी लखैं, शोभा शोभाधामकी ॥

महलनि पहुँचे श्याम पैर कुन्तीके पकरत ।
 लीये हिये लगाय सुभद्रा कृष्णा रोवत ॥
 सबकी पूछी कुशल शिशुनिकूँ आशिष दीन्हैं ।
 प्रभु पत्निनि गृह लाइ द्रौपदी पूजा कीन्हैं ॥
 यों अति ई सम्मानयुत, इन्द्रप्रस्थमहँ प्रभु रहत ।
 अरजुनके सँग सरस शुभ, सुखप्रद नित क्रीड़ा करत ॥

धरमराज इक दिवस सभामहँ बैठे सब सँग ।
 शोभा लखि घनश्याम होहिं पुलकित सब अँग अँग ॥
 बोले—हम हरि ! राजसूय मख करिकैं तुमकुँ ।
 पूज्यो चाहैं विश्वनाथ ! अपनावैं हमकुँ ॥
 अति प्रसन्न सुनि हरि भये, बोले—यह सङ्कल्प वर ।
 राजसूयमें तृप्त सब, होहिं बिप्र, सुर, पितर, नर ॥

अच्युत अनुमति पाइ बन्धु दिग्विजय करन हित ।
 पठये चारिहु दिशनि गये सेना सँग उत इत ॥
 सब नृप जीते किन्तु न जीतयो जरासन्ध जब ।
 उद्धवजीकी युक्ति बताई बासुदेव तब ॥
 हरि बहुविधि समुझाईके, धरमराज सहमत किये ।
 संग भीम अरजुन लिये, गिरित्रजकूँ सब चलि दिये ॥

माला चन्दन धारि कपट द्विज वेष बनायो ।
 मगध देशमहँ पहुँचि अलख नृप द्वार जगायो ॥
 जरासन्ध अति बिप्र-भक्त सेवक अतिथिनिको ।
 अतिथि योग्य अति समुझि कियो बहु आदर इनिको ॥
 छलिया कपटी कृष्णने, मगधेश्वरकूँ ठगि लयो ।
 द्वन्द्वयुद्धको बर लह्यो, तब अपनो परिचय दयो ॥

बोले श्री भगवान—भीम नृप ! इनकूँ जानों ।
 दूसर इनके बन्धु बीर अरजुन लघु मानों ॥
 हे मामाके ससुर ! औरका बात बताऊँ ।
 मैं तुमरो हूँ शत्रु कृष्ण कंसारि कहाऊँ ॥
 नृप हँसि बोल्यो—भगोड़े ! द्वन्द्व युद्ध का करेगो ।
 इन निरबल छोरनि सहित, बिना मौति तू मरेगो ॥

है तू तो अति भीरु हीनबल अरजुन छोडो ।
 भीम संग लड़ि लेउँ तुल्य बल मम सम मोटो ॥
 हरि बोले—अब भूप ! होहि रन देर न लाओ ।
 सम्बन्धनि ढिँग जाय भेंट अन्तिम करि आओ ॥
 जरासन्ध सुनि मुदित मन, गदा युद्ध हित कर लई ।
 पुर बाहर रन थल बन्यो, एक भीमहूँ कूँ दई ॥

भिड़ें मेषतैं मेष साँड़तैं साँड़ लड़ैं ज्यों ।
 द्वै द्विप है मदमत्त लड़ैं बर बीर उभय त्यों ॥
 दाव पेच करि उभय प्रकरषन अरु अनुकरषन ।
 आकरषन करि लड़ैं करें पुनि प्रबल बिकरषन ॥
 यों सत्ताइस दिन लड़े, कहे भीम—हे कृपानिधि ।
 हौं हताश यह रिपु प्रबल, जीत्यो जावै कौन बिधि ॥

कहैं कृष्ण—यह जुरयो मध्यतैं जाकूँ फारौ ।
 पैर पकरिकें चीरि बीचतैं रिपुकूँ डारौ ॥
 गये लड़न पुनि भीम कृष्णकी बात भुलाई ।
 छलियाने तृन फारि भीमकूँ सुरति कराई ॥
 तुरत भीम बलभीमने, पकरि शत्रुको पग लयो ।
 एक दबायो पग पकरि, एक करनितैं कसि गह्यो ॥

दयो बीचतैं फारि फरं टुकड़ा द्वै कीये ।
 तुरत दौरिके श्याम पकरि कुन्तीसुत लीये ॥
 लीये हिये लगाइ बधाई भाई दीन्हों ।
 कहैं—कृतारथ कोखि मातु कुन्तीकी कीन्हों ॥
 जरासन्ध-सत आइकें, प्रभु पैरनिमहँ परि गयो ।
 कश्यो प्यार सन्तोष दै, राजतिलक ताकौ कियो ॥

मगधेश्वर सहदेव कश्यो पितु काज कराये ।
 चढ़ि रथ काराबासमाँहिँ बन्दिनि ढिँग आये ॥
 बन्दी भूपति दुखित सतत प्रभु पन्थ निहारें ।
 कब भयभञ्जन श्याम आइकें हमहिँ उबारें ॥
 तबहीं निरखे भयहरन, कमलनयन प्रभु मन हरत ।
 कमल सरिस पग, कर, बदन, शीश मुकुट मिलमिल करत ॥

निरखे नयनानंद निरामय नटवर नरपति ।
 भगी विपति भय भग्यो भये आनंदित सब अति ॥
 पुनि पुनि दरशन करे' होहि संतोष न मनमहँ ।
 बहँ निरन्तर नयन पुलक होवै सब तनमहँ ॥
 दंड सरिस परि भूमिपै, पुनि पुनि प्रभु पैरनि परे' ।
 अञ्जलि बाँधे' विनय युत, गद्गद स्वर इस्तुति करे' ॥

राजाओंकी स्तुति

देवदेवेश्वर शोभाधाम । करे' रक्षा नटवर धनश्याम ।
 यह संसार अपार अति, करे' कृपानिधि पार ।
 तजि जगके नाते सकल, आये तुमरे द्वार ॥
 विपति भयभंजन तुमरो नाम ॥१॥ करे' रक्षा०
 धन जन बल सरबसु समुक्ति, भजहिं तुमहिं सुख रूप ।
 धनमदमें मदमत्त हैं, कहँ अकरि हम भूप ॥
 भयो मद चूर श्याम अभिराम ॥२॥ करे' रक्षा०
 वासुदेव हरि कृष्ण विभु, प्रणतपाल जगदीश ।
 कृपा कृपामय करे' अब, हे गोविंद गोपीश ॥
 परमप्रिय पदुमनि माँहि प्रनाम ॥३॥ करे' रक्षा०
 समुक्ति तुमहिं सरबस्व सत, करे' नाम नित गान ।
 बली धनी गुनवान हम, अब न होहि अभिमान ॥
 करे' सब तुमरे ही हित काम ॥४॥ करे' रक्षा०
 छप्पय—हरि दरशनतैं मोद भयो मन प्रमुदित अतिशय ।
 करि इस्तुति बहु भाँति करे' सब मिलिके' जय जय ॥
 शरनागत प्रतिपाल कृपा भूपनिपै कीन्हीं ।
 करि सबको सम्मान सुखद शिक्षा शुभ दीन्हीं ॥
 जाओ निज निज नगरकू, रटन नामकी नित करो ।
 त्यागि मान, मद, मोह नितै, भजहु मोहि तो भव तरो ॥

अब तुम सुखतै सकल जाउ अपने अपने पुर ।
 धारो श्रद्धा सहित मूर्ति मेरी अपने उर ॥
 धर्मराज मख करहिँ आइ तुम सेवा करिके ।
 द्रव्य सफल निज करहु भेंट बहु आगे धरिके ॥
 तब सबकुँ सहदेवने, असन बसन बाहन दये ।
 प्रभु आयसु स्वीकार करि, सब निज निज नगरनि गये ॥

यों रिपुकूँ मरबाइ भूप बन्दी छुड़वाये ।
 ह्वै सम्मानित श्याम भीम जय सँग पुर आये ॥
 इन्द्रप्रस्थ ढिँग आइ सबनि निज शंख बजाये ।
 लोग सुनत शुभ शङ्ख बिजय समुक्ती हरषाये ॥
 धरमराज धुनि मुनि मुदित, भये लखे जय भीम हरि ।
 अरघ अश्रु दै दौरिके, मिले श्यामतै अंक भरि ॥

इति श्रीभागवत चरितके षष्ठाहमें जरासन्धवध
 नामक नवम अध्याय समाप्त ।

[पाक्षिक पारायण—द्वादश दिवस विश्राम]

अथ दशमोऽध्यायः

[१०]

जरासन्ध-बध वृत्त सुनत नयननि जल छाये ।
 नृपति भये अति दीन बिनययुत बचन सुनाये ॥
 प्रभो ! आपु ई राजसूयकी दीक्षा लेवें ।
 अथवा सेवक समुक्ति दासकूँ आयसु देवें ॥
 बोले हरि—कुरुकुलतिलक ! राजसूय मख करहु तुम ।
 भरे कोष जीते नृपति, सम्मुख सेवक सकल हम ॥

हरि आयसु सिर धारि यज्ञके ठाठ रचाये ।
 करमकांडमहँ कुशल बेदविद विप्र बुलाये ॥
 सुनत, कण्व, त्रित, कवस, असित, कलु, पैल, पराशर ।
 गौतम, अत्रि, बसिष्ठ, राम आदिक सब मुनिवर ॥
 आये मखमहँ मुदित मन, अति स्वांगत सबको कश्यो ।
 चरन पखारत प्रभुहिँ लखि, नयन नीर सबके भश्यो ॥

धूम धाम अति मची—लेहु धन भोजन पाओ ।
 मनमाने धन रतन बाँधिके घर लै जाओ ॥
 कहें नारि नर—यज्ञ न ऐसो देख्यो कबहूँ ।
 जल सम बरसत कनक चुकत नहिँ तनिकहु तबहूँ ॥
 परब सोमरस-पान दिन, करि याजक पूजन नृपति ।
 प्रथम सभासद पूज्यको, जामें मच्यो विवाद अति ॥

बोले उठि सहदेव—सभामहँ स्याम बिराजें ।
 नभमहँ उडुगन मध्य शरद शशि सम हरि आजें ॥
 ये ही जगके पूज्य प्रथम पूजा अधिकारी ।
 अखिल भुवनपति सकल चराचरके दुखहारी ॥
 कश्यो समरथन पितामह, साधु साधु सब ई कहत ।
 धरमराजके प्रेमबस, नेह नीर नयननि भरत ॥

पांडव कृष्णा सहित सुनत अति भये सुखारे ।
 पूजन प्रभुको कश्यो प्रेमतैं पाद पखारे ॥
 पूजाविधि सब भूलि करें कछु कछु बतावें ।
 कहि न सकें कछु बात कँपें कर हिय हुलसावें ॥
 प्रभुपूजा शिशुपाल लखि, बोल्यो—कृष्ण अयोग्य अति ।
 जाति बरन कुलतैं रहित, कपटी कायर मंदमति ॥

जनमभूमि तजि भग्यो ठग्यो मगधेश्वर छलतैं ।
 कोई जीत्यो नहीं भूमिपति जाने बलतैं ॥
 क्षत्रिय कुलतैं हीन दीन अति जाकूँ प्यारे ।
 धनी न मानी जाहि, निहारें वैभव वारे ॥
 अंडबंड बहु काल तक, बकत रह्यो शिशुपाल जब ।
 दौरे पांडव हनन हित, रोकि कहें घनश्याम तब ॥

बूआ मेरी श्रुतश्रवाको सुत यह पापी ।
 तीन नयन भुज चारि सहित जनम्यो संतापी ॥
 तब नभबानी भई गोद जाकीमहँ जावै ।
 गिरें नयन कर वही जाहि परलोक पठावै ॥
 मेरी गोदीमहँ गिरे, करी विनय बूआ बहुत ।
 दयो ताहि बर दयाबश, क्षमा करहुँ अपराध शत ॥

तबतैं हौं गिनि रह्यो भये अपराध अधिक शत ।
 अब हौं मारुं जाइ होहि जामें सबको हित ॥
 यों कहिकें घनश्याम सुदरशन चक्र चलायौ ।
 करि घड़तैं सिर पृथक सभामहँ काटि गिरायौ ॥
 तेज निकसि शिशुपाल तन, तैं हरि तनमहँ मिलि गयौ ।
 तीन जनममहँ द्वेषतैं, भजि पुनि प्रभु पार्षद भयौ ॥

चेदिराज बलि चढ़ी भयो मख पूरो तबहौं ।
 पाइ मान सन्तुष्ट भये आगत नृप सबहौं ॥
 दई दक्षिना विपुल कनक धन रतन लुटाये ।
 सब सुर नर गन्धर्व निरखि मख परम सिंहाये ॥
 पूरन मख करि हरि सहित, धरमराज अति मुदित मन ।
 संग लिए नर नारि सब, चले न्हान अवभृत करन ॥

गंगार्जीपै जाय न्हान की धूम मचाई ।
 धेरे रानिनि श्याम उलचि जल देह भिगाई ॥
 पिचकारी प्रभु मारि करें ब्याकुल नारिनिकूँ ।
 हँसैं हँसावैं पकरि डुबावैं सब साथिनिकूँ ॥
 रानिनि संग होरी करत, मलत मुखनि केशरि ललित ।
 सुमन गिरत शिर कच खुलत, कृष्ण कलित क्रीड़ा करत ॥

करि अवभृत इस्तान नृपति निज निज पुर गमने ।
 सुहृद बिछोहो निरखि धरमसुत भये अनमने ॥
 रहे प्रेममश श्याम सुयोधन ठहर्यौ कछु दिन ।
 लखि पांडव धन बिभव तासु हिय जरत छिनहि छिन ॥
 एक दिवस मयसभामहँ, जल थल भ्रम ताकूँ भयौ ।
 थलकूँ जल लखि मोह बश, पग रपट्यो पुनि गिरि गयौ ॥

लखि पांडव नृप हँसे धरमसुत बहुत निबारे ।
 किन्तु कौतुकी कृष्ण सैनमहँ सबहिँ उभारे ॥
 दुरजोधन अति दुखी भयो खीज्यो खिसयायो ।
 सबहिँ व्यंगतैं कहें—अंधने अंधो जायो ॥
 भयो क्रोध में चलि दयो, हथिनापुरमहँ आइकें ।
 छलें पांडवनि द्यूतमहँ, सोचै गुट्ट बनाइकें ॥

इति श्रीभागवत चरितके षष्ठाहमें धर्मराज राजसूययज्ञ नामक
 दशम अध्याय समाप्त



अथ एकादशोऽध्यायः

[११]

इत यदुबरतै रहित द्वारका शाल्व निहारी ।
चढ़िकें सौभ बिमान लड़ाई कीन्हीं भारी ॥
करत नगर बिध्वंस लड़ाई नहिं हारत अघमति ।
यादव बंश बिनाश हेतु तप कीन्हीं खल अति ॥
औघरदानी शम्भुने, इच्छित फल ताकूँ दयो ।
बायुयान बर मय-रचित, पाइ मत्त दुरमति भयो ॥

इन्द्रप्रस्थ प्रभु गये द्वारकापै चढ़ि आयौ ।
लैकें सौभ बिमान नगरमहँ दुन्द मचायौ ॥
अख शख बरसाइ तुरत नभमहँ छिपि जावै ।
जलमहँ उत्तरै फेरि सतत गोला बरसावै ॥
हरिनन्दन प्रद्युम्न तब, सजि सेना रिपु दलनहित ।
चले संग यादव सुभट, भये सौभ लखि चकित चित ॥

डरे नहीं प्रद्युम्न प्रथम रिपु मायानाशी ।
छोड़े अगनित बान कृष्णनन्दन सुखराशी ॥
कीयो मूर्छित शाल्व सचिव ताको पुनि आयो ।
देख्यो आवत शत्रु तबहिं रथ तुरत घुमायो ॥
सहसा श्रीप्रद्युम्न हिय, गदा मारि गरज्यो सचिव ।
बज्र सरिस हियमहँ लगी, दुखी सारथी भयो तब ॥

लै रथ रनतैं भग्यो चेत हरि-सुतकूँ आयौ ।
 युद्ध पलायन निरखि सारथी अति धमकायौ ॥
 करिकैं पुनि पय-पान कवच बदल्यो रन आये ।
 गरजन भीषन करी शत्रु सैनिक घबराये ॥
 मंत्री शाल्व द्युमान बध, कश्यो फेरि आगे वढ़े ।
 करहिं बान बरसा असुर, बायुयानपै सब चढ़े ॥

सत्ताइस दिन भयो युद्ध नहिं यादव हारे ।
 हय, गज, पैदल, रथी सौभपतिके बहु मारे ॥
 भगै न खल छल करै शस्त्र नभतैं बरसावै ।
 बन, उपवन, आराम, सभा घर तोरि गिरावै ॥
 पुरी सकल ऊजर करी, पुरवासिनि अति दुख दयो ।
 इन्द्रप्रस्थतैं आइ इत, श्याम परम विस्मय कियो ॥

क्षत बिक्षत निज पुरी निहारी कहें मुरारी ।
 आइ सौभपति अधम द्वारका सकल उजारी ॥
 बल पुर-रक्षा हेतु भेजि रिपु सम्मुख आये ।
 उभय परस्पर भिड़े क्रोधयुत बचन सुनाये ॥
 वाननिकी बरसा करा, शत्रु मान-मर्दन कश्यो ।
 रिपु मारे शर श्यामकर, सारंग धनु करतैं गिश्यो ॥

सुर मुनि हाहाकार करें रिपु भये सुखारे ।
 शाल्य बढ्यो अभिमान गरबयुत बचन उचारे ॥
 कृष्ण मारिकैं तोइ मित्र-ऋण आजु चुकाऊँ ।
 हँसि बोले भगवान-तोइ यमसदन पठाऊँ ॥
 मायापतिसँग सौभपति, बिबिध भाँति माया करत ।
 मायातैं बसुदेव रचि, काट्यो तिनको सिर तुरत ॥

नरलीला कछु करी फेरि माया सब जानी ।
 सौम करन विध्वंस गदा श्रीहरिने तानी ॥
 भारी, गिश्यो बिमान दूटिकें चूर भयो सब ।
 लखि हरि सम्मुख शाल्व चक्रतैं सिर काट्यो जब ॥
 हाय हाय अरिदल मची, भये मुदित यादेव अमर ।
 जय जय सुर नर मुनि कहहिं, सुघर श्याम जीत्यो समर ॥

शाल्व और शिशुपाल मरन सब जगमहँ छायाँ ।
 वदलौ लैवे दन्तवक्र द्वारावति आयाँ ॥
 रनके बाजे बजे उभयदल चले हरषि पुनि ।
 मामा फूफी बन्धु लडैं लखि बिहँसत ऋषि मुनि ॥
 गदा श्याम सिर मारि खल, हँस्यो न हरि बिचलित भये ।
 तानि गदा कौमोदकी, कृष्ण असुरके ढिँगा. गये ॥

मारी हियमहँ गदा गिश्यो मरि अति अभिमानी ।
 तनुतैं निकसी ज्योति श्यामतनुमाँहिँ समानी ॥
 तीन जन्म जय बिजय भये खल हरिने मारे ।
 शाप मुक्त अब भये तुरत बैकुण्ठ सिधारे ॥
 दन्तवक्रको बन्धु लघु, आइ बिदूरथ रन कश्यो ।
 सोऊ हरिके हाथतैं, समरमाँहिँ सम्मुख मश्यो ॥

बिजयी बनि घनश्याम पुरी अपनीमहँ आये ।
 सुन्यो द्यूतमहँ धरमराज कौरवनि हराये ॥
 राज पाट सब हारि बने पांडव बनबासी ।
 पहुँचे बनमहँ तुरत सुनत अच्युत अबिनासी ॥
 दई सान्त्वना सबनिकूँ, बनको प्रन पूरन भयो ।
 दुरयोधनने तऊ नहिँ, राज पांडवनि फिरि दयो ॥

भयो युद्ध उद्योग पक्ष पांडव प्रभु लीयो ।
 उदासीन बनि रहौं यही बल निश्चय कीयो ॥
 तीरथ व्रतके व्याज द्वारकातैं चलि दीये ।
 पहुँचे क्षेत्र प्रभास तृप्त सुर, नर, ऋषि कीये ॥
 करत पुण्य तीरथ सकल, नैमिषार आये मुदित ।
 स्वागत हित ऋषि आपु सब, उठे अरघ दीयो उचित ॥

पिता न मेरे उठे रहे बैठे उच्चासन ।
 बल सोचें—यह धृष्ट करूँ हौं जाको शासन ॥
 ब्रह्म अस्त्रतैं तुरत पिताके काट्यो सिरकूँ ।
 ऋषि बोले—हम दियो ब्रह्म आसन बर इनकूँ ॥
 बल बोले—यह अघ भयो, भावी अति बलवान है ।
 उग्रश्रवा वक्ता बनै, आत्मा पुत्र समान है ॥

और कहें सो करूँ बतावैं अपर प्राइचित ।
 ऋषि बोले—नित विघन करे बलवल पापी इत ॥
 ताकूँ मारैं अबहिँ बरष भरि पुनि तीरथ करि ।
 यद्यपि आपु विशुद्ध शुद्ध होवैं द्विज दुख हरि ॥
 बल बोले—हे विप्रगन ! बलवलको बध करुङ्गो ।
 द्विजद्रोहीकूँ नष्ट करि, सब सङ्कट दुख हरुङ्गो ॥

वक्ता मोकूँ कर्यो रहे कछु दिन यदुनन्दन ।
 कर्यो उपद्रव आइ परबपै बलवल भीषन ॥
 हलतैं खँच्यो असुर ताँनि मूसर सिर माश्यो ।
 करत भयङ्कर शब्द गिर्यो परलोक सिधार्यो ॥
 यों बलवलकूँ मारिके, तीरथ हिन बल चलि दये ।
 तब तक कौरव खल-नृपति, भारत रत्नमहँ मरि गये ॥

भीम सुयोधन लड़ें न बल बल बहुत लगायो ।
 किन्तु उभय हठ करी सुयोधन स्वर्ग सिधायो ॥
 नैमिसार पुनि आई यज्ञ बलदाऊ कीन्हों ।
 यज्ञ दक्षिणा रूप ज्ञान तुम सबकूँ दीन्हों ॥
 यों बध बल्वलको करयो, संकरषन अवतार बल ।
 सुनहु सुदामा चरित अब, परम सुखद अतिशय विमल ॥

इति श्रीभागवत चरितके षष्ठाह में शाल्वोद्धार बल्देव
 तीर्थ यात्रा नामक ग्यारहवाँ अध्याय समाप्त ।
 (मासिक पारायणपच्चीसवें दिवसका विश्राम)



अथ द्वादशोऽध्यायः

[१२]


हरि सहपाठी सखा सुदामा रहे विप्रवर ।
मलिन बसन तन छीन दीन भिक्षुक फूट्यो घर ॥
पतिनी तिनकी लटी दूबरी करुनामूरति ।
हरि-साली घर हिली करी तिनकी अति दुरगति ॥
भिन्नामैं जो कछु मिलै, तातैं करि निरबाह नित ।
हरि सुमिरन दोऊ करत, नहिं अधर्ममहँ देहिं चित ॥

दारिद दुख अति दुसह भयो तब सती सुझायो ।
हैं यदुनन्दन सखा देव ! बहु बार बतायो ॥
च्यौं न द्वारकानाथ निकट हे प्रियतम ! जावे ।
दीनबन्धु ढिँग जाइ दुसह दुख च्यौं न सुनावे ॥
द्विज बोले—धन हेतु हरि, ढिँग कबहूँ नहिं जाउँगो ।
बिना अन्न मरि जाउँगो, तऊ न उदर दिखाउँगो ॥

विबिध भाँति समुझाइ द्वारका भेजे द्विजवर ।
चूरा मुट्ठी चार माँगि दीये अति सत्वर ॥
दात्रि बगलमहँ भेंट चले द्विज लठिया टेकत ।
ढगमग ढगमग परैं पैर हाँपत मग देखत ॥
तरु तर सोये श्रान्त हूँ, तनु जरजर मग अति बिकट ।
लाइ सुवाये शक्ति हरि, पुरी द्वारकाके निकट ॥



सुदामा और उनकी पत्नी पृ० ७७०



मुदामा जी के चावल और श्रीकृष्ण जी पृ० ७७२

जागे, पूछें—कहाँ द्वारका कृष्ण रहें कित ।
भौचक्के से लखें परम बिस्मित है उत इत ॥
लोगनि दयो बताइ रुकिमिनी महलनि आये ।
द्विजनि सहित छै द्वार लाँघि हिय अति हरषाये ॥
मित्र मिलनकी चटपटी, लगी सबनितैं द्विज कहत ।
कृष्ण हमारे सखा हैं, हम उनितैं मिलिबो चहत ॥

सब सेवक सुनि हँसहिँ व्यंग करि करि बतरावे ।
भोरे भारे विप्र सरल चित बात बतावे ॥
प्रिया सहित प्रभु पलंग पधारे दीठि परी जब ।
दौरे हैकें बिकल बिसारी तनु सुधि बुधि सब ॥
दोऊ भुजा पसारिकें, चिपटाये हियतैं तुरत ।
मित्र मित्र पुनि पुनि कहत, नेह नीर नयननि बहत ॥

स्वयं पकरि यदुनाथ पलंगपै विप्र विठाये ।
पूजाको संभार स्वयं करकमलनि लाये ॥
करि पूजन सम्मान स्वादु भोजन करवाये ।
करें प्रेम अति अधिक सुदामा बहु सकुचाये ॥
नेह सहित बैठाइ ढिँग, पुनि पुनि पूछत कुशल हरि ।
कहो लौटि गुरुसदनतैं, गृही बने नहिँ ब्याह करि ॥

भाभी कैसी मिली मिलै मन तुमरो वाते ।
लड़ति भिड़ति तो नाहिँ कान तो करे न ताते ॥
कितने बालक भये सबनिके नाम बताओ ।
सब घरको वृत्तान्त सुनाओ मति सकुचाओ ॥
गुरुकुलके सुखमय दिवस, हाय ! स्वप्न सम अब भये ।
चा दिनकी कछु यादि है, ईधन लैवै बन गये ॥

घरमहँ ईधन नाहिँ कह्यो गुरुआनी जाओ ।
 बेटा ! बनमहँ जाइ तुरत ईधन लै आओ ॥
 हम तुम दोऊ चले प्रबल बन आँधी आई ।
 बरषा भीषन भई नहीं मग परै दिखाई ॥
 राति बिताई वृत्त तर, भोर भयो गुरु आइकें ।
 कश्यो प्यार आशिष दई, हिय लीये चिपटाइकें ॥

जो गुरु दैके ज्ञान मोक्षको मार्ग बतावे ।
 ते हरि हर अज रूप सच्चिदानन्द कहावे ॥
 अच्छा, भाभी कहा हमारे लीये दीयो ।
 अबही नहिँ तुम दयो बिलस काहेकूँ कीयो ॥
 कछु न कहें द्विज लाजवश, श्रीहरि वैभवतैं चकित ।
 बार बार यदुवर कहें, देहु उपायन प्रिय तुरत ॥

दये रुकिमिनी कछुक प्रेममय हरिकूँ ताने ।
 तिनकूँ मुनिके बिप्र और सहमे सकुचाने ॥
 इत उत चित्त बँटाइ बगलतैं चिउरा खीजे ।
 खाये मुट्ठी तुरत कहें—ये अम्मृत सींचे ॥
 लगे चबावन दूसरी, लयो रुकिमिनी पकरि कर ।
 कहें—करो का कृपानिधि, मोऊकूँ कछु देउ बर ॥

चिउरा मुट्ठी एक खाय सब सम्पति दीन्हि ।
 मोकूँ हू अब दें आपुने इच्छा कीन्हि ॥
 यों हरि सब कछु दयो न द्विजकूँ प्रकट दिखायो ।
 होत प्रात ही बिप्र पूछि निज नगर सिधायो ॥
 कछुक दूरि पहुँचाइबे, आये हरि हिय लायकें ।
 बिदा करे अति विनयतैं, अति ही नेह जनायकें ॥

मगमहँ सोचत जात श्याम आदर अति कीयो ।
 किन्तु न एक छदाम ब्राह्मनीकूँ धन दीयो ॥
 नहीं दियो भल कियो अरथतैं अनरथ होवै ।
 द्रव्य पाइकें पुरुष मनुजता ऋजुता खोवै ॥
 सोचत सोचत नगर ढिँग, पहुँचि लगे बिस्मय करन ।
 निरखि असन, पट, गज, तुरँग, बहु सम्पति मणिमय भवन ॥

दिव्य अपसरा बनी बख भूषनतैं सज्जित ।
 बहु दासिनितैं धिरी निहारी नारी हरषित ॥
 स्वरग सरिस सम्पत्ति सकल श्रीहरिकी जानी ।
 समुझि गये सब रहस कृपा यदुबरकी मानी ॥
 सुमिरन करि करि कृपाको, पुलकित तनु बिनती करें ।
 जनम जनम हरि सखा बनि, ऐसे ही मम दुख हरे ॥

प्रभु प्रसाद सब समुझि करें बिषयनिको सेवन ।
 मनमहँ धारे कृष्ण करे' तिनि नित प्रति चिन्तन ॥
 जगमहँ सब सुख भोगि अंत हरि लोक पधारे ।
 भये सुदामा सखा श्यामके अतिशय प्यारे ॥
 मुनें सुदामा चरित जे, ते न परै भवकूप पुनि ।
 गोपिनि सँग हरि मिलन ज्यों, भयो कहूँ अब सुनहु मुनि ॥

इति श्रीभागवत चरितके षष्ठाह में सुदामाचरित नामक बारहवाँ
 अध्याय समाप्त ।

अथ त्रयोदशोऽध्यायः

[१३]

सूर्य्य-ग्रहन इक बार पश्यो सुनि सब नर नारी ।
 गये न्हान कुरुक्षेत्र सकल यादव बनवारी ॥
 इततैं गोपी गोप परबपै मिलि तहँ आये ।
 भेंट परस्पर भई सकल मिलि परम सिहाये ॥
 उभय ओर आनन्द अति, प्रमुदित यादव गोप-गन ।
 खिल्यो कमलमुख नयन जल, पुलकित तनु गद्गद बचन ॥

राम कृष्णने दौरि नंद यशुमति पग पकरे ।
 शिशुसम गोद बिठाइ पुत्र कसिके हिय जकरे ॥
 उभय नयन जलधार बहै करुना घबरानी ।
 भये कंठ अवरुद्ध न निकसै मुखतैं वानी ॥
 मातु पिताकी गोदमहँ, रोवत शिशुसम श्याम बल ।
 पट भिगवत सिसकत लिपटि, पुनि पुनि पौछत नयन जल ॥

शान्त भयो आवेग यशोदा भीतर आई ।
 दौरि देवकी और रोहिनी हिये लगाई ॥
 करि करि पिछली यादि अधिक आभार जतावे ।
 ये तुमरी सुत-बधू सबनिके नाम बतावे ॥
 राम श्यामकी बहुनिकूँ, लखि यशुमति प्रमुदित भई ।
 नाती बेटा होहिं बहु, मातु सबनि आशिष दई ॥

लखि बैभव ब्रज-बाल बहुत मनमहँ सकुचावें ।
 सोचे कब एकान्त ठाँवमहँ हरिकूँ पावें ॥
 अति रहस्यमय बात होहि नहिँ सबके सम्मुख ।
 निभृत निकुञ्जनिमाँहिँ मिलहिँ प्रियतब होवै सुख ॥
 समुक्ति भाव भगवान पुनि, सबतैं निर्जन थल मिले ।
 गाढ़ालिङ्गन कश्यो हरि, चन्द्रानन सबके खिले ॥

सकुची सहमी सखी श्याम संकोच छुड़ायो ।
 मधुर मधुर मुसकाइ करनि मुख अधर उठायो ॥
 पूछे—का रिस भई न हौँ फिरि ब्रजमहँ आयो ।
 जो नहिँ चाहौँ करन भाग्यने सो करवायो ॥
 है प्रारब्ध अधीन सब, सुख दुख अरु बिछुरन मिलन ।
 सार यही संसारमहँ, मोमें थिर है जाइ मन ॥

भरि नयननिजल कहें गोपिका—हरि ! तुम ज्ञानी ।
 का समुझैं हम योग ज्ञानयुत तुमरी बानी ॥
 कीयो जो उपदेश साँच हम ताकूँ मानें ।
 किन्तु न यशुमति-तनय छाँड़ि हमजग कछु जानें ॥
 बरदाता ! बर देहु जिह, जाइ न हमरी अनत मति ।
 तब मूरति हियमहँ बसै, चरन कमलमहँ होहि रति ॥

करी कृपा करुनेश सबनिकूँ धीर बँधायो ।
 धरमराजने दरश हेतु सन्देश पठायो ॥
 गोपिनिकूँ करि बिदा द्वारपै यदुबर आये ।
 करि स्वागत सत्कार नृपति पांडव बैठाये ॥
 कुशल चेम पूछी तबहिँ, कहहिँ धरम-सुत नयन भरि ।
 भई कुशल अब दयामय, तब चरननिके दरश करि ॥

इत यदुनन्दन पांडुसुतनि सँग प्रेम दिखावे ।
 इत पांचाली प्रभु-पत्निनि सँग मिलि बतरावे ॥
 निज बिवाहकी बात चलाई सब उकसाई ।
 पूछें सबतैं—कहो कृष्ण तुम कस अपनाई ॥
 रुक्मिनि ! सत्ये ! लक्ष्मणे ! हे भद्रे ! हे जाम्बवति ।
 सतभामे ! रोहिनि ! कहो, अपनाई ज्यों जगतपति ॥

कृष्णातैं सब कहें व्याहकी बिहँसि कहानी ।
 सत अरु सोलह सहस आठ श्रीहरिकी रानी ॥
 रुक्मिनिने निज हरन सत्यभामा मनि चोरी ।
 जाम्बवतीने कही मिली हरितैं ज्यों जोरी ॥
 कालिन्दी तपकी कथा, सत्याने बृष नाथिबो ।
 कृष्णो मित्रविन्दा स्वयं, बल-पूर्वक हथियायवो ॥

भद्राने संचेपमाँहिं सब बात बताई ।
 परम सरसतायुक्त लक्ष्मणा कथा सुनाई ॥
 पुनि जो सोलह सहस अधिक शत प्रभुकी पतिनी ।
 कही सबनि इक संग कथा करुनामय अपनी ॥
 हरि-पत्निनि अनुराग लखि, सब अति आनन्दित भई ।
 भाग्य सराहत सबनिके, सब निज निज डेरनि गई ॥

इत बाहर हरि दरश हेतु मुनिवर बहु आये ।
 करि स्वागत सत्कार कनक आसननि बिठाये ॥
 पुनि पुनि करी प्रनाम जोरि कर बोले श्रीहरि ।
 आज धन्य हम भये दये शुभ दरश दया करि ॥
 जप, तप, तीरथ, व्रत, सतत, सेवनतैं पावन करें ।
 किन्तु संत दरशननि ही, तैं सब दुख दारिद टरें ॥

सुनी श्यामकी बिनय भये बिस्मित सब ऋषि-गन ।
समुक्ति लोक व्यवहार कश्यो पुनि सबने थिर मन ॥
कहे—देव ! करि दरश दुरित दुख टरे हमारे ।
प्रभु तुम अशरन शरन चरन लखि भये सुखारे ॥
हृदयकमलमहँ योगि जन, करहिँ ध्यान जिनको सतत ।
तिन पदपदुमनि ध्यानमहँ, रहहिँ सदा हम सब निरत ॥

यों करि बहुबिधि बिनय चलनलागे ऋषि मुनि जब ।
तुरत जाइ बसुदेव चरन सिर धरि बोले तब ॥
करम धरमके हेतु करम बिनु नहीं नसावे ।
कौन करम करि होहिँ मुक्ति सो युक्ति बतावे ॥
मुनि हँसि बोले—कृष्ण पितु, है केँ हू शंका करे ।
बसहिँ गङ्गके निकट नर, पय न पियेँ प्यासे मरे ॥

नारद बोले—मुनिगन ! जामें अचरज नाही ।
रहे संग नित होहि न श्रद्धा ताके माहीं ॥
मुनि मुनि बोले—प्रभु प्रसाद हित कर्म करे जे ।
होहि न तिनकूँ दोष बन्ध जग नहीं परे ते ॥
सुररिन, ऋषिरिन, पितृरिन, रहे सबनिपै तीन रिन ।
यज्ञ और अध्ययन सुत, करि होवे सब द्विज उरिन ॥

सुत सर्वेश्वर करे कश्यो अध्येन जथामति ।
कश्यो न मख अब करो शूर सुत सुनि हरषे अति ॥
मख करवावो मोहि मुनिनितैं बिनती कीन्हीं ।
सब ऋषि ऋत्विज करे यज्ञकी दीक्षा लीन्हीं ॥
सजि बजिनर नारी फिरहिँ, मख हितलावहिँ फूल फल ।
हरि दरशन के लोभबश, रहे तहाँ ऋषि मुनि सकल ॥

अनुपम उत्सव भयो सबनिको स्वागत कीन्हों ।
 बहुत धेनु धन धान दान विप्रनिकूँ दीन्हों ॥
 मखमहँ सुर ऋषि पूजि शूर-सुत अति हरषाये ।
 पाइ मान सुर बिप्र सकल निज धाम सिधाये ॥
 पूजित हूँके नंदजी, सब ई गोपी गोप-गन ।
 रहे कछुक दिन संग तहँ, पुनि कीयो ब्रजकूँ गमन ॥

नित प्रति छकराजोरि चलहिं जब गोप नयन भरि ।
 आजु नहीं अब काल्हि जाइयों कहि रोके हरि ॥
 तीन मास यों रहे निकट जब वरषा आई ।
 भये बिबश बल श्याम कष्टतै करी बिदाई ॥
 नंद यशोदा सुतनिकूँ, पुनि पुनि हिये लगाइके ।
 कच भिगवत चूमत बदन, नयननि नीर बहाइके ॥

गोपी गोपनि हृदय प्रेमतै अति भरि आये ।
 मन हरि चरननि छोरि मधुपुरी तनतै धाये ॥
 इत यादव सजि सेन द्वारकामहँ आये जब ।
 कही कथा जो भई मिले ज्यों ब्रजवासी सब ॥
 मिले रहत बल्लभ सदा, गोपिनि हियमहँ बसहिं नित ।
 मिलन भयो कुरुक्षेत्रमहँ, भयो न ब्रज सम मन मुदित ॥

इति श्रीभाग चरितके षष्ठाह में कुरुक्षेत्रमें कृष्ण ब्रजवासी संगम्
 नामक तेरहवाँ अध्याय समाप्त ।

अथ चतुर्दशोऽध्याय

[१४]

एक दिवस बल श्याम गये निज पितुके पार्हीं ।
 निरखि ज्ञान जिह भयो पुत्र मेरे ये नाहीं ॥
 ऋषि मुनि भीषम व्यास इन्हें सर्वेश बतावे ।
 मानि मोइ निज जनक आइ पद शीश नवावे ॥
 बोले—तुम दोऊ सकल, या जगके आधार हो ।
 अज, अच्युत, अक्षर, अजिर, अखिलेश्वर अवतार हो ॥

बसुदेव—स्तुति

जय कृष्ण कृपालो ! भयत्राता ।
 जय संकरषण सब सुखदाता ॥
 दोऊ जा जगके रक्षक हो, निर्माता हो पुनि भक्षक हो ।
 तुम सकल ज्ञानके शिक्षक हो, नहिँ तुमरो जगतेँ कछु नाता ॥१॥ जय०
 चाहें जब जैसे बनि जावे, धरि रूप बिबिध जगमें आवे ।
 नहिँ पार निगम आगम पावें, तान्यो जगमायाको छाता ॥२॥ जय०
 हैं जगमें जितने शक्तिमान, अधिपति स्वामी अरु तेजवान ।
 भगवान ज्ञान अरु बुद्धिमान, तुमही सबके हो गुनदाता ॥३॥ जय०
 हैं पुरुष पुरातन आपु उभय, रवि, शशि, तारा ग्रह, सदा सभय ।
 नित करे सरग, थिति आपुप्रलय, सब जगके तुमही पितु माता ॥४॥ जय०

छ०—मोपै किरपा करो शरन तुमरी हौं आयौ ।
 इन्द्रिय विषयनि फँस्यो समय सब व्यर्थ गँवायौ ॥
 सुनिकें पितुके बचन श्यामसुन्दर सकुचाये ।
 आत्मज्ञान युत मधुर बिहँसि बर बचन सुनाये ॥
 सब भगवतके रूप हैं, मैं तुम बल ये चराचर ।
 आत्मा अद्वय एकरस, नित्य निरंजन परावर ॥

सुनि हरिको उपदेश भये वसुदेव सुखारे ।
 तब ई आई मातु मुदित बल श्याम निहारे ॥
 बोलीं माता—प्रथम सृतक गुरु-सुत तुव आन्यो ।
 योगेश्वर तुम उभय मुनिनिहँसि मखमहँ जान्यो ॥
 मेरे छै सुत कंसने, जनमत मारे सुघर सब ।
 तुम समर्थ सर्वज्ञ हो, तिनहिँ दिखाओ लाइ अब ॥

माता इच्छा समुझि सुतल बल हरि उठि धाये ।
 बलितैं पूजित भये कुमर माया तैं लाये ॥
 सुतनि पाइ अति मुदित भई जननी सुख पायो ।
 पय पिआइ मुख चूमि सूँघि सिर हिय सरसायो ॥
 छै मरीचि सुत विधिहिँ जब, कामातुर लखि हँसि गये ।
 असुर भये ते शाप बश, प्रभु प्रसाद पुनि सुर भये ॥

सूत कहें—अब हरन सुभद्रा सुनहु मुनीश्वर ।
 करहिँ भक्त अभिलाष सकल पूरन परमेश्वर ॥
 बन प्रसङ्गमहँ पार्थ सुभद्रा इच्छा लखि उर ।
 बनि बाबाजी रहें छद्मतैं छिपिके हरिपुर ॥
 बल छलकूँ समुझे नहीं, करे निमंत्रित कपट मुनि ।
 करति सुभद्रा पूर्ब ही, प्रेम पार्थको सुयश सुनि ॥



श्रीविष्णु जी पर भृगु मुनि का पदप्रहार पृष्ठ ७८८



सुमद्रा हरण पृ० ७८१

मौनी बाबा बने सुयश पुरमाहीं छायो ।
 बल बुलाइ घर प्रेम सहित भोजन करवायो ॥
 कुमरि सुभद्रा बार बार न्यंजन बहु परसे ।
 अति सुन्दर मनहरन रूप लखि पुनि पुनि हरषे ॥
 द्वै द्वै मिलिकें चार जब, भई आँखि दोऊ ठगे ।
 कपटी मुनि मोहित भये, प्रणय सहित देखन लगे ॥

वेष बदलिके चार मास अरजुन तहँ निबसे ।
 करत प्रफुल्लित सबनि शारदी शशि सम विकसे ॥
 कुमरि हरन हरि संग योजना बैठि बनाई ।
 रथ चढ़ि उत्सव माँहि सुभद्रा बाहर आई ॥
 बासुदेव निज रथ दयो, छद्म वेष तजि पांडुसुत ।
 गये सुभद्राके निकट, पकरि बिठाई रथ मुदित ॥

सुनि बल यादव कुपित चले लड़िबे अरजुनतें ।
 हूँके हरि गम्भीर प्रेमयुत बोले तिनतें ॥
 है अजेय जग पार्थ बात मत न्यर्थ बढ़ाओ ।
 करो सुभद्रा न्याह नेहतें नगर बुलाओ ॥
 हरिकी सम्मति समुक्ति बल, जय बुलाय कन्या दई ।
 पाइ परस्पर बर बधू, अति प्रसन्नता मन भई ॥

अब इक मुनिवर कहूँ कृपायुत कलित कहानी ।
 मिथिलापुरमहँ बसहि बिप्र श्रुतदेव अमानी ॥
 भूपति तहँ बहुलाश्व भक्तवर हरिके प्यारे ॥
 दोउनि करन कृतार्थ कृष्ण पुरमाँहि पघारे ॥
 पहुँचे मिथिला नगरमहँ, बहु ऋषि मुनि हरि संगमह ।
 सुनत बिप्र नृप हरषतें, नहीं समाये अंगमह ॥

दोउनिने इक संग निमंत्रित श्रीहरि कीन्हें ।
 दोउनि करन कृतार्थ रूप द्वै हरि धरि लीन्हें ॥
 एक रूपतैं गये ऋषनि संग नृप महलनिमहँ ।
 अपर रूप धरि गये द्विजनि लै विप्र भवनमहँ ॥
 भूपति हरि-पद गोद धरि, सुहराने पुनि पुनि कहें ।
 करें कृपा करुणेश कछु, काल जनकपुरमहँ रहें ॥

इत द्विज देखे देव दीनके द्वारे आयें ।
 चरण कमल सिर नाइ बिनययुत बचन सुनाये ॥
 नित्य निरञ्जन नाथ निरन्तर निकट हमारे ।
 अति अनुकम्पा करी अज्ञ अनुचर उद्गारे ॥
 करें कहा करुणायतन ! विधिवत बात बताइ दें ।
 होहिं द्रवित जाते तुरत, साधन सुखद सिखाइ दें ॥

हँसि हरि बोले—विप्र बेद जगमाँहिँ प्रचारें ।
 शम, दम, संयम, नियम साधि तिनिकूँ ते धारें ॥
 मेरे हू ते पूज्य करें जो अर्चन तिनिको ।
 समदर्शी है जाय भक्त होवे जो उनिको ॥
 यों सिख दीन्हों द्विज नृपहिँ, कछु दिन रहि पुनि पुर गये ।
 सुनो कथा अब शम्भुकी, बिकल असुर बर दै भये ॥

इति श्रीभागवतचरितके षष्ठाह में मातृपितृमैथिलानुग्रह
 नामक चौदहवाँ अध्याय समाप्त ।

अथ पञ्चदशोऽध्यायः

[१५]

पूछें शुकतैं भूप—प्रभो ! हर मरघटवासी ।
 चिता भस्म तन मलैं दिगम्बर बिषय उदासी ॥
 तिनि के सबई भक्त धनी मानी भोगी अति ।
 बने ठने हरि रहें सुघर सुन्दर कमलापति ॥
 लक्ष्मीपति-प्रिय धन रहित, शैव धनी बनि जात हैं ।
 बैष्णव बनि माँगत फिरहिँ, ये का उलटी बात हैं ॥

बोले शुक—सुनु नृपति शम्भु अज औघर दानी ।
 होहिँ शीघ्र सन्तुष्ट लहहिँ बर खल अभिमानी ॥
 पाइ अमित ऐश्वर्य करे अपमान सबनिको ।
 प्रकृति परे प्रभु बिष्णु टिकै नहिँ चित्त खलनिको ॥
 करै धिष्णु जापै कृपा, निष्किञ्चन ताकूँ करे ।
 सबकी आशा छोड़ि जब, आवे तब सब दुख हरे ॥

सुनो एक इतिहास परे हर संकट दै बर ।
 आशुतोष शिव समुक्ति करै तप उग्र बृकासुर ॥
 तनुको काटै मांस अग्निमें होमें ताकूँ ।
 बसै तीर्थ केदार भये छै दिन यों वाकूँ ॥
 शिव दरशन जब नहिँ दये, सतवें दिन गहि खडग खल ।
 सिर काटन लाग्यो जबहिँ, प्रकटे शंकर शिव विमल ॥

कहें—अरे, च्यों मरै माँगु बर मत घबरावै ।
 माँग्यो बर—कर धरूँ जासु सिर सो मरि जावै ॥
 आशुतोष ह्वै बिमन दयो बर खल सुख पायो ।
 भयो बिमोहित शिवा रूप लखि चित्त चलायो ॥
 करूँ परीक्षा शम्भु सिर, कर धरि यदि मर जायँगे ।
 मिलै सुन्दरी शिवा अरु, सबरे सुर डर जायँगे ॥
 धरन शम्भुपै हाथ बढ़यो हर अति घबराये ।
 भागे मुट्ठा बाँधि लोकपालनि पुर आये ॥
 बृक हू बरतैं बढ़यो भगै सँग शिवके मगमहँ ।
 कौन अन्यथा करै शम्भुके बरकूँ जगमहँ ॥
 और उपाय न देखि हर, भागि चले वैकुण्ठपुर ।
 रमारमन जहँ रमा सँग, करहिँ कलित क्रीड़ा सुघर ॥
 हरि सब समुक्ति रहस्य रूप बटु धरि मग आये ।
 बृकतैं बोले—बीर ! फिरौ च्यों तुम घबराये ॥
 कह्यो असुर सब वृत्त बताई अपनी इच्छा ।
 बोले हरि—निज शीश हाथ धरि करहु परीक्षा ॥
 सुनिखल निजसिर कर धर्यो, भयो भस्म शिव बचि गये ।
 ऐसो बर फिरि देहिँ नहिँ, हरि हरतैं कहि हँसि गये ॥
 सोरठा—सूत कहें मुनिराज, वेदस्तुति बरनन करूँ ।
 वे ही कारन काज, ज्ञान रूप हरि एकरस ॥
 छप्पय—हरि सब जगके ईश सृष्टि सब जिही बनावें ।
 जे ही रक्षा करे प्रलयमें लेट लगावें ॥
 बन्दी बनिके बेद विनययुत बोलें बानी ।
 बानी श्रुति कहलाई भेद समुक्त मुनि ज्ञानी ॥
 प्रलय अन्तमें श्रुति सकल, करहिँ विनय ह्वैके मगन ।
 इस्तुति नृपकी करहिँ ज्यों, बन्दी मागघ सूत-गन ॥

शौनक बोले—सूत ! वेद इस्तुति कछु भाखें ॥
 भेदभाव निज भक्त समुक्ति मनमहँ नहिं राखें ॥
 कहैं सूत—मुनि ! विषय गूढ़ कैसे हौं भाखूँ ।
 आपु सकल सर्वज्ञ भेद तनिकहु नहिं राखूँ ॥
 ब्रह्मसत्र जनलोकमें, भयो कुमारनिको प्रथम ।
 नारदतैं हरिने कह्यो, कहूँ ताहि अब सुनहु तुम ॥
 बने सनन्दन व्यास भये श्रोता सब भाई ।
 प्रकट्यो ब्रह्म विचार ज्ञानकी नदी बहाई ॥
 कहें सनन्दन—प्रलयकाल अवसान समुक्ति सब ।
 श्रुति इस्तुति मिलि करे कहूँ ताहीकूँ हौं अब ॥
 सोवें सुखतैं प्रलय-पय, में परमेश्वर श्रुति जर्गी ।
 हाथ जोरि सर्वेशकी, यों इस्तुति करिबे लगीं ॥

वेद-स्तुति

चौपाई

जाते जनमें जे सघ भूता, सब जग जाको प्यारो पूता ।
 जानें पूरब अज उपजाये, जानें चारिहु वेद बनाये ॥
 बुद्धि प्रकाशक देव अनन्ता, शरण गहूँ जो आत्मनि सन्ता ।
 ब्रह्म सत्य अरु ज्ञान अनन्ता, जो सरबज्ञ सर्वविद् सन्ता ॥
 कथन मात्र हैं सकल विकारा, ज्यों घटमें मिट्टो ही सारा ।
 ब्रह्मरूप है सब जग भाई मिथ्या नाना जो दिखलाई ॥
 कमलपत्र जल नहिं ठहरावै, त्यों ज्ञानी अब नहिं लिपटावै ।
 द्वैन न जाके मनमहँ आवै, पाप पुन्यतैं सो बिलगावै ॥
 नाम असुर्या लोक अनन्ता, तमतैं धिरे नहीं जिनि अन्ता ।
 आत्माघाती जे नर अहर्ही, मरिकें तिनि लोकनिमें रहहीं ॥

'आत्मज्ञान जाने' नहिं कीयो, तानें मनि तजि लोहो लीयो ।
 'ब्रह्म अमृतकूँ' जो नर पीवें, मरे न कबहूँ ते नित जीवें ॥
 'जो विषयनिमहँ' नर फँसि जावें, भ्रमें जगतमहँ दुख बहु पावें ।
 'अन्न प्राणमय वही' ब्रह्म है, वही बुद्धि मन परब्रह्म है ॥
 'कोई उदर ब्रह्म करि' मानें, कोई हृदय ब्रह्म ही जानें ।
 'कोई दहर उपासन करहीं', दहर अन्त आकाशहिँ भरहीं ॥
 'एक देव सब भूतनिमाहीँ', छिप्यो गूढ़ है दीग्यत नाहीँ ।
 'साक्षी सबके हृदय विराजै', केवल निर्गुन है के' राजै ॥
 'सबरे जगकूँ' वही बनावें, रचि पचि पुनि तामें घुसि जावें ।
 'जो पुतरनिमहँ' पुरुष दिखावै, सोई सूरजमाहिँ लखावै ॥
 'एक अनेक प्रकार लखाई', अन्य नहीं सो तू ही भाई ।
 'नमें जाहि सब देव भितरगन', ज्ञानी और मुमुक्षु हरिजन ॥
 'सब प्रतिबिम्ब देखि' हरषावें, पतो बिम्बको नहीं लगावें ।
 'घड़ा देखि विस्मय सब माने', कुम्भकारकूँ नहिँ पहिचाने ॥
 'देखो सुनो मनन करि' ध्याओ, आत्मा में ही चित्त लगाओ ।
 'मन बानी जहँतैं' फिरि आवें, ब्रह्म ताहि सब बेद बतावें ॥
 'जाको सब ई जगत् पसारो', जाते' नहीं जगत् कछु न्यारो ।
 'पहिले सत ही सत जगमाहाँ', कहो असत कछु हानी नाहीं ॥
 'ब्रह्म ब्रह्म ही ब्रह्म लखावै', ब्रह्म बिना कछु दृष्टि न आवै ।
 'मूरख फँसे अविद्या भीतर', समुक्ति विज्ञा दें मन्त्र निरन्तर ॥
 'अन्धे अन्धनि गैल' दिखावें, दोऊ गिरि कूआ में जावें ।
 'अद्वय एक ब्रह्म सत चित है', भूत भूतमें वह व्यवथित है ॥
 'एक अनेक वही कहलावै', जैसे जलमें चन्द्र लखावै ।
 'आत्माको ही सकल पसारो', आत्माते' कोई नहिँ न्यारो ॥
 'ब्रह्म सत्य अरु ज्ञान अनन्ता', नाना नहीं एक ही पन्था ।
 'जो नानापन जगमें' देखै, मृत्यु द्वार मरिके' वह पेखै ॥

ता बिनु वस्तु बहुन नहिँ थोरो, बँधे नाम दामहुकी डोरी ।
 हाथ पैर नहिँ इन्द्रिय मन हैं, चलें फिरे सब करें करम हैं ॥
 जाके डरतें भूत, चन्द्र, रवि, करें करम सो सरवेश्वर कवि ।
 अग्नि पतङ्गा ज्यों उपजावै, त्यों आत्मा जग अखिल बनावै ॥
 मैं सब जानूँ जो यह मानै, सो मानों किञ्चित नहिँ जानै ।
 जल बुदबुदवत जनम मरन है, वही करम अरु वही करन है ॥
 सुमन भिन्न सब रस मिलि जावै, सब मिलि जुलि सो मधु कहलावै ।
 ज्यों सरिता सागर मिलि जावै, नाम रूप तजि सकल बिलावै ॥
 त्यों विद्वान असत्य भुलावै, पुरुष पुरातनमहँ मिलि जावै ।
 माया में फँसि जीव भुलावै, पुनि पुनि जनमै पुनि मरि जावै ॥
 जनम मरन भक्तनिकूँ नाहीं, परैं नहीं ते माया माहीं ।
 चित चंचल हयके सम अहहीं, होहि समाहित गुरुपद गहहीं ॥
 जे गुरु बिनु भव तरिबौ चाहौ, ते बिनु केवट उदधि तराहीं ।
 जे रति सुखकूँ बड़ सुख मानें, ते नहिँ आत्मतत्व पहिचानें ॥
 सत्संगति जिनकूँ मिलि जावै, तिनि कूँ रति-सुख घर नहिँ भावै ।
 स्वर्ग नरक दोऊ दुखकारन, आत्मज्ञान ही है सुख भाजन ॥
 जो गृह तजि पुनि रति सुख चाहें, ते पुनि पुनि नरकनिमें जावें ।
 हरि ही हैं या जगमें सारा, हरि ही को यह सकल पसारा ॥
 हरि ही जग जगही सब हरि है, हरि हरि कहि नर जगते तरि है ।
 हरि ही नारी हरि ही नर है, हरि ही भीतर हरि बाहर है ॥
 हरि भजु सब तजि हरि गुन गाओ, हरि हीमें नित चित लगौ ॥
 ऊपर हरि हैं नीचे हरि हैं, और कछु नहिँ हरि ही हरि हैं ॥
 उठें नाथ सब जगहिँ उठावें, अपनो गुन कीर्तन करबावें ।
 जो तुमरो नितप्रति गुन गावें, ते तुमरे ही पदकूँ पावें ॥
 दोहा—वेद स्तुति सनकादि सुनि, भये प्रसन्न महान ।

सम्माने श्रीसनन्दन, पुनि कीयो प्रस्थान ॥

गूढ़ ज्ञान मुनिवर परम, धारे' हियमें आप ।
 श्रवन मनन निदिध्यासतें, मिटै जगत संताप ॥
 छप्पय—और सुनो इक चरित चली चरचा मुनिमाहीं ।
 करहिं यज्ञ ऋषि विशद् सरस्वति तटके पाहीं ॥
 हरि, हर, अजके बीच कौन सुर श्रेष्ठ कहावें ।
 भृगु मुनि करे नियुक्त परीक्षा लैवे जावें ॥
 प्रथम गये ते अज निकट, करा न दंड प्रणाम मुनि ।
 सुत अविनय लखि अति कुपति भये न बोले ब्रह्म पुनि ॥
 भृगु शिवसन पुनि गये शम्भु दौरे मिलिबे हित ।
 कह्यो अघोरी आपु न भेंटूँ है यह अनुचित ॥
 मारन दौरे रुद्र संती पग परि लौटाये ।
 क्रोधी शिवकूँ समुझि फेरि मुनि हरिपुर आये ॥
 सिर धरि लक्ष्मी अंकमहँ, सोवत हरि मुनि जायके ।
 चरमहँ मारी लात कसि, उठे विष्णु घवरायके ॥
 लात लगत ही उठे चरन मुनिकें सुहलावें ।
 पुनि पुनि करे' प्रणाम दीन है बचन सुनावें ॥
 द्विजवर ! मोतैं भूल भई स्वागत नहिँ कीन्हों ।
 सेवा कछु नहिँ बनी कष्ट ऊपरतैं दीन्हों ॥
 तब पद हैं अतिशय मृदुल, हिय कठोर मम बज्र सम ।
 पहुँचो पग पीड़ा प्रभो ! भये दूरि मम दुरित भ्रम ॥
 हरिकी मुनिकें विनय भये भृगु अतिशय लज्जित ।
 प्रेम न हिये समात कण्ठ गद्गद अति विस्मित ॥
 आइ सत्रमहँ सकल वृत्त विप्रनि सन भाख्यो ।
 विष्णु सबनितैं बड़े सबनि यह निश्चय राख्यो ॥
 हरिलीला संवरणको, भास होहि जामें यथा ।
 कहूँ विप्र अरु पार्थकी, अति अद्भुत अब सो कथा ॥

रहें द्वारका पार्थ कृष्ण इक चरित दिखायौ ।
मृतक पुत्र लै बिप्र द्वार राजाके आयौ ॥
सबै यादवनि कहैं—मरे च्यौ मेरे बालक ।
हैं सब यादव पतित अधरमी कुलके घालक ॥
एक एक करि नौ मरे, पुनि पुनि रोवत आइके ।
अन्तिम द्विज सुत मृतक लखि, अरजुन कहैं रिस्याइके ॥

कहो बिप्र ! का यहाँ न कोई क्षत्रिय निवसै ।
बिलपै ऐसे बिप्र न कोई धरतै निकसै ॥
तब सुत रक्षा करूँ देव ! अब नहिं धरारवै ।
होहि प्रसवको समय आई पुनि मोइ बतावै ॥
सुत रक्षा यदि नहिं करूँ, जरूँ अग्निनिमहँ हँस्यो द्विज ।
प्रसव काल आयौ जबहिं, गये पार्थ लै धनुष निज ॥

छोड़ि शरनि घर घेरि बनायो पिँजरा सम तिन ।
जनम्यो शिशु करि रुदन भयो अन्तरहित तत्क्षिन ॥
अरजुन लज्जित भये बिप्र कटु बचन सुनाये ।
द्विजसुत ढूँढन हेतु लोकपालनि पुर धाये ॥
कहूँ मिल्यो बालक नहीं, लागे अरजुन तब जरन ।
तोइ दिखाउँ द्विज तनय, चल बोले अशरनशरन ॥

दै अरजुनकूँ धीर ताहि रथमहँ बैठास्यो ।
पच्छिम दिशि करि लक्ष्य दिव्य रथतुरत सिधास्यो ॥
पर्वत, द्वीप, समुद्र सात सब लंघन करिकें ।
कस्यो घोरतम नाश सुदर्शन आगे बढ़िकें ॥
देख्यो तमके पार अति, दिव्य तेजमय लोक तहँ ।
परे सहस फन अहि प्रबल, दिव्य उदधिके भवनमहँ ॥

तिनकी शैया सुखद ताहिपर श्याम बिराजै ।
 भूमा, अज, अखिलेश अख आयुध सह भ्राजै ॥
 पार्थ कृष्णने जाइ चरन बन्दन तिनि कीन्हें ।
 भूमा पुरुष निहारि तनय दश द्विजके दीन्हें ॥
 बोले भूमा पुरुष पुनि, नर नारायण उभय तुम ॥
 आओ भूको भार हरि, तुरतहिं आयसु देहिं हम ॥

करिके दंड प्रनाम द्वारका दोऊ आगे ।
 द्विजके दशहू तनय दये दोऊ हरषाये ॥
 समुझे अरजुन भेद करन हारे सब हरि हैं ।
 कोई करि नहिं सकै कछु कारे सब करिहैं ॥
 यों लीला संबरणको, यदुनन्दन निश्चय कइयो ।
 भावमयी हरि भामिनिनि, को आपुहि हीयो भइयो ॥

इति श्रीभागवत चरितके षष्ठाह हर भृगु अर्जनानुग्रह नामक
 पन्द्रहवाँ अध्याय समाप्त ।

अथ षोडशोऽध्यायः

[१६]

भाग्यवती हरि प्रिया रिक्तावै हरिकूँ नित प्रति ॥
 रहैं सुखी सब सदा सुमिरि श्रीहरि चितवन गति ॥
 कमलनयन सुख दयो सरसतामहँ सब पागीं ।
 अब सबकूँ अति बिरहमयी लीला ते लागीं ॥
 कुररी, चक्रवी, नीरनिधि, चन्द्र, मलय मारुत, सरित ।
 कोकिल, भूधर, सजल घन, कहहिँ सबनि लखि कछु दुखित ॥

प्रथम गीत

कुररी च्यौँ रोवति सुनिशा में ।
 सोवत श्याम सुखद शय्या पै, बिघन करति तू तामें ॥१॥
 बात बताइ वीर ! बिपदाकी, झूठी बिरह बिथामें ।
 ये सुखदेनि रैनि प्रिय सँगमहँ, हँसि हँसि बहिन ! बितामें ॥२॥
 नींद नहीं आवति है तोकूँ, याद प्रात प्रिय आमें ।
 कुटिल कटाक्ष कमल दल लोचन, सर हियमहँ धँसि जामें ॥३॥
 तो फिर भूल नींद सुख सजनी, निशि बामर न सुहामें ।
 हमहूँ व्यथित दुखित निशि रोवति, तोकूँ का समुझामें ॥४॥

द्वितीय गीत

चकवी ! किन मूरति तू ध्यावै ।

पति बियोगतैं व्याकुल बनिकैं, बार बार बिललावै ॥१॥
 निशि नहिँ नींद नीर भोजन तजि, नयननि नीर वहावै ।
 समुझि श्याम दासी तू हमकूँ, मत सौभाग्य सरावै ॥२॥
 दासभावमहँ दुख पग पगपै, बनि पाछैँ पछितावै ।
 हरि चरननिपै अरपित माला, जो तू शीश चढ़ावै ॥३॥
 तो सजनी ! सब ई फिर जीवन, यों ही बिलपत जावै ।
 निपट निठुर नर कपटी सब ई, मत तू नेह बढ़ावै ॥४॥

तृतीय गीत

सागर ! च्यौँ गरजत निशिबासर ।

नींदलोपको रोग भयो का, जागत रहत निरन्तर ॥१॥
 का चित्तचोर चुगई तुमरी, कौस्तुभमणि अति सुन्दर ।
 अथवा शंख हरनके कारन, कोसत हो नित नटवर ॥२॥
 अथवा प्रिया बियोग जनित दुख, उमड़ि घुमड़ि उर अन्तर ।
 प्रलपत रहत प्रेमके कारन, है अति प्रेम भयंकर ॥३॥
 हमरो चित्त चुरायो हरिने, हम तुम एक बराबर ।
 प्रभुकी करनी प्रभु ही जानें प्रेम गली अति सांकर ॥४॥

चतुर्थ गीत

शशि ! च्यौँ सुन्दर बदन मलीन ।

तम तव रिपु तव निकट बिराजत, करत न ताकूँ छीन ॥१॥
 राजरोग क्षय दुख अति दारुन, तातैं तुम हो दीन ।
 अथवा तुमहूँ ठगे श्यामने, जो सब कला प्रवीन ॥२॥

सुनि सुनि मरस श्यामकी बतियाँ, छतियाँ छेद नबीन ।
 बिधिके भयो हियो छननी सम, कान्ति भई सब छीन ॥३॥
 तुम सम हमहूँ परम दुखित शशि ! भई निठुर आधीन ।
 भुवि जग सूनो सब दीखत, कृष्ण पद अति हीन ॥४॥

पंचम गीत

मलयानिल ! च्यौँ दुखी बनाओ ।
 हम अबला जगमहँ अति निरबल, च्यौँ हिय चोट चलाओ ॥१॥
 आपुहिँ दुखी श्याम दुख दीनो, नमक कटे बुरकाओ ।
 हरि कटाक्ष सर कसकत उरमहँ, तुम ताकूँ करकाओ ॥२॥
 मदन दहत हियकूँ परि तुम नहिँ, सखा ममुक्ति समुक्ताओ ।
 बहि बहि मंद सुगन्धित शीतल, रतिपतिकूँ उकसाओ ॥३॥

षष्ठम गीत

धन ! तुम यदुनन्दन के प्यारे ।
 नेह रोग तुमहूँ लाग्यो, चित्त चढ़ि गये कारे ॥१॥
 करिकेँ प्रेम कौन सुख पायौ, सब ई भये दुखारे ।
 छिन छिन पल पल रोवत बीतत, नयननि बहत पनारे ॥२॥
 हमने फँसि जो जो दुख पाये, सो तुम नाहिँ बिचारे ।
 अब भर भर आँसु बरसावत, कपटी कृष्ण हमारे ॥३॥

सप्तमगीत

कोकिल ! कुहू कुहू का बोलति ।
 रसमें संती सुधा सम बानी, बोलति तरुपै डोलति ॥१॥
 ऐसे ही ये श्याम निगोड़े, प्रेम पिटारो खोलत ।
 नेह तुलामहँ हियकूँ धरि के, राग बाटतें तोलत ॥२॥

कूजति तू कलकंठ कोकिले ! प्रियकी सुरति दिवावति ।
 का प्रिय करें बहिन ! तेरो हम, तव चरननि सिर नावति ॥३॥
 गोबिंदके गुन खग गन गावत, उड़ि उड़ि इट ई रोवत ।
 तू तो प्रभुके प्रेम छीरमहँ, मधुरव मिसिरी घोरति ॥४॥

अष्टमगीत

भूधर ! प्रेम समाधि लगाओ !
 नहिँ डोलत नहिँ बोलत बाबा, आसन अचल जमाओ ॥ १॥
 का सोचत का चाहत तप करि, अपनी साध बताओ ।
 अतिशय मृदुल चरन यदुवरतैं, शिखरनि परसन चाओ ॥२॥
 परसि प्यास नहिँ बुझै बावरे ! मत तिनकूँ ललचाओ ।
 प्रथम होहि सुख अतिशय अनुपम, परि पीछे पछिताओ ॥३॥
 हम बिललावति रोवत डोलति, हरितैं हमें मिलाओ ।
 बज्र समान कठिन हिय हमरे, प्रभु पदतैं पिघलाओ ॥४॥

नवम गीत

सरिता ! ज्यों सूखत तव गात !
 नहिँ पय भ्रमर हिलोर तरंगहु, तट मर्याद दिखात ॥१॥
 देखी प्रथम फली फूली तू, सजि बजि पिय ढिँग जात ।
 अब न पदुम श्री मीन पीन पय, चन्द्र बदन कुम्हिलात ॥२॥
 हमहूँ दुखित प्रणय सर हरि हिय, घुसि पीड़ा पहुँचात ।
 बजि दुरबल भटकति इत उत निशि, दिवस कछू न सुहात ॥३॥
 ज्यों तुम पति-पय तैं अब वंचित, त्यों हमहूँ बबरात ।
 प्रभु सुखकमल सुरति करि रोवति, जग सब सून दिखात ॥४॥

दशम गीत

हंसा ! हरिके दूत जनाओ ।

लैके सरस सँदेश श्याम को, हमरे ढिँग मत आओ ॥१॥

होहि न तोष सँदेशनिते प्रिय, यदुबर हमहिँ मिलाओ ।

देखो परि न जलमुही कमला, सौति संग मत लाओ ॥२॥

लिपटी रहत श्याम अँगमहँ नित, ताको मुँह न दिखाओ ।

हम सबहू कछु लगें तिहारी, एक बार फिर आओ ॥३॥

जाओ जाओ यदुनन्दनढिँग, प्रिय संदेश सुनाओ ।

करवाओ प्रभु परस प्रेमतै तनकी तपन बुझाओ ॥४॥

छप्पय—गावे महिषी गीत कबहुँ नहिँ श्याम मुलावे ।

तिनिके भागनि इन्द्र, शम्भु, अज सकल सरावे ॥

जगपतिक्कूँ पति पाइ भये तिनिके सुत दश दश ।

सबमें श्रीप्रद्युम्न ज्येष्ठ जिनिको व्यापो यश ॥

तिनिके श्रीअनिरुद्धजी, शूरवीर वर सुत भये ।

वज्र भये तिनिके तनय, यदुकुलक्षयतें बचि गये ॥

वज्र तनय प्रतिबाहु, सुबाहु सुतहू तिनिके ।

शान्तसेन तिनि पुत्र भये शतसेनहु चनिके ॥

यादव कोटि असंख्य सबनिकी संख्या नाहीं ।

यों यदुकुल पुनि बढ़यो छीन कलियुगके माहीं ॥

जब सब सुरगन, धेनु, द्विज, अधरम तै हँकें दुखित ।

हरिढिँग जामें दीन है, होहि अवतरित तब अजित ॥

सब सारनि को सार श्याम गुन सुनें सुनावें ।
 हृदय के तन्मय सतत नाम हरि चरितनि गावें ॥
 सुखद सरस शुभ चरित जगत दुख दूर भगावें ।
 सुनत सुनत हरि कथा कृष्ण हियमाहि समावें ॥
 पावन परम चरित्र जे, नेम प्रेमतै गायेंगे ।
 ते पहुँचहि प्रभु पदनिमहँ, पुण्य परमपद पायेंगे ॥

इति श्रीभागवतचरित के षष्ठाह में महिषीगीत नामक सोलहवाँ
 अध्याय समाप्त ।

(मासिक पारायण—छब्बीसवें दिनका विश्राम)

इति षष्ठाह



अथ सप्ताह

प्रथमोऽध्यायः

[१]

छप्पय—हे यदुनंदन कृष्णचन्द्र सब जगके शासक ।
वासुदेव भगवान भक्त वत्सल भयनाशक ॥
हे हरि ज्ञान स्वरूप मोहनाशक दुखभंजन ।
हे शोभाके धाम भुवनपति देवकिनंदन ॥
हे उद्धव मैत्रेय अरु, विदुर ज्ञानदाता प्रभो ।
हम अज्ञानिनिपै कृपा, दृष्टि दृष्टि होवै बिभो ॥

भटकि रहे भवमाँहि पन्थ दीखै नहिं सूघो ।
हमहूँ कूँ मिलि जायँ विदुर सम ब्रजमें ऊघो ॥
लेहिं मधुर तव नाम सरस कछु कथा सुनावें ।
कैसे पावैं तुम्हें सरल-सी गैल बतावें ।
संतनिके ढिँग बैठिके, कथा कीरतन करहिं नित ।
अरचन बन्दन देहतें, तव चरननिमें रमहि चित ॥

दोहा—सूत कहें शौनक मुनिहिं, हरि गुन चरित अपार ।
कछु रसमय लीला कही सुनो ज्ञानको सार ॥
ललित ललित लीला करीं, प्रभु लैके अवतार ।
जो गावैं ध्यावैं सुनैं, ते पावैं भवपार ॥

यों लैके अवतार श्याम बल असुर संहारे ।
 भारभूत भूपाल महाभारतमहँ मारे ॥
 भूको भार उतारि जानि निज कुलकूँ दरपित ।
 ताहूको संहार करन हरि सोचत हरषित ॥
 बिप्रनि कुपित कराइके, यदुकुल शाप दिवाइके ।
 गमने प्रभु निज धामकूँ, लीला ललित दिखाइके ॥

शौनक पूछें—सूत ! शाप बिप्रनि च्यौ दीन्हों ।
 च्यौ हरिने संहार स्वयं निज कुलको कीन्हों ॥
 सूत कहें—व्रत चतुर मास हित आये ऋषि मुनि ।
 पिंडारकमहँ रहे गये यादवकुमार सुनि ॥
 नारि बेष करि शाम्बको, पूछत—प्रसव करै कहा ।
 कहें क्रोध करि मुनि—जनै, कुलनाशक मूसल महा ॥

द्विजनि शाप सुनि कुमार भये अति दुखित डराये ।
 साम्ब उदरतँ मुसल भयो लखि सब घबराये ॥
 थर थर काँपत आइ नृपहिं सब वृत्त बतायो ।
 उग्रसेन सुनि सकल मुमल तुरतहिं रितवायो ॥
 चूरौ अरु लोहो बच्यो, फेंक्यो सागरमहँ जवाहँ ।
 चूरौ बहि तटपै लग्यो, भये एरका वृत्त तबहिँ ॥

जो लोहेकी कील बची सो सफरी खाई ।
 उदर फारि सो जरा ब्याध सर नौक लगाई ॥
 यदुकुलको संहार साज सबरो ई साज्यो ।
 महाकालको कठिन क्रूर अब घंटा बाज्यो ॥
 सखा और निज जनककूँ, तत्व ज्ञान अन्तिम दयो ।
 नारद मुनि बसुदेवतँ, उद्ववतँ आपुहिं कह्यो ॥

अब नारद बसुदेव सुनहु सम्बाद प्रथम मुनि ।
 भजै मोह भ्रम सकल सरल उपदेश सुखद सुनि ॥
 एक दिवस बसुदेव भवन नारद मुनि आये ।
 सब विधि करि सत्कार मृदुल आसन बैठाये ॥
 बोले श्रीबसुदेव जी—मुनिवर ! अब हम का करें ।
 देहु सुगम उपदेश वर, अनायास जगतै तरे ॥

माया मोहित भयो कश्यो मैने तप सुत हित ।
 अब समुक्तयो यह रहस लगायो प्रभुचरननि चित ॥
 बोले नारद—नृपति ! प्रश्न अति सुन्दर कीयो ।
 कृष्णपिता हूँ मोइ प्रश्न करि आदर दीयो ॥
 नव योगेश्वर जनकको, भयो सुखद सम्बाद वर ।
 जो सब देशनि सब समय, है सबकूँ कल्याणकर ॥

ऋषभतनय शत भये, इक्यासी बिप्र कहाये ।
 नव द्वीपनि नव नृपति भूप बड़ भरत बनाये ॥
 कबि, हरि, आबिर्होत्र, पिप्पलायन, करभाजन ।
 अन्तरिक्ष अरु चमस, दुर्मिल अरु प्रबुध योगिगन ॥
 नव योगेश्वर बिदित जग, जनक सभामहँ सब गये ।
 मैथिल मन अति मुदित हूँ, परमारथ पूछत भये ॥

बोले बिज्ञ बिदेह—बिप्रगन ! बात बतावे ।
 जा जगमहँ का सार भागवत धर्म सुनावे ॥
 जिनि धरमनिक्कूँ पालि जगत्के बन्धन दूटे ।
 लोक और परलोक जीवके भय सब छूटे ॥
 जनक प्रश्न सुनि मुनिनिमें, तै जो कबि मुनि ज्येष्ठ हैं ।
 भूपति तै कहिबे लगे, जो सबई बिधि श्रेष्ठ हैं ॥

कवि बोले-नृप! अजित चरन चिन्तन ही भयहर ।
 सुगम भागवत धरम राजपथ सुन्दर सुखकर ॥
 तन, मन, बानी, बुद्धि आदितै' करै करम जो ।
 कृष्णार्पण करि देइ न फिरि बन्धन कारक सो ॥
 प्रभु लीला नितनित सुनै, नाम गान निरभय करै ।
 नाचै गावै नेह भरि, हँसि रोवै गिरि गिरि परै ॥

लोक लाजकूँ त्यागि पुकारै प्रभु अब आओ ।
 हरि ! नारायण ! कृष्ण ! कृपालो दरश दिवायो ॥
 हूँ के' सदा असंग त्यागि संकोच सबनिको ।
 करै मधुर स्वर सतत कीरतन हरि नामनिको ॥
 करत करत कीर्तन कलित, होहि प्रेम प्रभु पद'नमहँ ।
 तव निरखै निज इष्टकूँ, जीव चराचर सबनिमहँ ॥

वृत्त, नीरनिधि, नदी, सरोवर, पुर, बन, भूधर ।
 पृथिवी, जल, अरु अनिल, अनल, नभ, नखत, चराचर ॥
 सबकूँ प्रभुको रूप समुक्ति निज शीश नवावै ।
 आदर सबको करै भेद मनमहँ नहिँ लावै ॥
 भगै भूख भोजन करत, तुष्टि पुष्टि हूँ होहि ज्यों ।
 भजन करत प्रभु प्रेम अरु, होहि ज्ञान बैराग्य त्यों ॥

पुनि नृप कहें विदेह—भागवत कैसे जानें ।
 हैं ये भगवद्भक्त कौन बिधितै' पहिचानें ॥
 सबई देहिँ बताइ भागवत लक्षण भगवन ।
 भक्त आचरन, चलन, मिलन, बोलन अरु चितवन ॥
 मुनि कवि भूपति प्रश्न सुनि, निरखे मुनिवर हरि जबहिँ ।
 समुक्ति बन्धु संकेत हरि, लगे दें उत्तर तबहिँ ॥

हरि बोले—नृप ! श्रेष्ठ भक्त हरि सबहिँ निहारे ।
 अपनेमहँ लखि सबनि न कबहूँ असत् उचारे ।
 ये तो उत्तम भक्त मध्य कछु भेद जनावैं ॥
 खलनि उपेक्षा, नेह भक्त, हरि प्रेम ददावैं ॥
 अधम न पूजहिँ भक्तकूँ, प्रभुहिँ न निरखैं सबनिमहँ ।
 प्रतिमा पूजन करहिँ नित, लहैं सिद्धि कछु दिननिमहँ ॥

करै सकल व्यवहार होहि आसक्त न तबहूँ ।
 समुझै माया सबहिँ करै नहि सुख दुख कबहूँ ॥
 जो सांसारिक धर्म न मोहित तिनिमहँ होवै ।
 हँसै न लखि अनुकूल निरखि प्रतिकूल न रोवै ॥
 जनम, करम, आश्रम, बरन, जाति भेद मनतैं तजैं ॥
 ते ई भगवत् भक्त बर, प्रेम सहित प्रभुकूँ भजैं ॥

परम भागवत मैं मेरीमहँ नाहिँ मुलावैं ।
 हरि सुमिरनके हेतु राज बैभव ठुकरावैं ॥
 सुमिरन निशि दिन करे नहीँ प्रभु-पद बिसरावैं ।
 समदरसी बनि जायँ परमपद तबई पावैं ॥
 पल पल सेवहिँ हरि चरन, शरन गहैं सब कछु सहैं ।
 तिनकूँ ऋषि मुनि वेदवित्, भक्त-मुकुटमणि बर कहैं ॥

इति श्रीभागवत चरितके सप्ताहमें यदुकुल शाप, नारद-बसुदेव
 सम्बाद नामक प्रथम अध्याय समाप्त ।

(पाक्षिक पारायण — तेरहवें दिवसका का विश्राम)
 ५१

अथ द्वितीयोऽध्यायः

(२)

बोले मैथिल भूप—नाथ ! मम रोग मिटाओ ।
 कृष्ण कथामृत मधुरसरसकल्लु अधिक पिआओ ॥
 होहि न मेरी वृत्ति चारु प्रभु चरित सुनावें ।
 माया अति बलवती बताई तिहि समुझावें ॥
 अन्तरिच बोले तबहिँ, त्रिगुनमयी माया प्रबल ।
 सर्ग स्थिति लयकारिनी, सृजत बाधु, भू, जल, अनल ॥

हरि स्वरूप निज जीव भोग अरु मोक्ष करनकूँ ॥
 पंचभूततैं रचे दीर्घ अरु लघु प्राणिनकूँ ॥
 तिनि सबमहँ प्रभू प्रविशिकरनमनबनि भोगनिकूँ ।
 भोगैं है आसक्त आतमा मानै इनिकूँ ॥
 करम बासना युक्त है, कैं भटकै संसारमहँ ।
 पुनि पुनि जनमै पुनि मरै, पश्यो प्रवाह असारमहँ ॥

प्रकृति और महत्त्व, अहं तैजस रज तममय ।
 तामसतैं सब भूत करन राजसतैं निश्चय ॥
 करननिके सब देव और मन तैजस संभव ।
 हैकें सध उत्पन्न रहें फिरि प्रलय होहि जब ॥
 तब ये सब प्रतिलोमतैं, मिलैं जाय अव्यक्तमहँ ।
 यह माया भगवानकी, रहै सदा परतत्वमहँ ॥

कैसे माया तरें, नृपतिने पूछ्यो जब ई ।
मुनि मुनिप्रवर प्रबुद्ध भूपतैं बोले तब ई ॥
समुझै घर, धन, करम, नाशयुत गुरु चरननि ढिँग ।
जावै सीखै धरम भागवत भक्तनिके संग ॥
सतसंगति, मैत्री, दया, बिनय शौच तप तितिचा ।
बिनय बड़नि प्रति नेह सम, दीननिके प्रति सद्विच्छा ॥

रहै मौन स्वाध्याय सरलता चितमहँ धारै ।
ब्रह्मचर्यव्रत धारि न काहू जीवहिँ मारै ॥
सुख दुखमहँ सम रहै निहारे सब थल हरिकूँ ।
रहै सदा एकान्त न समुझै अपनो घरकूँ ॥
पट पबित्र पहिनै परम, यथालाभ संतोष नित ।
सतत भागवत धर्मके, ग्रन्थनिमें ही देहि चित ॥

करै न निन्दा भूलि अन्य शास्त्रनिकी कबहूँ ।
चाहै सरबसु मिलै अनृत बोलै नहिँ तबहूँ ॥
संयम मन अरु बचन करमतैं नित ई राखै ।
शम दमको आचरन करै हरि चरितनि भाखै ॥
जनम करम गुन गन श्रवन, श्रीहरिके नित नित करै ।
कथा कीरतन ध्यानमहँ; रहै मगन माया तरै ॥

यज्ञ करै मख, दान, मंत्रजप, तप सब नियमित ।
सुत, दारा, गृह, प्रान करै सब हरिकूँ अरपित ॥
हरि भक्तनि सरबस्व समुझि सेवै सुख पावै ।
हरि चरचाकूँ त्यागि अनत नहिँ चित्त चलावै ॥
इन धरमनि आचरनतैं, प्रेम भाव होवै उदित ।
भक्ति भाव भावित भगत, नित नाचत रोवत हँसत ॥

नारायण हरि कौन, नृपति ने प्रश्न करयो जब ।
 मुनिके बोले बिहँसि पिप्पलायन मुनिवर तब ॥
 जगकी उत्पति प्रलय अकारन ह्वै के कारन ।
 बाहर भीतर रहै सबनिमहँ हरिनारायण ॥
 स्वयं प्रकाशित परावर, नेति निगम आगम कहै ।
 प्रान, करन, अन्तःकरन नित, जिनतैं जीवन लहै ॥

त्रिवृत् और महत्त्व सूत्र, हंकार, सकल सुर ।
 करत, अरथ, सत, असत ब्रह्म ही सब थल अक्षर ॥
 साक्षी चेतन शुद्ध नित्य कूठस्थ कहावै ।
 जाग्रत, स्वप्न, सुषुप्ति सबनिको दृश्य दिखावै ॥
 इच्छा जब उत्कट बढ़ै, कब पाऊँ प्रभु पद कमल ।
 करमयोगतै होहि मन, शुद्ध ब्रह्म दीखै अमल ॥

इति श्रीभागवतचरितके सप्ताहमें नवयोगेश्वरोपदेश
 नामक द्वितीय अध्याय समाप्त ।

अथ तृतीयोऽध्यायः

(३)

करमयोग अब कहैं, जनक जब बोले मुनितैं ।-
 मुनिवर आविहोत्र ! बिहँसिके बोले तिनितैं ॥
 करमयोग अति कठिन होहिँ मोहित हू ज्ञानी ।
 करमफंदमें फँसे न समुझै नर अज्ञानी ॥
 करम करै निष्काम नित, बेद बिहित प्रभु प्रीति हित ।
 प्रतिमापूजन प्रेमतैं, करै होहि तब शुद्ध चित ॥

भीतर बाहर करन शुद्ध करि प्रतिमा सम्मुख ।
 बैठे प्राणायाम करै तजि जगके सुख दुख ॥
 पूजाकी सब वस्तु जथाक्रम सब ई धरिकैं ।
 स्वयं अङ्ग करन्यास करै प्रतिमामहँ करिकैं ॥
 मूलमंत्र पढ़िके करै, प्रतिमा पूजन प्रेमतैं ।
 अङ्ग उपाङ्ग सपार्षदहिँ, पूजै नित प्रति नैमतैं ॥

पाद्य, अरघ, आचमन, स्नान, नाना पट, भूषण ।
 गन्ध, पुष्प, तिल, हार, धूप, दीपक, बर ब्यंजन ॥
 पुष्पीफल, तांबूल, दक्षिणा, नीराजन, करि ।
 क्षमा प्रार्थना स्तोत्र दंडवत पृथिवीपै परि ॥
 यों तन्मय हूँके करै, पूजन प्रभु परमेशको ।
 होवै तबहीं नाश सब, जगके दुख भय क्लेशको ॥

श्रीहरिको निरमाल्य गन्ध माला सिर धारै ।
 पूजित बिग्रह यथाथान धरि नाम उचारै ॥
 यों जल, थल, रवि, अनल, अतिथि, प्रतिमाके माहीं ।
 यजन कृष्णको करै मुक्ति पद दुरलभ नाहीं ॥
 अरचन, पूजन, कीरतन, अवतारनिको नित करै ।
 त्रिभुवनकूँ तारै स्वयं, इक्षिस पीढ़िनि संग तरै ॥

भूप कहें—अवतारचरित सब देव ! सुनाओ ।
 हुमिल कहें—अब चित्त नृपति मम ओर लगाओ ॥
 हँ अवतार अनन्त अन्त बेदहु नहिँ पावें ।
 तोऊ कछु कछु गुननि सहित हरि चरित सुनावें ॥
 प्रथम पुरुष वे ई भये, अज, हरि, हर नर नरायन ।
 बदरीबनमहँ तप करत, काम क्रोधतैं बिगत मन ॥

हंस और सनकादि ऋषभ हय ग्रीव मत्स्य हरि ।
 कियो अवनि उद्धार बेद बाराह रूप धरि ॥
 पुनि प्रभु कछुआ बने पीठ मंदर गिरि धार्यो ।
 बनि हरि गजकूँ ग्राह बक्त्रतैं खैंचि उबार्यो ॥
 बालखिल्य उद्धार करि, इन्द्र शाप रक्षा करी ।
 असुर बन्दिनी बनी बहु, सुर-ललननि विपदा हरी ॥

कलप कलप मनु भये लयो अवतार सबनिमहँ ।
 लयो सुरनिको पक्ष सुरासुर सबहिँ रननिमहँ ॥
 लै बामन अवतार छले बलि त्रिभुवन पाल्यो ।
 परशुराम बनि गये क्षत्रकुल पापी मार्यो ॥
 रामरूपतैं उदधिपै, कर्यो सेतु रावन हन्यो ।
 जग-उद्धारक मुक्तिप्रद, चरित-सेतु तातैं बन्यो ॥



नर नारायण के तप में अप्सराओं का विघ्न पृ० ८०६



कलिकाल में भगवन्नाम-कीर्तन पृ० ८०८

कृष्ण रूप धरि करें कलित क्रीड़ा कंसारी ।
 बुद्ध रूपतैं निरदय हिंसा नाथ निवारी ॥
 कल्कि लेहि अवतार अंत करि कलिको केशव ।
 सतयुगको आरम्भ करे करि क्रूरनि निज बश ॥
 अवतारनिकी कल्लु कथा, कही अधिक संक्षेपमहँ ।
 इरि फिरि के ये ही चरित, सब पुरान अरु बेदमहँ ॥

निमि पूछे—प्रभु ! भक्तिहीन गति कैसे पावे ।
 कहे चमसमुनि—नृपति ! प्रश्नको मरम बतावे ॥
 बर्णाश्रम उत्पन्न करे हरिजनक कहावे ।
 आदर तिनि नहिँ करे भजै नहिँ तिनि गिरि जावे ॥
 जो भोरे अनपढ़ बिबस, भक्त तिनिहिँ अपनाइके ।
 कथा कीरतन सुलभ करि, तारे नाम सुनाइके

कल्लु पाखंडी अज्ञ अंत की संत सुनावे ।
 फलश्रुति बाणी मधुर कहें बहु बात बनावे ॥
 कामी, क्रोधी, क्रूर, काम्य कल्लु करम करावे ।
 भक्ति, भक्त, भगवान सबनिक्खु ढोग बतावे ॥
 धन, बैभव, कुल, रूप, बल, बिद्याके अभिमानमें ।
 भरे रहै मन देहिँ नहिँ, भक्त-बछल भगवानमें ॥

मैथुन मदिरा मांस बेदबिधि मूर्ख बतावे ।
 बेद निवृत्ति हित कहें ताहि बिधि कहि समुझावे ।
 इच्छा नियमित करन व्याह मख बिबिध बताये ।
 सुत हित कह्यो बिबाह यज्ञ आलभन जताये ॥
 सौत्रामणि मखमहँ सुरा, सूँधि नियम पूरो करै ।
 जो बिधान इनकूँ कहै, सो नर नरकनिमहँ परै ॥

धरम अरथ अरु काम नरक, भू, नाक घुमावै ।
 पाये बिनु पद परम शान्ति नर कबहुँ न पावै ॥
 नित प्रति नव नव सुघर मनोरथ महल बनावै ॥
 तजि घर, सुत, धन, सुहृद् मृत्युके मुखमहँ जावै ।
 हौवै दुरगति भक्ति बिनु, उभय लोकमहँ नरनिकी ॥
 भक्ति भवनमहँ प्रबिसिके, होइ सुगति इन सबनिकी ।

निमि पूछें—युगधर्म सबिधि मुनिवर समुक्तावे ।
 युग युगमहँ हरि रूप, नाम अरु बरन 'बतावे' ॥
 करभाजन मुनि कहें—चारि युग चारि रूप धरि ।
 सतयुगमहँ बटु बनै चतुरभुज शुक्ल वरन हरि ॥
 तपतै ठब तिनिक्कू भजै, प्रेम करै तपधाम तै ।
 करै कीरतन हंस, मनु, ईश्वर आदिक नाम तै ॥

त्रेतामहँ मख रूप त्रयीमय स्नुक स्नुब धारी ।
 रक्त वरन भुज चारि रूप धरि रहें मुरारी ॥
 पृथिनगर्भ, उरुगाय, वृषाकपि, विष्णु उरुकम ।
 यज्ञ आदि लै नाम करै कीर्तन नर अनुपम ॥
 द्वापरमहँ कारे बने, पीताम्बर आयुध सहित ।
 तन्त्र बेद विधितै तिनहिं, पूजै नर चित-समाहित ॥

नर नारायन बासुदेव संकर्षण आदिक ।
 नाम कीरतन करै पूजि प्रभु श्रेष्ठ उपासक ॥
 कृष्ण कान्तिमय कृष्ण वरन कलि काल सपार्षद ।
 करिके कीर्तन यज्ञ सहजमहँ पाहिँ परमपद ॥
 राम कृष्ण अवतार गुन, नामनिकी कीर्तन करै ।
 केवल कीर्तन ही करत, नर भवसागरतै तरै ॥

या कलि-गुनतै' रीमि जनम कलिमहँ चाहें सुर ।
 होवे' कलिमहँ भक्त करै' कीर्तन धरि हरि उर ॥
 तजि सब बिषय बिलास शरन हरिकी जे जावै' ।
 सब रिनतै' हूँ उरिन श्यामके धाम सिधायै' ॥
 अशुभ करम यदि भूलतै', कबहुँ भक्ततै' बनि परै' ।
 तिनकूँ शरनागत बछल, अघहारी श्रीहरि हरै' ॥

नव योगेश्वर दयो ज्ञान निमिकूँ हूँ प्रमुदित ।
 अति प्रसन्न नृप भये गये हूँकें मुनि पूजित ॥
 नारद मुनि बसुदेव प्रश्नको उत्तर दीन्हों ।
 शूर-तनयने ब्रह्म-तनयको आदर कीन्हों ॥
 मुनि बोले—बसुदेवजी ! तुम सहपत्नी धन्य अति ।
 जगमहँ जिनके सुत भये बासुदेव श्रीजगतपति ॥

यों दैके' उपदेश गये नारदमुनि इत उत ॥
 मोह छोड़ि बसुदेव देवकी दयो कृष्ण चित ॥
 सूत कहें—यह सुखद चरित निरमल अति पावन ।
 मोह बिनाशक मुक्तिकरन जग दुःख बिनाशन ॥
 यों नारद बसुदेवको, प्रश्नोत्तर मुनिवर भयो ।
 कहूँ ज्ञान अब अति बिषद, जो प्रभु उद्धवतै' कह्यो ॥

इति श्रीभागवतचरितके सप्ताहमें नारद-बसुदेव सम्बाद
 समाप्ति नामक तृतीय अध्याय समाप्त ।

अथ चतुर्थोऽध्यायः

[४]

एक दिवस बसु, रुद्र, पितर, ऋषि, मुनि, शिव, सुरगन ।
 सब मिलि प्रभुढिँ ग गये द्वारका सँग चतुरानन ॥
 नन्दन बनके सुमन बिपुल प्रभुपै बरसाये ।
 नव जलधर सम छटा निरखि सब अति हरषाये ॥
 करि दरशन घनश्यामके, दुःख शोक सबके भगे ।
 सुललित पद अति मधुर स्वर, तैँ इस्तुति करिबे लगे ॥

करि बिनती अज कहै—नाथ ! भूभार उताड़यो ।
 पापी असुरनि मारि देव द्विज दुःख निवाड़यो ॥
 हम सब प्रभुवर ! खड़े कृपा करि हमें निहारे ।
 अब न रह्यो कछु काम धाम घनश्याम पधारे ।
 हँसि बोले रुक्मिनि-रमन, शेष अबहिँ कछु काम अज ।
 यदुकुलको संहार करि, तब आऊँ पुनि धाम निज ॥

हरि आयसु सिर धारि देव निज धाम सिधारे ।
 पुरी द्वारकामाँहिँ सबनि उत्पात निहारे ॥
 बोले सबतैँ श्याम—नित्य अपशकुन दिखावे ।
 सब मिलि चलो प्रभास पितर सुर पूजि नहावे ।
 करिबे शान्ति अनिष्टकी, सब चलिबे उद्यत भये ।
 हरि-हियकी सब समुझिके, उद्धवजी प्रभु दिँग गये ॥

बोले—हे विश्वेश ! आपुकी इच्छा जानी ।
तजि पृथिवी निजलोक गमनकी मनमहँ ठानी ॥
रहूँ तुम्हारे बिना नाथ ! नहीं जगके पाहीं ।
तजै न मोकूँ देव ! संग लै चलें गुसाई ॥
प्रभु ! प्रसाद, पट, गंध, स्रक्, सिर धरि कीर्तन करिङ्गे ।
तब चरितनि चिन्तन करत, दुस्तर माया तरिङ्गे ॥

उद्धवकी सुनि बिनय बिहँसि बोले वनवारी ।
हाँ, मैंने निजलोक गमनकी करी तयारी ॥
यदुकुल होवै नाश धरम अब होहिँ तिरोहित ।
तुम तजिके सब मोह जाउ बदरीबन तप हित ॥
जो मन-इन्द्रिय विषय हैं, मायामय सब मानिके ।
त्यागो गुन अरु दोष भ्रम, आत्मरूप जग जानिके ॥

आत्मा अद्वय अजर अमर व्यापक सब थलमें ।
जगमहँ एक समान रहें रबि शशि नभ जलमें ॥
जाकूँ ऐसो ज्ञान न सो जगमहँ दुख पावै ।
दृश्य चराचरमाँहिँ सबनिमहँ ब्रह्म लखावै ॥
ज्ञानी बालकके सरिस, भेद भावतें रहित है ।
नहिँ सोचे वह स्वप्नमें, यह अबिहित यह बिहित है ॥

कर्म त्याग संन्यास धरम सुनि बोले उद्धव ।
विषय गहन हौँ अज्ञ सरलतातें कहु केशव ॥
काकी जाऊँ शरन आपु सम और न पाऊँ ।
आयो तुमरी शरन चरनमहँ शीश नवाऊँ ॥
उद्धवकी सुनिके बिनय, बोले प्रभु परमात्मा ।
उपदेशक, गुरु, सुहृद, रिपु, है अपनी ही आत्मा ॥

नाना योनि बनाइ सबनिमहँ निवसूँ भाई ।
 किन्तु मोइ नरयोनि सबनितैँ अति सुखदाई ॥
 करिके' मनुज बिचार भेद मेरो सब जानैँ ।
 इन्द्रिय मन धी परै' मोइ साधक पहिचानैँ ॥
 नृप यदु अरु अवधूतको, भयो सुखद संवाद जो ।
 अति पावन अति ज्ञानमय, कहूँ प्रेमतैँ सुनहु सो ॥

एक दिवस यदु गये निहारे बनमहँ ज्ञानी ।
 थूल, नगन, निरभीक, युवक कवि सरल अमानी ॥
 नित्य मगन अवधूत देखि नृप पूछहिँ मुनिवर ।
 बिचरो बालक सरिस बुद्धि कहूँ पाई सुखकर ॥
 दक्ष मधुर भाषी सुघर, तोऊ जड़ उनमत्त सम ।
 निरधन है बिचरो सुखी, काम अग्निनिमहँ तपहिँ हम ॥

हँसिबोले अवधूत—भूमि, नभ, अनिल, अनल, जल ।
 रवि, शशि, अजगर, जलधि, कबूतर, हरिन, रुदनबल ॥
 मधुमक्खी, करि, मीन, पिंगला बेश्या, कुररी ।
 शरकृत, भृंगी, सरप, कुमारी कन्या, मकरी ॥
 मधुहारी अरु पतङ्गा, गुरु चौबीस बनाइके ।
 सबईतैँ शिछा लई, इन सबके ढिँग आइके ॥

होवै' नित उत्पात अवनिपै सब ई खोदें ।
 कहूँ चाँदी कहूँ कनक खोदिके' नर नित सोदें ॥
 तऊ न होवै कुपित धीरता मनमहँ धारै ।
 ज्ञानीको सत्कार करे चाहें तो मारै ॥
 माला मेली कण्ठमें, काहूने गारी दर्ई ।
 रहै सदा ई एक रस, यह शिछा भूतैँ लई ॥

परकारजमहँ निरत रहैं सब अँगतें नग गिरि ।
 पत्र, पुष्प, फल, मूल, काष्ठ, बलकल, छाया करि ॥
 देहिँ सबनि विश्राम करें निज जीवन अरपित ।
 आश्रय, जल, आहार दान करि होवें प्रमुदित ॥
 नित प्रति पर उपकारकी, शिद्दा गिरि बृद्धनि दर्ई ।
 कहूँ ताहि जो बायुकूँ, गुरु बनाइ शिद्दा लई ॥

केवल करि आहार प्रान सन्तुष्ट रहैं नित ।
 है सुन्दर रसयुक्त पदारथ नहिँ देवै चित ॥
 प्रान बायुतें लीनी मैने संयम शिद्दा ।
 मिलै भाग्यवश रुखी सूखी जैसी भिद्दा ॥
 ताकूँ पावै प्रेमतैं, प्रान मात्र धारन करै ।
 कबहुँ न रसना स्वादके, चक्करमहँ योगी परै ॥

गन्ध बहन नित करै रहै निरलेप अनिलहू ॥
 परस न ताकूँ करै गन्ध दुरगन्ध तनिकहू ॥
 यों ही योगी रहै बिरत बिषयनितें नित नित ।
 तनके आश्रय रहै देहि नहिँ तिनके गुन चित ॥
 होहि गन्धमहँ लिप्त नहिँ, अनल सर्वगामी सतत ।
 शिद्दा लई असंगकी, बिझ बायुवत नित बिरत ॥

करिकें गुरु आकाश लई जो शिद्दा भूपति ।
 कहूँ ताहि अब सुनहु आतमा है असङ्ग अति ॥
 व्याप्त चराचरमाँहि सर्वगत अनुगत सबके ।
 सूत्र व्याप्त स्रक्माँहि रहें मनिका बश तिनके ॥
 सीखी अपरिद्धिन्नता, आत्मा देह असङ्गता ।
 इन भूतनितें आतमा, की होवै नहिँ एकता ॥

तेज किरन आकाशमाँहिँ चहु दिशितैं भ्राजैं ।
 जल सीकर नित व्याप्त बायु सरवत्र बिराजैं ॥
 पृथिवी जनित पदार्थ रहैं सब ताके माहीं ।
 भरे रहैं नित मेघ लिप्त तिनमहँ नभ नाहीं ॥
 ह्वैकें मुनि नित समाहित, करै भावना गगनमहँ ।
 आत्मा शुद्ध अनादि अज, फँसै न तीनिहु गुननिमहँ ॥

जल गुरुतैं गुन चार भूप सीखे अति सुन्दर ।
 नित स्वभावतैं शुद्ध रहै मुनि बाहर भीतर ॥
 स्नेहयुक्त बनि सबनि प्रेममहँ नित्य न्दवावै ।
 कहिकें कड़वे बचन चित्त नहिँ कबहुँ दुखावै ॥
 तीर्थ रूप सबकूँ बनै, सदा तृप्त सबकूँ करै ।
 हँसै हँसावै सरल चित, दुखियनिके दुखकूँ हरै ॥

दरशन दैकें करै सबनिकूँ शुद्ध सरल चित ।
 परस प्रेमतैं करै करै नित सब प्राणिनि हित ॥
 कृष्ण कीरतन करै कथा हरि सुनै सुनावै ।
 परस्वारथमहँ निरत सबनिकूँ धीर बँधावै ॥
 जीवन ही जलकूँ कह्यो, सृष्टि प्रथम जलतैं भई ।
 उत्तम शिचा नीर गुरु, तैं राजन् ! मैंने लई ॥

तेजस्वी मुनि रहै अग्निके सरिस निरन्तर ।
 तपतैं ह्वै देदीप्य प्रकाशित भीतर बाहर ॥
 लुभित होहि नहिँ कबहुँ पेट ही पात्र बनावै ।
 भिक्षामें जो मिलै ताहि ताही छिन खावै ॥
 रहै सर्वभक्षी तऊ, कबहुँ न मल धारन करै ।
 कहूँ गुप्त कहूँ प्रकट ह्वै, भिक्षादातनि अघ हरै ॥

भेद भाव नहिँ करै अन्न सबईको खावै ।
 जामें प्रबिसै अनल रूप ताके है जावै ॥
 लेवै शिखा यही आत्मा सबके माहीं ।
 प्रबिसै है तद्रूप लिप्त तिनिमहँ सो नाहीं ॥
 लये आठ गुन अगिनितैं, तातैं ते मम गुरु भये ।
 कहूँ तिनिहिँ अब चन्द्र गुरु, करि तिनतैं जो गुन लये ॥

चन्द्र एकरस रहै स्वयं निजलोक प्रकाशित ।
 कृष्णपक्षमहँ घटै शुक्लमहँ बढै कला नित ॥
 सोचै योगी जिही आत्मा अजर अमर अज ।
 गरभ, जनम अरु जरा मृत्यु तनके सब कारज ॥
 छिन छिन पल पल जगतमहँ, परिवर्तन होवै सतत ।
 चलत रहत तातैं कहत, जाकूँ सब मुनिजन जगत ॥

अग्नि शिखा छिनमाँहिँ प्रकट हैकेँ छिपि जावै ।
 एक नष्ट है जाय दूसरी तत्छिन आवै ॥
 जल उद्गमतैं निकसि बहै फिरि नूतन पुनि पुनि ।
 बहै ग्रहन तब करै थान पुनि बीते बिन्दुनि ॥
 जग परिवर्तनशील है, असत् अभद्र अनित्य है ।
 परिवर्तन तनमहँ सकल, आत्मा चेतन नित्य है ॥

अब जो शिखा लई सूर्यतैं ताहिँ सुनाऊँ ।
 गुरु सूरज च्यौँ कश्यो हेतु ताकौ समुझाऊँ ॥
 निज किरननितैं खींचि सलिल ग्रीषममहँ लेवै ।
 बरषामहँ बरसाइ फेरि प्रानिनिक्कूँ देवै ॥
 इन्द्रनितैं स्वीकारिकेँ, त्यों ही त्रिगुन पदार्थ सब ।
 समय पाइ त्यागत तुरत, होहि न हर्ष विषाद तब ॥

जलपात्रनिमहँ पृथक् सूर्य बहु रूप लखावै ।
 टेढ़े मेढ़े गोल पात्र अनुरूप दिखावै ॥
 प्रतिबिम्बित लखि अन्न पात्रमहँ रविहिँ जनावै ।
 कहैं अन्न परिच्छिन्न बहुत कहि ताहि बतावै ॥
 सूर्यविम्ब सम मुनि कहैं, आत्मा अद्वय सर्वगत ।
 अब कपोततै लयो गुन, कहूँ ताहि नृप देउ चित ॥

काऊ बनके सघन वृक्षपै रहै कबूतर ।
 पत्नी ताकी रूपवती गुण तामें सुन्दर ॥
 करै परसपर प्रेम राग नव नित्य हड़ावै ।
 मिलि जुलि सँग फिरै संगमें सोवै खावै ॥
 कछुक कालमें चार सुत, जने नेह दम्पति करै ।
 शिशु कलरव कोमल परस, तैं दोउनिके हिय भरै ॥ ॥

दोऊ इक दिन गये चुगन खगघाती आयौ ।
 सुन्दर शावक निरखि डारि कण जाल विछायौ ॥
 बालक कणके लोभ जालमहँ फँसि घबराये ।
 तब ई लैके चुगो तुरत दोऊ तहँ आये ॥
 लखि कबूतरी बन्ध-शिशु, स्वयं फँसी पति फँसि मश्यो ।
 करै मोह मुनि कबहुँ नहिं, दिव्य ज्ञान हियमहँ धश्यो ॥

अजगर गुरु करि लई सीख माँगन नहिं जावै ।
 रूखी सूखी अधिक न्यून पावै सो खावै ॥
 यदि भोजन नहिं मिलै याचना करै न कबहुँ ।
 होहि चाहिँ उपवास करै चिन्ता नहिं तबहुँ ॥
 चिन्तातै कारण न कछु, कबहुँ बनै चितमहँ धरै ।
 रच्यो उदर सो भरैगो, मूरख च्यौ चिन्ता करै ॥

भाग्यमाँहिँ जो होहि देह सुख दुःख प्रबलहू ।
 इन्द्रिय, मन, बल युक्त होहि शारीरिक बलहू ॥
 तबहुँ न चिन्ता करै तानिकेँ सोवे चादर ।
 यह शुभ यह है अशुभ कर्मको करै न आदर ॥
 काहुँतै कड़वो बचन, हित अनहित कबहुँ न कहै ।
 अजगर सम निद्रित सतत, निर्व्यापार बन्यो रहै ॥

जलनिधि कीन्हीं कृपा दया करि दीक्षा दीन्हीं ।
 निस्तरंग जलराशि निरखि शुभ शिक्षा लीन्हीं ॥
 शान्त और गम्भीर रहै सागर सम ज्ञानी ।
 थाह न समुझै मनुज पार नहिँ पावहिँ प्राणी ॥
 चाहैँ बहु पूजा करहिँ, अथवा ताड़न करहिँ जन ।
 घटना कैसीहू घटै, कबहुँ न होवै क्षुभित मन ॥

ज्यों अगनित जलराशि सहित सरिता सागरमहँ ।
 जावैँ तऊ न वृद्धि होहि पयनिधिके पयमहँ ॥
 ओषममहँ सुखि जायँ घटै नहिँ तबहुँ पानी ।
 त्यों प्रिय पाइ पदार्थ होहि हर्षित नहिँ ज्ञानी ॥
 सुख दुखमहँ सम भावकी, शिक्षा सागरतैँ लई ।
 लखि समता गम्भीरता, ममता मेरी नसि गई ॥

अब पतङ्ग गुरु कश्यो कहूँ कारन सो भूपति ।
 देखि दीपकी लोय फँसै तामें खल दुरमति ॥
 त्यों ही कुण्डल कनक कामिनी पद अति सुन्दर ।
 भोग बुद्धि करि फँसै दैवकी माया दुस्तर ॥
 रूप अग्निनिमहँ भसम तनु, करे होहि आसक्त अति ।
 सुन्दरतामहँ सुख समुझि, जगमहँ होवै नहिँ सुगति ॥

तातैं सुन्दर नारि निरखि नहिँ चित चलावै ।
 नर सुबेष लखिनारि कबहुँ मन नाहिँ डिगावै ॥
 जो धारै नहिँ सीख व्यर्थ नर देह गँवावै ।
 हूँ पतङ्ग सम पतित मृत्युके मुखमहँ जावै ।
 यह सुन्दर शिखा सुखद, लई पतँग गुरु स्वयं करि ।
 मधुमक्खी ज्यों गुरु करी, सुनहु ताहि अब धीर धरि ॥

मुष्पनितैं मधु लेइ न तिनिको रूप बिगारै ।
 त्यों ही मुनि मधुकरी-वृत्ति भिन्नाहित धारै ॥
 सुमननितैं गहि सार स्वार्थ नित अपनो साधै ।
 त्यों शास्त्रनिको सार समुक्ति हरिकूँ आराधै ॥
 इत उततैं अति यत्न करि, मक्खी मधु छत्ता धरै ।
 त्यों यति कबहुँ भूलतैं, संचय नहिँ कबहुँ करै ॥

करपै भिन्ना लेइ उदरमें जितौ समावै ।
 जलके तटपै जाइ प्रेमतैं ताकूँ पावै ॥
 बचै अन्न कछु शेष अन्य प्राणिनिक्कूँ देवै ।
 कल या सायंकाल हेतु नहिँ यति धरि लेवै ॥
 त्यागी बनि संचय करै, सो पीछे पछिताइगो ।
 मधुमक्खी मधुहित मरै, त्यों यति हूँ गिरी जाइगो ॥

इक दिन घूमत फिरत गयो नृपवर हाँ बनमें ।
 सोचूँ लखिके बनी काठकी हथिनी मनमें ॥
 कौने यह धरि दई खिलौना बड़ो बनायो ।
 इतनेमें मदमत्त युवक इक हाथी आयो ॥
 प्रबल कामके बेगैतैं, अन्धो हूँ आगे बढ़यो ।
 फँस्यो पैर हथिनी सहित, अन्धे कूआमें गिर्यो ॥

जब कछु आगे बढ़यो यूथ हाथिनिको आयौ ।
 पर हाथिनी सँग निरखियुवक गज मारि गिरायौ ॥
 गुरु गज करिकें लई सीख अतिई उपयोगी ।
 बनी काठकी नारि पैरतैं छुये न योगी ॥
 परनारी है अगिनि सम, काम नेहतैं नित जरै ।
 जो पकरै सो मृत्युको, आलिङ्गन करि वत करै ॥

जोरि जोरिकें धरै लोभबश लोभी धनकूँ ।
 स्वयं खाइ नहिँ देहि अतिथि गुरु बन्धु स्वजनकूँ ॥
 भेद भेदिया लेइ एक दिन चुपके आवै ।
 मधुहारी सम आइ निकारै मधु सब खावै ॥
 रचि पचिकें संग्रह करै, ते देखत रहि जात हैं ।
 राम भरोसे जे रहैं, मेवा मिश्री खात हैं ॥

मैं मेरी करि पहिन लेइ बेड़ी नर पगमहँ ।
 धन काहूको भयो न होगो है नहिँ जगमहँ ॥
 मधुमक्खी करि कष्ट राति दिन शहद जुटावै ।
 भोग कार सकै नहीं काम औरनिके आवै ॥
 मधुहारी गुरु कार सदा, भिक्षा माँगन जात हूँ ।
 गृहा संगृहातैं प्रथम, बाबा बनिकें खात हूँ ॥

बाहड़ बनमें व्याध बिलोक्यो बीन बजावत ।
 ढिँगमहँ जाल बिछाय मधुर स्वर राग अलापत ॥
 सुनि बानाकी तान राग-प्रिय मृग तहँ आयो ।
 आम-गीत सुनि फँस्यो अज्ञ निज प्रान गँमायो ॥
 श्रवण-न्द्रिय आर्धान है, पछितावै अरु सिर धुनै ।
 बनबासी यात भूलिकें, विषय गीत कबहुँ न सुनै ॥

कोकिलकंठी नारि गाइकें चित्त लुभावै ।
 बिषय प्रशंसा करै स्वार्थतैं तुरत गिरावै ॥
 व्याधिनि जाल बिछाय मनुजमृग तुरत फँसावै ।
 ऋष्यशृङ्ग दृष्टान्त शास्त्र प्रत्यक्ष बतावै ॥
 मृग गुरु करि शिक्षा लई, करै राग ब्रजचन्दमहँ ।
 बिषयराग सुनि मृग सरिस, फँसै न जगके फन्दमहँ ॥

मत्स्य करयो गुरु लई सीख रसना बश राखै ।
 लोलुपता बश कबहुँ न अनुचित रसकूँ चाखै ॥
 माँस लोभतैं मत्स्य निगलि काँटेकूँ जावै ।
 फेरि उगलि नहिँ सकै लोभमहँ प्रान गमावै ॥
 होवैं बिषय निवृत्ति जब, शिथिल होहिँ इन्द्रिय सकल ।
 केवल रसना छोड़िकें, यह इन्द्रिय अतिशय प्रबल ॥

है इन्द्रिय आधीन समय सब योंहीं बीते ।
 इन्द्रियजित नहिँ होहि न जब तक रसना जीतै ॥
 रसना संयम सीख लई सफरीतैं राजन् ।
 बेश्या गुरु च्यौँ करी कहूँ ताको अब कारन ॥
 मिथिलापुरमहँ पिंगला, बेश्या अति सुन्दर रहति ।
 आवै कोई नर धनी, बैठी नित आशा करति ॥

इक दिन बैठी रही न कोई कामी आयो ।
 है निराश बैराग्य भयो मन अति पछितायो ॥
 सोचति-हैं अति पतित मनुज तन व्यर्थ गमायो ।
 नित्य कमाऊँ पाप न हरिमहँ चित्त लगायो ॥
 करै कामना पूर्ण का, ये कामी अति लुद्र नर ।
 च्यौँ न भजूँ प्रभुकूँ सतत, जो विश्वम्भर गुणाकर ॥

करि करि पश्चात्ताप पिंगला अतिशय रोयी ।
 आशा छूटी सुखी भई अति सुखतैं सोयी ॥
 आशामें ही दुःख निराशा सुखकी जननी ।
 पावै फल नर अवशि होहि जाकी जस करनी ॥
 शुभ शिखा निरपेक्षता, की बेश्या गुरुतैं लई ।
 कहूँ कुरर पत्नी कथा, जो मेरे सम्मुख भई ॥

मांसखंड लै कुरर बेगतैं नभमहँ जावै ।
 मेरो है जिह मांस सोचि अति हिये सिहावै ॥
 इतनेमें कछु बली बिहँग उड़िके इत आये ।
 निरखि मांस हिय लोभ बढ़यो छीनन सब धाये ॥
 मार परै तोउ न तजै, क्षत बिक्षत तनु है गयो ।
 कइयो त्याग जब बिबश है, तब अति आनन्दित भयो ॥

शिखा मैंने लई करै नहिँ यति संचय धन ।
 जो जो संचय करै रहै ताहीमहँ निज मन ॥
 चिन्ता शंका लोभ होहि भय धनतैं नित नित ।
 धनलोभी बहु रहैं धनीके पीछे उत इत ॥
 कुरर सरिस संग्रह करै, मार खाइगो सो अवसि ।
 निष्किञ्चन अति सुख लहै, ब्रह्मामृत सागर प्रविसि ॥

बालककूँ अपमान मानको भान न होवै ।
 सोवै लागे नींद भूख लगिबेपै रोवै ॥
 घर फूटै या गिरै रहै धन चाहैं जावै ।
 जो मुखमहँ धरि देउ ताहि भावै तो खावै ॥
 मेढ़ भाव चिन्ता नहीं, रहै करत क्रीड़ा सतत ।
 यों ज्ञानी यति हू रहै, आत्मभावमहँ नित निरत ॥

द्वै ई जगमहँ सुखी और सब दुखी भूमिपति ।
 एकगुननितै पार ज्ञान बिज्ञान निपुण यति ॥
 दूसर छलतै रहित सरल शिशु भारो भारो ।
 अधकचरे नित रहें दुखी चिन्तित हिय धारो ॥
 बालक गुरु करि जगतमहँ, बिचरूँ है निःशङ्क नित ।
 निज पर भेद भुलाइके, समभूँ सबकूँ आत्मवत ॥

निरखी कन्या एक अकेली बैठी आँगन ।
 खोजन माता पिता गये बर पहुँचे पाहुन ॥
 चावल घर नहिँ रहे धान वह लागीं कूटन ।
 पहिनें करमहँ चुरी शङ्खकी लागीं बाजन ॥
 पृथक् करीं करतै कछु, रहीं बजी द्वै शेष जो ।
 एक उतारी नहिँ बजी, हौं गुरु कीन्हीं तुरत सो ॥

शिक्षा ग्वातै लई—कलह होवै बहुतनिमहँ ।
 यदि सँग द्वैऊ रहै समय बीतै बातनिमहँ ॥
 भीड़ भाड़में भिनु भूलिके कबहुँ न आवै ।
 रखै न दूजौ संग अकेलो समय बितावै ॥
 एकाकी चिन्तन करै, खटपटतै नित ही बचै ।
 नर नारिनिकी संगता, जनम मरन पुनि पुनि रचै ॥

गुरु कीयो इषुकार बान पथमाँहिँ बनावै ।
 हँके तन्मय चित्तवृत्ति सरमाँहिँ लगावै ॥
 राजा सेना सहित गयो चित नाहिँ चलायौ ।
 इततै भूपति गयो कह्यो कछु नहिँ सङ्कुचायौ ॥
 विषयनितै बैराग्य करि, नित नितके अभ्यासतै ।
 चित्त मिलावै लक्ष्यतै, आसन प्राणायामतै ॥

रज तम रूपी मैल त्यागि जग बन्धन तोड़ै ।
 प्रविशि परम पद चित्त धूलि करमनिकी छोड़ै ॥
 आत्मा महँ चितरोध होहि हियमहँ सुख पावै ।
 भीतर बाहर फेरि न कछु जग बस्तु दिखावै ॥
 बाणकारके सरिस नित, करे चित्त एकाग्र यति ।
 देहि ध्यान नहि जगतमहँ, तब पावै त्यागी सुगति ॥

अहि सम बिचरै भिन्न अकेलो सबतैं छिपिकें ।
 एक थान नहि रहै गुहामें सोवै लुकिकें ॥
 कबहुँ न करै प्रमाद समयकूँ व्यर्थ न खोवै ।
 जन संग्रह नहिँ करै अल्पभाषी नित होवै ॥
 परै न मठके फेरमें, कंकर पत्थर जोरिकें ।
 पश्यो रहै एकान्तमें, सबतैं नातो तोरिकें ॥

आम-घड़ा सम देह पलकमहँ फटतैं फूटै ।
 कच्चे काँच समान आँच लागत ही टूटै ॥
 जा अनित्य तनु हेतु भवन अति बिषद बनावै ।
 हरि सुमिरन नहिँ करै व्यर्थमहँ पाप कमावै ॥
 पावै सूतो भवन जहँ, अहि सम रैंनि बिताइकें ।
 चलै फेरि शिक्षा लई, अहि गुरुदेव बनाइकें ॥

मकड़ीतैं शुभ सीख महेश्वर-लीला लीन्हि ।
 नित्य सृजन थिति प्रलय करे गुरु तातैं कीन्हि ॥
 हियतैं मुखके द्वार जाल बिस्तृत फैलावै ।
 तामें करै बिहार लीलि पीछेतैं जावै ॥
 कल्प आदिमहँ जगतकूँ, रचै मध्य क्रीड़ा करै ।
 कल्प अन्तमहँ निज रचित, सबकूँ हर बनि संहारै ॥

ईश्वर आत्माधार अकेले पुनि रह जावैं ।
 मायाकूँ करि जुब्ब सूत्रकूँ फेरि बनावैं ॥
 जामें ओत प्रोत जगत्के जीव चराचर ।
 प्रकृति पुरुषके ईश करे नित खेल परावर ॥
 रचै हरै रचा करै, हरि समान क्रीड़ा करति ।
 जगबन्धनमें नहिं परै, समुझि खिलारी खेल अति ॥

रचि घर भृङ्गी कीट पकरि क्रीड़ाकूँ लावैं ।
 करिकें घरमें बन्द निरन्तर शब्द सुनावैं ॥
 ताकौ सुनि सुनि शब्द ध्यान भृङ्गीको करिकें ।
 भृङ्गी ही बनि जाय एक ही तनतैं डरिकें ॥
 ध्यान धरत तदरूपता, होवै निश्चय यह भई ।
 गुरु करि भृङ्गीकूँ तुरत, उपयोगी शिखा लई ॥

काहूमें भय द्वेष नेह बश चित लगि जावैं ।
 भृङ्गी क्रीड़ा सरिस तुरत तन्मय बनि जावैं ॥
 तन गुरु करयो विवेक होहि बैराग्य भूपवर ।
 उपपति और बिनाश होय दुख सहै निरन्तर ॥
 यद्यपि जातैं तत्वको चिन्तन हौं नितप्रति करूँ ।
 जानि परायो मोह तजि, हूँ असङ्ग निर्भय फिरूँ ॥

दारा, सुत, धन, भृत्य, कुटुम घर सञ्चय करिकें ।
 परहित श्रम नित करै बृद्ध सम दुख बहु सहिकें ॥
 अपनी अपनी ओर खेंचि इन्द्रिय लै जावैं ।
 जैसे पतिकूँ सौति पकरिकें बहुत नचावैं ॥
 परमारथ जातैं सधै, वर नर तनकूँ पाइकें ।
 मोक्ष हेतु श्रम नहिं करै, सरबसु जाइ गमाइकें ॥

हरिने नाना योनि रचीं परि तोष न पायो ।
 सुखी भये लखि मनुज मोक्षको द्वार बतायो ॥
 पाइ मनुजको जनम जनम को अंत न कीयो ।
 विषयनि फाँसि मरि गयो अमृत तजिके बिष प्रीयो ॥
 सब योनिनिमहँ बिषय सुख, मिलै करै च्यौं श्रम अरे ।
 छनिक दुखद सुखतजि सरस, नित्य सुखहिं भजि बावरे ॥

नहिँ सीमित मम ज्ञान लैहुँ जो होहि सबनिपै ।
 सबतैं लै उपदेश फिरूँ निःसंग अवनिपै ॥
 ब्रह्म एक ही मुनिनि निरूपन बहु बिधि कीयो ।
 जातैं जो मिलि गयो ज्ञान ग्वाँसतैं लीयो ॥
 कहें कृष्ण— उद्धव ! सुनो, यों कहिके अवधूत मुनि ।
 पूजित है नृपतैं गये, भये मुदित यहु ज्ञान सुनि ॥

इति श्रीभागवत चरितके सप्ताह में उद्धवगीतान्तर्गत अवधूतगीता
 नामक चतुर्थ अध्याय समाप्त ।

अथ पञ्चमोऽध्यायः

[५]

उद्धव ! निज निज धरम पालि पावै सुख प्राणी ।
 आश्रम कुल अरु बरन धरमकूँ त्यागहिँ ज्ञानी ॥
 भक्त शौच संतोष आदि नियमनि कूँ पालहिँ ।
 गुरुकूँ पूजहिँ सदा साधना सत सब साधहिँ ॥
 वह मिथ्या संसार सब, सत्य समुक्ति नर दुख सहै ।
 मोकूँ काल स्वाभाव सब, वेद जीव धरमहु कहै ॥

उद्धव बोले—बद्ध मुक्त अरु भक्तनि लक्षण ।
 कहै प्रभो ! सरबेश सुनत हरि बोले तत्छिन ॥
 गुनतैं ही है बद्ध मोक्ष माया मूलक गुन ।
 विद्यातैं है मोक्ष अविद्यातैं जगबन्धन ॥
 जीव ईश पक्षी सखा, तनु तरुपै बैठे उभय ।
 फल खावै सो भय लहै, निराहार नित ही अभय ॥

कर्त्तापनतैं बँधै अकर्त्ता बँधै न कबहूँ ।
 ज्ञानीकूँ दुख देउ बिकृत होवै नहिँ तबहूँ ॥
 ब्रह्मभावमहँ लीन परम अमृत नित चाखै ।
 इस्तुति निन्दा रहित बुरौ अरु भलौ न भाखै ॥
 कीर्तन नामनिको करै, भाखै मेरे गुन करम ।
 भक्ति करै मोमें सतत, पाइ उपासक पद परम ॥

पावन मेरी कथा सुनै गावै ध्यावै नित ।
लीला अभिनय करै लगावै मम चरननि चित ॥
घरम अरथ अरु काम करै हूँ मेरे आश्रित ।
पावै निश्चल भक्ति कटै जगकी यह संसृत ॥
साधुनिके सतसंगतैं, भक्ति मुक्ति पावै सबहिँ ।
पुण्य पुरातन उदय जब, होवैं साधु मिलैं तबहिँ ॥

होवैं साधु कृपालु तितिक्षु द्रोहरहित नित ।
सत्यशील समभाव हितैषी मृदुल शुद्ध चित ॥
कामरहित संयमी सदाचारी निष्किञ्चन ।
निस्पृह युक्ताहार शांतचित शरणागत जन ॥
धीर गंभीर प्रमाद बिनु, षड रिपुजित थिरधी मुनी ।
मानरहित मानद सबहिँ, मिलनसार समरथ गुनी ॥

करुनामय कवि होहिँ साधु हरि भक्त हृदावैं ।
जो शुभ साधन करै भक्ति ते प्रभुकी पावैं ॥
प्रभु-प्रतिमा अरु साधु दरस पूजन पद परसन ।
सेवा इस्तुति बिनय सहित गुन नामनि कीर्तन ॥
ध्यान दास्य मम पर्व तिथि, उत्सव गायन नित्य नित ।
कथा श्रवन अरपन सकल, मेरे हित सब करहिँ व्रत ॥

मम हित यात्रा करै देवमन्दिर बनवावै ।
स्वयं शक्ति नहिँ होहि यत्न करिकैं करवावै ॥
उपवन अरु उद्यान सभायल शाला सुन्दर ।
हूँकैं निश्छल नित्य करै लेपन मम मन्दिर ॥
करी निवेदित वस्तु जो, लेइ न अपने काममहँ ।
करै सपर्पित वस्तु प्रिय, होहि प्रेम मम नाममहँ ॥

बिप्र, धेनु, रवि, अनिल, अनल, भू वैष्णव पानी ।
 आत्मा अरु आकाश चराचर जगके प्राणी ॥
 ये सब आश्रय कहे देव पूजाके प्यारे ।
 उपस्थानतैं सूर्य अग्नि घृत आहुति डारे ॥
 पूजै द्विज आतिथ्य करि, धेनु घास तृन डारिकें ।
 वैष्णवकूँ सत्कार करि, पूजे अंत प्रिय मानिकें ॥

मुख्य प्राणतैं बायु हृदय आकास ध्यान धरि ।
 पुष्पादिकतैं नीर भूमि बेदी थापन करि ॥
 अन्तरातमा करै तुष्ट भोगनितैं नियमित ।
 पूजै करि समदृष्टि सकल प्राणिनिमहँ नित नित ॥
 शान्त चतुरभुज रूपको, करै ध्यान है समाहित ॥
 करै करम मेरे निमित्त, मोमें राखै नित्य चित ॥

भक्तियोग सत्संग बिना सुख नहिँ नर पावैं ।
 चाहैं जप तप करैं योग करि ध्यान लगावैं ॥
 सत्संगतितैं तरे दैत्य अन्त्यज अधकारी ।
 असुर, गीध, गज, गाय, गोपिगन, कुब्जा नारी ॥
 नहीं करी सेवा महत्, बेद पढ़े नहिँ व्रत करे ।
 करि सत्संगति जगत्महँ, जीव चराचर बहु तरे ॥

योग, दान, व्रत, सांख्य, यज्ञ, जप, तप सब साधन ।
 श्रवण, मनन, संन्यास आदितैं होवै बश मन ॥
 किन्तु न ये सब सरस सरल हियकूँ नहिँ पकरैं ।
 साधन च्युत यदि भये फेरि जगबन्धन जकरैं ॥
 भक्तिभाव सत्संगतैं, होहि सरस तन्मय हियो ।
 ब्रजबनितनि मोमें मधुर, प्रेमभाव अनुपम कियो ॥

रूपसुधामहँ छकीं निरंतर मोकूँ ध्यावै ।
 प्रेमढोरिमहँ बँधी सुनत बंशो धुनि आवै ॥
 तजि बृन्दावन गयो मधुपुरी वे घबरायीं ।
 मन मोईमहँ फँस्यो सकल सुधि बुधि विसरायीं ॥
 मेरे संगमहँ छिन सरिस, निशा बितार्यो जो सुखद ।
 भई कलप सम मो बिना, मम बियोगमहँ अति दुखद ॥

ज्यों समाधिमहँ सिद्ध मिलैं सागरमहँ सरिता ।
 त्यों हूँकें आसक्त मिलीं मोमें ब्रजबनिता ॥
 मोमें मन फँसि गयो सकल तन सुधि बुधि भूलीं ।
 नहिं समुझीं सरवेश रमन सुन्दर लखि फूलीं ॥
 परम धन्य जगमहँ भई, मोमें करि आसक्ति अति ।
 तुम हू उद्धव ! त्यागि सब, भजो मोइ पावो सुगति ॥

हौं ही जग बनि गयो बीज ज्यों तरु बनि जावै
 बृक्ष कर्म मय मोक्ष भोग फलफूल कहावै ॥
 पाप पुण्य द्वै बीज बासना जड़ गुन तन हैं ।
 इन्द्रिय शाखा ईश जीव द्वै बैठे खग हैं ॥
 सुख दुख ही द्वै फल लगे, खावै दुख भोगी सतत ।
 योगी सुख चाखत रहत, ब्रह्मभावमहँ नित निरत ॥

गुन ही बन्धन हेतु प्रथम रज तमकूँ त्यागै ।
 सत्त्व बृद्धितैं भक्ति होहि श्रद्धा हिय जागै ॥
 आगम, जल अरु कुटुम-देश, संस्कार करम पुनि ।
 काल, जनम अरु ध्यान मंत्र ये कारन दश सुनि ॥
 सत्त्वज्ञान होवै नहीं, सेवै तब तक सत्यकूँ ।
 ज्ञान अगिनि अज्ञान भखि, प्राप्त करै एकत्वकूँ ।

उद्धव बोले—प्रभो ! सबहिँ मानें विषयनि दुख ।
 फिरि च्यौँ तिनकूँ भजैं करैँ तिनमें अनुभव सुख ॥
 हँसि बोले भगवान्—अहंतातैं मूरख जन ।
 फँसैं रजोगुणमाँहि कामना बश होवै मन ॥
 कबहुँ विवेकी हूँ फँसैं, किन्तु होहिँ आसक्त नहिँ ।
 चित्त समाहित करन हित, करैँ प्रान संयम नितहिँ ॥

सब विषयनितैँ खँचि चित्त मम चरननि लावै ।
 करैँ योग अभ्यास निरन्तर ध्यान लगावै ॥
 सनकादिककूँ हंस रूपतैँ शिखा दीन्हों ।
 वे मेरे प्रिय शिष्य योगमहँ निष्ठा कीन्हों ॥
 उद्धव पूछें—जगतगुरु ! हंस रूप कैसे धर्यो ।
 सनकादिककूँ योगमय, ज्ञान दान शुभ कब कर्यो ॥

प्रभु बोले—इक बार कुमर सुत अज ढिँग आये ।
 जिज्ञासा तिनि करी बन्दि पद बचन सुनाये ॥
 विषयनिमहँ चित जाइ विषयचित्तमहँ घुसि जावैं ।
 कैसेँ करि तिनि पृथक मुक्ति पद प्राणी पावैं ॥
 निरनय नहिँ कछु करि सकी, कर्ममयी अज बुद्धि जब ।
 प्रश्न पयोनिधि पार हित, कर्यो ध्यान मम चरन तब ॥

तबई मैं बनि हंस कुमारनिके ढिँग आयो ।
 करि आगे अज सबनि चरन मेरे सिर नायो ॥
 पूछें—को हैं आप ? कही हँसिकेँ हौं बानी ।
 काकूँ करि उद्देश प्रश्न कीन्हों मुनि ज्ञानी ॥
 आत्मा अद्वय एक है, बनहिँ न तामें प्रश्न यह ।
 पञ्चभूतके देह सब, प्रश्न न जामें उठहिँ जिह ॥

जो सोचो जो लखो सुनो सो मैं ही सब हूँ ।
 प्रथमहु मैं ही रह्यो रहौंगो मैं ही अबहूँ ॥
 विषयनि चित अनुसरे विषय हू प्रविशैं तामें ।
 जीव उपाधी उभय नहीं ते रूप कहावैं ॥
 सेवै विषयनिकूँ सतत, चित्त होहि आविष्ट तहूँ ।
 बनै बासना चित्तकी, जीव ब्रह्म द्वै पृथक् कहूँ ॥

दोऊ जीव उपाधि शुद्ध निज रूप निहारौ ।
 बुद्धि अवस्था तीनि आतमा इनतैं न्यारौ ॥
 मो तुरीयमहूँ पहुँचि जगत् बन्धन नहिँ लागै ।
 चित्त विषय नसि जायँ अहंता अपनी त्यागै ॥
 भेद बुद्धि जब तक नहीं, नसै न तब तक बुद्ध है ।
 जग-प्रपञ्च मिथ्या असत्, ब्रह्म सत्य शिव शुद्ध है ॥

सर्व नियामक नित्य निरञ्जन आत्मा सत्चित ।
 जाग्रत स्वप्न सुषुप्ति सबहिँ मायामहूँ कल्पित ॥
 ज्ञान खड्गकूँ धारि तीक्ष्ण युक्तिनितैं करि करि ।
 अहंकारकूँ काटि मोह भजि जगकूँ परिहरि ॥
 नश्वर दृश्य प्रपञ्च जिह, भासै नाना रूपमहूँ ।
 दीखै मायामय त्रिविधि, मिथ्या स्वप्न स्वरूपमहूँ ॥

निजानन्दमहूँ पूर्ण मौन गहि रूष्णा त्यागौ ।
 स्वप्न जगत्महूँ फँसे मोह निद्रातैं जागौ ॥
 स्वप्न-पदारथ याद होहि जागतमहूँ जबई ।
 करै न कछु अनर्थ बिज्ञ समुझै त्यो सबई ॥
 मदिरातैं उतमत्त नर, मोरीमहूँ गिर जातु है ।
 नंगो हूँकैं हँसि परै, सुधि बुधि सकल भुलातु है ॥

योंही ज्ञानी करै कर्म पीवै अमृत रस ।
 तनमहँ नहिँ आसक्त होहि तन काज दैव बश ॥
 द्विजगन ! मोकूँ परम पुरुष परमेश्वर मानौ ।
 सांख्य सत्य श्री कीर्ति परम गति सबकी जानौ ॥
 सब मुनि मिलि पूजा करी, हंस तहाँतैं उड़ि गये ।
 सुन्यो हंसगीता विमल, अज मुनि गन प्रमुदित भये ॥

इति श्रीभागवत चरितके सप्ताह में ऊद्धवगीता हंसावतार कथा
 नामक पञ्चम अध्याय समाप्त ।

[मासिक पारायण—सत्ताईसवें दिनका विश्राम]

अथ षष्ठोऽध्यायः

[६]

कहें कृष्ण—यह हंस ज्ञानमय गीता उद्धव ।
 सखा समुझिकें कह्यो कहूँ का कथा अपर अब ॥
 उद्धव पूछें—प्रभो ! तुम्हें बुध बहुत बतावें ।
 श्रेय सिद्धिके भिन्न मार्ग ऋषि मुनि बहु गावें ॥
 कही ज्ञानगाथा विमल, तृप्ति न मेरी भई हरि ।
 कहें भक्ति महिमा सुखद, सरस मधुर प्रसु कृपा करि ॥

तब बोले भगवान्—बेद ही मेरी बानी ।
 मुख्य भागवत धर्म जाहि धारै बिज्ञानी ॥
 आदि सर्गमहँ कह्यो ब्रह्मतैं मनुडिँग तिननैं ।
 तिति सप्तर्षिनि द्यो कह्यो फिर सबतैं उनने ॥
 अह्न कश्यो निज मत सरिस, सबके भिन्न स्वाभाव हैं ।
 प्रकृति भेदतैं भिन्न पथ, भिन्न क्रिया अरु भाव हैं ॥

धर्म एक परमार्थ बतावें यशकूँ दूसर ।
 अपर कामकूँ कहें सत्यमहँ कोई तत्पर ॥
 शम दम कोई कहें अपर ऐश्वर्य बतावें ।
 दान भोग ही स्वार्थ अपर तप मख मन लावैं ॥
 कहें दान व्रत यम नियम, भिन्न भिन्न पुरुषार्थ हैं ।
 किन्तु न शाश्वत नित्य ये, छुद्र कर्ममय स्वार्थ हैं ॥
 ५३

शुभ कर्मनितै' लोक मिलै' जाओ सुख पाओ ।
 पुण्य छीन है जायँ गिरौ उलटे जग आओ ॥
 मोहजनक दुख हेतु तुच्छ सुख दैवेवारे ।
 दुख परिनामी लगौ' तनिक इन्द्रनिकूँ प्यारे ॥
 जो सुख मेरी भक्तिमहँ वह सुख विषयनिमहँ नहीं ।
 मिश्रामहँ जो सुख मिलै, लौटाहँ पावै' कहीं ॥

निष्किञ्चन समबुद्धि शान्त सन्तोषी त्यागी ।
 निस्पृह निर्मम नित्य तुष्ट मम पद अनुरागी ॥
 निरखै सबमहँ मोइ द्वैत दीखे नहिं जिनिकूँ ।
 दुखको नहि लवलेश दिशा सुखमय सब तिनिकूँ ॥
 तन, मन, धन मम पदनिमहँ, सौँपि न चाहै इन्द्रपद ।
 राज्य पाट ऐश्वर्य सुख, लेवै' नहिं ते ब्रह्मपद ॥

उद्धव जैसे मोइ भक्त निष्किञ्चन प्यारे ।
 तैसे प्रिय नहि राम रमा अज डमरुवारे ॥
 निरबैरी निरपेक्ष भक्तके पीछे घूमूँ ।
 पदरजतै' कृतकृत्य बनूँ चरननिकूँ चूमूँ ॥
 विषयवासना कामसुख, की इच्छा मनमहँ नहीं ।
 उनि भक्तनि आनन्दकूँ, विषयी का पावै' कहीं ॥

भूलै मेरो भक्त विषयभोगनि फँसि जावै ।
 मम पद तजिके' नारि बदनमहँ चित्त लगावै ॥
 कछु दिन होवै पतित यादि सुमिरन सुख आवै ।
 भूलि भटकि पछिताइ मोइ फिरतै' अपनावै ॥
 बड़ी अग्निमहँ नीर हू, भस्म होहि जरि जाइ पुनि ।
 भक्ति होहि फिरतै' सजग, मधुमय मेरी कथा सुनि ॥

पाप पहाड़नि भक्ति जरावै उद्धव मेरी ।
तू चिन्ता मति करै परम निर्मल मति तेरी ॥
योग, सांख्य, जप, दान, धर्मतैं ही रीभूँ नहिं ।
भक्ति मार्ग ही श्रेष्ठ जाहि कामी नहिं ससुम्हहिं ॥
धर्म सत्य अरु दयायुत, तप भावित विद्या विमल ।
पूर्ण पवित्र न करि सकैं, भक्तिहीन नरकूँ सकल ॥

उद्धव ! सोचो प्रेम अश्रु बिनु गद्गद बानी ।
बिनु तनु पुलकित भयें मोइ पावैं च्यौँ प्रानी ।
हूँकैं भक्त बिभोर प्रेममें नाचैं गावैं ।
करि करि प्रेम प्रलाप हूँसे रोवैं गिरि जावैं ॥
भक्तियोग साधन सरल, सुलभ शुद्ध अञ्जन सरिस ।
कथा कीरतनतैं नसै, हियमहूँ संचित विषय बिष ॥

जो सोचो सो बनो होहि जैसो जाको संग ।
श्वेत बख्त सम चित्त रँगो जैसो होवै रँग ॥
विषयनि चिन्ता करै विषयमय मन बनि जावै ।
मेरी चिन्ता करै भक्त मेरो पद पावै ॥
साधन सबरे असत हैं स्वप्न मनोरथ सम सकल ।
तातैं सब तजि मोइ भज, मम चिन्तन साधन सफल ॥

तिरियनिको तजि नेहूँ संग विषयी पुरुषनिको ।
धीर बार गम्भीर बनै प्रिय सब जावनिको ॥
भजन हेतु घर तजै समय नहिं ब्यर्थ बितावै ।
निरखि शान्त एकान्त पुण्य थल ध्यान लगावै ॥
करै न आलस भजनमहूँ, कथा कीरतनमहूँ निरत ।
अथवा प्राणायाम करि, करै ध्यान मेरो सतत ॥

उद्धव बाँधौ गाँठ मोक्ष मारग अति दुस्तर ।
 पग पगपै अति क्लेश देहिं ये विषय निरन्तर ॥
 जैसो होवै क्लेश कामिनी अरु कामिनितैं ।
 तैसो होवै नहीं लोभ मोहादि रिपुनितैं ॥
 संसृतिको ही हेतु है, कामधुराको संग नित ।
 तातैं तजि अबिलम्ब नर, मम चरननिमहँ देहिं चित ॥

बोले उद्धव—नाथ ! ध्यान बिधि मोइ बतावैं ।
 कौन भाव किहि भाँति रूप तव कैसे ध्यावैं ॥
 हरि बोले—सुनु सुहृद ! प्रथम शुभ आसन बाँधै ।
 पुनि पुनि प्राणायाम करे प्राणनिकूँ साधै ॥
 कमलनाल सम प्रणव ध्वनि, घंटा नाद समान स्वर ।
 तीन काल दश बेर करि, होहि सहजमहँ चित्त थिर ॥

हृदय कमल दल अष्ट प्रफुल्लित साधक ध्यावै ।
 सूर्य चन्द्र अरु अग्नि कर्णिकामाहिँ बिछावै ॥
 चिन्तै मम मुख मधुर बाहु बर चार विशाला ।
 शंख चक्र अरु गदा पदुम पहिने बनमाला ॥
 मकराकृत कुण्डल कलित, श्रीनिवास पतपीतबर ।
 भुज अंगद कटि करधनी, नूपुरयुत पद अति सुघर ॥

भाल, नयन मुखहृदय, नाभि, कटि, ऊरु, चरनतल ।
 सुघर मनोहर निरखि करै थिर मनकूँ शुभ थल ॥
 केवल मुखकूँ ध्याइ अन्तमहँ ताकूँ त्यागै ।
 निराकार निरबीज चित्त आत्मामहँ लागै ॥
 ससुभै आत्मा सर्वगत, सबकूँ मोमें मोइ सब ।
 ज्ञान कर्म अरु द्रव्य भ्रम, योगीको नसि जाय तब ॥

योगी ध्यावै मोइ सिद्धि सब तिहि ढिँग आवैं ।
 उद्धव बोले—नाथ ! सिद्धिके भेद बतावैं ॥
 हरि बोले—सब सिद्धि अठारह मुनिनि गिनाई ।
 तिनिमहँ दश हैं गौण आठ ही मुख्य बताई ॥
 अणिमा महिमा अरु लघिम, आश्रय इनको देह है ।
 प्राप्ति सिद्धि उत्तम कही, इन्द्रिय जाको गेह है ॥

सिद्धि कही प्राकाश्य ईशिता बशिता उद्धव ।
 दूरश्रवन परकाय प्रविसि तनु सुघर मनोजव ॥
 गति आज्ञा अनिवार देवक्रीड़ा अनुदरशन ।
 अग्नि सूर्य जल गरल आदि बस्तुनि को स्तंभन ॥
 करै धारना जाहिमें, होहि सिद्धि तैसी तहाँ ।
 भक्तियोग बिनु सिद्धि सब, पावैं कामी नर कहाँ ॥

जितनी होवें सिद्धि जन्म औषधि अरु तपतैं ।
 ते सब पावैं भक्त नाम मेरेके जपतैं ॥
 सब सिद्धिनिको ईश बेदबिद मोहि बतावैं ।
 तातैं सब तजि चित्त भक्त मम चरन लगावैं ॥
 हौं ही सबमहँ रमि रह्यो, देहुँ सिद्धि सबकूँ सकल ।
 मम तजि सिद्धिनिमहँ फँसैं, मेरी माया अति प्रबल ॥

इति श्रीभागवतचरितके सप्ताहमें उद्धवगीतान्तर्गत भक्तियोग
 ध्यान तथा सिद्धि वर्णन नामक छठवाँ अध्याय समाप्त ।

अथ सप्तमोऽध्यायः

(७)

बोले उद्धव—सुनीं सिद्धि सब नाथ बखानी ।
 अब बिभूति निज कहैं मोइ निज सेवक जानीं ॥
 सुनि बोले विश्वेश—पार्थतैं मैंने रनमहँ ।
 कछु बिभूति निज कहीं कहूँ तिनि धारौं मनमहँ ॥
 जीव काल गति गुन, प्रनव, गायत्री, सुरपति, अनल ।
 विष्णु नीललोहित, भृगू, मनु, नारद, कपिला कपिल ॥

प्रजापतिनिमहँ दक्ष अर्यमा हौं पितरनिमहँ ।
 दैत्यनिमहँ प्रह्लाद बरुन हौं जलवासिनिमहँ ॥
 ऐरावत, रबि नृपति, अहिष, यम, कनक, अश्वत्थर ।
 शेष, सिंह, संन्यास, गंग, जलनिधि, धनु, शङ्कर ॥
 गिरिप मेरु, अश्वस्त, यव, कार्तिकेय, अज, बृहस्पति ।
 सुनि बसिष्ठ, जल, अनल, रबि, मनु, शतरूपा विष्णु यति ॥

हौं ही सनतकुमार त्याग अरु मौन प्रजापति ।
 संबतसर सुबसन्त, मास अगहन अरु अभिजिति ॥
 सत् युग, देवल असित, व्यास द्वैपायन, भार्गव ।
 वासुदेव, हनुमान, सुदर्शन, गोघृत उद्धव ॥
 कमलकोश, कुश, पद्ममणि, गुण सत्त्वादिक, तेज रस ।
 पूर्वचित्ति विश्वावसू हौं ही सत्रमहँ कीर्ति यश ॥

हौं ही ईश्वर, जीव, सत्व, रज और तमोगुण ।
 प्रकृति, पुरुष, गति, काल, भूमि, जल, नभ, रवि त्रिभुवन ॥
 कहूँ कहाँ तक तेज, कीर्ति, श्री जहूँ जहूँ जानों ।
 पुरुषार्थ, बल, कान्ति अंश सब मेरे मानों ॥
 अपनी कहीं बिभूति कछु, सब ये मनोबिकार हैं ।
 परमार्थ ये ही नहीं, जगके सब ब्योहार हैं ॥

उद्धव बोले—मोड़ बतावहिँ बर्णाश्रम हरि ।
 करि जिनको आचरन जाहि जगतै मानव तरि ॥
 हौ प्रभु सर्व समर्थ बेद सब तुमरी बानी ।
 मूर्तिमान हौ धरम कहैं मुनि पंडित ज्ञानी ॥
 बर्णाश्रमको प्रश्न सुनि, हरि बोले—उद्धव कहूँ ।
 हौं ही चारिहु युगनिमहँ, धरम रूपतै नित रहूँ ॥

आदि कल्पमहँ भयो प्रथम सतयुग हौं जामें ।
 हंसरूपतै रहौ ध्यानतै पूजै तामें ॥
 मखतै त्रेतामाँहिँ करै पूजा द्वापरमहँ ।
 नाम कीरतन करहिँ पाहिँ प्राणी कलियुगमहँ ॥
 मुखतै द्विज, भुज जत्र उरु, वैश्य शूद्र मम चरनतै ।
 चारि बरन प्रकटित भये, जानहिँ निज निज करमतै ॥

वरन सरिस ही चार भये आश्रम विराटतै ।
 मस्तकतै संन्यास धर्म प्रकटित स्वराटतै ॥
 गृह आश्रम वटु धर्म जघन अरु हियतै जानों ।
 वनस्थलतै वानप्रस्थ उत्पति तुम मानों ॥
 चार चार आश्रम बरन, सबके पृथक् स्वभाव हैं ।
 पावै फल सब कर्म करि, जिनिके जैसे भाव हैं ॥

पहिले सुनो स्वभाव बिप्रको उद्धव ! उत्तम ।
 शम दममहँ नित निरत रहै ध्यावै चरननि मम ॥
 तत्परताके सहित शौचके पालै नियमनि ।
 यथालाभ संतोष करै नहिं संग्रह बस्तुनि ॥
 अपकारीके दोषकूँ, शक्तिवान हूँकें सतत ।
 क्षमा करै निष्कपट हूँ, परकारजमहँ नित निरत ॥

होवै मृदुल स्वभाव भक्ति मेरी हिय धारै ।
 सब जीवनि पै दया करै नहिं जीवनि मारै ॥
 सदा सत्य व्यवहार बिप्रके ये ही सब गुन ।
 इन गुनतै ही करै जगतकूँ बशमहँ द्विजगन ॥
 द्विजस्वभाव मैंने कहे, ब्राह्मण तनमहँ रहहिं सब ।
 करै वृत्ति कैसी रहै, सुनो बिप्रको धर्म अब ॥

ब्राह्मण क्षत्रिय वैश्य वर्ण द्विज तीनि कहावै ।
 यज्ञ दान अध्ययन तीनिको धर्म बतावै ॥
 पढ़ै बिप्र सब बेद द्विजनिक्कूँ फेरि पढ़ावै ।
 स्वयं यज्ञ नित करै द्विजनिक्कूँ यज्ञ करावै ॥
 देहिं दान श्रद्धा सहित, लेहिं बिबश हूँ वृत्ति हित ।
 रहै तपस्यामहँ निरत, परमारथमहँ रखहिं चित ॥

बिप्र वृत्ति तजि नहीं नीच कारज अपनावै ।
 गौ कृषि अरु व्यापार वृत्तितै काज चलावै ॥
 अथवा लैकें शस्त्र युद्धमहँ लड़िबे जावै ।
 धर्मयुद्धतै कबहुँ पैर पीछे न हटावै ॥
 आपद धर्म अनेक हैं, सदाचार कबहुँ न तजै ।
 कर्म बचन मनतै सदा, अघहारी हरिक्कूँ भजै ॥

क्षत्रिय वर्ण स्वभाव सुनौ उद्धव मोतैँ अब ।
तेजस्वी, बलवान, धीर अति सहै दुःख सब ॥
शूरवीर रणधीर दानमहँ रुचि नित राखै ।
होवै परम उदार दीन बाणी नहिं भाखै ॥
करत रहै उद्योग नित, थिरता रखि कारज करै ।
दीन दुखिनिके दुःखकूँ, स्वयं दुःख सहिकेँ हरै ॥

यदि होवै सामर्थ्य बिप्रकूँ सुख पहुँचावै ।
जो माँगे सो देहि नहीं घरतैँ लौटावै ॥
हैं बिप्रनिकूँ दान अपर बहु भये नृपति गन ।
बहुतनि दीयो बिप्र बचनतैँ सरबसु तन धन ॥
क्षत्रिनिको ऐश्वर्य नित, रहै सत्य अरु धरमतैँ ।
बढ़ै पुण्य यश जगतमहँ, शास्त्र बिहित शुभ करमतैँ ॥

सुतवत पालै प्रजा दूर भय करै सबनिको ।
छठवों लेवै अंश हरै दुख नरनारिनिको ॥
दण्डशुल्क कर क्षात्र वृत्ति ऋषि बेद बतावै ।
दस्युनि देहिं भगाइ नृपति अति पुण्य कमावै ॥
बैश्य वृत्तिहु बिपतिमहँ, धारि करै निर्बाह नृप ।
अथवा बिचरै बिप्र बनि, नहिं त्यागै तप नियम जप ॥

क्षत्रिय धर्म प्रधान प्रजापालन रणथिरता ।
दुष्टनिको संहार करै रिपुतैँ नहिं मृदुता ॥
भाईहु रिपु होहि समरमहँ ताहि पछारै ॥
जगको होवै अहित ताहि बिनु सोचे मारै ॥
क्षत्रिय वृत्ति स्वभाव कछु, उद्धव यह तुमतैँ कह्यो ।
बैश्यवृत्ति बगान करूँ, जो स्वभाव इतने लह्यो ॥

वैश्य कहावै श्रेष्ठ सरल होवै आस्तिक अति ।
 यथाशक्ति नित दान पुण्यमहँ स्वाभाविक मति ॥
 बिप्रनि सेवा करै पर्वपै न्योति जिमावै ।
 करै बिप्र जो क्रोध ताहि चितमहँ नहिँ लावै ॥
 शत, सहस्र, दश लक्ष वा, अरब खरब हू होहि धन ।
 चाहै जितनो नित मिलै, तबहु न होवै तुष्ट मन ॥

खेतीतै निर्बाह करै गौपालन नित प्रति ।
 वस्तुनिको ब्यौहार करै जोरै धन सम्पति ॥
 शूद्र वृत्ति हू वैश्य बिपतिमहँ परि अपनावै ।
 किन्तु न ताकूँ धर्म समुक्ति नित काज चलावै ॥
 पालै अपने धर्मकूँ, नृप द्विज देवनिहँ डरै ।
 पूजै द्विज, गौ, अतिथि, सुर, सन्ध्या बन्दन नित करै ॥

स्वाभाविक रुचि रहै शूद्रकी सेवा माहीं ।
 कृहै करन द्विज काज करै नहिँ कबहूँ नाहीं ॥
 बिप्र, धेनु, सुर पूजि नित्य कर्तव्य निभावै ।
 सेवातै जो मिलै ताहितै काम चलावै ॥
 गुरुकुलवास न शौच तप, सेवा तिनिको कर्म है ।
 सेवा ही तप दान व्रत, शूद्रनिको यह धर्म है ॥

शूद्र बिपतिके समय करै गोपालन खेती ।
 अथवा धारै वृत्ति कारु पुरुषनिकी जेती ॥
 चर्म, चटाई, सूप, ऊनकी, वस्तु बनावै ।
 बनतै लावै वस्तु बेचिकें काम चलावै ॥
 आपद ही में सब करै, पुनि आपद मिटि जाय जब ।
 नीच वृत्तिकूँ त्यागि कैं, अपनावै निज धर्म तब ॥

नारिहरन करि उच्च बर्णकी जे लै जावैं ।
 दस्यु म्लेच्छ ते अधम नीच चांडाल कहावैं ॥
 रहैं सदा अपवित्र करैं खल मिथ्या भाषन ।
 दैं चोरीमहँ चित्त न मानहिं देव पितर गन ॥
 शिखा सूत्र विश्वास नहिं, व्यर्थ कलह सबते करैं ।
 कामी, क्रोधी, लालची, ते मरि नरकनिहँ परैं ॥

म्लेच्छ दस्यु हू धर्म पालिकें सद्गति पावैं ।
 अधम बृत्तिकूँ त्यागि करे शुभ शुचि है जावैं ॥
 उद्धव ! मैंने बर्ण धर्म सब तोइ सुनाये ।
 जे पुरान, इतिहास, बेद, शास्त्रनिने गाये ॥
 यह विशेष सब बर्णके, धर्म कहे मैंने सकल ।
 कहूँ धर्म सामान्य अब, जो सब बर्णनिकूँ बिमल ॥

सत्य, अहिंसा शुद्ध चित्ततै मनमहँ धारैं ।
 कबहुँ न चोरी करैं, काम बड़ रिपुकूँ मारैं ॥
 क्रोध लोभतै रहित होहिं प्रिय करहिं सबनिको ।
 प्राणिमात्रतै प्रेम करे, हित सब जीवनि को ॥
 सुखी होहिं पर सुख निरखि, पर संपति लखि नहिं जरैं ।
 स्वयं न प्रिय व्यवहार जो, तिहि औरनि सँग नहिं करैं ॥

द्विज शूद्रनि अरु सर्व बर्णको धर्म बतायौ ।
 सबकी बृत्तिनि सहित तोइ संक्षिप्त सुनायौ ॥
 अब जो इच्छा होहि कहूँ जो पूछौ उद्धव ।
 बोले उद्धव—कहो धर्म आश्रमको केशव ॥
 हरि बोले—आश्रमनिमहँ, ब्रह्मचर्य आश्रम प्रथम ।
 द्विज बालक उपनयनयुत, बसै तहाँ पालै नियम ॥

गुरुकुलमहँ नित बास करै भिक्षा करि लावै ।
 गुरु सम्मुख धरि देहि देहिं जो सोई खावै ॥
 धारै नित उपवीत मेखला अरु मृगङ्गला ।
 दण्ड, कमण्डलु, जटा अक्षकी उरमहँ माला ॥
 अलंकार हित दंत पट, रँगै न उज्ज्वल करै अति ।
 भोजन मज्जन, होम, जप, महँ नहिँ बोले धीरमति ॥

पंचकेशकूँ रखै शिखा ही अथवा धारै ।
 जग विषयनितैँ बिरत रहै नित मनकूँ मारै ॥
 गो गुरु, द्विज रवि, अग्नि, अतिथिकूँ पूजै नित प्रति ।
 समुझै गुरु ममरूप करै सेवा निश्चल मति ॥
 तजै अष्ट मैथुन सदा, भिक्षापै निरबाह करि ।
 पढ़ि गुरुकूँ दै दक्षिणा, बनै गृहस्थी ब्याह करि ॥

कन्या सुघर सवर्ण सुशीला सद्गुन बारी ।
 ताके संग करि ब्याह वृत्ति धारै हितकारी ॥
 घरमहँ अतिथि समान बसै रागादिक त्यागै ।
 काम, क्रोध, मद, लोभ, मोह, तृष्णतैँ भागै ॥
 सबकूँ स्वप्न समान लखि, सुत, दारा, धन बन्धु जन ।
 ऊपरतैँ कारज करै, राखै मो में सदा मन ॥

देव, पितर अरु अतिथि करै सेवा प्रानिनिकी ।
 देवै सबको भाग जीविका जैसी जिनिकी ॥
 जो कछु कारज करै भाव मोईमहँ राखै ।
 जीवनि दुख नहिँ देहि अनृत बानी नहिँ भाखै ॥
 सब भूतनिमहँ मोइ लखि, निरभिमान घरमहँ बसै ।
 घर त्यागै अथवा चतुर बानप्रस्थ बनि तनु कसै ॥

कन्द मूल फल खाइ मूँछ, नख जटा बढ़ावै ।
 बनमहँ जो मिलि जाइ ताहितैं काम चलावै ॥
 पञ्च अग्नि तप करै कुटीमहँ सोवै नार्हीं ।
 सिरपै बरषा सहै, शरदमहँ जलके माहीं ॥
 करै अग्नि सेवा सतत, स्वयं दास बनिकें रहै ।
 बरषा गरमी ठंडकूँ, जथाशक्ति नित नित सहै ॥

करै दर्श अरु पौर्णमास मख मोकूँ उर धरि ।
 बन्य कन्द फल मूल आदि चरु पुरोडास करि ॥
 तुच्छ स्वर्गके हेतु व्यर्थ नहिं देह तपावै ।
 रुग्ण वृद्ध असमर्थ होहि तनु अनल जरावै ॥
 यदि होवै बैराग्य तो, अग्नि लीन करि प्रानमहँ ।
 संन्यासी बनि सम रहै, सदा मान अपमानमहँ ॥

संन्यासी तजि अग्नि काम्य कर्मनिकूँ छोरे ।
 सबकी तजि आसक्ति जगत्तैं मुखक मोरै ॥
 दण्ड कमण्डलु रखै बस्त कौपीन लगावै ।
 दृष्टिपूत पग धरै माँगिकें भिक्षा खावै ॥
 षडवर्गनिकूँ जीतिकें, राखै मोमें सतत चित ।
 अनुभव परमानन्द करि, बिचरै हूँ स्वछन्द नित ॥

समुझै नहिँ सत् कबहुँ दृश्यकूँ यति वैरागी ।
 अनासक्त नित रहै काम्य कर्मनितैं त्यागी ॥
 मन बानी संघात रूप जग माया मानै ।
 नित परिवर्तनशील असत् नश्वर सब जानै ॥
 नेति नेतितैं बाध करि, नहिँ माया चक्कर परै ।
 स्थिर हूँ नित्य स्वरूपमहँ, ब्रह्म एक निश्चय करै ॥

जगतैं होहि बिरक्त ज्ञानमहँ अथवा थिरमति ।
 चाहैं होवै भक्त कृष्ण चरननिमहँ दृढ़रति ॥
 तजि बरणाश्रम चिन्ह मिलै भिन्ना जहँ खावै ।
 विधि निषेधतैं रहित मुक्त बन्धन हूँ जावै ॥
 बालकवत क्रीड़ा करै, जड़वत् अरु उनमत्तवत ।
 पशुवत हूँ चर्या करै, रहै न जग कारज निरत ॥

यदि होवै जिज्ञासु सिद्ध गुरुके ढिँग जावै ।
 मन इद्रिनिक्कूँ रोकि हृदयकूँ शुद्ध बनावै ॥
 शान्ति अहिंन्सा ज्ञान धारि बैराग्य जगततैं ।
 मोमें राखै चित्त, मोरिकें मुखकूँ इततैं ॥
 वर्णाश्रमके धर्म सब, पालै मम सेवा करै ।
 काहूँ आश्रममहँ रहै, अनायास जगतैं तरै ॥

परमहंस सब त्यागि कर्ममय बेदबाद रति ।
 रहै धीर गम्भीर अमानी सहनशील यति ॥
 सुखदुखमहँ सम रहै रहूँ जैसे हौं माधव ।
 लीला सम सब करै दैव आधीन समुक्ति सब ॥
 भिन्नाकूँ औषधि समुक्ति, खाइ उदर केवल भरै ।
 फट्यो पुरानो जो मिले, पट ताकूँ धारन करै ॥

शौच आचमन नियम करै नहिं विधिमहँ बँधिकें ।
 केवल लीला समुक्ति करै सब नियमनि तजिकें ॥
 ज्ञानाकूँ संसार स्वप्नवत् असत लखावै ।
 होहि प्रतीती कबहुँ समुक्ति मिथ्या हँसि जावै ॥
 जब तक तनु तब तक कबहुँ, यदि भासै जग नहिं हिलै ।
 होहि पतन जब देहको, होहि एक मोमें मिलै ॥

ज्ञानी तो सर्वस्व एक मोईकूँ मानै ।
 मो प्रभुतैं अतिरिक्त स्वर्ग अपवर्ग न जानै ॥
 ज्ञानी अति प्रिय मोइ निरन्तर मोकूँ ध्यावै ।
 तत्व ज्ञान बिनु सिद्धि कबहुँ साधक नहिं पावै ॥
 बोले उद्धव—जगत्पति ! होहि ज्ञान कैसे बिमल ।
 भक्तियोग बरनन करै, मुनिबेकी इच्छा प्रबल ॥

इति श्रीभागवतचरितके सप्ताहमें उद्धवगीतान्तर्गत विभूतियोगः
 तथा वणाश्रमधर्म नामक सप्तम अध्याय समाप्त ।

अथ अष्टमोऽध्यायः

[८]

हरि बोले—जो ज्ञान भीष्म पांडवकूँ दीयो ।
 ताहीकूँ हूँ कहूँ प्रश्न तुमने जो कीयो ॥
 नौ ग्याह अरु पाँच तीन अट्टाईस ये सब ।
 कहे तत्व इनमाँहिँ एक अनुगत हौँ उद्धव ॥
 ज्ञान कह्यो अपरोक्ष है, दृढ़तर सो विज्ञान है ।
 नेति नेतितैँ जो बचै, वही ब्रह्म भगवान है ॥

परिणामी सब कर्म लोक परलोक अशाश्वत ।
 जानि असत् सब तजै जगतकूँ ज्ञानी बिषवत ॥
 भक्तियोग अब कहूँ समुझिकैँ तुमरो रुचि अति ।
 कथा सुनै अरु करै नाम कीर्तन मम नित प्रति ॥
 मेरी पूजामहँ सतत, रहै भक्त संलग्न नित ।
 त्यागि जगत ब्यौहार सब समुझै सेवामाँहिँ हित ॥

हूँकैँ अति ई आर्त करै स्तव मेरो सादर ।
 परम दीनता प्रकट करै मेरे प्रति आदर ॥
 करुनामय इस्तोत्र कंठ गद्गद है गावै ।
 मम मन्दिरमहँ भक्तिभावतैँ जाइ सुनावै ॥
 मेरी सेवामहँ सदा, प्रेम रखै सेवा करै ।
 मेरे सम्मुख दण्डवत्, प्रेम सहित भूपै परै ॥

सब अङ्गनितै करै बन्दना मम भक्तनिकी ।
 पूजा मोतै अधिक करै श्रद्धातै उनकी ॥
 निज पूजाकूँ निरखि होहुँ नहिँ उतनों हरषित ।
 जितनो पूजित भक्त निरखि होवै अँग पुलकित ॥
 थावर जंगम जीव सब, अचर सचर चैतन्य जड़ ।
 निरखै मोकूँ सबनिमहँ, जगमहँ सोई भक्त बड़ ॥

चेष्टा मेरे हेतु करै अङ्गनिकी सब ई ।
 करै गान गुन सतत उचारै बानी जब ई ॥
 जो कछु कारज करै मोइमहँ चित्त लगावै ।
 मनसा बाचा कर्म सदा मोईकूँ ध्यावै ॥
 जगकी जितनी कामना, तिनि सबकूँ मनतै तजै ।
 जगके नाते तोरि सब, केवल मोईकूँ भजै ॥

मम हित धन अरु भोग तजै सुख सबरे मनतै ।
 करै यज्ञ व्रत दान हवन जप तप जो तनतै ॥
 मम अरपन करि देइ न अपनेमहँ कछु राखै ।
 मैने यह शुभ करयो न कबहूँ मुखतै भाखै ॥
 जो इन धरमनिको करै, पालन श्रद्धा सहित सुनि ।
 होवै प्रकटित भक्ति मम, का तिनि कूँ अवशेष पुनि ॥

बढ़ै सत्व चित शान्त होहि आत्मामहँ जावै ।
 धर्म ज्ञान बैराग्य और ऐश्वर्यहिँ लावै ॥
 यदि चित जगमहँ लगै बिषय भोगनिमहँ भटकै ।
 जनम मरन अरु रोग शोक दुःखनिमहँ पटकै ॥
 भक्ति बढ़ै सो धर्म है, सबमहँ आत्मा ज्ञान है ।
 अणिमादिक ऐश्वर्य है, बिषय बिरत बैराग्य है ॥

उद्धव बोले—प्रभो ! प्रश्न कछु पूछूँ पावन ।
 'पूछो' बोले कृष्ण—देहुँ उत्तर मन भावन ॥
 यम कितने हैं नाथ ! कह उद्धव ! बारह मुनि ।
 सत्य, अहिंसा, ब्रह्मचर्य अस्तेय, अभय पुनि ॥
 आस्तिकता, ह्रीं, मौन अरु, क्षमा असञ्चय दश भये ।
 धिरता, विषय-असंगता, यों सब बारह हैं गये ॥

'नियम बताओ नाथ !' कहें बारह ते सज्जन ।
 भीतर बाहर शौच, होम, जप तप मम पूजन ॥
 श्रद्धा, अरु संतोष, तीर्थ, गुरु-सेवा उद्धव ।
 परकारज आतिथ्य, भये बारह पूछौ अब ॥
 'शम, दम, धीरज तितिक्षा, अर्थ बतावें रिपुदमन ।
 शम-मम धो गो-दमन दम, कहें तितिक्षा दुख सहन ॥

जिह्वा और उपस्थ विजय धृति बेद बतावें ।
 उद्धव बोले—दान बीरता, तप समुझावें ॥
 सत्य और ऋत, त्याग, इष्ट धन यज्ञ अर्थ विभु ।
 नरबल, भग, बड़ लाभ, दक्षिणा, विद्या ही प्रभु ॥
 हरि बोले—है दान बड़, भूतद्रोह तजिबो सतत ।
 मन बश करिबो शूरता, सत प्रिय बानी कहहिँ ऋत ॥

सम दरशन ही सत्य शौच कर्मनि आसक्ति न ।
 करम त्याग संन्यास धरम ही कह्यो इष्ट धन ॥
 हौं ही उत्तम यज्ञ ज्ञान उपदेश दच्छिना ।
 बल बड़ प्राणायाम लाभअति भक्तिभावना ॥
 आत्मा अरु परमात्मा, महँ अभेद विद्या कही ।
 भगही मम ऐश्वर्य है, दुष्करमनिको त्याग ही ॥

उद्धव बोले—कहैं आपु 'श्री' काकूँ स्वामी !
 सुख दुख, पंडित, मूर्ख अर्थ का अन्तरयामी !!
 कौन कुपथ, का सुपथ, स्वर्ग अरु नरक बताओ ।
 बन्धु कौन, घर कहा, कौन निरधन समुझाओ ॥
 को ईश्वर; बिपरीत को, धनी कौन, को कृपन हैं ।
 मेंटें मेरे मोहकूँ, प्रभु तो अशरन-शरन हैं ॥

सम सुख-दुख सुख कह्यो; कही श्री सद्गुण संचय ।
 बिषय अपेक्षा दुःख, काम ही रिपु अति दुर्जन ॥
 बन्ध मोक्षतैं विज्ञ होहि सो पंडित ज्ञानी ।
 मैं मेरीमहँ फँस्यो कह्यो मूर्ख अज्ञानी ॥
 बड़ै सत्व गुन स्वर्ग सो, ममढिँग लावै सो सुपथ ।
 बड़ै तमोगुण सो नरक, चित चञ्चलकर सो कुपथ ॥

हौं ही गुरुवर बन्धु मनुज तनु घर अति मनहर ।
 गुणी धनी ही सत्य, बिषय निरलिप्तहि ईश्वर ॥
 बिषयी ईश्वर नहीं तासु चित नहीं समाहित ।
 निरधन जो नहि तुष्ट कृपन जो नहि इन्द्रियजित ॥
 सब प्रश्ननि उत्तर द्यो, उद्धव ! अब अति सार सुन ।
 गुन दोषनिको देखिबो, दोष न देखन उभय गुन ॥

सुनिके प्रभुके बचन प्रश्न कीयो उद्धव पुनि ।
 भगवन् ! मन-भ्रम भयो बात गुन दोषनिकी सुनि ॥
 यह गुन है यह दोष सतत श्रुति बचन बतावैं ।
 बिधि निषेधके हेतु कर्म गुण दोष दिखावैं ॥
 द्रव्य, देश, बय, काल अरु, स्वर्ग नरक उत्तम अधम ।
 बेद भेद प्रतिपद कहैं, कैसें फिरि तजि देहिँ हम ॥

पुनि पुनि ही यों कहै—दोष गुन नहीं निहारौ ।
 त्यागि दोष गुन भक्ति करौ या ब्रह्म बिचारौ ॥
 लखि विरोध भ्रम भयो बुद्धि मेरी चकराई ।
 मम भ्रम मेंटौ नाथ भक्तवत्सल यदुराई ॥
 तब बोले भगवान—सुनु, उद्धव ! तू अति तत्त्ववित ।
 तान योग मैंने कहे, पुरुषनिके कल्याण हित ॥

ज्ञान कर्म अरु भक्तियोग ये तीनि पुरातन ।
 जो विरक्त निष्काम ज्ञान तिनि हेतु सनातन ॥
 अधिकारी ते कर्मयोगके जो सकाम जन ।
 नहिँ विरक्त अति रक्त नतिनिकोभक्ति परम धन ॥
 जबतकविषयविराग नहिँ, मम गुनकरमनि श्रवन रुचि ।
 तब तक तजि फल कर्म करि, होवै अन्तःकरन शुचि ॥

भक्ति ज्ञानकी प्राप्ति मनुज तनुतै ही होवै ।
 पाइ मनुज तनु विषय भोगमहँ ताकूँ खोवै ॥
 सो अति मूरख अधम अमृत तजि विषकूँ पीवै ।
 मृतक सरिस सो अज्ञ देखिबेको ही जीवै ॥
 नौका नरतनु अति सुदृढ़, करनधार गुरुके चरन ।
 होहिँ अज्ञ भवपार नहिँ, मम प्रेरित पावन पवन ॥

होवै विषय विराग तबहिँ इन्द्रिय संयम करि ।
 चितकूँ करि थिर चञ्चलता सब मनकी परिहरि ॥
 चञ्चल हयके सरिस चित्तकूँ सीख सिखावै ।
 हौलें करि अनुरोध योगमहँ नित्य लगावै ॥
 सांख्ययोगतैं उदय लय, कौ मनतैं चिन्तन करै ।
 यों अनात्ममहँ आत्मधी, की जड़ताकूँ परिहरै ॥

मेरी पूजा करै कथा सुनि मम गुन गावै ।
 होहि कर्म आसक्ति ताहि नित निन्द्य बतावै ॥
 भजन भावकूँ नित्य बढ़ावै कर्मनि त्यागै ।
 करत करत अभ्यास बासना हियकी भागै ॥
 भक्ति मार्ग अति सुगम सुठि, है निरपेक्ष निकाम नित ।
 त्यागि स्वर्ग अपवर्ग सुख, मोमें रखै भक्त चित ॥

ज्ञान करम अरु भक्ति कहे साधन परमारथ ।
 जे तजि इनकूँ छुद्र विषय सुख साधै स्वारथ ॥
 पुनि पुनि जनमें मरे' घोर ते नरकनि जावै ।
 पाइ मनुज तनु विषय निरत ते पुनि पछितावै ॥
 चौरासीके चक्रमहँ, घूमि पाहिँ पुनि मनुज तन ।
 तब छूटै संसारतै, यदि साधनमहँ देहिँ मन ॥

जो जाको अधिकार सुदृढ़ता तामें गुन है ।
 अनधिकार बिपरीत कर्म सो ई अवगुन है ॥
 परिभाषा गुन दोष विवेचन जिही बताई ।
 बस्तु सकल सम किन्तु भिन्नता बेद जताई ॥
 शुद्धि अशुद्धि बिचार है, धर्म हेतु पुनि दोष गुन ।
 कहे सकल व्यवहार हित, यात्रा हित शुभ अशुभ दिन ॥

पञ्चभूतमय देह कहे अजतै' नग द्रुम तक ।
 भिन्न भिन्न हैं नाम रूप तनके सब साधक ॥
 करमनि नियमित करन देश-कालादि बखाने ।
 शुद्ध देश कछु कहे कछुक अति शुद्ध न माने ॥
 द्रव्य संयोग स्वभावतै, होहि कर्म जिह कालमहँ ।
 वही शुद्ध नहिँ कर्म जब, होहि अशुद्ध बिकालमहँ ॥

कहे हेतु कछु शुद्धि अशुद्धि पदार्थनि मधिमहँ ।
 द्रव्य, बचन, संस्कार, काल, बहु स्वल्प सबनिमहँ ॥
 शक्ति बुद्धि अरु बित्त विभव कारन कछु भाखे ।
 होहिं दोष गुन, देश काल अनुसारहिं राखे ॥
 स्नान, दान, तप, अवस्था, शक्ति, कर्म, संस्कारतैं ।
 चित्त शुद्ध होवै अवसि, सुमिरन मम पद प्यारतैं ॥

परिज्ञानतैं मन्त्र शुद्धि कर्महु अरपनतैं ।
 देश, काल अरु वस्तु, कर्म कर्ता, मनु इनतैं ॥
 धर्म शुद्धिमहँ हेतु कहे छै ये सब उद्धव ।
 शुचितैं होवै धर्म अशुचितैं अधरम यादव ॥
 कबहुँ दोष गुनके सरिस, गुन होवैं कछु दोष सम ।
 कबहो बली सामान्यतैं, अधिक विशेष निगम नियम ॥

जो जाको कुल धरम दोष नहिं ताकूँ तामें ।
 चाहे होइ सदोष पतिततैं नहिं हों ग्वामें ॥
 होइ प्रवृत्तितैं दुःख निवृत्तितैं सुख निरभयता ।
 विषयनि सुखप्रद लखै होइ तब तिनिमहँ ममता ॥
 होहि कामना कलह पुनि, क्रोध मोह अज्ञान हू ।
 सिमृतिनाश मृतवत् बनै, नसै ज्ञान बिज्ञान हू ॥

करम बन्धके हेतु सकामनि हित बेदनि महँ ।
 कहे प्रशंसापरक बचन नर फँसिहैं तिनिमहँ ॥
 दै मीठेको लोभ शिशुनि कटु औषधि प्यावैं ।
 त्यों श्रुति कहि श्रुतमधुर बचन मखमाँहिं लगावैं ॥
 अज्ञ न समुझै रहसकूँ, सब कछु समुझै करमकूँ ।
 हिंसामहँ नित निरत है, तजै मोक्ष सुख धरमकूँ ॥

स्वप्न समान अमान मधुर श्रुत स्वर्ग आदि सुख ।
तिनिहित हिंसा करै अन्तमहँ पावै बहु दुख ॥
गुनमय देवनि भजै गुननिमहँ ही फँसि जावैं ।
ते निरगुन परमात्म-तत्त्व मोकूँ नहिँ पावैं ॥
सुनि करमनिको प्रशंसा, गूढ़ रहस नहिँ धरहिँ हिय ।
ऋषि परोक्ष बरनन करै, है परोक्ष अति मोड़ प्रिय ॥

शब्द-ब्रह्म दुरबोध पार सब ताहि न पावैं ।
पश्यन्ती अरु परा मध्यमा त्रिविधि बतावैं ॥
नाद रूपतैं प्रथम फेरि बनि बरन सुहाये ।
बरन छन्द बनि गये भेद बहु मुनिनि बताये ॥
गायत्री उष्णिक् बृहति, जगती त्रिष्टुप पंक्ति सब ।
अतिच्छंद अत्यष्टि ये, अति जगती बीराट तब ॥

छन्दनिमें ही भये व्यक्त सब भाव जगतके ।
कर्म उपासन ज्ञानकांड प्रकटित इत उतके ॥
आदि मध्य अरु अन्त कहाँ हौं ही वेदनिमहँ ।
हैं सब मायामात्र पदार्थ सत् हौं इनिमहँ ॥
तत्त्वनिको निश्चयकरौ, परमतत्त्वकूँ पुनि लहौ ।
उद्धव बोले—तत्त्व कै, यदुनन्दन ! मोतैं कहौ ॥

अट्टाईस प्रभु ! कहे तत्त्व कछु चार बतावैं ।
कछु नौ, छै, छब्बीस, सात, पच्चीस गिनावैं ॥
च्यों इतनो मतभेद रहस का जाके भीतर ।
उद्धव शङ्का सुनी बिहँसिके बोले यदुबर ॥
बिज्ञ बिप्र जो कछु कहें, युक्तियुक्त सब तात ! है ।
मेरी मायामहँ कहो, कौन असंभव बात है ॥

तत्त्व परसपर मिलेजुले कछु पृथक बतावै ।
 कछु एकहिमहँ कहें कछु द्वै चार मिलावै ॥
 प्रकृति, पुरुष, महत्त्व, अहं, मन, मात्रा इन्द्रिय ।
 पञ्चभूत पच्चीस भये अठ्ठाइस गुन त्रय ॥
 छन्विस ईश्वर सहित हैं, कहूँ भूत इन्द्रिय अलग ।
 कहूँ आत्मा, परमात्मा, एक कह्यो कहूँ सो बिलग ॥

इति श्रीभागवतचरितके सप्ताहमें उद्धवगीतान्तर्गत विविध
 प्रश्नोत्तर नामक आठवाँ अध्याय समाप्त ।

अथ नवमोऽध्यायः

[६]

बोले उद्धव—तत्त्व ज्ञान तो सुन्यो मुरारी ।
 प्रकृति पुरुषको भेद बतावें भवभयहारी ॥
 हरि बोले—है प्रकृति पुरुषमहँ भेद परमप्रिय ।
 सायातैँ जग होहि पुरुष सत चैतन निष्क्रिय ॥
 भेद त्रिविध गुन तीन हैं, सब प्रपञ्च इनितैँ भयो ।
 आत्मा ज्ञान स्वरूप नित, अविकारी बेदनि कह्यो ॥

उद्धव पुछें—प्रभो ! बिमुख जे तुमतैँ प्रानी ।
 का तिनकी गति होहि कर्मके जे अभिमानी ॥
 आत्मज्ञानतैँ रहित पुरुष यह भेद न जानें ।
 जग प्रपञ्चमहँ फँसे देहकूँ सब कछु मानें ॥
 फँस्यो मोहमहँ दयानिधि ! गहे कृपामय तव चरन ।
 उद्धवकी सुनिकें बिनय, बनवारी बोले बचन ॥

प्रियवर ! मन है करमयुक्त इन्द्रियतैँ संयुत ।
 जीव संग लै फिरै लोक लोकनिमहँ इत उत ॥
 मनने जो कछु सुन्यो कश्यो तिहि नित्य बिचारै ।
 जाइ जहाँ तहँ रमै पूर्व निज रूप बिसारै ॥
 अहंभाव स्वीकार ही, यही जीवको जनम है ।
 नहीं जीव जनमै मरै, यही यथार्थ मरम है ॥

करै स्वप्नमहँ भेद भाव ज्यों बहु विधि प्रानी ।
 त्यों आश्रय करि करण बनै आत्मा अज्ञानी ॥
 प्रति पल होवै जनम मरन मूरख नहिं जानै ।
 परिवर्तित तनु होहि अबुध नित नहिं पहिचानै ॥
 गरभ, वृद्धि, उत्पत्ति शिशु, कुमर, युवक पुनि, प्रौढ़ वय ।
 जरा, मरन नव अवस्था, तनुकी जीव सदा अभय ॥

बोयो पौधा भयो काटिके बीज निकारौ ।
 द्रष्टा इनतै पृथक जीव त्यों तनुतै न्यारौ ॥
 प्रकृति पुरुषको भेद समुझि जे नहीं बिचारै ।
 भटकै योनिनिमाँहि मरै पुनि पुनि तनु धारै ॥
 चाई माई शिशु करै, कहै—भूमि घूमै फिरै ।
 त्यों कर्त्ता नहि जीव है, भ्रम बश चक्करमहँ परै ॥

होहि अर्थ नहि तऊ जगत चिन्तन है अनरथ ।
 स्वप्नमाँहि जो लखै तिनहि सत् समुझे स्वारथ ॥
 भ्रमबश भासित होहि सत्य जगकू मत जानों ।
 खल जो कछु कटु कहै बुरो ताको मत मानों ॥
 उद्धव बोले—प्रभु ! नहीं, सह्यो जात अपमान है ।
 कैसे समदर्शी बनै, हियमहँ बड़ अज्ञान है ॥

हरिहँसिबोले—सखे ! संहनन अपमान कठिन अति ।
 वाक्य-बानतै बिंधे ब्यक्तिकी बिगारै गति मति ॥
 सुनौ एक दृष्टान्त अवन्ती नगरी नामी ।
 तामें द्विज एक बसै कृपन अति क्रोधी कामी ॥
 भयो नाश धन कृपनको, दान भोग नहि कछु कश्यो ।
 हरयो चोर, नृप, स्वजन, खल, जोरि जोरि जो धन धरयो ॥

भयो कृपन धन रहित बात अब कोइ न बूझै ।
 माइयो माइयो फिरै न मारग सुखकर सूझै ॥
 आशा करिकें जाइ जहाँ तहँ धक्का पावै ।
 हँ चिन्तामहँ प्रस्त नयनतै' नीर बहावै ॥
 अब पछितावत कृपन अति, लई भक्त-चरननि शरन ।
 गहि पद गद्गद कंठतै, बिकल बिलख बोल्यो वचन ॥

मैं नहिँ कीयो धरम करम कछु द्रव्य कमायो ।
 सोऊ सब नसि गयो काम मेरे नहिँ आयौ ॥
 कृपननिको धन धरम भोगमहँ काम न आवै ।
 दुखको कारन बनै लोक परलोक नसावै ॥
 धनअर्जन, व्यय, नाशमहँ, श्रम, भ्रम, भय, मद होहिदुख ।
 चित चिन्तित सब जन कुदैं, कहो द्रव्यमहँ कौन सुख ॥

चोरी, जारी, काम, क्रोध, मिथ्या भाषन अति ।
 इस्मय, मद, पाखण्ड बैर अरु भेद व्यसन मति ॥
 इस्पर्धा, बिश्वासहीनता, हिंसा, अनरथ ।
 होहिँ अर्थतैं सकल सधै का धनतैं स्वारथ ॥
 सब व्यसननिको जनक धन, तृष्णा अब नहिँ करुझो ।
 करें कृपा करुनायतन, तो सब तजि हरि भजुझो ॥

यों निश्चय करि बिप्र भयो दन्डी सन्यासी ।
 प्रान, करन, मन साधि बन्यो भगवत विश्वासी ॥
 भिक्षाकूँ जब जाइ करें अपमान असज्जन ।
 छीनैं कन्या, दन्ड, कमन्दलु, माला, आसन ॥
 करन लगै भिक्षा जबहिँ, त्यागि देहिँ मल-मूत्र खल ।
 देहिँ विविध विधि यातना, तऊ न होवे द्विज बिकल ॥

छाटें छपटें दुष्ट बाँधि कपि सरिस नचावैं ।
 नित कटु कहै कुवाक्य धूर्त, खल, चोर बतावैं ॥
 कहैं—द्रव्य हित कृपन फिरै नित वेष बनाये ।
 तजै मौन खल करै यतन नहिं डिगै डिगाये ॥
 दैविक दैहिक परहिँ दुख, भाग्य समुक्ति सबकूँ सहै ।
 गीत गाइ समुझाइकें, बार बार मनतै कहै ॥

देवै दुख सुख कौन दैव गतिनै सब होवै ।
 अमुक देहि दुख समुक्ति अज्ञ पछितावै रोवै ॥
 स्वजन, देवगन, काल, करम कारन सब नाहीं ।
 मनही सुख दुख रचै घुमावै जगके माहीं ॥
 गुन वृत्तिनि उपजाइ मन, त्रिविध करम करवाइकें ।
 आत्मा नित्य निरीह परि, बधै गुननि मन पाइकें ॥

दान, धरम, यम, नियम, बेद पढ़िबो, व्रत धारन ।
 बरनाश्रम शुभकरन सकल मन बशके कारन ॥
 यदि मन बशमहँ भयो न फिरि आवश्यक साधन ।
 हैं साधन सब व्यर्थ होहि नहिँ बश जिनिनै मन ॥
 यह मन अति बलवान रिपु, सकल करन प्रेरक प्रबल ।
 जाके बशमहँ सब रहैं, करहिँ जाहि बश नर बिरल ॥

अज्ञ न जीतै जाहि विजय हित इत उत अटकै ।
 बिनु मन जीते पुरुष बिबिध योनिनिमहँ भटकै ॥
 यदि सुख दुखको हेतु मनुजकूँ ही तुम मानों ।
 देह परस्पर लडैं आत्मा निष्क्रिय जानों ॥
 सोचो यदि निज दाँततै, कटै जीभ भोजन समय ।
 करौ क्रोध फिरि कौनपै, कौन करै अनुनय बिनय ॥

देहिं देवता दुःख लवैं यदि स्वयं परस्पर ।
 आत्माकी का हानि गिरै जल जलके ऊपर ॥
 सुख दुखतैं है परे आत्मा का दुख देवै ।
 निजानन्दमहँ तुष्ट नहीं बिषयनिकूँ सेवै ॥
 यदि ग्रहगन ही देहिं दुख, सहै देह आत्मा नहीं ।
 स्वप्न कालको अहि कहो, काटे जाग्रतमहँ कहीं ?

नहीं करम सुख दुःख देहिं आत्मा है न्यारो ।
 जड़ चेतन हैं भिन्न नहीं दुख देहि, बिचारो ॥
 काल कहा दुख देहि अंश आत्माको जानों ।
 आत्मा अज, निर्द्वंद्व प्रकृतितैं पर पहिचानों ॥
 अहंकार संसृति जनक, भ्रम-वश होहि प्रतीत दुख ।
 समुमे जो जा ज्ञानकूँ, होवै ताकूँ नित्य सुख ॥

नहीं दुःख सुख देहि कबहुँ काहूँ कोई ।
 दुखको कारन अन्य बतावैं तिनि मति खोई ॥
 मारें बाँधैं चाहिं देहिं दुख मोकूँ सब जन ।
 समुझि दैव गति कबहुँ होहुँ नहिं दुखित मलिन मन ॥
 कहैं कृष्ण—उद्धव ! सुनो, भिन्न कृतारथ है गयो ।
 सहीं यातना खलनिकी, गाय, गीत प्रमुदित भयो ॥

उद्धव बोले—प्रभो ! सांख्य अब मोइ सुनावैं ।
 कितने हैं सब तत्व ? भये कैसें ? समुझावैं ॥
 हरि बोले—हौं प्रथम एक ही अद्वय सतचित ।
 दृष्टा दृश्य स्वरूप प्रकृति अरु पुरुष भये इत ॥
 प्रकृति पुरुष संयोगतैं, लोभ भयो जब गुननिमें ।
 एकादश अरु देव मिलि, भयो अण्ड इनि सबनिमें ।

सलिलमाँहिँ सो रखो विराज्यो तामें हौं जब ।
 भयो नाभितैं कमल प्रकट अज भयो स्वयं तब ॥
 तप करि त्रिभुवन रचे चतुरदश लोक बनाये ।
 मनुज, भूत, सुर, असुर लोक सबमाँहिँ बसाये ॥
 प्रकृति पुरुषतैं होहि जग, काल पाइ होवै सकल ।
 रहूँ ब्रह्म हौं ही सदा, मोतैं नहिँ कोई प्रबल ॥

प्रलयकाल जब होहि कार्य कारन मिलि जावै ।
 देह अन्नमहँ मिलै बीजमहँ अन्न समावै ॥
 बीज भूमिमहँ भूमि गंध सो जल जल रसमहँ ।
 यों क्रमतैं सब भूत लीन है जावैं नभमहँ ॥
 इन्द्रिय मात्रा भूत गन, अहंकारमहँ होहिँ लय ।
 अहंकार महत्त्वमहँ, प्रकृतिमाँहिँ सोऊ बिलय ॥

प्रकृति कालमहँ बिलय जीवमहँ काल समावै ।
 हौं अब्यक्त अनादि जीव मोमें मिलि जावै ॥
 नहिँ काहूमें मिलूँ अवधि सबकी हौं उद्धव ।
 अति समासतैं कही सृष्टि लय कहूँ कहा अब ॥
 बोले उद्धव—नाथ ! अब, गुन वृत्तिनि बरनन करें ।
 च्यौँ प्राणिनिमहँ बिषमता, नटनागर संशय हरेँ ॥

सुनि हरि बोले—भेद होहि गुनकी वृत्तिनिमहँ ।
 शम, दम, दया, विवेक, नहीं इच्छा बिषयनिमहँ ॥
 त्याग तितिक्षा, दान, सत्य, श्रद्धा अरु इस्मृति ।
 मन प्रसाद अरु मौन सत्य गुनमाँहिँ आत्म रति ॥
 इच्छा, तृष्णा, बिषय सुख, भेद-बुद्धि, अभिमान, मद ।
 आत्मप्रशंसा, हास्यबल, वृत्ति रजोगुनकी दुखद ॥

क्रोध, लोभ, पाखंड, कलह, श्रम, शोक, मोह भय ।
 मिथ्याभाषन, नींद, याचना, हिंसा अपचय ॥
 पीड़ा और विषाद, व्यर्थ आशा निज तनमहँ ।
 अनुद्योग है रहै अधिक ममता निज तनमहँ ॥
 बढ़ै तमोगुन देहमहँ, होवें ये सब वृत्ति तब ।
 पृथक् कहीं गुन वृत्ति सब, सन्निपात गुन सुनहु अब ॥

अहंकार सुन उद्धव ! होवै तीनिहु गुनमहँ ।
 इन्द्रिय, मन अरु विषय प्रात तीनिहुगुन इनमहँ ॥
 धरम, अरथ अरु काम होइ इच्छा जब मनमहँ ।
 सन्निपात गुन होहि चित्त श्रद्धा, रति धनमहँ ॥
 गृह रति रुचि कर्तव्यमहँ, करम कामनाके सहित ।
 समुझहु खिचरी गुननिकी, सुनु स्वभाव गुन लाइ चित ॥

बढ़ै सत्व शम आदि बढ़ै गुन चित प्रसन्न अति ।
 ज्ञानादिक सम्पन्न होहि सुख धरममाँहिँ मति ॥
 जब रज अति बढ़ि जाय काम सुखई प्रिय लागै ।
 चित चंचल मति भ्रमित द्रव्य यश इच्छा जागै ॥
 तमकी होवै प्रबलता, हिंसा निद्रा शोक भय ।
 बढ़ै ग्लानि मन शून्यवत, खिन्न चित्त अज्ञानमय ॥

देव असुर अरु यातुधान बल बाढै क्रमतै ।
 सत्व रजोगुन और ज्ञाननाशक गुनतमतै ॥
 स्वरग भूमि अरु नरक देवत्रय तीन अवस्था ।
 बात, पित्त, कफ सबनि माँहिँ गुन तीन व्यवस्था ॥
 भोग, धरम, व्रत, नियम, फल, काल, करम, करता, करन ।
 द्रव्य, देश, निष्ठा, क्रिया, ज्ञान, अवस्था अरु असन ॥

सबई हैं त्रिगुनात्म प्रकृति अरु पुरुष अधिष्ठित ।
 देखे समुझे सुने बुद्धि द्वारा जो निश्चित ॥
 होहिँ करम बश बन्ध भक्तितैं गुन भगि जावैं ।
 मोमें राखैं भाव भक्त ते मोकूँ पावैं ॥
 रज, तमकू जय सत्वतैं, करै सत्व मम भजनतैं ।
 हौवै त्रिगुनातीत तब, लिपटै सो मम चरनतैं ॥

इति श्रीभागवतचरितके सप्ताहमें भिन्नु गीत सांख्ययोग नामक
 नवौ अध्याय समाप्त ।

(पाक्षिक पारायण—चौदहवें दिनका विश्राम)

अथ दशमोऽध्यायः

[१०]

मानव तनु लहि रहै चरन मेरे लिपटानों ।
 नर जीवन फल लह्यो यथारथ तानें जानों ॥
 होवै जब ई ज्ञान जगत माया नसि जावै ।
 अज्ञानिनिको संग करै बिषयनि फँसि जावै ॥
 फँसे उरबशी मोहमहँ, ऐल नृपति सम्राट जब ।
 भयो ज्ञान पछिताइ पुनि, सुखकर गाये गीत तब ॥

ऐल-गीत

प्रथम गीत

हाय ! यह जीवन बृथा गँवायौ ।
 मोहमयी मदिरा पी-पीके, कामिनि हाथ बिकायौ ॥१॥ हाय०
 मृगनयनी बधिकिनि बनि सम्मुख, मोहक जाल बिछायौ ।
 डारि रूपको चुगो चहुँ दिशि, चंचल चित्त फँसायौ ॥२॥ हाय०
 हौं नरपति भूपति-पद बन्दित, खग मृग सरिस नचायौ ।
 त्यागि मोइ ठगिनी चली दीनी, नैक न नेह निभायौ ॥३॥ हाय०
 ह्वैकें बिकल त्यागि पट भूषण, पीछे नंगो धायौ ।
 तेज, ओज, बल, पौरुष त्यागो, हौं नहि नीच लजायौ ॥४॥ हाय०
 भयो दुखी कातर अति बिह्वल, अतिशय नेह जतायौ ।
 गदही मारत जात दुलत्ती, खर वत पीछे धायौ ॥५॥ हाय०

द्वितीय गीत

वृथा ताको जप तप अरु दान ।

जाके हियमहँ धँसीं नारिकी, मंद मृदुल मुसकान ॥१॥ वृथा०
पदै शास्त्र, फल फूल खाय व्रत, कश्यो बेद को गान ।

व्यरथ सकल साधन यदि चाहै, मन अधरामृत पान ॥२॥ वृथा०
तब तक शील, सँकोच, सरलता, जाति, बरन कुल कान ।

जब तक हियमहँ चुभे न चोखे, नारि नयन बर बान ॥३॥ वृथा०
बार बार धिक्कार जारकूँ, कुलटा रूप लुभान ।

मानत सुख जा हाड़चामहँ, नहिँ सुमिरत भगवान ॥४॥ वृथा०

तृतीय गीत

हाय ! मन मूढ़ न मेरो मान्यो ।

जो अति अशुचि मूत्रमल आलय, ताकूँ सुखकर जान्यो ॥१॥ हाय०
खग, मृग सरिस समुझि मोइ वधिकिनि, निज कटाच्छ सर तान्यो ।

अपने आप फँस्यो फंदामें, भयो न दुखो रिस्यान्यो ॥२॥ हाय०
सुधा समुझि बिष बेलि अधम पशु, पाइ ताहि हरषान्यो ।

अति उनमत्त भयो मद पीकें, नहिँ पहिले पहिचान्यो ॥३॥ हाय०
चन्द्रबदन कजरारे नयना, अँग अँग निरखि लुभान्यो ।

देखि रूप भरमायौ कामी, बिष अमिरितमहँ सान्यो ॥४॥ हाय०

चतुर्थ गीत

त्रियाक्री देह परम प्रिय जानी ।

जो मल मूत्र रुधिर मज्जा अरु, कफ खकारकी खानी ॥१॥ त्रिया०

रुधिर राधि मल कफके कीरा, सुधा सरिस इन जानी ।
 कुलबुलात हरषात इनहिमहँ, हौँ तैसो ही प्राणी ॥२॥ त्रिया०
 जोहत रहत नयन मुख पल-पल, समुक्ति आपनी रानी ।
 वृन सम तोरि नेहकी डोरी, छिनमहँ भई बिरानी ॥३॥ त्रिया०
 भ्रमबश सरपिनि गर लपटानी, मनहर माला मानी ।
 कब आई कब गई सयानी, अब रहि गई कहानी ॥४॥ त्रिया०
 माया नाना नाच नचावै, ठगिनी परम पुरानी ।
 हे मायेश बचाओ गिरिधर, यदुबर सारँगपानी ॥५॥ त्रिया०

पंचम गीत

जगतके विषय बड़े बलवान ।
 इतने रहो सचेत सदाई, जो चाहो कल्याण ॥१॥ जगत०
 विषयी विषय बात बतरावहिँ, करत विषय गुनगान ।
 तातैं तजो संग विषयिनिको, बिघन रूप इनि जान ॥२॥ जगत०
 मन अरु करमनि मति पतिआवो, ये रिपुअति बलवान ।
 गहो चरन प्रभु भली करिगे, दीनबन्धु भगवान ॥३॥ जगत०
 छंपय—यों बहु विधि पछिताइ उरबशी पुर तजि आये ।
 मनमहँ मोहूँ धारि शान्त हूँ अति हरषाये ॥
 भयो यथारथ ज्ञान मोहको नातो तोइयो ।
 सब जगतैं मुख मोरि प्रेम मोई तैं जोइयो ॥
 जो चाहै कल्याण निज, जाइ न कबहुँ कुसँजमहँ ।
 कामी कामिनि सङ्ग तजि, रहे सदा सत्संगमहँ ॥

समदरशी शुचि संत सरलचित शान्त अमानी ।
 भोरे ममताशून्य अकिंचन निरमम ज्ञानी ॥
 होवै तिनिके यहाँ कथा नित हरिकी मनहर ।
 सुनत होत अघ नाश होहि हिय निरमल सुखकर ॥
 संतनिके ढिँग बैठिकें, सुनें कथा जे चावतैं ।
 ते पावें ध्रुव परमपद, करै कीरतन भावतैं ॥

शरन हुताशन लेत शीत, तम, भय भगि जावें ।
 त्यों संतनि सँग पाप ताप तम सब नसि जावें ॥
 सत संगति फल समुझि ऐल नृप सुखी भयो अति ।
 करि उद्धव ! सत्संग लगाओ मम चरननि मति ॥
 उद्धव बोले—दयानिधि, क्रियायोग मोतें कहें ।
 कैसे तुमहूँ पूजि हम, नित पदपद्मनिमहूँ रहें ॥

इति श्रीभागवतचरितके सप्ताहमें ऐलगीत नामक दशम
 अध्याय समाप्त ।

[मासिक पारायण अट्ठाईसवें दिनका विश्राम]

अथ एकादशोऽध्यायः

[११]

हरि बोले—यह क्रियायोग है विस्तृत भारी ।
अति समासतें कहूँ सबनिको जो हितकारी ॥
बैदिक, तान्त्रिक, उभय तीनि विधि पूजा मम प्रिय ।
पंचभूत, द्विज, अतिथि, मूर्तिमहँ अथवा निजहिय ॥
करे नित्यकरमनि निबटि, प्रतिमा सुघर बनाइके ।
पत्र, पुष्प, फल, नीरतें, मोमें चित्त लगाके ॥

जो मिलि जावै वस्तु अल्प वा बहु पूजनकी ।
साङ्ग सहित परिवार करै पूजाइनि सबकी ॥
पाद्य अर्घ्य इस्नान धूप दीपादिक दैके ।
नाना विधि नैवेद्य धरै अति हरषित ह्वैके ॥
दै मुखशुद्धी प्रदच्छिन, क्षमायाचना बहु करै ।
भोग लेहि, निज शीशपै, चंदन चरनामृत धरै ॥

बेदी सुघर बनाइ अग्निमहँ पूजै विधिवत ।
करि पुनि मेरो ध्यान समिध आहुति दे धृतयुत ॥
आज्यभाग आघार देहि शाकल्य आज्यमय ।
मूलमन्त्र पढ़ि देहि स्विष्टकृत करै सदाशय ॥
रवि उपासना अर्घ्य दै, जलमहँ जल तरपन करै ।
अतिथि बिप्र नैवेद्यतें, पूजै यों करमनि करै ॥

धनको सत-उपयोग जिहीं मम पूजा होवै ।
 धरमहीन धन जोरि ब्यरथ नर आयुष खोवै ॥
 मन्दिर सुघर बनाइ भोग नित नव लगवावै ।
 बाँटै प्रभु परसाद स्वयं बन्धुनि सँग पावै ॥
 खेत, नगर, आजीविका, पूजा हित अरपन करै ।
 करि धन व्यय सेवा निमित्त, भवसार नर ध्रुव तरै ॥

उद्धव बोले—प्रभो ! करें परमार्थ निरूपन ।
 हरि बोले—नहिँ लखै कबहुँ परगुन अरु दूषन ॥
 निन्दा इस्तुति करै जीबकी जो जड़ प्राणी ।
 परमारथतै गिरें द्वैत करिकें अज्ञानी ॥
 का जगमें शुभ अशुभ है, ये सब गुनके खेल हैं ।
 जगत पदारथ असतहै, बिकृत गुननिके मेल हैं ॥

हरि ही सब बनि गये करन अरु कारन कर्ता ।
 वे ही पालक पाल्य बने संहत संहर्ता ॥
 होवै त्रिविध प्रतीत गुनमयी माया मानों ।
 निज अनुभव प्रत्यक्ष बेदतें जाकूँ जानों ॥
 उद्धव पूछें—देह जड़, आत्मा स्वयं प्रकाश है ।
 होइ प्रतीती कौनकूँ, कामें अमको वास है ॥

हँसि बोले भगवान—“असत जग आत्मा है सत ।
 देह, करन, मन, प्रान रहें जब तक सम्बन्धित ॥
 तब तक यह अज्ञान रहै नहिँ छूटै बन्धन ।
 ज्यों नहिँ छूटै स्वप्न होहि अनरथ नहिँ छिन्दन ॥
 देह, करन, मन प्रानको, अभिमानी ही जीव है ।
 अहं अविद्यातें रहित, स्वयं प्रकाशित शीव है ॥

एकतत्त्व नित नयो विविध रूपनिमहँ भासै ।
वही प्रकास प्रकाश्य दृश्यकूँ नित्य प्रकासै ॥
आदि अन्त जग नाहिँ मध्यमें हू न रहेगो ।
च्यौँ ज्ञानी फिरि सोच करै च्यौँ दुःख सहेगो ॥
अन्वय अरु व्यतिरेकते, आत्मतत्त्व निश्चय करै ।
जब तक दृढ़ता होहि नहिँ, तबतक शुभ साधन करै ॥

रोग उपेक्षा करो उभरि वह पुनि पुनि आवै ।
त्यौँ विषयनि आसक्त चित्त साधकहिँ डुवावै ॥
काम करम बश होहि स्वयं कर्ता बनि जावै ।
जो कर्ता बनि जाय अन्तमहँ सो फँसि जावै ॥
रहै कमल जलमें यथा, त्यौँ ज्ञानी जगमहँ रहै ।
करै प्रकृति बश काज सब, किन्तु न बन्धन दुख सहै ॥

है बिकल्पतें रहित आतमा चित्त मोह बश ।
करै द्वैतको भान भेद करि राजस तामस ॥
अर्थबाद जो कहें अज्ञ ते पंडित मानी ।
भोगनिमहँ सुख लहैं असत् कर्मनि अभिमानी ॥
करै साधना योगकी, विघ्न डिगावै आइकें ।
तौ विघ्ननिक्कूँ नाश करि बढैं फेरि हरषाइकें ॥

होइ शीत संताप सूर्य शशि करै धारना ।
बात आदि बढि जाइँ करै आसननि कल्पना ॥
होहि भाग्य बश पाप तिनिहिँ तप करिकें जायै ।
बात, पित्त, कफ बढैं औषधिनिर्ते संहारै ॥
कौप क्रूर ग्रह करहिँ यदि, तौ मन्त्रनिको जप करै ।
कामबाधना यदि उठै, ध्यान सतत मेरो धरै ॥

है बिघननिके नाश हेतु प्रभु नाम कीरतन ।
 काम क्रोध नसि जायँ करै जो मेरो सुमिरन ॥
 नश्वर समुझै देह न जामें मोह लगावै ।
 यदि है जावै सुदृढ़ तऊ नहिँ लखि इतरावै ॥
 सिद्धि पाइकें योगकी, मन न फँसै जगमहँ कहीं ।
 जे आश्रम मेरो गहँ, होहि विघ्न तिनिक्कूँ नहीं ॥

उद्धव बोले— बिभो ! योग अति दुष्कर मानूँ ।
 मैं तो लीला, धाम, नाम अरु रूपहिँ जानूँ ॥
 कोई सुगम उपाय कृपा करि और बतावें ।
 अनायास सब सिद्धि सरलतातैं मिलि जावें ॥
 कमल सरिसकोमल सुखद, परम मृदुल अति अरुन वर ।
 गही शरन तब चरनकी, जो कमला-संतापहर ॥

सुनिकें उद्धव विनय बिहँसि बोले बनवारी ।
 है अति पावन परम विमल मति तात तुम्हारी ॥
 विषय बासना फँस्यौ व्यरथ बय प्रानी खोवै ।
 मम धरमनि अनुराग भाग्य ही तें प्रिय ! होवै ॥
 अब फिरितें अपने धरम, कहूँ सुमङ्गल शान्तिमय ।
 करि जिनको आचरन शुभ, करै मृत्युपै नर विजय ॥

मोमें मन चित लाइ करै सुमिरन मेरो नित ।
 असन बसन जो करम तिनिक्कूँ मेरे हित ॥
 रहैं भागवत जहाँ तहाँ ही समय बितावै ।
 भक्तनिको नित करै आचरन तिनि गुन गावै ॥
 मेरे पर्वनिपै करै, महा महोत्सव प्रेमतें ।
 धूम धाम अरु ठाठतें, करै काज सब नेमतें ॥

आत्मा गगन समान समुक्ति नित नेह बढ़ावै ।
 करि सबको सत्कार द्वैत मनमाँहि न लावै ॥
 बिप्र, श्वपच, खर, धेनु करै डंडौत सबनिकूँ ।
 मेरे अरपन करै सकल तन मन करमनिकूँ ॥
 अपनो कछु समुझै नहीं, तन, मन, जन, गृह, वित्तकूँ ।
 या अनित्य तनतें चतुर, पावै मो अज नित्यकूँ ॥

ज्ञान सारको सार कह्यो उद्धव ! यह तातें ।
 शङ्का यदि कछु रही पूछि ग्याकूँ तू मोतें ॥
 जे श्रद्धायुत सुनहिँ हियेमें जाकूँ लावैं ।
 ते पावैं मम भक्ति अन्त मम धामहिँ आवैं ॥
 अब उद्धव तुमरो कहो, शोक मोह का नसि गयो ?
 मेरो मायातें रहित, रुप हिये में बसि गयो ?

उद्धव सुनि प्रभु प्रश्न चरन कमलनि लिपटाये ।
 कंठ भयो अवरुद्ध नयन जलतें भरि आये ॥
 पुनि कछु धरिकेंधीर कहें—प्रभु ! सब कछु जानों ।
 भयो यथारथ ज्ञान मोह मद मान नहानों ॥
 भयो नाथ ! जीवन सफल, पुनि पुनि पदपद्मनि परूँ ।
 कृष्ण ! कृपा करिकें कहें, है कृतार्थ अब का करूँ ॥

सुनि बोले यदुनाथ— बत्स ! बदरीबन जाओ ।
 कन्द, मूल, फल खाइ अलकनन्दामें न्हाओ ॥
 शीत उष्णको सहन करो नित ध्यान लगाओ ।
 तो तुम तजि भवबन्ध अन्तमहँ मोकूँ पाओ ॥
 श्याम सीख सुखमय सुनी, पुनि पदपद्मनि परि गये ।
 प्रभु चरननि बिछुरन सुमिरि, उद्धव अति बिह्वल भये ॥

चरनपादुका लईं धरीं सिर प्रभुपद सुमिरत ।
 पुनि पुनि करत प्रनाम चले बदरीवन बिलखत ॥
 हरि निज सेवक सखा समुक्ति सब सीख सिखाई ।
 शुभ शिक्षा हिय धारि परमगति उद्धव पाई ॥
 पूछें शौनक—सूतजी, पुनि यदुन्दन का कश्यो ।
 कैसें कुल संहार करि, शेष भार भूको हश्यो ॥

इति श्रीभागवतचरितके सप्ताह में उद्धवगीता उपसंहार नामक
 ग्यारहवाँ अध्याय समाप्त ।



अथ द्वादशोऽध्यायः

[१२]

कहें सूत—अपशकुन पुरीमहँ नित नित होवें ।
 करि करि करकस शब्द सियारिनि दिनमहँ रोवें ॥
 काक, कंक अरु गीध अशुभ खग इत उत डोलें ।
 उल्लू, श्वान कपोत भयंकर बोली बोलें ॥
 हरि बोले—यादव सुनहु, इनउत्पातनि शमन हित ।
 सब प्रभास मिलिकें चलो, दान धरममहँ देहु चित ॥

साधु साधु कहि सबनि हरषि अनुमोदन कीन्हों ।
 सब प्रभास चलि दयेपुण्य हित धन बहु लीन्हों ॥
 अस्त्र शस्त्र लै संग चले, सब तुरंग भगावत ।
 पहुँचे पुण्य प्रभास उदधि लखि सब हरषावत ॥
 विधिवत करि उपवास पुनि, पूजि प्रेमतेँ सुरनिकूँ ।
 धेनु, धान, धन, गज, तुरंग, दई वस्तु सब द्विजनिकूँ ॥

तीरथको करि कृत्य यथारुचि भोजन कीयो ।
 भावी बश फिरि सबनि द्रव्य मादक बहु पीयो ॥
 करन लगे सब कलह परस्पर देवें गारी ॥
 सकल भये मदमत्त भाग्यने बुद्धि बिगारी ।
 धनुष, बान, तोमर, खड्ग, लै लै सब लरिवे लगे ।
 हरि-माया मोहित भये, नहिँ कोई रनतेँ भगे ॥

धनुष गये सब दृष्टि बाण तूनीर रहे नहिँ ।
 तटपै सम्मुख मुसल चूर्णके सरपत निरखहिँ ॥
 तिनिक्कूँ तुरत उखारि परस्पर सबई मारें ।
 बज्र सरिस बनि जायँ सकल यादवनि सँहारें ॥
 राम श्याम बरजन लगे, इनकूँ हू मारन लगे ।
 ये हू सरपत लै भिड़े, गिने न सम्बन्धी सगे ॥

सब कटि कटि गिरि गये बच्यो नहिँ कोई यादव ।
 लाख निज बंश बिनाश भये प्रमुदित अति माधव ॥
 बल अन्तरहित भये, भये अहि तजि मानुष तन ।
 उदधि तीर अश्वत्थ तहाँ पहुँचे यदुनन्दन ॥
 रूप चतुर्भुज दिव्य अति, दिशनि करत आलोकमय ।
 श्याम-बरन श्रीवत्सयुत, धारें कुंडल बर बलय ॥

बाम चरनकूँ धरें दाहिनी जंघापै हरि ।
 पीपल पीँठि सटाइ बिराजे बंश नाश करि ॥
 शंख चक्र अरु गदा पद्म सशरीर बिराजें ।
 कुंडल कंकन मुकुट करधनी अंगनि भ्राजें ॥
 जरा व्याध बनमें छिप्यो, मुसल कीलको बान करि ।
 सुखासीन मृगके सरिस, परे दूरितें दृष्टि हरि ॥

हरिन समुक्ति तकि बान चरनमहँ व्याधा माइयो ।
 दौइयौ पकरन तुरत निरखि हनि ज्ञान बिसाइयो ॥
 पद पदुमनिमहँ पइयो कहै—नहिँ नाथ रिस्यावें ।
 माइयो उनि पद बान जिनहिँ मुनि योगी ध्यावें ॥
 माधव ! मोकूँ मारिकें, देहिँ दंड दानव-दलन ।
 पुनि न करूँ अपराध अस, शिक्का पावें अपर जन ॥

यदुनन्दन हँसि कहें—जरा भय मत कछु खाओ ।
मम इच्छातैं उठो भयो सुरलोकनि जाओ ॥
बिनती बहु बिधि करी दिव्य तनु व्याधा धार्यो ।
चढ़िकें दिव्य विमान बन्दि पद स्वरग सिधार्यो ॥
इत दारुक नहिं लखे प्रभु, खोजत खोजत चलि दयो ।
चरन-चिन्ह पहिचानिकें, कछु कछु आशान्वित भयो ॥

चरन सहारे आइ लखे पीपर तर यदुबर ।
रथतैं उतर्यो तुरत पश्यो चरननिमें आतुर ॥
रोय रोय यों कहैं—नाथ ! सूनो तुम बिनु जग ।
भई नष्ट मम दृष्टि घिर्यो तम नहिं सूझत मग ॥
इत रोवत सारथि सतत, उत गरुडध्वज रथ तुरत ।
उड़यो गगन घोड़नि लिये, लीन भयो आयुध सहित ॥

रथ आयुध जब गये कहैं तब हरि दारुकतैं ।
सूत ! द्वारका जाउ बृत्त यह कहो सबनितैं ॥
मेरी त्यागी पुरी डुबोवै जलनिधि अबई ।
इन्द्रप्रस्थकूँ जाउ संग अरजुनके सबई ॥
सदा भागवत धर्म तुम, करि पालन निपेरत बनि ।
जग प्रपञ्च माया रचित, समुक्ति असत मानों सबनि ॥

हरि आयसु सिर धारि चल्यो द्वारावति दारुक ।
इत, अज शिव, सुर, शक्र श्यामढिँग आये उत्सुक ॥
परमधाम प्रभु गमन निहारन इच्छा मनमहँ ।
नयन कमल हरि मूँद बिराजे सुख आसनमहँ ॥
अंतरहित निज तनु कश्यो, गमने श्याम स्वधाम जब ।
धर्म, धैर्य, धी कीर्ति, श्री, सत्य आदि सँग गये सब ॥

अज हू गति नहिं लखी भये कब हरि अन्तरहित ।
 व्यो घनतें घनमाँहिँ न बिद्युत दीखत प्रबिशत ॥
 सब सुर निज निज लोक गये प्रभुके गुन गावत ।
 यों करि क्रीड़ा कृष्ण करुन अति दृश्य दिखावत ॥
 द्विजसुत, गुरुसुत, मातुसुत, मृतक जिवाये परीक्षित ।
 नहीं प्रकट चिर तनु रख्यो, योगिनिके उपदेश हित ॥

प्रभुलीला संवरन करी दारुक इत आयौ ।
 पहुँचि द्वारका सकल यथावत वृत्त सुनायो ॥
 सुनि प्रभास सब लोग बिकल हूँ दौरे आये ।
 रोहित अरु बसुदेव देवकी प्राण गँवाये ॥
 हरि, बल अरु बसुदेव सब, यदुवंशिनिकी कुलवती ।
 निज निज पति हिय लाइकें, भई नारि सबई सती ॥

सती भई सब नारि निरखि अरजुन अति रोये ।
 सम्बन्धी प्रिय सुहृद सखा सरबसु हरि खोये ॥
 करिकें सबके श्राद्ध नारि बालक संग लीये ।
 इन्द्रप्रस्थ मग चले पराजित चोरनि कीये ॥
 धरमराज प्रभु-गमन सुनि, नृपति बज्र ब्रजमें करे ।
 हथिनापुर नृप परीक्षित, करे हिमालय में गरे ॥

इति श्रीभागवतचरितके सप्ताहमें यदुवंश विनाश भगवत्स्वधाम
 गमन नामक बारहवाँ अध्याय समाप्त



अथ त्रयोदशोऽध्यायः

[१३]

शौनक पूछें—सूत ! भये को कलिमें भूपति ।
 सूत कहें—मुनिराज ! न कलिमें कोई नरपति ॥
 सहस पाँच या सात और राजा कछु क्रमतें ।
 फिरि कुलीन नहिँ भूप रहें सब आवृत तमतें ॥
 जरासन्धके बंशमें, शत्रुञ्जय राजा भयो ।
 जाहि पुरञ्जय हू कहें, शुनक सचिव ताको कह्यो ॥

शुनक स्वामि निज मारि कश्यो प्रद्योत पुत्र नृप ।
 ताको पालक पुत्र भयो पुनि सो मगधाधिप ॥
 तासु विशाखायूप पुत्र राजक पुनि नरपति ।
 राजकके बिख्यात नन्दिबर्धन सुत भूपति ॥
 पाँच भये प्रद्योतके, बंशज नृप अवनीश ये ।
 भये नृपति गण सब बरस, एक शतक अड़तीस ये ॥

तदनन्तर शिशुनाग भये नृप काकवर्ण सुत ।
 क्षेमधर्म सुत तासु तासु क्षेत्रज्ञ प्रभायुत ॥
 ताके सुत बिधिसार बिम्बसारहु कहलावें ।
 ताके पुत्र अजात-शत्रु पितु तक भय खावें ॥
 जिनिने कौशल नृपतितें, समर राजहित अति कश्यो ।
 भयो ब्याह कौशल सुता,—तैं तातैं दर्भक भयो ॥

दर्भकके सुत अजय नन्दिवर्धन सुत ताके ।
 महानन्दि तिनि भयो शुद्ध नहिं सुत पुनि ग्वाके ॥
 है अन्तिम शिशुनाग-वंशको महानन्दि नृप ।
 बरष तीन सौ साठ राज्य कीयो इनि सब नृप ॥
 शूद्रातैं उतपन्न इक, महानन्दको सुत बली ।
 महापद्म धनको अधिप, नन्द परम भूपति छली ॥

महापद्म नृप नंद क्षत्र कुलको संहारक ।
 शूरवीर अति बली सकल पृथिवीको पालक ॥
 भये तासु सुत आठ कहाये नवनन्दहु सब ।
 अति व्यभिचारी वृषल, बिप्र प्रकट्यो क्रोधी तब ॥
 परम कुटिल कौटिल्य मुनि-को आदर तिनि नाहँ कियो ।
 युक्ति सहित तिनि नंदको, नाश राज्य कुल करि दियो ॥

शकटारक निज नंद सचिव बन्दी करि राख्यो ।
 कश्यो मुक्त सुनि उक्ति हास्य कारन जब भाख्यो ॥
 सचिव बैर मन राखि बिप्र चाणक्य बुलायौ ।
 युक्ति सहित अपमान नंदतैं कुपति करायौ ॥
 चन्द्रगुप्त निज पक्षमें, करि भीषण षडयन्त्र द्विज ।
 मरवाये नवनंद हू, करी प्रतिज्ञा पूर्ण निज ॥

कूटनीति निज करी यवन राजा बुलवाये ।
 युक्ति सहित मरवाइ हराये कछुक भगाये ॥
 कुटिल बिप्र-चाणक्य जथारथ नृप अधिनायक ।
 चन्द्रगुप्त नृप प्रथम मौर्य-कुलके संस्थापक ॥
 चन्द्रगुप्त द्विज कृपातैं, विश्व बिदित नृप है गये ।
 द्वितिय मौर्य सम्राट नृप, वारिसार तिनि सुत भये ॥

चारिसार या बिन्दुसार नृप भद्रसार वर ।
चन्द्रगुप्त-सुत इति नामनितै भयो उजागर ॥
शत्रुसँहाती विदित पितासम देश विदेशनि ।
रहै विदेशी दूत सभामें भूप असंख्यनि ॥
तिनिके पुत्र अशोक नृप, भये यशस्वी जग विदित ।
मानें नृप आज्ञा सकल, नित्य अहिंसामें निरत ॥

शिलालेख खुदबाइ जीव हिंसा हटबाई ।
भिछु धर्म स्वीकारि दया सबपै दरसाई ॥
बिप्र, भिछु सम्मान दान सबकूँ ही देवें ।
सदाचार सम्पन्न भिछु ज्ञानिनिक्कूँ सेवें ॥
तिनिको सुत सुयशा भयो, सुयशा सुत संगत अजय ।
शालिसूक संगत तनय, तासु सोमशर्मा तनय ॥

शतधन्वा सुत भयो सोमशर्माको नामी ।
भये बृहद्रथ तासु तनय अति सरल अकामी ॥
अंतिम राजा भये मौर्यकुलके ये नरपति ।
सेनापति छल कश्यो भूपकी कीन्हों दुरगति ॥
पुष्यमित्र सेना अधिप, राज्य लालची अति भयो ।
करिकें बध भूपालको, स्वयं भूप खल बनि गयो ॥

अग्निमित्र सुत तासु सुजेष्ठ हु ताको सुत नृप ।
भये फेरि बसुमित्र भद्रकहु पुनि पुलिंद नृप ॥
सुत पुलिंदके घोष घोषके वज्रमित्र सुत ।
भये भागवत तासु देवभूती तिनि श्रीयुत ॥
देवभूतिकूँ मारिकें, बासुदेव भूपति भयो ।
तासु पुत्र भूमित्र तिनि, नारायण नृप है गयो ॥

पुत्र सुशर्मा तासु चार ये कएव बंश नृप ।
 फेरि अन्ध बलि बन्यो सुशर्मा मारि महीधिप ॥
 भ्राता बलिको कृष्ण भयो नृप अतिशय बलयुत ।
 तासु पुत्र श्रीशान्तकर्ण तिनि पौर्णमास सुत ॥
 उजिस भूपनि अन्तमें, भयो गोमती पुत्र नृप ।
 भयो सलोमधि नवम पुनि, तीस अन्ध्रबंशी अधिप ॥

भये सात आभीर कुशान बंशी कहलाये ।
 करत दिग्विजय यहाँ देश देशनिकूँ आये ॥
 इनमें नृप वामेष्क कनिष्कहु भयो बीर बर ।
 नृप बासिष्क हुबिष्क बासुदेवहु सुयशस्कर ॥
 फेरि भये नृप गर्दभी, गुप्तबंशके नामतें ।
 अति प्रसिद्ध भूपति भये, प्रजा हितैषी कामतें ॥

गुप्त घटोत्कच चन्द्रगुप्त ये भूपति अनुपम ।
 नृप समुद्र पुनि चन्द्रगुप्त दूसर ये पंचम ॥
 गुप्त कुमार नृपाल भये इस्कंद सातवें ।
 पुनि कुमार बुध भानु आठवें नमवें दशवें ॥
 फेरि गर्दभी वंश नहिँ, रह्यो कंक भूपति भये ।
 राजवंशके पुत्रमिलि, सब एकत्रित हूँ गये ॥

कंक करिकें कुमार राज सब भये भूमिपति ।
 ये सब सोलह बंश भये राजा शुभ मति अति ॥
 राजपूत सब सूर्यचन्द्रबंशी मिलि आये ।
 देशविदेशी भेदभाव तजि छात्र कहाये ॥
 कंकव कुमारने एक करि, यवननितें रक्षा करी ।
 यों बर्णाश्रम धर्मकी, कछु भावी बिपदा हरी ॥

यवननि कश्यो प्रवेश नष्ट मठ मन्दिर कीये ।
 बूट्यो अगनित द्रव्य बिधरमी कछु करि लीये ॥
 तुरक गुलामनि सौँपि गयो अपनी रजधानी ।
 मश्यो जाय-फिरि बने गुलामहु भूपति मानी ॥
 यवननिके कछु बंश पुनि, बने आततायी नृपति ।
 अति ई निरदय दस्यु सम, अन्यायी अति क्रूर मति ॥

हौंती हूँकें रही यवन भारत चढ़ि आये ।
 देवालय करि नष्ट लूट धन देश सिधाये ॥
 पुनि यवननि अधिकार कश्यो कुल आठ भये नृप ।
 फिरि क्रमतें बछु तुरक भये जब छीन भयो तप ॥
 फेरि फिरंगी नृप भये, पश्चिम दिशितें आइकें ।
 बनियाँते राजा भये, यवननि आर्य लड़ाइकें ॥

ये दश भये गुरुण्ड फिरंगी नृप ब्योपारी ।
 छल करि कीयो राज सबनिकी बुद्धि बिगारी ॥
 होवें ग्यारह मौन चार किलकिलके नृप सुनि ।
 तेरह बाहिक होहिँ छात्र द्वै आन्ध्र सात पुनि ॥
 मगध पुरञ्जय क्रूर नृप, यदु पुलिन्द अरु मद्रमें ।
 क्षत्रिय, द्विज अरु वैश्यकूँ, सबनि मिलावै शूद्रमें ॥

फिरि सुराष्ट्र, आभीर शूर, अर्बुदके द्विजगन ।
 म्लेच्छ सरिस बनि जायँ ब्रात्य हूँ जावें सब जन ॥
 म्लेच्छ ब्रात्य अरु शूद्र सिन्धु कश्मीर पंचनद ।
 इनि देशनि बनि नृपाति देहिँ म्लेच्छनि कूँ सब पद ॥
 खण्ड खण्ड बनि देशके, पृथक नृपति बनि जायँगे ।
 द्विजद्रोही, लोभी परम, प्रजनि क्लेश पहुँचायँगे ॥

नाममात्रके नृपति द्रव्य हित सबकुँ मारे ।
 पर-धन दारा हरे धेनु द्विज शिशुनि सँहारे ॥
 क्रियारहित अल्पायु हीनबल विषयी कामी ।
 होहिँ कलियुगी भूप प्रपञ्ची परतियगामी ॥
 कलि प्रभाव बढ़ि जायगो, सद्गुन सबहिँ बिलायँगे ।
 धर्म, शौच, बल, आयु, सत—रहित पुरुष बनि जायँगे ॥

कलिमें धन ई मुख्य धनी ही पंडित-मानी ।
 बली करै सो न्याय शूर-रति सो ई ज्ञानी ॥
 बेष शेष रहि जाय छली सब आश्रम धारी ।
 जातें मन मिलि जाइ वही नारी अति प्यारी ॥
 पंडित जे बकबक करै, रँगे बख्ख स्वामी बनें ।
 संस्कारतें रहित नर, निरदय जीवनिकूँ हनें ॥

जो भरि लेवैं पेट कुशल समरथ कहलावैं ।
 धरम करै यश हेतु विज्ञ जे बात बनावैं ॥
 वर्णाश्रम कछु रहै न मानै सकल समाजा ।
 जो होवै अति बली वही बनि जावै राजा ॥
 लोभी लम्पट क्रूरमति, धन दारा सब हरिङ्गे ।
 सबहिँ दुखित ह्वै भागिकें, बास बननिमहँ करिङ्गे ॥

कन्द, मूल, मधु, मांस खाइ निरबाह करिङ्गे ।
 अनावृष्टि दुष्काल आदितैं बहुत मरिङ्गे ॥
 आधिव्याधि बहु होहिँ चलै अति करकश वायू ।
 बरष बीस या तीस होहिँ कलिमें परमायू ॥
 धरम बरन आश्रम मिटै, दुरगुन अति बढ़ि जायँगे ।
 सबहिँ गुननितें रहित नर, पशुवत समय बितायँगे ॥

अति अधर्म जब बढ़ै कल्कि प्रकटे संभलमहँ ।
 विष्णुयशा द्विज गेह सिद्धि अणिमादिक सँगमहँ ॥
 लीये कर करबाल अश्व चढ़ि दुष्टनि मारै ।
 सब पापिनिकूँ हनै सकल शत्रुनि संहारै ॥
 दिव्य गन्ध हरि देहकी—तै सबकी हो विमल मति ।
 बढ़ै धरम अरधम घटै, सतयुग पुनि शुचि होइ अति ॥

सूर्य चन्दके भये होहिँ, हैं भूप वताये ।
 तब ई तै कलि लग्यो श्याम जब धाम सिधाये ॥
 ऐसे ही सब वंश होहिँ युग युग में मुनिवर ।
 समय पाइके नसै कालकी क्रीड़ा कटुतर ॥
 मैं मेरी कहि नृप गये, नहिँ वसुधा तिनिकी भई ।
 मिल्यो धूरिमें सब विभव, कथा शेष ई रहि गई ॥

इति श्रीभागवतचरितके सप्ताहमें कलियुगी नृपतिगण वर्णन
 नामक तेरहवाँ अध्याय समाप्त ।

अथ चतुर्दशोऽध्यायः

[१४]

नृपनि विजयकूँ व्यग्र निरखि वसुधा हँसि जावै ।
 करि करि उनपै ब्यंग मरमयुत वचन सुनावै ॥
 नृपति खिलौना-काल मोइ का ये जीतिङ्गे ।
 बीते अगनित नृपति कालि येहू बीतिङ्गे ॥
 कहो, कहा तिनिने लह्यो, कीयो जिनिने मोइ वश ।
 जाने कहँ मरि ते गये, हौं तब जैसी अबहुँ तस ॥

वसुधा-गीत

वसुधा भूपनिकूँ समुझावै ।

अरे, ब्यरथ च्यौँ कटत मरत हो, हाथ कछू नहिँ आवै ॥१॥ वसुधा०
 कितने भये होहिँगे अब हैं, मोइ कौन लै १ । वै ।
 विजय करत रथ हय गज लैकें, को विजयी कहलावै ॥२॥ वसुधा०
 चार दिवस अभिमान बढ़ायौ काल बली पुनि आवै ।
 मैज्यों की त्यों ईं रहि जाऊँ, नृप निज तनु तजि जावै ॥३॥ वसुधा०
 पृथु, पुरुरबा, गाधि, नहुष नृप, को इनिको पद पावै ।
 सगर, राम, गय, नल, ययाति, रघु, केवल अब सुधि आवै ॥४॥ वसुधा०
 जब इन सबकी नहीं भई हौं, तो तू च्यौँ ललचावै ।
 मूरख मोमें ममता तजिके च्यौँ हरिपद नहिँ ध्यावै ॥५॥ वसुधा०

छप्पय—ऐसे भूपति भये नई जे सृष्टि बनावें ।
 सूरजपथकूँ रोकि रैनिके तमहिँ भगावें ॥
 रथतैं करै समुद्र भूमिपै बान चलावें ।
 सप्तद्वीप नवखंड विजय करि भूप कहावें ॥
 किन्तु कालके गालमें, तेऊ घुसिकें नसि गये ।
 करि जगतैं वैराग्य हरि—शरन गये ते तरि गये ॥

पूछें शौनक—सूत ! युक्ति अब सरल बतावैं ।
 जातैं कलिके दोष दूरि सबरे ह्वै जावैं ॥
 सूत कहें—युग चारि धरम पद चारि बताये ।
 सत्य, दया, तप, दान, प्रथम युग सकल सुहाये ।
 घटत घटत घटि जाय गुन, कलिमें होवै कलह नित ।
 काम, क्रोध, मद, लोभमहँ, सब प्रानिनिको फँसै चित ॥

जहँ देखो तहँ ढोंग विषयमें रत सब प्रानी ।
 राजा क्रोधी, क्रूर कुटिल, कामी, अज्ञानी ॥
 सती न होवैं नारि कामिनी कुटला घर घर ।
 काम बासना हेतु करै साहस अति दुष्कर ॥
 पुरुष काम-लोलुप अधिक, कुलटनिकी सेवा करे ।
 यहाँ दुखी नित शोक्तें, पुनि मरि नरकनिमें परे ॥

कलियुगमें पाखण्ड पुजै पथ पुण्य न सूझें ।
 हाय ! अभागी पुरुष प्रेमतैं प्रभुहिँ न पूजै ॥
 जिनके अघहर नाम नासि सब दोषनि देवें ।
 कलियुगके अति अधम पुरुष तिनिहूँ नहिँ लेवें ॥
 मरन समय ह्वै कैं विवश, राम, कृष्ण, गोविंद कहैं ।
 सो फिरि पाप पहाड़ हू, नाम लेत छिनमें ढहैं ॥

नामी नाम प्रभाव हियेमें ततछिन आवै' ।
 सकल पाप सन्ताप श्यामके नाम नसावै' ॥
 भूपतितै' गुरुदेव कहें—नृप ! मत घबराओ ।
 मरन समय हरि नाम लेउ निश्चय तरि जाओ ॥
 अवगुन ही अवगुन भरे, परि जा कलिमें एक गुन ।
 ध्यान, यज्ञ, पूजानिके, मिलैं सकल फल नाम सुन ॥

शौनक पूछें—सूत ! प्रलयको मरम बताओ ।
 प्रलयनिके कै भेद सरलतातै' समुझाओ ॥
 कहें सूत—मुनि ! प्रलय चारि विधि वेद बतावै' ।
 नैमित्तिक अज दिवस निशामहँ सो-सो जावै' ॥
 पूर्ण होहि अज आयु जब, होहि लीन प्रकृती सबहि' ।
 भुवन चतुरदश प्रकृतिमें, मिलै' प्रलय प्राकृत तबहि' ॥

आत्यंतिक इक प्रलय मोक्षहू जाकूँ भाखै' ।
 ज्ञानी निज पर भेद आतमामें नहिं राखै' ॥
 होहि ज्ञान परिपूर्ण द्वैत सबरो नसि जावै ।
 जगको पुनि अस्तित्व रहै नहिं ब्रह्म लखावै ॥
 छिन छिन पल पलमें सकल, जग पदार्थ बदलत रहत ।
 जल प्रवाह लौ दीपसम, नित्य प्रलय ताकूँ कहत ॥

इतनी कथा सुनाइ कहें शुक्र नृपतै' मुनिवर ।
 कह्यो भागवत धर्म, मोक्षप्रद नृपवर ! सुखकर ॥
 'अहि काटै मरि जाउँ' भूप ! जा भयकूँ त्यागौ ।
 मोहनीदकूँ त्यागि ज्ञान बेलामें जागौ ॥
 अमर अजनमा आतमा, अजर एकरस नित रहत ।
 देह देहतेँ प्रकट हूँ, मरत जियत जन्मत रहत ॥

माया मन रचि देह, करम, गुन मनहि बनावै ।
 मायारूप उपाधि जीव जगमाँहिँ भ्रमावै ॥
 तैल, पात्र अरु वर्ति अग्नि मिलि दीप कहावै ।
 इनि तैं ह्वै केँ भिन्न सर्वगत पुनि कहलावै ॥
 उत्तपति थिति अरु प्रलय सब, तीनि गुननिको काज है ।
 रहै देह तब तक जगत, मोह नसें नसि जात है ॥

ज्यों दीपक नसि जाइ तेजको नाश न होवै ।
 त्यों सब जग नसि जाइ आत्मा सुखतैं सोवै ॥
 नहीं व्यक्त अव्यक्त सकल आधार निरन्तर ।
 आत्मा अखिल अनन्त अनामय अच्युत निर्जर ॥
 अन्वय अरु व्यतिरेकतैं, दृष्टा दृश्य विचारतैं ।
 वासुदेव चिन्तन करो, हटो जगत् व्यवहार तैं ॥

आत्मचिन्तना करो अहं सतचित कहलाऊँ ।
 परमधाम हौँ ब्रह्म परमपद ब्रह्म कहाऊँ ॥
 परमात्मा में जबहिँ आतमाकूँ तुम देखो ।
 फिरि तत्तक, जग, देह सकल आत्मा में पेखो ॥
 सात दिवसमें यथामति, भव भयहर सुखकर सुकर ।
 कही विष्णुगाथा कछुक, कहूँ कहा अब भूपवर ॥

इति श्री भागवत चरितके सप्ताहमें वसुधागीत ब्रह्मोपदेश
 नामक चौदहवाँ अध्याय समाप्त ।
 (मासिक पारायण—उन्तीसवें दिनको विश्राम)

अथ पञ्चदशोऽध्यायः

(१५)

श्रीशुकको सुनि प्रश्न नयन नृपके भरि आये ।
 हैके अति ई दीन चरन-कमलनि लिपटाये ॥
 पुनि पुनि करै प्रनाम न निकसै मुखतै बानी ।
 पुनि कछु धरिके धीर कहें नृप सरल अमानी ॥
 प्रभो ! कृतारथ हौं भयो, सुनिके श्याम चरित्रकूँ ।
 जनम मरनको भय भग्यो, थापूँ हरिमैं चित्तकूँ ॥

तब मुख निस्सृत श्यामचरित अति मधुमय लाग्यो ।
 श्रवन पुटनि करि पान शोक अरु भय मम भाग्यो ॥
 पाइ ब्रह्म निरबान भयो हौं देव ! कृतारथ ।
 भयो दूर अज्ञान लह्यो अब ज्ञान यथारथ ॥
 आयसु देवै दयानिधि, करूँ मौन धारन अबहिं ।
 सुनि शुक अति हरषित भये, गिरे सुमन नभतैं तबहिं ॥

शुककी पूजा करी सविधि नृप विह्वल हैकें ।
 सुनिनि संग शुक गये नृपतिकूँ आशिष दैकें ॥
 बैठे कुशा विधाय विचारें तत्तक आवै ।
 आत्मा तो है नित्य देहकूँ कोई खावै ॥
 इत शृङ्गी ऋषि शापतैं, सप नृपहिं डसिबे चलयो ।
 विषहारी कश्यप गुनी, तत्तककूँ संगमें मिल्यो ॥

तत्क्षक पूछे—आपु पधारे द्विजवर ! कितकूँ ।
 तत्क्षक नृपकूँ डसै उतारे ताके विषकूँ ॥
 बोल्यो तत्क्षक—आपु मंत्रबल मोइ दिखावै ।
 काटि भस्म बट करूँ मंत्रतै आपु जिवावै ॥
 स्वीकार्यो जब विप्रने, भस्म गरलते बट कश्यो ।
 कश्यो विप्रने मंत्रतै, फिरि ज्यों को त्यों तरु हर्यो ॥

निरख्यो मंत्र प्रभाव अधिक आदर अहि कीन्हों ।
 विविध भाँति समुक्ताइ बहुत धन द्विजकूँ दीन्हों ॥
 धन लै द्विज फिरि गयो नृपतिदिँग तत्क्षक आयौ ।
 तज्यो यथार्थ रूप विप्रको वेष बनायौ ॥
 फलमें कीड़ा बनि घुस्यो, डस्यो भूपकूँ भूलमें ।
 भयो भस्म तनु भूपको, मिली धूरि पुनि धूरिमें ॥

जगमें हाहाकार मच्यो सब अश्रु बहावै ।
 भये चकित सुरवृंद सुमन नभतै बरसावै ॥
 साधु साधु सब कहें धन्य कुरुकुलके भूषन ।
 भये मुक्त सुनि कथा मिट्यो द्विजकृत-अघदूषन ॥
 जनमेजय नृपके तनय, कुपित नाग कुलपै भये ।
 सर्पसत्र करिबे लगे, नष्ट नाग बहु करि दये ॥

विप्र मंत्र जब पढ़ें सर्प चहुँदिशितै आवैं ।
 होहिं विवश अति बली कुंडमें गिरि मरि जावैं ॥
 तत्क्षक है भयभीत शरन सुरपतिकी लीन्हों ।
 च्यौं नहिं तत्क्षक मरै नृपति जिज्ञासा कीन्हों ॥
 रक्षा सुरपति करतु है, जब विप्रनि उत्तर दियो ।
 इन्द्र सहित स्वाहा करो, सुनत स्रुवा द्विज कर लियो ॥

लागे पढ़िबे मंत्र इन्द्र सिंहासन हाल्यो ।
 सुरगुरु मखमहँ आइ नृपहिँ समुझाइ निबाइयो ॥
 मानी मुनिकी सोख सर्पमख नृपने त्याग्यौ ।
 दियो द्विजनि उपदेश हिये भूपति के लाग्यौ ॥
 हरिमाया अतिशय प्रबल, पावै पार अनन्य हैं ।
 वैरभाव तजि हरिमजहिँ, ते नर जगमें धन्य हैं ॥

इति श्रीभागवत चरित के सप्ताहमें परीक्षित निर्वाण नामक
 पन्द्रहवाँ अध्याय समाप्त ।

अथ षोडशोऽध्यायः

[१६]

शौनक पूछें—सूत ! वेदके कै आचारज ।
 कैसे कर्यो विभाग पैल आदिक मुनि आरज ॥
 सूत कहें—अवतार ब्यास धरि भूपै आये ।
 एक वेदके चारि करे मुनि चारि बुलाये ॥
 द्यौ वेद ऋक् पैलकूँ, वैशम्पायन यजु द्यौ ।
 जैमिनि मुनिकूँ सामश्रुति, मुनि सुमन्तु चौथो लक्ष्मौ ॥

पाइ संहिता सकल मुनिनि पुनि शिष्य बनाये ।
 करि करि शाखा पृथक् सबनिकूँ मन्त्र पढ़ाये ॥
 शिष्यनिके हू शिष्य भये विस्तार भयो अति ।
 शाखा सबकी पृथक् भईं तिनकी तिनिमें रति ॥
 वैशम्पायन शिष्य इक, याज्ञवल्क्य अति तेजयुत ।
 यजुरवेदमहँ अति निपुण, देवरातको सौम्यसुत ॥

अपर शिष्य इक दिवस करै व्रत गुरुहित दुष्कर ।
 याज्ञवल्क्यने कह्यो—करै का यह व्रत गुरुवर ॥
 हौं तवहित व्रत करूँ अल्प वीरज यह बालक ।
 भये कुपित गुरुदेव, कहें—तू द्विजकुलघालक ॥
 मेरी विद्या त्यागि दै, तू अब मेरौ शिष्य नहि ।
 उगलि दई विद्या सकल, कठिन बचन नहिं गये सहि ॥

उगले सगरे मन्त्र दिव्य दीमक बनि जीये ।
 तित्तिर बटु बनि गये लोभबश सब चुगि लीये ॥
 तैत्तिरीय सो भई वेदकी शाखा सुन्दर ।
 याज्ञवल्क्य ने करे तुष्ट तप करिकें दिनकर ॥
 अश्वरूप धरि सूर्यने, शिखा द्विजबरकूँ दई ।
 वाजसनेयी पृथक् यह, यजुरवेद शाखा भई ॥

ऐसे ही पुनि सामवेदकी शाखा अगनित ।
 बहु अथर्वके भये महामुनि चित्त-समाहित ॥
 पुनि दश आठ पुरान बनाये अतिही सुखकर ।
 दश लक्षणतै युक्त जगत-हितकारक मुनिवर ॥
 ब्राह्म, पाद्म, बैष्णव महा, शैव भागवत नारदी ।
 मार्कण्डेय पुरान पुनि; अग्नि भविष्य सुशारदी ॥

ब्रह्मविवर्त पुरान लैङ्ग वाराह पुरातन ।
 पुनि इस्कंध पुरान हु वामन कूर्म सनातन ॥
 मत्स्य, गरुड, ब्रह्माण्ड अठारह सब मिलि होवैं ।
 पढ़ैं सुनैं नर नारि सहस जनमनि अध धोवैं ॥
 वेद पुराननि भेदकूँ, नाम मात्र हू जे रटैं ।
 पढ़ैं प्रेमतै नियमयुत, तिनिके सब पातक कटैं ॥

शौनक बोले—सूत ! होहु चिरजीवी भाई ।
 भटकि रहे जगमाँहि गैल अति सरल दिखाई ॥
 मार्कण्डेय चिरायु तात ! कैसें कहलावैं ।
 कल्प प्रलय नहिँ भई प्रलय जल कस तैरावैं ॥
 सूत कहें—शौनक ! सुनहु, मायामें संभव सकल ।
 मायाकी ही प्रलयमें, भये महामुनि अति विकल ॥

मुनि मृकण्डुके तनय पुष्पभद्रा तट तपहित ।
 रहै करै व्रत सदा लगावै हरिचरननि चित ॥
 छै मन्वन्तर करी तपस्या मन न डिगायौ ।
 देखि घोर तप इन्द्र हृदयमें भय अति छायाँ ॥
 मलयानिल अरु अपसरा, काम, लोभ, मद, मुनि, निकट ।
 भेजे मुनि आश्रम जहाँ, करहिँ महामुनि तप विकट ॥

सब मिलि कीयो यत्न मोह मुनि मन नहिँ आयौ ।
 काम सेन सँग लौटि इन्द्रकूँ वृत्त सुनायौ ॥
 भयौ इन्द्र निस्तेज मनहिँ मन मुनिहिँ सरावै ।
 ब्रह्म तेजतैं डरै निकट मुनिके नहिँ आवै ।
 मुनि तपतैं सन्तुष्ट है, नर नारायन आइके ।
 दयो दरश जब सत्रयं-मुनि, विनय करे सिर नाइके ॥

मार्कण्डेय-स्तुति

जगके प्रभु ! तुम एक सहारे ।
 माता पिता सगे सम्बन्धा, लगें न तुम बिनु प्यारे ॥१॥ जगके०
 जगहित नरनारायन बनिके, कठिन नियम व्रत धारे ।
 अज, सुर, नर, हर थर थर काँपै, अकुटि बिलास तिहारे ॥२॥ जगके०
 गुनकेजनक, सर्वगत, सब थल, विविध रूप तुम धारे ।
 सत्वमूर्ति हे सुखमय स्वामिन, पकरे चरन तुम्हारे ॥३॥ जगके०
 माया मोहित जीव न जानें, जानें श्रद्धावारे ।
 बेद भेद तुमरौ नहिँ पावै, नेति नेति कहि हारे ॥४॥ जगके०
 जानि अविज्ञान दरशन दीयो, सब अघ कटे हमारे ।
 चरन कमल प्रभु पुनि पुनि बन्दत, दीन दरशतें तारे ॥५॥ जगके०

मुनिकी इस्तुति सुनी कहन नारायन लागे ।
 सिद्ध भये मुनिराज तिहारे सब भय भागे ॥
 माँगो जो बरदान देहिँ हम जो तुम चाओ ।
 हमकूँ कछु न अदेय न मनमें मुनि सकुचाओ ॥
 भये दरश सब वर मिले, परसे पद पुनि का कहूँ ।
 तुमरी माया मोहनी, कमलनयन ! देखन चहूँ ॥

एवमस्तु कहि भये तिरोहित नर नारायन ।
 मुनि प्रसन्न अति भये कश्यो व्रतको पारायन ॥
 अति उत्कंठिन भये निहारूँ माया अब ई ।
 बरषा भई प्रचण्ड चराचर डूबे सब ई ॥
 सुत मृकण्डुके ही बचे, बहत प्रलय जलमें सतत ।
 सबरो जग जलयय भयो, भूख प्यासतैं मुनि दुखित ॥

निरख्यो तब बट बृक्ष फिरत जब इत उत भटकत ॥
 मरकत मनिके सरिस सुघर शिशु तापै विहरत ॥
 परे पत्रपुट श्याम चरनकूँ मुखतैं चूसत ।
 चितवत ह्वै अति चकित प्रभातैं सब अँग विकसत ॥
 करि दरसन संताप श्रम, शोक मोह सब नसि गये ।
 श्याम सलौने सुघर शिशु, मुनिके मनमें बसि गये ॥

ज्यों ही सम्मुख गये श्वाँस तब शिशुने लीन्हीं ।
 घुसे नासिका द्वार सृष्टि भीतर सब चीन्हीं ॥
 भू, नभ, ग्रह, गिरि, द्वीप, असुर-सुर सबहिँ निहारे
 मुनि अति विस्मित भये श्वाँस तजि फेरि निकारे ॥
 देख्यो पुनि बट प्रलय जल, शिशु मनहर क्रीड़ा करत ।
 दौरे आलिंगन निमित्त, लीन भयो बट शिशु तुरत ॥

प्रलय-सलिल नहिं रह्यो पूर्ववत् जगत लखायौ ।
 माया दरशन समुक्ति श्याम चरननि सिर नायौ ॥
 अक्षयवट पुट पत्र करे' क्रीड़ा शिशुके सम ।
 उदरमाँहि सब दृश्य होहि मायातैं जग भ्रम ॥
 माया लखी महेशकी, भये फेरि मुनि भ्रम रहित ।
 तब वृष चढ़ि शङ्कर तहाँ, आये पारवती सहित ॥

शिवा कहें—“सरबेश ! भक्त मुनिक्कूँ वर देवैं ।
 शिव बोले—“ये भक्त मोक्ष तकक्कूँ नहिं लेवैं ॥
 हरि हिय धारे इननि फेरि का इनिक्कूँ दुज्जो ।
 साधु समागम लोभं बात कछु सुखद करुज्जो ॥
 मुनि ध्यावैं सरबेशक्कूँ, इष्ट नहीं जब हिय लखे ।
 खोलि नयन सम्मुख तबहिं, शिवा सहित शङ्कर दिखे ॥

सोरठा—सहसा लखे महेश, भौचक्के-से मुनि भये ।
 सानुकूल सरबेश, निरखि लगे इस्तुति करन ॥

शिवस्तुति

करे' हर ! कैसे विनय तिहारी ।
 सुख स्वरूप सर्वज्ञ सर्वगत, सब जगके संहारी ॥१॥ करे'०
 ज्ञान रूप तुम घट घट बासी, सीमित बुद्धि हमारी ।
 दया दृष्टितैं हरो अविद्या, हे शङ्कर त्रिपुरारी ॥२॥ करे'०
 निरगुन शान्त त्रिगुणमय स्वामी, हो तुम लीलाधारी ।
 पालो रचो फेरि संहारो बनि अज, रुद्र, मुरारी ॥३॥ करे'०
 पुनि पुनि चरन सरोरुह बन्दौ, माँ गिरिराजकुमारी ।
 जननी जनक स्वयं शिशु सम्मुख, आये जग सुखकारी ॥४॥ करे'०

छप्पय—हर प्रसन्न अति भये भक्ति वर मुनिकूँ दीयौ ।
 बाढ्यो मुनि मन मोद यथोचित पूजन कीयौ ॥
 महिमा शिवने अधिक भक्त संतनिकी गाई ।
 शिव मुखतें सुनि विनय लाज मुनिकूँ अति आई ॥
 पूजित हैकें शिवा सँग, पुनि शिव अन्तरहित भये ।
 बिना प्रलय ही ध्यानमें, मुनि माया दरशन किये ॥

शौनक पूछें—सूत ! पाञ्चरात्रादि बन्दना ।
 अङ्ग उपाङ्गनि सहित करे कस कृष्ण अर्चना ॥
 क्रियायोगको फेरि हमें बिस्तार बतावें ।
 सूत कहें—मुनि कर्मकाण्डको पार न पावें ॥
 हरिमय जगकूँ जानिकें, करै कल्पना अङ्गमें ।
 तत्तत भावनिके सहित, पूजै सबकूँ सङ्गमें ॥

अण्डमाँहिँ जो रहैं वही ब्रह्माण्ड बनावें ।
 रचि पचि जगकूँ फेरि स्वयं तामें घुसि जावें ॥
 द्वापर युगमें क्रियायोग बहु विधितें गायौ ।
 केवल कलिमें कृष्णनाम अति सुगम बतायौ ॥
 करे ध्यान भगवान्को, जे नामनिकूँ गायँगे ।
 ते मख, पूजा पाठको, सबहिँ सहज फल पायँगे ॥

शौनक पूछें—सूत ! कहे द्वादश रवि तुमने ।
 सबके सप्तक कहो सुने पहिले हू हमने ॥
 कहें सूत—प्रतिमास रहें रवि सात सहायक ।
 नाग, अप्सरा, यक्ष, राक्षस, ऋषि, सुर, गायक ॥
 चैत्र मास धाता रहें, माघवमें रवि अर्यमा ।
 ज्येष्ठ मित्र नामक तपें, वरुन तपें आषाढ़मा ॥

आचनमें रवि इन्द्र भाद्रमें विवश्वान् रवि ।
 त्वष्टा आश्विन रहें विष्णुकी कातिकमें छवि ॥
 मार्गशीर्षमें अंशु पौषके भग हैं नामी ।
 फागुनके परिजन्य माघके पूषा स्वामी ॥
 सब मासनिके पृथक रवि, पृथक पृथक गन सबनिके ।
 स्वयं सच्चिदानंद हरि, स्वामी सबई गुणनिके ॥

इति श्रीभागवतचरितके सप्ताहमें वेद पुराण शाखा मार्कंडेय
 चरित पूजा रवि-सप्तक नामक सोलहवाँ अध्याय समाप्त ।

अथ सप्तदशोऽध्यायः

[१७]

निज मतिके अनुसार कथा मुनिवर शुभ भाखी ।
 अन्तरयामी श्याम सकल जीवनिके साखी ॥
 भई कथा तो पूर्ण विषय-सूची अब भाखूँ ।
 सब मिलि देहिँ अशीष सदा हियमें हरि राखूँ ॥
 धर्म, कृष्ण अरु व्यास शुक, सबके पुनि पुनि पग पंरूँ ।
 पुण्य भागवत-चरितकी, अनुक्रमिका वरनन करूँ ॥

मेरो तुमरो मिलन व्यास नारद सम्बादा ।
 फेरि भीष्मकी कही कथा जो सबके दादा ॥
 तिनि परलोक प्रयान द्वारका पुनि प्रभु आये ।
 भयो परीक्षित जनम राजमें बजे बधाये ॥
 विदुर और धृतराष्ट्रको, गृह तजि पुनि हरिपुर गमन ।
 कहा कृष्ण निरयान पुनि, पाण्डुसुतनिको हिम निधन ॥

विजय परीक्षित फेरि कश्यप कलि जैसे वशमें ।
 दीयो द्विजने शाप गये नृप गंगा तटमें ॥
 श्रीशुक भूपति मिलन कश्यप ज्यों नृप अभिनन्दन ।
 पूजा विधिवत करी लगायौ माथे चन्दन ॥
 अवतारनिके चरित शुभ, सृष्टि कथा संक्षेपमें ।
 विदुर और ऊर्ध्व मिलन, कही सृष्टि पुनि शेषमें ॥

कश्यप दिति सम्बाद गर्भ ज्यों दितिने धाड़्यो ।
 भये असुर जय विजय कुमारनिकूँ ज्यों ताड़्यो ॥
 हिरनकशिपु हिरनाक्ष जन्म तिनि विजय करी ज्यों ।
 धरिकें सूकर रूप सुरनि हरि विपति हरी ज्यों ॥
 हिरन्याक्षकूँ मारिकें, अभय करे सुर मुनि यथा ।
 यहाँ तलक पूरन भई, प्रथमआहकी शुभ कथा ॥

द्वितियआहमें देवहूति करदम सँग ग्याही ।
 प्रकटे हरि बनि कपिल मातुकूँ सीख सिखाई ॥
 मनु पुत्रिनिको वंश दत्त शिव शापा शापी ।
 सती देहको त्याग दत्त माइयो सन्तापी ॥
 भई पूर्ति ज्यों यज्ञकी, वंश अधर्म बताइकें ।
 कह्यो चरित ध्रुव विष्णु ज्यों, दरशन दीये आइकें ॥

ध्रुव चरित्र करि पूर्ण बेनको चरित बखान्यों ।
 पुनि पृथुराज चरित्र प्रचेतनि मुनि सम्मान्यों ॥
 कही पुरञ्जन कथा भूपकूँ शिखा दीन्हों ।
 पुनि प्रियव्रतको चरित ऋषभ ज्यों लीला कीन्हों ॥
 ऋषभ चरित अति ही सुखद, मुनि समास ही तें कह्यो ।
 यहाँ तलक सप्ताहमें, द्वितीय आह पूरन भयो ॥

तृतीयआहमें प्रथम भरत जड़ चरित बखान्यों ।
 कह्यो फेरि भूगोल ध्यानतें मुनिवर जान्यों ॥
 नरकनिको कछु वृत्त अजामिल चरित बतायौ ।
 नाम महातम कह्यो विविध विधितें समुझायौ ॥
 नारदजीकूँ दत्तने, दयो शाप पुनि सो कथा ।
 विश्वरूप सुर पुरोहित, सुरपति काट्यो सिर यथा ॥

पूर्व वृत्रको चरित चरित मरुतनिको भाख्यौ ।
 पुनि प्रह्लादचरित्र पिता ज्यों गुरुगृह राख्यौ ॥
 दीये ज्यों बहु कष्ट कश्यो कीर्तन ज्यों हरिको ।
 प्रकटे श्रीनरसिंह उदर फाड़्यो ज्यों अरिको ॥
 नारद मुनिनैं धर्मसुत, तैं जैसे यह सब कह्यौ ।
 धरमराज सम्बाद तक, तृतीयआह पूरन भयौ ॥

अब चतुर्थ में प्रथम ब्राह्मज चरित मनोहर ।
 सुर विनती पुनि मथन पयोनिधि पान गरल हर ॥
 धन्वन्तरि अवतार मोहिनी चरित रङ्गीलौ ।
 देवासुर संग्राम भयो हैत्यनि बल ढीलौ ॥
 मिलन मोहिनी शम्भुको, करी विजय बलिने यथा ।
 यों बलि छलिवेकी कही, छलिया वटु वामन कथा ॥

कह्यो चरित सुद्युम्न पुत्र मनु चरित कहे तब ।
 च्यवन सुकन्या ब्याह नभग नाभाग चरित सब ॥
 पुनि इक्ष्वाकु चरित्र सौभरी चरित मनोहर ।
 भये त्रिशंकू पुत्र नृपति हरिचंद धरमधर ॥
 भये भस्म सुत सगरके, श्रीगङ्गाजी आगमन ।
 रघुवंशी भूपति कथा, ज्यों दशरथ नृप गुरु-शरन ॥

राघवेन्दुकी कथा प्रथम ही बाल-चरित है ।
 ब्याह-चरित है द्वितीय तृतीय बनवास-चरित है ॥
 सीताहरन चतुर्थ कह्यो संयोग पाँचमों ।
 राज तिलक है छटो, कह्यो सिय-त्याग सातमों ॥
 अष्टम है उत्तरचरित, नवमेमें महिमा रही ।
 यों इनि नौ अध्यायमें, राघवेन्दु लीला कही ॥

निमिको कहिकें वंश कथा दण्डककी भाखी ।
चन्द्रवंश पुनि कह्यो उरबशी इल-सुत राखी ॥
परशुराम अवतार ऐलको वंश सुनायौ ।
नृप ययातिको चरित पुराननिमें जो गायौ ॥
पुरु अनु आदि ययाति सुत, वंश कह्यो यदुवंश पुनि ।
चतुर्थाह पूरन भयो, पञ्चमाह अब सुनहु मुनि ॥

पञ्चमाहमें प्रथम व्याह वसुदेव बखान्यों ।
नभवानीतें कंस देवकी-सुत रिपु जान्यों ॥
चिन्ता व्यापी कंस कृष्ण अवतार कह्यो है ।
गोकुलमें प्रभु गये तहाँ आनन्द भयो है ॥
आइ पूतना विष द्यौ, मरी बकीकूँ गति दर्ई ।
कही कथा शकटादि तन, मुक्ति खलनिकी ज्यों भई ॥

विश्वरूप माँ दरश बाललीला मृदभक्तन ।
माखन चोरी ललित बँधे ज्यो नटखट मोहन ॥
गोकुल गोपनि सङ्ग त्यागि वृन्दावन आये ।
करे खेल बक, वत्स, असुर अघ मारि गिराये ॥
ब्रह्माजी मोहित भये, धेनुक कालियकी कथा ।
नाग निकाइयो नाथिकें, दावानल पीयो यथा ॥

पुनि प्रलम्बकी मोक्ष वेनुको गीत मनोहर ।
बल्ल चुराये दये कुमारिनिकूँ वर सुखकर ॥
द्विज पतिनिनिपै कृपा श्याम गोबरधन धार्यौ ।
इन्द्र, सुरभि अरु वरुन सबनि दर्शनतें तार्यौ ॥
फेरि रास इच्छा भई, बेनु बजाई रसभरी ।
ब्रजबनिता धुनि सुनि चलीं, कछु न कानि कुलकी करी ॥

कीयो रास विलास भये अन्तरहित गिरिधर ।
 बिलपीं बनिता बहुत भये पुनि परगट नटवर ॥
 महारास पुनि भयो सरसता अँग अँग छायी ।
 यों पुनि पूरन भई रासकी पञ्चाध्यायी ॥
 शङ्खचूड़ अजगर असुर, केशी व्योमासुर मरन ।
 फेरि कह्यो अति भावमय, श्वफलक-सुत ब्रज आगमन ॥

ब्रज तजि पुनि बल सङ्ग श्याम मथुराकूँ धाये ।
 गोपी व्याकुल भयीं अश्रु अति सबनि वहाये ॥
 श्वफलकसुतपै करी कृपा मरि रजक तश्यो है ।
 कुब्जाकूँ करि सुघर धनुषको भङ्ग कर्यो है ॥
 आये गज अरु मल्ल जे, मरे कंस मामा मर्यौ ।
 नन्द गये ब्रजकूँ बिलखि, जननि जनकको दुख हर्यौ ॥

फिरि गुरुकुलको बास मृतक गुरु-सुत ज्यों लाये ।
 ब्रज उद्धवके हाथ आइ सन्देश पठाये ॥
 उद्धव देखे दुखी गोप गोपी गौ बछरा ।
 अस्त व्यस्त सब बस्तु परे टटे घर छकरा ॥
 अमरगीत, कुब्जाकृपा, कुन्तीढिँग श्वफलकतनय ।
 पञ्चमाह पूरन भयो, अब षष्ठाह सुनहु सदय ॥

जरासन्ध आक्रमण सेन लै मथुरा घेरी ।
 पुर तजि भगि रनछोर यवन करवाई ढेरी ।
 रुक्मिनि सङ्ग विवाह पुत्र प्रद्युम्न भये हैं ।
 पुनि स्वमन्त आख्यान व्याह हरि सहस किये हैं ॥
 ज्यों अनिरुद्ध विवाहमें, बल रुक्मीको बध कियो ।
 फिरि विवाह अनिरुद्धको, वाण-सुताके सँग भयो ॥

कृष्ण-वाण संग्राम शम्भु-हरि सङ्ग लड़ाई ।
 राजा नृगकी कथा कही अति परम सुहाई ॥
 बलदाऊ ब्रज-गमन पौण्ड्र-बध साम्ब-सगाई ।
 गृहचर्या अति दिव्य श्याम नारदहिँ दिखाई ॥
 जरासन्ध बध भामतेँ, राजसूयको वृत्त सब ।
 शाल्व और शिशुपाल बध, कह्यो सुदामा चरित तब ॥

कुरुक्षेत्रमें भयो मिलन ब्रजवासिनितें ज्यों ।
 ललकि मिले घनश्याम पिता माता बल सँग त्यों ॥
 कृष्णा महिषी बात सरसता छाई मबपै ।
 जनक, जननि, द्विज तथा कृपा मैथिल भूपतिपै ॥
 हर, भृगु, अरजुनपै कृपा, करी सबनिको दुख हर्ख्यौ ।
 गायौ महिषीगीत पुनि, षष्ठआह पूरन कर्ख्यौ ॥

सप्तमाहमें शाप दिवायो निज कुल गर्वित ।
 नारद अरु वसुदेव कह्यो संवाद सुशोभित ॥
 नवयोगेश्वर ज्ञान कह्यो अवधूत सु-गीता ।
 उद्धवगीता कह्यो सुनत छूटै भव-भीता ॥
 हंस-ज्ञान पुनि भक्ति अरु, ध्यान, सिद्धि सबई कहीं ।
 पुनि हरि कछु बरनन करीं, जो विभूति उनकी रहीं ॥

वर्णाश्रमको धरम विविध प्रश्ननिको उत्तर ।
 भिन्नगीत कहि कही सांख्यकी महिमा सुखकर ॥
 नृपति ऐलको गीत उद्धवहिँ शिखा दान्हीं ।
 पुनि यदुवंश विनाश संवरन लीला कीन्हीं ॥
 कहि कलियुगके नृपनिक्कूँ, भूमिगीत हू पुनि कह्यौ ।
 फेरि ब्रह्म उपदेश शुक्र—ते नरपतिक्कूँ ज्यों द्यौ ॥

त्यागि परीक्षित देह परमपद पांयौ जैसैं ।
 शाखा वेदनि कही पढ़ी विप्रनिने कैसैं ॥
 मार्कण्डेय चरित्र कही पूजाविधि उत्तम ।
 कहि रवि-सप्तक कही विषय-सूची सुनिसत्तम ॥
 फेरि भागवत सार सब, कछो महातम नाम पुनि ।
 पुण्य भागवत चरितको, पूर्ण भयो सप्ताह सुनि ॥

जो न भागवतचरित पूर्ण पढ़िवेको अवसर ।
 विषय अनुक्रम पढ़ै एक अध्याय पुण्यकर ॥
 अति समास सप्ताह निकाश्यौ सार सार सब ।
 करै कण्ठको हार होहि नहि तिनि बन्धन-भव ॥
 जो अध्याय विशेषकूँ, सुनहि पढ़हि गावैं रटैं ।
 होहि मनोरथ सकल सब, तिनिके भवबन्धन कटैं ॥

इति श्रीभागवत चरितके सप्ताहमें सप्ताह-अनुक्रमणिका नामक-
 सत्रहवाँ अध्याय समाप्त ।

अथ अष्टादशोऽध्यायः

[१८]

जो जो कीये प्रश्न यथामति सकल बखाने ।
 सब चरितनिमें सार श्याम शुभ नामहिँ जाने ॥
 रपटत ठोकर खात गिरत छींकत जमुहावत ।
 'हरये नम' ये शब्द पाप पर्वतनि ढहावत ॥
 ज्यों रवि तमकूँ पवन ज्यों, छिन्न भिन्न मेघनि करै ।
 त्यों कीर्तन हरि नामको, हियके सब कलमष हरै ॥

सो बानी है व्यर्थ नाम हरिके नहिँ गावै ।
 है वह कथा कलङ्क कृष्ण चरितनि न सुनावै ॥
 हैं अति पावन बचन सुयश हरि हीके बोलें ।
 ते पद पावन परम पुण्यतीर्थनिमें डोलें ॥
 कथा कीर्तन कृष्णको, तुलसी हरिसेवा जहाँ ।
 हंस भक्त निरमल परम, नियम सहित निवसहिँ तहाँ ॥

जामें नहिँ हरि नाम भागवत चरित न जामें ।
 काक तीर्थ सो निन्द्य न्हायँ कौआ बक तामें ॥
 होवै कविता सुघर रसीली गुन प्रसादयुत ।
 कृष्णकथातें रहित घृणित नीरस अति निन्दित ॥
 नित नव नव नटवर चरित, सुखद सरस अतिशय विमल ।
 कहत पढ़त गावत सुनत, होवै विकसित हृदकमल ॥

मिलै न छंद प्रबन्ध न उपमा अनुप्रास गुन ।
 यमक न मात्रा शब्द मिलै नहिँ तुक सब अवगुन ॥
 रहै श्यामके नाम सुयशयुत यदि मनभावन ।
 तो वह अघहर छंद गाइ होवै जगपावन ॥
 भगवद्भक्ति विहीन यदि, होहि ज्ञान करमनि रहित ।
 नहिँ फल हरि अरपित किये, उत्तम नहिँ सो दुख सहित ॥

तप बरनाश्रम धरम-आचरन श्री यश देवै ।
 प्रभु-पद सुमिरन सतत होहि तिनि जे हरि सेवै ॥
 हरिलीला गुन श्रवन नित्य हरि भक्ति बढ़ावै ।
 इस्मृति हरिपद रहै अमङ्गल सकल नसावै ॥
 करै शान्त विस्तार नित, चित्त शुद्धि होवै अवसि ।
 भक्ति, ज्ञान, वैराग्य सब, मिलै होहिँ हिय प्रभु प्रविसि ॥

बड़भागी सब आपु कहाँ तक करुँ बड़ाई ।
 तजि सब जगत प्रपञ्च कृष्ण-पद भक्ति दृढ़ाई ॥
 निन्दा इस्तुति त्यागि भजनमें चित्त लगायौ ।
 तुमने ही मुनिवृन्द मनुज जीवन फल पायौ ॥
 मैं हूँ अतिशय धन्य हूँ, तुमरी सङ्गति पाइकें ।
 कर्यो कृतारथ कुमतिहूँ, हरि-यश यादि दिवाइकें ॥

नृपति प्ररीक्षित् त्यागि राज गंगा तट धाये ।
 भावी अति ही प्रबल तहाँ मम गुरु शुक आये ॥
 हौँ हूँ पहुँच्यो तहाँ कथा गुरुदेव सुनाई ।
 सकल मुनिनि नृप सङ्ग सुनी मैंने सुखदाई ॥
 श्रीगुरुमुखतें जो सुनी, कही यथामति सो सकल ।
 कलि कल्मष नाशन निमित्त, अनल सरिस यह अति बिमल ॥

प्रतिदिन समय निकारि भागवतचरित सुनिगे ।
 सुनिकें सब नरनारि अवसि चित विमल करिगे ॥
 हरिवासर व्रत करै प्रेमतें सब पढ़ि जावै ।
 आंयु बढै अघ घटै अन्तमें प्रभु-पद पावै ॥
 पुष्कर, मथुरा, द्वारका, काशी, पुन्य प्रयाग थल ।
 पाठ करैतें भय छुटै, होहि बुद्धि अतिशय विमल ॥

शुद्ध चित्ततें मनुज गाइकें जाइ सुनावै ।
 तिनिके अति अनुकूल पितर, ऋषि सुर है जावै ॥
 सिद्ध, पितर, सुर, भक्त देहिं इच्छित फल ताकूँ ।
 भक्ति, मुक्ति, सब सिद्धि सहजमें मिलिहैं ग्वाकूँ ॥
 पढ़ै भागवतचरितकूँ, ते सब ई फल पाइंगे ।
 द्विज धी, नृप भू, वैश्य धन, शूद्र शुद्ध है जाइंगे ॥

सब ग्रन्थनितें श्रेष्ठ भागवतचरित मनोहर ।
 भक्त भागवत वृत्त कहे पद पदपै सुंदर ॥
 अबतारनिकी कथा चरित भक्तनिको अघहर ।
 भगवन्नाम महात्म्य छोड़ि जामें नहिं दूसर ॥
 जो अच्युत अखिलेश हैं, जिनिके अगनित नाम हैं ।
 तिनिके पद पाथोजमें, पुनि पुनि पुन्य प्रनाम हैं ॥

जीव चराचर रचै प्रकृति अरु विकृति बनावै ।
 आचारज बनि स्वयं साधना सीख सिखावै ॥
 सत्य सनातन धाम भुवनपति अज विश्वम्भर ।
 जिनिकी सत्ता बिना रहै नहिं जंगम थावर ॥
 रचना पालन नासिबौ, जिनिको नित नित काम है ।
 तिनिके पावन पदनिमें, पुनि पुनि पुन्य प्रनाम है ॥

आत्माराम, निरीह निरामय मुनि मम गुरुवर ।
 भेद भावतें रहित ज्ञान निष्ठा जिनि दृढ़तर ॥
 हरि गुन सुनिकें बँधे भागवत चरित सुहाये ।
 निमित्त परीक्षित करे, जगत हित हरि प्रकटाये ॥
 परमहंस अवतंस मुनि, श्रीशुक जिनि को नाम है ।
 तिनिके पावन पदनिमें, पुनि पुनि पुन्य प्रनाम है ।

जिनिकी इस्तुति-करें वरुन, अज, इन्द्र, मरुद्गन ।
 सस्वर गावें जिनहिं वेदविद मुनि योगीजन ॥
 पाई न जिनि को अन्त शारदा, अज, चतुरानन ।
 शेष, सुरेश, महेश, दिनेशहु, देव, असुर गन ॥
 जिनिके अगनित नाम हैं, रूप अनूपम श्याम हैं ।
 तिनिके पदपाथोजमें, पुनि पुनि पुन्य प्रनाम हैं ॥

जब कच्छप बपु धर्यो पीठ धार्यो प्रभु मन्दर ।
 अगनित योजन कूट फिरै ऊपरतें घरघर ॥
 तिनि ऐसो सुख होइ नारि जनु पद सुहरावै ।
 मन्दर ज्यों ज्यों फिरै नाथकूँ निँदिया आवै ॥
 जिनिके श्वास प्रश्वासतैं, अत्र तक उदधि अशान्त अति ।
 तनि पद जे बन्दन करैं, तिनिकी होवै शुद्ध मति ॥

दश अरु आठ पुरान सार सब-शास्त्रनि लीये ।
 कहे भागवत चरित भक्तिके सम्पुट दीये ॥
 शौनक पूछें—सूत ! पुराननि संख्या कितनी ।
 सबकी संख्या कहो, छन्द संख्या है जितनी ॥
 सूत कहें—सब अठारह, सुनीं पिता अरु मुनिनितें ।
 चार लाख हैं छन्द सब, श्रेष्ठ भागवत सबनितें ॥

कथा भागवत लगै भाग्यशालिनिक्कूँ प्यारी ।
 यह पुरान सिर तिलक जगत जीवनि हितकारी ॥
 प्रथम कह्यो श्रीविष्णु ब्रह्मतेँ करुना करिकेँ ।
 पूरन ज्ञान विराग भक्तिक्कूँ प्रतिपद भरिकेँ ॥
 परब्रह्म जाकौ विषय, कह्यो प्रयोजन पावनों ।
 अतिही अनुपम ग्रन्थ है, विषय परम मनभावनों ॥

ब्रह्मसूत्रको अर्थ सार देवनिको अनुपम ।
 दुह्यो उपनिषद् दूध शर्करा तामें शम दम ॥
 एक बार जिनि पियो शास्त्र सब फाँके लागें ।
 छोड़ि अमृत नर मधुर व्यरथ विष पीवे भागें ॥
 ज्यों सरितनिमें गङ्गा हैं, शिव उत्तम वैष्णवनिमें ।
 क्षेत्रनिमें वाराणसी, श्रेष्ठ भागवत सबनिमें ॥

अति ही निरमल चरित भागवत भक्तनिको धन ।
 जामें ज्ञान विशुद्ध भक्ति भगवतको वरनन ॥
 करम, त्याग, वैराग्य यथाथल सबई भाखे ।
 अति समास सब कहे शेष कोई नहिँ राखे ॥
 अवन मनन अरु पाठ नित, करै प्रेमतेँ नारि नर ।
 देहिँ भक्ति अरु मुक्ति तिनि, प्रभु परमेश्वर परावर ॥

हरिने अजतेँ कह्यो प्रथम अज नारद पाहीं ।
 नारदतेँ मुनि व्यास व्यास शुक दियो पढ़ाहीं ॥
 नृपति परीक्षित निकट कह्यो शुक हौँ मुनि लीयौ ।
 जैसो कछु बनि पश्यो ताहि तुम सबक्कूँ दीयौ ॥
 जिनितेँ निकस्यो चरित यह, सो हरि सुखके धाम हैं ।
 मोइ दयो गुरुदेवनेँ, उभय पदनि परनाम हैं ॥

हे देवेश्वर ! दयित ! दयानिधि ! दाता ! दानी ।
 है सेवक प्रभु-दत्त अल्पमति अवगुनखानी ।
 धन, जन, वैभव, राज विषय सुख नाथ न चाहूँ ।
 पदपदुमनिकी भक्ति जनम जनमनिमें पाऊँ ॥
 का कहिकेँ विनती करूँ, अज्ञ अकिञ्चन दीन हूँ ।
 कृपा प्रतीक्षा करि रह्यो, सब विधि साधन हीन हूँ ॥

संकीर्तन जिनि नाम पापके पुञ्ज जरावै ।
 जिनिक्कूँ कर्यो प्रनाम सकल अधशोक नसावै ॥
 जिनिके मधुमय चरित सुधा श्रवणनिमें धोरे ।
 हरे मुरारे नाथ नाम अध कूटनि तोरे ॥
 कलिमें कीर्तनतैं मिलै, सुनि कीर्तन राम जात हैं ।
 चरन शरन तिनि की गहौ, जो प्रभुके पितु मात हैं ॥

दोहा—मात्रा अक्षर हीन पद, यदि अशुद्ध हू कोउ ।
 करेँ क्षमा राधारमन, प्रभु प्रसन्न अब होउ ॥

इति श्रीभागवतचरितके सप्ताहमें सारातिसार सिद्धान्त भगवन्नाम
 साहात्म्य नामक अठारहवाँ अध्याय समाप्त ।

इति सप्ताह
 [पाक्षिक पारायण—पन्द्रहवें दिन का विश्राम]

[मासिक पारायण—तीसवें दिन का विश्राम]

श्रीकृष्णार्पणमस्तु

॥ श्रीहरिः ॥

श्री भागवत चरित

(सप्ताह)

माहात्म्य

छप्पय—सब जगके जो बीज विश्वद्रुम जिननि बनायौ ।
जिननि मोहको जाल सकल भुवननि फैलायौ ॥
ब्रह्मा, विष्णु, महेश बनें करि पालें नासैं ।
त्रिविधि ताप संताप सबनिके सपदि बिनासैं ॥
सत चित आनंद रूप जे, कृष्णचन्द्र जिति नाम है ।
सर्व प्रथम मम इष्ट जे, तिति पदपदुम प्रनाम है ॥

• लौकिक वैदिक करम त्यागि जन्मत बन भागे ।
जिनिकूँ नहिं धन, धरम, काम कछु अच्छे लागे ॥
सुत सुत कहि पितु भगे द्रुमनिमें सुत दरसायौ ।
पितु पितु सब तरु कहें व्यासको मोह नसायौ ॥
तरुन अरुन वर नयन तनु, सुन्दर सुगठित श्याम है ।
गुरुवर श्री अवधूत मुनि, शुक-पदपदुम प्रनाम है ॥

शौनक बोले—सूत ! भागवत चरित सुनायौ ।
 किन्तु न कष्टो महात्म्य चित्त ता हित ललचायौ ॥
 जिओ बहुत दिन सूत ! महातम हमें सुनावें ।
 वस्तु महातम सुनत भक्ति श्रद्धा हिय आवें ॥
 सूत कहें कहैं तक कहूँ, मुनि महात्म्य अति अकथ है ।
 जलनिधि अगम अथाह जिह, तामें तैरत थकत है ॥

प्रभु-प्रसाद यह चरित सन्त भक्तनिकूँ भावै ।
 कलि कराल विष-व्याल भागवत सुनि नसि जावै ॥
 सुधा अमृत रस सकल सरिस जाके कछु नाहीं ।
 जनम करम जगबन्ध सपदि सुनिकें कटि जाहीं ॥
 देवनि शुककूँ सुधा घट, दै बदले चाह्यो चरित ।
 सुरनि अनधिकारी समुक्ति, दयो न है यह जग विदित ॥

जगमें सवई सुलभ खलनिकूँ धन मिलि जावै ।
 पुण्य करत नर ब्रह्मलोक तक हू चलि जावै ॥
 किन्तु भागवतचरित होहि रति दुरलभ अति है ।
 धन्य धन्य ते मनुज कृष्ण चरननि जिनि मति है ॥
 धरम तुला अजने करी, एक ओर साधन सबहिँ ।
 एक ओर भगवतचरित, भयो गरु पलड़ा इतहिँ ॥

जाको सुनि सप्ताह पिघलि हिय अघ बहि जावें ।
 निरमल मन ह्वै जाइ तबहिँ प्रभुजी तहँ आवें ॥
 नारदकूँ सन्ताप भयो सनकादि मिटायौ ।
 कश्यो न कछु उपचार भागवत चरित सुनायौ ॥
 बूढ़े ज्ञान विरागहू, युवक भये सप्ताह सुनि ।
 भक्ति नृत्य करिबे लगी, प्रकट भये अखिलेश पुनि ॥

स्वयं भागवत बने कृष्ण संशय मत लाओ ।
 तजि कुतर्क बकवाद भागवत चरितनि गाओ ॥
 सुनिकें शुभ सप्ताह धुंधकारी अघ छूटे ।
 सात बाँसकी गाँठ फटीं बन्धन सब दूटे ॥
 प्रेतयोनि तजि देव बनि, चढ़ि विमान सुरपुर गयो ।
 सप्ता शुभ गोकर्णने, जगहित करुना करि कह्यो ॥

जामें भाव प्रधान भावहीतें फल पावैं ।
 भावहीन नर सुनहिं न गावैं नहिं ढिँग आवैं ॥
 सुनत सुनत बनि जाइँ भाव संशय मत लाओ ।
 जैसे तैसे बने सुनो अरु सबनि सुनाओ ॥
 बिधि निषेध जामें नहीं, सकल सुनें सब कालमें ।
 नित्य नियमतें जे पढ़े, ते न फँसे जगजालमें ॥

उत्सव पूर्वक करें हर्ष हियमें अति लावैं ।
 मंडप अति रमणीक पुण्य थलमाँहिँ बनावैं ॥
 देहिँ निमन्त्रण सबनि विज्ञ पंडित बुलवावैं ।
 बीना, बेनु, मृदंग, मजीरा बाद्य बजावैं ॥
 कल कंठनितें भक्त मिलि, प्रेम सहित सब गाइँगे ।
 निश्चय प्रभुके प्रेममें, सब विभोर हूँ जाइँगे ॥

का सुख जगकेमाँहिँ बैठिकें आपु बिचारें ।
 सुत, कलत्र अरु मित्र दुखी सब ई करि डारे ॥
 होंहि चित्त अति शान्त नीर नयननि जब छावैं ।
 स्वर गद्गद हूँ जाइँ दृश्य परपंच भुलावैं ॥
 यह समाधि आनंद है, चित हरि चरननिमें फँसे ।
 सुनत भागवत चरित हिय, मनमोहन मूरति बसै ॥

सात दिवस तक महामहोत्सव विशद मनावै ।
 करै सबनि सत्कार कृपनता मन नहिं लावै ॥
 निन्दा इस्तुति त्यागि जगतकी चिन्ता छोड़ै ।
 ब्रह्मचर्य व्रत धारि दुर्गुननिर्ते मुख मौड़ै ॥
 मंडप सुघर सजाके, समाधान सबको करै ।
 आवै भगवत्भक्त सुनि, दौरि सबनिके पग परै ॥

करै अल्प आहार नींद आसन नहिं आवै ।
 निराहार रहि सुनै चाहिं जल, पय, फल खावै ॥
 अथवा व्यंजन विविध भोग श्रीहरिहिं लगावै ।
 भक्तनि संग परसाद प्रेमते प्रतिदिन पावै ॥
 कथाश्रवनकर्ता करै, हरि गुरु भक्तनि अर्चना ।
 कृष्ण कीरतन गुन-मनन, प्रभुपद सुमिरन बन्दना ॥

गायक अरु हरिभक्त बुलावै गाम गामते ।
 पूजन प्रभुको करै प्रथम दिन धूमधामते ॥
 ता दिन करि अधिवास महात्तम सुनि सुख पावै ।
 यदि बनि सकै अखण्ड कृष्णकीर्तन करवावै ॥
 दूसर दिन सप्ताहकूँ, पूजन करि विधिवत सुनै ।
 सुनै कथा जो दिवसमें, पुनि ताकूँ निशिमैं गुनै ॥

नित्य करमते निबटि प्रात मिलि सब संग गावै ।
 करि भोजन पुनि सुनै, शेष यदि कछु रहि जावै ॥
 ताकूँ निशिमैं सुनै कीरतन सम्पुट दैके ।
 मुक्तकण्ठते गाइ कृष्ण नामनिकूँ लैके ॥
 सात दिवसमें सात थल, सुनै फेरि पूरन करै ।
 पुनि पूजन अरचन हवन, करै जाहिते मन भरै ॥

यदि न करै सप्ताह करै पाक्षिक पारायन ।
 पन्द्रह दिनमें होहि सरलतातें सब गायन ॥
 यदि मासिक मिलि करै कीरतन अधिक बढ़ावै ।
 अथवा सम्पुट नाम मंत्रको संग लगावै ॥
 ऐसे उत्सव जे करें, ते जग यश सुख पाइंगे ।
 जगभोगनिकी का कथा, स्वयं कृष्ण तह आइंगे ॥
 विमल भागवतचरित स्वयं श्री हरिने गायौ ।
 शुद्ध सनातन ज्ञान मनुजने नहीं बनायौ ॥
 मुनिवर ! सोचें आपु मनुजका चरित बनावें ।
 यह समाधिको चरित चलित चित कैसे ध्यावें ॥
 हरि, अज, नारद, व्यास, शुक, क्रम क्रमतें विस्तृत बन्यो ।
 लिखवायौ प्रभु-दत्ततैं, भाषामें मैंने मन्यों ॥
 नैमिषके मुनि धन्य धन्य हौं हूँ बड़भागी ।
 धन्य भयो प्रभुदत्त वृत्ति जाकी इत लागी ॥
 श्रोता वक्ता धन्य धन्य जे पाठ करिङ्गे ।
 धन्य धन्य नर नारि हियेमें जाइ धरिङ्गे ॥
 ग्रन्थ प्रचार प्रसारमें देहिं योग ते धन्य हैं ।
 नहीं कलयुगी जीव ते, प्रभुके भक्त अनन्य हैं ॥
 विक्रम सम्बत सात सहस्र द्वै अति ही पावन ।
 मार्गशीर्ष शुभमास अष्टमी कृष्णा भावन ॥
 तीरथराज प्रयाग गंग उत्तर तट सुखकर ।
 अतिष्ठानपुरमाँहिं भागवत चरिय मनोहर ॥
 ग्रन्थ भयो पूरन सकल, अब न मोइ है मृत्युभय ।
 बोलो मिलिकें भक्त सब, सिरी कृष्णचन्द्रकी जय ॥
 इति श्रीभागवतचरित माहात्म्य समाप्त !

श्रीकृष्णार्पणमस्तु

❀ सुमुख भवन के पुस्तकालय ❀

श्रीभागवत चरितकी आरती

भागवत चरित अमृत पीजे ।

आरती सब मिलिके कीजे ॥

दयाके सागर हैं यदु चन्द, गहे अजने तिनिपद अरबिन्द ।

कमल-मुख करै सुधाके बिन्दु, तिनहिँ पीपीके नित जीजे ॥१॥ आरती०

नामको रसना करिकें गान, करै मन मोहन मूरति ध्यान ।

नयन निरखें सबथल भगवान, कृष्णको कीर्तन नित कीजे ॥२॥ आरती०

यादि जब चरितनिकी आवै, पुलक तनु सबरो ह्वै जावै ।

प्रेम सब अंगनिमें छावै, भावमें भक्त रहें भीजे ॥३॥ आरती०

हियेपै चढ़े भक्तिको रंग, मिलै भक्तनिको नित सतसंग ।

काज सबकरें कृष्णहितअंग, व्यरथ नरजीवननहिँ छीजे ॥४॥ आरती०

प्रेम अरु लयतें सब गाओ, पार भव सागर ह्वै जाओ ।

पदुम-पद-रज प्रमुकी पाओ, आरती भक्त वृन्द लीजे ॥५॥ आरती०

हिन्दू धर्म और हिन्दी-साहित्य में युगान्तकारी

धार्मिक प्रकाशन

“भागवती कथा”

देशके विभिन्न विद्वानों नेताओं और पत्रकारों द्वारा,

भूरि-भूरि प्रशंसित । इसके लेखक हैं

श्रीप्रभुदत्तजी ब्रह्मचारी

इसे पढ़कर आप

१—श्रीमद्भागवत तथा अन्यान्य पुराणों की कथाओं का रहस्य सरलता सरसता और घरेलू ढंग से समझेंगे ।

२—दैनिक जीवन को सात्विक, धार्मिक और राष्ट्रीय जीवन की सार्थकता में परिणत करेंगे ।

३—व्यवहारिक या गार्हस्थ्य जीवन को जीने के लिये नहीं, जीवनके लिये इसके पठनसे उसे उच्च और धार्मिक बनायेंगे ।

४—श्रेय और प्रेय, योग और भोग एक साथ सम्पादन करने—प्राप्त करने—की शिक्षा घर बैठे प्राप्त करेंगे ।

५—जननी जन्मभूमि की महत्ता को समझकर स्वधर्म स्ववर्ण, स्ववेश, तथा स्वदेश के प्रति निष्ठावान् बनेंगे ।

इस अभूत-पूर्व ग्रन्थ में १०८ भाग होंगे ।

प्रति मास एक भाग प्रकाशित करने की योजना चल रही है । अब तक ६८ भाग छप चुके हैं । प्रायः २५० पृष्ठों के प्रत्येक सचित्र भाग की दक्षिणा केवल १।) है ।

१५।।३) अग्रिम वार्षिक प्रदान करने पर १२ भाग बिना डाकव्यय के आपके घर रजिष्ट्री से पहुँच जायेंगे ।

प्राप्तिस्थान

संकीर्तन भवन, भूसी (प्रयाग)

॥ श्रीहरिः ॥

श्री प्रभुदत्तजी ब्रह्मचारी द्वारा लिखित अन्य पुस्तकें
जो हमारे यहाँ मिलती हैं ।

- १—भागवती कथा—(१०८ खंडोंमें), ६८ खंड छप चुके हैं । प्रति
खण्ड का मूल्य १।), बारह आना ढाकन्यय पृथक् ।
- २—श्री भागवत चरित—लगभग ६०० पृष्ठकी, सजिन्द मू० ५।)
- ३—बदरीनाथ दर्शन—बदरी यात्रा पर खोजपूर्ण महाग्रन्थ मू० ४)
- ४—महात्मा कर्ण—शिष्याप्रद रोचक जीवन, पृ० सं० ३५६, मू० २॥।)
- ५—मतवाली मीरा—भक्ति का सजीव साकार स्वरूप, मू० २)
- ६—नाम संकीर्तन महिमा—भगवन्नाम संकीर्तन के सम्बन्ध में उठने
वाली तकों का युक्तियुक्तपूर्ण विवेचन । मू० ॥।)
- ७—श्रीशुक—श्रीशुकदेवजी के जीवन की झोंकी (नाटक) मू० ॥।)
- ८—भागवती कथा की बानगी—(आरंभ के तथा अन्य खंडोंके कुछ
पृष्ठों की बानगी) पृष्ठ संख्या १००, मू० १।)
- ९—शोक शान्ति—शोक की शान्ति करने वाला रोचक पत्र मू० १।)
- १०—मेरे महामना मालवीयजी—उनके सुखद संस्मरण पृष्ठ १३०
मू० १।)
- ११—भारतीय संस्कृति और शुद्धि—क्या अहिन्दु हिन्दु बन सकते
हैं ? इसका शास्त्रीय विवेचन पृष्ठ सं० ७६ मू० १।)
- १२—प्रयाग माहात्म्य—मू० १।)
- १३—वृन्दावन माहात्म्य—मू० १।)
- १४—राघवेन्दु चरित—भागवतचरितसे ही पृथक् छापागया है मू० १।)
- १५—प्रभुपूजा पद्धति—पूजा करने की सरल शास्त्रीय विधि मू० २।)
- १६—श्री चैतन्य चरितावली—पाँच खंडोंमें प्रथम खंड का मू० १।)
- १७—भागवत चरित की बानगी—भागवत चरित के कुछ अध्यायों
की बानगी मू० १।)
- १८—गोविन्द दामोदर शरणागत स्तोत्र(छप्पयछंदों में) मू० २॥।)
- १९—गोपीगीत—(मूल तथा हिन्दी पद्य सहित) अमूल्य ।

पता—संकीर्तन भवन, प्रतिष्ठानपुर (भूसी) प्रयाग

1881

मुमुक्षु भवन वेद वेदांग विद्यालय
ग्रन्थालय

आगत क्रमांक... १४५१ ...

दिनांक.....

ब्रह्मचारीजीकी हमारे यहाँ मिलनेवाली पुस्तकें

- (१) भागवती कथा, ६८ खण्ड छप चुके हैं, प्रतिखण्ड का मूल्य १।)
- (२) चैतन्य-चरितावली (खण्ड १) मूल्य १)
- (३) श्रीभागवत चरित मूल्य १।)
- (४) बदरीनाथ दर्शन मूल्य ४)
- (५) महात्मा-कर्ण मूल्य २॥)
- (६) मतवारी मीरा मूल्य २)
- (७) नाम संकीर्तन महिमा मूल्य ॥)
- (८) श्रीशुक (नाटक) मूल्य ॥)
- (९) भागवती कथाकी बानगी " १-)
- (१०) शोक-शान्ति " १-)
- (११) भारतीय संस्कृति और शुद्धि मूल्य १-)
- (१२) मेरे महामना मालवीय और जनका अन्तिम सन्देश मूल्य १-)
- (१३) प्रयाग माहात्म्य, पृ० ६४ " १-)
- (१४) वृन्दावन माहात्म्य " १-)
- (१५) राघवेन्दु चरित पृ० ६४ " १-)
- (१६) भागवत चरितकी बानगी मूल्य ॥)
- (१७) प्रभुपूजा पद्धति मूल्य २-)
- (१८) गोविन्द दामोदर स्तोत्र मू० २-॥)
- (१९) गोपीगीत अमूल्य
- पता—संकीर्तन-भवन, भूसी (प्रयाग)

